


شهادات ١٢٢ من صناعاتها ومعاصريها

طارق حبيب



مركز الأهرام
للترجمة والنشر



ملفات ثورة يوليو

شهادات ١٢٢ من صناعها ومعاصريها

طارق حبيب

الطبعة الأولى

١٤١٨ هـ - ١٩٩٧ م

جميع حقوق الطبع محفوظة

الناشر : مركز الأهرام للترجمة والنشر

مؤسسة الأهرام - شارع الجلاء - القاهرة

تليفون : ٥٧٨٦٠٨٣ - فاكس : ٥٧٨٦٨٣٣

تصميم الغلاف

الفنان

هشام بهجت

المحتويات

الصفحة

٥	□ تقديم : بقلم د . يونان لبيب رزق
٩	□ تمهيد : بقلم طارق حبيب
١١	□ فهرس بالشخصيات التي دار الحوار معها
١٧	□ الملف الأول : ساعة الصفر
٤٧	□ الملف الثاني : وجاء اليوم الحاسم
٦٩	□ الملف الثالث : يسقط الملك فاروق
١٠١	□ الملف الرابع : معالم الطريق
١٤٣	□ الملف الخامس : يعيش نجيب .. يسقط نجيب
١٧٣	□ الملف السادس : وسطع نجم عبد الناصر
١٩٣	□ الملف السابع : وانتصر عبد الناصر
٢٠٥	□ الملف الثامن : تحيا القومية العربية
٢٢٧	□ الملف التاسع : ويسقط الاستعمار
٢٥٣	□ الملف العاشر : التحول الاشتراكي
٣١٥	□ الملف الحادى عشر : النكسة
٣٧٣	□ الملف الثانى عشر : المشير والمصير
٤٢١	□ الملف الثالث عشر : سنوات الاستنزاف
٤٧٥	□ الملف الرابع عشر : مات ناصر .. عاش السادات

تقديم

بقلم : د. يونان لبيب رزق

عمل غير مأثوف ذلك الذى يقع بين دفتى هذا الكتاب ، وهو العمل الذى عكف الأستاذ طارق حبيب على إنجازه ، و استغرق منه خمس سنوات ، على حد قوله ، وأنا أصدقُه !
ومع أن العمل استعراض لتاريخ مصر منذ أربعينات هذا القرن .. خلال السنوات القليلة السابقة على قيام ثورة ١٩٥٢ ، وحتى رحيل عبد الناصر وتولى السادات مقاليد الحكم عام ١٩٧٠ ، إلا أنه لم يكن كتابا للتاريخ بالمعنى التقليدى .

الفترة التى تناولها هذا الكتاب تتعامل أساسا مع ثورة يوليو ، وهو ما دعا المؤلف إلى أن يختار لها عنوانا جذابا .. « ملفات ثورة يوليو .. شهادات ١٢٢ من صناعاتها ومعاصريها » ..

ولأول وهلة يبدو وكأنه قد قصد من وراء هذا الاختيار شد القراء ، وإن كان الاطلاع على العمل يؤكد أنه يحمل من اسمه نصيبا كبيرا ، فقد استطاع صاحب العمل ، من خلال حوارات غير تقليدية ، أن يستخرج من سرائر من حاورهم كثيرا مما يمكن أن يرقى إلى مرتبة الأسرار .

نعم نعرف نحن المشتغلين بالكتابة التاريخية عندما نتعامل مع شهادات المعاصرين فى الدراسات التقليدية - فيما اعتمده صاحب هذا العمل فى دراسته ، وبشكل كامل - أن هذا التعامل يتم بشروط معينة :

١ - أن تشكل هذه الشهادات جانبا من الدراسة ، وهو فى الغالب الجانب الذى لا تسعف الباحث فيه المادة العلمية المتاحة ، سواء كانت على شكل وثائق أو مذكرات شخصية أو مراجع ، والشهادة هنا يكون لها وظيفة محددة .. سد ثغرات يستشعرها الباحث ، ويرى معها ضرورة ملتها وإلا شاب الدراسة قدر من الخلل .

٢ - أن تخضع الأسئلة التى توجه لصاحب الشهادة لدراسة دقيقة تتناول الدور الذى قام به فى العمل العام موضوع الدراسة ، وما عرف من هذا الدور ، وأهم من ذلك ما لم يعرف ، ويكون الباحث موقفا كلما نجح فى أن يستخرج من صاحب الشهادة ما نجح فى إخفائه

بامتداد السنوات السابقة ، ويتم هذا في العادة بإقناعه بخطورة استمرار هذا الإخفاء على الحقيقة التاريخية التي كان واحدا من صناعها .

٣ - مع كل ذلك فإنه على الباحث أن يخضع الشهادة لدراسة نقدية ، يراعى فيها دوافع صاحبها في الإدلاء بما قيل تقديمه من شهادته ، والأسباب التي دفعته إلى أن يسهب في جانب معين من شهادته ويقتضب في جانب آخر ، فضلا عن رغبته في تضخيم الدور الذي قام به والتقليل من أدوار الآخرين ، ويتم كل ذلك على ضوء دراسة مسبقة لكل مآقده صاحب الشهادة .

٤ - فضلا عن كل ذلك فإن على الدارس أن يفترض أن صاحب الشهادة سوف يغلب نوازه الشخصية ويفتقر إلى الموضوعية والحياد ، الأمر الذي يتطلب مقارنة شهادته بشهادات الآخرين الذين شاركوا في نفس الحدث للخروج بالحقيقة أو أقرب صورة لها .

كل تلك القيود التي يلتزم بها الباحثون الأكاديميون في استخراج التاريخ من أفواه صانعيه تحرر منها الأستاذ طارق حبيب في هذا العمل ، وفاجأنا بشكل جديد من التأريخ لفترة معينة معتمدة على شهادات صانعيها أو معاصريها ..

وهذه الدراسة غير التقليدية غير مطلوب منها أن تخضع للقيود الأكاديمية الصارمة .. وإلا فقدت كثيرا من جاذبيتها .. وهي قد أخذت على كل حال ببعض هذه الشروط مثل المقارنة بين الشهادات ، والدراسة قبل الحوارات .

صاحب هذا العمل لم يعد إلى الوثائق أو المراجع أو حتى المذكرات الشخصية ، ولكنه اتجه رأسا إلى رسم صورة للأحداث التاريخية من خلال شهادات صانعيها أو الشهود على أحداثها ، وبشكل شديد الابتكار ، فقد نجح في المزج بين الشهادات على نحو غير مسبوق ، وهو المزج الذي أفرز صورة تعجز كل شهادة على حدة عن تقديمها ، وهو بذلك أدخل بعض تقنيات الأفلام السينمائية والتليفزيونية في الكتابة التاريخية .. تقنية القطع للنقطة ما لتدخل عليها نقطة أخرى تشكل معها صورة مختلفة ، ولكنها أكثر إقناعا .

ساعد على الأخذ بهذا التوجه ، هذا الكم الهائل من أصحاب الشهادات الذين وصلوا إلى ١٢٢ شخصية . والمشتغلون بالكتابة التاريخية يعلمون قدر الجهد الذي يبذل لاستخراج شهادة شخصية واحدة ناهيك عن أن يكون العدد بهذه الكثافة .

لم يقتصر اللجوء إلى هؤلاء على الكم بل امتد إلى النوع ، فهو لم يترك واحدا من أعضاء مجلس قيادة الثورة الأحياء إلا وكان وراءه .. البغدادي ، كمال الدين حسين ، خالد محيي الدين ، حسين الشافعي ، ومن ترك دنيانا منهم كان بالمرصاد لأبنائهم .. هدى عبد الناصر ، جمال السادات ، فضلا عن الضباط الأحرار الذين تعقب الأحياء منهم على نحو غير مسبوق ، فضلا عن الملكة السابقة ناريمان صادق وعدد من ساسة ما قبل الثورة وما بعدها ، زد على ذلك عددا من الشخصيات العامة والمؤرخين .

ساعد ذلك صاحب هذا العمل على أن يقدم صورا للشخصيات والأحداث التاريخية من زواياها المتعددة .. مثلا دور السادات في اغتيال أمين عثمان ، العلاقة بين الضباط الأحرار والإخوان المسلمين ، وعما إذا كانوا جميعا قد ارتبطوا بصلة أو بأخرى بهذه الجماعة ، وعالج أيضا علاقة بعض هؤلاء بالشبوعيين ، خاصة الحركة الديمقراطية للتححر الوطنى (حدثو) ، وهى قضايا لا تزال موضع تساؤلات .

وقد اقترب العمل من خلال ذلك المنهج من حقول ألغام تاريخية ، الأمر الذى يبدو واضحا خصوصا فى قضية الأسلحة الفاسدة ، فلأول مرة يثير كاتب خارج أسوار الجامعة قضية الأسلحة الفاسدة التى كانت من أهم أسباب قيام ثورة يوليو ، وي طرح الرأيين .. أنها كانت قضية حقيقية أو أنها لم تكن قضية بالمرة (!) ، وهو فى ذلك ساق شهادات أصحاب الرأيين .. المؤيد والمعارض ، وبشكل شديد الجاذبية .

باختصار فإن هذا العمل البانورامى الذى امتلأ بالنبض بحكم اعتماده على شهادات الشخصيات التاريخية يمثل نهجا جديدا من الكتابة التاريخية ، فلا هو يلتزم بقواعد الكتابة العلمية الصارمة أحيانا ، والمتجهم فى أغلب الأحيان ، ولا هو يعمد إلى التبسيط المخل الذى يحول التاريخ إلى رواية يكتنفها من الخيال أكثر مما يحوطها من الحقيقة ، مما يفرد لها مكانة فريدة ومذاقا خاصا فى تسجيل هذه الحقبة الهامة من التاريخ المصرى المعاصر .

تقديم

يضم هذا الكتاب حوارات مع ١٢٢ من صناع ثورة يوليو ومعاصريها ، بعضهم رحل عن دنيانا بعد التسجيل ، والبعض الآخر مازال بيننا . وقد استغرق إجراء هذه الحوارات ٥ سنوات كاملة ، وتضمنت شهادة أصحابها عن مقدمات وقائع وتطورات ثورة يوليو التي كشفوا خلالها عن كثير من الخبايا والخفايا التي لم تكن معروفة من قبل ، والتي كانوا من مدبريها أو من شهود العيان المباشرين عليها . ولم يكن القصد من ذلك هو التأريخ أو القيام بدور المؤرخ ، وإنما كان تسجيل مختلف الروايات من أفواه أصحابها قبل أن يمضوا ويمضى فتضيع الحقيقة وتتوه الوقائع وتتشوه بمرور الزمن . وتمتد الفترة التي تغطيها الشهادات من نهاية الحرب العالمية الثانية ، وحرب فلسطين ، وقيام ثورة يوليو وخلع الملك فاروق ، وتولى عبد الناصر كل السلطات ، والعدوان الثلاثي وحرب يونيو ١٩٦٧ ، وحتى رحيل عبد الناصر وتولى السادات مقاليد الحكم .

وكل ما يرد في هذا الكتاب هو ما جاء على لسان المشاركين في الحوارات المسجلة ، بنص عباراتهم دون أى تدخل ، ويمثل رأيهم ورويتهم كاملين . وقد جمعت فيه آراءهم وأقوالهم مقسمة حسب موضوعات محددة ، بما يجعل اتفاق شهاداتهم أو اختلافها ، بل وتضاربها أحيانا ، مادة ثرية يمكن للقارئ والباحث الاعتماد عليها واستخلاص حقيقة ما حدث وتكوين فكرته الخاصة عن الموضوع من خلالها . وهو ما أرجو أن أكون قد وفقت فيه .

وفى البداية والنهاية ﴿ إن الله لا يضيع أجر من أحسن عملا ﴾ ..
صدق الله العظيم

طارق حبيب

فهرس بالشخصيات التى دار الحوار معها

من الضباط الأحرار ، وضابط بالمخابرات العامة ومحافظ سابق	إبراهيم بغدادى
وزير سابق ورئيس حزب العمل	إبراهيم شكرى
مهندس ، رئيس سابق لاتحاد طلبة هندسة القاهرة	إبراهيم مكادى
كاتب صحفى وصاحب جريدة « المصرى »	أحمد أبو الفتوح
من الصف الثانى لرجال الثورة ، ومن حرس المشير عامر	أحمد أبو تار
نقيب المحامين وعضو التنظيم الطليعى سابقاً	أحمد الخواجة
من الضباط الأحرار	أحمد المصرى
من الضباط الأحرار وكاتب صحفى	أحمد حمروش
مدير الأمن الخاص بالسادات	أحمد سرحان
أول مدير لإذاعة صوت العرب	أحمد سعيد
من الضباط الأحرار ، ومن مؤسسى هيئة التحرير ووزير سابق	أحمد طعيمة
من الضباط الأحرار ورئيس سابق للمخابرات العامة	أحمد كامل
من الضباط الأحرار وفتان معروف	أحمد مظهر
سكرتير عسكرى للرئيس نجيب ومحافظ سابق	إسماعيل فريد
سفير سابق لمصر لدى الولايات المتحدة الأمريكية	أشرف غربال
من الضباط الأحرار ، ومدير مكتب عيد الناصر ووزير سابق	أمين شاكر
من الضباط الأحرار ، ورئيس المخابرات العامة ووزير سابق	أمين هويدى
كاتب صحفى معروف	أنيس منصور
بابا الإسكندرية وبطريق الكرازة المرقسية	البابا شنودة
فنانة معروفة والزوجة الثانية للمشير عامر	برلنتى عبد الحميد
سفير ، ومتحدث رسمى ، ومنتوب مصر لدى الجامعة العربية سابقاً	تحسين بشير
فنانة معروفة	تحية كارويكا
من الضباط الأحرار ووزير سابق	توفيق عبده إسماعيل
أديب معروف	ثروت أباطة
من الضباط الأحرار ووزير سابق	ثروت عكاشة
قائد الباخرة « المحروسة »	جلال علوية

جمال اللبشي	من الضباط الأحرار ومنتج سينمائي
جمال حماد	من الضباط الأحرار وكاتب ومؤرخ
جمال السادات	مهندس ونجل الرئيس السادات
جمال عامر	مهندس ونجل المشير عامر
جمال منصور	عضو أول تنظيم ثوري في الجيش ، وصاحب اسم « الضباط الأحرار » ، وسفير سابق
جيهان السادات	حرم الرئيس أنور السادات
حافظ إسماعيل	مدير مكتب المشير عامر ، ورئيس سابق للمخابرات العامة ، ومستشار سابق للرئيس السادات لشئون الأمن القومي
حسن اللمنهووي	من الضباط الأحرار ومستشار بالجامعة العربية سابقاً
حسن المراغي	سكرتير مجلس النواب قبل الثورة
حسن رجب	ضابط ومهندس وسفير سابق
حسن عباس زكي	نائب سابق لرئيس الوزراء
حسن فهمي عبد المجيد	من الضباط الأحرار وسفير سابق
حسنى نبيه الدسوقي	لواء أ . ح . من ضباط دفعة ١٩٤٨
حسين الأتربي	مستشار سابق ، وقريب كل من حيدر باشا وزير الحربية وإسماعيل شيرين نسيب الملك
حسين الشافعي	من الضباط الأحرار ، وعضو مجلس قيادة الثورة ونائب سابق لرئيس الجمهورية في عهدي عبد الناصر والسادات
حسين بيكار	فنان تشكيلي معروف
حلمي سلام	كاتب صحفي ، رئيس مجلس إدارة دار التحرير ورئيس تحرير الجمهورية سابقاً
حلمي مراد	أستاذ قانون ووزير سابق
خالد محبى الدين	من مؤسسى حركة الضباط الأحرار ، وعضو مجلس قيادة الثورة ورئيس حزب التجمع
دينار عبد الحميد	ملكة الأردن سابقاً
رشاد مهنا	ضابط ووزير وأحد ثلاثة أوصياء على عرش مصر بعد الثورة
رياض سامى	السكرتير الصحفي للرئيس نجيب وسفير سابق
زهدي العدوي	رسام كاريكاتير معروف
سامى شرف	سكرتير الرئيس عبد الناصر للمعلومات
سعد الشاذلى	رئيس أركان القوات المسلحة في حرب أكتوبر
سعد عبد النور	سكرتير حزب الوفد

من الضباط الأحرار ومدير مكتب زكريا محبي الدين	سعيد حليم
سفير فلسطين السابق في القاهرة وأمين عام مساعد الجامعة العربية	سعيد كمال
رئيس جامعة أسيوط ووزير سابق	سليمان حزين
لعب دوراً أساسياً في إصدار قانون الإصلاح الزراعي ، وزير ورئيس مجلس الشعب سابقاً	سيد مرعي
طبيب بمستشفى القوات المسلحة في ١٩٦٧	شريف عبد الفتاح
من الضباط الأحرار ووزير حربية سابق	شمس بدران
مخرج سينمائي معروف	صلاح أبو سيف
ضابط شرطة ومحافظ وسفير سابق	صلاح الدسوقي
ضابط بالحرس الملكي وسفير سابق	صلاح شعراوي
مستشار ونائب رئيس مجلس الدولة	طارق البشرى
ضابط شرطة ، كشف شرائط التسجيل في مايو ١٩٧١	طه زكي
كاتب وأحد أقارب الملك فاروق	عادل ثابت
رئيس سابق لوزراء العراق	عارف عبد الرزاق
من الضباط الأحرار ووزير سابق	عباس رضوان
ضابط مهندس من قادة هيئة قناة السويس سابقاً	عبد الحميد أبو بكر
رئيس سابق لوزراء ليبيا	عبد الحميد البكوش
نائب سابق لرئيس جمهورية اليمن	عبد الرحمن البيضاني
رئيس وزراء سابق	عبد العزيز حجازي
مؤرخ وكاتب معروف	عبد العظيم رمضان
وزير الإعلام ومؤسس التلفزيون ونائب رئيس الوزراء سابقاً	عبد القادر حاتم
من مؤسسي حركة الضباط الأحرار ، وعضو مجلس قيادة الثورة ونائب سابق لرئيس الجمهورية	عبد اللطيف بغدادى
من الضباط الأحرار ، ومدير مكتب عبد الناصر وأمين سابق للاتحاد الاشتراكي بالقاهرة	عبد المجيد فريد
من الضباط الأحرار وأمين عام سابق للاتحاد الاشتراكي	عبد المحسن أبو النور
ضابط بالحرس الملكي ، فريق أول كان قائداً للحيش المصري في اليمن وقائداً لجبهة سيناء في ١٩٦٧	عبد المحسن كامل مرتجى
عضو مجلس قيادة الثورة	عبد المنعم أمين
إعلامى سورى معروف	عبد الهادي البكار
مؤسس شركة «المقاولون العرب» التي قامت بدور أساسى في بناء السد العالي ، ونائب رئيس وزراء سابق	عثمان أحمد عثمان

عزیز صدقی	رئيس وزراء سابق
على خليل	نائب سابق لرئيس الإذاعة
على محمد دياب	رئيس معهد السموم والمخدرات بالمركز القومي للبحوث
فتح الله رفعت	من الضباط الأحرار ورئيس بنك الائتمان والتصنيف الزراعى سابقا
فريد عبد الخالق	من أقطاب الإخوان المسلمين ووكيل وزارة سابق
فكرى مكرم عبيد	نائب سابق لرئيس الوزراء
فهمى عمر	رئيس سابق للإذاعة
كمال الدين حسين	من مؤسسى حركة الضباط الأحرار وعضو مجلس قيادة الثورة ، ووزير التربية والتعليم ونائب رئيس الجمهورية سابقا
كمال الطويل	موسيقار معروف
لطفي واكد	من الضباط الأحرار ونائب رئيس حزب التجمع
مأمون حسن الهضيبي	مستشار سابق ونائب المرشد العام لجماعة الإخوان المسلمين
ماجد فرج	ناشر له عدة كتب ومجلدات عن العهد الملكى
مبارك رفاعى	من الضباط الأحرار ومحافظ سابق
محسن عبد الخالق	من الضباط الأحرار وأستاذ اقتصاد وسفير سابق
محسن محمد	كاتب صحفى معروف
محمد أبو الفضل الجيزاوى	من الضباط الأحرار وعضو مجلس الشعب
محمد أحمد	السكرتير الخاص للرئيس عبد الناصر
محمد الدكرورى	أمين عام سابق للاتحاد الاشتراكى
محمد عبد الغنى الجمسى	رئيس هيئة العمليات فى حرب أكتوبر ثم رئيس أركان حرب القوات المسلحة ، ونائب رئيس الوزراء ووزير الحربية سابقاً
محمد على عبد الله	ضابط سابق ، ابن شقيقة الرئيس نجيب
محمد فائق	من الضباط الأحرار ووزير إعلام سابق
محمد فوزى	رئيس الأركان ثم قائد عام القوات المسلحة سابقا
محمد متولى الشعراوى	داعية إسلامى معروف
محمد نسيم	ضابط ومن قادة المخابرات سابقاً
محمود جامع	طبيب وأستاذ بكلية الطب بجامعة طنطا
محمود الجوهري	ضابط عمل بالمكتب الفنى لمجلس قيادة الثورة ، وكان مسئولا عن الأموال المصادرة
محمود فهم	الحارس الخاص للرئيس عبد الناصر
مذكور أبو العز	محافظ سابق ، وقائد القوات الجوية عقب نكسة يونيو

مدير مكتب رئيس الجمهورية للشئون السياسية فى الخمسينيات ، وسفير
وزير خارجية سابق
كاتب صحفى معروف ومؤسس أخبار اليوم
رئيس وزراء سابق
من الضباط الأحرار ورئيس حزب الأحرار
كاتب صحفى معروف
مستشار ورئيس نادى القضاة
مستشار ورئيس محكمة الاستئناف سابقا
أستاذ بكلية الهندسة وعضو مجلس الشعب السابق
ملكة مصر والسودان سابقا
أديب عالمى مرموق فاز بجائزة نوبل
وزير سابق ورئيس المجلس التنفيذى إبان الوحدة
أستاذة جامعية وكريمة الرئيس عبد الناصر
من الضباط الأحرار ومحافظ سابق
رئيس محكمة النقض سابقا
أستاذ التاريخ الحديث وكاتب بالأهرام

مراد غالب
مصطفى أمين
مصطفى خليل
مصطفى كامل مراد
مصطفى محمود
مقبل شاكر
ممدوح نجيب
ميلاد حنا
ناريمان صادق
نجيب محفوظ
نور الدين طراف
هدى عبد الناصر
وجيه أباطة
يحيى الرفاعى
يونس لبيب رزق

الملف الأول

ساعة الصفر

- انتهت الحرب العالمية الثانية بهزيمة هتلر والنازية ..
- وكانت مصر تحت سيطرة الاحتلال الإنجليزي .. ولكنها كانت شامخة رغم كل الضغوط والأحداث ..
- وجيش مصر هو أقدم الجيوش الحديثة فى العالم العربى .. من أيام محمد على الكبير .. ولم يكن هذا الجيش بعيداً يوماً عن النبض الوطنى العام ..
- عرفت السنوات الأولى من عهد الملك فاروق وبعد توقيع معاهدة سنة ٣٦ تزايد تخرج الشباب من الطبقة المتوسطة من الكلية الحربية .. واستمرار اشتراكه فى العمل الوطنى بشكل سرى ..
- ويقول حسين الشافعى : « أيام الكلية من سنة ٤٥ .. كنا نلتقى أنا وجمال عبد الناصر وعبد الحكيم عامر وثرثوث عكاشة فى بيته فى شارع فاطمة النبوية فى العباسية .. وكنا فى هذا الوقت بعد انتهاء الحرب نتلمس الطريق لدرجة كنا نطرق كل الأبواب » .
- يقول أحمد المصرى : « الجيش كان فيه أكثر من مجموعة تتحرك وأكثر من مجموعة بتعمل .. كان فيه فى المدفعية محسن عبد الخالق بمجموعته وكان فى الفرسان جمال منصور ومجموعته .. كان فيه ضباط آخرين هنا وهناك .. اجتماعات فى بيوت الضباط يناقشوا فيها الأحوال السياسية .. إحنا كلنا كنا أبناء الطبقة المتوسطة فى مصر وبالتالي بتهمنا قوى الأحداث الجارية فيها » .
- وشارك الضباط قبل الكلية الحربية فى مختلف الأحزاب .. مثل « مصر الفتاة » .. التى كانت معادية للإنجليز ومتفقة مع الألمان .. وكونوا خلايا سرية متعددة ..
- يقول د . نور الدين طراف : « كنت من ضمن مؤسسى حزب مصر الفتاة .. أنا كنت حزبى ووطنى بطبيعته وأنا طفل صغير يعنى ميال للحزب الوطنى بتاع مصطفى كامل ومحمد فريد ..

ولما أنشئت « مصر الفتاة » كان من ضمن المؤسسين لها الأستاذ فتحى رضوان وأنا وإبراهيم شكرى ومصطفى الوكيل وعدد من الشباب الوطنيين فى ذلك الوقت .. وكنا نعارض الملك بواسطة جريدة مصر الفتاة » .

* ويضيف المهندس إبراهيم شكرى : « لا يمكن إننى أغفل أن جريدة كانت تسمى بالاشتراكية وأخذت رخصتين رخصة منهم كانت باسم « مصر الفتاة » ورخصة أخرى باسم « الشعب الجديد » .. وكانتا تصدران أسبوعيا .. وكانتا فى الواقع المدفعية الثقيلة التى مهدت المناخ العام لقبول تغيير كبير جذرى بالنسبة للنظام كله » .

* ويؤكد وجيه أباطة : « شوف يا سيدى إحنا أول مجموعة اتعملت فى القوات المسلحة .. كانت مجموعة الطيران وكان منها عبد اللطيف بغدادى وأحمد أبو على الذى أخذ طائرة وراح وصل الخرائط للجيش اللى المغروض إن الألمان يضربوها أيام الحرب العالمية .. اللى قيل بعد كده ولا أعرف إنقال إزاي .. إنه راح مندوباً عن مصر علشان يعمل معاهدة مع روميل .. طبعاً الكلام ده كله مش مضبوط .. نرجع لىوليو ٥٢ .. وبعدين حسن عزت جاب لنا أنور السادات ولو إحنا قوات الطيران بس .. كان فيه مجموعات أخرى فى الأسلحة الثانية بنسميها الخلايا .. بس هى ما كانتش خلايا فى وقتها .. إحنا كنا أول خلية اتعملت فى الطيران وكان فيه خلايا المدفعية والفرسان وغيره وغيره .. وبعدين بدأنا نخبر بالطريقة المتفقين عليها .. أنا أجند ٤ معايا وبغدادى ٤ معاه بهذا الشكل .. وحسن إبراهيم دخل فى الدفعة الثانية معايا أنا » .

* ويضيف خالد محبى الدين : « هو إحنا كل واحد منّا كان له رجل فى حنة .. كان الوفديون قليلين من اللى لهم علاقات مع من فى الحكم .. إنما الأحزاب الثانية زى « مصر الفتاة » كلنا كان لنا علاقة بها .. والإخوان المسلمين .. فكان لنا علاقة بالفوى دى كلها .. وفيه ناس كانت لهم علاقات بالحزب الوطنى لأن الحزب الوطنى حزب قديم له اتجاه فى الحركة القومية .. المهم هو رفض المفاوضات إلا بعد الجلاء وده بيمثل الوطنية المتطرفة والضباط كان عندهم الجانب الوطنى المتطرف ده .. وكان جمال فى الحزب الوطنى » .

● وكان لاتساع قاعدة الشباب الجامعيين قبل حرب فلسطين آثاره الظاهرة على الحركة الشعبية المصرية .. ووقعت أحداث كبيرة فى الشارع المصرى ضد الإنجليز بدأت من حرم الجامعة .. واستخدم الجيش لضرب الحركة الوطنية مما أثار الضباط والشعب ..

* ويقول أحمد أبو الفتوح : « خرجت مظاهرات ضخمة من الطلبة والعمال تجوب شوارع العاصمة تهتف ضد الاستعمار » .

* ويضيف محمد أبو الفضل الجيزاوى فيقول : « ثورة ٥٢ لم تقم من فراغ .. إنما كان فيه حركات سياسية سابقة .. وبعد الحرب العالمية الثانية كل الدول عازمة تستقل فكان فيه عدد كبير من ضباط الجيش يهدفوا إلى هذا الهدف .. فكان فيه أكثر من تنظيم داخل القوات المسلحة » .

- واتسمت فترة ما بين الحربين .. بالكفاح من أجل استقلال مصر من الاحتلال الإنجليزي ..
- يقول كمال الدين حسين : « عموماً إحنا واللى قبلنا واللى بعدينا كنا مشحونين بياه ؟ أنا نشأت إزاي .. نشأت بأفوكك فى أعقاب ثورة ١٩ وكان فيه بقى الكلام الكثير عن الوطنية ومقاومة الإنجليز .. الوالد كان بيحبب لى تاريخ الحركة الوطنية فنقرأ كل اللى مؤلفه عبد الرحمن الرافعى .. والدتى كانت تقعد نتغنى بالأغاني اللى كانت بيقولوها الأمهات فى أيام السلطة لما كانوا بياخدوا عساكرنا ويجندوهم عشان يروحوا ميادين القتال فى فلسطين » .
- وكان قد بدأ الصدام بين قوات الشرطة وبين أفراد الشعب .. إذ شهدت تلك الفترة .. انفجار القنابل فى دور السينما والمحال الكبرى وحرر الجامعة .. فضلاً عن الاغتيالات .. إذ عرفت نفس الفترة التى لم تتجاوز السنوات السبع .. اغتيال رئيسين للوزارة (أحمد ماهر لإعلانه دخول مصر الحرب العالمية .. ومحمود فهمى النقراشى لإصداره قرارا بحل الإخوان) .. وعدة محاولات لاغتيال مصطفى النحاس .. واغتيال الخازندار رئيس محكمة الجنايات .. والوزير أمين عثمان ..
- ويقول د . يونان لبيب رزق : « الانفجارات كانت تدل على القلق الشديد الذى يعانى به الشعب .. والجماعات ذات الأفكار الأيديولوجية نتيجة لإغلاق منافذ التعبير عن نفسها أمامها .. كالإخوان والشيوعيين وحتى « مصر الفتاة » الذين كانوا يسمونه بالأحزاب الغير برلمانية كانت تائرة من داخلها » .
- ويقول خالد محيى الدين : « اغتيال أمين عثمان كان احتجاجاً على قوله « إن العلاقة بين مصر وبريطانيا هى علاقة زواج كاثوليكي » .
- ويقول عبد المنعم أمين : « كان السادات من المدبرين لمقتل أمين عثمان .. واتفق إن هو يقف على الباب ويلبس بواب ويحمى تفهقر حسين توفيق من النادى » .
- ويقول جمال حماد : « كان السادات طول عمره مغامر .. فقد اشترك فى جميع الحركات السرية التى سبقت الثورة .. اشترك وقبض عليه فى قضية أمين عثمان .. واشترك فى محاولة اغتيال مصطفى النحاس .. فهو كان باستمرار فى مؤامرات سرية » .
- ويقول أمين شاكر : « مقتل أمين عثمان اشترك فيه أنور السادات .. لأن أنور السادات كان بروحين .. هو كان يكره الإنجليز لأن هم كانوا السبب فى القبض عليه سنة ٤٢ .. وأمين عثمان كان الطفل المدلل بتاعهم .. فدرب الناس وأطلقوا النار على أمين عثمان وقتلوه » .
- وعلى الجانب الآخر .. وقع اغتيال الشيخ حسن البنا .. وكان عدد من الضباط مشاركاً فى جماعات الإخوان المسلمين ..
- ويقول فريد عبد الخالق : « حدث اغتيال الإمام حسن البنا .. حصل فراغ فى القيادة ..

باختصار انتهى إلى اختيار الهيئة الأساسية لمن يخلفها اللي هو المستشار حسن الهضيبي ..
وما مرش على اختيار حسن الهضيبي ٨ شهور إلا وقامت الثورة » .

• **ويقول خالد محبى الدين :** « الرئيس عبد الناصر أول مرة أتعرف به كان عن طريق عيد المنعم عبد الرؤوف .. ده كان حوالى سنة ٤٤ كده .. وبعدين جت سنة ٤٥ والحرب انتهت .. وكان فيه تفكير بعمل تنظيم .. وكان الجيش على علاقة بالإخوان المسلمين .. واتعرف جمال عبد الناصر بأغلبهم » .

• **وتقول د . هدى جمال عبد الناصر :** « كان والدى يدرّب الفدائيين أيام الاستعمار فى قناة السويس » .

• **هل درب الإخوان ؟**

• **« كان يدرّب جميع الفدائيين .. وقتها اشترك الشباب من جميع الأحزاب فى العمل الفدائى وكان الضباط يدرّبونهم » .**

• **وهل انضم إلى الإخوان ؟**

• **« لم ينضم إلى الإخوان على الإطلاق .. ده كان عمى شوقى كان على اتصال بهم وليس والدى .. لكن جازب كان على اتصال ببعضهم لبعض الوقت » .**

• **ويقول محسن عبد الخالق :** « فى الواقع لازم ننظر إلى الحركة فى الجيش كأنها انعكاس للحركة الوطنية العامة .. نحن جيل الأربعينات كنا نعيش حياة فكرية كبيرة .. الحرب العالمية الثانية .. فراءات متنوعة .. تعليم فى الجيش الإنجليزى . انفتحنا على الفكر الذى كان موجوداً فى هذه الحقبة .. فكان لا بد أن يحدث انعكاس فى داخل الجيش .. بالتالى بدأنا نبحث أمور جيشنا .. جيش متخلف جداً وقيادات قديمة مع شباب متفتح يعنى كان فيه نوع من الصدام .. ابتدئنا نجتمع لتطوير الجيش .. وانتهينا إلى الاجتماع سنة ٤٥ نبحث أمور الجيش ومنها أمور البلد .. وهذا كان أول اجتماع عقد فى أوائل ٤٥ فوق السطوح فى شارع البارامونى .. وكان هناك مندوبين للأسلحة عن سلاح المدفعية .. عن سلاح الفرسان .. عن سلاح المشاة .. عن الطيران .. الخ .. ومن هذه النقطة تبلورت الأفكار وأماننا والاهتمام بالشئون الوطنية فى البلد .. بعضنا انضم إلى الإخوان المسلمين .. كانوا من الحواريين ولا ننسى فضل الإخوان المسلمين .. وابتدأت اجتماعاتهم تفتح أذهان الضباط على المشاكل » .

• **ويؤكد كمال الدين حسين :** « شوف أنا راجل طول عمرى الحمد لله مسلم ومتدين وحتى وأنا فى ابتدائى أخذت جائزة الدين فى سنة أولى ابتدائى .. وأنا طالب فى الجامعة أحد أصدقائى أخننى زرنا جمعية الإخوان المسلمين فى مقرها فوق لوكاندة البرلمان فى العتبة الخضراء .. وبعدين كنت أروح للاجتماعات بتاعتهم كل حين وآخر وخصوصا بعد ما نقلوا فى الحلمية .. اجتماعات الثلاثاء .. إلى أن حصل ارتباط معاهم لما عبد المنعم عبد الرؤوف الله يرحمه كان يركب معايا الترمزى .. إحنا كنا ننزل من ألماظة نركب الترمزى الأبيض .. فرص كثير إن

إحنا نقعد مع بعض مدة طويلة .. لما الترمای يمشى بينا المسافة دى شتاء وصيفاً نرغى .. هو لمس فى وأنا لمست فيه الناحية الوطنية .. هو كان قبل ذلك اشترك مع عزيز المصرى فى حكاية الطائرة اللى فروا بيها ووقعت وتم حبسهم واتعزل من سلاح الطيران .. قال لى ما تبجى معنا إحنا فيه اجتماعات بنعملها .. رحنا على فى بيت جمال عبد الناصر وجدته مع واحد اسمه الصاغ محمود لبيب هو كان متصلاً بالإخوان برضه أو كان مندوب الإخوان .. وهو راجل من الجيش القديم .. الجيش التركى القديم واشترك فى حرب ليبيا ضد إيطاليا وراجل لطيف وكلامه شيق .. وبينكلم عن الدين وعن الإسلام وعن فائدة دين الإسلام فى إصلاح المجتمع .. وبينكلم عن الجيش وبعدين الوطنية وضرورة التخلص من الإنجليز .. وكنا نجتمع فى الأسبوع مرة فى بيت أحد مننا سراً طبعاً .. كانت اتجاهاتنا فى الأول متدنية .. خالد محبى الدين كان ساكن فى التكية اللى فى شارع درب الجماميز .. وأنا زرتة وقعدنا معاه وكان برضه معنا .. وبعدين مش عارف إيه اللى قلبه على الناحية الماركسية .

• **وأسأل خالد محبى الدين : حضرتك كنت من مؤيدى الإخوان ؟**

• « فى ذلك الوقت كنا بنرى إنه كان تنظيمياً وطنياً .. لكن بعد كده حصل خلافات وتركنا الإخوان المسلمين » .

• **واتجهت اتجاهاً عكسياً على طول الخط ؟**

• « أصل وأنا داخل الإخوان المسلمين كنت بأقرأ فى خط الاشتراكية .. كانت عندى العقيدة الدينية والعقيدة السياسية .. فالأثنان عملوا امتزاج معين .. الرئيس عبد الناصر انضم لأحد هذين الطرفين .. هو انضم للإخوان المسلمين معنا .. لمدة طويلة .. اشتغلنا مع الإخوان المسلمين وتنظيماتهم السرية .. وبعدين تركناهم » .

• **ويؤكد مأمون الهضيبي :** « معروف إن جمال عبد الناصر ومجموعة من الضباط اللى هم عرفوا بعد ذلك بالضباط الأحرار سعوا إلى حسن البنا .. ثم كانت لهم علاقات بقيادات من الإخوان بعد اغتيال حسن البنا .. ومعروف طبعاً أن حسن العشماوى كان له علاقة وثيقة جداً بجمال عبد الناصر وصلاح شادى .. ومعروفة وثابتة فى الأوراق هذه العلاقة الوثيقة .. وكان فيه كثير من الضباط فى الجيش منضمين إلى جماعة الإخوان المسلمين وطبعاً أخبار الثورة يوماً بعد يوم وقبل أن تقوم موجودة عندهم » .

• **ويقول أحمد أبو الفتوح :** « كانت مهمة عبد الناصر فى الجهاز هى تدريب المنضمين إليه تدريباً عسكرياً » .

• **وأسأل فريد عبد الخالق :** **مَنْ مِنَ الضباط الأحرار كان عضواً فى جماعة الإخوان ؟**

• « هم كثيرون : كمال حسين وعبد الحكيم عامر وبغدادى وحسن إبراهيم .. وجمال عبد الناصر على رأسهم ده بايع نور اليقين .. على أنه أحد أفراد الجماعة وقام هو بنفسه قبل الثورة ..

فى مرحلة من المراحل .. بتدريب الإخوان على السلاح باعتباراه ضابطاً .. وكان منتمياً فى الحقة دى وكان له نشاط .. وكثير من الضباط الأحرار أصلهم من الإخوان .. والحقيقة إنه ما كانش يتبادر للذهن إن دى حركة لها تطلعات وعازرة تركز على عناصر فى الجيش علشان تعد نفسها للقفز على السلطة .. دى كلها حاجات الناس بتقولها بعدين .. لأن حسن البنا سنة ٣٨ ما كنش لسه له تيار سياسى .. كان دخل كداعية وكانت مهمته الأساسية إنه يبين الإسلام بياناً حقيقياً وشاملاً .. وكانت مهمته إنه يربى أجيالاً على هذا الفهم السليم للإسلام .. المهم دخل جمال وغيره وباعوا واشتركوا فى الأنشطة وكان بيننا وبينهم علاقة أساسية .. وأكل وشرب ومافيش بينى وبينه أى تكليف .. نقعد فى أى حنة وننام .. إلى درجة إن أنا أيامها كنت أدخن فكان هو لما يأكل يحط إيداه فى جيبى ويطلع العلبة ويأخذ الللى هو عازوه .. ويحطها ثانى .. مافيش تكليف » .

• **ويضيف أبو الفضل الجيزاوى :** « فكان لهم السبق إنهم دخلوا فى التنظيمات بتاعة القوات المسلحة واستقطبوا عدداً كبيراً من الضباط .. فمعظمهم - ضباط الثورة - تقريباً إن لم يكن ٨٠ - ٩٠٪ منهم دخلوا فى الإخوان .. وعبد الناصر علاقته مع الإخوان على هذا الأساس كانت طيبة من قبل قيام الثورة .. والمفروض يتعاون معهم » .

• **ويعلق محسن عبد الخالق :** « وتقول هنا إن جمال عبد الناصر لم يكن من بين الحركات الوطنية فى الجيش .. ولكن هو حابس نفسه داخل الإخوان المسلمين وداخل الجهاز السرى .. كان جمال عبد الناصر .. كمال الدين حسين .. خالد محبى الدين .. عبد المنعم عبد الرؤوف .. حسين حمودة واثنين آخرين لا أنكر أسماءهما .. إذن جمال عبد الناصر فى ذلك الوقت كان مشواره مع الإخوان المسلمين .. لم يكن مشواره مع الحركات السرية أو الحركات الوطنية داخل الجيش .. وعندما تقابلنا فى حرب فلسطين بدأ يسمع كلاماً جديداً .. بدأ يسمع إن إحنا بنعمل منشورات .. بدأ يعرف إن فيه حركات وفيه تنظيمات وفيه خلايا بتتكون .. الخ .. وانفتنا » .

• **ويضيف أحمد حمروش قائلاً :** « معظم أعضاء مجلس قيادة الثورة كانوا فى الإخوان المسلمين .. عبد الناصر كان فى الإخوان .. عبد اللطيف بغدادى .. خالد محبى الدين .. كل دول بدأوا حياتهم فى الإخوان » .

• **ويقول إبراهيم شكرى :** « كان هناك تعاوناً بين تنظيم الضباط الأحرار وبين جماعة الإخوان المسلمين دون شك فى ذلك وذهب إلى أبعد كثيرة » .

• **ويقول خالد محبى الدين :** « فى فترة اتصالنا بالإخوان كان عبد الحكيم عامر أكثر واحد مننا كرهاً لهم » .

• **ويقول توفيق عبده إسماعيل :** « فى المجال الوطنى محمود لبيب فى الإخوان المسلمين كان له دور فى التربية السياسية فى هذه المجموعة .. وإن منظمة شيوعية عن طريق خالد محبى الدين وعلاقته بهم كان لهم دور .. مجموعة أخرى بدأت بلا هوية معينة .. فى الحقيقة دخل

جمال عبد الناصر في مرحلة من المراحل مع الإخوان المسلمين مع الصاغ محمود لبيب وكان ماسك الجواله بقي له ٥ سنوات .. ودخل معه مجموعة كبيرة من صباط الجيش اللي ظهروا سنة ٥٢ على مسرح الأحداث بتاعة الضباط الأحرار واستمروا معاهم في المدرسة السياسية بتاعة الإخوان المسلمين » .

- وأسأل د . هدى عبد الناصر : هل كان والدك عضواً في « حدتو » ؟
- « لقد قال لي أنا لفيت على جميع الأحزاب .. لكنه لم يكن معجباً بالعمل الحزبي قبل الثورة .. وكانت فكرته أن الأحزاب ينتظر إلى مصلحتهم الخاصة » .
- ويقول محسن عبد الخالق : « عبد الناصر كان متصلاً بأغلب المنظمات لكنني لا أستطيع أن أجزم أنه كان مشتركاً اشتراكاً فعلياً في « حدتو » .. »
- ويقول خالد محبى الدين : « عبد الناصر لم يفكر في الانضمام إلى « حدتو » .. وهذا ادعاء خاطيء .. وكان الاسم الحركي له هو زغلول .. فكان عندما يتصل بي تليفونياً يقول « أنا زغلول » .. »
- بينما يقول أحمد أبو الفتح : « عبد الناصر اندمج في المنظمة بحيث أصبح أحد أعضائها .. وكان اسمه السرى أو الحركي « مورييس » .. وكان يحمل رقم ١١٧ » .
- وفي ١٥ مايو سنة ٤٨ صدر قرار ملكي مصري في عهد النقراشي باشا بدخول الجيش الحرب ضد العدو الإسرائيلي .. وكانت هناك مشكلة الأسلحة الفاسدة .. التي تضاربت الأقوال فيها ..
- وأسأل د . حسن رجب : هل تعتقد أن قضية الأسلحة الفاسدة من أسباب قيام الثورة ؟
- « لا شك إنها هي التي مهدت الجو كله وهي التي ولعت الناس كلها .. فيه الناس اللي ماتوا أولادهم .. والناس اللي ماتوا ناس من عائلاتهم .. وفيه حاجات كثير جداً .. وبعد كده الحالة الفظيعة اللي كانت البلد فيها .. الدول جميعاً المشتركة في الأمم المتحدة تمتنع عن إمداد كلا من العرب وإسرائيل بالأسلحة والذخائر .. الحاجات دي كلها طبعاً .. وهذا القرار طبق بحذافيره على العرب كلهم أما إسرائيل فكان بيجهلها أسلحة وذخائر ومعدات وطائرات بل ومتطوعين مش بس من الدول الغربية بل ومن الدول الشرقية أيضاً .. جالها من تشيكوسلوفاكيا ومن بولندا .. كل اليهود اللي هناك جاءوا متطوعين مافيش شك .. لإنهم بيحاولوا يبنوا وطن .. وكل اليهود بيحاولوا يقدموا كل المساعدات لإسرائيل .. مصر طبعاً لم تقف ساكنة أمام هذه الحكاية كان لا بد أن يتخذ قرار .. إزاي نحصل على أسلحة وذخائر .. فوجد أن الطريق العادي عن طريق الإمدادات بتاعة الجيش والعطاءات .. مش حتنفع .. فأمر بتشكيل لجنة اسمها لجنة الاحتياجات .. وأعطى لهذه اللجنة كل الصلاحيات الممكنة إنها تلاقى سلاح أو ذخيرة أو معدات حربية في أي جهة من جهات العالم تروح وتجييها وتدفع ثمنها فوراً ومن غير مزاييدة .. نحن

فى ظروف غير عادية فلا نأتى ونطبق اللوائح والفوائىن التى تطبق وتأخذ وقت طوئل على عملية محتاجة كل ثانية فيها .. لها قيمتها .. وجاب رئيس اللجنة لواء مهندس اسمه ابراهيم سعد المسيرى .. كان أول مهندس دخل الجيش برتبة مهندس .. حاصل على الهندسة .. وحصل عليها م « المهندسخانة » فى ذلك الوقت وكان اسمها « المهندسخانة الملكية » عام ١٩٢٣ .. وكان شخصية كويسة ومحبوبة وكنا لسه صغيرين ضباط ومهندسين داخلين جديد كلنا كنا نحبه .. وكان أيضاً محترم من كل ضباط الجيش ويقدره وكان دائماً بيتشغل وظائف مهمة فى الجيش .. مسك مدير مكتب الوزير ومسك مدير سلاح المهندسين يعنى كان راجل له قيمته .. وابتدأ ابراهيم سعد المسيرى يشتغل .. جاب ناس يثق فى أمانتهم لإن معاهم فلوس بالملايين يحصروها من غير حساب .. أذكر من ضمنهم .. صدقى سليمان اللى بقى رئيس وزارة بعدين وعبد المجيد العبد .. وناس كثير من الناس الكويسين دول .. وابتدأوا يشتغلوا وابتدأ بيعت ناس فى كل جهة يسمع إن فيه هناك صفقة ذخيرة أو صفقة أسلحة ويحاولوا يتفاوضوا على إنهم يحصلوا عليها .. طبعاً فلوس زى دى بتتصرف من غير حساب وحاجات زى كده برضه ماحدش عارف .. مش كل واحد نفسه كويسة .. ومش كل الناس اللى جابها كانوا كويسين .. فالمقصود بعث أحد ضباط الذخيرة يروح يتعاقد على ذخيرة من إيطاليا .. فلم يجد غير قتابل يدوية .. فتعاقد على ربع مليون قتبلية يدوية .. ربع مليون يعنى كمية ضخمة جداً والجيش المصرى يمكن مش محتاج لها كلها خصوصاً إنه ما أخدهاش بقيمة زهيدة علشان نسكت عليها .. إنما الألعن من هذا .. إن الذخيرة التى وصلت .. وجد بها عيوب .. وجد بها إنها بتنفجر حتى ساعات بمجرد اللمس .. فى عام ١٩٤٨ قمت أنا بتشكيل إدارة اسمها إدارة البحوث والتطورات الحربية .. أنا اقترحتها والجيش على طول راح موافق عليها .. فى ظل الظروف التى كانت موجودة .. الإدارة دى وظيفتها إيه ؟ .. الإدارة دى وظيفتها أنى إشكال يحصل على ذخيرة .. كويسة أو وحشة إحنا بتتدخل .. لإن كلها مهندسين وكيمائيين وناس متخصصة فى الذخائر .. وهذه طبعاً عملية خطيرة فى وقت الحرب .. فتعرض علينا وأنا بأشكال لجنة فنية من عندى .. وبأعطيههم كل المعدات ووسائل الاختبار اللازمة .. وإذا كان سلاح بأشوف إيه العيوب اللى فيه .. كان تحت تصرفى ورش قوية جداً ومستعدة تمام الاستعداد .. إذا كان ممكن نصلحها فينصلحها ونرجعها ثانى للميدان .. أو الوحدة اللى هى تابعة لها .. أو بنشوف طريقة إما إننا نبتلها أو نرجعها المخازن ولا نتصرف فيها بأى طريقة .. مشيت الحكاية بالشكل ده لكن حصل بعد كده إن الناس ابتدت تسافر علشان تجيب أسلحة وذخائر .. ابتدوا يتصرفوا طبعاً على كيفهم مادامت لا توجد رقابة ومافيش حساب .. أى إيصال يكتبه حيوا فوقا عليه ويدفعوا له ثمنه .. ابتدت القنابل اليدوية اللى فيها زرار أمان قبل ما تلمسه ممكن تنفجر .. ده مش كلام أنا بأقوله أنا معايا هنا جواب من الملحق العسكرى البريطانى فى القاهرة .. وكانت علاقتنا به فى ذلك الوقت كويسة .. وكنت سألته عن المعدات هذه .. والجيش الإنجليزى كان بيعملوا إيه فيها لإنه وقع فى إيده كميات كبيرة من هذه الأسلحة .. إذا كانت الأجهزة هذه صالحة ولا لأ .. اتكلم عن بعض أنواع الأسلحة وبعض أنواع المدافع وجاء للقنبلة اليدوية هذه وقال : خللوا بالك دمى قنابل بتنفجر أحياناً بمجرد اللمس اللى

هى القنابل اليدوية التى راح عبد الغفار عثمان يتعاقد عليها .. الحاجات دى دلوقت جاءت ووصلت إيه العمل فيها .. طبعاً كان فيه آراء مختلفة إننا نسحبها من الميدان .. لأنه انصرف فيها حوالى مليون دولار يروح على مين ومين المسئول .. إلا أن عبد الغفار عثمان بجوار عمله ككبير مفتشى الذخيرة والمفرقات فى الجيش المصرى .. كان أيضاً على صلة بالملك لأنه كان مديراً للمتحف الحربى الخاص بالملك اللى كان عنده متحف حاظت فيه طبنجاته وأسلحته وحاجاته من عصور مختلفة .. وكان طبعاً الكل عامل له حساب فى الجيش وماحدث يقدر يتكلم فى حقه أو يعمل له أى حاجة .. ابنتت العملية هذه تذاغ فى الجيش بين العساكر والجنود وأهاليهم وابتدت تذاغ فى البلد كلها ..

هل حدثت إصابات يافندم ؟

« حدثت إصابات فعلاً .. إصابات كثيرة وأنا عندى دوسيه كامل فيه كل ما كتب فى هذا الموضوع أمام النيابة أو أمام المحكمة .. كانت بتطلع يومياً .. كانت كل الجرايد تتبارى فى أن تجمع كمية من المعلومات عن هذه القضية لأنها كانت تقدر تقول الحاجة الأولى التى بنهم الشعب كله .. ده مصير البلد .. »

وأذكر أن الكاتب الكبير إحسان عبد القدوس قد تبنى هذه القضية ؟

« تبنى هذه القضية وكتب عدة مقالات فى روزاليوسف .. جعلت الشعب يهيج من المقالات هذه .. وطبعاً الجيش أيضاً لأنه ما كانش عارف .. وابتدا يعرف من المجلات والجرائد .. وكل هذه الحاجات .. قام الملك أوعز لحيدر باشا على ما أعتقد فى ذلك الوقت وزير الحربية .. قال إن الحكاية دى حنديها للنيابة تحقق فيها .. طبعاً ده كان إجراء سليماً وكلنا ارتحنا له .. طبعاً حيروح فى إيد النيابة .. يعنى فى أيدي سليمة .. وكان فى ذلك الوقت المدعى العام محمد عزمى بيه .. رجل عرف بإنه راجل دقيق وراجل أمين ورجل عادل .. فقلت الحمد لله إن العملية هذه راحت دلوقت للجماعة دول وحنشوف حنعرف الناس اللى عملوا الحاجة دى حياخدوا جزاءهم .. لكن اللى حصل غير كده .. أول ما ابنتت تحقق فى هذا الموضوع ابنتت تظهر لها حاجات تانية لم تكن واردة .. يعنى إحنا مركزين على قضيتين .. قضية القنابل اليدوية اللى جاية من إيطاليا دى .. ومركزين أيضاً على المدافع (١٠٥ مللى أسبانيا) المدافع دى كانت من أصل إنجليزى إنما كانوا واخدينها من « باترن » قديم قوى يمكن من أواخر الحرب العالمية وابتدوا يصنعوها فى أسبانيا .. وما عملوش منها كميات كبيرة حتى ما وزعوش على الجيش ولا حاجة .. وما صدقوا إن مصر طلبت الأسلحة هذه فراح « التنبيل عباس حليم » توسط فى العملية دى وراح هناك وقال أنا حاجيب لكم الأسلحة والذخائر .. طبعاً لما فهموا إن ده سلاح من أصل إنجليزى واسم معروف وكويس .. وافقوا على إنه يجيب الحاجات وبسرعة لأنهم محتاجينها .. فأخذ هو جزء من الفلوس وطبعاً كانت العمولة بتاعته زى ما عرفنا بعدين من السفير المصرى فى أسبانيا وصلت إلى ٤٠٪ من القيمة .. القيمة بتاعته كانت ٥ مليون دولار وكان وصل مع الـ ١٦ مدفع اللى اتعاقد عليهم ٢٠٠ ٠٠٠ دانة .. ولا المدافع ولا الدانات

انكشف عليهم هناك .. المقصود .. وصلت الحاجات دى هنا وقالوا لنا نجعمل فيها إيه .. فشكلت أنا لجنة من الجماعة بتوع علم المرمى وبعثت طلبت من سلاح المدفعية بشكل لنا لجنة .. لاقينا المدفع يروح ناطلت فى الهواء وما ينزلش مطرحة ينزل فى حنة ثانية .. وبعدين أجهزة التفشين ما تفهمش مربوطة بمسامير أحياناً عليها عسافير ساعات تنفك وساعات لما تركبها تانى ما تركبش وهذه حاجات دقيقة جداً .. إنت بتتنش على هدف على بعد كيلو أو ٢ كيلو .. فلو ما كانش النيشان دقيق راح الغرض .. مشينا فى العملية هذه وكتبنا كل العيوب بتاعة السلاح وكل العيوب بتاعة الذخيرة بتاعته .

• ولكن النيابة برأت المتهمين ؟

• « هذا فى النهاية .. إنما قبل ما يتبرأوا حصل الآتى .. طبعاً الملك لما شاف إن العملية فلتت من إيده ولما أوصى إنها تروح للنياحة العامة كان متصوراً إنه بالسيطرة بتاعته على الدولة وعلى الحكم وعلى الحاجات دى كلها .. حيقدر يتصرف أو يقدر يوقف العملية لكن العملية فلتت بسرعة من إيده على ما يبدو فابتدأ يلجأ إلى حاجات ثانية .. إيه هى الحاجات الثانية .. إنه أوعز لناس أكثر من مرة أن يعتدوا على حياة إحسان عيد القدوس وأظن إنك سمعت الحكاية دى .. وبعد كده لم يكتف بذلك .. أولاً الضباط الللى كانوا عندى الللى كنت بأعتمد عليهم .. فيه عندى طقم بيبجى من المدفعية وطقم بيبجى من المشاة وطقم بيبجى من الأسلحة المختلفة .. ابتدوا يوزعوا الضباط الللى درسوا فى الفنون والللى اتبحروا فيها .. سرحوهم على الميدان وكل ما آجى أطلب ضابط .. يقولوا لى ده مش موجود ده فى الميدان طبعاً فى الميدان مش حقتدر تجيبه النهارده .. فمشى فى العملية بالشكل ده .. وبعدين بصيت لاقيت أنا كمان ابتدوا يحاولوا يؤثروا على معنى مش الجماعة الللى تحت إيدى بل أنا جالى إسماعيل شيرين وقال لى انت بتعمل إيه .. إنت يا راجل من الضباط الللى لهم منزلة كويسة فى الجيش والملك أنعم عليك برتبة البكوية وأعد لك نيشان نجمة فؤاد الأول العسكرية الللى هو وسام الشجاعة إزاي تعمل حاجة زى دى .. قلت له يا سيدى إن كان على الرتبة اتفضلوا خذوها أنا مش عاوزها ولو كان على الأوسمة اتفضلوا كمان خذوهم وبالرغم من إنى أخذت الأوسمة هذه .. ولو إنى أستحقها لإنى أخذتها مش علشان فتنزىة أو علشان حاجة أنا قمت بأعمال مهمة فى الميدان وأعتقد إنى أستحقها إذا كانوا عاوزينها اتفضلوا خذوها » .

• وصممت حضرتك على رأيك ؟

• « وصممت على رأيى .. ومرت الأيام وبرأت المحكمة المتهمين فى نهاية حكم الملك .. ثم جاءت الثورة وفتحت ملف القضية تانى وأدانتهم وكان من ضمن الناس الذين أدينوا « عبد الغفار عثمان » الذى ورد القنابل اليدوية .. حكمت عليه بتجريدته من رتبته وصادرت أملاكه وأملاك زوجته لأنه كان متزوج واحدة إنجليزية واحدة مصرية » .

• ويؤكد فتح الله رفعت : « وإحنا فى حرب فلسطين أنا جايب لك صورة لأحد المدافع الللى عندى

اللى فُجرت قبل أوانها فى ماسورة المدفع يعنى القول بأن قصة الأسلحة دى حقيقة لإنها حصلت معايا .. مدفع من البطارية بتاعتى انفجر قبل أوانه » .

• **بينما يقول حسن فهمى :** « الحقيقة أنا ومصطفى صدقى الله يرحمه .. اللى كنا بنأخذ الأخبار بنوديبها لإحسان عيد القديس فى روزاليوسف فى المبنى القديم اللى فى الشارع وراء مجلس الوزراء على طول .. فأتنا ما أعرفش الدخائل أو الأسرار بتاعتها لكن ماشفتش أنا من صور الأسلحة اللى اتعرضت فى المصور وفى آخر ساعة حاقول لك إن ده كان سوء تدريب للعساكر .. لإن المدفع الـ ٢٥ رطل اللى هو كان من أحسن المدافع فى الدنيا أيامها كان بيتفجر بعد الماسورة على طول .. بعد الترياس .. على طول .. ده بدينا فكرة إن المدفع ده فضل يضرب ضرباً سريعاً من أربع لخمس طلقات فى الدقيقة ضرب سريع .. والضرب العادى .. طلقين فى الدقيقة .. لو تضربه أكثر من كده .. حيسخن قوى وجايز إنه يحمر ويبقى زى الجزرة .. فى الحالة دى أول ما تحط القنبلة جواه .. وتقل الترياس يروح منفجر المدفع .. على طول القنبلة تنفجر فى الماسورة .. فكل الصور اللى شفتها لهذه المدافع إن الماسورة منفجرة بعد الترياس على طول ده معناه إن المدفع كان سخن قوى واتعمر واتقل الترياس راحت منفجرة المدافع » .

• **إذن لم تكن أسلحة فاسدة فى رأى حضرتك ؟**

• **« أنا فى رأى ما كانتش أسلحة فاسدة .. وأنا متيهاً لى قرئت كتاب بتاع .. ثروت عكاشة .. هو رأييه من رأييه ده .. ولو تشوف برضه مدافع الهاون .. الصور اللى شفتها الماسورة مفتوحة زى الموزة من فوق كده .. حط وأنا اللى أحط القنبلة بقاعدتها لتحت .. وتخبط تحت فيه مسمار يروح خابط على المواد المتفجرة فتروح طالعة دول حطوها بالمشقلب .. لما أحطها بالمشقلب .. فالقنبلة هى اللى مش حتنفجر حتطلع برة .. فينفجر المدفع .. ويتفتح زى الموزة .. فده برضه سوء تدريب » .**

• **وهل كانت الأسلحة الفاسدة من أسباب ثورة يوليو ؟**

• **« يعنى هى كانت قضية كبيرة بس اللى أنا أقول لك حاجة أيامها كان فيه قرار طلع من الأمم المتحدة ما يدوش سلاح لا لليهود ولا للعرب ولكل الناس المتحاربين .. طيب إحنا كنا حنجيب سلاح منين .. كانوا اللى ببلاقوا سلاح كانوا ببروحوا بأخوذوه بأى شكل .. وكان بيلموا السلاح فى الصحراء الغربية .. طيب ده يضمنوا إنه كويس منين .. فإذا كان فيه حاجة من هذا القبول فدى أسلحة فاسدة .. كانت قطعاً غصب عنهم .. لكن ما كانش حاجة متعمدة أبداً » .**

• **ويقول رياض سامى :** « حارب فى معركة ٨٠×٦ ودى منطقة من رفح وغزة .. وأراد الإسرائيليون أن يشتروا هذه المنطقة وكان الأميرالاي محمد نجيب الرتبة الوحيدة اللى حاربت وأصيبت .. والقول بأنها أسلحة فاسدة أعتمد غير سليم .. وأنا حارب فى مواقع كثيرة فى فلسطين لمدة سنة ونصف ما فيش طلقة كانت غير سليمة » .

• **ويؤكد رشاد مهنا الكلام السابق :** « الأسلحة الفاسدة اسم على غير مسمى .. اللي حصل إن جهاز مدفع انفجر ده صح .. ليه لإنهم كانوا يجيبوا بعض الأسلحة من مخلفات الجيوش .. الحرب خلصت سنة ٤٥ الصحراء مليانة مخلفات مدافع وبنادق وذخيرة راحوا جابوا حاجة منهم بيحربوها انفجرت حتى موتت ضابط .. كان فيه دعاية كبيرة جداً ضد السرايا ومن حولها قالوا أسلحة فاسدة وجيبوا ويشتروا ويأخذوا الفلوس وحاجة زى كده .. أنا عن نفسى أقول لك شهادة أمام الله إننى أنا مطلع أسلحة جديدة بالشحم من القلعة ومسلمها لهم .. جاية من إنجلترا .. ده السلاح الفاسد .. ده مغالاة فى الكلام » .

• **ويقول د . محمود الجوهري :** « والله الحقيقة المهندس صدقى سليمان ده من الشخصيات النادرة فى مصر يعنى أمانة وصدق .. صدقى سليمان قال الحق » .

• **إنه ما كانش فيه قضية أسلحة فاسدة ؟**

• **« لا كان فيه .. كان فيه فاسد مش كلها فاسدة لكن كان فيه حاجات سليمة ١٠٠٪ ودافع عن الناس اللي كانوا متهمين فى قضية الأسلحة الفاسدة » .**

• **والرئيس عبد الناصر غضب منه كما ذكرت فى كتابك ؟**

• **« كان الرئيس زعلان وقال آمال إحنا عملنا الثورة ليه لما كل الأسلحة مش فاسدة .. كان هو ينتظر الرد من صدقى سليمان إنه يقول إن كل الأسلحة فاسدة .. ده حقيقى !! »**

• **وفى أثناء حرب فلسطين سنة ١٩٤٨ ولدت فكرة تنظيم الضباط الأحرار .. وبعدها بدأ التنفيذ العملى للفكرة ...**

• **ويقول توفيق عبده إسماعيل :** « لما جاءت حرب فلسطين .. حصل تآلف أكبر بين عدد من الضباط بقيادة جمال عبد الناصر فى هذا الوقت منفرداً .. واتعرف على عدد من الضباط اللي أبلوا بلاء حسناً .. فى الحقيقة دى قصة طويلة .. ولو إن علاقنى قصيرة بالضباط الأحرار قبل الثورة » .

• **ويعلق أحمد المصرى فيقول :** « هو ما فيش حاجة اسمها تنظيم الضباط الأحرار .. فيه الضباط الأحرار لأن كلمة تنظيم فى ذلك الزمان كانت تعنى على طول تحفز السلطة الموجودة وهى الملك والسراي والإنجليز والأحزاب ضد هذه المجموعة اللي بتسمى نفسها تنظيم .. وفى بعض الأحوال عرفت بعض المعلومات عن ما يسمى بالضباط الأحرار وحوسب أعداد منهم أمثال رشاد مهنا عن تصرفاتهم .. إنما كلمة ضباط أحرار لم تعرف فى مصر إلا بعد تداول المنشور الثانى أو الثالث من منشورات الضباط الأحرار التى كانت سياسية من الدرجة الأولى وكانت بتحاول أن تعرف الفساد الموجود وتمهد لفكرة التعبير » .

• **وتقول د . هدى عبد الناصر :** « كان والدى ينظر لوالدتى وينظر إلينا ويقول مانستهونوش بها .. ياما تعبت معى كنت أرجع بالليل متأخر عليها وكنت بأجيب لها قنابل تشيلها » .

• **ويقول جمال منصور :** « حركة الضباط الأحرار مرت تسميتها بمرحلتين .. المرحلة الأولى من سنة ٤٥ إلى سنة ٤٩ كانت تسمى باسم « ضباط الجيش » واستمرت كذلك حتى حرب فلسطين .. ثم انتقلت بعد ذلك إلى المرحلة الثانية تحت اسم « الضباط الأحرار » إلى أن نجحت ثورة ٢٣ يوليو ١٩٥٢ . »

• **وأعلن وقف إطلاق النار في ٧ يناير سنة ١٩٤٩ .. وتركت حرب فلسطين جرحاً في نفوس العرب .. وهزة في العلاقات العربية ..**

• **ويضيف توفيق عبده اسماعيل فيقول :** « أغلب الضباط الأحرار الذين شاركوا في حرب فلسطين كان لهم سجل مشرف في الحرب سواء صلاح سالم أو عبد الحكيم عامر أو زكريا محبى الدين أو ثروت عكاشة أغلبهم اترقى ترقيات استثنائية وأخذ نياشين نتيجة أعمال بطولية في هذه الحرب وعلى رأسهم جمال عبد الناصر في الفالوجا .. في هذه الفترة نشأت فكرة تنظيم سياسى بقيادة عبد الناصر وكلم زملاءه بعد عودتهم من انتصار الفالوجا . »

• **ويقول كمال الدين حسين :** « المهم أخذنا بعدها فترة راحة سكون شوية علشان الأنظار لا تنتج إلينا .. وبعدين جمال عبد الناصر اقترح أن الجيش للجيش .. ومالناش دعوة بعد تاني .. يعنى نتصل بيهم أه .. لكن إحنا نبقى تيار واحد .. وفعلأ كانت فكرة صائبة .. بدأنا وبدأ الضباط الأحرار فى الفترة اللي لغينا فيها الاتصال مع الإخوان المسلمين بأن الجيش يبقى بتاع الجيش .. عبد المنعم عبد الرؤوف اللي هو سبب فى معرفتى بجمال عبد الناصر يومها قال لى أنا سوف أستنى فى الإخوان وأنا ملتزم مع الإخوان .. والإخوان أنا لما يجرى لى حاجة سوف يعينوا عائلتى وأولادى .. قلنا له إحنا معتمدين على الله وربنا يسلمها فى مواقف كثيرة والمواضيع دى بتاعة ربنا .. المهم هو التزم وخرج يومها .. ونقصت القيادة واحداً .. لكن اتعوضت بناس تانيين » . »

• **ويضيف د . ثروت عكاشة :** « عدنا من فلسطين مهزومين نتيجة ما حدث من هزيمة ووجدنا أن تنظيم الإخوان المسلمين قد تورط فى أمور غامضة مثل العنف والاعتقالات .. وهذا فى الحق قد نفر خلايا الضباط منه .. واستقر الرأى على أن نشكل تنظيمأ جديداً لا يقوم على معتقد مذهبى بل يضم إليه ضباط القوات المسلحة مهما كانت نزعتهم السياسية أو العقائدية طالما أن حسهم الوطنى كان موجوداً » . »

• **ويقول أحمد حمروش :** « اتخذنا خطأ أن الضباط الأحرار لا يكونوا تحت عباءة أى تنظيم .. ودى كانت من مزايا جمال عبد الناصر بالإضافة لقدرته على تجميع الضباط الأحرار من مختلف الاتجاهات حرصه على أن يكون الضباط الأحرار بعيدين عن الخضوع أو الانتماء أو العمل تحت عباءة أى تنظيم » . »

• **ويقول خالد محبى الدين :** « فى مايو ٥٢ قرنا إبعاد عبد المنعم عبد الرؤوف لإحاحاه على ضرورة ارتباطنا بالإخوان » . »

• وكان استقطاب الضباط الوطنيين أول وسائل تنظيم الضباط الأحرار .. وهكذا انضم واحد بعد الآخر .. وبدأ العدد يزداد ويكبر يوماً بعد يوم ..

• ويقول توفيق عبده (إسماعيل) : « الضباط الأحرار أصلاً فكرة نشأت حول اشتراك الجيش في العمل السياسي أو في العمل الوطني .. وبعد انتهاء الحرب في ٤٩ بدأ التنظيم فعلاً يأخذ مرحلة إعداد دقيقة أكثر من المراحل الكثيرة التي نشأت في هذه الفترة .. وكانت المحاولات كلها تبقى حول ضابط أبدي شجاعة وله شعبية أو ضابط يتكلم في العمل الوطني باستمرار فمحاولة اصطلياده أو إدخاله في التنظيم ينتج من الجماعة المؤسسة للضباط الأحرار سنة ٤٩ .. الجماعة دى كانت مجرد ضباط وطنيين في الأصل لما اجتمعوا مع بعض عاوزين يعملوا نشرات ويعملوا تنظيماً » .

• كما يقول فتح الله رفعت : « جمال عبد الناصر كان باستمرار يشوف الضباط وحركاتها وقدرتها على تحمل مثل هذا العمل الخطير اللي سوف تقوم به .. وده من ضمن الحاجات بتاعة جمال عبد الناصر الواعية الصحيحة .. ورحنا أنا ومحسن عبد الخالق في بلد اسمها أسندود كانت في فلسطين طبعاً .. وكنا بنقعد بالـ ٥ و ٦ ساعات لغاية صلاة الفجر .. دى بداية معرفتنا بفجر الثورة الأول وهو جمال عبد الناصر .. قال لنا إحنا بعد ما نرجع سوف نغير النظام خالص .. كان الأول النظام بتاع التكوينات اللي بيكونها جمال عبد الناصر أو يلتقى بأحد أفرادها كانت عامة على كل الأسلحة .. النظام الجديد سوف يعمل لكل سلاح تكوينات معينة علشان يبقى لها رئيس .. وكان رئيس المدفعية عندنا هو كمال الدين حسين » .

• ويقول مبارك رفاعى : « حرب فلسطين سنة ٤٨ أنا شاركت فيها كنت ضابطاً صغيراً وبعدها نقلت مدرساً في مدرسة المدفعية جناح المدفعية المضادة للطائرات .. والفترة دى انضمت لتنظيم الضباط الأحرار مع مجموعة من زملائي في المدفعية المضادة للطائرات .. وكان يرأس المجموعة بتاعتنا كلها السيد كمال الدين حسين لأنه كان مدرساً في المدفعية .. وهو كان أقدم ضابطاً فينا كان هو برتبة صاغ » .

• هل كانت اجتماعات سرية ولا اجتماعات علنية في ذلك الوقت ؟

• ضرورى أن الاجتماعات لا تكون علنية لأن ده تنظيم سرى .. بالقطع كانت الاجتماعات سرية بنجتمع فيها كل مجموعة مكونة من ٥ » .

• ويقول محمد أبو الفضل الجيزاوى : « كمال حسين اتصل بى علشان أنضم للتنظيم فعلى طول وافقت وانضمت مع الضباط اللي أنا أعرفهم .. جينا من حرب فلسطين ابتدا تكوين فرقة مدرعة .. فأننا من ضمن الناس اللي أخبرتوا كلاً كان حرب للشئون الإدارية .. فأننا فوجئت بكمال حسين .. طبعاً كنا بنعمل قعدات مع بعض واتصالات مع الضباط .. فى بيوتها أو فى القشلاق أو فى الطابور .. يعنى كان العمل السياسى مفتوحاً عندنا .. فجاء لى قبلها بـ ٤ - ٥ أيام وقال إن ضباط بتوع مدفعية الفرقة المدرعة يتجمعوا عندك فى البيت علشان فيه أوامر

أو تعليمات أو اتجاهات جديدة حقولها .. قلت له يعنى فيه حاجة حتحصل .. قال لى إن شاء الله ربنا يسهل .. قلت له « أوكيه » فقال لى لم الضباط ونفقال فى البيت .. وقد كان .. كان فيه مقدم اسمه عبد المنعم أمين وكان من الشخصيات البارزة فى المدفعية فأنا فوجئت بلن عبد المنعم أمين جاء ومعه كمال حسين .. وده من الأخطاء بناعة عبد الناصر .. كان يجيب رتباً كبيرة يحاول يغطى بها حركة الضباط .. عبد المنعم أمين حيعمل إيه طبعا ولا حاجة .. يعنى أنا أركان حرب مدفعية ورتبتي نقيب فى ذلك الوقت .. كان فيه الكفاية ومش مهم أكون لواء ..

• ويقول د . ثروت عكاشة : « قام جمال عبد الناصر وعبد الحكيم عامر بعد عودتنا من فلسطين بالدعوة لهذا التنظيم .. وكنت قد عينت برئاسة هيئة أركان حرب الجيش إدارة التدريب الحربى .. وعين جمال عبد الناصر مدرساً بكلية أركان حرب وعين عبد الحكيم عامر أركان حرب سلاح المشاة .. وقام كل منهما بالدعوة إلى تنظيم الضباط الأحرار الذى انضمت إليه بطبيعة الأحوال لأن كل ما كان مطلوباً من هذا التنظيم هو ما كنا نردده فى اجتماعاتنا وخلقنا أفكاراً وحواراً .. كان الداعى الأول للتنظيم بلا نزاع هو جمال عبد الناصر .. فما شهدنا منه إلا كل إنسانية فياضة وبذلاً من جهده ووقته وماله فى سبيل قضية مصر التى كانت شغلنا الشاغل وتصحية فى سبيل الغير وحرصاً على بذل العون لكل من نزلت به نازلة سواء كانت معنوية أو مادية فضلاً عن حنكته السياسية ودرأته العسكرية وتجرده المثالى .. لهذه الصفات كان عبد الناصر أهلاً لكى يقود ويسود ..

• ويقول عبد المحسن أبو النور : « بعد ما انتهت حزب فلسطين اجتماعنا فى القاهرة .. وابتدأ جمال عبد الناصر يفكر فى تكوين فعلاً تشكيل الضباط الأحرار وكان تقريباً فى سنة ٤٩ وفاتحنى هو وعبد الحكيم عامر فى هذا وانضممنا مع بعض وابتدئنا نعمل خلايا الضباط الأحرار .. الخلية اللى أنا فيها كانت مع عبد الحكيم عامر وكان فيها محمد البلتاجى اللى كان محافظ الجيزة وكان فيها إسماعيل فريد اللى كان سفيراً فى الخارجية وكان فيها عباس رضوان اللى كان نائب رئيس وزراء .. وكان يجتمع أيضاً مع عبد الناصر فى أوقات كثيرة .. وهذه الخلايا ابتدت تنسع وتكبر ..

• ويقول إسماعيل فريد : « الخلية الأصغر .. أو الأقل لا تعلم عن الخلية العليا شيئاً .. علشان المحافظة على السرية .. يبقى أنا بأعرف الضباط اللى فى خليتى .. زائد بأعرف الخمس ضباط أو الأربعة التانيين اللى سوف ينضموا لى فقط .. لكن ما أعرفش خلية زميلى إيه .. عمل كده علشان تبقى السرية مضمونة .. طبعا كان كل ده بيصب فى الخلية العليا اللى إحنا لا نعرفها ..

• ويذكر مصطفى كامل مراد : « يعنى بعد حرب فلسطين ما انتهت فى ٧ يناير ٤٩ فؤاد باشا صادق اللى هو كان قائد الحملة لأول مرة عمل مؤتمر الضباط فى رفح وخطب قال « أنا كنت بأحارب موسى سورتوك (واحد فى إسرائيل) وكان فيه موسى سراتيك بتحاربنى فى مصر .. والمشكلة مش هنا المشكلة فى القاهرة .. وأنا جئت من المعاش وأنا عارف راجع المعاش تانى .. » طبعا العملية دى يعنى هزنتى قوى معناها إن فيه خيانة فى القاهرة .. وكنت أنا

منزوحاً وعازراً أرجع لمراتى .. جاء كمال حسين قال لى أنت متضايق ليه ؟ قلت له الكلام اللي أنت سمعته النهاردة كلام لا يسر .. قال لى ما تيجى تدخل معنا الضباط الأحرار .. ولم أسأله ما هى الضباط الأحرار ولا أهدافها .. وقلت له موافق .. وبعد كده دخلت الخلية بتاعة محمد أبو الفضل الجيزاوى فى المدفعية المدرعة لأن هو كان رئيس الخلية فى الـ ٤ دول بتوع المدفعية .. وبدأنا نجتمع كل جمعتين مرة واحدة بعض الساعات .. وبدأنا توزيع منشورات على الضباط .. وبعدين اكتشفت فى شهر مايو ٥٢ وأنا كنت فى سنة ثانية كلية التجارة .. إن مباحث أمن الدولة أو كانوا يسموها « القسم المخصوص » .. بتسأل عنا » .

• **ويقول أحمد كامل :** « ولولا إن جمال عبد الناصر هو اللي على رأس التنظيم ما كانش أحد راح .. عبد الناصر طول عمره معروف برجولته وشهامته وإخلاصه لوطنه وصدقه فعرض علينا إننا ننضم لتنظيم الضباط الأحرار .. فانضمينا .. كان أيامها مافيش غير شوية المنشورات .. وكنا نقعد نوزع منشورات » .

• **ويقول أمين شاكر :** « عبد الناصر قال لى على تنظيم الضباط الأحرار .. وقال إن موضوع سلاح الإشارة ده له أهمية كبيرة جداً .. هو اللي بيعمل اتصال من القاعدة الخلفية إلى الجندى الأمامى .. وقال لى : سعد توفيق أنا كنت مكلفه بإنه يكون خلايا للضباط الأحرار فى السلاح لكن ده كان موجوداً بره السلاح فمش قادر يقوم بهذه العملية .. إيه رأيك تقوم بها .. فسألت بعض الأسئلة علشان أستوضح حقيقة أهداف هذا التنظيم فرد عليها .. فقلت له أنا قبلت .. وبعدين مرة وأنا قاعد فى الميز جاء سعد توفيق وقعد معايا لقينته بيكلمنى وبيقول لى .. ده فيه جمال عبد الناصر وعبد الحكيم عامر أنت تعرفه كنا مع بعض فى فلسطين .. عاوزين يقابلوك .. فقلت له ليه ؟ .. قال لى ما أعرفش .. فقلت له يتفضلوا .. أنا داعيهم على الشاى فى « هليوبوليس بالاس » .. رحنا هناك لقينا حيدر باشا بتاع السجون قاعد .. كان قائد عام الجيش .. فأول ما شغنا قال لنا بتعملوا إيه هنا ؟؟ » .

• **ده قريب عبد الحكيم عامر ؟**

• « قريب عبد الحكيم عامر ابن خالة أمه على طول .. فقالوا له لا مافيش حاجة يافندم .. وأخذنا بعضنا ودخلنا جوه .. وكلمنى عبد الناصر قال لى إحنا سمعنا عنك وإحنا فى تنظيم اسمه كذا فى الجيش .. فهل عندك مانع إنك تنضم لهذا التنظيم .. قلت له لا .. ومن هذا التاريخ بدأ انضمامى .. وابتدئت أنا أجند الضباط اللي هم تلامذتى .. ومن هذا اليوم عينت المسئول عن تنظيم الضباط الأحرار فى سلاح الإشارة .. وبعدين هو اختارنى علشان أبقى عضو اللجنة العليا للضباط الأحرار فى المنطقة المركزية للقاهرة .. اللي هى أصبحت بعد كده مجلس قيادة الثورة » .

• **ويقول المهندس جمال عبد الحكيم عامر :** « والدى جند أكبر عدد من الضباط .. وهو اللي جاب محمد نجيب ورشحه » .

• ويتأمل حسين الشافعي الموقف والذكرى .. ويقول : « أى حدث فى الكون هو قدر من الله يجريه على أيدى أناس ويهيء لهم الفرصة .. وإذا كان هو أعطى الإذن فهو يسر .. وعلامة الإذن التيسير .. وأنا لا أحب أقعد أقول أنا عملت وأنا سويت .. لأن الفعّال هو الله .. كون إن أنا ربنا يفتارنى علشان يجرى قدره على يدي إذا كان خيراً ده يبقى فضل من الله .. ويمكن بالمدخل ده الواحد بيتكلم عن الثورة .. كلامى يبدأ من سبتمبر سنة ٥١ .. مر مرور عابر جمال عبد الناصر على إدارة الجيش التقينا على السلم وأنا المكتب كان فى الدور الأول اللي هو دلوقتى وزارة الدفاع .. وأنا عارف إنه من الضباط الأحرار لكن لم أكن أعرف فى هذه اللحظة إن هو على رأس التنظيم .. رغم إنى أعرفه من مدة طويلة - وهذا الكلام أقوله لأول مرة - وبصيت لقيت نفسى عمّال أكلمه وأثيره وأكد أحاول أن أجنده .. وهو كعادته .. فضل يسمع ولم يغضب .. الكلام ده كان قبل الظهر .. بصيت لاقيت على المغرب باعت اثنتين علشان يبلغونى .. لأنه يظهر أحس فى كلامى ما لم يكن يتصور أكثر منه .. بصيت لاقيت باعت لى ثروت عكاشة وعثمان فوزى ليبلغونى أن أتولى قيادة المدرعات فى السلاح .. وأنا ليس لى صلة من فترة بالدفع الجديدة اللي تخرجت .. بحكم عملى فى إدارة الجيش .. والحقيقة استصعبت المهمة وأنا خارج السلاح » .

• الوسيلة الثانية التى اتبعها التنظيم الجديد كانت المنشورات ..

• ويقول خالد محبى الدين : « كنت أنا مسئولاً عن قضية المنشورات وتوزيعها .. والبرنامج وإنشاء تنظيم الفرسان .. لغاية ما حسين الشافعي جاء واستولى على الرابطة .. هو تولى مسئوليته لأن هو أقدم وكان عنده قائد سيارات مدرع .. فأولاً كنت مسئول تنظيمى عن سلاح الفرسان .. ومسئول عن المنشورات ومسئول عن البرنامج » .

• مين كان بيكتب المنشورات يا قندم ؟

• « كان بيكتبها ساعات جمال عبد الناصر وساعات عدد من الضباط .. وساعات كان لنا صديق اسمه أحمد فؤاد بيكتبها .. وأنا ساعات كنت بأكتبها .. لكن بنراجعها سوا .. وبعدين طبع وتوزع » .

• ويضيف عباس رضوان : « عبد الحكيم عامر كان بيراقب على فى الامتحان .. وبعد ما أخذ الورق بتاع الامتحان قال لى افرض إنى أنا احتجت لك .. قلت له خلاص اعتبر الموضوع منتهى .. وفى خلال أسبوعين يمكن من هذا الكلام وجدت شبه اتفاق على أن نتقابل أنا وهو وجمال عبد الناصر وإسماعيل فريد الأخ اللى كان فى محافظة الدقهلية .. والأخ محمد أحمد البلتاجى اللى كان فى محافظة الجيزة .. اجتمعنا إحنا الخمسة فى منزل إسماعيل فريد .. اتكلم عبد الحكيم عامر واتكلم جمال عبد الناصر عن وجود تنظيم الضباط الأحرار .. فرحبت وابتدت تكون لنا جلسات كل عشرة أيام وكل أسبوعين - فى سرية طبعاً .. كانت ابتدت طباعة منشورات الضباط الأحرار .. إلى أن كلفت أنا والأخ إسماعيل فريد بتوزيع هذه النشرات -

على الضباط - اللى نعرف إنهم من التنظيم .. فعلاً كان بيجبلى الأخ خالد محبى الدين بالمشورات .. وحتى كنت أستغرب إنه يمشى من على الباب .. بالمران عرفت إنه ده دارس أمن أكثر منّا فعلنا وقمنا بهذا الواجب مضبوط .. وكنا بنغطى كل منطقة مصر الجديدة والزيتون والحلمية ومنشية البكرى والعباسية » .

• **ومين اللى كان بيمول ورق البوستة ؟**

• « والله إنا كان فيه اشتراك شهرى فى الوقت ده .. يمكن دلوقتى يبقى قليلاً قوى .. المبلغ كان على ما أذكر ٥٠ قرش .. وهذا الاشتراك كنا بنجيب به المطبوعات .. وكان فيه مجموعات عليها الطباعة وأخرى عليها الكتابة » .

• **ويقول توفيق عبده إسماعيل :** « وكان من حسن الظروف إن جمال عبد الناصر وكمال الدين حسين وزكريا محبى الدين كانوا الـ ٣ مدرسين فى كلية أركان حرب .. فأولاً استقطبوا عدد من تلامذتهم .. ثانياً كانوا بيلتقوا كل يوم مع بعض لقاء طبيعياً لأنهم مدرسين فى وحدة واحدة .. وبدأوا يستقطبوا عناصر أخرى وفى نفس الوقت يعتمدوا على شخصياً كعنصر فى الدبابات .. وكان ثروت عكاشة العنصر الرئيسى لهم فى سلاح الفرسان .. وظهر حسين الشافعى على المسرح وما كانش معانا فى هذا الوقت داخل السلاح .. كان منتدباً خارج السلاح إنما كان ساكن فى مساكن الضباط فكان بيمر علينا الصبح علشان يروح مكتبه من داخل السلاح .. فبدأ يتصل بى ونتحدث فى الأمور العامة بتاعة الجيش وما أصابه والبلد وما أصابها من الملك .. ومن التصرفات التى تمت فى هذا الوقت .. واستمرت على علاقة بالـ ٣ أخوة حتى مارس ٥٢ فى انتخابات نادى الضباط .. وفى سنة ٥٠ قابلنى الصاغ خالد محبى الدين فى هذا الوقت فى النادى الأهلى .. وكان فى هذا الوقت سيقنا بكام شهر .. أول انقلاب فى سوريا سنة ٥٠ وكانت طبعاً ده علامة من علامات التشجيع لضباط الجيش فى الدول النامية والدول العربية على وجه التحديد .. إننا نفكر نعمل حاجة مثيلة بسوريا .. فلما قعد معايا خالد محبى الدين أكثر من جلسة كنا نتجاذب الحديث فى ملاعب الإسكواش ثم فى حديقة الشاى فى النادى الأهلى مع زملاء آخرين .. وتكلمنا عن إصلاح الأوضاع وقلت له وجهة نظرى إن الفساد الموجود فى مصر أساسه النظام الملكى .. والملك بالذات فى هذا الوقت كان بدأ يتصرف تصرفات غير لائقة وغير وطنية وفيه تهم كثيرة موجهة له فى حرب فلسطين .. ففى الحقيقة كانت الجلسة الأولى اللى فتح معايا الموضوع فيها بجد .. كانت هى البداية لمشاركى فى التنظيم عن طريق توزيع المنشورات واستقطاب أعضاء جدد فى التنظيم .. ثم الالتقاء المستمر والدورى مع السيد خالد محبى الدين .. مر مارس وأبريل ومايو وإنا على اتصال مستمر بقيادات الضباط الأحرار بتاعتنا داخل السلاح حسين الشافعى وخالد محبى الدين وثروت عكاشة وكان بيشاركى فى عملية الدبابات زميل عزيز أحمد إبراهيم حمودة بنقعد مع بعض .. نستعرض هل فلان يصلح أم لا ويكلمه إزاي .. بقى عندنا عدد فى هذا الوقت فى يونيو ٥٢ أكثر من ١٠ ضباط فى السلاح بإمكانهم أن يشاركوا بالدبابات فى أى عمل مطلوب منهم » .

• **ويقول فتح الله رفعت :** « كان بعض المنشورات ببكتب قبل ذلك فيها الضباط القوميين أو الضباط الوطنيين أو أى أسماء أخرى .. وكنا فى أول الاجتماعات مجموعة ضباط : مصطفى كمال صدقى وحسن فهمى عبد المجيد ومحمد أبو الفضل الجيزاوى وأحمد المصرى وعبد الفتاح أبو الفضل وآخرين .. يعنى كنا بنقعد ونشوف ونتكلم فى حالة البلد وبعدها نكتب منشورات ونوزعها بالبوستة أو باليد فى بيوت الضباط ده علشان نخلق رأياً عاماً .. وكان فيه واحد اسمه حسن صالح كان من ضباط المدفعية والتكوينات .. جمال عبد الناصر كان بيحرص على ألا يدخل فى تلك التكوينات إلا بعد ما هو شخصياً يقعد معاه .. وكان يقعد معانا بالساعتين والثلاثة .. ويتناقش فى الثورات السابقة : ثورة غاريلدى .. ثورة كمال أتاتورك .. والدروس المستفادة .. يعنى اشتدت الأعمال بتاعتنا بحيث إن إحنا كنا على طول بتناقض الضباط اللي بنشعر إنهم ضباط وطنيين وأقوياء بحيث إنهم يتحملوا مسئولية الحاجة الضخمة الكبيرة اللي اتعملت فى سنة ٥٢ » .

• **وأسأل مبارك رفاعى :** هل كان فيه اشتراكات بتجمعوها ؟

• **كانت اشتراكات شهيرة وكانت ضئيلة .. المال ما هوش الهدف .. هو الهدف جمع تنظيم أكثر منه جمع مال .. وكان فيه بعض المنشورات بتوزع » .**

• **فى فبراير عام ١٩٥٠ توالى المنشورات باسم « الضباط الأحرار » ..**

• **ويقول خالد محبى الدين :** « جمال منصور كتب المسودة الأولى للمنشور الأول .. واقترح أن نوقعه باسم الضباط الأحرار » .

• **ويقول جمال منصور :** « وضعت فى نهاية المنشور الاسم الجديد « الضباط الأحرار » هذا الاسم الذى عبر عن وجه الثورة الجديد .. وتحت هذا الاسم سارت الثورة فى مدارها إلى أن تحقق نجاحها فى فجر ٢٣ يوليو ١٩٥٢ .. وحينما نجحت الثورة .. دنا عبد الناصر من خالد محبى الدين وقال له « إنه أمر يدعو للإعجاب حقاً .. هذا الاسم الذى أطلقه علينا جمال منصور ونذيل به أول منشور فى حركتنا .. يصبح الاسم لأقوى جماعة يتحدث عنها العالم كله الآن » .

• **ويقول توفيق عبده إسماعيل :** « فكرة تسمية الضباط الأحرار جاءت من زميل اسمه جمال منصور كانت فكرة تسمية وشراء آلة علشان يطبعوا عليها نشراتهم وبدأوا يصدروا نشرات فى أواخر ٤٩ .. النشرات كانوا يبعثوها لكل الضباط تقريباً اللي بيتلقوا النشرة طبقاً للأوامر العسكرية .. كان مفروض إنه يبلغ المخابرات إنه تلقى نشرة سرية .. اللي يتلقاها ويتكلم عنها بيبقى ده مجال للحديث مع زملائه علشان يعرفوا هل هو يتكلم عنها مؤيد أو معارضاً .. إذا كان مؤيداً يبتدى الاقتراب منه » .

• **ويقول محسن عبد الخالق :** « ابتدئنا نطلع منشورات بأسماء مختلفة .. ولم تكن المؤسسة الوحيدة التى تزاوّل هذا العمل داخل الجيش .. كان فيه مؤسسات أخرى .. ولكن كانت أقوى مؤسسة وأصدرت منشورات باسم ضباط الجيش بناء عليها تم اعتقال بعض الضباط منأ ..

وكان الفضل لجمال منصور أنه أصدر منشورا بعد اعتقال الضباط .. وهنا وضع الملك في موقف أن يختار بين ضباط الجيش وبين إبراهيم عطا الله وخرج إبراهيم عطا الله وأتى حيدر باشا .. وأنتت الكوليرا ففعلت تصرفاتنا واجتماعاتنا .

• **ويقول فتح الله رفعت :** « في الأول كانت هناك تكوينات عسكرية هذه التكوينات العسكرية كان كل منهم وطنياً .. وبعدين تيجي لنا منشورات موقع عليها أسماء مختلفة .. « الضباط الأحرار » أطلق هذا الاسم في آخر سنة ٥٠ واللى أطلقه الأخ جمال منصور سفيرنا في فرنسا وفي عدة بلاد .. أطلق عليهم الضباط الأحرار ووقعت المنشورات باسم الضباط الأحرار » .

• **ويقول أحمد أبو الفتح :** « فرح عبد الناصر لإن أحمد فؤاد قد وعده بتحريض وطبع المنشورات .. وفرح أحمد فؤاد إذ أن انضمام الضباط الأحرار لمنظمته الشيوعية قد يبشر ويفتح للشيوعية في مصر أفاقاً واسعة النطاق » .

• **ويقول اللواء عبد المتعم أمين :** « لم يكن انضماماً للضباط الأحرار .. كان سنة ٥٠ كان حضر إلى كمال الدين حسين وقال لى إنت عارف إن إحنا بتروح المنشورات .. وعندنا التنظيم بتاع الضباط الأحرار .. إنضم إلينا .. قلت له والله أنا عندي التنظيم بتاعى وبأطبع منشورات .. لكن يوم ما عاوزين تعملوا حاجة قولوا لى .. ويوم ما أكون مستعداً أعمل حاجة سوف أقول لكم علشان نعملها كلنا سوا » .

• **وبدأت الأزمة الاقتصادية الاجتماعية تطفو على السطح وهي أزمة بين الفلاحين والعمال من ناحية .. وبين كبار ملاك الأراضي الزراعية ورجال الصناعة من ناحية أخرى .. وعانى أبناء الطبقة الوسطى من ارتفاع تكاليف المعيشة وانتشار البطالة ..**

• **ويقول كمال الدين حسين :** « الفلاح المصرى طول عمره .. إلى أن قامت الثورة مظلوم .. أنا شفت بعينى الفلاحين حفاة عراة ما عندهم ش فى بيتهم غير الحصيرة وزلعة المش ورغيف الذرة لو أمكن إن ده يتيسر يبقى نعمة كبيرة جدا من عند ربنا .. فكان ده حال ما يرضيناش أبدا ده طبعاً » .

• **واستحكمت روح الإحباط .. وأدى إلغاء النحاس معاهدة سنة ٣٦ فى أكتوبر سنة ٥١ إلى مصادمات دامية فى منطقة القناة قادها شباب القذائين والإخوان المسلمون ..**

• **ويقول خالد محبى الدين :** « وقف النحاس باشا أمام مجلس النواب وقال « من أجل مصر وقعت معاهدة ٣٦ .. ومن أجل مصر أطلبكم اليوم بلإغائها » .. وبدأت العمليات القذائية فى القناة » .

• **ويقول أحمد المصرى :** « النحاس باشا ألغى معاهدة ٣٦ وأصبح الشارع فى مصر مستناراً إثارة شديدة جداً ، القوات الإنجليزية فى قناة السويس مستنارة إثارة شديدة جداً .. وعلى الجيش المصرى أن يواجه هذه المسألة .. ويعثونا كلنا تقريبا لنواجه القوات الإنجليزية فى طريق السويس فى المنطقة بصفة رسمية علشان نواجه دخول الجيش الإنجليزى إلى القاهرة .. هذه

المرحلة انتهت بعملية السويس المشهورة بتاعة إخواننا رجال الشرطة .. وأصبح فيه مهانة شديدة تجتاح كل الناس .. الضباط والشعب » .

• **ويقول أحمد أبو الفتح :** « فى ديسمبر سنة ١٩٥١ نسف القذائيون مخازن الذخيرة بالنل الكبير .. وبهاجمون القوافل البريطانية .. والإنجليز يبيدون « كفر عبده » من الوجود ويدبرون جريمتهم الكبرى الثانية فى الإسماعيلية فى منطقة فنار الحجر » .

• **وفى انتخابات نادى الضباط .. تمكن الأحرار من إنجاح مرشحهم للرئاسة .. اللواء محمد نجيب .. فى مواجهة مرشح الملك .. اللواء حسين سرى عامر ..**

• **يقول محسن عبد الخالق :** « فؤاد صادق باشا تخلى عن عبد الناصر لإن السراى أقنعتة إن حتجيبه رئيس أركان فتخلى .. فرشح محمد نجيب وهو اختيار جيد لأنه كان مشهوراً عنه الشجاعة والإحترام » .

• **ويقول خالد محبى الدين :** « محمد نجيب كان مشاركاً وموجوداً وعلى صلة بس ماكنش له دور تنظيمى .. أولاً لواء حركته محسوبة .. وأى محاولة لضمه للخلايا كانت تنكشف جداً .. هو الراحل كان على علاقة حسنة بنا وراجل وطنى ودخل باسمنا انتخابات نادى ضباط الجيش .. وكان بيبيلغنا بكل المعلومات التى تصله ونبلغه بأية معلومات .. وفى الوقت نفسه لما قلنا له إن فيه حركة حقوق قال أنا مستعد أتولى القيادة وأشارك .. قلنا له إنت ما تشاركش خليك فى الأمان بتاعك » .

• **ويقول أمين شاكر :** « كان فوزنا فى انتخابات نادى الضباط تأكيداً لنجاح خططنا السرية » .

• **وأسأل رشاد مهنا : متى بدأت علاقتك بالضباط الأحرار ؟**

• **« أنا ليس لى علاقة بالضباط الأحرار خالص » .**

• **التفتيت بهم إذن بعد الثورة ؟**

• **« هذا نظام كان بينهم وبين بعض .. لا دخل لى فيه .. ولا انضميت إليه .. ولا أعرف عنه شيئاً » .**

• **ويقول عبد المنعم أمين :** « وهو ده من الأسباب اللى أنا قلت لازم نجتمع كل واحد له شخصية فى الجيش .. نجتمع ونجيبه هنا .. يعنى مش ضرورى يكون عضواً فى مجلس قيادة الثورة .. على هذا الأساس أنا كلمت رشاد مهنا علشان نجيبه .. لأنه من الشخصيات البارزة فى الجيش ومن الشخصيات اللى أنا عاشرتها وأعرف عنها الاتزان المطلق والوطنية المطلقة .. لأنه لن يحيد علشان كده ولا كده » .

• **ويضيف رشاد مهنا :** « قالوا إحنا عاوزين نجرب أنفسنا قلت إذا كنتم عاوزين تجربوا نفسكم أنا أجربكم .. وكان فى هذا الوقت ببنى كعضو فى مجلس نادى الضباط وبين السراى بعض سوء التفاهم .. قلت إذا أمكنكم ساعدونى ونسير لحد ما نكسب الجولة .. قالوا لى وهو كذلك » .

- نقدر نقول إن انتخابات نادى الضباط حضرتك أوحيت لهم أن يقوموا بها ؟
- « نعم » .
- طيب مين كان من الحاضرين فى الجلسة ؟
- « كان موجوداً زكريا محبى الدين وعبد اللطيف بغدادى وكان جمال سالم .. والله أعلم كان حسن إبراهيم أم لا .. دول كلهم كانوا موجودين » .
- لكن أحداث ٢٣ يوليو نفسها حضرتك لم يكن لك دوراً فيها ؟
- « لما دخلوا معى فى أحداث النادى غطت أحداث النادى على كل شىء .. وأصبحت المعركة ما بين الرئاسة وبين النادى فى صورة محمد رشاد مهنا لإنى كنت أقود المعركة وأقف أقود الجماعة وأقود الاجتماعات .. وفهمت إنهم عاوزين ثورة قلت مافيش مانع .. أنا لها ومشينا مع بعض على الأساس ده .. إلى أن اترقيت ونقلت إلى العريش .. كانت صلتى بهم ثقل جداً لإن إحنا اتفقنا إن الصلة لازم تكون شخصية لا تليفون ولا مكاتبة ولا حاجة ولازم اللى بيحى ضباط .. وقلت لهم إن المخابرات سوف تقول إن رشاد مهنا سابكم وإنه استقال وساب النادى .. لا أبداً أنا كفى أن أقول لكم الحقيقة .. أنا رايح العريش .. إلى أن جاء فى اجتماع خطير جداً .. آخر اجتماع للنادى .. حضرت من العريش إلى القاهرة وأعانتى الله سبحانه وتعالى على هذا الاجتماع وانتهى على خير .. ورجعت العريش تانى .. مع إنهم ذكروا فى كتبهم إنى هربت للعريش .. أنا مش فاهم أهرب من القاهرة للعريش يعنى إيه لم أفهم لها المعنى .. وهنا الجيش وهناك معظم الجيش .. وهناك إحنا جنب إسرائيل وتحت المخابرات .. واللى هنا هو اللى هناك .. لم أفهم هذا المعنى !؟ »
- ويقول جمال الليثى : « حضرت معاه المعركة الكبرى بتاعة نادى الضباط .. وإزاي كنا عاوزين نرجع محمد نجيب ونرجع التنظيم ونسقط المجموعة بتاعة سلاح الحدود .. وفعلأ نجحنا فيها جداً .. وأذكر فى هذا يوم إن جمال عبد الناصر قاعد فى الصفوف الخلفية قاعد منتبهاً عمال يشوف كل واحد داخل وخارج وبيعطى تعليمات بإشارة من طرف إيده .. فكانت أول مشكلة إن العدد غير كامل .. فكلف بعض الضباط .. منهم أنا ومنهم محسن عبد الخالق إن إحنا نشوف طريقة .. فكنّا ندخل يعدونا وبعدين نروح من على سور النادى ننتظ أنا ومحسن ٢ - ٣ آخرين وندخل يعدونا مرة ثانية لغاية ما العدد اكتمل .. فاجتمعنا الجمعية العمومية .. وإلا كان الاجتماع مش حيتم !! » .
- قبل ذلك وبعده اكتتفت حالة من القلق العام المدنيين والعسكريين .. قادت فى النهاية إلى أحداث أطول يوم فى تاريخ مصر المعاصر .. وبدأت صور الانهيار السياسى على أشدها ..
- وكان حريق القاهرة نقطة تحول للضباط الأحرار .. أو كان كما جاء فى كتاب « البحث عن الذات » للسادات : « جرس الإنذار .. الذى عجل باستعدادنا للانقضاض » ..

• وسألت الملكة السابقة ناريمان : تفكرى الحريق كان سبباً فى قيام ثورة ٢٣ يوليو ؟

• « أفكر عدم ظهور الملك فى الجيش .. والمنشورات كانت فيها طلبات الجيش .. أنا أخذت واحدة منها ووضعتها جنبه .. طلبات الجيش أو مجموعة الجيش التى على رأسها وزير الدفاع حيدر باشا - خصوصاً بعد ١٦ سنة منتظر ولّى العهد - والمنشور كان يقول إنهم عاوزين ٢ مليون جنيه .. ورفع مستوى معيشتهم .. مش نياشين » .

• التى هم الضباط الأحرار ولا الجيش كله ؟

• « الجيش ككل .. وكان لازم يقول خطبة ما أعرفش ليه ترك حيدر باشا يقولها للجيش » .

• ما كانش عاوز يواجههم يمكن ؟

• « بأستغرب .. أنا كنت وراه بس على كرسى متنقل » .

• ليه يافندم ؟

• « كان لسه آثار الولادة » .

• ويقول عادل ثابت : « كان اللواء حسين سرى عامر ومجموعته يمدون الملك بتقارير دقيقة عن الضباط الأحرار .. وكان حيدر قد انحاز إلى جانب متمردى الجيش ضد فاروق .. وانطلق حيدر إلى الاسكندرية لإبلاغ الملك أن تقرير حسين سرى عامر غير صحيح » ..

• ويقول أمين شاكر : « حصل حريق القاهرة .. وفى تصورى إن الذى عمل هذا الحريق هى السفارة البريطانية واتضح إنهم جاييين ناس فى معسكر كامب فريد وديروهم على عملية الحرائق دى .. وكما تعلم وزير الداخلية حاول أن يتصل بحيدر باشا ٣ مرات ولم يتمكن .. اضطر يروح بنفسه إلى قصر عابدين ونزل حيدر باشا قابله .. وبناء عليه نزلنا إحنا كقوات الجيش .. وأنا كنت ضمن الضباط الللى نزلوا .. وشقنا البلد مولعة .. إنما كان واضح جداً إن كان فيه أفراد مدربين هم الللى كانوا بيقودوا عملية الحرائق والمظاهرات .. وكما تعلم « الفرست كلوب » و« اللويدز بانك » حرقوهم كنوع من التعمية .. ولكن ظهر الهدف السياسى من هذه العملية .. وهو إقالة حكومة الوفد وتشكيل حكومة جديدة برئاسة على ماهر .. وخرج الوفد لأنه كان يتفاوض مع البريطانيين على ضرورة تعديل أو إلغاء إتفاقية ٣٦ وانسحاب القوات بناعتهم من الأراضى المصرية » .

• ويقول عبد اللطيف بغدادى : « كنا مجموعة وطنية متحمسة .. فدائين .. قيادة جماعية .. من قبل الثورة والرأى شورى بينهم .. لما حصل حريق القاهرة وماعملناش حاجة .. والجيش نزل وماعملناش حاجة .. أنا قلت لهم « باى باى » .. سلام عليكم .. قلت لهم لما تكونوا جاهزين ومستعدين تعملوا حاجة .. أنا جندى فى الطيران .. أبقا كلمونى .. وسبتهم وقعدت ٦ شهور قبل الثورة بعيد » .

- **ويؤكد هذا المعنى أمين شاكِر إذ يقول :** « هنا بقيَ ظهرت وجهتا نظر .. وجهة نظر كان ينزعها بغدادى إلى إحنا ما دام نزلنا وسيطرونا على المواقع الاستراتيجية فى البلد أن نعلن قيام الثورة فى يناير سنة ٥٢ .. عبد الناصر ما وافقش .. وبرضه عدد من أعضاء اللجنة العليا ما وافقوش .. لإنه قال علشان تبان إنها ثورة لازم نتبث للشعب إن إحنا قادرين نحرك القوات بناعتنا .. إنما القوات دى نزلت بأوامر من القيادة الموجودة .. وبناء عليه انتصرت وجهة نظر عبد الناصر ولم نعلن الثورة » .
- **ويقول توفيق عبده إسماعيل :** « فى يناير ٥٢ فى حريق القاهرة فكر الضباط الأحرار إنهم يعملوا عملية مشابهة لعملية عرابى .. مطالب للملك وخلافه .. ورجعوا لمجموعة سلاح الفرسان الأصلية الللى كان فيها الأخ جمال منصور ومصطفى نصير وسعد عبد الحفيظ .. ودى كانت مجموعة صلتها الأصلية بجمال عبد الناصر وخالد محيى الدين .. فلقوا إن عدد المجندين معاهم عددأ مش كبير .. فأجلوا الفكرة تماما » .
- **ويقول مأمون الهضيبي :** « لما حصل حريق القاهرة عام ٥٢ كان جمال عبد الناصر وضباط الثورة ومجدى حسنين عندهم أسلحة .. فجابوها وأخذها حسن العشماوى وهو الللى راح حطها فى العزبة بتاعتهم فى الشرقية .. والللى عمل الرسم بتاع المخبأ والللى خططه بإيده جمال عبد الناصر .. وبعدين مرت الأيام واستولوا على هذه الأسلحة وقالوا إن الإخوان بيعيدها لكذا وكذا !! » .
- **وكان الوفد هو حزب الأغلبية .. وكان اليسار واليمين والإخوان قد احتلوا مكاناً فى الحركة الشعبية ..**
- **وتخلص الملك من حزب الأغلبية بإقالة وزارة النحاس السادسة والأخيرة بعد الحريق ، وتعاقبت وتعددت الوزارات فى فترة قصيرة جدا وحرجة جدا .. وحل مجلس النواب فى مارس ..**
- **حدثت حالة من عدم الاستقرار الحكومى .. حتى أنه تشكلت أربع حكومات فى أقل من ستة شهور .. ومع مرور الوقت .. تحولت حالة القلق إلى حالة من السخط ..**
- **ويقول البابا شنودة :** « أنا فاكِر إن فى أسبوع واحد تغيرت ٣ وزارات لدرجة أن أحد الوزراء كانوا يسمونه وزير الساعة لأن ما قدش غير ساعة واحدة » .
- **وتقول الملكة السابقة ناريمان :** « والله كان عبارة للأسف ما أقدرش أصورها .. كان كديفيليه .. وزارات متتالية ومتعاقبة » .
- **وأسأل نجيب محفوظ : مصر ما قبل الثورة ٢٣ يوليو .. الشهور القليلة الللى قبلها ؟**
- **« الحقيقة على ما أذكر صادفت شهوراً كانت مثلاً للفوضى السياسية بعنى كانت واصلة لدرجة من التحلل خلتها موضع السخرية .. لدرجة إن لاقينا إن الوزارات بتتكون إزاي وتروح إزاي**

وكانت قصيرة .. يعلنوا عن رئيس وزارة ويجيبوا واحد تاني وحكاية .. لغاية الواحد بقى مش فاهم حاجة فى البلد .. يعنى كانت فترة تسبب غريبة جداً » .

* **ويضيف عباس رضوان :** « كان فيه الخلل السياسى اللي كان موجوداً فى الحكم فى مصر .. وحينما فى يونيه تقريباً أو من أول مايو بقت فيه ثلاث وزارات .. وزارة نجيب الهلالي وبعدين وزارة حسين سرى وبعدين وزارة نجيب الهلالي تاني .. وفى هذا كان موقفنا بقى واضحاً للسراى لدرجة إنه طلب من أحد الذين شكلوا الوزارة إنه يأخذ زوج شقيقة الملك فاروق إسماعيل شيرين .. وزير حربية » .

● **وفى منتصف يوليو فوجيء الضباط بالملك يصدر أمراً بإلغاء انتخابات النادى ..**

* **ويقول أمين شاکر :** « كان فوزنا فى انتخابات مجلس نادى الضباط دليلاً على تواجدها .. وكشف أسماها .. وبدأ التحدى سافراً .. وأرسلت إلى إيطاليا كنوع من الإبعاد » .

* **يقول عباس رضوان :** « نحى محمد نجيب .. واتحل مجلس إدارة النادى وأصبحت مشكلة .. فهدينا شوية » .

* **ويقول جمال حماد :** « على وجه التحديد يوم ١٦ يوليو ١٩٥٢ صدر القرار بحل مجلس إدارة نادى ضباط القوات المسلحة .. وأنا كنت عضواً فى مجلس إدارة هذا النادى عن سلاح المشاة .. فهذا الحل كان زى ضربة ساحقة لآمال ضباط الجيش فى هذا الوقت .. لأن معناها إنه أصبحت هناك معركة سافرة .. بين الضباط وقيادات الجيش وعلى رأسها الفريق محمد حيدر .. وبين الملك .. فكانت هناك آراء مختلفة كثيرة .. ما العمل فى هذا الموضوع .. وأنا بأعتبر إن حل مجلس إدارة نادى الضباط هو الذى عجل بقيام ثورة ٢٣ يوليو » .

* **وسألت ملكة مصر السابقة ناريمان :** حضرتك قلتي كان الملك « بايع » العرش فى أواخر أيامه .. تقصدى إيه ؟

* « أفكر إنه قدم بسلبياته مصر بسهولة على صينية فضة » .

* **تفتكرى ليه ؟**

* « دى حاجة بقى يرد عليها الملك أحمد فؤاد الثانى السابق .. إن شاء الله سوف تتصل به وتلتقى به » .

* **بس تفتكرى ليه كان « بايع » أو لو جاز لى أن أعير وأقول « مستبيع » ؟**

* « هو أخذ العرش وهو صغير .. وهى فعلاً مسألة السياسة كان مش غاويها .. يمكن حصلت له حاجات سلبية فى حياته .. منها أخته الأميرة فتحية كان زعلاناً منها جداً وأنا كنت حاضرة .. عاوزها ترجع فوراً من أمريكا .. وكان مثالا للتردد والشك .. ويعنى كان سايب كله فى الآخر .. ودى كلها قضاء وقدر » .

- وكان الضباط الأحرار يجتمعون لتدارس الموقف ورسم الطريق لتنفيذ الثورة ويخططون في صمت ..
- وكان الضباط يحيطون اجتماعاتهم بالكتمان حرصاً على السرية .. ويسابقون الزمن والقصر ..
- وبدأ العد التنازلي .. وحبس جميع الضباط الأحرار أنفاسهم انتظاراً للساعة المحددة ..
- ويقول محسن عبد الخالق : « كان الاتفاق إن مجموعة المدفعية يبقي لها مندوب مع جمال عبد الناصر .. تمثل المدفعية بواحد .. يمثل فيها الفرسان بواحد .. يمثل فيها الأسلحة المشتركة .. أصرينا أن نقوم بالثورة بعد الحريق مباشرة .. وكان هذا أمراً ميسوراً ولكننا وجدنا إننا غير مستعدين خصوصاً في التشكيلات الداخلية .. تحدى الملك لنادى الضباط .. لمجلس إدارة نادى الضباط وحله .. والإشاعة إنه حيعتقل الضباط .. دخلتنا في مشوار تنساق فيه مع الملك .. من سيضرب من ؟ لم يكن هناك خيار أماننا إلا أن نضرب .. أن نقوم بالثورة .. وضعت الخطة وقرأت الخطة علينا .. واعترضت المدفعية على الجزء الخاص بها ووضعت خطتها .. الجزء الخاص بالمدفعية كان ينحصر في صحراء العباسية وهذا رفضناه رفضاً باتاً ووضعنا خطتنا في إطار الخطة العامة .. وعبد الناصر كان قبل الثورة رجلاً ودوداً .. منصتاً .. طيباً .. ولهذا اخترناه » .
- ويتذكر صلاح الدسوقي فيقول : « كان في بيتي الأسلحة الخاصة بالضباط الأحرار في ذلك الوقت كنتت معروفاً إننى راغل رياضى ولا توجد أى شبهة سياسية تجاهى » .
- حضرته ضابط بوليس أو ضابط جيش ؟
- « ضابط بوليس .. وكان كل يوم تطلع فى الجرائد الأجنبية اسم صلاح الدسوقي لاعب فى بطولة مصر كذا وسافر بطولة العالم كذا .. وكنتت عضواً فى نادى السلاح الملكى فكنتت بعيداً كل البعد عن الشبهات .. وكان وقتها وجود السلاح فى بيتى مسألة حساسة ودقيقة .. لأن الظروف وقتها وده اللي أحب أقوله الإخوان المسلمين كان فيه معركة بينهم وبين الحكومة .. وكان فيه تفتيشاً مستمراً لكل الجهات والقاهرة قسمتت إلى قطاعات وأى إنسان يوجد عنده سلاح كانتت على طول أشغال شاقة مؤيدة .. دى كانتت إلى حد ما مهمة وأعتبرتت ده موضوع سر كبير .. وده اللى خلانى أعرف بقية أعضاء مجلس قيادة الثورة » .
- ويقول توفيق عبده إسماعيل : « عبد الناصر استطاع إنه يجيب المجموعات المتباينة .. مجموعة من الشيوعيين الماركسيين .. مجموعة من الوفديين .. وأحمد أنور .. جمال القاضى .. وسراج الدين .. وتوفيق عبده إسماعيل كنا ننتمى عائلياً للوفد .. ومجموعة من غير الوفديين خالص .. ومجموعة من الإخوان المسلمين .. دمج هذه المجموعات وتحريكها كان فى يد شخص واحد .. هو جمال عبد الناصر » .

- ولما كانت ثورة ١٩١٩ .. عند قيامها .. قد ضمت إلى جانب المسلمين إخوانهم المسيحيين .. فقد خطر على بالي أن أسأل البابا شنودة : لماذا كانت المشاركة المسيحية في حركة الضباط الأحرار وثورة يوليو تكاد تكون معدومة ؟
- « الثورة لما قامت بين جماعة من الأصدقاء في سرية تامة .. كانوا يجتمعوا الناس اللي بيطمئنونوا إليهم في المشاركة الثورية .. وطبعاً كثير من المسلمين لم يشتركوا .. ويرضه المسيحيين .. لأن دى كانت بين مجموعة معينة من الأصدقاء في الجيش .. وتعمل في سرية تامة جداً » .
- وأضاف د . ميلاد حنا : « هو كلمة ثورة مش مضبوطة قوى .. لأنه سنة ١٩١٩ كان تحركاً شعبياً .. أما في سنة ١٩٥٢ كان تدبيراً مخططاً لمجموعة تعمل في الخفاء .. فده له طبيعة وده له طبيعة .. في ٥٢ أنا سألت هذا السؤال لخالد محيي الدين وسألته لثروت عكاشة وغيرهما .. فهو واضح إنه في نقطة البداية .. كان فيه صلة مع جماعة الإخوان المسلمين .. لكن لما بعد كده اتلما الضباط الأحرار مع بعض أصبح الطابع بتاعها سرياً .. وبالتالي بتختار على أساس سرى وتختار على أساس الثقة المطلقة .. وكل الضباط من القيادات قالوا لى إحنا ما كناش متصورين إننا حنحكم .. وإلا كنا دعينسا على « حد قبلى » ودخلناه معانا .. ده كان كلامهم لى .. معتزدين .. فَوُت لنا دى .. كان لها ظروفها التاريخية ! »
- ويقول مصطفى أمين : « أنا كنت متوقعاً قيام الثورة قبل قيام الثورة بـ ٣ سنوات كتبت في الجرنال في « أخبار اليوم » سنة ٥٠ في الموقف السياسي إن إحنا نزيد ثورة » .
- وهكذا كانت مصر خبلى بالثورة .. وعجلت الأحداث المشتعلة والمتصاعدة .. بدرجة الغليان المتوقعة في النهاية .. وسارع الضباط بوضع الرتوش الأخيرة لخطتهم ..
- ويقول عباس رضوان : « كان الصيف ابتدأ .. اللي سافر واللى راح الإسكندرية .. وأنا في الإسكندرية تقابلت مع جمال عبد الناصر صدفة في سيدى بشر نمرة واحد المجانى .. مش في الأرستقراطية !! وبعدها قال لى .. الموقف يستدعى اتخاذ قرار نهائى وحتمولوا ترتيباتكم وأن كل يوم اجتمعوا من ٦ إلى ٩ عند إسماعيل فريد علشان نشوف إيه التطورات .. فلدرجة حتى إنى كنت بأذاكر في سكن مع ضباط مالهومش دعوة بالموضوع .. فبقيت أطلع بحجج عندى شغلانة أو عندى ميعاد .. إلى إن جاء يوم قال بكرة .. بكرة يعنى ٢٢ .. صدرت التعليمات بالقيام بالثورة » .
- ويقول أحمد حمروش : « في هذا اليوم كنت مسئولاً عن لجنة منطقة الإسكندرية وفوجئت وأنا أستعد للسفر للخارج بمجيء عز العرب عبد الناصر وشوقي عبد الناصر وقالوا لى إن جمال عبد الناصر عاوزك ضرورى في مصر .. كان الكلام ده حوالى يوم ٢٠ فنزلت مصر يوم ٢٢ وقابلت جمال عبد الناصر .. رحلت له البيت ما كنش موجوداً .. استنيتته على ناصية الشارع فجاء في العربية الأوسن الصغيرة بتاعته .. وكان معاه كمال الدين حسين وصلاح نصر والأميرالاي أحمد شوقي اللي مسك قسم القاهرة .. وفوجئت بإنه قال لى أهم كلمات سمعتها

في حياتي .. وهى إن الليلة دى الجيش حيتحرك .. علشان الملك دخل فى سباق مع الضباط الأحرار وجاءت لهم معلومات إنهم حيعتقلوا الضباط الأحرار .. وكانت الخطة موضوعة .. فهو سلمنى رسالة أروح بها للإسكندرية وهى إن الإسكندرية لا تتحرك فيها القوات .. وإنما تظل منطقة هادئة حتى لا يكون هناك تعارض بينها وبين القاهرة لأن هناك كان الوزارة وخفر السواحل والبحرية الملكية وكل القوات اللى مفروض إنها عملياً خاضعة للملك .. وماكنش فيه خطة أعدت لتحريك القوات » .

• **ويعلق رشاد مهنا فيقول :** « فى يوم من الأيام أتانى صلاح سالم وواحد اسمه كمال فؤاد .. قالوا إحنا قررنا نقوم بالثورة .. كانت مفاجأة بالنسبة لى !! لأننى كنت معتقداً إننى الرئيس بالنسبة لهم طبعاً .. لقيت العملية خلاص قلت لهم مين ؟ قالوا فلان وفلان .. واتفقنا بس الميعاد لم يتحدد .. فعدت ناقشتهم فيها .. الحاجة الفلانية اتعملت ؟ .. والإنجليز وراكم و ... و ... إلى آخر هذه العوامل .. قالوا إحنا عملنا الترتيب .. قلت لهم خلاص على بركة الله » .

• **ويقول ثروت عكاشة :** « وابتدينا - حسين الشافعى وأنا - نطمئن على إن سلاح الفرسان جاهز للعمل .. وإن به على ما أكرر ٣٢ ضابط سيشتركو وبه ٤٨ دبابة و ٤٨ سيارة مدرعة .. وشرحنا له إن هذه القوة كفيلة بإنجاح الثورة ولسنا فى حاجة إلى أية معونة من أى سلاح آخر .. طالما إن عندنا كتيبة مشاة ميكانيكية .. على أية حال انصرفنا وتوجهنا إلى ضباطنا لنعلنهم بالتزام نكتانهم حتى يأتى الأمر بركوب مدرعاتهم - اللى هى ساعة الصفر - وفى اليوم التالى كنت فى مكتبى برئاسة أركان حرب الجيش فمر على عبد الناصر ليلبغنى إنه قد تقرر تأجيل القيام بالحركة ٢٤ ساعة وبعد انتهاء الـ ٢٤ ساعة تحدد الموعد ليكون الساعة الواحدة والنصف بعد منتصف ليل ٢٢ يوليو » .

• **ويضيف حسين الشافعى :** « يوم ٢٢ أنا بدأت فى وحدتى لحد الساعة واحدة ونصف ظهراً .. رحلت الميز اتغديت ورجعت علشان يبقى وجودى ثابتاً .. وحوالى الساعة ٢ إلا ربع أخذت عربيتى « الموريس » اللى كنت أملكها واللى كنت شاريتها « ساكند هاند » من واحد اسمه محمود الكاشف .. كان أخوه ضابط معانا .. ورحلت فى الميعاد المقرر للاجتماع الأخير لتنسيق الخطة فى وضعها النهائى .. كان الاجتماع فى شارع فوزى العطيعى فى بيت خالد محبى الدين .. يعنى كل واحد منا حط عربيته على مسافة بعيدة ومشى لحد بيت خالد .. حضرنا الاجتماع وتم مناقشة الخطة .. وقالوا إن الميعاد الساعة ١٢ زى ما كنا متفقين يوم ٢١ .. أنا قلت .. أنا دلوقت مش حاقدر أتصل بأحد لإن العجلة مشيت .. ولم يبقى فيه مجال للاتصال بالضباط .. ودى سوف تكشف العملية ساعة قبل الميعاد .. بقى فيه تصميم إنها الساعة ١٢ خلاص .. إحنا نتحمل مسؤولية الساعة دى وربنا معانا .. وانتهى الاجتماع الساعة الرابعة والنصف » .

• **ويقول فتح الله رفعت :** « كان تحت إيد كل ضابط مسئول يوم ما حدث حريق القاهرة .. قوة من المشاة ومن الفرسان .. كان قائدها حسين الشافعى ومن المدفعية وأنا كنت قائدها .. دول سمح لهم بأن يأخذوا ذخيرة .. هذه الذخيرة هى التى أفادت يوم الثورة لإن وحدتنا اللى بأقول

لك عليها المشاة والفرسان والمدفعية .. سمح لهم بأخذ الذخيرة التي وزعت علشان القيام بالثورة .. قالوا ثانی يوم الضباط اللي لها وحدات تروح فى منزل فتح الله رفعت .. والضباط اللي ملهاش وحدات محاربة تروح عند محسن عبد الخالق .. وحصل .. وكان بيتى فى ٢٢ يوليو فيه جميع ضباط اللجنة التأسيسية اللي هى سميت بعد ذلك مجلس الثورة .. كان فيها من الطيران والمدفعية والسوارى والمشاة كل وحدة لها ناسها علشان يقوموا بهذه الثورة .. كان فى بيتى معظم رجال الثورة .. وكان زكريا محبى الدين هو المنوط له بعمل الخطة بالتفصيل تحت إشراف جمال عبد الناصر .

• **ويؤكد هذا الكلام كمال الدين حسين :** « كنا قبلها اجتمعنا عند محمد أبو الفضل الجيزاوى وكان عدداً كبيراً جداً من الناس يبدخلوا ويخرجوا .. واحتياطاً للأمن .. قلنا ما نتجمعش ثانی فى بيته .. ورحنا بيت زميل من زملائنا : فتح الله رفعت .. وواحد ثانى اسمه محسن عبد الخالق .. وإدبنا التعليمات النهائية هناك وكانت ساعة الصفر الساعة ١٢ وكان كلمة سر الليل « نصر » .

• **ويعود مصطفى كامل مراد بالذاكرة إلى هذه الليلة ويتذكر :** « فى ذلك الوقت كان فيه واحد من الأميراليات بوليس اسمه إمام إبراهيم .. كان بيكلم عضو مجلس نواب قريب لنا حلمى عبد البارى الله يرحمه فى بيتى .. إنتم عرفتوا أسماء شوية العيال دول الضباط الأحرار .. قال له أيوه عرفنا أغلبهم .. أنا خفت بصراحة .. جاء كمال الدين حسين وجاء بكباشى اسمه عبد المنعم أمين .. وقال إن إحنا سوف نتحرك فى منتصف الليل وتروحوا قشلاقانكم النهاردة وتجهزوا للعملية ونقول للعساكر إن فيه حالة طوارئ .. طبعاً بدأت النفوس تضطرب من إن الحكاية جد .. كنا إحنا أركاننات حرب فى رئاسة مدفعية الفرقة المدرعة إدونا إشارة إننا نجهز ونستعد للخروج فى حالة الطوارئ .. أنا قلت آه أبو الفضل الجيزاوى قال لأ .. ما فيش إشارات .. كل واحد عارف دوره وعارف المهمة بتاعته .. واللى عاوز يتحرك بوحدة يتحرك وانفضينا .. طبعاً أنا كنت فى حالة قلق وكانت مراتى حامل فى ابنتى الدكتوراه مها .. وكنا آخر الشهر وما فيش فى جيبى بضعة جنيهات كما هى العادة .. وكنت قلقاناً وخائفاً .. وكان فيه ابن خالتي .. كان يوزباشى فى البحرية اسمه محفوظ نظير .. قلت له ده فيه كذا وكذا قال لى يا خبر أبيض دى عملية خطيرة .. وقال لى خليك حذراً .. لم أطمئن إلا طمئنان الكافى .. رحنت مصر الجديدة قبل ما أروح أوماظة عديت على أخى محمود صدقى مراد قلت له على الموضوع .. وكان موجودا الصاغ صلاح كامل اللي هو أصبح لواء فيما بعد وتقاعد مع أخى محمود .. قال لى يا خير إسود ده أنا ضابط عظيم نوبانشى فى المدفعية .. دى العملية حقتى عملية كبيرة .. وليس وقام راح رئاسة المدفعية فى أوماظة .. ومحمود أخويا قال لى ربنا يوفقكم .. العملية خطر وفيها إعدام لو فشلت الحركة .. قلت له معلش إحنا مقتنعين بها .. وتوكلت على الله !!»

• **وكانت الشحنة الموقوتة قد حل موعد انفجارها .. واقتربت اللحظة الحاسمة ...**

الملف الثانى

وجاء اليوم الحاسم

• أطول يوم فى تاريخ مصر المعاصر هو الساعات الأربع والعشرون من يوم ٢٣ يوليو سنة ١٩٥٢ ...

• وفى السويغات الحرجة السابقة على حركة الضباط بعدما تسربت أخبارها إلى القصر .. كانت المسألة مسألة حياة أو موت ...

• ويتذكر حسين الشافعى فيقول : « يوم ٢٠ كنا بنتغدى فإذا بزوج أخت ثروت عكاشة يتصل تليفونيا ويبلغنا إن فيه تشكيل جديد للوزارة .. والتشكيل ده برئاسة الهلالى واللى جاى كوزير حربى هو حسين سرى عامر اللى كان قائد الحدود وكان موالياً للملك موالاة كاملة .. وظهر طبعاً موقفه فى عملية انتخابات نادى الضباط .. اتضح ساعة ما سمعنا هذا الكلام إن العملية مؤداها تصفية كاملة إذا جاء حسين سرى عامر .. رحنا سايين الأكل وطلعنا على بيت جمال عبد الناصر .. بيته فى هذا الوقت كان جنب محطة البنزين اللى فى الناحية الثانية من نفق المترو أمام المستشفى العسكرى .. طلعنا له كان فى الدور اللى فوق الأرضى وبلغناه طبعاً لم يكن فيه مجال إلا إنه لابد أن يكون التحرك بأسرع ما يمكن .. وتقرر إن الثورة تنفذ يوم ٢١ .. وبعدين لأسباب مختلفة منها إن بعض الناس اللى كانوا فى العريش .. لم يكونوا قد تواجذوا .. يعنى ده المبرر اللى أدى للتأجيل .. الميعاد كان ١٢ ليلاً .. إحنا بلغنا الضباط وبقي كل واحد فى موقعه يوم ٢١ لحد ما بلغناهم إن العملية تأجلت ليلة ٢٣ » .

• ويؤكد ثروت عكاشة هذا الكلام فيقول : « فى ٢٠ يوليو على وجه التحديد كنت قد دعوت أخى وصديقى حسين الشافعى لتناول الغداء فى منزلى .. وبينما نحن منكبين على الوجبة إذ بالتليفون يرن وتلافى مكالمة تليفونية من الأستاذ أحمد أبو الفتح رئيس تحرير صحيفة المصرى وقت ذاك .. وكنت قد أوصلت جمال به منذ عام ٤٩ حيث وضع الصحيفة فى خدمة أهداف التنظيم .. قال لى : إن ثمة مشكلة وزارية فى الأفق وإن الملك قد طلب من حسين سرى باشا رئيس الوزراء تعيين اللواء حسين سرى عامر خصم الضباط الأحرار اللدود وزيراً للحرية .. غير إن رئيس الوزراء اعترض على مثل هذا التعيين الذى قد يكون له نتائج مخربة .. واقترح

تعيين اللواء محمد نجيب بدلاً منه وزيراً للحربية ، ثم أضاف أن هناك قائمة بأربعة عشرة ضابطاً مطلوب تشريدهم والزج بهم فى السجون .. وألمح إلى رمزاً إلى أنه ينبغي الإسراع بقيام تحرك سريع .. أسرعت فوراً ومعى حسين بالخروج للقاء عبد الناصر فى منزله حيث اختلنا به .. وأنهيت إليه ما قد أبلغنى به الأستاذ أبو الفتح فسلّنى رأىى .. فقلت لابد أن نقوم بالثورة فى الغد فوافقنى .. غير أنه كان يتقرب وصول بقية وحدة من وحدات المشاة من سيناء إلى القاهرة .. ثم سأل حسين الشافعى عن رأيه فكان رأيه من رأىى وابتدبنا حسين وأنا نطمئنه على إن سلاح الفرسان جاهز للعمل » .

• **ويضيف أحمد المصرى :** « الغريب إن الملك عن طريق حسين سرى عامر وناهد رشاد .. علم أن هناك فى الجيش بعض الضباط متمردين .. وسارع بوزارات مختلفة فى هذه الفترة حوالى ٧ - ٨ وزارات .. كانت آخر وزارة منهم وهى أخطر وزارة بالنسبة لنا لأن كان أشيع إن حسين سرى عامر مدير سلاح الحدود هو الذى سيتولى وزارة الحربية .. حسين سرى عامر على دراية كاملة بالضباط الأحرار وعارفهم واحداً واحداً .. وهو رجل قاسى .. فأصبح هناك ضرورة لشىء ما يتم حتى لا تُجهض حركة الضباط الأحرار » .

• **بينما يقول أحمد حمروش :** « الذى عاوز أقوله إن الأيام التى كانت فرق بين وضع خطة والتحرك الفعلى لا تتجاوز أربعة أيام وده نتيجة السباق الذى كان موجوداً لأن الملك كان مقررأ اعتقال الضباط الأحرار والخبر ده جاء عن طريق اللواء محمد نجيب .. قاله له محمد باشا هاشم الذى كان وزير دولة فى وزارة حسين سرى باشا رئيس الوزراء .. وجاء أيضاً عن طريق الأستاذ أحمد أبو الفتح أبلغه للكبكاشى ثروت عكاشة الذى هو نسيبه .. فكان الضباط الأحرار أمام خيار وحيد إنهم يتحركوا ويفكروا يتحركوا .. إزاي لغاية لحظتها ما كانت معروفة .. هل يعملوا حركة اغتيالات .. هل يحركوا الجيش .. إلى أن استقر الأمر على تحريك الجيش فى ليلة ٢٢ / ٢٣ يوليو » .

• **ويقول خالد محبى الدين :** « الخبر تسرب .. الضابط حسن صالح رايح بلبس هدومه فى غير موعد نوبطشيته فأمه شكّت فى الموضوع فكلمت أخاه .. كان ضابط طيار فاقصل بالقصر .. فهو عرف بلغ زملاؤه فقالوا له اقعد فى البيت .. لكن بقى كان لابد من الحركة بسرعة لإن الملك طبعاً عرف .. ونزل قائد أركان حرب الجيش وجاب القوات .. كان فيه سباق بيننا وبينهم » .

• **ويقول فتح الله رفعت :** « الثورة - وأقولها علشان الناس تعرف - كانت ستقوم يوم ٢١ يوليو تأجلت يوم لإن حسن صالح رايح قال لوالدته .. تأجلت الثورة إلى يوم ٢٢ يوليو .. وقيل هذا فى بيت أبو الفضل الجيزاوى فى الاجتماع بتاع الفرسان الذى هى الدبابات والمدفعية » .

• **ويقول كمال الدين حسين فى نفس الموضوع ولكن برواية أخرى :** « طبعاً كل واحد رجع بيته .. علشان يستعد للتجهيز .. وأنا لسه قاعد فى البيت علشان أخرج قبل ساعة الصفر بساعة يمكن وزيادة .. جاء لى واحد من ضباط المدفعية قال لى فيه ضابط وهو خارج أمه مسكته

وبلغت أخاه اللي كان مرفوداً من الجيش أو محال على الاستيداع من سلاح الطيران وكان من السرب الملكي أظن وراح مبلغ السراى .. والضابط ما كانش له ذنب فى العملية دى لكن لما بلغونى فى البيت وجدت عبد الناصر كان فايت علئى ليلته زى ما أنا بأمر على الناس نشوب عملوا إيه واستعدادتهم إيه .. كان هو بيمر أيضاً على المجموعات علشان يطمنن إن كل حاجة ماشية .. قفلت له .. فقال لى العملية مشيت وخلص الموضوع ده كأنه ما حصلش » .

• كانت هناك خطة عسكرية محكمة .. وهى تلك التى غيرت تاريخ مصر الحديث .. وكانت المهام ساعة الصفر كالآتى : الإشراف العام والقيادة كانا لكل من جمال عبد الناصر وعبد الحكيم عامر .. وكانت العملية مدروسة بصفة عامة وموزعة بين الضباط .. وتولى زكريا محبى الدين أركان حرب العملية ..

• يقول محسن عبد الخالق : « كلف زكريا محبى الدين بوضع مسودة الخطة وقرنت الخطة على مجموعة عبد الناصر ثم قرنت على الوحدات فى اجتماعات الوحدات .. إحنا المدفعية اعترضنا ووضعنا خططنا فى إطار من الخطة العامة » .

• ويقول أحمد حمروش : « هو اعتقادي إن زكريا محبى الدين هو اتلى وضع خطة الثورة هو اللي كتبها ووفق عليها فى لجنة الضباط الأحرار » .

• وأسأل ثروت عكاشة : لما اطلعت يافندم على مذكراتك .. كان فيها وثيقة عبارة عن خطة الثورة يوم ٢٣ يوليو وكانت بخط المشير عامر ؟

• « لم تكن وراء هذا فكرة وإنما كان وراء هذا فريقاً متعاوناً .. عبد الناصر كان بلفى برأيه وعبد الحكيم يسجل وزكريا أسندت إليه مهمة .. وكان زكريا مشتركاً أيضاً فى هذه الخطة ولا يهم من كان يكتبها بخط يده » .

• ويقول كمال الدين حسين : « ليلة ٢٢ - ٢٣ طبعاً اجتمعت لجنة القيادة .. كان فيه مجموعة مكلفة إنها تعمل الخطة .. عبد الحكيم عامر وأنا وزكريا .. وبعد ما عملنا الخطة واجتمعت لجنة القيادة ناقشناها .. وقلنا بقى حيروح كل واحد ينفذ الجزء بتاعه الخاص بيه .. وإحنا قطعاً كل واحد كان مسئولاً عن سلاح .. فمثلاً جمال عبد الناصر وكان عبد المنعم عبد الرؤوف قبل كده وزكريا محبى الدين وعبد الحكيم عامر .. كانوا مسئولين عن سلاح المشاة .. وأنا وبعدين عبد المنعم أمين انضم لنا قبل الثورة بيوم .. عن سلاح المدفعية .. وهكذا » .

• بينما يقول محسن عبد الخالق : « من قال هذا لم يعطنا دليلاً .. كنا أول الوحدات التى تحركت وشاهدت عبد الناصر وكان بملابسه الرسمية .. هل كان واضعاً الملابس العسكرية فى العربية .. لا أظن أن ذلك حدث .. لايد أن من روى هذه القصة .. كان يقصد إنه رآهم يمشون فى التاسعة مساءً أو العاشرة بالملابس المدنية وذلك كان قبل ساعة الصفر » .

• ويقول شمس بدران : « وبعدين أول حاجة عملها عبد الناصر لما غير هدومه ولبس الملابس

العسكرية ولما احتلوا رئاسة الجيش طلبني في رئاسة اللواء .. بس برضه الحذر الشديد بتاعه كان موجوداً فطلب الولد بتاع التحويلة قال له إنده لى فلان .. قال له أقول له مين حضرتك ؟ قال له الصاغ جمال .. هو كان بكباشى المفروض يقول البكباشى جمال فقال له الصاغ جمال .. علشان لو العملية فشلت وراجعوا المكالمات التليفونية حيلقوا الصاغ جمال مش البكباشى جمال .. فلما كلمته قال لى تقدر تجيب اللواء وتحركه تجيبه إلى رئاسة الجيش .. وحركت له اللواء ووديته رئاسة الجيش .. بقى قوة احتياطى هناك .. بس .. يعنى دورى مش جامد قوى .. دور على قننا » .

• كنت ملازماً أيامها ؟

• « أيوه كنت ملازم أول » .

• وكان الأخوان جمال وصلاح سالم فى سيناء التى عاد منها أنور السادات لتنفيذ خطة سلاح الإشارة ..

• وتذكر السيدة جيهان السادات فتقول : « هو أنور السادات كان ساعتها فى رفح وكان عارف إن الثورة سوف تقوم ولما تقوم الرئيس عبد الناصر سوف يخطره بهذا .. وهو تم إخطاره فنزل من رفح جاء إلى القاهرة .. طبعاً أنا قلت له ده مش ميعادك إيه الحكاية ؟ قال لى والدتى تعبانة .. وبعتين جاء .. طبعاً والدته لم تكن تعبانة .. وبعتين هو عمره ما كان يغير كلامه ولا يكذب فى حياته .. قال أنا جاي أجازة وقال لى أنا عاوز أفسحك كمان .. عارف واحد حاسس إنه سوف يموت أو سوف يجرى له حاجة .. عاوز آخر لحظاته يعيش مع أسرته .. أخذنى اتمشينا بالعربية بتاعتنا فى شارع الهرم .. وقال أنا وعدت والدك إنى لا أشغل فى السياسة .. مش عارف .. الوعد ده مضايقتى .. أنا طبعاً بمنتهى الحماس قلت أنا اتجوزتك علشان حبك لمصر وتفانيك من أجل خدمة مصر .. أنا لا أرضى يا أنور بالعكس .. قال لى بجد ؟ يبقى أنا طلعت من الوعد .. قلت له طبعاً أنت متجوزنى أنا ولا أبويا .. ارتاح يومها .. وأخذنى رحنا سينما الروضة كانت سينما مفتوحة صيفى .. فالنور قطع مرتين قمتا لما رجعنا البيت هو راح يجرى العربية .. البواب أعطانى كارت من جمال عبد الناصر مكتوب عليه « المشروع يبدأ الليلة » .. أعطيته الكارت بص فيه وراح داخل بسرعة .. كان لأبس قميص وبنطلون فليس اللبس العسكرى وقال أنا ماشى بسرعة .. قلت له ييه يا أنور رايح فين ؟ قال لى واحد صاحبى فى المستشفى ولازم أروح حالاً .. وكان مشدوداً قوى .. قلت له طيب ليه اللبس العسكرى ؟ قال علشان يعنونا به .. وهو نازل على السلم بصيت له كده وقلت له : أنور لو رحت السجن .. مش حازورك .. كان نارل بسرعة راح واقف وبص لى كده بصة وقال بتقولى إيه يا جيهان .. طبعاً أنا بأقولها تلقائياً مش فاهمة إيه اللى يحصل لكن فيه حاجة كده مستغرباها وطلعت منى .. بص لى كده قال لى صحيح ؟ قلت له أنا بأضحك وبأهزر .. ربنا معاك .. وراح مكمل وغاب وأنا مش عارفة الغياب ليه .. إلى أن كلمنى فى التليفون الصبح » .

• ويضيف ثروت عكاشة : « هو كما ترى الظروف أجبرتنا على أن تتم فى ٢٣ يوليو ما كنا

قد عزمنا أن تتم في ٥ أغسطس فكان من العسير الاتصال بطاقم الضباط في مثل هذه المهلة القصيرة .. والفترة الحرجة » .

- وأسأل حسين الشافعي : مين يافندم اللي كانوا مش موجودين وانتظروهم ؟
- « أظن جمال سالم وأنور السادات وحسن إبراهيم .. وأنور السادات كان مفروض إنه عليه واجب تعطيل تليفونات القاهرة بصفته ضابط إشارة يعنى حتى تأخره ساعد في إن الاتصالات لم تقطع حتى يوم ٢٣ » .
- ويقول محسن عبد الخالق : « صلاح سالم بقى في منزله في رفح ولم يذهب إلى مكتبه .. يعنى لو كنا اتمسكنا كان هو ييقى ما لو ش دعوة .. رشاد مهنا هو الذى قاد الثورة في العريش .. وجمال سالم كان على البحر ساعة قيام الثورة » .
- ويؤكد توفيق عبده إسماعيل هذا الكلام فيقول : « وقفوا أنور السادات في الطريق .. وهو مش عارف حاجة .. هم مين ؟ ملك ولا ثورة .. مش عارف .. استجار بالناس إلى أن سمع صوته عبد الحكيم .. فجاء .. وبدأ يلعب دوراً ودوراً رئيسياً في هذا المجال .. ما كانوش لاقين ضابط الإشارة .. أمين شاكركان هو المسئول وكان موجوداً في إيطاليا .. فكان لازم ضابط في سلاح الإشارة هو السلاح المسئول عن التوصيلات التليفونية واللاسلكية مع وحدات الجيش وكان دوره محورياً ما نقدرش نعمل حاجة إلا إذا كان بتاع الاتصالات موجود .. لو كان أمين شاكركان موجوداً كان هو فضل في العريش .. ويعتوا له عن طريق الأخ على شقيق صفوت كلفوه إنه يجيبه بسرعة وهو كلف ضابط آخر مسافر برسالة ظريفة راح لصلاح سالم وقال له عاوزين « زبيبة » بأى شكل بأسرع ما يمكن في القاهرة .. لأن السادات كان بيصلى وله زبيبة ومعروفة .. الاسم الكودى بتاعه كان « زبيبة » .. وجاء أنور السادات وبدأت الأمور تأخذ التحرك الفعلى يوم ٢٣ » .
- ويقول عبد المنعم أمين : « قلنا الفرصة بتاعتنا أن نستولى على نقاط مداخل القاهرة علشان نقدر نسيطر على القوات الموجودة في القاهرة ولا أحد يتعرض لنا .. وطبعاً فيه قوات لقطع التليفونات .. قالوا إن أنور السادات يصل من العريش وسوف يحضر علشان يأخذ قوات نحضرها له ويروح يستولى على مصلحة التليفونات والإذاعة « ماركونى » والاتصالات الخارجية علشان يقطع الاتصال الخارجى » .
- ويقول خالد محيى الدين : « جمال منصور وكفافي لم يشتركوا في ليلة الثورة .. بناء على اقتراح عبد الناصر » .
- ويقول توفيق عبده إسماعيل : « جميع الخطوط كانت تؤدى لواحد فقط هو جمال عبد الناصر .. كان جمال عبد الناصر يتولى التنسيق بين المجموعات المختلفة وبين الاتجاهات المختلفة .. هو الذى وضع التخطيط النهائى للثورة ، وهو الذى كان صاحب القرار ويمكن القرار الوحيد .. كان قرار ٥ أغسطس اتخذ وعبد اللطيف بغدادى كان زعلاناً من مارس ٥٢ لما لقي

إن مافيش حاجة بتتم .. فأعلن امتعاضه من الاستمرار .. وإن الضباط الأحرار بهذا الشكل معرضين لمخاطر كثيرة .. وببستعجل القيام بحركة معينة فى الجيش .. فكان بعيداً .. مجموعة أخرى .. وصالح سالم وجمال سالم وأنور السادات كانوا موجودين فى رفح .. فكان الفرار النهائى فى القاهرة فى إيد جمال عبد الناصر ومعه المجموعة الللى فى القاهرة .. زكريا محبى الدين .. حسين الشافعى .. ثروت عكاشة .. كمال الدين حسين .. خالد محبى الدين وعبد الحكيم عامر ..

* **يقول حسين الشافعى :** « الحقيفة الواجبات التى كانت ملقاة على سلاح الفرسان والمدركات كانت واجبات تقريباً بتشمل كل حاجة .. مثلاً الطيران .. لا يمكن أن يتحرك إلا إذا أمنته بأن تبعث له دبابات أو سيارات مدرعة .. الكتيبة ١٣ لم تكن تتحرك إلا بعد ما بعثنا لها الدبابات لتأمينها .. رئاسة الجيش نفسها قل ما يروح يوسف صديق كنا باعيتين فاروق الأنصارى بالعربيتين المدرعتين وأقف فى موقع رئاسة الجيش .. وهو الللى بالعربيات المدرعة كسر البوابة وفتحها .. بعد ما ناقشنا الخطة بكل تفاصيلها قالوا إن الميعاد الساعة ١٢ .. وإحنا كنا متفقين يوم ٢١ إن الميعاد الساعة ١١ .. طبعاً هذا جعل كل الناس تروح الساعة ١١ .. ونزلت كان لى أخت ساكنة فى مصر الجديدة عديت عليها غيرت لبسى وأخذت حمام وأخذت فنجان شأى .. وضيعت الوقت علشان أغرب الميعاد الللى أنا متفق فيه مع ثروت عكاشة إننى أكون فى بيته الساعة ٦ علشان بقى تفاصيل الخطة نترجمها إلى عمليات وواجبات تتوزع على كل فرد باسمه .. رحنا الساعة ٦ وجدت ثروت عكاشة وقعدنا نبادل الكلام الللى تم الاتفاق عليه .. وطبعاً هو كان فى تقديره إن واجبات كثيرة جداً .. ويعنى هم سوف يعملوا إيه ؟ قلت مافيش هم وإحنا الللى فى إيداه حاجة يعملها .. »

* **ويقول فتح الله رفعت :** « مش حنقول التفاصيل عن أحد نقاس عن الثورة .. »

* **مين .. عاوزين نعرف ؟**

* **« لا .. لا .. »** مش حاقول أسماء لكن هى ملصوقة فى مخى وقلتها لإخوانى .. فيه ناس كثيرة حصل إنها تقاعست عن الثورة .. ثم أصبحوا .. مرموقين .. »

* **ويقول محسن عبد الخالق :** « ذهبت إلى محمد فوزى شخصياً وكان كبير المعلمين العسكريين فى الكلية الحربية وأخبرته بقرار وموعد قيام الثورة وإنه اليوم .. ففعد وتغير وجهه وقال أنا معذور .. فأبلغت عبد الناصر وكمال الدين حسين .. وذهبوا إليه فى المساء فقرر الاعتذار ولكنهم حصلوا منه على وعد بعدم الإبلاغ بخطة الضباط الأحرار .. وغاب أيضاً فى اللحظة الأخيرة سعد زايد وطلعت خيرى وكانا فى الخلية التى تجتمع بكمال الدين حسين فلم يشتركا ليلة الثورة .. عكس ادعاء سعد زايد الذى نشر فى أكثر من مكان بعد ذلك .. وتم استبدال محمد فوزى بعبد المنعم أمين الذى أبدى استعداداه الكامل للتعاون والمشاركة .. »

● **أما سلاح الفرسان فقد تولى قيادته حسين الشافعى وخالد محبى الدين وثرثوت عكاشة .. وكان معهم أيضاً توفيق عبده (إسماعيل وعثمان فوزى ..**

• **ويقول حسين الشافعي :** « سلاح الفرسان .. أنا كنت أتولى قيادته .. وسلاح الفرسان في الحقيقة هو كان القوة الضاربة .. إذ لو لم يشارك لم يكن في الاستطاعة بالنسبة لأي سلاح أن يتحرك .. ولذلك الواجبات التي أقيمت على سلاح الفرسان تكاد تغطي جميع الواجبات .. وربنا أراد أن يجري هذا القدر على يد هذه المجموعة التي ألقت .. كان جمال عبد الناصر له بعض الناس التي يعرفهم داخل السلاح وهم يمكن كانوا إخوان ناس .. يعني كان فيه مثلاً محمود التهامي أخو حسن التهامي في السلاح .. كان مثلاً أحمد عبد الحميد كفاي أخو أحمد عبد السلام كفاي التي كان في المخابرات .. بعد ما قابلني واطمأن بأن يلقي بهذه المسؤولية في يدي .. يبدو إن هو يعني قال لهم يجمدوا موقفهم وقال لهم لا تتحركوا ولو إنهم كانوا مجندين من قبلها .. ولكن لم يتحرك واحد منهم في أي عمل في الثورة .. دي طبعاً أقدار مقدرة .. وتم السيطرة بسرعة على الموقف .. كل دي حاجات طبعاً ما حدث يقدر يرتبها إلا إذا كان جزءاً من قدر الله أنن به .. عملية قدرية .. بعد ما انتهينا .. اتعشنا بطيخ وجبنة .. كان صيف .. وقبل ما نزل بربع ساعة فات علينا جمال عبد الناصر .. تأكد من إننا على استعداد وإن كل حاجة ماشية .. وأخذ ثروت عكاشة تحت باطه وكلمه بالإنجليزي قال له يا ثروت : “Tonight there is no room for sentimentality, We have to be ready for the unexpected.” ومشي .. نجى طبعاً لحظة التنفيذ .. نزلت أنا وثروت ركبنا العربية مع بعض .. وخالد وعثمان فوزي ركبوا مع بعض عربية ثانية .. ودخلنا رحنا على القشلاق عشاااا نقابل الناس ونوزع عليهم الواجبات ونبتدى التحركات » ..

• **ويقول حسن المنهوي :** « في الحقيقة ما كانش فيه أية مقاومة منهم .. لما بيكون واحد داخل لوحده وما معاهش حد ما بيقااش منه مقاومة .. وكانت أسلحتنا فيها ذخيرة ودباباتنا على ما أنكر في ذلك اليوم كان فيها ذخيرة وكل شيء .. فأنا وصلتهم في معتقل الكلية الحربية ورجعت ثاني » .

• **وأسأل ثروت عكاشة :** ما الدور الشخصي الذي قمت به في قيام هذه الثورة ؟

• « كان دوري أركان حرب عملية سلاح الفرسان ليلة الثورة .. ولقد ذكرت هذا الدور مفصلاً في مذكراتي .. وكان ذلك حرصاً مني على أمرين .. الأمر الأول هو ما قام به ضباط سلاح الفرسان الشجعان من دور خطير جسيم ليلة ٢٣ يوليو وإنني لأذهب إلى أبعد من هذا فأقول .. إنه لولا الدور الذي اضطلع به سلاح الفرسان ما كان يمكن على الإطلاق أن تقوم لهذه الثورة قائمة أو يكتب لها النجاح » .

• **ويقول خالد محيي الدين :** « كنت قدت الكتيبة الميكانيكية .. التي يقولوا عليها مشاة المدرعات .. عبارة عن نصف جنزير بتركب فيها المشاة التي يتبقى مدرية تركب وراء الدبابات .. عشاااا كده مسكوني قائد ثاني الكتيبة .. وقائد ثاني الكتيبة بتدي له فرصة يقوم بدور أكبر .. فدى أنا قدتها ليلة الثورة وقفلت بها منطقة الكوبري التي أمام مستشفى القوات المسلحة والطريق إلى سبورتنج مصر الجديدة .. لما تقفل السكة دي لغاية المترو مايفش عربيات تمر ..

وجزاء من القوات الثانية فقلت عند كوبرى الفبة .. كانت الخطة عزل المنطقة العسكرية أولاً
عن مصر .. ثم الاتجاه إلى الإذاعة » .

• **ويقول عباس رضوان :** « توزعت علينا الواجبات من جمال عبد الناصر وعبد الحكيم عامر ..
إن أنا والأخ إسماعيل فريد والأخ البلتاجي ومعانا كمال رفعت وحمدي عاشور على ما أنكر ..
حنأخذ قوة مدرعة من سلاح الفرسان وحنستلمها من الأخ ثروت عكاشة .. ونطلع ومعانا كشف
بأسماء الضباط الكبار ومسالكهم أو عناوينهم ونجمع الضباط الكبار وبيجوا على القيادة .. فمن
حسن الحظ إن فعلاً رحنا واستلمت أنا وأخ من الإخوة اللي معايها هذه القوة المدرعة من الأخ
ثروت عكاشة شخصياً وخرجنا بها .. القيادة العامة بعد سلاح الفرسان .. فلاقيت واحد بينده
« يا عباس يا عباس » .. طلع عبد الحكيم عامر .. قال لي تعالى دول كلهم هنا .. كان حصل
بقي في الليلة دي إن ضابط عرف من أخوه والخبر وصل للملك في الإسكندرية .. واتصلوا
علشان ينقذوا الموقف وما قدروش .. لإنهم كانوا كلهم جاءوا وإحنا القوة هجمت .. ووزعت
فواتي .. وقال لي القوة اللي معاك حطها عند الكلية الحربية عند كوبرى الفبة .. وفعلاً تمت
العملية بسلام .. القوات والناس اللي كانوا موجودين زائد اللي حضروا بعد كده من الرتب
الكبيرة كله عومل معاملة كريمة جداً .. وأخذوا إلى الكلية العسكرية .. كان اعتقالاً مؤقتاً ..
وانتهت العملية عند هذا الحد الساعة ٣ صباحاً » .

• **أما الطيران فقد تحدثت مهمته بطلعات استكشافية للتأكد من عدم تحرك أية قوات بريطانية
من القناة .. وكان على رأسه عبد اللطيف بغدادى وحسن إبراهيم وجمال سالم ووجيه
أباطة ..**

• **ويقول عبد اللطيف بغدادى :** « في يوم الثورة .. الطيران قام بدوره كاملاً كما هو مطلوب
منه .. كان مطلوب منه الاستيلاء على سلاح الطيران بالكامل وتم هذا في صباح يوم ٢٣ يوليو
وكان من الساعة ٢ أو ٣ صباحاً .. المطارات المختلفة سيطر عليها الضباط الأحرار .. بقي
فيها قيادات وأركان حرب جديدة مسيطرة عليها .. بمعنى الضباط والجنود يروحوا الصبح ..
يلاقوا المطارات دي تحت السيطرة » .

• **مين اللي وزع الأدوار عليكم يا فندم ؟**

• **« أنا اللي وزعت الأدوار » .**

• **كان مين مع سيادتك ؟**

• **« جمال سالم وحسن إبراهيم وكان جمال في العريش في الوقت ده » .**

• **ويقول ووجيه أباطة :** « كنت في مطار مصر الجديدة اللي فيه رئاسة القوات الجوية .. كنت
قاعد هناك عند المدير بتاعى .. الحقيقة الضباط كان فيه منهم عدد بسيط عندنا .. قابلوا العملية
بترحاب شديد جداً على أساس إن إحنا نقوم بتطهير الجيش .. وكان حتى الساعة ١١ فعدنا عندى
في البيت كنت أنا وبغدادى وحسن إبراهيم .. وبعدين بدأنا ننفذ .. بغدادى قال لي الأول .. لو

شلت سماعة التليفون ولاقيت مافيش تليفونات اعرف إننا استولينا على التليفونات وعطناها .. كلمته وجدتها سغالة رحمت واخذ بعضى فى العربية .. لما وصلت هناك لم يكن أحد يعرف .. قلت للعساكر إحنا جايين علشان كذا وكذا .. وخلص أنا بقيت مدير السلاح .

• **والمدفعية تولي قيادتها كمال الدين حسين وعبد المنعم أمين .. ومحسن عبد الخالق .. وفتح الله رفعت وأبو الفضل الجيزاوى ..**

* **يقول كمال الدين حسين :** « كان المفروض إننا بنبيع مجموعات من الناس علشان يروحوا يمسكوا الضباط الكبار بتوع الجيش فى بيوتهم .. فالعملية مشيت وانتهينا ونزلنا بفى الساعة ١١ .. وأنا أخذت مجموعة من معايا ورحنا على أول حنة .. أول مكان حنبتدى منه وكان عند البرج نمرة ٢ عند الكيلو ٤ من طريق السويس كانت مدرسة المدفعية هناك ومركز التدريب .. وكان هناك فيه لواء للحدود تبع حسين سرى عامر .

* **ويقول أمين شاكر :** « كان عبد المنعم أمين هو قائد الدفاع الجوى فى ذلك الوقت .. فقد كان مسئولاً عن المدفعية المضادة للطائرات .

* **أما محسن عبد الخالق فيقول :** « المدفعية كان يفودها ثلاثة .. وعندما أقول يفودها ليس لأنهم الذين يأمرهم فلولا الضباط اللى معاهم ما كانت تقوم المدفعية .. يعنى مثلاً يقول لك محسن عبد الخالق أو فتح الله رفعت أو محمد أبو الفضل الجيزاوى .. ولكن هذا التنظيم فيه عمالة أيضاً .. يعنى لما نذكر من مجموعتنا أذكر على شريف .. كمال لطفى .. لا يقل دورهما عن أى دور من أدوارنا .. دور المدفعية كان أن تتحرك من المأظلة فرقة المدفعية المدرعة .. وفرقة المدفعية المشاة منها فى الهايكستب ومدارس المدفعية وكل وحدات المدفعية وتقوم بواجباتها .. واجباتها قتل الطريق عند الكيلو ٥٠ اللى جاي من السويس علشان تقدم سلاح الحدود .. وجاءت على مركز قيادة الثورة اللى هو مركز قيادة الجيش وميدان عابدين وكل الأهداف الحيوية كانت المدفعية متواجدة مع غيرها من الأسلحة .

* **ويقول كمال الدين حسين :** « الطريف حاجة حصلت عملها زميلنا أبو الفضل الجيزاوى .. هو تقمص شخصية قائد المدفعية .. وأنا كنت واضح وقلت له روح على رئاسة المدفعية وكان هو أركان حرب المدفعية اللى موجودة فى الحنة التى هناك .. كل ما يتصل به حيدر ويقول له : الحالة شكلها إيه ؟ يقول له أنا حافظ بكري .. اللى هو مدير المدفعية .. ويقول الحال تمام لا توجد أية حاجة أبداً لغاية آخر لحظة .

* **ويشرح أبو الفضل الجيزاوى ما حدث فيقول :** « وأنا قاعد ضرب التليفون .. العسكري بتاع التحويلة قال حيدر باشا على التليفون .. فأنا بحكم الصفة بتاعتى المميزة يعنى أبادر ما أخذش المواضيع سلبية لازم أستفيد من كل نقطة .. قلت له : « وصلنى به .. أيوه يا معالى الباشا أنا حافظ بكري » .. هو عاوز يكلم مدير المدفعية اسمع حافظ بكري .. قال : يا حافظ الموقف إيه ؟ .. قلت له : الموقف عال يا معالى الباشا وإحنا كلنا تمام .. وبعثت أجبب الضباط وإحنا

مسيطرين على الموقف سيطرة كاملة وطعن مولانا .. وإحنا في خدمة مولانا وتحت أمر مولانا .. واللى يأمر به حنقده .. ومعاليك اطمئن خالص .. فحيدر باشا طبعاً انبسط جداً .. قال : طيب يا حافظ أنا متشكر وحابغ مولانا الكلام ده كله .. بعد كده بعد ساعة انكلم مرة ثانية وثالثة .. آخر مرة الصبح الساعة ٤ بيتكلم قال : أنا عاوز حافظ بكري .. قلت له : أنا حافظ بكري .. قال : لا إنت مش باين عليك حافظ بكري أبدأ .. قلت له : ليه يا معالي الباشا .. قال لى : صوتك متغير .. قلت له : متغير أنا بأنكلم من القاهرة وحضرتك من الإسكندرية .. قال : لأ صوتك متغير .. طيب إدينى أمارة خاصة .. قلت له : أمارة خاصة إيه يا معالي الباشا .. أنا بأتريق .. قال لى : إدينى أمارة خاصة بالعيد .. قلت له : « هو بعد العيد يتفتل كحك !! خلاص كل سنة وإنت طيب الثورة قامت .. السلام عليكم .. ورحت قافل السكة .. ودخلت بعد كده لحافظ بكري مدير المدفعية كان هو القائد بتاعنا .. قلت له : أنا آسف بأستعمل اسم سيادتك لإننا اتعلمنا فى حرب فلسطين فعل هذه الألأعيب من إسرائيل .. كان لما بقى أى شوايش أو ضابط فى أيدي اليهود كانوا بيستخدموه .. كانوا بيعملوا مكالمة مثلاً مع رئاسة القوات فى فلسطين أو مع وحدة من الوحدات .. ويخلوا هذا الضابط يديهم معلومات غلط علشان يضربونا .. فحافظ بكري سكت الراجل حيقل إيه .. وكان على باشا نجيب قاعد .. أخو محمد نجيب .. انبسط .. وكنت بأجيب لهم شأى وقهوة وأكل .. فدى بقى الشخصية الللى أنا نقصتها ليلة الثورة .. حتى الفجر » .

• أما المشاة فقد تولاهما يوسف صديق من ناحية .. وأحمد شوقي وصلاح نصر من ناحية أخرى ..

• ويقول فتح الله رفعت : « الثورة كان مهيء لها الساعة ١٢ فى منتصف الليل .. الللى حصل يوسف منصور صديق طلع بدرى هو والضباط الللى معاه .. كان مقدمة مدافع الماكينة فى وحدة اسمها مدافع الماكينة موجودة وكان هو القائد بتاعهم » .

• ونجح يوسف صديق فى اقتحام القيادة العامة .. وكانت بذلك الإشارة الأولى للنجاح التاريخى للحركة .. واعتقل كبار الضباط بضرية واحدة .. وبمقاومة محدودة جداً ..

• ويقول محسن عبد الخالق : « يقولون يوسف صديق أنقذ الثورة .. وأنا أختلف معهم .. مع احترامى وحبى ليوسف صديق الذى حاربت معه .. المدفعية هى التى فتحت له البوابة فى القيادة .. إحنا الللى فتحنا له بالمدافع الماكينة .. وبما إن المدفعية عنصر تدمير لا هجوم .. فقد هجم بعد ذلك واقتحم القيادة » .

• وهنا يقول عبد المنعم أمين : « كان يوسف صديق وصل وقابله عبد الحكيم عامر وقابله جمال عبد الناصر لأنهما ما طلوعوش .. الللى طلعا ليلتها أنا وكمال الدين حسين وخالد محيى الدين وثرثرت عكاشة » .

• تقول « ما طلوعوش » .. تقصد كانوا فى بيوتهم أو كانوا فى موقع آخر قيادى ؟

- « أنا لا أعرف موقع قيادى آخر .. هما كانا منتظرين النتيجة .. حتى إنهم ينضموا إلينا .. لكن الذى نزلوا فى الشارع هم دول الللى قلت لك عليهم .. مش عارف الأسماء بالضبط لكن طلع ضباط المدفعية حوالى ٧٠ ضابطاً ومن الدبابات طلع حسين الشافعى وتروت عكاشة .. دول اتقابلت معاهم لأنهم عاملين نقاط فى الشارع .. وبعدين دخل يوسف صديق وعبد الحكيم عامر رئاسة الجيش واستولوا عليها .. كان فيه عساكر من البوليس الحزبى حبت تعمل أى شىء ضربوا طلقتين فى الهواء .. وحد اتعور فى رجليه .. مش عارف .. لكن لم تحصل خسائر .. ودخلوا للواء حسين فريد فى مكتبه .. حتى يوسف صديق وهو داخل .. وهو متهور شوية كان ماسك مدفع فى يده .. فعبد الحكيم عامر رفع المدفع علشان خاطر لا تجيء فى أحد .
- **ويقول أحمد حمروش :** « اعترض طريق يوسف صديق وجنوده شاويش حذره يوسف ولكنه أصر فأطلق عليه طلقة أصابته فى رجليه .. كانت جراحة يوسف صديق وبسالته عاملاً مرجحاً لقوات الحركة » .
- **ويقول جمال عبد الحكيم عامر :** « طبعاً عبد الحكيم عامر كان له دور كبير فى ليلة الثورة .. وأصيب خلال اقتحام القيادة .. وللأسف إن الكلام ده لم يسجل .. بس يمكن لما يرجعوا للكلام ده حيعرفوا دوره الحقيقى لأن الللى بيتقال النهارده غير مضبوط .. وفيه تجنى عليه وعلى دوره وقيادته » .
- **ويؤكد هذا الكلام شمس بدران :** « المشير هو الللى فتح باب رئاسة الجيش .. كان فيه حرس من جوه .. العساكر بالسلاحليك .. وبالسلاح بتاعهم .. فما رضويش يفتحوا الباب فاضطر يضرب واحد منهم .. يضرب واحد منهم وضرب البنادق فى السلاحليك وقمعا على الأرض وفتح الباب .. جاء يوسف صديق بقواته .. ودخل رئاسة الجيش واحتلها .. لكن الللى فتح الباب هو عبد الحكيم عامر .. وبعدين أعطوا أهل الولد تعويضاً على هذه الحادثة » .
- **وأسأل سعيد حليم :** هل هناك اسم معين من الضباط الأحرار يتضعه على رأس القائمة لدوره الفعال ؟
- « هو الحقيقة فيه المرحوم يوسف صديق .. لولا شجاعته فى الاستيلاء على قيادة القوات المسلحة ودور الكتيبة ١٣ .. ولولا تجمع قوة مقاتلة زى الكتيبة ١٣ كانت العملية مش حتبقى يعنى ما أعرفش كويسة ولا لآ » .
- **وفى تمام الساعة ٢ قرب فجر ٢٣ يوليو .. أصبحت المنطقة العسكرية من العباسية إلى المازة والهايكستب تحت سيطرة الضباط الأحرار ..**
- **ويقول محسن عبد الخالق :** « كتبت فى كتابى « الحقيقة الغائبة » أن أنور السادات شارك يوم ٢٣ يوليو .. ولكنه لم يقد أى وحدة .. وهذا فى تقديرى معناه أنه مثل غيره ممن لم يخرجوا من القساعات ولم يفقدوا فى هذه الليلة .. لم يشترك » .

• وانتشرت القوات واحتلت فصائل من الجيش الميادين والمرافق العامة بالقاهرة مثل محطة السكة الحديد ومصحة التليفونات ..

• ويقول فتح الله رفعت : « كان طول ما إحنا ماشيين من الهايكستب لغاية أمانة ناس من عندنا يقولوا يمكن نطلع ما نلاقش لا ثورة ولا حاجة .. أول حاجة عند محطة البنزين اللي فى مصر الجديدة ولاقينا الدبابات قلنا لهم كلمة السر .. عرفنا إن الحركة دائرة .. كمال رفعت وغيره يأخذوا الضباط الكبار من بكباشى فما فوق ويحطوهم فى الكلية الحربية أو فى الثانوية العسكرية .. والأركان حرب كان اسمه المعتز بدين الله .. الله يرحمه قال إن حسين فريد الآن لسه متصل بى فى التليفون - حسين فريد باشا اللي كان هو رئيس الأركان - أنا قلت له يا معتز الثورة ناجحة أنا جاي من برة ولا كنت جاي من برة ولا حاجة .. وإن شاء الله سوف يستمر النجاح بتاعها .. كان على مسمع من قائد كتبية أظن على ما أتذكر الكتبية السادسة اسمه طاهر الشربيني الله يرحمه .. وقال أنا سوف أخرج معاكم وخرج .. وهو أول ما شاف الحركة دى بعت بوليس حربى على بوابات الهايكستب .. وبعدين .. كان فيه اثنين اللي هما محسن عبيد الخالق وعيسى سراج الدين ابن أخو فؤاد سراج الدين .. وأخذوا المدافع والأسلحة بتاعة البوليس الحربى .. وخلص لنا الطريق بإن إحنا نطلع بالبطاريات بتاعتنا » .

• وقبل الصباح كان قد تم إبلاغ الأحرار فى كل من القنال والعريش والإسكندرية ..

• ويقول عبد المنعم أمين : « اجتمعنا فى القيادة علشان نتدارس الموقف إيه ونشوف إيه أخبار إسكندرية .. وأخبار العريش إيه .. وأخبار المناطق كلها » .

• ويقول توفيق عبده إسماعيل : « فكروا الساعة الرابعة صباحاً فى الاتصال بسيماة لإن كان مهمماً جداً يتصلوا بسيماة .. وبعدما جاء أنور السادات الساعة الثانية إلا ثلث .. لقوا الخطوط متقطعة .. لأن لما افتحموا القيادة قطعوا خطوط التليفونات .. ما كانش ممكن حد يقدر يتصل غير واحد زى أنور السادات عنده خبرة بأجهزة اللاسلكى .. هو اتصل بتوفيق عبد الفتاح فى القنطرة وعن طريقه اتصلوا بصلاح سالم .. وصلت الرسالة لصلاح سالم بعد ٤ صباحاً بعد ما أمكنهم الاتصال به علشان يدوا له إنذار إننا سيطرنا على القاهرة » .

• يقول الكاتب أحمد حمروش : « سافرت على الإسكندرية واتصلت بالموجودين من الضباط الأحرار وقعدنا نترقب وننتظر فى الكنات .. وأذكر إن إحنا يوم ٢٣ يوليو الصبح قعدنا اجتماع الالائى الثانى وقررنا فيه تعيين قائد للمنطقة وأركان حرب للمنطقة من الضباط اللي إحنا نرتضيه .. وكان قائد المنطقة عاطف نصار اللي اخترناه وعبد الحليم الأعسر .. وده كان من لجنة الضباط الأحرار فى منطقة الإسكندرية » .

• أمال ليه الكتب يقول إن أحمد حمروش لم يوصل رسالة عبد الناصر للإسكندرية ؟

• « رسالة عبد الناصر وصلت إلى الإسكندرية بدليل أولاً إننا كنا موجودين فى الكنات قبل وقوع الثورة .. ثانياً إن المفاجأة فيها كانت كبيرة لأن كما قلت الخبر جاءنى قبلها بيومين وما كانش

فيه أحد .. بعض المناطق كان فيها ضباط أحرار ولم يعرفوا بموعده قيام الثورة ويمكن اطلعوا عليها بعدما .. وده نتيجة السرعة اللي حصلت .. لكنى فعلاً وصلت الرسالة بدليل إن إحنا كنا مسيطرين فعلاً على منطقة الإسكندرية » .

• **وأسأل رشاد مهنا : بعد نجاح الثورة اتصلوا بحضرتك ؟**

• « بعد ما أعلنوا أخطروني إنها قامت .. كانت باتفاق كانت بالتليفون .. مش قالوا لى إنها سوف تقوم الساعة كذا .. لا .. دى قامت الثورة وأخطروني إنها قامت .. ودى لأسباب يستحسن أن تكون على علم بها .. الضباط الأحرار أنا قلت لك لا علاقة إطلاقاً وما ينبغي لى .. اجتمعوا مع بعض واتفقوا أن يتخلصوا من محمد رشاد مهنا بكل طريقة .. الأسباب ؟ لا تسألنى عنها أسألهم .. الأسباب أنا لا أعرفها إنما هم اللي قرروا هذا .. وبناء عليه أرسلوا جمال سالم إلى العريش ليقيم هو بالثورة فى العريش .. عند محاولة إخطار جمال سالم بذلك أراد الله ولا مرد لما أراد .. أن لا يتمكنوا من الاتصال بجمال سالم إطلاقاً .. واضطروا مضطرين أن يتصلوا بمحمد رشاد مهنا ليقوم بالثورة كيف .. سبحانه وتعالى يفعل ما يريد .. وأنا حالى الذهن جداً من مواقفهم منى .. لكن بعد نجاح الثورة ما فيش ضباط أحرار .. كانوا رجال الثورة .. انتهت الرواية فى نفس اليوم فى حوالى الساعة ٢ صباحاً اتصلوا تليفونياً بجمال سالم وقال إن الثورة قامت .. قمت توليت الجيش بالعريش وقمت بالثورة فى العريش .. والجيش كله كان فى رفح .. كان جمال سالم وأنا هنا فى العريش لحد الوقت ده .. المفهوم أنا فى العريش وقمت بالثورة فى العريش .. وبعتنا تلغرافاً تأييداً .. وبعدين توالت ظروف أخرى » .

• **ويقول لطفى واكد :** « كنت المسئول عن منطقة جنوب قناة السويس والقوات الللى هناك والتجهيز للاشتباك مع القوات البريطانية إذا حاولت دخول القاهرة .. والسيطرة على قيادات الجيش فى ذلك الوقت هناك » .

• **يقول عباس رضوان :** « قالوا أحد يروح يجيب اللواء محمد نجيب من البيت وراحوا .. أنا لم أكن معهم .. أظن الأخ إسماعيل فريد ومعه قوة جابهو من البيت على القيادة على طول » .

• **وأسأل إسماعيل فريد : مين الللى استدعى اللواء نجيب ؟**

• « راح اليوزباشى سعد توفيق يجيبه بالعربية الجيب من منزله .. وجاء وأنا استغفيلته على المدخل .. إنت هنا معانا أهلاً وسهلاً .. اتفضل فوق على القيادة » .

• **بينما يتذكر جمال حماد فيقول :** « وبعدين طلعا فوق وكلمت محمد نجيب باعتبارى أنا أركان حربه فطمانته بالتليفون وكان منتظراً هذه المكالمه وانبسط جدا .. وقلت له أنا سأبعث لك ثلاث عربيات مدرعة تحييك قال لى أنا حاجى بعربيتى .. وجاء فعلاً بعربيته » .

• **وبعد احتلال الإذاعة .. استمع العالم إلى البيان الأول للحركة الذى أذيع باسم اللواء محمد نجيب ..**

• وجاء في البيان الذى أذاعه السادات بصوته : « اجتازت مصر فترة عصيبة في تاريخها الأخير من الرشوة والفساد وعدم استقرار الحكم .. وقد كان لكل هذه العوامل تأثير كبير على الجيش .. وتآمر الخونة على الجيش فقمنا بتطهير أنفسنا .. وتولى أمرنا داخل الجيش رجال نثق في قدرتهم وفي خلقهم وفي وطنيتهم .. ولا بد أن مصر كلها ستلتقي هذا الخبر بالابتهاج والترحيب » .

• ويروى جمال حماد ظروف البيان : « كنا قاعدين في الغرفة بتاعة رئيس أركان حرب فأنا انسحبت مع عبد الحكيم عامر .. إلى الغرفة المقابلة اللي هي غرفة المؤتمرات .. وقعدت أنا وعبد الحكيم عامر لأول مرة نفكر في بيان الثورة لأنه ما كانش ممكن يتعمل البيان قبل كده .. لإننا مش عارفين إن كنا حننحج ولا لا .. حنحضر بيان إيه .. مش لما ننجح الأول .. هم عارفين إني أديب وبأكتب .. فقالوا لى : اكتب البيان فقلت له : إيه رأيك يا عبد الحكيم نكتب إيه ؟ فأنا وهو قعدنا ننداول في شوية نقط كده .. كتبناها في ورقة صغيرة وبعدين كتبت ورقة فلوسكاب ورحت عامل البيان بتاع الثورة » .

• والورقة دي هي الموجودة في المتحف الحربي ؟

• « موجودة في المتحف الحربي حالياً .. بخط إيدى ويتعديلات محمد نجيب لإن محمد نجيب عامل تعديلين .. أنا كنت قايل « وإنى أؤكد أن الجيش » .. فهو قال لى « أؤكد للشعب المصرى » .. وأضاف عبارة ثانية « فى ظل الدستور » .. ده اللي هو عامله بخط إيده .. وموجودة في البيان اللي دلوقتى حنشوفه وموجود في المتحف الحربي » .

• ويقول توفيق عبده (إسماعيل) : « إحنا عملنا كوردونات مسلحة حول الإذاعة حنعمل فيها إيه .. حنذيع إيه ؟ نذيع بياناً .. طيب مين يكتب البيان .. جمال حماد بسرعة بخط إيده كتب البيان عرضه على عبد الناصر عدل فيه شوية ثم محمد نجيب عدل فيه شوية .. مين يقوله .. أنور السادات قال أنا مستعد أقوله .. صوتى كويس .. هو اللي يقدر يقرأه ويقول له : طيب صلح الخط علشان يقوله .. من ٥ - ٧ أخذت وقت .. فيه ضابط من الضباط كان موجوداً في القيادة في هذا اليوم ماهماش الضباط الأحرار أخذ البيان وقاله .. يعنى أذيع البيان مرة واحدة بصوت آخر إنما أثناء الإذاعة وإحنا منتظرين إذاعة البيان ماسمعناوش .. فالضباط واقفين قالوا الله ده هو محطة الإذاعة الأساسية في « أبو زعبل » .. ماحدش راح أبو زعبل فطلبوا من آمال المرسفى ومن عبد الفتاح الأحمد ومن مجدى حسنين إنهم يتوجهوا بسرعة ومعاهم ضابط مهندس اسمع جمال يروحوا أبو زعبل .. وراحوا هناك لقوا المهندس الجارحى اللي مسك رئيس للإذاعة والتليفزيون بعد كده .. وقالوا له إحنا عاوزين نوصّل الإرسال قال ده أنا جاء لى أمر أن أقطع الإرسال .. فوصل الإرسال .. وأذاع أنور السادات البيان بلسانه الساعة ٧,٠٥ أو ٧,١٠ » .

• ويقول عباس رضوان : « وصدر البيان الأول .. للثورة طبعاً .. من الإذاعة فأصبح الموقف واضحاً » .

• مين اللي قال البيان يافتدم ؟

• « هو البيان الواقع اللي ألقى البيان في الأول خالص كان ضابطاً وكان يمكن لغته العربية ضعيفه فلم يلغيه كويس ، فعلى طول بعدها كُلف السيد أنور السادات بأن هو اللي يروح يذيع البيان وراح وأداع البيان بصوته ده وبلعة عربية فصحي .. ولغى البيان الأول اللي كان بتاع الضابط ده .. استمرينا طبعاً في القيادة .. زى ما نقول بتأييد من الجيش كان منقطع النظير سواء اللي كانوا في التنظيم أو غير التنظيم .. والتأييد الشعبى كذلك كان واضح جداً » .

• ويقول كمال الدين حسين : « كل واحد كان مشغولاً .. آه الصبح كنا موجودين مع بعض باستمرار .. إحنا قضينا ثلاثة أيام تايمين في منى القيادة وكنا مجتمعين اجتماع مستديم » .

• ويتذكر خالد محبى الدين فيقول : « الصراحة .. الثقة الكاملة لما أذيع البيان لإن أنا كنت واقف في حنة ما أعرّض إيه اللي بيجرى هناك .. أول ما أذيع البيان والطيارات طارت عرفت إن الموضوع انتهى » .

• ويقول عبد المنعم أمين : « كان هذا البيان معداً لمحمد نجيب أما إذا كان أنور السادات قال حاجة فطبعاً أنور السادات عملها كده .. لكن أنور السادات وصل القيادة حوالي الساعة الرابعة .. لماذا لم يأتى قبلها ؟ أنا مش عارف ليه ؟ لكن أنا فلكر إنه قال بياناً في يوم ثانى .. وبعدين قال إنتم لو اتمسكتم .. حيحاكموكم .. لكن أنا لو اتمسكت حيعدمونى على طول » .

• بينما يؤكد أحمد المصرى رداً على سؤالى : بيان الثورة في الإذاعة .. من الذى قاله ؟

• « اللي قاله أنور السادات وتسألنى ليه أقول لإيه كان أفصح الضباط لساناً بس .. ولا تسألنى أنور السادات كان فين لإن أنور السادات حتى الثالثة صباحاً لم يكن قد وصل القيادة العامة بعد ! » .

• ويحاول وجيه أباطة أن يتذكر فيقول : « قاله ضابط صغير مش أنور السادات .. قاله والنظار إنه لخبط في الكلام .. وكان مش عارف مين .. أفكر جمال حماد .. وبعدين قالوا ده فلان الفلانى في اللغة العربية كويس خلّوه هو اللي يقوله .. اللي هو أنور السادات » .

• وأسأل خالد محبى الدين : مين اللي ألقى البيان ؟

• « اللي ألقى البيان أنور السادات » .

• ويقول على خليل : « أول بيان بدأت الإذاعة الساعة ٦ صباحاً بالقرآن الكريم وكان المذيع الأخ فهمى عمر وأنا كلمته والقرآن ماشى .. كان تسجيلاً .. وقلت له انت عندك الجيش .. قال آه .. قلت لا تتحرش بهم بأى شىء وإلا سيقتلوك قال لى كتر خيرك .. والساعة ٦،٣٠ طلع صوت المرحوم البكباشى أنور السادات وألقى البيان الأول للثورة » .

• وأسأل فهمى عمر : هل قلت المهم « أبو زعبل » للضباط الأحرار ؟

• « لا .. أبو زعبل جيت عفب حدث من الأحداث .. كانت الإذاعة تبث برامجها بداية من ٦,٣٠ صباحاً .. كنت أنا رحت من ٦,١٥ لغيت الضباط موجودين وعرفت على الفور مين من الضباط المسئول عن المهمة الإذاعية » .

• **اللى هو مين ؟**

• « كان السيد أنور السادات وعرفته على الفور لإنه فى تلك الأيام كان شخصاً معروفاً .. ده كان فى حقبة الأربعينات معروفاً بالنسبة للشباب والطلبة وعارفين أحداثه وما قام به من بعض الأعمال التى جعلته فى نظرنا بطلاً من الأبطال .. بداية من عملية التجسس وحكمت فهمى ثم أمين عثمان ثم فى القوات المسلحة والملك ومذكراته التى كان يكتبها أسبوع بعد أسبوع فى مجلة المصور .. كل تلك الأحداث جعلتنى أعرف إنه أنور السادات .. المهم بعد ما دخلنا الاستوديو الساعة ٦,٣٠ إلا ٣ دقائق قال لى فيه تغيير فى برنامجك النهارده .. لأن الإذاعة كانت محاطة بكميات كبيرة من القوات المسلحة حسيت إن فى الأمر شىء .. وكان يسعدنى أنا كراحد من شباب تلك الأيام الذى كان باستمرار ينادى بالجلاء أو الاستقلال أو أن يقف الملك عند حده .. قلت له إحنا بنبدأ إذاعة ٦,٣٠ .. قال لى ما تبدأ الإذاعة مباشرة دلوقتى .. قلت له إحنا نبدأ الإذاعة بموسيقى مارش عسكرى .. فأنأ أبث هذا المارش لمدة دقيقتين وبعدين تيجى .. وقلت : « أعلنت ساعة جامعة فؤاد الأول الساعة ٦,٣٠ بتوقيت القاهرة صباح يوم الأربعاء ٢٣ يوليو ١٩٥٢ .. وتبدأ إرسالها معكم بموسيقى مارش عسكرى .. » يادوب ما فيش عشرين ثانية لغيت غرفة المراقبة ببدا لى تليفون منقطع وإن الإرسال قطع من أبو زعبل وإنتم دلوقتى مش على الهواء !! أنا قلت له : للأسف يا فندم البيان بتاعك لن يسمع لأن الإرسال قطع من أبو زعبل .. فاتصل تليفونياً .. واستمر البرنامج العادى للإذاعة وهو مكتوب فى تقرير المذيع ، المذيع يكتب كل تفاصيل الأحداث .. وأذيع القرآن الكريم .. فقال : بمجرد القارئ ما يقول « صدق الله العظيم » اقطع الإرسال مرة ثانية من مصلحة التليفونات .. هما كانوا متنبهين لهيئة التليفونات .. لم يستغرق أمر إعادة الإرسال تماماً سوى دقائق .. هى إرادة الله أن يكتب لهذه الثورة النجاح .. كانت نشرة الأخبار تذاغ فى السابعة صباحاً وكانت الإذاعة المصدر الأول للأخبار .. فقد للثورة أن تأخذ كماً إعلامياً كبيراً من خلال ما أذيع وقلت : « إليكم الآن بيان القيادة العامة للقوات المسلحة بليقه مندوب القيادة » .

• **ومن أول من ألقى البيان ؟**

• « الذى قال البيان لأول مرة المرحوم السادات » .

• **ويقول كمال الدين حسين :** « يقول لنا الفلاسفة البيان الأول هو الذى يدل على الاتجاه بتاع الثورة وخطة الثورة .. نبى هبل لو قلنا فى البيان كل اللى إحنا عاوزينه .. عاوزين نطردك يا فاروق ونطلع الإنجليز ونحارب الإنجليز تبقى مشكلة .. يعنى زى لما يكون الواحد عاوز يتقدم يضع نفسه حقل ألغام قدام نفسه .. طيب ليه .. فكانت الخطة اللى عملناها إن إحنا قلنا الكلام الأول بتاع الفساد ويمكن الملك يومها افنكر حقيقى إن هى دى كل طلبات الجيش » .

- وسألت الملكة السابقة ناريمان : « مين اللي أبلغ الملك بقيام الثورة رسمياً .. سمعها فى الراديو ولا كان عرف قبلها ؟
- « أنا كنت بعيدة عن الساحة لكن شافية كل حاجة .. هو يوم ٢٢ كان عنده أمل أن يعمل حاجة .. وكان بيقول القدر .. ابتدأوا أولاً شالوا حسين سرى عامر وخطوا محمد نجيب .. ونفذ طلباتهم على باشا ماهر اللي كان كرئيس وزارة !! »
- وتوجه بعض الضباط لإبلاغ السفارات وطمانتها على رعاياها .. ولزمت السفارات الصمت ..
- ويقول عادل ثابت : « نشر أندرو تالى عام ٦٢ فى كتابه « المخابرات المركزية الأمريكية » : كانت الولايات المتحدة وبريطانيا قد قررتا فى أكتوبر ٥١ .. إن فاروق يجب أن يذهب .. وأرسلت عدداً من العملاء إلى القاهرة ثم أعطت الإشارة فى يوليو ٥٢ فهب فريق الضباط الأحرار بقيادة عبد الناصر إلى العمل » .
- بينما يقول أحمد حمروش : « إن مايلز كوبلاند مؤلف « لعبة الأمم » يقول إن الحكومة الأمريكية لم تعلم بوقوع الإنقلاب إلا من الصحف الصادرة صباح يوم ٢٣ يوليو » .
- وأسأل أمين شاكر : هل كانت أمريكا على علم بقيام حركة الضباط الأحرار ؟
- « ما كانتش على علم لكن كانوا متصورين إن فيه حاجة ممكن تحصل .. إنما على علم زى ما إنت بتقول بالضبط لا .. إنما كانوا متصورين الشعب المصرى مش حيتحمل نزوات فاروق أكثر من كده » .
- إنما ما كانوا يعرفوا حاجة عن حركة الضباط الأحرار ؟
- « لا .. إطلاقاً » .
- وأسأل عبد اللطيف بغدادى : هل كانت السفارة الأمريكية على علم بقيام الثورة ؟
- « لأ طبعاً .. إحنا قمنا بالثورة وكان ٨٠ ألف عسكري إنجليزى موجودين فى القناة .. فكانت دى مشكلة المشاكل حتقوم بالثورة و ٨٠ ألف عسكري موجودين .. لو زحفوا للقاهرة نعمل إيه ؟ طيب لو حيفضلوا قاعدين مافيش فائدة .. لازم نأخذ الخطوة دى .. فأخذنا « ريسك » وعلنا الخطوة دى .. طيب نبغهم إزاي إن إحنا حطينا قوات على طريق السويس وطريق الإسماعيلية .. واتفقنا مع الإخوان علشان يبقى فيه مقاومة شعبية طيب عاوزين نبغهم .. ده بالليل يوم الثلاثاء ٢٢ - ٢٣ نبغهم إزاي .. كان على صبرى معانا فى الطيران ماسك مدير مخابرات الطيران .. كنت أعرف إنه صديق الملحق الجوى الأمريكى (اسمه إيفانس) .. فأنا قلت نجيب على صبرى .. على صبرى كنت بأستغله كمدير مخابرات الأسلحة .. ولما ألغيت معاهدة ٣٦ .. بقينا نبعثهم القناة .. ونشيل الأسلحة » .

- كنت بشيبل الأسلحة فين ؟
- كنت بأشيها عند على صبرى فى المخابرات .. ماحدش حيفتش هناك الأسلحة طبعاً نأخذها من الجيش أو نسرقها من الجيش .
- ويضيف عادل ثابت : « قال لى على صبرى : لم يكن ممكناً أن يكون للضباط الأحرار أية تعاملات مع المخابرات الأمريكية المركزية .. لأننا كنا نعتبر الأمريكيين يقفون إلى جانب الملك وأية اتصالات كانت موجودة كانت ذات طبيعة اجتماعية أساساً .. وكان الأمريكيون بطبيعة الحال مهتمين بالأحداث التي تجرى في مصر .. وكنت من جانبي أتمتع بعلاقات اجتماعية طيبة معهم .. لا عن طريق رئاستي لمخابرات السلاح الجوي فحسب بل أيضاً لإنني تلقيت دراسات متقدمة في الولايات المتحدة .. وكنا حريصين في كل محادثاتنا مع الأمريكيين على إقناعهم غير عالمين بنوايانا .. وأن نغذيهم بمعلومات مضللة .. وهذا ما حدث بصفة خاصة عندما سألونا عن الأزمة التي تحيط بانتخابات نادي الضباط (وهو حدث رئيسي في إشعال الثورة) فإنا أبلغناهم أن هذه مسألة داخلية تتعلق بمسألة النادي وليست لها تضمينات أخرى .. إننا لسنا شيوعيين ولا فاشيين ولكننا ضد فاروق .. وإننا ننصح البريطانيين بعدم التدخل .. وكانت لى علاقات شخصية طيبة بالملحق الجوي الأمريكي وقد سمعته بنفسى وهو يبلغ السفير كافرى بوجهة نظرنا .. ولا شك في أن الرسالة قد نقلت إلى لندن حيث كان لها التأثير المطلوب » .
- ويقول محسن محمد : « كان الأمريكيان عندهم إحساس كبير إن ستحدث ثورة في مصر .. وعندما أبلغ عامل التليفون السفير كافرى بذلك لم يصدق .. ولما اتصل به مساعد الملحق الجوي ما استغريش .. لكن إن الثورة قامت بمساعدة أمريكية لأ إنما أمريكا أيدت الثورة .. وكل الوثائق تؤكد أن ثمة اتصالات بين واشنطن ولندن قد جرت .. وطلبت أمريكا من إنجلترا عدم التدخل أو مساندة الملك وقالت اتركوه لمصيره .. ليه ؟ عندما جاء ضابط المخابرات الأمريكي كيرميت روزفلت لعمل ثورة بيضاء سنة ٤٩ وطالب الملك بإجراء إصلاحات والتنازل عن أراضيهم رفض الملك .. وشعروا إن الملك إن أجلاً أو عاجلاً سيمضى ولا أمل في إصلاحه .. فكانوا سعداء للتخلص منه .. وما صدقوا إنه يلاقوا عهداً جيداً فرحوا به .. لذلك تلاحظ كثرة الاجتماعات التي كانت تعقد بين الثوار والملحق العسكري الإنجليزي أو السفير الأمريكي كافرى لدرجة أنه أرسل من ٢٣ يوليو إلى ٢٦ يوليو أسماء الضباط لواشنطن » .
- ويؤكد عبد المنعم أمين : « لا .. الأمريكيان ولا غير الأمريكيان كانوا عارفين هذا الميعاد .. ولا أحد متصل بالأمريكان .. كان فيه ضابط خارج عن الضباط الأحرار كان على اتصال بالملحق الجوي .. واللى هو على صبرى .. وعلى صبرى لم يكن من الضباط الأحرار » .
- ماذا فعلت بعد نجاح الثورة ؟
- « جمال عبد الناصر بعد النجاح قال لى أنا وزعتك وقلت لك هات لنا سجاير علشان أنفرد بكمال الدين حسين خصوصاً لما قعدت في الكنبة في بيتك فقلت نفسي بأعطس فيها وبصراحة خفت ..

وبالمناسبة جلال كشك الله يرحمه كتب مقالاً أن الأمريكان كانوا على اتصال بالأحرار حتى عبد المنعم أمين سافر إلى قبرص في مارس ليتلقى تعليمات المندوب الأمريكي ! رديت عليه وقلت له أنا ما كنتش من الضباط الأحرار ولا عمري رحت قبرص لا فسحة ولا أمورية .

* وحضرتك لم تتصل بالأمريكان إطلاقاً ؟

* « عمري لم أتصل إلا يوم ٢٣ يوليو سنة ٥٢ لما قمنا بالثورة .. قلت لازم نتصل بالأمريكان علشان نفهمهم إيه الغرض من هذه الحركة أحسن يمينوا فهم هذه الحركة .. الجيش الإنجليزي يفكر إنها ضده والجيش الإنجليزي يوم الثورة تقدم إلى الكيلو ٦٤ طريق مصر السويس يعنى بقى على بعد ٦٤ كيلو من القاهرة .. يا جماعة إنتم أخطرتم السفارات ؟ قالوا على صبرى راح للملحق الجوى علشان يخطره وزمانه أخطره .. طيب أخطره وقال له إيه ؟ قلت لهم لأ أنا سوف أروح وأقابل السفير ورحت .. ده أول اتصال .. أنا فلان الفلاني عضو مجلس الثورة وجاى علشان أفهمكم الوضع الموجود إن إحنا ناس لا شيوعيين ولا إحنا نرغب القيام بعمل ضد الأجانب فى مصر .. إحنا ناس ملتزمين وجايين علشان نصلح الجيش بتاعنا يعنى كل الحركة دى علشان تصلح الأحوال فى الجيش .. وبوازع وطنى خالص » .

* أما جلال علوية فله رأى آخر عندما سألته : هل السفارة الأمريكية كانت على علم بقيام حركة الضباط الأحرار ؟

* فقال : « أعتقد ١٠٠٪ .. علشان أولاً كافرى كان يقول عليهم "My boys" .. وكان الأمريكان عاوزين يورثوا الحكم فى مصر بدل الإنجليز .. والإنجليز قبل الثورة اتصل بى الملحق العسكرى وقال لى إذا أطلقت طلقة واحدة فإحنا نحنل مصر وإسكندرية .. فعلشان كده قلت ما فيش طلقة تُضرب .. وجاءت الحركة كلها سهلة والمسألة جاءت صدفة » .

* ورفضت الملكة السابقة ناريمان التعليق أو الرد .. وقالت : « اعفينى من السؤال ده » .

* ويقول د . أشرف غربال : « أعتقد إن أمريكا علمت وقت حصول الثورة .. إنما علم مسبق لا أنصور .. إنما اللي إحنا بنقراه فى الكتب من المؤرخين للثورة ورجال الثورة إن الثورة حرصت على أن تبلغ السفير الأمريكى (جيفرسون كافرى) بالذات وقالوا له الثورة لا تهدف إلى أى أذى للأجانب بل بالعكس بتحرص على سلامتهم وأمنهم وهى ثورة ضد الظلم والفساد .. وأعتقد إن كان واضحاً فى خلال الحقبة التالية إن مش بس العالم الداخلى فى مصر كان مرحباً بالثورة إنما العالم الخارجى كذلك كان بيرحب بها ترحيباً كبيراً .. وكانت العلاقة بين جيفرسون كافرى ورجال الثورة علاقة وثيقة » .

* وأسأل مصطفى أمين : هل كانت إنجلترا وفرنسا وأمريكا .. مؤيدين لقيام الثورة فى ذلك الوقت ؟

* « آه كانوا مرحبين لإنهم يتسوا من الملك .. حتى الإنجليز ! »

• وبدأت مباحثات واتصالات حركة الضباط تجرى باسمهم وعلى رأسهم اللواء محمد نجيب ...

• وهكذا نجحت حركة الجيش في يوم الأربعاء الموافق ٢٣ يوليو سنة ١٩٥٢ وأعطاهما الشعب من التأييد ما لم تكن تحلم به .. لسبب بسيط هو أنها رفعت نفس الشعارات التي كان يرفعها الناس .. وهى شعارات « الدستور .. الحرية .. وجلياء الإنجليز عن مصر والسودان » ..

• ويقول أبو الفضل الجيزاوى : « المفروض لما خرجنا فجر ٢٣ يوليو جميع لجان الإخوان المسلمين على مستوى الجمهورية .. وقتت ورانا وقتت بجانبنا تؤيدنا .. وخرجت معنا فى المسيرات » .

• ويقول فريد عبد الخالق : « وبدأت الثورة تأخذ مجراها وكان تكليف من جميع الإخوان بالاتفاق إن فيه احتمالات تحصل ردود أفعال غير مرئية أو تدخلات .. فقال أنا حاكّد على الإخوان المسلمين اللى لهم قوة شعبية إنهم يتحملوا مسئولية حماية ظهر الثورة فعلاً أخذت تعليمات فى جميع الأنحاء » .

• ويقول حسن المراغى : « اللى حصل إنهم بعد ما قامت الثورة نجيب باشا الهلالى أو مجلس الوزراء كلف المرحوم مرتضى إنه يروح يقابل محمد نجيب فى مصر علشان يقعد يتكلم معاه ويقول له تعالى اتفضل استلموا الحكم .. وإن الوزارة حتقدم استقالتها .. فمرتضى المراغى بالذات فى الفترة دى سافر مع مصطفى أمين وركبوا طائرة وجم هنا مع بعض .. لما راحوا وزارة الداخلية ما تقبّوا أحد خالص .. كان بدرى فوى .. وبعدين مرتضى حب يمشى قاموا جاءوا له ٢ ضباط أنا مش متذكر مين هما قالوا إنا مستعدين نأخذك ونروح للجنرال محمد نجيب قال لهم أنا مهمتى انتهت أنا خلاص انتهيت عند هذا الموضوع .. خلاص الوزارة قدمت الاستقالة واللى شكل الوزارة على ماهر باشا وانتهى عند هذا الحد إنما إذا كان فيه حاجة بعد كده أنا جاهز » .

• ويقول مصطفى أمين : « يوم ٢٣ يوليو كنت فى مكتب مرتضى .. وزير الداخلية فى ذلك الوقت .. وجاء له خبر على إن الجيش يتحرك .. بعد ذلك علمت إن فيه ثورة » .

• وكيف كان تصرفك ؟

• « أنا رأيي إن الثورة لما قامت لم تقصد طرد الملك كانت تريد فقط الفاسدين من الضباط فى الجيش .. لما قامت وحصل الانقلاب والبلد خرجت تؤيده بالإجماع .. يعنى مافيش حد وقف ضد الثورة .. وهم لم ينتظروا هذا أبداً كانوا فاكرين حتحصل مقاومة وإن حرس الملك يقاوم وإن أجزاء من البلد سوف تعترض ولم يعترض أحد .. وحاولت أن أرجع مصر لإني كنت فى الإسكندرية .. ورجعت مصر بالسلامة » .

• هل دى مش ثورة ده انقلاب كما قال البعض ؟

- « هو فى الأول كان انقلاب وإنما تحول بعد ذلك إلى ثورة » .
- **ويقول أنيس منصور :** « الثورة قامت ولم تكن فى الحقيقة ثورة .. لأن ثورة بمعنى أن يكون عندك برنامج شامل لتغيير المجتمع وتغييره .. وفيه أنواع مختلفة من الغضب فيه غضب .. وفيه سحق .. وفيه انقلاب .. وفيه ثورة .. وفيه غضب يبقى أنا متضابق من أوضاع وما عديش برنامج .. سحق ساطخ على وضع معين وعندى فكرة أصلحه إزاي .. انقلاب عسكري إنك إنت عملت تعديلاً ويجوز ما عندكش برنامج » .
- **ويقول إبراهيم شكرى :** « أنا كنت فى سجن مصر .. ففى الواقع فى تلك الليلة مساء سمعنا بأن هناك ثورة وأغلقت السجون يومين ثلاثة من غير خروج .. وجاء يوم ٢٦ يوليو .. هذا اليوم أنا بالنسبة لى هو قيام الثورة وكانت خطوة كبيرة لا شك فى ذلك لأن تهمتى كانت العيب فى الذات الملكية !! »
- **ويعلق جلال علوبة فيقول :** « أنا بأكتب كتاباً ومش عاوز أبوظه لإنى بأكتب منكراتى ونكرياتى .. وإحنا كضباط مفروض إننا بنحلف اليمين القانونية أول ما نخش ضابط ونقول الله والوطن والمملك .. فده قسم لا يمكن أن أرجع فيه .. والضابط مهمته الدفاع عن الوطن مالوش دعوة بالسياسة إطلاقاً » .
- **كيف إذن رجع فيه رجال الثورة فى رأيك ؟**
- « ما أعرفش .. أنا ضابط متعلم فى إنجلترا بلد العسكرية وأنا عمرى ١٢ سنة والضابط اللي بيخالفوا القسم بتاعهم ويرجعوا يتدخلوا فى شئون ليس من شئونهم لا أعتبرهم ضابطاً أبداً .. لأن الضابط بيسمع كلام رئيسه فقط وينفذ الأوامر التى تصدر له فقط لا غير .. مالوش دعوة بأى سياسة أو أى تدخل فى حاجة ثانية غير شغله » .
- **حتى لو كان من أجل مصر ويدافع من وطنيته ؟**
- « هو ليس له الحق أن يحكم على بلده أو وطنيته .. لأن يصح إن يجيى لك أمر بالتراجع وانت مش عاوز تتراجع زى نيلسون وما حصل .. ولكن القواد لهم حكمة فى هذا .. فلأزم تنفذ الأمر حتى ولو كنت مش مقتنعاً به » .
- **ويعلق لطفى واكد فيقول :** « لأ .. لم يكن مخالفاً للقسم لأن يميننا أساساً للوطن وكل من يعرض مصالح الوطن للخطر فهو لا يستحق أن يكون محصناً باليمين » .
- **وللعلم فإن الحركة المباركة كما أسماها أصحابها عادة قيامها .. تعدلت مواعيدها أكثر من مرة ..**
- **يقول مأمون الهضيبي :** « تأجل موعد قيام الثورة حتى يأخذوا التصديق النهائى من المرشد العام اللي كان موجوداً آنذاك حسن أبو زيد اللي فاجيء عبد الناصر إن أخبار الثورة أصبحت معروفة ومعلنة وإنه وصل الأمر إلى مسامع الملك واللواء حسين سرى عامر بتاع الملك ..

فخافوا على أنفسهم وعجلوا بموعد قيام الثورة اللي كان المفروض أن يكون بعد ذلك ببضعة أشهر .. وكان على ما أذكر تحدد ٢٢ يوليو وأخطر قيادات الإخوان .. فقالوا له مانقدرش لإنه لابد في بادئ الأمر نأخذ التصديق النهائي من المرشد .. إزاي .. مش إزاي .. قالوا إحنا مانقدرش ولاقوه موجود في الإسكندرية أيامها فساfer فريق منهم إلى الإسكندرية منهم فريد عبد الخالق وحسن العشماوى وقابلوه وعرضوا عليه الموضوع وقعد يتبادل معهم الرأى فى هؤلاء الضباط وإيه الوضع وحيصلوا إيه .. وإيه المطلوب من الإخوان لإنه طلب منه أن يعملوا بعض الحركات التخريبية وهو رفضها .. خاف منها .. فأنفجرت الثورة وننسب مسئولياتها للإخوان أو حاجة زى كده .. لما رجعوا بالموافقة .. فأجلت إلى ٢٣ يوليو » .

● وكانت عقارب الساعة تواصل دوراتها .. معلنة بداية تاريخ مصر الجديد ..



يسقط الملك فاروق

- تسعون ساعة بالضبط مرت بين تحرك الجيش فى منتصف ليلة ٢٣ يوليو ورحيل الملك فاروق الأول .. بعدها بثلاثة أيام ..
- عاش الملك منذ ميلاده يوم ١١/٢/١٩٢٠ فى القصر الملكى حيث نشأ وترعرع وتعلم ..
- وأسأل السفير صلاح شعراوى : كنت ضابطاً بالحرس الملكى .. ولك ذكريات كثيرة عن هذه المرحلة المهمة فى تاريخ مصر .. تفكرت لنا منها إيه ؟
- « أنا فعلاً كنت ضابطاً فى الحرس الملكى من عام ٤٨ حتى نهاية عام ٥٢ وانتقلت بعد هذا إلى صفوف القوات المسلحة على أثر الكادر بتاع ضباط الحرس اتفك .. لكن أنا كان لى دراية بالسراى قبل ذلك .. لأن والدى كان خدم فى السراى من سنة ١٥ لغاية ٢٠ أغسطس عام ٤٣ يعنى حوالى ٢٨ سنة ونصف .. وكان يأخذنى وأنا صغير علشان أتدرب سباحة أو سيف أو شيش على أيدي مدرب الملك فاروق .. علاوة على الأحاديث الللى كان والدى يحكيها لى .. فاللى أقدر أقوله هو إن الملك فاروق كان شخصية زى كل الناس ما عارفاهما أول ما جاء الحكم .. كان كل الناس بتحبّه .. الشقاوة بتاعة الشباب .. والجمال أيضاً .. وشالوا به العربية مرة من المرات .. وانتهت الأمور بأن حصل نوع من الضيق والاستياء من تصرفاته فى سنواته الأخيرة .. لكن أنا عاوز أقول حاجة حقيقة الملك فاروق بأعتبره ضحية الوالد .. والده الملك فؤاد .. الإنسان ببقيى نتاج ظروف عاشها .. فالظروف اللتى عاشها فاروق أيام والده .. ظروف صعبة لازم تؤدى إلى هذه النتيجة .. لأنه كان ولد على أربعة بنات والده كان حارم أى اتصال خارجى بينه وبين بره .. فالولد عاش فى جنبات القصر فى إطار نسائى .. إطار البنات أخواته .. بلبسوه .. يساعدوه .. فكانوا بيدلعهو بـ « روكى » بالمناسبة .. بيقولوا له « روكى » اسم الدلع بتاعه .. فعاش فى هذه الحياة .. عمره ما شاف أحداً .. وحتى أبناء الأسرة المالكة كان الملك فؤاد مانعاً أى اتصال بهم .. وأنا أتذكر نظراً لابتعاد الناس عن مجموعة فاروق وإخوته .. أنا كنت أول مرة أشوفه .. طبعاً والدى كان ضابط فى الحرس فأخذنى معاه .. ووقفت عند بوابة المنزلة على باب المحطة وجاء عم إدريس الللى هو الشماشرجى يعنى الللى

بيلبس الملك .. كان عمرى ٦ سنين وقالوا لى إن سمو الأمير مش حيمر لإنه تعبان إنما الأميرة فائقة حتمر .. فأنا أتذكر إنهم قالوا لى لازم توطى رأسك عندما تمر .. أنا طبعاً علوز أشوف الناس دول .. فرفعت رأسى وشقتها راكبة الكاريئة فى الفسحة بتاعة الساعة عشرة ونصف ولاقيتها بنزع لعن إدريس : من فين جبتوا ده ؟ .. يعنى كلنى شخص جاى من المريخ مثلاً أو القمر .. فهذه نقطة .. النقطة الثانية إنه لم يتعلم كفاية .. وهذه نتيجة ظروف إن والده مات وهو صغير .. وظروف أخرى سياسية لإن أمه كانت خائفة إن العرش يتاخذ منه .. فما صدقوا إنه يتم الـ ١٨ سنة هلالية .. وبقي ملكاً .. لإنه كان وقتها الأمير محمد على بيستعى أن تزدد فترة الوصاية ٥ سنوات .. تعدى الـ ١٨ سنة .. فهذه النقطة مهمة فى حياة الملك فاروق لإن قلة تعليمه خلّت عنده نوع من مركب النقص .. وأنا والدى حكى لى .. إن ملك صغير ١٨ سنة وفى إطار سراى وناس كبار فى السن زى سعيد باشا ذو الفقار وإسماعيل باشا تيمور ومراد باشا محسن .. مين اللى حيقى حواليه .. أهو برضه لازم يكون فيه ناس عقليتهم متقاربة .. فوقع الاختيار على مجموعة من شباب مصر المتعلم من أبناء العائلات الكريمة مثل محمود يونس وصالح يونس أخوه ومحمد عبد الرازق وإكرام سيف النصر والحامصى ومحمد صادق .. مجموعة محترمة فاضلة .. فلأسف الرغبة كانت رغبة كويسة لكن أدت إلى نتيجة عكسية .

• إزاي يافتهم ؟

• « هو شعر إن هناك ناس تبدو مثله .. كانوا بيتكلموا لغات وهو كمان .. كانوا عارفين الدنيا .. بس هم متعلمين .. فابتعد عنهم بدل ما يتقرب منهم أو يحاول يوصل لمستواهم .. ابتعد عنهم .. طبعاً ظروف الحكم شغلته بلا جدال .. لكن ابتعد عنهم وعن صحبتهم فكان اختلاطه كله بمجموعة الخدم اللى اشتغلوا فى السراى .. كهربائى السراى والسواق بتاعه ومدرّب الكلاب والحلاق .. هؤلاء بمستواهم العلمى حيعطوا له إيه ؟ مش حيقدرنا يعطوا حاجة ذات قيمة .. ويقوا يدوا له أى حاجة ترضيه وهذا ما أشبع غوره .. وتطورت الأمور إلى أن أصبح مجموعة منهم وخصوصاً للأسف بأقول المصريين .. أقوياء جداً فى السراى وخارج السراى .. يعنى مثلاً .. وصل الأمر إن السائق بتاعه كان هو وحسين سرى كمدير سلاح الحدود هما اللى ببوضوا التزيينات والتعيين فى المناصب .. محمد حسن اللى كان الشماشرجى بتاعه بعد ما كان فاروق تعب من عم إدريس اللى كبير فى السن واشتكى منه .. وجاء مرة من المرات - والدى حكى لى - كان الملك بيصطاد فى وادى الرشراش سنة ٤٣ وكان وقتها فيه أزمة غذائية فى مصر بسبب الحرب .. فقال له : إنت جاي تصطاد هنا وسايب اللى أبوك عمله لك .. ما ترجع تانى .. قال له : أخرس بس يا واد يا كلب .. رد عليه وقال : كبرت صغرت كلب إنما إنت ما تضيعش الملك اللى سابه لك أبوك .. فالراجل يظهر كبير وخلص استيعب فيقى يقول اللى فى قلبه .. لما الملك تعب منه وقال ده كبير .. رشحت الملكة نازلى « محمد حسن » اللى هو كان الشماشرجى بتاع جوزها .. قالت له : أنا عندى ولد كويس قوى .. محمد حسن جاء وفى خلال سنتين ثلاثة .. كان مش مسيطر على القصر كان مسيطراً على الدولة وكان هو اللى

- يتكلم مع الوزراء ويمكن بيعين ويشيل ويقبل وكان فاروق سايب له الأمر إلى حد كبير في أواخر أيامه .. هذه بعض التكريات التي سمعتها من والدى خلال ذلك الوقت .
- وأطلب من مصطفى أمين كلمة عن الملك فؤاد والد الملك فاروق .. فيقول : « هو كان رجلاً مُصلحاً ولكن كان ديكتاتوراً وكان لا يؤمن بالشعب المصرى » .
- وأسأل حسن المراعى (الابن الثانى للمرحوم الشيخ المراعى) .. كيف كنت ترى العلاقة بين الأزهر والملك ؟
- « والدى كان بالنسبة للعلماء سنه صغير وشيخ الأزهر عادة سنه لا يقل عن ٦٠ و ٨٠ سنة .. النحاس هو الذى رشح والدى أن يكون شيخ الأزهر لأنه كان رئيس المحكمة الشرعية .. ورغم اعتراض الملك فؤاد على صغر سنه إلا إن النحاس باشا صمم لأنه وجد فيه إنه أنسب ما يكون لشيخ الأزهر .. ووضع قانون الأزهر الذى أجله الملك ورفض الموافقة عليه فقدم استقالته سنة ٢٩ وعاد مرة أخرى سنة ٣٥ بعد ثورة عارمة قام بها الأزهر مع الجامعة » .
- والدته الملكة نازلى ثانى زوجات الملك فؤاد .. بعد شويكار .. وجده هو الخديوى إسماعيل ..
- وأراد الملك فؤاد استكمال تعليم ابنه فأرسله إلى بريطانيا للالتحاق بأكاديمية عسكرية هناك ..
- واضطر الأمير فاروق الأول إلى العودة لمصر بعد أقل من عام بسبب وفاة والده ..
- وطلب الملك فاروق أن يكون حفل تنويجه فى الأزهر الشريف ووجد معارضة من الوفد .. وبيع « الإخوان المسلمون » الملك المعظم .. الذى جلس على العرش فى ٢١ يوليو سنة ١٩٣٧ وعزف السلام الملكى لأول مرة لملك مصر الجديد .. بعد أن هتف رئيس الديوان على باشا ماهر قائلاً « مات الملك عاش الملك » ..
- ويقول على خليل : « وكان الملك فى أول توليه الحكم محبوباً جداً لأنه صعب على الناس .. كان هو يدرس فى إنجلترا والوالد توفى ٢٨ إبريل .. فرجع بالمركب .. مآكناش الطائرات متوفرة قوى .. يوم ٦ مايو لما وصل كان لابس بذلة تشريفية كده جاكته بيضاء عليها نياشين وراكب عربية حظور وطلعت صورته وهو راكب فى العربية فى الصحف جاى من محطة القاهرة إلى قصر عابدين .. وبعدين وهو بيبكى صعب على الناس .. وكان جميل الصورة فحصل عطف شديد جداً عليه من أبناء الشعب جميعاً » .
- ويقول محسن محمد : « على ماهر هو أكثر شخص أفسد الملك .. وأخذ يعلن فى البلد أنه « الملك الصالح » .. وأدخل فى فكره ذلك وكان ينزل ليصلى كل جمعة فى الشارع .. وصدقه الملك » .
- ويقول عادل ثابت : « توجه الملك فاروق بصحبة عزام باشا إلى مكة المكرمة لأداء فريضة

الحج .. حيث استقبله الملك سعود كما يستقبل ابناً له وقبل الدعوة لزيارة مصر .. وتمت تلك الزيارة في مارس سنة ١٩٤٦ .

• ويقول حسين الأثري : « رغم إنه لم يكن عالى الثقافة جداً لإبنه عاد بعد وفاة والده دون أن يكمل تعليمه .. ولكنه كان مثقفاً نفسه فى حاجات كثيرة » .

• ويقول فكرى مكرم عبيد : « هو نشأ نشأة كريمة .. ومنظره كان جميل .. والناس كانت بتحبه أول الأمر .. أما بعد هذا تحول من النقيض إلى النقيض .. واللى حوله طبعاً الله يرحمه على ماهر اللى أدخل فى ذهنه إن هو بقى زعيم العرب الذى لا يخطئ .. الخ .. وكان شاباً صغيراً بتاع ١٧ - ١٨ سنة فنخله الفرور » .

• وأسأل حسين بيكار : الملك فاروق كنت بترسمه إزاي ؟

• « زمان الملك فاروق رسمه فنان شهير جداً اسمه « ديلالزو » جابوه من الخارج رسمه وهو كان لسه صبياً .. وكانت هذه الصورة أجمل صورة رأيته فى حياتي لفاروق لإنها صورة بعين فنان عالمي .. أنا بعد ما شفت هذه الصورة مش ممكن أرسم الملك فاروق أبداً » .

• خمسة عشر عاما (أغسطس ١٩٣٧ - يوليو ١٩٥٢) هى الحكم الدستورى لفاروق الأول .. بدأ بقبول شعبى واسع للملك الشاب ..

• وكان الملك قد تزوج فى ٣٨/١/٢٠ من صافيناز نو الفقار التى أطلق عليها اسم الملكة فريدة ..

• وأنجب من فريدة ٣ بنات هن فريال وفوزية وفادية ..

• كان لفاروق خمس أخوات من البنات ..

• ويقول عادل ثابت : « الأولى أخت غير شقيقة .. هى الأميرة فوقية ابنة الملك فؤاد الأول والأميرة شويكار .. والباقيات شقيقات من الملكة نازلى » ..

• ووصل تأييد الجيش للملك الشاب فاروق إلى ذروته بحادثة ٤ فبراير سنة ٤٢ حين أجبره الإنجليز بقوة السلاح على أن يأتى بوزارة النحاس باشا ..

• لم يكن الملك قد أكمل ٢٢ سنة من عمره واجتمع برؤساء الأحزاب ورجال السياسة بعد حادثة ٤ فبراير ..

• ويقول حسن فهمى : « إحنا طبعاً اعتبرنا إن اللى حصل من الإنجليز أيامها ده إهانة للجيش المصرى كله .. واجتمعنا فى نادى الضباط وقررنا إننا نليس رسمى احتجاجاً منا على ما حدث للملك وإن إحنا نعظم بعض ونحى بعض أينما تواجدنا .. وكان فيه حفل يوم ٤ فبراير وكل سنة نجتمع فى نادى الضباط » .

* **ويقول جمال حماد :** « اعتاد فاروق عقب حادث ٤ فبراير .. القيام بزيارة شخصية مفاجئة لنادى الضباط بالزمالك مساء ٤ فبراير من كل عام » .

* **وأسأل حسن فهمي :** هل الملك فاروق كان مهتماً بالجيش المصرى ؟

* « أنا أذكر المناورات .. مناورات المدفعية .. كنا بنعمل مناورات مخصصة وندعوا إليها البرلمان علشان يصدقوا لنا على ميزانية الجيش وكان الملك بيحضر هذه المناورات .. فكان فى الحقيقة الملك مهم جداً بالجيش .. والجيش قبل الثورة كان جيشاً صغيراً .. كان عندنا آلاى واحد مدفعية وآلاى مضاد للدبابات وآلاى طائرات .. لكن الضباط كانوا من عائلات كويسة .. ويقدم الضابط أوراًفاً إنه يملك أطيافاً .. والجيش لإنه صغير فكان معتنى به قوى وإحنا ما كناش بنشوف خير من البعثات .. ومع ذلك كان الجيش كريس قوى .. يمكن ما كانوا راضيين عن الضباط الكبار بعد حرب سنة ٤٨ » .

* **ويقول د. يونان لبيب رزق :** « تزايدت كراهية الملك للإنجليز بعد حادث ٤ فبراير ورفض حكومة الوفد .. وكانت صلة الملك بالإنجليز سيئة أيضاً بسبب فكرتهم فى تحجيم الجيش المصرى ورفض تسليمه .. لاسيما بعد حملة فلسطين » .

* **ويقول محسن محمد :** « كانت ميول الملك مع الألمان بلا شك وهذا ما جعل كراهية الإنجليز له تزداد » .

* **ويقول عادل ثابت :** « أقدر أقول لك حاجة .. أنا كنت فى الجامعة العربية لما الملك كلف عبد الرحمن عزام إنه يجيب ضابط ألمانى كبير مصر علشان يدرس أوضاع الجيش وخصوصاً حرب سنة ٤٨ اسمه جنرال شميت .. وكان تانى قائد .. راجل من القواد المشهورين بخبرة الحرب فى الصحراء .. حضر هنا .. وأنا كُلفت أنى أكون مسئولاً عن هذا الشخص .. وكنت همزة الوصل بين الملك وعبد الرحمن عزام فى العملية دى بالذات .. قعد هنا مدة طويلة قوى سنتين وشوية وواجه دسائساً ومشاكل كبيرة قوى .. كان حيدر باشا طبعاً يخشى أن يجيبوا راجل ألمانى يراقب العمليات العسكرية .. لدرجة إنه يوم من الأيام وجدنا إن السفارة الأمريكية جابت جنرال ألمانى تانى بطلب من الحربية علشان يوقف هذا الجنرال بتاع الملك .. وكان الملك مصمماً أن يستمر فى الحرب .. وده مكتوب فى الكتاب بتاعى » .

* **وكان الملك يشجع المصريين من أوائل الطلبة الرياضيين .. والفنانين الذين غنوا له وأبدعوا ..**

* **وزادت شعبية الملك بعد حادثة القصاصين ..**

* **ويقول حسين الأتربى :** « دى مُدبرة من الإنجليز .. كانت حاملة عسكرية واقفة فى طريق القصاصين راحت طالعة من وسط عربية وضربت الملك ولولا إنه كان راكب المرسيدس اللى هنتر كان مديها له هدية كان خُلع فيها » .

• بينما يقول د. يوثان لبيب رزق : « اصطدمت سيارة الملك بسيارة نقل تابعة للجيش الإنجليزي .. وتصور البعض أنها حادثة مدبرة » .

• ويقول حسن فهمي : « كان الملك محبوباً ولما جرح في القصاصين طلعت الدنيا كلها إلى مستشفى القصاصين .. وبعدها عطا الله باشا لم ضباط الجيش كلهم وراحوا له على قصر القبة والملك طلع من فوق وشاور لنا وقام اللوات كلهم قبلوا يد الملك .. أيامها كان محبوباً فعلاً » .

• سرعان ما بدأت شعبية الملك تنكّل تدريجياً لأسباب مختلفة .. إذ تصاعدت روائح الفساد من السراى .. وكثر الكلام عن حاشية الملك واستغلالها للنفلوذ ...

• وأسأل د . سليمان حزين : ماذا تقول لنا عن الملك فاروق في سطرين ؟

• « تولى الحكم شخص أقل بكثير في مستواه العقلي والفكرى والعاطفى من المسئولية التى ألقيت عليه .. شخص صغير جداً بالنسبة لبلد كمصر حضارتها ٧ آلاف سنة » .

• ويقول د . حلمى مراد : « الملك فاروق بدأ بداية طيبة كأى شاب طموح يريد إنه ينجح فى المركز الذى تولاه .. ولكن بطانة السوء أدت إلى التأثير عليه وانحرفوا به .. بحيث أصبح يعيش فى أجواء فاسدة .. لا تبشر بالخير » .

• ويقول حلمى سلام : « فاروق كان ملكاً فاسداً بكل المقاييس .. والملوك كما قال عبد الفتاح باشا حسن الوزير السابق .. يولدون فاسدين .. فكل شىء متحقق لهم .. ولا يبقى أمامهم إلا الفساد » .

• وأسأل تحية كاريوكا : هل أيام الملك كانت الرافصات لهن علاقة بالسراى ؟

• « أنا عمرى ما كان لى علاقة بالسراى إلا بالملكة فريدة لإن والدتها فى جمعية الهلال وخالتها وفيه صداقة بينا » .

• بس كان فيه سامية جمال .. وكاميليا ؟

• « كاميليا عمرها ما رقصت .. هو كان بيحبها .. شاب وملك .. ما يحبش ليه ؟ إذا كان ملك واحد دلوقى عشرة .. زى ما قالوا ذهب فاروق وأتوا فواريق » .

• وسامية ؟

• « كانت سامية جمال علاقتها معه وثيقة شوية .. وعلى فكرة يوم ما الملك طلق فريدة بقينا أعداء .. كإنتى حماته » .

• ويقول د . يوثان لبيب رزق : « فى البداية كان فاروق ملكاً .. ثم أصبح أفاقاً .. وأنا أذكر إننى من جيل كان يخرج فى المظاهرات معلناً سخطه على الملك .. ونقول أين الغذاء يا ملك النساء !! »

- وسأنت ملكة مصر السابقة ناريمان : من كان مستشار الملك فاروق رقم واحد ؟
- « ما فيش شك انطوان بوللى اللى كان سكرتيره الخاص .. كان يخرج معاه ولازم يقف جنبه ويلبسه ويوضب له حاجاته .. ده غير الشماشرجى محمد حسن .. ودخلت مرة أوصته .. ارتبك بوللى .. كنت بأسأل عن الملك وأقول له هو فين .. ولأول مرة أشوف السويتشات لرئيس الوزراء ومثلاً لوزارة الداخلية والخارجية .. كانت لها كاباتات تليفونات .. قلت له إنت تعرف الملك فين ؟ قال طبعاً بس ما عنديش تعليمات إنى أقول » .
- أيامها كان بيروح فين تقدرى تستنتجى أم لا ؟
- « كان فى شقق الملك على مسافة كيلو ونصف أو ٢ كيلو من شقق الملكة .. فى السراى .
- ويقول عادل ثابت : « كان على فاروق أن يتحمل وطأة المشكلات بين أمه وزوجته .. فكانت الملكة نازلى تؤيد سياسة تقارب ابنها والنحاس باشا (زعيم الوفد) الذى كانت زوجته صديقة شخصية لها .. أما الملكة فريدة وهى ابنة شقيقة رئيس الوزراء حسين سرى باشا الذى كان يميل للإنجليز .. وخسرت فريدة المعركة أمام المرأة الأكبر سناً .. رغم شبابه ونضارتها .. فإن خصمتها الملكة نازلى .. كان لديها الخبرة والنضج والسيطرة .. وسيطرت على فريدة الغيرة ونزعة التملك .. وهو آخر شيء كان عليها أن تفعله » .
- ويقول مصطفى أمين : « كان فى أوائل حكمه محبوباً جداً من الشعب ولكن حاشيته وبخاصة الإيطاليون وغير المصريين الذين كانوا يحيطون به أفسدوه » .
- ويقول د. يوتان : « الحاشية الخصوصية للملك أساءت إلى فاروق إساءة بالغة » .
- ويقول توفيق عبده إسماعيل : « أنور السادات كان له دور رئيسى فى تنظيم الضباط الأحرار عن طريق علاقته بالحرس الحيدى وعلاقته بالكتور يوسف رشاد على وجه التحديد » .
- ويقول د. يوتان : « السيدة ناهد رشاد كانت صاحبة نشاط خاص .. وكانت تعرف الرئيس السادات .. فى تلك الفترة تقرر تكوين ميليشيات لحساب الملك .. مثل الجماعات السرية .. وهذه العلاقة ثابتة تاريخياً » .
- وأسأل حسن فهمى ما هى علاقتك بيوسف رشاد والسادات ؟
- « يوسف رشاد كان من حلوان .. وكان إخواته الصغيرين معى فى الروضة فى حلوان .. لكن ما كانش فيه سابق معرفة بيننا .. قبل مقابلتى له يوم ما جيت من بيت لحم .. علشان أقول له على أوضاع القوة بتاعتنا .. دى كانت أول مرة أشوفه .. وكان يوسف رشاد شخصاً وطنياً ورجلاً شهماً ويجب يسمع أوضاع الجيش .. علشان يبلغ كلامنا للملك وحاولنا الاتصال بالأحزاب السياسية وما كانش فيه نتيجة » .
- والسادات كان منكم أو معكم ؟

- « الرئيس السادات ما كانت معنا .. كان له مجموعة ثانية لكن إحنا كنا على اتصال به » .
- « وأسأل أمين شاكى : هل كان يعلم عبد الناصر بذلك ؟
- « لا .. ولكنه عرفها بعد اشتراك السادات فى عملية العدوان وضرب النار على النحاس باشا » .
- « ويقول خالد محبى الدين : « الحرس الحديدى مجموعة بزعمة مصطفى كمال صدقى .. ضمنت عدداً من الضباط منهم خالد فوزى وسيد جاد وحسن فهمى .. وكنا عارفين أن أنور السادات له علاقة ببيوسف رشاد والحرس الحديدى .. لكن كنا عارفين أيضاً إنه ضابط وطنى » .
- « بينما يقول حسن فهمى : « موضوع الحرس الحديدى .. أقسم لك إنى أول مرة أسمع عن الحرس الحديدى بعد ما قامت الثورة .. قالوا لى أنت من الحرس الحديدى .. لكن عمل إيه ؟ .. موت مين ؟! ضرب مين ؟! إحنا كنا مجموعة من الشباب القوميين الللى كانوا عاوزين يخدموا البلد .. فى مرة قال القراشى للإنجليز : اخرجوا من بلادنا أيها القراصنة .. فرد النحاس إنه لا يمثل إلا نفسه .. وكنا مجموعة متحمسة جداً قررنا قتل النحاس باشا ورحنا ضربناه وكان أبعد مدفع عن ظهر النحاس باشا مترين .. ورغم ذلك لم يمت أحد .. إن الناس الللى كانوا معنا ما كانوا عاوزين يموتوا حد !! »
- « وأسأل حسين الأتربى : هل الحاشية كانت أحد العوامل والأسباب ؟
- « كل ما يقال عن بوللى إنه كان دمه خفيف .. إيطالى الجنسية .. ويترو الحلاق بتاعه .. ومحمد حسن كان الليبى بتاعه فأكرمه وإدى له البهوية وكانت توزع على أى حد .. كريم ثابت يمكن كان له تأثير بسيط فى تشجيعه على التصرفات المنحرفة .. أما إلياس باشا أندراوس ده كان واخذ التواخى الاقتصادية وكان محترم نفسه ويعيد عن الحاجات دى » .
- « ويقول د. حسن رجب : « العملية .. فلتت منه .. لأنه بكل أسف أحاط نفسه بناس لا يستاهلوا .. وعن واحد زى عبد الغفار عثمان ده .. معروف إنه راجل بطل .. راجل تاريخه القديم والحديث كله كان وحش .. يعنى ليه بيحتضنه .. لو كان جاب ناس كويسين أو طيبين .. مافيش شك ما كانتش حصلت المهازل دى كلها .. أو على الأقل لو كانت حصلت كانت أوقفت فى أولها » .
- « ويقول فكرى مكرم عبيد : « مجموعة من الحثالة الللى أمثال بوللى وإلياس أندراوس وإنخ .. الجماعة الللى أفسدوا الحياة السياسية .. وكان الوضع علشان تصل إلى أى شىء .. لابد إنك تتصف بالصفات دى علشان تبقى رجل الملك » .
- « وكان قرار الملك بطلاق الملكة فريدة سنة ٤٨ صدمة شديدة للمصريين .. وقال البعض إنها ابتعدت بسبب علاقاته المريبة .. وقال البعض الآخر إنه ابتعد بسبب علاقاتها المريبة ..

• وبعد الهزيمة فى حرب فلسطين .. بدأت الأزمة تتصاعد .. وهتافات العداء للملك تتردد .. فى المظاهرات الشعبية ..

• وبدأ الصدام بين الإخوان والملك بعد اغتيال النقرشى باشا الذى اتهم فيه الإخوان .. ثم اغتيال المرشد العام حسن البنا سنة ١٩٤٩ الذى اتهم فيه رجال من السراى ..

* ويقول فريد عبد الخالق : « ما أثير حول العلاقة أو الصلة بالملك فاروق بدأت أيام حسن البنا رحمة الله عليه كما قيل .. لإثمه لما جه الملك وتولى وكان لسه شاباً كان حسن البنا من منطلق اهتمامه بإنه يوصل مفاهيم الإسلام بطريقة سليمة سمحة كما هى حقيقة الإسلام وليست كما هى على أفواه وفى تصورات بعض الناس .. فكان عنده أمل إن هذا الشاب إذا بلغته الدعوة وهو غير متأثر ولسه فى دور التكوين مثل هذه الحاجات قد يكون لها أثر حسن على البلد كلها فيما يتعلق بالتعاون مع الناس والتعاون بصفة عامة لكن هو طلب وسعى .. ولكن الحقيقة إنه تبين إن فيه عناصر حواله من الحاشية كانت لا ترى ذلك لأسباب يمكن مش كلها معروفة ربما يكون لها أبعاد خارج البلد بتخاف من صلة الإسلام باللى فى الحكم .. فقيل هو سعى إنما لم يوفق .. كان عاوز وكلف ناس إنهم يكونوا همزة وصل إنما المحاولات لم تكتب لها النجاح . »

* ويقول د. يونان لبيب رزق : « بعد إلغاء معاهدة ٣٦ فى سنة ١٩٥١ أطلق على الملك لقباً جديداً وهو « ملك مصر والسودان » .

• فى ١٩٥١/٥/٦ تزوج الملك من ناريمان صادق ...

* يقول جلال علوبة : « هى شابة مصرية صميمة .. بنت حلال مالهش لا فى السياسة ولا فى الحكم بس عندها صورة شكلها كويس » .

* ويقول حسين الأتربى : « الملكة ناريمان كانت سيدة من الطبقة العادية خالص .. واللى زوجها له أحمد باشا نجيب الجواهرجى وقد كان أحد حاشيته وقريبه .. وكان له تأثير كبير جداً فى بورصة المال فى فرنسا بعد الحرب .. وهى كانت مخطوبة أيامها للدكتور زكى هاشم وبعدين سابته واتجوزت الملك .. إنما لا هى من مقامه ولا مركزه ولا هى من ثقافته .. ولا هى تصلح كملكة لواحد مجروح تلم الجروح بتاعته وإنما تزوجها كزوجة وبس علشان تنجب ولى العهد .. وأنجبت ولى العهد .. وذهبت هى وهو وولى العهد !! »

• وأنجب الملك فاروق الأمير أحمد فؤاد .. ولى العهد فى ١٦ يناير ١٩٥٢ ...

* وسألت الملكة ناريمان : (إيه الذى حضرتك تذكركه يوم (إبلاغك بقرب وصول ولى العهد ؟

* « ده فى آخر شهر العسل ، كنا زرنا الأول سيسيليا .. على « فخر البحار » مش « المحروسة » .. اللى كانت أظن بتتصلح .. ورحنا بعد كده كابرى فى الساحل الإيطالى .. وفرنسا (الريفيرا) .. وشعرت بدوار وكان معنا الدكتور يوسف رشاد الله يرحمه ، حسيت إننى منزعة ، هو عرف على طول .. ثم أبلغته بالخبر ضحك وقال « على الله يجيبى لى بنت ! »

- وإيه اللي حضرتك تذكره عن إبلاغه بميلاد ولى العهد ؟
- « الملك اختار الدكتور إبراهيم مجدى ودخل الأوضة فى بداية الولادة .. ولما أنا فقت من البنج قالوا لى إنه دخل مع الكاترة والمرضات فى أوضة العمليات ولبس ماسك للتنفس .. وقالوا له .. طبعا كان مبسوطاً جداً وأنعم على الدكتور إبراهيم مجدى بالباشوية » .
- وأنعم على حضرتك بإيه يومها ؟
- « كل اللي أقدر أقوله وعدنى إنه سوف يغير مجرى حياته علشان خاطر ابنه أحمد » .
- وسألت جلال علوبة : هل الملك فرح لما جابت له ولى العهد ؟
- « جداً » .
- وفى يوم ٢٦/١/٥٢ بعد أيام من ميلاد ولى العهد احترقت القاهرة ..
- ويقول أحمد أبو الفتح : « لم يسفر التحقيق عن معرفة الجناة الذين حرقوا القاهرة .. وتبادل القصر والوفد الاتهامات .. كما حامت الشبهات حول أحمد حمسين زعيم الحزب الاشتراكي .. ونتج عن الحريق إقالة الوفد » .
- وأسأل الملكة السابقة ناريمان : أكبر أزمة مرت على الملك فاروق فى نظر حضرتك إيه ؟
- « حريق القاهرة » .
- كان إيه انطباعه عنه .. عرفتم به إزاي ؟
- « أنا الحقيقة كنت فى شبه سجن كبير ذهبى .. لكن برضه كان مش مصرح لى إن أنا أخرج كثيراً .. كل ما أذكره إن أنا صحيت مذعورة وكان بعد ١٢ يوم من ولادة ولى العهد .. فتحت عيني لافتيه واقف لابس البدلة .. بدلة البحرية ، هو يفضل لبس بدلة البحرية .. لما شفته واقف كان العرق بيتصبب منه .. هو كان لما يتضايق يبقى العرق كثيراً طبعا .. ماسك النظارة المعظمة ويدخل فى مكتبه ويرجع تانى بيدوا له صور .. الحريق وصل فندق شبرد .. الحريق وصل المحلات اللي حواله .. ويطلع على السطوح وكان يحاول الاتصال بوزير الداخلية » .
- فى سراى القبة ولا سراى عابدين يافندم ؟
- « لأ ، عابدين » .
- ويتصل بالمسئول مين يافندم ؟
- « المسئول وزير الداخلية فؤاد باشا سراج الدين .. أظن أفكر لإن الأمن ما كانش علوز ينزل جيش .. لكن لم يكن ممكن .. وخصوصا لما قال قومي واستعدى ، ولأول مرة أعرف إنه كان فى سطح عابدين فيه مطار هيليكوبتر .. واستدعى عاكف » .

- * عاكف مين يافندم ؟
- * « طيار الهليكوبتر » .
- * على أساس إتكاحتمال تمشوا من عابدين ؟
- * « قال لى قومي حضرى نفسك للسفر بس خللى بالك مش حتأخذى غير ابنتك .. أنا كنت لسه فى النقاهاة .. قلت له حنسا فر فين ؟ وهو متضايق وخائف وبعدين جه قال مافيش فائدة .. كان كل همه ليكون الحريق حوالين الأوبرا أو تمثال إبراهيم باشا من شغب ناس وحشيين مشاغبين .. وأنا شفت الصور .. كنت أفضل أن نرحل بعدها ولكن لم يقدر إنه يسيطر على الأمن أو الداخلية فنزل الجيش ومنع التجول » .
- * تفنكرى الحريق حصل ليه ؟
- * « لا أعرف !! »
- * ويقول خالد محبى الدين : « بعد حريق القاهرة جاء بغدادى بجمال سالم .. ولم تكن لنا به أى علاقة من قبل » .
- * ويؤكد هذا المعنى محسن عبد الخالق : « بغدادى جاب جمال سالم معاه دون دعوة .. ولم يكن ممن شاركوا فى عمليات الضباط الأحرار » .
- * ويقول أحمد المصرى : « حريق القاهرة ده فجر فى نفوس الضباط الأحرار معنى أن الموقف أصبح لا يحتمل تأجيل » .
- * ونلاحظ من الملك الاستهانة بل والاستهتار .. وقيل الكثير عن الملك فاروق وتصرفاته وطباعه .. وتضاربت الأقوال أحيانا واتفقت فى أغلب الأحيان ..
- * ويقول د. عبد العظيم رمضان : « كان الملك دائم الاعتداء على الدستور » .
- * وأسأل الملكة السابقة ناريمان : هل كان يتحدث باللغة العربية ؟
- * « بطلاقة » .
- * وكان بيصلى ؟
- * « كان بيصلى فى جامع على أيامى فى قصر عابدين .. والمنتهزه فيه جامع .. وكان يحترم جداً شيخ الأزهر .. ولم يكن يحسنى الخمر زى مايقولوا .. بس هو كان يشرب سوانل كثيرة لأن والدته كانت فى حالة خطيرة دائماً عايشة بنصف كلية .. صحياً تعبانة .. كان بيأخذ كميات مهولة من السوانل علشان الكلى » .
- * هو كان لا يشرب زى ما حضرتك بتقولى ويصلى ويصوم .. طيب أمال إيه اللي كان بيعمله من المحرمات إذا سمحت لى أعرف ؟

• أصل الفترة بتاعتي كانت دقيقة جداً .. والحراسة مش عاوزة إنه بتغيب كثيراً من السراى
فأفكر كان يحب يروح نادى السيارات .. يفضوا الشارع كله .. ويكونوا ٤ أو ٥ الموجودين
هناك .. يمضى الوقت هناك ..

• طيب وهل السهر فى نادى السيارات من المحرمات ؟

• نأ .. يعنى لما يكون فيه أزمة لازم يحلها بدل اللعب لإنه كان يقدر من وجهة نظرى يحل
المشاكل .. بس الكوتشينة أفكر يعنى كان بيحبها ..

• ما شفتيهوش حضرتك أبداً بيلعب كوتشينة ؟

• نأ .. شفته ..

• ويقول أحمد أبو الفتح : « أرسل لى عبد الناصر مذكرات .. كانت إدارة المخابرات قد استكثبت
كريم ثابت مستشار فاروق الصحفى .. ثم تلا ذلك مذكرات أخرى كتبها بعض رجال فاروق ..
واستمر الناس يقرءون عن فاروق قصصاً عجيبة .. »

• وأسأل حسين الأتربى : ماذا تقول عن الملك فاروق ؟

• الملك فاروق كان وطنياً فوق ما تتصور حضرتك .. وهو انحرف نتيجة الظروف العائلية ..
والمسئولة الأولى هى الملكة نازلى والدته .. ثم لحقت العلاقات الغير متوافقة بينه وبين
زوجته .. والمثل السائر إذا ما شكت الزوجة فى الزوج قد تلجأ إلى إثارة شكوكه بعلاقات
صحيفة أو كاذبة .. حتى تجذبه ناحيتها .. كلاهما مات .. إلا إن الاثنان لطخا أسماء
بعضهما ! ..

• وهل تعتقد الملك فاروق ظلم ؟

• ظلم ظلماً كبيراً .. إلى أن ضاقت به نفسه بحمل هذه الأثقال كلها .. العائلية من ناحية ..
وبعدين الأثقال السياسية اللى إحنا كنا فيها بعد الحرب العالمية الثانية .. وضغط اللورد كيلرن
عليه اللى ما كانش عاوزه .. وكانوا بيكرهوه وعاوزين يشيلوه بأى طريقة .. طبعاً ما كانش
مترناً فى تفكيره فى الآخر .. وعاش عيشة مش بتاعة ملوك فيها حرية زيادة .. تبقى قاعد
فى كازينو تبص تلاقى الملك داخل وساحب له ثلاثة أربعة معاه وقاعدين فى طرابيزة .. وتطلع
من هنا تزوح حنة ثانية تلاقى الملك تانى داخل .. فضاعت حتى الهيبة اللى كانت موجودة فى
وقت كان البروتوكول فى عزه .. فداس البروتوكول كله فى الأرض .. لإنه كان منداس هو
شخصياً ..

• ويضيف عادل ثابت : « فاروق مهما كان وطنياً مصرياً .. والدليل على هذا إنه كان مصمماً
قوى فى الحرب على إسرائيل .. لصالح فلسطين .. ولولا كده كان يمكن قوى يتاجر مع
الأمريكان ومع غيرهم .. وكان كسب الملايين .. واصططح مع إسرائيل .. وكان فضل ملك
مصر .. الواحد لازم يقدر له هذا .. »

* **ويقول جلال علوية :** « أولاً هو كان وطنياً جداً كان يحب البلد زى أى مصرى .. هو كان مظلوماً لأنه محكوم من الإنجليز والوفد .. كان يخاف من الاثنين .. يعنى أحياناً كنت أدخل عليه ألافه بيعيط .. يقول مش عارف أشعل إيه .. الإنجليز والوفد ضاغطين على فى كل حاجة .. آخر مرة قلت له يا مولائى إنت مفروض تملك ولا تحكم .. ليه ما تجيش الوفد مش البلد عاوزاه هات الوفد وهات النحاس باشا .. قبل آخر وزارة للنحاس قال : « إنت مجنون إنت عاوز يشيلنى .. قلت له : « ما تسمعش الكلام الفارغ ده .. النحاس زعيم البلد والبلد عاوزاه هاته .. قام قال : « طيب حاشوف ولو حصل حاجة إنت المسئول .. قلت له « طيب » .. فعلاً خللى النحاس باشا ألف الوزارة .. آخر وزارة قبل الهلالى على طول .. وجاء النحاس باشا دخل عليه علشان يشكره .. أول ما دخل عليه قال له : « يا مولائى أنا لى طلب عندك .. أنا كنت واقفاً جنبه .. الرجل وشه اصفر .. قال له : « إيه يا باشا ؟! » .. قال له : « أبوس إيدك .. ارتاح .. قلت له مش كده أحسن .. ليه تتخافوا مع بعض » .

* **ويقول مصطفى أمين :** « أنا رأيي إن الثورة لما قامت لم تقصد طرد الملك .. كانت تقصد فقط الفاسدين من ضباط الجيش .. ولما قامت وحصل الانقلاب والبلد خرجت تؤيده بالإجماع يعنى مافيش أحد وقف ضد الثورة .. وهم لم ينتظروا هذا أبداً .. كانوا فاكرين حتحصل مقاومة .. وإن حرس الملك حقاوم .. وإن أجزاء من البلد سوف تعترض .. ولكن لم يعترض أحد » .

* **ويقول د. نور الدين طراف :** « بطبيعة الحال أى شاب وطنى فى ذلك الوقت كان لا يرضى عما يحدث من تصرفات الملك .. وبعدين محاربة حزب الأغلبية ولو إنى لم أكون وفدياً .. ولكن منع الوفد من إنه يتولى وكل ما تشكل وزارة يختلق الأسباب لإقالتها .. كان فيه جو عدائى موجود ضد الملك فؤاد بصفة خاصة .. الجو ده يمكن تغير شوية .. لما فاروق تولى .. وجدنا فيه شاباً ووجدنا فيه أملاً إنه يمكن يغير هذه السياسة أو إنه يمكن ينضم إلى صفوف الشعب ويقف ضد الإنجليز .. ولكن بكل أسف اتضح فى النهاية إنه انساق أيضاً فى نفس التيار » .

* **وأسأل جلال علوية :** هل كان الملك بايع القضية زى ما الملكة ناريمان قالت لى ؟

* « أيوه .. زهق .. قال إيه خيلنى أتحمل هذه المسئولية .. ودى حاجة كانت ظاهرة فى كل تصرفاته .. زى ما تقول بئس من الدنيا .. وكان هو بيدبر إنه يتنازل عن العرش فى وقت ما » .

* **الملك فاروق الإنسان .. ماذا تقول عنه بعيداً عن كونه ملك مصر والسودان ؟**

* « رجل كان يحب الناس ومخلصاً لمن حوله .. وما كانش يحب أحداً يستغله .. كان بنى آدم يُحب من أول معاشرته » .

* **وهل كان يصلى ويصوم ولا يشرب الخمر كما قيل ؟**

- « لم يشرب الخمر في حياته وكان يعزم على بالخمر قلت له ليه مش بتشرب ؟ قال لى : أولاً حرام وثانياً لا أحبها !! »
- وكانت الفكرة التى سادت بين المحيطين بالملك أن التحركات فى الجيش ليست أكثر من « زوبعة فى فئجان » ..
- ويقول حسن المراعى : « أنا-دائماً لما كنت أفوت على حيدر باشا كنت بأخش فى مكتبه ألاقى مين .. ألاقى المشير اللى كان وقتها مقدم أو بكباشى .. وعلى صبرى أنا أعرفه من أيام المعادى لما كنا بنروح نادى المعادى .. هو وحسين ذو الفقار صبرى والعيلة كلها .. وكنا على صلة وبنلعب رياضة مع بعض .. وألاقى صلاح سالم » .
- ويقول حسين الأثرى : « ذهبت إلى حيدر باشا فى مقر القيادة وأخبرته بأسماء الضباط الأحرار .. فقال لى دى « زوبعة فى فئجان » .. وصلاح سالم أظن إنه كان مدير مكتبه .. وعبد الحكيم عامر كان قريبه .. وحيدر باشا قال لا أريد أن أعمل هزة فى الجيش » .
- وتقول الملكة السابقة ناريمان : « حيدر باشا كان بيقول دول شوية عيال وأنا أحطهم فى جيبى .. ما فيش حد كان بقول الصورة الحقيقية الصحيحة » .
- وكان على فاروق بعد أن بدد رصيده من حب الناس له أن يواجه التسعين ساعة العصبية بين تحرك الجيش ورحيله ..
- وأسأل الملكة ناريمان : هل بالتالى ظلمه رجال الحاشية ورجال الدولة فى ذلك الوقت .. لإتهم لم يقولوا له كل الحقيقة .. أو لم ينصحوه نصيحة مخلصه ؟
- « كان كويس قوى الدكتور يوسف رشاد .. وكان أصله ضابطاً واتعرف عليه من حادثة القصاصين .. قال له لا بد إنك تزور التكنات وتشوف مطالبهم وتلييها .. ومرة جانى الملك وقال لى سوف أحط إسماعيل شيرين زوج أختى الأميرة فوزية وزيراً للحربية » .
- ويقول محسن محمد : « إسماعيل شيرين للتاريخ .. كان الوحيد من أسرة الملك الذى كان ينتقده .. كل الناس أخذت الباشوية إلا هو » .
- وأسأل الملكة ناريمان : هل كان تعيين إسماعيل شيرين وزيراً للحربية مفاجأة ؟
- « لم يكن مفاجأة لى » .
- « ليه يافندم ؟
- « لإنه كان دائماً هو الوحيد اللى ينتقده وينصحه قدامى وكان ليقاً أولاً .. وأخته جنبى لمدّة شهر .. حتى مرة كان بيعارض التسبب مثلاً أنا كست بيت لاحظت كان التسبب كبير قوى فى الأكل .. فى الموظفين .. ومصروفات كثيرة ليس لها لزوم » .
- وأسأل حسين الأثرى : إيه ظروف تولى إسماعيل شيرين وزارة الحربية ؟

• « علاقته بالملك نشأت بعد زواج الأميرة فوزية بشاه إيران .. وعندما تم طلاقها رشحه الملك فيمن رشحه لها فاختارته هو .. مما أسعد الملك .. لاسيما إن علاقته به كانت قوية .. ويحبان الصيد معاً .. حتى وقع حريق ٢٦ يناير وتوالى ٦ وزارات .. وكانت آخر الوزارات وزارة الهلالى التى دخل فيها إسماعيل شيرين وزيراً للحربية ولكنها لم تدم إلا ١٨ ساعة » .

• هل تعتبر إسماعيل شيرين من حاشية الملك التى قيل عنها ما قيل ؟

• « كان رجلاً بعيداً عن الهلس وهو كان ملتزماً بزواجه .. ونصح الملك مراراً لدرجة إنه حدث فنور بينهما من كثرة النصائح ليعدل من سلوكياته » .

• وتؤكد هذا الكلام الملكة السابقة ناريمان فتقول : « هو فعلاً .. لما كنا فى قعدة خاصة مثلاً حفلة فى ركن حلوان .. فنصحه إسماعيل بيه شيرين .. زوج أخته الإمبراطورة فوزية ودى أقرب إخوانه إليه لأن بينه وبينها سنة .. كان يتكلم وأنا أشجعه .. ولكن كان يتردد .. لا يأخذ القرار بشكل حاسم ونهائى .. يتردد .. وكمان بعده عن الجيش أو عن بنض الشارع أو الجمهور .. قيل كده كان يأخذ إخوانه وينزلوا فى حلمية بالاس والأوبرج فى الحنت دى أنا سمعت كده يمكن جوازى أنقذه .. لكن كان بعيداً نسبياً عن الجمهور .. ولذلك الأسرة كلها نصحته وأنا نصحته وبطل نزول فى الحنت دى بعد الزواج » .

• هل صحته كانت تعبانة .. ما كانش فيه أسباب لأرقه المستمر ؟

• « لأ .. كان لما دكاترة بتيجى ما كنتش أحضر .. كان يفضل يبقى لوحده .. ولا يقول لحد .. لكن كان حساس جداً من المرض .. يعنى أنا لما كنت أعيا أو حد من بناته مثلاً الأميرة فريال يبقى مشغول ومتضايق » .

• ويقول عادل ثابت : « كان إسماعيل شيرين هو ابن شقيقة حيدر باشا .. قامت مافيا قصر فاروق .. التى عزلته بصورة فعالة عن البلاد .. تقوم بدور مؤذى .. وبقي حيدر عن طريق الضغط الذى كان يمارسه إسماعيل شيرين .. كان دور حيدر يحوطه الغموض إذ كان يقوم بدور مزدوج على الملك .. فمن ناحية كان يبدو مخلصاً لصاحب الجلالة .. فى حين إنه من الناحية الأخرى كان يشن حملة ضده .. والأسوأ من ذلك إن حيدر كان يعرف جيداً نوايا الضباط الأحرار .. ومع ذلك فقد كان يهدى شكوك الملك » .

• ويقول حسن المراعى : « كان مرتضى الله يرحمه عين وزيراً للدخالية لكن الوزارة كلها ما قعدتش ٢٤ ساعة الللى هى قامت فيها الثورة .. فى الفترة دى أنا ما كنتش موجود .. إنما لما جيت التقيت بمرتضى وروى لى الرواية الآتية : أولاً الللى ساعد جداً على قيام الثورة تعيين اسماعيل شيرين وزير الحربية صهر الملك الللى كان متجوز البرنسية فوزية .. ده الللى عجل بالموضوع » .

• وأسأل الملكة السابقة ناريمان : نكريات ملكة مصر السابقة عن آخر ليلة قبل الثورة ؟

• « أيوه .. كنت في الإسكندرية » .

• كان كل برنامجكم عادى .. وكل حاجة عادية ؟

• « لأ .. طبعاً مش عادى هو كان بيتعيب برضه .. برضه لا أعرف كان فيه يومين تغيب وسألته فين هو ؟ لأنى طبعاً كنت قلقانة وحاسة فيه حاجة غير طبيعية حتحصل .. وكانت فيه مناقشة .. وعشان أكلمه لازم أتعشى الساعة ٤ الصبح معاه .. كنت حاسة إن أحسن هو يبقى رمزا ويعطى السلطة كلها لرئيس الوزارة » .

• وقبل الملك استقالة الهلالي وكلف على ماهر بالوزارة الجديدة .. في تلك الأثناء كان الجيش بعد نجاح الحركة .. قد أحكم قبضته تماماً على القاهرة ..

• وحمل على ماهر طلبات الجيش للملك .. ومنها تعيين محمد نجيب قائداً عاماً وتخويله السلطة لإعادة عدد من كبار الضباط للاستيداع .. وحل الحرس الملكي .. وفصل عدد من رجال الحاشية منهم بوللى مدير شئونته الخاصة .. وإلياس أندراوس مستشاره الاقتصادى ..

• وكانت القضية التى أثارت جدلاً بين الثوار هي قضية مصير فاروق ..

• ويقول عبد اللطيف بغدادى : « أصل مش ممكن تقوم بثورة وتعارض نظام وتخلّى رأس النظام قائم .. ببيل حسين ذو الفقار صبرى كان أركان حرب لقواتنا في السودان .. فكلمنى هو من السودان يوم ٢٤ .. قال لى ده فيه اتفاقية خاصة بالسودان .. علشان كده استدعيناه وجبناه وبقي مساعد لصالح سالم .. وقال لى إنتم .. قطعوا ذيل الحية .. ورأس الحية موجودة .. قلت له اطمنن يا حسين حنتخلص من رأس الحية .. دى واقعة تدل على إنه كان في ذهننا من البداية إننا لازم نتخلص بس إحنا أخفينا هذا ليه .. خوفاً من تدخل الإنجليز .. بقى ده هدف مستتر » .

• بس كان الإنجليز والملك على غير وفاق ؟

• « بصرف النظر .. بس ده بيعهمم .. ده بتاعهم .. إحنا نظام جديد ما يعرفوش حيتعاملوا معاه إزاي .. ده على الأقل عارفين يتعاملوا معاه إزاي » .

• ويقول كمال الدين حسين : « فكرنا الملك سوف نعمل فيه إيه ؟ إحنا من الأول خالص .. اللى يقول إنتم مش عارفين حنعمل إيه في الملك مش عارفين نطرده ولا نقتله .. ده هو الحوار .. وبعدين استقر الرأى إنه لا يقتل لكن أن يتخلص منه وأمال كنا قائلين ليه ولا نعمل زى عرابى » .

• ويقول أحمد أبو الفتح : « أثناء اجتماعى باللواء محمد نجيب دخل البكباشى زكريا محبى الدين وقتل نجيب » إن بقاء فاروق على العرش سيظل خطراً على حركتنا ومن الواجب أن نعمل على تنازله عن العرش .. وقابلت عبد الناصر وتباحثت معه في الأمر ولكنه لم ينته إلى رأى في هذه المسألة .. وعندئذ اتصل به القائمقام رشاد مهنا تليفونيا من العريش وأعلن انضمام حامية

العريش للحركة .. وقال مهنا « إذا لم تطردوا الملك فإنى سأحضر بحامية العريش لأتولى هذا الأمر بنفسى » .

• ويقول إسماعيل فريد : « وقعدنا نطلب الخطوة الثانية .. اللى هى القرار اللى اتخذ بعد كده .. إننا نظرد الملك من مصر .. وسافرنا الإسكندرية » .

• فى هذا الوقت كلف الدكتور عبد الرازق السنهورى وسليمان حافظ مستشار الرأى بمجلس الوزراء بإعداد وثيقة التنازل عن العرش .. وكلف الأخير بالحصول على توقيع الملك على الوثيقة ..

• وكانت لحظة رهبة على الملك .. وهو يوقع الأمر الملكى رقم ٦٥ بالتنازل عن العرش ..

• ويقول المهندس سيد مرعى : « ورضخ فاروق وأمسك بالقلم ووقع لآخر مرة كملك .. ولم يكن توقيعيه منضبطاً فى أول مرة .. فوقعها مرة ثانية » .

• بينما يقول ماجد فرج : « الملوك فى العادة يوقعون أعلى الصفحة لا أسفلها .. وكانت هذه هى عادة الملك فاروق فقد وقع أمام اسمه أعلى الصفحة وفقاً للبروتوكول الملكى .. ولم يكن توقيعيه الثانى إلا بناء على طلب الحاضرين » .

• وأسأل الملكة ناريمان : ذكرتى منشوراً للضباط الأحرار كانوا يطلبون فيه ٢ مليون جنيه .. تفكرى إن هذا كان هو السبب فى إن بعد كده طلبوا من الملك التنازل عن العرش ؟

• « يعنى هو لو كان دفع كانت انتهت .. لكن ده واحد قدره كده » .

• إزاي طلبوا منه التنازل عن العرش ؟

• « أنا كنت بعيدة وسمحو بس للأميرة فوزية حرم وزير الدفاع أن تحضر .. وهى كانت حزينة جداً .. وأنا كنت قاعدة بعيداً عن الساحة دى » .

• وكان هذا اقتراح من الملك ولا كان طلب من رجال الثورة ؟

• « لا .. طلبه هو » .

• كتابة ولا شفوية ؟

• « أنا شفته مضى على التنازل » .

• ومين اللى كتب التنازل ؟

• « لا أعرف .. لازم رئيس الوزارة .. واختاروا الأمير محمد عبد المنعم وبركات ورشاد مهنا .. كان كريس .. الحقيقة على ما أذكر فتحت التليفون وجدت أن كل التليفونات انقطعت لكن الملك كان عنده جهاز لاسلكى .. كان دليل لومضة الذكاء الكبيرة بتاعته .. وكانت دى مفاجأة لى لأول

مرة أعرفها .. واتصل بكافرى سفير أمريكا .. هو كان يكره ستيفنسون .. وعلى العموم كلهم كانوا فى المصيف .. وطلب التنازل لابنه » .

• وانتقل الملك يوم ٢٥ يوليو من قصر المنتزة .. إلى قصر رأس التين ..

• وأسأل الملكة : لو حضرتك رجعتى بالذاكرة للوراء لآخر ساعة .. الملك كان بيعمل إيه و جلالة الملكة بتعمل إيه ؟

• « ده كان يوم حزين جداً .. طبعاً نجيب باشا الهلالى وعلى ماهر ناس نظاف جداً نصحوه إنه يطلع فوراً من المنتزة .. وكان هو فى أوضة وجنبه التليفونات شغالة .. كل لما أخش يقول اتفضلوا برة .. ويتكلم بعصبية .. وطلع وقال لسليمان عزت ولا بوللى على ما أظن يمكن ييجى فى الميناء .. كان فيه ميناء صغيرة فى المنتزة سوف أنتظره وعاكف مش موجود ده اللي بيثق فيه .. وقال بسرعة انزلى إنت وأحمد فؤاد وإخوته .. وركبت جنبه .. وإحنا طالعين بسرعة فى اتجاه رأس التين .. دخلت الدبابات المنتزة » .

• وحاصرت قوات حركة الضباط القصر ...

• وتذكر الملكة ناريمان : « فوجئت الساعة ٥ الصبح وأنا طالعة فى البلكونة اللى بتطل على الميناء افكرونى يمكن أحداً ضربوا الرصاص .. ولم ننام .. كنت حاملة ابنى وكنا لابسين علشان تسليم الرجال اللى هم دائماً مكروهين سواء كان الحاشية اللى من أصل إيطالى أو المكروه من زمان .. وكان مصمماً يأخذ أنطوان بوللى معاه ليه مش عارفة » .

• مين اللى ضرب الرصاص .. الجنود ولا الحرس الملكى اللى هو فى القصر ؟

• « الحرس الملكى لم يضرب .. رجال الثورة » .

• وإيه رد فعل الملك ساعتها .. هل فكر يرد عليهم بالسلاح ؟

• « أنا لما طلعت البلكونة وجدت الرصاص رحت منبطحة .. بصراحة لم أعرف إيه اللى حصل .. هل كان فيه خيانة من الداخل أو من الخارج .. عموماً دى قسمة ونصيب وده قدر » .

• وأسأل الفريق أول عبد المحسن كامل مرتجى : حضرتك كنت فى الحرس الملكى ؟

• « كنت فى الحرس الملكى من سنة ٤٦ لغاية ما قامت الثورة » .

• وحضرت الثورة ؟

• « حضرت الثورة وضربت على الثورة كمان .. كنت أنا ضابطاً عظيماً وضربت على الكتيبة بتاعة عبد المنعم عبد الرؤوف لإيهام داخله من ناحية رأس التين وكلهم خرجوا ولولا إن الملك كان جباناً .. يعنى هو لو كان استمر كان احتمال يحصل حاجة فى ذلك الوقت .. لإن ما كانش الجيش كله مع الثورة .. البحرية كانت مع الملك .. الطيران كان نص ونص يعنى .. إنما هو ساب الأمور .. وبعث لنا مع النجومى باشا قال لنا : « مولانا بيأمر بإيقاف ضرب النار » ..

فأوقفنا ضرب النار .. راحوا واخذنى أنا ومحمد أحمد صادق .. أخذونا على مصطفى باشا لغاية ما خرج الملك .. رجعونا تانى » .

* **ويقول عادل ثابت :** « إسماعيل شيرين قال لى لقد أراد الملك تجنب سفك الدماء وأن يقاتل المصريون المصريين .. وكان مصمماً على إحباط أى حرب أهلية دموية محتملة » .

* **ويقول حسين الأثرى :** « ورفض الملك أن يقوم الحرس فى رأس التين بالقضاء على الثوار .. تجنباً لإراقة الدماء وقال مش ممكن مصرى يقتل مصرياً مثله .. وكان قد كلف الملك إسماعيل شيرين ولكن الأمر كان قد قضى » .

• **وفى الخامسة والنصف غادرت الملكة ناريمان والأميرات وولى العهد القصر ..**

* **وأسأل الملكة ناريمان :** حضرتك قبل التسجيل قلتي لى عن حديث دار بين الملك فاروق وبين السفير الأمريكى .. قبل مغادرته على طول لمصر .. قال له (إيه) ؟

* « تكلم بالاسلكى واستدعاه وقال الملك للسفير إذا يمكن تحضر You are my best friend (أنت من أعز أصدقائى) وتعالى عاوز أشوفك لأن حصل كذا وكذا .. وكان يتكلم باللغة الإنجليزية .. وأنا بأتكلم بالفرنساوى » .

* **طيب ماذا قال له ؟ .. هناك جملة أنا مستعد أقولها بس بما إن حضرتك اللي قايلة لى عليها .. أرجوكم تقوليها لنا ؟**

* « قال .. أنا فاكدة بالتأكيد .. Now, if I shall die, come my best friend, I want to go .. وبمجرد ما وصل السفير الأمريكى لاحظنا إن in Peace .. يعنى أنتنازل وأرحل بسلام .. وبمجرد ما وصل السفير الأمريكى لاحظنا إن الرصاص وقف » .

* **وتضيف ناريمان :** « هو أصله كان يحب النكتة وابن نكتة .. قال له « الآن ويعد ما عملتها .. تعالى بقى معايا .. لأنى لو حأموت تموت معايا » .

* **وهل يعنى هذا إن الأمريكان كانوا على علم مسبق ؟**

* « لأ .. الأمريكان .. لا أفكر هو السفير كان دائماً يتغدى معه ويتعشى معه .. وأنا حتى كان يقول لى ده واحد من العائلة ده واحد من أعز أصدقائى » .

* **ويقول حسين الشافعى :** « كان عمال يقول بقلاطة بالإنجليزى بقى « حكومة جلالة الملكة تريد أن تؤكد ما أعرفش إيه » وطبعاً حيحصل مظاهرات وحرصنا على الأقليات .. أقليات .. ده عالم الحمد لله لما بيكون فيه حد زى جمال سالم يسد فى المواقف اللي زى دى .. فقام له .. كان معاه خرزانة كده ومحمد نجيب قاعد على المكتب وراح ضارب فى المكتب بالعصايا .. وقال له إنت جاي بتعليمات من حكومتك ولا دى مبادرة منك .. الرجل اتلخبط وقال له لأ دى مبادرة منى .. قال طيب بس .. وبعدين راح الإنذار للملك على أساس إنه يتنازل وقبل الساعة ٦ لازم يكون مغادر البلاد .. فالجزء الأول ده ما كنتش موجود فيه » .

• وانتقل الثوار إلى الإسكندرية .. وكان هناك كل من محمد نجيب وجمال سالم وحسين الشافعى وأنور السادات ومجموعة أخرى من الضباط ...

• ويقول عباس رضوان : « راحت القوة بالطريق البرى على أساس إنها تقوم بما كلفت به يوم ٢٦ من ناحية تتنازل الملك فاروق عن العرش وحروجه من مصر .. وتمت بسلام .. كنت عاوز رجع الوحدة .. وبعدين يوم ٢٤ كلفنى جمال عبد الناصر بالليل على إن يوم ٢٥ أرحل قوة من المدرعات والمدفعية إلى الإسكندرية .. وقد كان ورحلتها من محطة العباسية .. يمكن فيه ناس كثير ما تعرفش إن فيه محطة سكة حديد فى العباسية .. اللي هى كان عاملينها الإنجليز عشان يوصلوا المعادى والحتت دى » .

• وتقول الملكة ناريمان : « الجزء الثانى اللي هو بتاع المغادرة ده إحنا رحنا لتوديعه فالتناس كتيرة فى منطقة السلسلة والأنفوشى مظاهرات .. فعطلونا وتأخرنا ٥ دقائق » .

• ويقول جلال علوية : « هو ودع إخواته والناس اللي كانوا يستقبلوه كلهم .. وكان ده فى السراى .. وبعدين جاء كافرئى السفير الأمريكى حوالى السادسة إلا ربع وقال « يلا بنا نزوح » .. كان مفروضاً نستنى محمد نجيب .. تأخر شوية الساعة السادسة إلا عشرة قال لازم نزوح المعاد جاء خلاص .. ركبنا للنش ورحنا للمركب هو والملكة والأمراء الصغيرين واستيننا هناك .. أتأبى محمد نجيب كان تاه مش عارف يبجى على الرصيف .. وكان اليخت على السمعتورة فى وسط البحر فى وسط الميناء .. بعد شوية بصيت لاقيت محمد نجيب جاي ومعه جمال سالم وأحمد شوقى وسكرتيره إسماعيل فريد وجمال حماد وحسين الشافعى .. وقلت نحسب الشافعى وحماد بس كفاية عليكم كده .. محمد نجيب وسالم وأحمد شوقى يودعوا الملك .. راح محمد نجيب جرى أمامهم شوية وراح سلم على الملك بالتحية العسكرية وقال أنا أسف نصلى الملك باستعجاب .. التانيين كانوا جم معاه .. فجمال سالم كان ماسك عصايا وكان بيخبط على رحله كده قام قال له شيل العصايا دى من إيدك .. برضه فضل يخبط .. شخطت أنا فى جمال قلت له شيل العصايا دى .. محمد نجيب أخذنى على جنب .. قلت له الباشمهندس جاء لى ثلوث بيقول لى إن فيه عطل فى الماكينات ومش حنقدر نقوم الساعة ٦ بالضبط يمكن ٦,١٥ أو ٦,٣٠ .. قال بس أرجوك ما تتأخرش إعمل كل اللي تقدر عليه علشان تمشى فى معيادك مصبوط » .

• ويقول الشافعى : « فعلى ما وصلنا على الرصيف لاقينا على ماهر والوزراء والناس اللي هم بيودعوه راجعين من عند الرصيف .. فعلى ماهر قال إنتم أتأخرتم وده كان يود أن يراكم .. قلنا إحنا كمان كنا نحب نشوفه .. قال طيب ما تجهزوا لنش وتروحوا .. قلنا نزوح .. جابوا لنش ونزنا وركبنا .. وطلعنا على المركب فلفينا لفة حولها كده وأدينا التحية ما ردش علينا .. فعليا نلثمه الثانية رد علينا .. فطلعنا فرحنا سلمنا عليه كان وراءه مراته وبناته وطبعاً بيباشر نغلاصة .. الملكية لآخر ثانية » .

• هل نزلت دموع من إحدى الأميرات .. أو من الملكة السابقة ؟

* « لأ .. ما شفتاش .. كانوا على مسافة بعيدة وأنا بالذات كان قدامى جمال سالم .. سلم عليه وكان معاه عصايا حاطتها تحت باطه وأدى التحية فقال له نزل العصا دى .. طبعاً جمال سالم تأفف وأبدى الامتعاض .. وبذل ما كان واقف انتباه وقف كده ونفخ نفخة كده زى « الله يطولك يا روح » .. وبعدين أنا دخلت .. سلم على قال لى اسمك إيه ؟ قلت له حسين الشافعى .. راجع فى بالله الاسم وما ردش على .. وقال إن شاء الله تخلوا بالك من الجيش .. لإن ده الجيش الللى بناه أجدادنا .. وشوية هلفطة كده .. وأخذنا بعضنا ونزلنا .

● وفى السادسة (لا عشر دقائق أنزل العلم الملكى من فوق قصر رأس التين .. وعزف لآخر مرة السلام الملكى للملك فاروق بينما كانت المدافع تطلق ٢١ طلقة ..

* وأسأل تاريخان : هل كان مع الملك طبنجة عند مقابلته لرجال الثورة .. ولا كان أبعدوا السلاح عنه ؟

* « مش متذكرك .. المهم أنا طلعت الأول وصلت المحروسة الحمد لله بأمان .. وهو نزل الراية .. أنا فاكدة كويس قوى .. ورفع راية ابنه .. كل واحد له راية ويروتوكول وطبعاً معاه على الرصيف من بعيد مستر كافرى السفير مع وزير الدفاع إسماعيل شيرين وطبعاً الوزراء .. اصطفوا كلهم ومحمد نجيب .. وقال كلمة حلوة تمنى لكم النجاح والتوفيق .. ده الللى الملك قاله » .

* هل كان مثلاً متأثراً .. عواطفه خائنه والدموع كانت فى عينيه ؟

* « لأ .. بالعكس كان ماسك نفسه » .

* وأسأل تاريخان : مين كان ألطف رجال الثورة الللى راحوا يودعوكم فى نظر حضرتك ؟

* « على باشا ماهر .. وكان فيه واحد تانى لطيف من الثورة مش فاكدة لكن ألفهم كان على باشا ماهر الللى الملك فاروق جابه .. لو كان كمل ؟؟ لكنه تنازل وطلع رسمى » .

* وأسأل جلال علوية : هل قبّل الملك فاروق أرض مصر قبل مغادرته ؟

* « أيوه » .

* وهل تأثر أحد من رجال الثورة ؟

* « كل الموجودين حتى رجال الثورة .. محمد نجيب نفسه كان متأثراً » .

* ويقول عادل ثابت : « سأل السفير الأمريكى كافرى .. أنور السادات عند رحيل فاروق : حسناً باقائهم هل ستبرمون صلحاً مع إسرائيل الآن ؟ .. فأجاب أنور السادات سوف نفعل ذلك بمجرد تطهير الفساد .. وقد فعل ذلك فعلاً بعد ٣٠ عاماً » .

● ومع غروب الشمس تحرك اليخت .. وعلى متنه الملك المخلوع .. ولم يكن قد جاوز الاثنين والثلاثين عاماً (لا بشهور قليلة ..

• **وتقول الملكة ناريمان :** « بعد ما رحلت المركب وبعد ما طلعنا من المياه الإقليمية .. دخلت عليه .. كان حزينا جداً .. هو لا يحب بوري الحزن .. وأنا كنت أتمنى نتوجه إلى دولة عربية للجوء السياسي » .

• **ويقول جلال علوية :** « وبعدن كنا في البحر أول يوم طبعاً الكل حزاني وكانت ليلة عvisية جداً .. ثاني يوم ابتدا يطلع على « الكوردة » ويكلما أنا والضباط .. ثالث يوم ابتدا يهز زى ما يكون حاجة انشالت من على صدره وقال لى أنا مش زعلان جداً إلا إن بوللى مش معايا .. بوللى ده ماسك لى كل حاجة .. أنا مش عارف حاجة أبداً .. نهايته .. وصلنا نابولى وافكرت .. أنا كنت رافع علم الملك .. الملك الصغير .. الملك فاروق كان منتظراً إن يقابلونا بالحفاوة اللى إحنا قابلنا بها « إيمانويل » ملك إيطاليا .. لما جاء .. ضربت المدافع تحية .. ما ردوش علئى .. دخلت الميناء لاقيت عسكرى بوليس واقف على الرصيف ومنسوب وزارة الخارجية والسفير بتاعنا بدر والقنصل .. دخلت وربط .. بصيت لاقيت إشارات من مصر .. أنا عاوز أعمل ترتيب أنزله إزاي ؟ وكل ثانية تيجى إشارة باللاسلكى .. عود حالاً ورجع معاك كل الطقم والطلانية .. كان فيه مجموعة طلانية .. الحلاق .. مدرب الكلاب .. اثنين الحرس الخاص .. ٦ ضباط بوليس بتوعنا سمعوا إنهم بيجوا معانا وحتى قالوا إحنا حنزل مع الملك مش حنرجع .. قلت لهم أحكام السجن ترجعوا معايا يعنى ترجعوا معايا .. كلنا كنا متأثرين لكن أنا أرجعكم بالقوة والحمد لله رجعتهم معايا .. لما جاءت الإشارات دى واحدة وراء الثانية وراء الثالثة قلت لضابط اللاسلكى رد عليهم قول ما عنديش وقود ولا أكل .. قالوا عاوزين أنزل الملك وأرجع على طول .. قلت لهم لأ مش حارجع إلا بكرة .. قالوا لى أقبض على صيغة الملكة (المجوهرات) وهات الناس اللى معاك دول عاوزينهم يحاكموهم .. بصيت لاقيت واحد منهم راح ناطت فى البحر اللى هو بناع الكلاب .. نط فى البحر وهرب .. الباقى قلت لهم انتم حرين إحنا فى بلد الطلانية ودى بلدكم انزلوا .. نزلتهم وفضلت الإشارات تيجى وأنا ملخوم عاوز أعمل ترتيبى للعودة » .

• **هل كان الملك معه أوراقاً رسمية « باسبور » مثلاً ؟**

• « أبداً .. وجاء السفير بتاعنا لا أتذكر اسمه .. قال لى جلالة الملك بيقول ممكن توصله لجنوة بدل نابولى .. قلت دى الأوامر بتاعنى أنزله أول ميناء .. ما أقدرش إلا لما آخذ أوامر .. فى الوقت ده برضه ابنتت الإشارات تيجى .. « هات الذهب » .. قلت لبناع اللاسلكى أقلل المحطة وما تردش على حد .. ونزلت قلت للطلانية بأجروا لنا عبارة علشان الملك يروح فيها كابرى من نابولى .. جاءت العبارة ونزل الملك .. كان متأثراً جداً وأخذنى بالحضن وقال : يا جلال أنا متأسف ما أنيتلكش رتبة الباشوية إنت أول واحد كنت تستحقها .. قلت : ده مش وقته حتى لو إديتها لى تبقى انتلفت .. حضنا بعض وأخذ بعضه ونزل راح على كابرى ومعه الحاشية الصغيرة .. فى الوقت نفسه كان عندنا يخت هناك كان يدخل سباق اليخوت اسمه « صيد البحار » .. ده خاص بالملك بتاعه الشخصى .. فكان يروح يجيب كل ما يتعلق بالطقم اللى عليه

فهؤلاء جم مع المركب .. وقعدت ليلتها أخذت الوقود بتاعى وجبت الأكل وثانى يوم قمنا بعد الظهر » .

* وأسأل الملكة ناريمان : هل جاء عرض من دولة أجنبية لكم ؟

* « أيوه .. أفنكر من الملك عبد العزيز .. وكان يعزّه جداً » .

* عرض الملك عبد العزيز إنكم تروحوا السعودية .. طيب الملك اعتنر ولا إيه ؟

* « كان علوبة يجيب الإشارة (التلغراف) ويعرضها عليه .. أنا كان من رأى الخاص .. علشان تربية الأطفال تكون إسلامية .. نروح .. لكن هو توجه إلى إيطاليا » .

* وأسأل جلال علوبة : كان يحرص على وجود ولى العهد فى جواره فى أثناء الرحلة الأخيرة (رحلة المنفى) ؟

* « أيوه كان كل الأميرات والملك الصغير معه .. كانت عائلة مترابطة قوى مع بعض » .

* وهكذا انتهت قصة الملك فاروق مع عرش مصر .. وعاش الملك بقية عمره فى إيطاليا .. مع بناته اللاتى فى بداية الأمر رفضن الإقامة مع أمهن فى سويسرا ..

* وأسأل جلال علوبة : فى لحظات وصول الملك فاروق إلى أرض إيطاليا قال حاجة عمل حاجة تذكرها ؟

* « قال لى خليك معايا لأن ما عنديش حد يأخذ باله منى وأدى لك مليون جنيه .. قلت له يا مولائى .. أهلى وأولادى وبلدى فى مصر ما أقدرش أسببها وآجى أقعد بعيد عن بلدى ووطنى .. وأنا لى مأمورية أقوم بها .. وطبعاً أول ما رجعت .. طردونى .. فى الرحلة قلت له إنت حتعيش إزاي عندك قد إيه ؟ .. قال لى ما عنديش غير ٥ مليون فى الخارج أعيش بهم .. و٥ مليون وقتها زى عيود مثلاً مش حاجة كبيرة .. وفى أثناء الرحلة كان بيكلمنى وبيوصينى .. بيقول لى عارف إيه ده محمد نجيب عامل زى النمر اللى ماسك ذيله .. حييجى يعضه فى يوم من الأيام .. وبكرة شوف كلامى .. وقعدنا نتكلم كثيراً .. وكان متأثراً أول يوم .. ودخل نام بدرى » .

* وأسأل الملكة ناريمان : هل كان الملك موسوساً ؟

* « فى المنفى أيوه .. فى الآخر .. كان يحب اللبن وعصير الموز .. يدق » بترو « كل حاجة قيل ما هو يدوقها .. لو حد قال له أى حاجة لو سمع بصديقها .. ما أعرفش .. هو شكاك .. لكن لا أفنكر إن حد سوف يسمه » .

* علمتم إيه فى المركب ؟

* « أنا بالليل دخلت عليه .. لاقيته كان حزينا جداً .. ولاقيت عينيه فيها بعض قطرات من الدموع » .

- كان قال لحضرتك لازم تسافرى معايا ؟
- « سأل كل بناته تحبوا تقعدوا مع فريدة أمكم ؟ وقال أنا حآخذ الولد .. على ماهر بيقول خلى الولد ويبقى هنا تحت الوصاية .. وأنا نقيت محمد عبد المنعم .. لكن هو كان خائفاً على الولد وقال سوف أخذه .. وتلقائياً كلنا قلنا موافقين .. حنروح معاك .. ونسافر ونعيش حياة مستقرة كزوج وزوجة . »
- ودى كانت آخر مرة أهد يقول له رسمياً الملك فاروق ملك مصر والسودان .. مش كده ؟
- « لأ .. كانت تقال له بعد كده فى المنفى . »
- وكان طبعاً يعامل كملك ؟
- « عاش برضه بحاشية كاملة وألبانيين .. كانوا ٤ وكان عنده حراس طبعاً كمان . »
- مين كان معاه من رجال الحاشية .. بوللى ؟
- « لأ .. بوللى سلم نفسه . »
- إلياس أندرأوس ؟
- « كان معاه « بترو » .. والتعليمات إن ما يكونش فيه أى مصرى . »
- تفكرى كان نادماً ؟
- « طبعاً .. وكان بيسترجع ساعة ما دخلت عنده فى الأوضة فى المحروسة .. لإنى أول مرة شفته كان منطوياً ومتضايقاً . »
- ويقول جلال علوية : « انحطيت من يومها فى الـ Black List .. ومُنعت من السفر .. ولكن الحمد لله لما رجعت .. ماقيش حد قال لى ثلث الثلاثة كام .. لما جيت لاقيت إشارة مستثنائية تقول لى إن محمد نجيب طالبينى فى مصر فسافرت مصر ورحت لمحمد نجيب .. قال لى إن شاء الله تكون الرحلة كويسة .. قلت كويسة أى أوامر أنا ضابط وأخذ أوامر ماليش دعوة .. قلت له طيب دلوقتى عاوز منى إيه .. قال تشرب قهوة .. قلت أشرب قهوة .. بعد شوية تشرب ليمون .. وقتها عرفت إنه ليس له أية كلمة مالهوش أية حاجة .. قلت له عاوز منى إيه .. فى الآخر خالص دخل وطلع قال طيب يا جلال .. أنا كنت أعرفه قبل الثورة .. روح لليخت وحتيجى لك الأوامر .. بعد يوم لاقيت « أطلع أجازة مفتوحة » .. طبعاً أنا كنت عارف إن الحاجات دى كلها محتصل .. رحى بيتى فعدت .. بعد ثلاث شهور طلعتونى على المعاش .. بس ما كانش لى أى اتصال بالملك بعد كده لإنى كنت ممنوعاً من السفر لغاية بعدها بكام سنة لما صرحوا لى بالسفر !! »
- وأسأل الملكة : دخلتم إيطاليا بجوازات سفر مصرية .. ولا بدون جوازات خالص ؟

- * « بدون جوازات » .
- * « رحتم على قصر معين فى إيطاليا .. ولا اخترتم على مهل القصر اللى حتعيشوا فيه ؟ »
- * « طبعاً وصلنا إلى كابرى .. كان لازم يكون فيه عبارة .. أخذنا العبارة ورحنا إلى جزيرة كابرى لإنهم ما حبوش نقعد فى روما نفسها .. الحكومة الإيطالية .. أفكر إن كان فيه بعض رجال السفارة المصرية فى استقباله علشان كان ابنه ملك ولسه ملكية » .
- * « هل كان يتابع أخبار مصر وإنتم فى إيطاليا ؟ »
- * « أول ما وصلنا طبعاً .. سمع من الراديو عن بعض الشخصيات البارزة . كان لسه النحاس ياشا فى المصيف .. وإنهم قبضوا على بعض الشخصيات .. وكان منظوياً على نفسه فى الفندق فى كابرى .. وبعدين كان فيه « دافليو » محامى ملك إيطاليا السابق .. عمل ترتيبات بجوازات سفر دبلوماسية إيطالية .. واخترت أنا وهو فيلا من ٣ طوابق وجنية كبيرة تعيش فيها » .
- * « لم تدفعوا ثمنها يافندم ؟ »
- * « لأ .. طبعاً دفعنا » .
- * « أيامه فى إيطاليا كانت بتمر إزاي .. هل تغير نظام حياته تماماً .. ولا بالعكس كان ما يفعله فى مصر يفعله فى إيطاليا ؟ »
- * « فضلنا شهرين ثلاثة .. أسعد زوجين .. ونخرج ونقعد مع الأولاد .. ورجع ما أعرفش أثر وعكة قال لى ساعات يتعم ويقول لى سوف تكونى أصغر أرملة فى العالم .. لكن رجع تانى اتغير .. يزور النوادى مرة أخرى .. وسهرات لوحده .. وأنا لوحدى .. سببت لى الغربة عن وطنى فى نفسى آثاراً سلبية .. وكمان أذكر عيد ميلاد الملك أحمد فؤاد الثانى .. كان فيه حفلة رسمية .. أمر إن ابنى لا أقعد معاه أكثر من ساعة يومياً » .
- * « كنظام ملكى يافندم ؟ »
- * « لأ .. ولا نظام ملكى ولا حاجة .. تعليمات .. وكانت تعليماته دى من الأسباب اللى أبعدتنى .. وافترقنا .. القدر .. ممكن أقول لإن الحكاية دى معروفة ولإن الغلطة إن هو سحب منى الجواز الإيطالى .. وكان عنده واحد تانى من « موناكو » صديقه « رينيه موناكو » (أمير موناكو) .. وأخذت « ليسيه باسيه » (Laissez Passer) وقررت العودة لإن والدتى كانت مريضة جداً اتصلت بها لكن كان عندى أمل آخذ الولد والبنت .. ونروح نعيش فى سويسرا » .
- * « أكثر حاجة كان ببحرص عليها فى الغربة إيه ؟ »
- * « السبعة وشنطة فيها كل العملات » .
- * « كنوع من أنواع جمع العملات .. ولا كثرة ؟ »

* « لأ .. مش فلوس كتير .. يعنى أنا لم أعدها .. وسبق أن قلت إنه لم يطلع بكثير .. على ما أظن مش أكثر من ٢ مليون جنيه مصرى !! » .

* هل ظلمت على اتصال بالملك فى المعنى ؟

* « فى أوائل الأيام لإنى كنت قاعدة معاه وأتصل به دائماً .. ما كانش يحب أبداً يورى شعور، تحت ستار ضحكة معينة عنده كده .. وكان بيشتاق للضحكة .. يعنى لا يصرح .. وتحس دوى بقت وراثية عند ابنى وإخوانه .. اتصالى بأخوانه الأميرة فوزية وفايزة وفايقة عند وفاته .. ولما تركته طبعاً نزلت « بالليسيه باسيه » فوجدت ٣٠٠ صحفى فى المطار وتمالكت .. وكنت منتظرة نرجع تانى لبعض .. أو نتريث .. اتصلت بالسفير المصرى .. وانتظرت علشان خاطر الولد أن يتصل بالهاتف أو يرسل لى سكرتيره كراتى .. اللي بأحبه .. كان لطيفاً ومن أصل سويسرى .. لكن هى أكبر غلطة إنهم أخذوا الجواز وسحبوه منه .. وتكلم فى الصحف العالمية وقال « أرجعى لابنك » لكن طبعاً شفوياً .. أو فى الصحافة .. طبعاً كنت أتمنى إن يحصل .. الانتظار كان صعباً جداً وكان لازم أرجع بأية طريقة .. فكرت ساعتها وكنت تعبانة جداً .. فى الوسيلة .. كانت لسه ملكية والسفير المصرى قال ما أقدرش .. ما عنديش تعليمات أخرى .. اتصلنا بمصر بمكتب الرئيس محمد نجيب .. رد .. فوجئت بصوت معبر جداً .. أتذكر قال تأخذى الوثيقة بشروط وهى عدم المطالبة بحقوقى السياسية والمالية .. والثيقة جابه السفير فى الصالون عندى .. ومضيت » .

* وتنازلت ملكة مصر والسودان عن كل حقوقها وأخذت الجواز المصرى أيامها ؟

* « أيوه .. ورجعت إلى الوطن » .

* هل كان له علاقة بمجلس الوصاية على العرش ولا ما كنش أحد منهم بيتصل به .. رغم إن واحد منهم كان قريب الملك ؟

* « آه الأمير عبد المنعم .. ابن عباس حلمى » .

* ومجلس الوصاية ما كانش على اتصال خالص بالملك ؟

* « لأ طبعاً » .

* معلومات حضرتك إيه عن آخر أيام الملك فاروق رغم إنك كنت بعيدة عنه ؟

* « كان برضه بيتكلم فى التلفزيون .. لما أروح أشوف أحمد فؤاد فى سويسرا .. اللي هو الحل اللي كنا قلناه وهو رفضه فى البداية .. وبعدين قعد فى روما لوحده .. وترك ابنى فى يدى المدرسة « تابوريه » الفرنسية و « إنشر سايد » الإنجليزية وأعطى كل المسئولية لهم .. وأنا كنت طبعاً معترضة على المربيّات .. وأنا فى اعتقادى إن المربيّات والمدربات لهن تأثير مباشر .. وكنت رافضة هذا » .

- * حصل إليه فى الآخر .. يعنى هل كان ابتداءً يهمل فى صحته .. ويكثر من سهراته أو يعيش بالطول وبالعرض ؟
- * « أيوه .. أيوه » .
- * ولا بالعكس كان ابتداءً ينطوى على نفسه .. يعنى كيف كانت آخر أيامه .. رغم إن حضرتك بعيدة عنه ؟
- * « أيوه فعلاً زى ما حضرتك بتقول .. ودخل مصحة كمان » .
- * يعنى كان منطقياً على نفسه ولا بالعكس ؟
- * « أيوه .. لعدة أسباب منها محاولة للتخسيس .. ثم حزنه على زواج ابنته الأميرة فادية فى لندن .. وطبعاً أنا كنت فى مصر » .
- * هل الملك كان على اتصال بأى واحد من رجال الثورة ؟
- * « مواعيده ما كنتش أعرف عنها حاجة .. والله أنا مریت بظروف وحشة قوى بعد إلغاء الملكية .. يعنى أفكر الضباط اللي هم صغيرين لكن الكبار كانوا يتمنوا يعملوا حاجة كويسة .
- * وأسأل الوصى على العرش القائمقام رشاد مهنا .. هل كان لك صلة أو اتصال بالملك فاروق فى فترة الوصاية على العرش ؟
- * « لا .. أنا جاني مرة رسالة فقط عن طريق محمد عبد المنعم قال إن الملك بيوصيك بابنه إنما مافيش اتصال ولا بعد ذلك ولا قبل ذلك » .
- * وأسأل الملكة ناريمان : هل كانت الدولة بترسل لحضرتك معاشاً ؟
- * « لأ » .
- * هل كان فيه من يساعد من الملوك العرب الملك فاروق ؟
- * « أنا لما كنت مع الملك الله يرحمه .. كان دايماً على اتصال بالملك عبد العزيز » .
- * هل الأسر الملكية الأخرى فى العالم العربى غير الملك عبد العزيز كانت بتتعامل معاكم وتتصل بكم وتعرض عليكم خدماتها ؟
- * « لأ » .
- * فى الأوائل يافندم ولا فى أواخر أيامك مع الملك فاروق ؟
- * « أنا أذكر مرة واحدة قابل سفير السعودية لكن لم يذكر لى المقابلة » .
- * وكيف كانت علاقة ملكة مصر بالعائلات الملكية فى الدول العربية ؟

• « ملك المغرب والملكة لطيفة طبعاً .. عرفتكما بابنى أحمد فؤاد .. والملك والملكة وبيعاملوه كأخ وتولد حفيدى فخر الدين هناك وأفنكر إنه كان يبشجعه على الإقامة هناك .. وقال لى اطمننى عليه حقيقى زى أخويا .. وشفت هناك طبعاً فرح ديبا الإمبراطورة السابقة .. لهم قصر كبير هناك ووالدتها فى فرنسا .. ودلوقتى راحت لأمريكا .. بقى لى سنتين ما شفتهاش لطيفة جداً شخصية فرح » .

• وأسأل حسين الأترى : هل التقيت بالملك وهو فى المنفى ؟

• « لأ .. يعنى نادرأ .. وكان فى أول قعدة لى معاه كانت فى باريس وهى عبارة عن خمسة دقائق .. أنا داخل لافيتيه قاعد فرحت له .. وعمرى ما عملتها وبُست إيد حد لكن لأنه كان عزيز قوم ذل عملتها .. قال لى إنت مش خايف .. قلت له أخاف من إيه ما هى خربت خربت فضّل واقف علشان أمشى .. وقال لى علشان ما يؤذوكش .. فقلت له هل تؤذى أن أقعد .. وأنا كنت شايف الحرس الموجودين حوله فى كل مكان لكن فعدت معاه حوالى خمسة ستة دقائق .. سألنى عن أحوال مصر وأحوال العائلة .. وقال لى كفاية كده وقوم بأه » .

• ومات الملك فى روما يوم ١٧ مارس سنة ١٩٦٥ ...

• وأسأل عادل ثابت : هل قتلوا الملك فاروق ؟

• « دى حاجة لا أعرفها .. يقولوا كده .. الأخ صلاح نصر الظاهر بيقول آه .. أنا قرأت كلاماً عن محاكمة صلاح نصر لما سألوه عملت إيه ؟ وإن كان فيه حبوب سامة مخصوصة لدى المخابرات .. استعملتها مع عدة شخصيات .. والظاهر إنه اعترف إنه قتل فاروق .. هل صحيح ولا لا الله أعلم » .

• وأسأل إبراهيم بغدادى : بصراحة شديدة جداً .. هل قتل الملك فاروق ؟

• « بالقطع لأ .. لم يحدث » .

• فيه كتاب صدر بيقول عنوانه « كيف قتل الملك فاروق ؟ » وفيه عدة مقالات عنك صدرت بتقول « أنا برىء من دم الملك فاروق » .. ونحن لا نبحث عن إفشاء سر من أسرار المخابرات العسكرية .. أو نبحث عن خبر مثير تذكره الآن .. ولكن إحنا هدفنا البحث عن الحقيقة من أجل مصر وتاريخ مصر .. فماذا نقول ؟

• « حاقول إن الملك فاروق مات موة ربنا .. بالسكنة القلبية على وجه التحديد .. نتيجة التهمة .. وهو كان بيعانى من مرض القلب .. وليس صحيح إنه قتل » .

• قيل يافندم المخابرات وحضرتك كنت بتعمل معها أو بتعمل لها .. أنك سافرت إلى روما فى هذا التوقيت وعملت جرسوناً فى أحد المطاعم .. والملك لما مات .. مات مسموماً بالمكرونة .. لم يظهر أثر سمها لأنه كان من النوع اللى ما بيبانش فى جسم الإنسان عند تشريح الجثة أو عند التحليل ؟

• « فى الواقع إنه أحسن ما فى هذه الجملة كلمة « قتل » .. لإن كل هذا قيل .. ولكن ليس من المعقول أولاً أن يكون فيه جهاز مخبرات فى العالم حتى ولو تولى القتل .. يعترف .. سواء عن طريق أحد أفراده .. إنه قتل .. ده شيء مفروغ منه .. الحاجة الثانية .. إن الملك فاروق من الثابت إنه مات موتة ربنا .. وحتى إذا كان لم يتم التشريح كانت واضحة للتحقيقات الإيطالية .. وبعدين ما المبرر بعد هذا كله للتخلص من الملك فاروق سواء كان بالموت أو بالقتل .. لإن الملك فاروق لم يكن يشكل أى خطر على النظام فى مصر عام ٦٥ بعد حوالى ١٢ أو ١٣ سنة من إعلان النظام الجمهورى ولم يكن عنده طموحات بأنه يعود للملك مرة أخرى » .

• هل التفت بالملك فاروق فى هذه الأيام ؟

• « كلمة التفت هذه .. هى بالتحديد كلام عائم .. كلام عائم أنا التفت مع طارق حبيب وهو ماشى فى الشارع إنما التفت وقعدت مع طارق حبيب يبقى ده موضوع ثانى .. الملك فاروق كان بيمشى فى الشارع وأى واحد مصرى أو غير مصرى كان عارف إن ده هو الملك فاروق .. وكلمة التفت على وجه التحديد شفته يعنى .. شفته زى ما بتشوف أى واحد ماشى فى الشارع .. وحضرت واقعة وفاته .. هنا نقول إن فيه الإثارة الصحفية لعبت دوراً كبيراً فى ترويج هذه الشائعة .. لما بيجي أحد الصحفيين بجمع معلومات أو مجموعة من الشائعات ويحاول يصيغها فى قالب فى صحفى مثير .. فطبعاً يحط عنوان « كيف قتلت الملك فاروق » .. بعدها علامة استفهام .. أو علامة تعجب .. اللي يأخذ الكلام سطحياً بأقول لك يبقى هذا اعتراف بإنى قتلت الملك فاروق .. إنما لو قرأ اللي جواه يفهم إنه بيحاول يحط كلاماً يمكن تكون فيه شبّهات وإنما وصلت النتيجة إلى إن الملك فاروق لم يقتل » .

• ماذا كنت تعمل فى روما فى هذا الوقت بالذات ؟

• « طبيعة العمل فى أجهزة الأمن بتفرض قيوداً من الناحية الأمنية البحتة وحتى من الناحية الأخلاقية .. ده بالإضافة إلى إن القانون بيمنع أية معلومات متعلقة بالأمن أو بأعمال أجهزة الأمن أن تنشر فى أى جهاز من أجهزة الإعلام » .

• أعود وأسأل سؤالاً واحداً .. هل كنت تعمل فى روما جرسوناً ؟

• « أنا لا يمكن أن أقول إن العمل بقاع ضابط الأمن أو ضابط المخابرات يعتبر عملاً فيه تجسس » .

• لأ ده واجب وطنى ..

• « الضابط لا يعمل جاسوساً .. تعريف الجاسوس إنه الشخص العميل الذى يعمل لحساب دولة أخرى .. كون إنه يواجه ضابط من دولة أخرى فليس معنى ذلك إنه يعمل جاسوساً » .

• واشتغلت جرسوناً فى فترة من الفترات ؟

- « برضه أستبعد الإجابة على هذا السؤال لأنى بأقول إن طبيعة عمل رجل الأمن المفروض إنه يتخذ ستاراً فى عمله حتى لا يتكشف العمل الأساسى اللى هو بيعمله » .
- طيب هل حضرتك تنفيذاً للمطلوب منك .. اضطررت لإخفاء شخصيتك بعمل آخر ؟
- « قطعاً فى حالات كثيرة » .
- زى جرسون ؟
- « فى حالات كثيرة .. فى مهن مختلفة » .
- أنا أؤرخ لوجه الله ولعيون مصر .. تاريخ ثورة ٢٣ يوليو .. وأسجلها من كلام صناعها والرجال الذين عاصروها وعاشوها ..
- « هو ده عمل تشكر عليه وعمل عظيم فعلاً .. واللى أنا أتوقعه وأتوخاه إن كل واحد يحاول ألا يخرج عن دوره الحقيقى بدون إدعاء أو بطولات زائفة .. هذا ما أرجوه » .
- ما قتلش سبب وجودك فى هذه الفترة بالذات فى روما ؟
- « سواح » .
- فى نفس الوقت ده بالذات صدفة ؟
- « تصادف » .
- ما كنتش رايح فى مهمة رسمية ؟
- « لأ » .
- وقعت قد إيه ؟
- « على ما أذكر ٣ - ٤ أيام تقريباً » .
- والملك فاروق الله يرحمه مات يوم إيه ؟
- « فى شهر مايو » .
- وحضرتك كنت فى أية فترة ؟
- « فى أوائل مايو » .
- وتقول الملكة ناريمان : « لما سمحوا لى أنا والأميرة فايقة نسافر بعد الجنازة .. وكان لازم إمضاء من الرئيس جمال عبد الناصر وهو كان فى برج العرب ولما طلع سأل محمد أحمد وصلاح الشاهد .. هى الأم ما طلبتش جواز سفر علشان تحضر العزاء ؟ قيل لى هذا .. وبعدين سافرت بره فقال لى بترو وطبعاً رايح جاي .. كانت موجودة كل الأسرة والأميرة فايقة وفؤاد

بك صادق زوجها .. وكان يلعب ابني .. وقال لى إن الوصية حتى اللي كان لازم يتركها حسب الشرع لابنى النص لم يمضيها .. ولغت نظري بند أمه .. كانت مكتوبة بالطلاني .. كان يجيب الكتابة بالطلاني » .

* هل سم أحد الملك .. أنا عارف إنك ما كنتيش موجودة .. لكن ما تقدرش تقولى هل قتلوا الملك ؟

* « لم أكن موجودة .. أنا كنت فى القاهرة ولما سمعت النبأ .. قدمت طلباً رسمياً للرئيس عبد الناصر اللي كان فى برج العرب .. أنا والأميرة فايزة أخته لم نحضر الجنازة .. ولما سمحوا لى وصلت بعد ٧ أيام .. وسألت ابني كان ١٣ سنة صغير وأنا كان كل همة أشوفه .. سألته إيه اللي حصل ؟ سألت البوابين .. وسألت بناته .. كانوا فى سويسرا ساكنين .. ما حدش عرف يقول لى حاجة » .

* وأسأل حسين الأترى : هل قُتل الملك فاروق فى رأيك ؟

* « لأ .. إطلاقاً .. الملك فاروق كان عنده مرض .. هو عارفه اللي هو التشحم حول القلب .. ما كانش يشرب خمر إطلاقاً وإنما يشرب كمية عصير فظيعة ويأكل .. ما يبتلش أكل طول النهار .. وطول ماهو فى السراى بالشورت يفتح الثلاجة حتى فرخة يأكلها أى حاجة يأكلها عصير وهكذا .. فحدث التشحم حول القلب وكانت المصيبة إنه لو خس بسرعة يموت ولو تركوه بسرعة يموت وكنا على علم بذلك قيل وفاته » .

* وأسأل عادل ثابت : لماذا حرص الملك فاروق على أن يدفن فى مصر بناء على وصيته ؟

* « دى قصة لازم أفتح بابها هنا .. فيه بعض الآراء العنصرية بتفرق ما هو أصله تركى أو شركسى .. إحنا فى مصر معروفين إن إحنا استقبلنا جميع الشعوب ومصرناها .. واللى يدل على هذا العرب .. إحنا مصرنا العرب الآن اللي أصلهم عرب بقوا مصريين .. الأتراك مصرناهم .. فكرة العنصرية دى غلط .. كل عائلة محمد على مدفونة هنا فى مصر .. ومش فى تركيا .. ليه لم يقرروا إنهم يدفنوا هناك إذن ؟! »

● ويعيش حالياً ابنه الملك السابق أحمد فؤاد فى باريس .. ويرقد جثمان أبيه إلى الآن فى جامع الرفاعى .. وهكذا عاد فاروق الأول إلى أرض مصر .. ليدفن فى ترابها بناء على وصيته مع أجداده ..

الملف الرابع

معالم الطريق

- علم الشعب بحركة الضباط الأحرار من الراديو .. ثم من الصحف .. وقابلتها الأغلبية العظمى بالارتياح والفرح ..
- وفى صباح ٢٣ يوليو استقل اللواء محمد نجيب والبكباشى جمال عبد الناصر سيارة مكشوفة من سيارات الجيش تتبعها عربات أخرى ، وسار الركب فى شوارع القاهرة فاستقبلته جموع الشعب بالتحية والتصفيق والهتاف ..
- واسأل محمد على عبد الله : عندما قامت الثورة واختير الرئيس نجيب كرنيس لمجموعة الضباط الأحرار .. هل كنت على اتصال به ؟
- طبعاً أنا كنت عايش تقريباً معاه فى بيته الأول فى تكفات العباسية .. وإحنا اتخرجنا بعد الثورة بعدة أيام لأن دفعتنا كانت المفروض تتخرج فى ٣١ / ٧ أجلوها لغاية ٩ أغسطس ٥٢ .. وهو الذى خرجنا من الكلية الحربية كان قائد الثورة وقتها .. ولا أنسى إطلاقاً يوم الثورة اتلعت الناس وطلعنا على شارع الخليفة المأمون وشفت موكب الرئيس محمد نجيب وكانت العربية لا أنساها عربية « بلايموث » مكشوفة بيضاء وراكب العربية وبيشارور بالكاب بناعه والناس ملمومة وقدامه حرس عربية جيب ووراء عربية جيب .. رغم إن الملك كان ما زال فى البلد والإنجليز مازالوا فى البلد وهو مضحى بحياته وحاطت رقبته على كفه وبيلف فى وسط البلد .. فى هذا الوقت كان من السهولة تماماً يندس أحد فى وسط الناس الذى يتهتف ويضربوا عليه رصاص .. كان فيه حرس حديدى كان فيه بوليس سياسى .. يعنى كان ممكن يعملوا أى حاجة لكن الراجح كان فعلاً فى هذا اليوم مضحى بكل شىء فى سبيل الوطن وهذه وطنية فذة .. وكان ليس له أى مطالب غير مصلحة البلد .
- ويقول أحمد أبو الفتح عن يوم ٢٤ يوليو : « لأول مرة تتولى وزارتان حكم مصر .. وزارة عنها الملك فاروق برئاسة الهلالى باشا وتقيم بالإسكندرية .. ووزارة ثانية عنها الجيش برئاسة على ماهر باشا وتقيم فى القاهرة » .

• وأسأل جمال حماد : أول بيان ألقاه الرئيس نجيب في الإذاعة .. كنت معه كما في الصورة .. ما هي ذكرياتك ؟

• « كان هذا الكلام يوم ٢٤ يوليو وتوجه اللواء محمد نجيب .. وكان في هذا الوقت قائداً للقوات المسلحة .. وكنت معاه وكان معاه الرئيس الراحل محمد أنور السادات .. رحنا إحنا الثلاثة إلى دار الإذاعة .. وأنا والرئيس أنور السادات كنا وراءه زى ما إحنا ظاهرين في الصورة .. وألقى الرئيس محمد نجيب بياناً إلى الشعب المصرى .. والذي يلفت النظر إن هو لما نادى الشعب ما قالش إنه بيكلم المصريين .. قال « إلى شعب وادى النيل » .. وهذه إشارة خطيرة .. تدل على أن هذا الرجل كان ينظر إلى مصر والسودان على إنها بلد واحد » .

• في اليوم التالى لقيام حركة الضباط (يوم ٢٤ يوليو) انتهالت برقيات التأييد على مركز مجموعة ضباط القيادة الذين كونوا فيما بعد مجلس قيادة الثورة ...

• وزار مساء يوم السبت ٢٦ يوليو بعض زعماء الأحزاب مركز قيادة الجيش وقابلوا اللواء محمد نجيب وتمنوا للحركة التوفيق ...

• ويقول سعد عيد النور : « إنت بتسألنى الوفد كان مؤيداً أو غير مؤيد .. فى هذه الآونة أقدر أقول وللتاريخ إن الوفد كان مؤيداً لأن النحاس باشا أبلغ مجلس قيادة الثورة هذا التأييد عدة مرات .. مرة لما وصل بالليل بعد قيام الثورة قبل أن يذهب إلى داره .. وتوقف فى مجلس قيادة الثورة وزار محمد نجيب وأبلغه تأييده للحركة .. وقال له الحركة مباركة وسميت « بالحركة المباركة » .. بعد كده النحاس باشا كان لديه من القنوات الشخصية مع مجلس القيادة ما يسمح له بالاعتقاد وفيه مذكرات فى هذا الموضوع .. يعنى أحمد أبو الفتوح كاتب فى هذا الموضوع .. ثروت عكاشة كاتب فى هذا الموضوع .. إن كان فيه قنوات بين الوفد ومجلس قيادة الثورة .. تسمح بتكوين عقيدة عند مصطفى النحاس بأن لا داعى للصدام بين مجلس النواب والشيوخ وبين مجلس قيادة الثورة .. ومجلس قيادة الثورة تعهد باحترام الدستور فلا مقتضى من إثارة أى نزاع » .

• وأسأل حسين الأتربى : هل تعتقد لو لم يسافر النحاس وسراج الدين رحلة الصيف إلى أوروبا .. كان الوضع اتغير ؟

• « نعم .. بنسبة ٨٥٪ لو لم يسافر النحاس ! الشعب كله مع الوفد .. بدليل إن الملك لما أراد سندا لحكمه توجه إلى الوفد .. وما كان الوفد يترك الثورة اللى سميت فى البداية الحركة المباركة » .

• وأسأل فتح الله رفعت : كيف تكون مجلس قيادة الثورة ؟

• « جمال عبد الناصر زى ما بأقول لك من بعد حرب فلسطين غير النظام فاختر ممثلين من كل سلاح وهم اللى أصبحوا أعضاء مجلس قيادة الثورة » .

• **يقول سعيد حليم :** « بمجرد نجاح الثورة تسلم مجلس قيادة الثورة الحكم .. ولم يكن للضباط الأحرار بعد ذلك أى دور .. ولم يؤخذ برأيهم ولم يحدث اقتراع على أى عمل قام به سواء مجلس الثورة أو السيد جمال عبد الناصر » .

• **وأسأل بغدادى :** متى كان أول اجتماع لكم كثنوار بعد نجاح الحركة ؟

• « كان يوم ٢٢ بالليل » .

• **بعد قيام الثورة ونجاحها ؟**

• « بعد ٢٦ يوليو فضلت الاجتماعات مستمرة كذا شهر ورا بعض » .

• **فى مجلس قيادة الثورة ولا فين ؟**

• « فى القبة .. وبعدين رحنا محل الهيلتون كان فيه قشلاق بتاع قصر النيل .. كان مكتنبا هناك وبعدين أخذنا المبنى بتاع البحرية اللي كان فى الجزيرة اللي على النيل اللي وراه الشيراتون دلوقت .. ده بقى مجلس قيادة الثورة » .

• **ويقول حسن فهمى :** « ويعدما بيوم أو اثنين بعثوا الطيارة أخذت رشاد مهنا .. وسافر على مصر » .

• **ويقول رشاد مهنا :** « لم أكن أتصور إنهم يعملوا للخلاص منى .. هذا كان مش فى ذهنى .. وبعدين سادت .. قصة .. إنت عايز تسمعها ؟ »

• **أرجوك ؟**

• « أنا عند رجائك يا سيدى .. لما قامت الثورة ٢٣ و ٢٤ و ٢٥ جاءتني أكثر من رسالة لاسلكية : احضر حالا للقاهرة .. صدمت جداً وبدأت أقرأ الواقع بمجرد وصولي للقاهرة .. قابلني ضباط المدفعية فقط .. لا حرج فى ذلك .. لما ذهبت للرئاسة لم يقابلني مخلوق ولم يسلم على مخلوق إطلاقاً حتى مجرد السلام .. وهم مجتمعين فى الداخل » .

• **طيب كانوا يستدعوك ليه ؟**

• « ده سؤال يجاب عليه بالآتى : فى يوم من الأيام وهم مجتمعين دخلت عليهم مجتمعين لوحدهم .. السلام عليكم عليكم السلام فبادرنى جمال عبد الناصر وهو على رأسهم .. قال لى إنت جاي تنقض على الثورة .. أنا بُهت .. لأن معلوم الثورة عندهم فئة يلحقها أى مخلوق .. هذا هو معنى الثورة .. قلت له انقض عليها معنى إيه .. قال لى مش كده ويس .. مين قال لك تعالى .. قلت له مين قال لى .. مين اللي يقول لى .. قال إحنا .. قلت له لا أحد يقدر يقول لى تعالى .. أنا آجى وأروح زى ما أنا عاوز .. أفهمته إنى أنا جيت بعد طلبكم لى ٣ مرات .. ومع كل .. سوف أسافر العريش زى ما كنت .. السلام عليكم .. قالوا لا تطلع .. قلت سوف أسافر العريش على شرط إن صلاح سالم لا يأتى إلا إذا كنتم عاوزين حاجة .. تبلفونى أو أسيب

الجيش مش عاوز حاجة .. قالوا لأ .. وقع صلاح سالم مغشياً عليه فانشغلت دعكت له رجلية وإيديه إلى أن فاق .. وانتهت هذه القصة » .

• **ويقول مصطفى أمين :** « بعد قيام الثورة بـ ٣ أيام .. جم قبضوا على أنا وعلى أمين .. وأنا اعتقدت إن السبب إنهم خافوا أن ننشر إن فاروق سوف يطردوه يعنى يغادر البلاد .. لكن بعد كده عرفت إن واحد صحفى أبلغ ثروت عكاشة إن إحنا اتكلمنا فى التليفون مع وكيل الخارجية البريطانية فى لندن وقلنا له خلى الجيش البريطانى يوقف الثورة .. فقبض علينا .. وكانت فى ذلك الوقت التليفونات كلها مراقبة بين مصر وخارج مصر .. وبتسجل الأحاديث .. فبعد ما خرج الملك فاروق راحوا مصلحة التليفونات وقالوا لهم عايزين الشريط للمحادثة التليفونية اللى بين مصطفى أمين وبين لندن .. مصلحة التليفونات قالت هو لم يتكلم .. قالوا طيب لم يتكلم قبلها بيوم .. قالوا لم يتكلم قبلها بشهر .. لآ لم يتكلم .. دعونا إلى مجلس الثورة على أمين وأنا .. وقبلنا محمد نجيب واعتذر على إنه قبض علينا .. أنا قلت له الاعتذار الشفوى لا يكفى .. يجب إن الناس تعرف لماذا قبض علينا ولماذا أفرج عنا .. وطلع بلاغ قال فيه إنه نسب إلينا اتهامات وظهر إنها غير صحيحة .. وإنهم يأسفوا لما حدث وأذاعوا هذا البلاغ فى الراديو » مرات » .

• **وقبول النظام الجديد بالترحيب من معظم الدول العربية ..**

• **ويقول توفيق عبده إسماعيل :** « بعد الثورة مباشرة بدأت أسجل ما حدث كتابة للضباط .. وكان مطلوب التسجيل فى هذا الوقت .. جاءتنا بعد الثورة حسنى الزعيم فى زيارة .. والملك السنوسى فى زيارة .. فطلبوا منا إن الضباط الأحرار يأخذوا نياشين فى زيارة الملك السنوسى هو جاء الأول والزعيم السورى بعده .. واتقسمنا الضباط الأحرار على مجموعتين .. المجموعة الأولى مع الملك السنوسى أخذنا نياشين .. وبعد الثورة بدأنا نعمل اجتماعات للجان الضباط الأحرار المختلفة .. وبدأ يحضرها عبد الناصر وعبد الحكيم عامر وصلاح سالم وكمال حسين » .

• **ويقول خالد محبى الدين :** « الاتحاد السوفيتى كان يشن علينا حملة عاتية ويتهمنا بإننا انقلاب عسكري عميل لأمريكا » .

• **وكانت قد تشكلت وزارة على باشا ماهر .. التى كانت بمثابة وزارة الانتقال من العهد القديم أو العهد البائد ، كما أسماها رجال يوليو ، إلى العهد الجديد ..**

• **ووزع الضباط الأحرار فى مختلف الجهات والاتجاهات ..**

• **ويقول خالد محبى الدين :** « اتفقنا على أن يعمل عبد الحكيم وصلاح مديرين لمكتب القائد العام .. وكان عبد الناصر هو وكيل مجلس القيادة .. وبدأ عبد الناصر يستشعر حماسية خاصة إزاء الضباط الأحرار الذين يتدخلون فى كل شىء ويتحذرون بصفتهم أصحاب الحركة .. وربما كان يخشى منهم لإنهم كانوا قد تدربوا على العمل السرى المنظم » .

* وأسأل توفيق عبده إسماعيل : أول قرار جماعى اتخذته هيئة الضباط الأحرار بعد نجاح الثورة كان متى وفيين ؟

* « هو بعد نجاح الثورة كانت المجموعة اللى موجودة فى القيادة أساساً .. جمال عبد الناصر منير مكتب القائد العام للقوات المسلحة محمد نجيب .. الذى عُين قائداً عاماً للقوات المسلحة ووزيراً للحربية يوم ٢٣ صباحاً .. وعلى ماهر جاء زارنا ٢٤ يوليو الصبح وزار الوحدات اللى شاركت ومعه محمد نجيب كوزير للدفاع .. ورقى لرتبة فريق وتنازل عنها يوم ٢٦ .. فاللى كانوا موجودين فى هذا الوقت كان بغدادى وكمال الدين حسين وزكريا محبى الدين وحسين الشافعى وخالد محبى الدين وثروت عكاشة .. المجموعة الأخرى كانت لسه موجودة فى العريش .. صلاح سالم جاء بعد يوم ٢٥ وإحنا نتجه إلى الإسكندرية » .

* ويقول أبو الفضل الجيزاوى : « كان عبد الناصر بعد ما قامت الثورة أحب يطلع كل الناس اللى عملوا عملية عسكرية .. ومتصلين بوحداتهم .. يطلعهم خارج الوحدات العسكرية .. علشان يبقى نوع من الاطمئنان والأمان له هو .. فطلبوا إننا ننسب الجيش ونشغل فى الإدارات المختلفة .. إدارة المخابرات .. إدارة شؤون العمل والقوات المسلحة .. إدارة التنظيم والإدارة .. إدارة التدريب الجماعى .. أى إدارة .. فقال لى عبد الناصر تختار إيه .. فأنا فى ذلك الوقت كنت فى كلية الحقوق جامعة القاهرة .. فقلت أنا أروح الشؤون العامة علشان يبقى عندى فرصة أذاكر وأروح الجامعة .. وفعلنا وافق عبد الناصر ورحت أركان حرب الشؤون العامة .. »

* وأسأل أمين شاكى : عينت مديراً لمكتب الرئيس عبد الناصر أيام ما كان الرجل الثانى فى بدايات الثورة ؟

* « أنا اتعينت من يوم ٢٣ يوليه ٥٢ .. وعبد الناصر هو اللى عرض على .. لإنى كنت فى إيطاليا .. قال لى ارجع فوراً فرجعت هربانا لأن كان فيه تنبيهات على أحمد حسن الفقى (الملحق العسكرى) إن أنا ما أخرجش بره روما فرحت دفعت رشوة للجماعة بتوع حجز التذاكر فى إيطاليا وإدوني تذكرة .. ووصلت ٣ صباحاً .. قال لى عبد الناصر أنت رايح فىين .. فقلت أنا رايح البيت أغير هدموى المدنية .. فقال لى لا بيت ولا غيط .. أفعد هنا .. قلت له أعمل إيه .. قال لى أنت تمسك مدير مكتبى .. وهكذا بدأت حكاية مدير مكتبه اللى استمرت ٩ سنوات » .

• وفى ٢٨ يوليو سنة ٥٢ أعلن أنتونى إيدن فى وزارة ونستون تشرشل أن الحكومة البريطانية أبدت عدم رغبتها فى التدخل فى شئون مصر الداخلية ...

• وترددت رنة أسى عند البعض بسبب ما حدث للملك السابق .. ولكن الأغلبية العظمى فرحت لهذه النتيجة ...

* ويقول صلاح شعراوى : « أقول لحضرتك بعد كده .. حصلت .. للأسف يعنى أحداث صغيرة كده .. نتيجة سوء تفكير .. تبص تلاقى عساكر البوليس الحربى كانوا يضايقوا العساكر بتوع

الحرس .. ضابط أو اثنان ضربوا الضباط فحصل نوع من الاستياء .. إحننا ضباط جابين من الجيش .. وحذرجع للجيش فإزاي يحصل هذا النوع من المهانة .. فجاء اللواء محمد نجيب .. وهذا أمورها .. وهى كانت أصلا السبب فى الحرب برضه أيام الملك فؤاد .. وكان محمد نجيب زمان فى الحرس .. وقال لنا أنا كنت فى الحرس وعارف وإجابتكم إيه .. وهذا الأمور .. ولكن فى الحقيقة جم قالوا لنا كل واحد يختار الحنة اللي عاوز يروحها .. وأبدأ تشكيل الحرس بأخذ شكلاً آخر .

• وأسأل خالد محبى الدين : حضرتك فى الأيام الأولى للثورة كان لك دوراً محدداً ؟

• « إحننا بعد الثورة أول حاجة فكرنا فيها تأمينها .. فكان لابد من تولى حسين الشافعى رئاسة الفرسان .. وثروت عكاشة أركان حرب .. وأنا مسكت ضابط مخابرات سلاح الفرسان .. فيقت قيادة الفرسان أمانة .. بجانب إن عدداً من قادة القوات المدرعة أبعادوا .. فأماناً وجود سلاح الفرسان .. وكانت دى قضيتنا الأولى لغاية الملك ما خرج .. وبعد كده بدأنا حاجة أخرى . »

• ويقول سعيد حليم : « وبعد ذلك جاءت بالصدفة الحقيقة بعد ٣ - ٤ أيام من الثورة أمرت أن أروح للمخابرات الحربية .. مع بعض الضباط الأحرار .. فما عجبنيش العمل هناك .. وحسيت إنه مش من طبيعتى .. فرحت تقدمت بطلب إننى عاوز أرجع لوحدتى وهى الكتيبة ١٣ .. ففى نفس اللحظة .. قابلنى السيد زكريا محبى الدين وعرض على أن أعمل معه سكرتيراً عسكرياً .. وهو مدير وكان يطلق عليه فى ذلك الوقت سكرتيراً عسكرياً .. وعملت معه كسكرتيراً عسكرياً فى المخابرات الحربية .. والمخابرات العامة .. ووزارة الداخلية حتى سنة ٥٨ ففضلت أن أنضم إلى عملى اللي كان فى ذلك الوقت فى الخارجية .. وتركزت عملية الثورة أو الحكم بمعنى أصح . »

• وأسأل حسن الدمهورى : إمتى اجتمعتم كضباط أحرار لتحتفلوا بانتصاركم ؟

• « ما حصلش .. إننا اجتمعنا علشان نحتفل بانتصارنا .. لأن كل واحد أدى دوره وقعدنا فى القشلاقات بناعتنا .. يعنى ويمكن ضباط الفرسان الوحيديين اللي ما حدش منهم خرج بره السلاح أبداً .. وأخى أصبح محافظاً . »

• هل الضباط الأحرار استمروا فى القيادة وفى الإدارة ؟

• « للأسف الشديد مدى علمى إنهم لم يستمروا أبداً .. لم يستمروا فى الإدارة ولا فى المناصب الخارجية .. يعنى الحقيقة كان شغلنا الشاغل تأمين هذه الثورة .. فلحننا كنا قاعدين فى قشلاقاتنا لا نغادرها إطلاقاً .. ده فى الفترة الأولى ثم إنت عارف إن دايمنا الناس اللي بيغفوا بالثورات ما همأش هم اللي بيوصلوا فى النهاية أبداً .. بالعكس دول بيععدوا من أول الطريق ما بيوصلوش أبداً .. يعنى معظم الناس اللي تولت الحكم فى مصر .. أو شاركت فى مسئولية الحكم .. ما كانوا ضباطاً أحراراً !! »

- * باستثناء الـ ١٣ ؟
- * « طبعاً أعضاء مجلس الثورة دول حاجة ثانية !! »
- * وحوكم القادة العسكريون .. وعلى رأسهم حسين سرى عامر .. أما حيدر باشا الذى كان القائد العام للجيش .. فلم يحاكم .. وكذلك حسين فريد .. كما لم يحاكم يوسف رشاد وكذلك النحاس باشا ...
- * ويقول خالد محبى الدين : « اعترض صلاح سالم بشدة على محاكمة حيدر باشا » .
- * ويقول حسن المراغى : « حيدر باشا كان يعلم علم اليقين عن الثورة وقيامها » .
- * بحكم إنه قريب للمشير عامر ؟
- * « أيوه .. أيوه .. »
- * يقول حسين الأتربى : « وذهبت إلى حيدر باشا فى مقر القيادة وأخبرته بأسماء الضباط الأحرار فقال لى دى « زوبعة فى فنجان .. وصلاح سالم ده مدير مكتبى والثانى قريبي » .
- * اللى هو عبد الحكيم عامر ؟
- * « آه .. وكانت الأسماء كلها مذكورة .. وفؤاد باشا عارفها والملك عارفها وحيدر باشا عارفها كل الأساسيين وقال لى أنا لا أريد أن أعمل هزة فى الجيش .. ولا أحب أن أذى ناس من أصدقائى .. ولما قابلت حيدر باشا مرة ثانية أخبرته بقبول فؤاد باشا له كوزيراً .. وتحدد سفر الوفد .. وحاولت أن أثنى النحاس باشا وفؤاد باشا عن السفر وتدخل الآخرون فسافروا .. وحدث ما حدث ووقع الانقلاب » .
- * ويقول أمين شاكر : « فى بداية الثورة كانت أكثر حاجة بتشغلنى وكنت بأسعى لتحقيقها أن أجعل عبد الناصر على اتصال بالناس باستمرار .. وجبت له الناس من مختلف القطاعات .. جبت له أحمد عيود باشا .. ورئيس مجلس إدارة بنك مصر .. اللى هو جوز بنت طلعت حرب .. وجبت له ناس من البنك الأهلى ومديرين بنوك وشركات .. وجبت له عمال .. كمان فكنت باستمرار عامل ترتيب إن كل يوم لازم يقابل اثنين أو ثلاثة .. بقدر ما يتسع وقته .. علشان يسمع من الناس وبألستهم إيه اللى حاصل فى البلد .. إيه القرارات اللى عملها مجلس قيادة الثورة .. وهم رأيهم إيه .. والعملية دى فى رأى نجحت لدرجة كبيرة جداً فى أنها عملت لعبد الناصر شعبية كبيرة وجبت له النحاس باشا دى ما حدث يعرفها لغاية النهارده .. وصلاح الدين اللى كان وزيراً للخارجية .. وشغلته معايا فى مجموعة « اخترنا لك .. » وأحمد عبد الغفار .. وكنت من أوائل الناس اللى جابوا له الإخوان .. ابنة الهضيبي كانت زميلتى .. وعبد الناصر تعلم من جميع هذه الجهات .. وإحنا كنا حاسين إن الشعب مسروراً جداً بنجاح الثورة » .

• وفى ٢ أغسطس تقرر إلغاء الرتب والألقاب المدنية .. وصدر مرسوم بالعفو الشامل عن جرائم العيب فى الذات الملكية ..

• وعين مجلس الوصاية على العرش من ثلاثة .. الأول الأمير محمد عبد المنعم .. والثانى الباشا السابق بهى الدين بركات .. والثالث رشاد مهنا ...

• وأسأل رشاد مهنا - الوصى على عرش مصر : ولية اختاروك بالذات وقد كنت من كلامك مش من مؤيديهم أو إنهم ميالين إليك ؟

• « يظهر إنى أخطأت التعبير أنا مش ميال إليهم أو ضدهم .. أنا لست معهم .. إنما أنا ليست عندى الروح العدائية إطلاقاً .. وإلا كانت حرب أهلية .. وهذا اللي تفاديتة لو كنت أنا ثرت كان لها وقع ثانى .. إنما الحمد لله ربنا وهبنى العقل .. وفكرت علشان يتولى فلان أو علان تزهق أرواح بالآلوف قلت لا يمكن .. فلان تولى خلاص .. وقتلتها صراحة فى سلاح المدفعية .. وهو ثائر .. وقتت إذا قام بهذه الثورة امباشى حتى لا دخل لنا بفلان .. ليست أسماء .. وفكرة الثورة عندنا نحن كان لنا جانب آخر .. وهو أن يقوم الشعب بالثورة ويحميه الجيش .. ده كان معنى الثورة » .

• نتكلم عن مجلس الوصاية ؟

• « أقول لك ملخص كلام .. صلاح سالم اللي كتبه فى المجلة قال إحنا ورشاد مهنا فى الجيش لا يمكن نتعاون .. لابد من القضاء على أحدها .. ده كلام ؟ ولذلك إحنا جيبنا أن نخلص ونعطيه أعلى المناصب حتى إن معاونيه إذا تكلموا نقول لهم إحنا أعطيناه فكانت عملية الوصاية عملية خلاص منه وليست ودیعة بين يديه .. يعنى الاختيار مرغمين عليه .. مش عضو فى الثورة ولا حاجة » .

• وحضرتك كنت لسه رجلاً عسكرياً ؟

• « رجل عسكرى .. على فكرة أول واحد طلعهو ثانى يوم من الجيش .. كان أنا .. وأصبحت أيامها رجلاً غير عسكرى خلاص » .

• كنتم بتعملوا إيه فى مجلس الوصاية كوصى على العرش ؟

• « عملية المُلْك .. عملية رئاسة الدولة .. يعنى المراسم وما إليها الخاصة بالسرايا .. والتصديق .. تشكيلات لكن أنا كنت أعتبر غير هذا لأنى كنت أعتبر نفسى مندوباً للثورة .. وهم رأيهم يعنى بملك ولا يحكم قلت لهم مش عندى أنا » .

• هل النية كانت مبيتة لإعلان الجمهورية ؟

• « النية كانت مبيتة لإعلان الجمهورية فى الوقت المناسب .. عندما تستكمل مصر سنة أو ثلاثة والملك تحت الوصاية ويكون الشعب مؤهلاً وبعدين تعلن الجمهورية .. ولكن اللي حصل غير

كده .. اللى حصل عملية فعل ورد فعل .. يعنى أنا لما وقفت لهم مراراً فى بعض الحاجات حبوا .. مش عارف أقول إيه .. والله يحزننى أقول ما كان يُفعل .. وبعدين لما بنست من الإصلاح أعفيت نفسى وقدمت الطلب لعبد المنعم .. تانى يوم الصبح كان فيه إقالة .. وسمعنا فى لندن مش من هنا .. وأنا بأفتح الراديو وجذته يقول الوصى على العرش أقالوه !! وانتبهت علاقتى بالوصاية وفضلت تحت الحراسة .. والوصاية استمرت لفترة بالتنين الثانيتين .. وبعدين واحد وبعدين انتهت » .

• وكنت مبعداً أو مغضوباً عليك ؟

• « لا مغضوب على لا أقبله أبداً .. ! لأن لما يغضب على بنى آدم يكون من واحد له قيمته .. مبعد صح .. وكشروط الوصاية لابد أن أكون أميراً أو وزيراً لأكون وصياً .. فعينت وزيراً للمواصلات » .

• ويقول جمال منصور : « فى أحد اجتماعات الضباط الأحرار فى مكتبى برئاسة سلاح الفرسان قلنا يوماً : « نحن نرفض أى نظام سوى النظام الديموقراطى » .. وإننا لم نخلع « فاروق » لكى نأتى فى مكانه بـ « ١٣ فاروق » .. وعقدنا اجتماعاً فى منزل الدمنهورى حضره حوالى ٤٠ ضابطاً حراً من «سلاح الفرسان .. وحسين الشافعى وثروت عكاشة وخالد محبى الدين .. ثم اجتماعاً حضره جمال عبد الناصر الذى أعلن قراراً بنقل مصطفى نصير وعبد الحميد كفاوى إلى خارج السلاح .. كما حدث لى .. وسرعان ما أصدر مجلس الثورة قراراً بالغاء تنظيم الضباط الأحرار باعتباره إنه قد استنفذ أغراضه » .

• وكان قد حدث شغب بين عمال شركة مصر للغزل والنسيج بكفر الدوار أدى إلى حدوث مظاهرات وإضراب عام بين عشرة آلاف عامل .. وحكمت المحكمة العسكرية على خميس والبقرى المتهمين بقيادة الشغب ...

• وأسأل رشاد مهنا : اللواء عبد المنعم أمين كان رئيساً لإحدى محاكم الثورة .. وحذا بالإعدام على خميس والبقرى .. فما رأيك ؟

• « أسأل عبد المنعم أمين قول له إيه رأيك إنت .. كان بيملى عليك ولا إنت عملت كده من نفسك ؟ » .

• ثم أسأل عبد المنعم أمين : هل حضرتك كنت أول رئيس لمحاكمات الثورة ؟

• « لأول محكمة ثورة لأ .. كان هذا مجلساً عسكرياً عالياً لمحاكمة العمال فى كفر الدوار .. اللى قاموا بشغب وهدموا وبدأوا يكسروا فى المصنع بتاعهم نفسه .. ونتيجة هذا التعدى مات ١١ واحد : ٨ من العمال و ٣ من عساكر البوليس .. يعنى حصل تبادل إطلاق نار ما بين العمال بتوع المظاهرة والبوليس .. الموقف كان قدامنا كده وكان لسه لم نعمل أى حاجة .. أنا أكثر تجربة فيهم لا شافوا تجربة فى الحياة .. قليلى الخبرة .. أنا قلت لهم أنا أروح مع أعضاء

مجلس عسكري ونروح نحاكم الناس نول علشان إدا لم نعمل محاكمة عسكرية .. المحاكمة المدنية حتأخذ سنوات ..

• من كان معك أعضاء ؟

• « كان معى حسن إبراهيم .. عبد العظيم شحاته .. فتح الله رفعت .. وكان نائب أحكام عبد المنعم مراد .. »

• هل ده كان بداية مواجهة مع الشيوعيين فى مصر ؟

• « آه كان بداية مواجهة الشيوعيين فى مصر لأن عبد المنعم خميس ١٠٠٪ شيوعى .. لأ مش اسمه عبد المنعم خميس اسمه خميس والبقرى أنا أعرف واحد اسمه خميس ثانى .. خميس تصرفاته وكلامه كلها فى الجلسة وقال أنا مستعد أدافع عنهم فهو رفض كلامه كان شيوعى ١٠٠٪ .. »

• هل كانت الأحكام معروفة قبل صدورها عليهم بالإعدام ، يعنى اتفقتوا على ذلك ؟

• « لأ أبدأ لم نتفق على شىء بدليل أن كان الأول خميس هو المدان .. ليه لأن كانوا شابيلينه على أكتافهم وينادى « يسقط الظلم » .. كلام زى كده .. دى المظاهرة التى بدأت تأثير النظام والقانون .. وأنا كنت لا أحكم بالقانون المدنى .. ولكن الأحكام العرفية التى كانت صادرة يومها وما زالت موجودة حتى الآن إن أى مظاهرة نتيجتها موت أحد من المتظاهرين القائد بتاعها يحكم عليه بالإعدام .. إحنا لا نعرف كم القوات ولا نعرف أى حاجة .. وبعدين موسى صبرى جاء وتطوع أن يدافع عنه وكان فيه منهم واحد لذلك كان متهماً بأنه يكسر مع الناس .. موسى صبرى كان لسه متخرجاً من الكلية وليس له أى تجربة فى الدفاع .. كانت زوجة البقرى شاهدة علشان تقول ما لهوش دعوة وهو كان فى البيت .. وهى جاءت قالت كان بابت عندى فى البيت وبعدين فى الصباح قلت له رايح فين قال مالكيش دعوة يا وليه .. ووجدته واقف مع عمال بيكسروا حاجات ويجمعوا حاجات .. لمسته كقائد من القوات يقول لهم يا أولاد كسروا واحرقوا وما كانش قدامى غير أن أدخله .. لكن أحكام مسبقة لا أحد يعرف عن الأحكام دى حاجة .. كآى جلسة أو أى ناس عندهم نزاهة .. حكمت بهذا يعنى أنا كنت سايب لهم الحرية خالص للأعضاء ولازم يكون حكم الإعدام بالأغلبية المطلقة أو بالإجماع .. »

• **ويقول لطفى واكد :** « الرئيس نجيب كان لى معاه حوارات فى هذا الموضوع .. هو بعد الثورة كلنا كنا عايزين إننا نرفع من شأنه إلا أن قضايا الإعدام هو وافق عليها .. وجمال عبد الناصر هو الوحيد الذى رفض يوافق على قضايا الإعدام !! »

• وصدرت تشريعات مالية ترمى إلى الحد من الدخول الكبيرة .. وأغلقت البورصة .. كما خفضت الإيجارات ..

• وفى أوائل سبتمبر سنة ٥٢ حدث تعديل فى وزارة على ماهر ودخلها فيمن دخلها المهندس مراد فهمى .. د . نور الدين طراف .. د . إبراهيم بيومى مذكور ..

- وأسأل د . نور الدين طراف : كيف بدأت صلتك برجال الثورة ؟
- ه أنا يمكن لا أعرف ليه اختاروني ؟ يعنى لغاية دلوقت أنا مش واجد له مبرر .. يمكن السبب فى هذا تاريخى فى مجلس النواب .. وتاريخى فى حركات الطلاب .. أعطاهم فكرة عنى .. ولم يكن فى ذهنى أن أحاول أن أتصل بهم .. كانوا يجتمعوا فى كوبرى القبة لأنى ما كنتش عارفاً أحداً منهم .. حصل بعد عودتى بأيام .. إن الصديق الصحفى القديم حلمى سلام اتصل بى فى التليفون وقال لى إن فيه بعض الإخوان عايزين يشوفوك وبأدعوك لفنجان شاي عندى فى البيت فرحت بيته .. كان قريباً من كوبرى القبة فوجدت الصديق فتحى رضوان أيضاً مدعواً بنفس الطريقة .. ووجدت عدداً من الضباط كنت لا أعرف أحداً منهم إطلاقاً وقنعنا نتكلم فى مسائل عامة .. هم بيتكلموا عن أحداث البلد وكلام عام زى ما يكون الاثنين المدنيين دول موضوعين تحت الاختبار الشفوى .. حاجة من هذا القبيل .. النهاية دى كانت أول مرة أشوفهم .. أنا الللى لاحظته يومها إن فيه واحد منهم لم يتكلم إطلاقاً .. كان مكتئباً بالسبع .. سألت حلمى سلام ده مين ؟ قال جمال عبد الناصر .. ده أهم واحد فيهم ده هو لا يحب أن يتكلم يحب يسمع بس كده .. دى كانت أول مرة أشوفه .
- وما لبث أن قدم على ماهر استقالة وزارته إلى مجلس الوصاية .. وكان من أهم أسباب الاستقالة .. قانون الإصلاح الزراعى ...
- وأسأل رشاد مهنا : إيه أهم قرار حضرتك مضيت عليه كوصى على عرش مصر ؟
- ه أهم قرار هو الإصلاح الزراعى .. وهو له قصة .. لم يكن إصلاحاً زراعياً لأنه كان نيتاً شيوعياً .. بذرة شيوعية وضعها بعض إخواننا الشيوعيين ولا داعى لذكر أسماء .. تبنّاها جمال سالم .. وجمال سالم كان يُشك فى قواه العقلية لأنه كان مصاباً بسرطان فى دماغه .. فكان أول ما عايزين يضايقوا واحد .. يسلطوه عليه .. أنا أذكر مرة إن واحد من الإخوة دول مسك جمال عبد الناصر قال له أبوك .. ومن هذه الأنفاظ .. الإصلاح الزراعى هم سموه كده .. ما كانش الإصلاح الزراعى كان تحديد الملكية .. أنا وقتت وقتت مافيش تحديد للملكية صمموها وقتت لهم لا يمكن هذا يتنافى مع الاقتصاد .. ومع الدين ومع كل حاجة .. تحديد الملكية .. لا إحنا مش شيوعيين .. كلمنى محمد نجيب الله يرحمه ويرجع أفعمه .. وهكذا إلى أن قلت لهم لا ينفع نجتمع رجال الثورة والللى مختص من الوزراء وأنا معاهم ونتناقش ونصل إلى نتيجة .. ويومها حرص محمد عبد المنعم أن لا يأتى خوفاً من بذاءات إخواننا .
- ويقول المهندس إبراهيم شكرى : ه كنت أول من دعا إلى تحديد الملكية الزراعية فى مصر .
- وأسأل المهندس سيد مرعى : حضرتك كنت من أول أو من أوائل من تانبوا بالإصلاح الزراعى فى مصر .. الفكرة جاءت إزاي .. وعبرت عنها إزاي .. قبل ٥٢ ؟
- ه فى الحقيقة لا أقدر أقول إنى ناديت بالإصلاح الزراعى .. كإصلاح زراعى .. إنما بدأت فى حياتى الأولى وشفت الظلم الواقع على الفلاحين فى وقتها من دفع القيمة الإيجارية .. تقدر تقول

إن التفكير بتاعى بدأ تفكيراً اجتماعياً للبيئة اللى أنا موجود فيها .. لم أكن أعرف فى هذا الوقت وأنا متخرج إيه كلمة الإصلاح الزراعى إلى أن تطورت الأمور .. كان الله يرحمه على بك التمسى رئيساً للبنك المركزى فى الوقت ده كنا بنتكلم مع بعض فى هذا الموضوع فهو أول واحد ترجم الناحية الاجتماعية التى كنت أفكر فيها إلى ما سُمى بالإصلاح الزراعى .. مش بس كده .. دعا واحدة اسمها « دون رينار » متذكر اسمها حتى الآن .. كاتبة إنجليزية كانت كتبت كتاباً عن الأرض والفقر فى منطقة الشرق الأوسط من ضمنها نادت بالإصلاح الزراعى .. من هنا تنبأت وتنبهت من زوايا محددة للى كان المرحوم محمد بيه خطاب فى مجلس الشيوخ ينادى بتحديد الملكية بـ ٥٠ فدان .. أنا ناديت فى وقتها بتحديد القيمة الإيجارية للأرض الزراعية فأصبح القانونين دول مكملين لبعض .. ده قبل الثورة .

• ويقول محسن محمد : « قويت الاتصالات الأمريكية مع الثوار .. حتى أن قانون الإصلاح الزراعى نفسه عرض على كافرى .. وطلب منهم أن يهدنوا اللعب شوية .. وكانوا يستمعون إليه باهتمام شديد وكان هو مستشارهم رقم واحد » .

• وكيف عرفت ذلك ؟

• « كل ذلك مذكور فى الوثائق الأمريكية والبريطانية التى أطلعت عليها » .

• وأسأل سيد مرعى : هل وجدت أن الثورة تقضى على الإقطاع فعلاً ؟

• « هنا لازم أكون صريحاً معاك .. لما بدأنا .. اعتقادى كان راسخاً فى القضاء على ما يسمى بالإقطاع .. ولو قرأت كتابى اللى أنا مألّفه عن الإصلاح الزراعى أنا ما كنتش بأسميه إقطاع بأسميه ملكية كبيرة .. لأن الإقطاع ما كانش موجوداً فى مصر بالمعنى التاريخى للإقطاع .. وتقننا بحماس كبير جداً سواء فى عدالة التوزيع أو سواء فى عدالة الاستيلاء بقدر ما أمكننا أو سواء حطينا هدفاً أمامنا ألا يؤدى الإصلاح الزراعى إلى انخفاض فى الإنتاج .. وأمكننا فى الكام سنة اللى إحنا توليناهم أن ننفذ القانون بشكل إنه حتى الهيئات الدولية اعترفت به .. لدرجة إنك تروح روما تجد إن ضمن المستندات الموجودة هناك .. يقول لك يعنى نظام الدورة الزراعية منظمة إزاي تجميع الحاصلات الزراعية .. إزاي تجميع الدورة الزراعية .. إزاي عدالة التوزيع .. نقادى نفتت الملكية .. هل الإصلاح الزراعى نفذ على جميع الملاك ؟! الإجابة نعم نفذ على كل ما هو أزيد من الحد القديم » .

• وأسأل الملكة ناريمان : رأى الملكة كان إيه فى قانون الإصلاح الزراعى ؟

• « رأى أنا إن كان لازم يعملوا قانون الإصلاح الزراعى فى صالح الفلاح » .

• تكلمتى مع الملك فى هذا الموضوع ؟

• « أيوه كان غرض عليه من فؤاد باشا سراج الدين وسيد مرعى .. يعنى كان فيه كلام .. لكن مش ١٠٠ فدان لكل فرد .. فى الوقت ده كان عايزه لصالح الفلاح » .

* ويقول خالد محيي الدين : « كاس كافرى سفير الولايات المتحدة يتصرف على أساس أنه ذو نفوذ فى صفوف الثورة بالحق أو الباطل .. وكان يتحدث عنا قائلًا "My Boys" (أولادى) .. وأبلغ على صبرى جمال عبد الناصر أن السفير غير راض عن اختيار السنهورى رئيساً للوزراء .. وعلى أية حال اعتذر السنهورى حتى لا يسبب لنا حرجاً .. ولعل البعض قد أخرجته لكي يتخذ موقف الاعتذار » .

* ويقول د . يونان ليبيب رزق : « فلما حددت الملكية الزراعية بمائتى فدان وتأثر بهذا القانون أكثر من ألفين من الملاك الزراعيين .. حاول البعض مقاومة تنفيذه فكان الرد السريع بإقامة محاكمات عسكرية للمعترضين » .

• وألف اللواء محمد نجيب وزارة مدنية برئاسة ...

• تبع ذلك التوجه إلى التجمعات السياسية فى الأحزاب القديمة .. وبدأ ذلك برفع شعار « التطهير » ومطالبة الأحزاب بتطهير نفسها .. وصحبها حملة اعتقالات ...

* ويقول أحمد أبو الفتوح : « لقد كان التطهير سلاحاً مشهراً على مستقبل كل موظف فى الدولة .. ولذلك اندفعت غالبية الموظفين تتنافس فى النفاق والتجسس .. مئات من الموظفين فقدوا وظائفهم لا لشيء إلا لأنهم يمتون بصلة القربى أو النسب لبعض كبار السياسيين القدامى .. أو لأنه سبق أن عرفوا بميل للأحزاب السياسية » .

* ويقول إسماعيل فريد : « الثورة أعطت مهلة للأحزاب تطهر نفسها كانت النتيجة إنها لم تطهر نفسها .. هى هى .. بالنسبة لنا إحنا وكان الشعب يعرف إن دول مرتشين .. أو الشعب يعرف إن لهم انحرافات .. هم استمروا فى الأحزاب كما هى فكان الطبيعى أن تأخذ وضعاً إيجابياً ضدهم » .

* ويقول إبراهيم شكرى : « بعد قيام الثورة دعت إلى أن تطهر الأحزاب صفوفها .. وبالفعل حصلت تحركات وأصدروا قانون لتنظيم الأحزاب .. وهذا القرار لتنظيم الأحزاب استقر .. كما أذكر الحزب الوطنى الجديد .. وأيضاً حزب مصر الاشتراكى .. أمكنه أن يقدم أوراقه للاعتراف به وصدرت جريدة رسمية فيها تكوين للحزب الجديد .. حزب مصر الاشتراكى .. وهذا صدر فى يوم ١٥ يناير ٥٣ » .

• وأصدر المجلس قراراً باعتقال ٦٤ سياسياً .. وبدأت مرحلة جديدة من تاريخ الثورة ...

• وفى ١٤ أكتوبر سنة ٥٢ أقيل محمد رشاد مهنا من منصب الوصى على العرش ...

* ويقول مصطفى كامل مراد : « رشاد مهنا كان فيه انقلاب فى يناير ٥٣ .. معنى كان فيه مؤامرة علشان قلب نظام الحكم فقبض على الضباط وحكموا » .

* ويقول فتح الله رفعت : « عندك رشاد مهنا حبوا يشيلوه من الوصاية .. جمال عبد الناصر عمل لنا طيارة مخصصة أنا ومحسن وكمال ورحنا العريش .. ورحنا رفع .. ورحنا

الإسكندرية .. علشان نمهد الطريق .. لإن رشاد مهنا رجل من المدفعية .. وكان محبوباً جداً ..
نمهد الطريق علشان يخرج رشاد مهنا » .

• وقمتم بذلك فعلاً ؟

• « قمنا بذلك فعلاً وهذا كان خطأ كبير .. اللي أنا أخطأت في حقهم كفتح الله رفعت ما لبش
دعوة بغيري .. رشاد مهنا ومحمد نجيب » .

• وأسأل رشاد مهنا : محاكمات الثورة هل كانت صورية .. هل كانت الاتهامات ملفقة
أو باطلة ؟

• « أضحكتني .. سأحكى لك عن محاكمتي أنا شخصياً .. أنا أول واحد أحوكت الساعة
٣,٣٠ صباحاً .. أنا كنت في سجن الأجانب » .

• متى يافتدم ؟

• « سنة ٥٢ جاء لى حمزة السيونى .. قال لى قوم يا عمى .. لأن علاقتي بحمزة السيونى مهنا
تقول عليه كان ربنا محنن قلبه على وكان يحترمنى .. ويوم جاء قال لى انتفضل روب علشان
فيه محاكمة النهارده فى قصر النيل .. فكرنى بأحمد عربى والجماعة دول .. قمت نوضأت
وصليت ورحت معاه قصر النيل .. بعد شوية دخلت فى أوضة صغيرة وبعدين ندهوا لى وقالوا
انتفضل .. دخلت السلام عليكم عليكم السلام وجدت كل بتوع الثورة موجودين .. ما فيش منهم
غائب غير أنور السادات ومحمد نجيب .. مسك زكريا محبى الدين زى ما تقول كان سكرتير
الجلسة .. وقال مش عارف إيه واتهاماتى أنا كانت دعوة إلى انقلاب بالقوة والألفاظ .. والسمات
القانونية إنما هى كده .. سكت انتفضل افعد .. قعدت .. جابوا الشاهد الأول .. سألوه عمل إيه
شغت إيه طلع إيه .. زكريا محبى الدين يقرأ ويقول له ده صح يقوم يقول له لأ .. لأول مرة
فى حياتى أشرفها .. طلع الشاهد الأول شاهد نفى وليس شاهد إثبات .. هاتوا الشاهد الثانى
برضه .. مش كده .. طلع ليس شاهد إثبات .. أنا معاه حنة ورقة صغيرة كنت فاهم إنى أقدر
أكتب ملاحظات علشان أدافع عن نفسى .. رفعت الجلسة .. كان رئيس الجلسة جمال
عبد الناصر .. شوية سمعت موسيقى كلاسيك من أوضة الجلسة » .

• مين كان من هواة الموسيقى ؟

• « مش عارف .. فضلت أسمع موسيقى زى ما هم بيستمعوا كتر خيرهم لأنهم لم يحوشوها ..
وبعدين انتفضل .. دخلت لاقيتهم جايين شاهداً .. الشاهد بيقلوا له إنت شغبت إيه أيام ما كنت
عنده وكنت تغطر معه وكان يتكلم عن الدستور .. أيامها كان رجال الثورة قالت إن كل حزب
أو كل جماعة عازية تشترك فى السياسة تعمل دستوراً جديداً .. وأنا بصفتى فى مجلس الوصاية
كنت بأخذ نسخة فكانت عندى نسخة من اللي عملوها الإخوان المسلمين زى أى واحد
وخلص .. ودى الإدانة .. وخلص انتهت المحاكمة على هذا الأساس » .

- وماذا كان الحكم ؟
- « الحكم ٢٥ سنة سجن تخفيفاً للإعدام ! » .
- وفى ١٠ ديسمبر سنة ٥٢ أعلن نجيب باسم الشعب سقوط دستور ١٩٢٣ ..
- وفى ١٨ يناير سنة ٥٣ حُلّت الأحزاب وصودرت أموالها .. وهكذا أغلق ملف الأحزاب لمدة ربع قرن ...
- ويقول محسن عبد الخالق : « كان الجيش قد تقدم للوفد وبعض الأحزاب بسؤال ملخصه ماذا تريدون لإعادة البرلمان ؟ وقبل هذا العرض بالرفض » .
- ويقول عبد المحسن أبو النور : « إحنّا الأول خالص الجيش ما كانش عنده تفكير إنه يحكم .. كان التفكير إنه حترجع الأحزاب تحكم تانى .. بعد ما تكون طهرت نفسها وبعدين بيتدوا يصلحوا فى الوضع السياسى والاقتصادى للبلد ولكن عرض عليهم قانون الإصلاح الزراعى .. رفضوه فكانت النتيجة إنه لا مفر من إن الجيش بيتدى يحكم .. وابتدا حل الأحزاب وابتدا ينفذ هذا القانون » .
- ويقول إبراهيم شكرى : « فى يوم ١٦ يناير سنة ٥٣ صدر قرار من مجلس الثورة بحل جميع الأحزاب .. لأنها شاركت فى فساد الحكم .. عند ذلك أقول إن هذا القرار لم يطبق على الإخوان المسلمين .. على اعتبار أنهم ليسوا حزباً إنما هم جماعة .. بينما التحليل الصحيح إنهم كانوا بالفعل لهم تنظيمهم .. ولهم أدواتهم .. ومن هنا وجد أنه لا بد من الفصل بين الأمرين .. ولا يؤخذ الأمر دفعة واحدة مع الكل .. وإن كان هذا جعل موقف الإخوان المسلمين يضعف شعبياً من حيث إنه إجراء اتخذ ضد الحريات قبلوا به .. ولكن بعد ذلك عندما أخذت ضدهم كثيراً من الإجراءات .. لم يجدوا صدقاً شعبياً يقف بجانبهم » .
- وأسأل الملكة ناريمان : كان إليه شعور الملك فاروق فى موضوع إلغاء الأحزاب ؟
- « لا ما أقدرش أتكلم وأقول عن فاروق .. أتكلم عن نفسى .. إلغاء الأحزاب كان المفروض طبعاً لأن الأحزاب لم تتعاون .. وأنا أحترم جداً النحاس باشا كان كبير فى السن وكذلك أحترم حرمة .. ومثى عارفة أقول إنهم خدعوا على باشا ماهر .. أظن إنهم خدعوه .. ومحمد نجيب اللى قالوا عليه الرئيس محمد نجيب .. يعنى ربما كان فيه تفكير .. وقال لهم إحنّا مش اقتصاديين ولا سياسيين .. قمنا بالمهمة وحصلناها لكم » .
- وهكذا امتلأت الأيام بصور التأييد وأشكال التغيير ...
- ويقول توفيق عبده إسماعيل : « بعد ٥ - ٦ شهور لما بدأت الخلافات على السطح بين عدد من داخل أعضاء مجلس الثورة وبين عدد من خارج أعضاء مجلس الثورة .. منهم أنا شخصياً .. بدأت خلافات كثيرة .. فبدأت علاقتى تبعد عما يدور داخل الجيش وداخل الثورة

إلى أن خرجت من الجيش خالصة في يونيو ٥٤ .. فاحتفظت بأوراقى وبعلاقتى بالناس ومتابعتى للأحداث .. وبعد الثورة اختلف الوضع تماماً .. عدد كبير مش من الضباط الأحرار اتضح أنه كان في التنظيم إنما لم يطلب منه المشاركة .. وأوكلت إليه مسئوليات بعد الثورة مسئوليات كبيرة مالهائش دعوة بمشاركته في السلاح .. في نفس الوقت المجموعة اللتي شاركت من الضباط الأحرار ليلة الثورة تصورت - وأنا منهم - كان سننا صغير يعنى حوالى ٣٠ سنة وأعضاء مجلس الثورة متوسط سنهم من ٣٠ - ٣٣ سنة وإحنا كلنا فى العشرينات .. فتصورنا إن إحنا أصحاب حق فى إملاء الرأى » .

• **ويقول محسن عبد الخالق :** « بعد ٥٢ دخل عبد الناصر ما يسميه الصراع على السلطة .. مقابل ومؤامرات ومناورات .. وده كان صراع على السلطة شديداً جداً » .

• **وأسأل خالد محبى الدين :** أعضاء مجلس قيادة الثورة فى البداية كان عملهم عملاً مشتركاً جماعياً ؟

• « طبعاً كلنا كنا بنكمل بعضينا .. سياسياً وعملياً .. وذلك لما كان المجلس متعاوناً مع بعضه ويكمل بعضه .. وكان الجو ماشى .. أول ما حصلت الخلافات حصل الانقسام والخروج .. فهم كانوا أول ما قامت الثورة يعملون .. بروح طيبة وكانوا يكملوا بعضهم » .

• **وأسأل كمال الدين حسين :** بمرور الوقت اختلفتم فى الآراء .. إلى أى مدى كانت هذه الاختلافات ؟

• « شوف هو وجود ١٣ بيتناقشوا فى موضوع معين لازم يحصل فيه خلافات فى الرأى .. وده موضوع طبيعى وبديهى .. وكان عزيز المصرى يقول لنا إيه يا أولاد اتخانقوا مع بعض واضربوا بعض .. ويعدين فى الآخر تستقروا على رأى .. هو ده اللتي تطلعوا به على الناس .. واولعوا توروا الناس أنكم مختلفين .. وكان بيحصل طبعاً مناقشة فى كل حاجة .. وكل واحد يقول رأيه تمام .. ويعدين بالتدريج .. الأيديولوجيات والأفكار عند بعض الناس تختلف ولكن فى الأول يمكن .. يعنى لم نختلف على حاجة أساسية .. كل الأحزاب انقلبت ضدنا وكل العالم الخارجى .. وللأسف العالم الداخلى معاها ضدنا .. ووصل الخلاف أشده فى مارس ٥٤ مع محمد نجيب » .

• **ويقول عبد اللطيف بغدادى :** « قامت الثورة وكانت القيادة جماعية .. كل موضوع بيناقش .. والمهم رأى الأغلبية .. وفضل مستمراً فترة طويلة من البداية .. وكانت تطلع القرارات مضبوطة مع الخلافات اللتي بتتوجد .. الخلافات فى الرأى .. جمال سالم كان عصبياً شوية .. وكان صلاح سالم كذلك .. لكن كان كلها فى الصالح .. لكن ما حصلش صراعات حول السلطة .. إلا فيما عدا موضوع محمد نجيب فيما بعد » .

• **ويقول أمين شاکر :** « والله عبد الناصر كان رجلاً يسعد جداً إنه أحد أفراد الشعب .. وكان يحترم الناس ويحبهم لأقصى حد .. وكان يكره أن يقع أى أذى على أى بنى آدم حتى لو كان

ألد أعدائه .. وكان يحب قوى يستمع لوجهات نظر الناس .. ولما تكلمه تلافيه يشجعك إنك تسترسل فى كلامك .. وكان يحكم على إني أحضر كل الاجتماعات .. وكان بعد الاجتماع يقول لى نقطة كذا عاوزك تتصل بفلان تستوضحها لى واكتب لى تقريراً .. هى دى الديمقراطية فى نظرى » .

● وإزداد القبول الشعبى لمجلس القيادة يوماً بعد يوم ..

● واحتفل الثوار بمرور ستة أشهر على نجاح الحركة ..

● وأنشئت هيئة التحرير فى يناير سنة ١٩٥٣ ..

● وأسأل أحمد طعيمة : ما الذى تذكره عن إنشاء هيئة التحرير ؟

● « بعد نجاح الثورة .. كان التنظيم كله عسكرياً بحتاً .. كله ضباط الجيش .. ولم يكن للثورة قاعدة شعبية .. أو حزب سياسى .. أو تجمع مدنى .. فكان ده نقصاً شديداً بتواجهه الثورة .. فكانت مفاجأة للشعب كله .. إن ضباط الثورة قاموا بالثورة لصالح الشعب .. إنما ما فيش تنظيم يضم مبادئ الثورة .. أو يحتضن مبادئ الثورة .. كان فى ذلك الوقت فيه أحزاب سياسية كثيرة .. وكان هناك إخوان أيضاً .. ويحل الأحزاب .. أصبح هناك فراغاً سياسياً .. الفراغ السياسى ده .. تصور الإخوان أنهم الورثة الحقيقيين لثورة ٢٣ يوليو .. وأنهم أصحاب الحق فى أن يكونوا ممثلين للثورة .. وأن الضباط قد أنهوا مهمتهم بنجاح ثورة ٢٣ يوليو .. وأن عليهم تسليم مقاليد الحكم للإخوان المسلمين .. باعتبار الإخوان المسلمين هم الحزب السياسى للثورة .. أو القاعدة الشعبية التى تعتمد عليها ثورة ٢٣ يوليو .. وطلبوا جمال عبد الناصر بأن ده الوضع اللئى يجب أن تسير فيه الأمور .. يمكن أهم اعتراض اعترضه جمال عبد الناصر على هذا الموضوع .. وده يمكن لم يذكر من قبل .. إن الشعب المصرى فيه أقباط كثيرين .. وهم جزء من الشعب المصرى لا يمكن تجاهله .. فإذا اعتبرت الثورة إن الإخوان هم الحزب الوحيد الموجود فى مصر واللى بيمثل ثورة ٢٣ يوليو .. إذن أين يذهب أقباط مصر ؟ ومن يريد منهم العمل السياسى وأن يكون له رأى فى تسيير دفة الأمور .. إلى أين يذهب .. هل ينضم للإخوان المسلمين ؟! هذا منطق غير مقبول لا شكلاً ولا موضوعاً .. فالرئيس جمال اقترح أنه يتعمل حزب أو هيئة .. تمثل مبادئ الثورة .. وفى هذه الحالة إذا أراد الإخوان أن ينضموا إلى هذا التنظيم .. فالأب مقترح لهم .. وإذا أراد قبطى أن ينضم إلى هذا التنظيم فالأب مقترح له .. وتبقى البلد كلها نسيج واحد .. وشعب واحد .. بتمثله « هيئة التحرير » .. اعترض الإخوان اعترضاً شديداً على هذا الموضوع .. واعتبروا أن ده قضاء على مستقبلهم مع ثورة ٢٣ يوليو .. وإن بهذا الشكل جمال عبد الناصر تخلص منهم نهائياً .. بقيام هيئة التحرير .. فى الواقع .. أى نجاح حققته هيئة التحرير .. لا يمكن أن ننسبه إلى هيئة التحرير .. أو لمن قاموا بهيئة التحرير .. وبالذات المؤسسين .. اللئى صدر بهم قرار التأسيس .. كان جمال عبد الناصر .. وصالح سالم والطحاوى وأنا .. كنا ٤ أو ٥ .. الخامس أنا مش متذكره .. النجاح الحقيقى جاء من معنى واحد .. أن الشعب المصرى بأجمعه .. كان منتظراً ثورة تخلصه مما كان يمانيه ..

هذه الثورة بمبادئها .. استقبلت استقبالا عظيماً من الشعب المصرى .. فأى واحد دخل أو انضم لهيئة التحرير .. هو فرحان بثورة ٢٣ يوليو .. ومش عارف ينضم لها إزاي .. هيئة التحرير فتحت له الباب أنه يكون أحد أعضاء ثورة ٢٣ يوليو .. وده سبب النجاح الحقيقى لهيئة التحرير » .

• ويقول أمين شاكى : « الواقع إحنا لما عملنا الثورة .. حسينا بتعاطف وتأييد من الغالبية العظمى من الشعب .. ولكن السياسة تحتاج دائماً ممن يتولى الحكم والإدارة أن يبقى له قاعدة شعبية .. القاعدة الشعبية دى كانت على مدى السنوات الطويلة .. من نهاية الحرب العالمية الثانية أو الأولى .. حتى سنة ٥٢ كانت الأحزاب السياسية هى الموجودة .. وبعدين جاء الإخوان المسلمين .. وبقي لهم قواعد ممتدة إلى القرية والكفر والنجع .. وبعدين جم الشيوعيين .. وكما تعلم كانوا بيتغلغلوا وبيتدخلوا فى مراكز حساسة كثيرة جداً .. إحنا ما كناش لنا قاعدة شعبية .. فكرنا أن نعمل قاعدة شعبية .. « هيئة التحرير » .. وكانت تجارب مش ناجحة .. والناس بقت تتساءل الثورة دى حتعمل إيه .. أهدافها إيه .. ومافيش إجابة .. فقلت لعبد الناصر .. لازم نقول للناس الثورة دى قامت ليه وعازوه تعمل إيه .. إحنا حسينا أن إحنا قاعدين على الهواء ومافيش تحتنا قاعدة شعبية .. نحركها وقت اللزوم .. وعبد الناصر فكر فى تكوين حزب .. وأقدر أقول إن جزءاً كبيراً من مجلس قيادة الثورة وافق على هذا الرأى .. ولكن هذه العملية كانت Long Term لأن الحزب حيعمل إيه ؟ وحيتم اختيار أفراد إزاي ؟ ومن سيتولى أمره ؟ وما مدى العلاقة بينه وبين مجلس قيادة الثورة ؟ وطبيعة هذه العلاقة ؟ كل دى حاجات كان لازم تُدرس وتأخذ وقتاً طويلاً جداً .. وده اللي خلى محمد نجيب قدم نفسه للناس أنه عاوز يعمل حزباً .. أو يعيد الأحزاب اللي كانت موجودة قبل الثورة .. ويقود البرلمان .. والديمقراطية .. مع إن دى كانت فقرة إلى الخلف .. دى معناها أنك ترجع الأحزاب بالوضع اللي كانت عليه قبل سقوط فاروق .. كانت حترجع زى ما هى .. يعنى كنت لما حتعمل انتخابات .. كان الوفد طبعاً حيكسح هذه الانتخابات .. مش عاوزة أى شك .. واللى حيشكل الحكومة رئيس الوفد والوزارة من أعضاء الوفد .. أنا ما عنديش شىء ضد الوفد .. لكن الأحزاب السياسية فى عهد فاروق .. انحرفت .. وكان جزء كبيراً من جهدها يتجه لإرضاء الملك على حساب الشعب .. وده اللي كنا عاوزين نمنعه .. لأن الملك كان له اتصال بالسفارة البريطانية .. وكانت السفارة بتشغله « بالزميلك » زى ما يقولوا » .

• ويقول أحمد أبو الفتح : « عادت الرقابة على الصحف يوم ٢٨ من يناير عام ١٩٥٣ .. كانت أوامر جمال تقضى بالآ يعترض على نشر أى مقال أكتبه بتوقيعى .. وكثيراً ما كان يختصنى بأخبار هامة .. فلما اندفعت أعارض اتجاهه إلى الحكم العسكرى .. بدأت المضايقات » .

• وصدر فيما بعد كتاب « فلسفة الثورة » ...

• وكانت الثورة قد حاولت إرضاء الإخوان ولم تطبق على جماعتهم قانون حل الأحزاب ...

* **ويقول أمين شاكر :** « الإخوان المسلمين .. قُل فيهم ما تثبت .. ولكنهم تنظيم سياسى منظم .. وببتميز عن التنظيمات الشيوعية .. والتنظيمات السياسية الأخرى .. لأنهم مدرسين إلزاميين و .. و .. إلح .. إنهم واصلين للكفور والتجوع .. إلى آخر البلد فأى حاجة عاوزين يوصلوها للناس .. الناس بتوعهم يقدرُوا يوصلوها لنهاية النهاية .. أنا كنت أعرف سعد الهضيبى .. بنت الهضيبى .. فقلت لها أنا عاوز أقابل أبوكى .. علشان خاطر أنا عاوز أدعيه يجى يقابل سيادة الرئيس عبد الناصر .. فعملت لى ميعدا معه .. ورحت وأحضرتة فى عربيتى .. وقدمته إلى عبد الناصر .. واتفق فى هذا الاجتماع .. إن الإخوان المسلمين يعتبروا أنفسهم القاعدة الشعبية للثورة » .

● **وبدأ الإخوان يقفون موقف الخصومة من الثورة .. وفصلوا الباقورى من جماعتهم لقبوله منصب الوزارة ...**

* **ويقول جمال حماد :** « طالب الإخوان بأن يكون صوتهم مسموعاً .. ويوم أن ألف محمد نجيب الوزارة كان بها بعض رموز الإخوان .. ومنهم أحمد حسن الباقورى .. عاد الإخوان ورشحوا بعض من لم تقبلهم الثورة » .

* **وأسأل أحمد كامل : ماذا تقول لنا عن الثورة والإخوان المسلمين ؟**

* « الإخوان المسلمين فى الحقيقة .. فى بدء الثورة .. كانوا من أعظم المؤيدين للثورة .. وبعد فترة من الفترات .. أرادوا أن يكونوا هم المسيطرين على الثورة .. وهذا لم يكن ممكناً » .

* **وأسأل فريد عبد الخالق : تفكر أصل الحكاية إيه ؟**

* « والله ده سؤال كبير ومهم .. وأنا لا أخفى عنك أننى فى أوائل ٥٤ .. اعتقلت كما اعتقل الكثيرون من القيادات .. والسؤال ده الذى تفضلت به .. سؤال يطرح نفسه .. لدرجة الذى حفقوا معى .. قالوا لى بصراحة إحنا ضباط فى الثورة .. بس لازال عندنا غموض فى الحنة دى .. فى الأول كنتم حبايب قوى .. وبعدين مرة واحدة .. تطورت الأمور ١٨٠ درجة .. إيه الحكاية دى ؟ بيقال لنا كلام بس مش مقنع بينى وبينك .. وعلشان تطمئن إنها رغبة خالصة .. إحنا حنقفل التحقيق وخلينا إحنا نفهم .. فالسؤال مش بس النهارده .. من سنة ٥٤ .. وعلشان أخط النقط فوق الحروف .. وباختصار ويكون فيه كلام مقنع وواضح .. أقول الحقيقة .. إن الاتفاق بين جمال وبين الإخوان .. فيما يتعلق بالارتباط بالمبادئ بتاعة الإسلام ما كانش واضحاً وضوحاً كافياً الحقيقة .. ولذلك لما حصلت الثورة .. وقربنا .. كان فيه ضباط أحرار وفيه ضباط إخوان .. هو بدأ يقول فكره وأعلنها للإخوان وقال بصراحة أنا أرى أن من المصلحة .. ألا توصف الحركة بأنها إسلامية .. أو تبع الإخوان .. لأن ده حسيب لها منفصات من الخارج .. وقد يكون من الداخل .. لأن البلد فيها انتماءات فكرية .. والخارج له نظرة معينة .. إنما كان بدأ يتعامل لأمر ما مع الضباط الذى هم من الإخوان أصلاً .. فهو كان أول صلته العملية بعبد الرحمن السندى ومن معه فى النظام الخاص .. توطدت الصلة لدرجة أنه بايع الإخوان

فيبدأ يحصل زى ما تقول طباع فى مسلكه وفكره .. قال إنه مش لازم الارتباط ومسلكه أنه بدأ يجنب الإخوان .. فعلاً عبد المنعم عبد الرؤوف .. وهو أقدم منه .. وكذلك أبو المكارم عبد الحى .. نحامنا وأخرجهما من التنظيم .. فدى كانت علامة بداية الشرخ .. وبدأ يتسع وحصل الخلاف .. ودى نقط مهمة .. ليه حصل الخلاف ؟ لأن استكمال الصورة يستدعى مزيداً من البيان علشان يفسر المسألة دى .. لأن المسألة لها ما بعدها وعملت صداماً .. ولذلك للأسف هو الناس فى السلطة يظهر غصب عنهم حتى مع حسن النية يظهر السلطة لها مؤثرات قد لا يعرفها المحكوم إلا إنها بتوصله إلى أشياء محل نظر .. تجد الظاهرة دى مع محمد نجيب .. بهذا القدر وهذه المكانة دخل السجن .. ورشاد مهنا دخل السجن .. عبد الحكيم عامر بهذا القرب حصل له ما حصل .. فدى ظاهرة .. مش بس الإخوان .. بما يدل على أن فيه سبب ثانى كمان .. يتعلق بشخص عبد الناصر نفسه ومنهجه » .

• **ويقول مأمون الهضيبى :** « الخلاف بدأ بعد الثورة بفترة .. وده الشئ الذى كان منظرأ .. أن هو مادامت ثورة .. وبيقولوا وضعنا رؤوسنا على أيدينا .. مش حيسيوها لغيرهم .. وبعد فترة .. هو تخلص من باقى الأحزاب وبقى أمامه حركة قوية موجودة .. لا يريد لها أن تشاركه فى الوجود .. هى مادامت موجودة .. حاجة من اثنين .. إما تبقى تهمل .. وإما تشارك .. لتتخذ موقفاً معارضاً وتنتقد .. يا إما تشارك .. فهو مش عاوزها خالص » .

• **بينما يقول أبو الفضل الجيزاوى :** « للأسف الإخوان .. عيهم الأساسى أنهم لا يعترفوا بأى قيادة أخرى غير قيادتهم الذاتية .. ولهم مخطط .. ولهم منهج هم بيرسموه .. فكان من المستحيل أن يتفقوا مع عبد الناصر فى مخططة .. وبصفة خاصة إحتاكان لنا بمبادئ واضحة ٦ .. كانت بعيدة عن الدين إلى حد ما .. لأنه ما كانش فى صميم الدين .. الإخوان عاوزين كل حاجة دينية صرف .. فاختلفنا معهم .. على أساس أنهم حاولوا يخلوننا نمشى فى طريقهم .. فكان مستحيلاً » .

• **وقام عدد من ضباط المدفعية بالدعوة إلى أن يتم تمثيل الضباط فى مجلس القيادة بالانتخابات ، وأدى ذلك إلى اعتقال عدد منهم فى ١٥ يناير سنة ٥٣ ...**

• **ويقول عبد المنعم أمين :** « طلبت صورة من التحقيقات التى أجريت مع الضباط المقبوض عليهم .. وقال لى عبد الناصر إن زكريا محبى الدين سيسلمها لك .. ولكن زكريا تجاهل الطلب .. وترزع صلاح سالم حملة هجوم على .. ثم وجه لى زكريا وجمال سالم عبارات عنيفة » .

• **ويقول جمال اللبثى :** « كانت الأعصاب متوترة .. ده رأى الشخصى ما أعرش الحقيقة إيه .. فأى حركة فيها نوع من التذمر وأى حركة فيها اعتراض كانت بتتخذ بمعانى أخرى وإن حقيقى فيه اعتقالات .. وإن حقيقى فيه ثورة مضادة .. إلخ .. أدى كل الحكاية .. فقامت الثورة وكل الحاجات اللى حصلت كانت « زوبعة فى فئجان » .. أنا متصور كده .. أعتقد إن مافيش حركة

مدفعية ولا فيه حاجة .. كانت عملية أعصاب مشدودة .. يعنى محسن عبد الخالق جيعمل انقلاب ضد عبد الناصر وهو أخوه .. صديقه .. مش ممكن .. العملية كلها عملية تأمين للثورة .. والأعصاب مشدودة ومتوترة .. وما حنش متحمل يسمع كلمة فيها اعتراض ولا معارضة ولا كلمة نقد ..

* هل لذلك وزع الضباط وعادوا إلى ثكناتهم العسكرية .. أو أبعدوا خالص من الجيش ؟

* « يعنى ما حنش ابتعد .. هو فيه ناس طلبت إنها ترجع الجيش .. وعادوا وقعدوا فى الجيش لغاية ما طلعوا معاش طبيعى .. وفيه ناس انتقلوا .. يعنى لو عاوزين بيعتوا ناس فى حنة معينة .. محتاجة واحد يكون مخلصاً ومن التنظيم بيعتوه » .

* ويقول خالد محبى الدين : « عندما بدأ زكريا محبى الدين التحقيق مع سامى شرف فى قضية المدفعية اكتشف أنه بإمكانه أن يتحول إلى « شاهد ملك » .. فأبلى باعتراقات عديدة .. وبعد ذلك عُين فى مكتب زكريا .. ثم نُقل بعدها إلى مكتب عبد الناصر » .

* ويقول جمال حماد : « أثار ضباط المدفعية موضوع الشائعات عن علاقة صلاح سالم بالأميرة فائزة شقيقة الملك فاروق ومساعدتها لإخراج مجوهراتها .. ونتيجة لانفضاح العلاقة بهذا الشكل أصدر مجلس القيادة قراراً بإخراجها من مصر فى ٢٤ ساعة » .

* ويقول أحمد أبو الفتح : « سمعت أن أحد الأثرياء الأجانب المقيمين بالقاهرة كان قد دعى إلى حفل حضرته الأميرة فائزة .. وحضره صلاح سالم مع عدد من زملائه الضباط الأحرار .. وحدثت على ما يبدو مشادة انتهت بأن فذفت الأميرة ما فى كوبها فى وجه صلاح سالم .. ولا أعرف عن مدى صحة علاقاتهما شيئاً » .

* ويقول محسن عبد الخالق : « كلمة الضباط الأحرار أو حركة الضباط الأحرار الذى أطلقه مجموعة السوارى التى كانت تقوم بطبع المنشورات .. فمجموعة السوارى هى التى كانت تطبع المنشورات وتوزعها وهى التى كانت تكتب المنشورات .. وده كان اتفاقاً فيما بيننا وهى التى أطلقت اسم « الضباط الأحرار » .. وهذا الاسم اللى أطلقه جمال منصور وزملاؤه اللى هو مصطفى نصير وعبد الحميد كفاوى .. هذا هو الاسم واستمرينا نجند الضباط إلى ٥٢ » .

* هل كان عبد الناصر يتخلص من أعوانه وشركائه واحداً بعد الآخر ؟

* « ده صحيح .. ولكن أخذت فترة .. وبدأت بعد قيام الثورة بشهر إنه تخلص من مجموعة قادة الفرسان جمال منصور .. لأنهم اجتمعوا وناقشوا تصرفات مجلس الثورة وقالوا مقولة معروفة « إحنا ما شيلناش الملك نجيب ١٤ ملك » اللى هو لما كان محمد نجيب رئيساً للوزراء .. وإحنا بنتكلم نكر عبد الناصر كلمة عنوية ولكن يقصدها قال لى « إنت مثلاً لما تخش على لا تستأذن ومش ممكن أقدر أطلب منك إنك تستأذن ولما بتخش بتقعد .. ما أتصورش إنك تقف وأقول لك أقعد .. لما فلان بيخش علشان يخش لى لازم يدى تليفون ويستأذن السكرتير وما يقعدش

إلا لما أقول له .. فابتدا هو يحس بعدم راحة مع وجود شركائه فى الحركة الوطنية .. هو عاوز يقول عاوز يتبجح لما يكون قاعداً مثلاً ويقول أنشأت الضباط الأحرار وعملت كذا .. وأنا موجود .. سيجد حرجاً فى إنه يقول مثل هذه الأشياء .

• بينما يقول توفيق عبده (إسماعيل) : بدأ هناك صراع .. ظهرت فكرة فى ديسمبر سنة ٥٢ .. إن ليه ما نعملش انتخابات .. وليه ما نبقاش انتخابات النادى ومجلس إدارة النادى .. وهو ممثل الضباط .. فتحدى كمال الدين حسين إخواننا فى سلاح المدفعية فى هذه الفكرة .. وقال نقعد ونتفق مين يمثلنا .. وهو رشح نفسه .. فانهزموا هزيمة نكراء .. وكسب ٣ من المجموعة الأخرى الللى كانت بتناوىء كمال حسين وصلاح سالم .. ويتجادل فى وضعهم إنهم ينويوا عن سلاح المدفعية .. وكان مقررأ إن يوم ١٤ يناير سنة ٥٣ .. يبقى فيه انتخابات لنادى الضباط .. كمال الدين حسين طلب انعقاد مجلس قيادة الثورة .. وتقرر اعتقال حوالى ٤٥ ضابطاً من سلاح المدفعية ومعاهم رشاد منها .. ومجموعات من الإخوان .. ومعاهم مجموعات أخرى من الضباط الأحرار .. ومن الضباط المشاركين فى الوفد وخلافه .. مجموعات كبيرة اعتقلت فى ذلك اليوم .

• نقدر نقول تحت عنوان صراع على السلطة ؟

• فى اعتقادى كان صراعاً على السلطة .. يعنى صراع على القرار والمشاركة .. لأنه كانت الرغبة أن ننتخب أعضاء مجلس قيادة الثورة وده كان سلاح المدفعية بس .. أنا كان لى اتصال بهم .. فلما اعتقلوا .. أنا والضباط الللى معاى قررنا أن نحتج على اعتقالهم .. وأعلنا احتجاجنا لثروت عكاشة .. كان يوم جمعة .. وقلنا له إحنا بنحتج على هذا الاعتقال .. وده أمر غير طبيعى .. دول مجموعة كبيرة منهم من الضباط الأحرار .. ولا يصح أن يعتقلوا .. المفروض يتحاكموا ويتحقق معاهم .. تحقيقاً سليماً بالنظام العسكرى .. فهو اعتبر لما أبلغ بهذا الكلام .. اعتبر إن إحنا عندنا استعداد للتمرد .. فأثر أن يبلغ .. وكان التبليغ للأسف الشديد نتيجته اعتقالنا أنا وحسن المنهورى وكان له أخ أكبر منه فى سلاح آخر .. بينكلم كثير .. وأتصور إن لنا علاقة به .. وإحنا اعتقلنا .. وحقق معاى .. الأخ الأكبر حُكم عليه بالإعدام .. وحسن المنهورى حُكم عليه بـ ٥ سنوات سجن وأنا طلعت براءة .. إنما أبعدت عن سلاح الفرسان فى ٢٦ يناير ٥٣ .

• واعتقل الإخوان المنهوى ...

• وأسأل حسن المنهوى : كان لكما موقعة شهيرة جداً .. وأخوك الذى لم يشترك مع الضباط الأحرار وقت قيام الثورة .. حكم عليه بالإعدام .. لماذا ؟

• بالفعل حسنى لم يشترك فى الثورة .. إنما كان على علم .. إنت عارف إحنا إثنين إخوان .. فدائماً ما بيقاش فيه اثنان مشتركان فى عمل واحد أبداً .

* باستثناء صلاح وجمال سالم ؟

* « والله ده كان وضعاً غريباً شوية .. مش عاوز أخوض فيه .. لأنى لا أعتبر جمال سالم مشتركاً فى الثورة .. كان فين جمال سالم ؟ كان فى العريش .. كان على بال ما وصل الوحدة بتاعته .. الساعة ١١ - ١٢ بالليل .. يعنى أنا ما سمعتش عنه الحقيقة .. إنما .. إنت عارف بعد قيام الثورة ابتدت المسائل تأخذ شكلاً آخر .. اتجاه ديكتاتورى من الأول خالص .. يعنى الثورة قامت لتحقيق عدالة اجتماعية .. لتحقيق الديمقراطية .. حكم الشعب بالشعب وللشعب .. إنما المسألة ابتدت تأخذ اتجاه تانى .. أول حاجة اتعملت كان نادى الضباط .. ده بالانتخاب .. طول عمره بنسمع عليه بالانتخاب .. فكان مغرضاً لتحصل انتخابات نادى الضباط فى ديسمبر ٥٢ .. طبعاً الانتخابات دى ألغيت .. لأن إحنا كنا بننادى ونسأل مين اللي جاب أعضاء مجلس الثورة دول .. هل هم الضباط اللي قاموا بالثورة .. هم اللي جابوا أعضاء مجلس الثورة دول بالانتخاب .. بأى حق أن الناس دى أصبحت هى قيادة الثورة .. وما كانواش مسميين أنفسهم كده .. فلحنا نادينا بأن يكون هناك مجموعة من الضباط بالانتخاب تساند القيادة فى عملها وتمنعها من الشطط .. نادينا بهذه الفكرة وقلنا لازم يكون فيه ضباط منتخبين .. بقوا بجانب القيادة اللي موجودة .. فطبعاً الكلام ده لم يعجب القيادة العامة .. وابتدت فى نقل بعض الضباط .. وحصل موضوع المدفعية .. كان فيه اتصال مع الجماعة بتوع المدفعية عن طريق محبى الخولى .. على أساس الفكرة بتاعة الانتخاب .. وبعدين جم حبوا يتخلصوا من الضباط اللي ساعدوهم فى الثورة .. فقبضوا على بتوع المدفعية .. ولما قبضوا عليهم حصل أنه ابتدا تحرك فى الفرسان على أساس أن إحنا نحاول نقف أمام القيادة .. ونحاول نشوف حل لبتوع المدفعية .. فقبضوا علينا .. أقصد القيادة .. فى يناير » .

* هل كان الرئيس محمد نجيب مسئولاً فى هذه الفترة ؟

* « الرئيس محمد نجيب كان قائداً عاماً للقوات المسلحة .. والرئيس عبد الناصر ما كانش لسه ظهر » .

* إذن ما كانش واحد منهما مسئولاً .. لا محمد نجيب ولا عبد الناصر ؟

* « هى أوامر بتصدر من القيادة .. والقيادة مين ؟ القيادة محمد نجيب وعبد الناصر وصلاح سالم وزكريا محبى الدين وحسين الشافعى وخالد محبى الدين .. هم دول أعضاء القيادة » .

* وحصل إيه بالذات لآل الدمنهورى ؟

* « حصل أن صدرت أوامر بالقبض علينا .. أنا فى حوالى الساعة ٣ - ٤ الصبح .. وأخويا .. فى نفس الساعة تقريباً .. وحصل مجلس تحقيق .. ده يوم ١٧ يناير ٥٣ .. بعد القبض على رشاد مهنا وجماعة المدفعية فى ١٥ يناير أو ١٤ يناير .. وقبض على جماعة المدفعية .. وحصل التحقيق فى تكناات قصر النيل .. كان موجوداً صلاح سالم وزكريا محبى الدين وعبد اللطيف بغدادى وحسن إبراهيم وعبد الحكيم عامر » .

• وصدر الحكم بناء على التحقيق ؟

• « لأ .. التحقيق استمر لوقت طويل .. من ٥ صباحاً إلى يمكن بعد الظهر .. وبعدين انتقلنا إلى القيادة العامة للقوات المسلحة في كوبرى القبة .. حوالى الساعة ٢ - ٣ بالليل .. كانت المحكمة برئاسة جمال عبد الناصر وعضوية جميع أعضاء مجلس الثورة فيما عدا .. عبد المنعم أمين .. ويوسف منصور صديق .. والرئيس أنور السادات » .

• ليه الثلاثة دول ما كانوا موجودين ؟

• « الثلاثة دول .. عبد المنعم أمين ويوسف منصور صديق كانوا أبعدا عن مجلس الثورة .. والرئيس أنور السادات الحقيقة ما أعرفش ليه السبب ما كانوا موجوداً .. وصدر الحكم .. مافيش أغلبية ولا إجماع .. المحاكمة ما أخذت من ١٠ - ١٥ دقيقة .. وجميع أعضاء المجلس ما عدا الـ ٣ المذكورين كانوا موجودين .. وفيما عدا محمد نجيب أيضاً ما كانوا موجوداً » .

• ونص الحكم كان إيه ؟

• « الإعدام على محمد حسنى المنهورى .. والليمان لليوزباشى حسن المنهورى » .

• « ويقول أحمد حمروش : « كان هذا هو أول حكم بالإعدام يصدر على ضباط فى الجيش المصرى بتهمة أخرى غير الخيانة العظمى .. وقد رفض نجيب التصديق على الحكم وقال : « إننى لا أريد أن أمضى فى طريق مفروش بدماء الزملاء من الضباط » » .

• « ويعود محسن عبد الخالق فيقول : « بداية الخلاف إن الثورة لها مبادئ .. إنها ٦ مبادئ .. القضاء على الاستعمار .. تنظيم رأس المال .. الإصلاح الزراعى .. العدالة الاجتماعية .. الديمقراطية .. وهنا أتت مسألة الديمقراطية .. التصرفات اللى تلت سنة ٥٢ لا تتم عن الديمقراطية .. تصرفات تقودنا إلى الديكتاتورية .. وقد ناقشت عبد الناصر مناقشات طويلة بحضور ضباط المدفعية .. لابد من تحديد واضح لعودة الديمقراطية .. نقول إن فيه سنة مرحلة انتقالية .. لإصدار التشريعات الأساسية .. سنة سنتين ثلاثة لكن لابد أن يكون هناك ما يطمئنا وما يضمن لنا عودة الديمقراطية .. وهنا نشأ ما نسميه بمشروع المدفعية لتنظيم الحياة بعد ٥٢ » .

• « ويضيف محسن عبد الخالق : « المدفعية والفرسان متجاوبين .. يوم أنا ما اعتقلت اجتمع ٥٠٠ ضابط مدفعية .. لماذا اعتقل محسن عبد الخالق ؟ .. ومحسن عبد الخالق يحمل نجمة فؤاد العسكرية وحياء القائد العام عندما انتهت الحرب .. يعنى مش ح أقول تواضعاً .. أنا كنت بطل حرب فلسطين » .

• محاكمته كان مين اللى بيرأسها ؟

• « مجلس الثورة بكامله برئاسة جمال عبد الناصر اللى ما قدرش بيض لى .. والسؤال اللى سأله

هل أنا كنت مشتركاً معهم ولا لأ .. قلنا له إنا أكبر من إنك تشترك معنا .. إنا مش مستعدين نأخذ توجيهات من أحد .. لأن مجلس الثورة كان يتهمه أنه مشترك معنا فى حركتنا .. أنا ذكرت مشروع المدفعية .. هذا المشروع الذى كان مثار الخلاف ومثار المحاكمة .. مجلس الثورة يكون من ٥ .. طب ليه ٥ .. مندوب عن سلاح المدفعية .. وممثل عن سلاح الفرسان .. ممثل عن سلاح المشاة وهو عبد الحكيم عامر .. والطيران .. وجمال عبد الناصر الخامس .. وعلى مجلس الثورة الـ ١٤ .. يفتخب الخمسة من بينهم .. وحتى لا يتحول مجلس الثورة إلى ديكتاتورية .. لابد أن يكون جمعية وطنية مؤقتة .. لفترة انتقال .. تتكون نصفها من الضباط الأحرار الذين قاموا بالثورة حتى يكونوا قوة والنصف الآخر من الوطنيين الذين لا خلاف عليهم .. يحصل توازن .. محمد نجيب رئيساً للجمهورية ويتولى شئون المراسم .. مجلس الثورة يضمن أن الحكومة بتطبق المبادئ الستة .. حكومة وطنية مدنية تتكون من اثنين من الحزب الوطنى أو أكثر .. اثنين من حزب الوفد يمثل القوة الوطنية الحزبية .. اثنين من الإخوان .. والباقي من الشخصيات المصرية التى لا خلاف عليها .. ده كان المشروع الللى قدم والذى يحدد سلطات مجلس قيادة الثورة .. الللى برزت بعد كده إنها سلطات مطلقة .. وقادتنا إلى الشمولية .. وإلى كارثة ٦٧ .. وعيننى جمال عبد الناصر سكرتير الحكومة المشتركة .. وقال لى أنت نمره ١٥ بعد ١٤ .. قلت له المسألة مش ١٥ و ١٤ المسألة إن هناك مبادئ لابد أن نحافظ عليها .. إنا طالبنا بالديموقراطية .. وكل واحد ابتدا يأخذ من نفسه سلطة مطلقة .. وقادة السوارى تخلص منهم .. المدفعية قلقت وانزعجت لهذا الإجراء .. وبدأ التخلص من اليوم الأول منذ الشهر الأول .. ولكن حسب تطور الأحداث .. فى سنة ٥٣ أصبحت المدفعية تشكل خطورة كبيرة .. فتخلص من المدفعية فى ضربة ٥٣ .. وقال لى فيما بعد إن لازم كنت أعمل كده علشان أسكت الجيش .. يبقى ما كانش فيه مؤامرة .. دى اختراعات جهاز المخابرات .. يقدر على أى حاجة .. ولكن .. لإسكات صوت الجيش .. بعد كده جمال عبد الناصر قالها لى شخصياً عندما خرجت من السجن .. كنت فى مكتبه مسئولاً عن النواحي السياسية .. لأن كان فيه أكثر من مدير مكتب .. فكنت أنا مديراً للمكتب للنواحي السياسية » .

• إذن كان اصطلاح معاك ؟

• « ما هو بعث لى وأنا فى السجن .. قال الثورة ستنتهى .. ووافقنا على آرائكم الللى إنتم قلنا عليها إنا موافقين » .

• وهل أخذت تخفيف حكم ؟

• « أخذت تخفيف حكم .. هو أصلاً ما رضيش بعضى .. انزعج جداً من الحكم بالإعدام .. أخذت ١٥ سنة .. وصلنا إن هو لما خرجت بعث لى .. لأن كان الجيش فيه ثورة .. وقال لى إن الثورة بتنتهى .. واختياره لخالد محيى الدين أعطى للمدفعية إن هناك طعم ولون أحمر فى الأزمة بتاعة ٥٤ .. ودى كانت حركة ذكية منه جداً .. يعنى أمام المدفعية .. خالد محيى الدين صواباً

أر خطأ .. أعطى الشكل الأحمر في ذلك الوقت .. فإذن دى حركة حمراء .. المهم رجعت وأخذنى من إيدى فى المكتب » .

• **ويقول فتح الله رفعت :** « سنة ٥٣ يعنى إحنا كنا كضباط ليس لنا فى السياسة .. غير إن البلد كانت حالتها وحشة جداً .. وبعدين أردنا برضه نظام الديمقراطية اللي بينادوا به دلوقتى بعد ٤٠ و ٤٥ سنة .. إحنا سنة ٥٣ أول من صمم على أن الديمقراطية لازم تمارس .. أخذنا الصدام الأول .. وحتى أنا فى التحقيق قلت لهم .. إزاي مؤامرة .. دى لا تتعمل « جهجاهون » كده .. تتعمل سراً .. إنتم معتقلينا لأن بيقولوا إن إحنا عاوزين نعمل ثورة مضادة !! » .

• **مين اللي كان معتلكم ؟**

• **جمال عبد الناصر طبعاً ..** رغم وجود الرئيس محمد نجيب .. كان لسه ما بقاش رئيس جمهورية .. ورئيس مجلس قيادة الثورة هو جمال عبد الناصر .. والحق يقال .. « ولا نكتموا الشهادة » .. جمال عبد الناصر هو المنظم للثورة .. وهو المفجر للثورة لا شك فى ذلك » .

• **وبعد ما اعتقلت ؟**

• **« بعد ما اعتقلت اتحاكمت » .**

• **كان الحكم إيه ؟**

• **« بعد ما رشاد مهنا أخذ إعداماً .. ومحسن أخذ ١٥ سنة وهكذا بقية الأفراد الذين كانوا معتقلين معنا أخذوا .. اللى ٧ سنوات واللى ١٠ سنوات واللى كذا .. أما اليزباشى فتح الله رفعت تأجلت المحاكمة لحين أن يشفى من مرضه .. أنا كنت فى زنزانة .. كان فى السجن بتاع الأجانب اللي عند المحطة .. وكان أحمد أنور قائدًا لسجن الأجانب .. قمت الصبح لقيت دم من معدنى نصف الأوضة .. كتبت لذكريا محبى الدين على ما أتذكر أنه يحولنى إلى المستشفى العسكرى » .**

• **ويقول أحمد أبو الفتح :** « كان الشيوعيون يقفون موقف العداء من حركة الجيش .. وكانوا يعتقدون أنهم عن طريق أحمد فؤاد وخالد محبى الدين وبعض الضباط الشيوعيين سيستطيعون السيطرة على الحركة .. فلما اتضح لهم عكس ذلك .. كانوا فى مقدمة من هاجموا الحركة فى منشورات سرية .. وبدأوا الهجوم خلال سبتمبر وأصدروا أول منشور لهم ضد الحركة وضد زيارات محمد نجيب للأقاليم وكان عنوان المنشور « رحلة البهلوان فى آخر الزمان » » .

• **وترك يوسف صديق مجلس القيادة .. وأبعد إلى أسوان .. فكان ثاني المبعدين بعد عبد المنعم أمين ..**

• **ويقول أحمد أبو الفتح :** « أصبح يوسف صديق سوكة فى حلق جمال عبد الناصر يثير له المتاعب كل يوم .. فما كان من عبد الناصر إلا أن وضعه تحت المراقبة الشديدة » .

- * وأسأل أمين شاكِر : لماذا ترك يوسف صديق منصبه فى مجلس قيادة الثورة ؟
- * « يوسف صديق ترك لأن برضه مراته الله يرحمها بقى .. كانت شيوعية متطرفة » .
- * وهو ألم يكن كذلك ؟
- * « هو كان يسارياً .. لكن ما كانش شيوعياً عميلاً .. وكان تفكيره إن إحنا ما نتعاونش مع الإخوان المسلمين .. نتعامل مع الشيوعيين .. وهنا نشأ الخلاف اللي كان من الصعب جداً أن تجد حلاً له فى بداية الثورة » .
- * ويقول رشاد مهنا : « قامت الثورة كلها على أكتاف يوسف منصور .. كل الثورة دى .. وأول واحد أبعد بعدى كان يوسف صديق منصور .. اللي قامت على أكتافه الثورة لأن هو جاء ودخل القيادة وغلط .. ربنا له فى ذلك حكمة .. جاء قبل الميعاد بساعة وغلط فى الطريق » .
- * ومن الذى أبعدوه ؟
- * « جمال عبد الناصر الذى أبعد الكل .. مش يوسف صديق ومش رشاد مهنا فقط » .
- * ويقول جمال حماد : « علل عبد المنعم أمين الحملة الشرسة التى شنت ضده بأنها من تدبير عبد الناصر شخصياً .. فقد كان يريد التخلص منه بسبب ما يتمتع به من شعبية بين ضباط المدفعية .. كما إنه لم يغفر له أبداً إنه أرسل عدة إشارات لاستدعاء رشاد مهنا من العرش إلى القاهرة بدون علمه » .
- * ويقول خالد محبى الدين : « عبد المنعم أمين لاحظنا علاقته الوثيقة بالأمريكان .. وثارت أقاويل عن ثروة زوجته التى كسبت كثيراً من البورصة .. وكان لا يخفى عداءه للعمال » .
- * وأسأل عبد المنعم أمين : لماذا تركت .. ويمكن كنت أول الذين بعدوا ؟
- * « أنا خالفت نصيحة « سل عن الرفيق قبل الطريق » .. وعن الجار قبل الدار » .. أنا لم أعرف الناس دول للأسف .. لو كنت عرفتهم قبل كده ما كنتش انضمت لهم ولا وضعت إيدى فى إيدهم .. لكن أنا من أول يوم حسيت باني أنا راجل متداخل زى ما أكون جاي أنتهز فرصة علشان آخذ حاجة .. شعرت بشعور غريب .. إني أنا غريب فى وسطهم .. أنا طبعاً أقدم منهم كلهم ما عدا محمد نجيب .. وأكاد أعرف واحد أو اثنين فيهم .. لما حسيت بهذا الشعور وحسيت إن ليس هناك ألفة بينهم وبينى قلت لهم فى أكتوبر يا جماعة أنا عاوز أستقيل .. جمال عبد الناصر وعبد الحكيم عامر كانوا عندى فى البيت قلت لهما أسبيكم وأمشى .. قالوا ليه ؟ وكلام زى كده .. قلت أنا حاسس إن أنا غريب ويتعاملونى بشئ من الحذر .. قالوا لأ المسألة إن ليس عندك شغل كفاية .. أقول لك سافر إنجلترا واعمل اتصالات علشان عاوزين نعمل مفاوضات مع الإنجليز .. علشان الجلاء .. وبهذا الشكل سافرت إنجلترا علشان أعمل الاتصالات .. والمسألة إني شعرت أن هناك شئ يحاك من ورائى بطريقة الدس والوقية .. وأقدر أقول لك إن حاجة حصلت يعنى راح واحد من مجلس القيادة جمع ٣ أو ٤ ضباط من

المدفعية المتحمسين .. وقال لهم عبد المنعم أمين .. قالوا طيب ليه لم تطلعه .. قال عنده المدفعية .. قالوا إذا كان ضباط المدفعية تعرف إنه عمل حاجات وحشة زى كده .. طبعاً مش حيرضوا عنه .. وحيرضوا إنكم تطلعه » .

• ومين كان هذا الضابط ؟

• « صلاح سالم .. هؤلاء الضباط اجتمعوا بعد كده مرتين أو ثلاثة .. وكان يقول لهم حاجات كاذبة .. من ضمن الحاجات الكذب كان فيه تعديل وزارى فى نوفمبر .. لما سافرت إنجلترا أخذت مراتى معايا وبعدين لما رجعت بعد أسبوع خلصت المفاوضات .. عملت الأساس بتاع مفاوضات الجلاء .. ورجعت على اعتبار يدرسوا المسألة ويعطونى خبر وجدت تعديلاً وزارياً .. وحضرت الجلسة بتاعة التعديل الوزارى .. فقالوا فلان وفلان يخرجوا ومرتشح بدلاً منهم فلان وفلان .. بعدما بيومين « روز اليوسف » كتبت هذا الكلام كأنهم كانوا معانا فى الجلسة .. يبقى لازم أحد من المجلس قال لهم هذا الكلام .. يا زكريا شوف المخابرات بتاعتك مين اللى طلع هذه الإخبارية الصحيحة ؟ جاء بعدما بيومين أو ثلاثة .. وقال مرأت عبد المنعم أمين هى اللى طلعت الإخبارية .. وقيل هذا الكلام بحضور كل الأعضاء .. قلت لهم مراتى فى إنجلترا .. يا ترى هى عرفت الخبر منين .. وأذاعته ثانياً إزاي فى نادى السيارات ؟ وكان قاعد معانا عضو مجلس قيادة الثورة اللى قال لإحسان عبد القدوس هذا الكلام » .

• وحضرتك كنت لسه عضو فى مجلس قيادة الثورة ؟

• « طبعاً أنا قعدت عضواً لغاية مارس ٥٣ .. كان قاعد عضو منهم وهو اللى قال هذا الكلام .. واعترف لنا بهذا أو اعترف لى شخصياً .. قال : أنا خرجت من هنا وقت على إحسان عبد القدوس فى بيته وبعدين قعدنا قعدة « تجلى » .. وقلت له .. هذه الحقيقة » .

• اللى هو مين يا فندم ؟

• « أنور السادات .. وفضل يهز دماغه على إنه لا يعرف إن مرأت عبد المنعم أمين والكلام ده كله .. ولم يفتح يومها فمه بكلمة .. دى عينة من عينات العقاب .. طبعاً شعرت إنى لازم أسيب الناس دول » .

• وإمتى سبت مجلس قيادة الثورة ؟

• « أخذت أجازة أو أعطونى أجازة فى شهر يونيو سنة ٥٣ .. أجازة مفتوحة .. إنى أروح سفيراً أو ملحقاً عسكرياً فى أى حنة .. وبعدين بعد ٦ أشهر أرجع ثانى يكون تم تهدئة الضباط .. قبضوا على الضباط بتوع المدفعية اللى كانوا مسلطينهم يعملوا كده .. شوف الشغل الغير شريف .. إنهم يقولوا للضباط حاجة ويخلوهم يعملوا حاجة .. وبعدين بيدأوا يجتمعوا وبعدين يروحوا قابضين عليهم .. ويتهموهم بالمؤامرة .. وحكموا عليهم بأحكام ما بين مؤبد و ١٥ سنة سجن .. وقالوا فرصة إننا ندخل رشاد مهنا بالمرة معهم .. أخذوا الضباط دول وأخذوا رشاد مهنا على اعتبار إنه متأمّر وياهم » .

- وأسأل أمين شاكرا : لماذا ترك عبد المنعم أمين منصبه فى مجلس قيادة الثورة ؟
- « والله عبد المنعم أمين كان يهمنى ما أتكلمش عنه .. لأن اللى أساءت إليه زوجته .. زوجته كانت سيدة اجتماعية وكانت عضوة فى الكثير من النوادى .. زى نادى السيارات ونادى الجزيرة .. وكانت تتكلم كثيراً شوية .. وكانت تحب تتكلم فى السياسة .. إنت عارف فيه بعض السيدات حبوا يتكلموا فى السياسة علشان يوروك إنهن على علم .. حاجات كثيرة من اللى قالتها اتحسبت على عبد المنعم أمين .. وبالتالى أمر عبد الناصر إنه يطلع بره كسفير .. وحتى وهما بره أساءت إليه برضه » .
- ويقول مصطفى كامل مراد : « بالنسبة لعبد المنعم أمين لم يحصل شىء .. عبد المنعم أمين عين سفيراً فى لندن .. بعد ما انتهى دوره .. يعنى الأوضاع هى اللى رتبت الأمور .. مآكانش المقصود التخلص منه » .
- ويضيف عبد المنعم أمين : « المفروض اللى كنت داخل عليه .. إيهم ناس وطنيين إذن لازم يشتغلوا لمصلحة البلد .. وبعدين وجدت كل واحد بيشتغل لنفسه يعنى يعمل أى حاجة يسىء فى علاقته أو كلامه أو أى حاجة ناظرأ لأن يخرج الشخص علشان يحل محله » .
- ويقول خالد محيى الدين : « عبد المنعم أمين أول من ترك المجلس يليه يوسف صديق يليه أنا » .
- ليه ؟
- « عبد المنعم أمين بعد أحداث المدفعية فى يناير ٥٣ كان فيه شكوى منه ومن تدخلاته .. فالضباط مآكانوش راضيين عنه .. والحركة تقريباً كانت موجهة بسببه .. فاستبعد واتعين سفيراً .. ويوسف صديق كان كثير الحركة والكلام والنقد لمجلس قيادة الثورة .. بصورة حركية ينتقل للوحدات والضباط رغم التنبيه عليه فطلب منه أن يلزم بيته وحددوا إقامته .. وبعدين طلبوا منه الاستقالة .. وحجوا يعينوه سفيراً مارشيش .. خرج بره شوية وبعدين رجع » .
- وكان ذلك إعلاناً عن بداية خلافات أعضاء المجلس .. مع ظهور أسباب الصراع ... كما أبعد من القيادات ثروت عكاشة ...
- وأسأل د . ثروت عكاشة : لماذا اختلفت مع الرئيس عبد الناصر ؟
- « الخلاف فى رأى لا يفسد للود قضية .. الخلافات موجودة فى كل مكان بين الزوج وزوجته .. الأخ وأخوه .. بين الأب وابنه » .
- حضرتك بتقول « مقالاً كتبته فى مجلة التحرير أخرجنى من مصر » ؟
- « ظهرت مجلة التحرير كأول عمل صحفى بعد الثورة .. وقد توليت رئاسة تحرير هذه المجلة منذ العدد الرابع .. وكان الغرض من هذه المجلة أن تعكس أهداف الثورة للرأى العام .. وأن تعكس لمجلس الثورة حقيقة إرادة الشعب التى قامت الثورة من أجله .. وظللت رئيساً للتحرير

حتى العيد الأول للثورة في ٢٣ يوليو سنة ٥٣ .. وكتبت في ذلك التاريخ مقالاً بعنوان « هكذا قمنا بالثورة » .. تحدثت فيه بالضبط عما قام به سلاح الفرسان من واجبات أساسية جوهرية ليلة الثورة .. وهي جزئية كنت أعلمها .. وكنت أحيط بها كل الإحاطة .. لأنني شاركت فيها وكان لي نصيب في العمل فيها .. ولذلك لم أكتب عن ما دار في غير سلاح الفرسان من أسلحة أخرى في ليلة ٢٣ يوليو لأنه لم يكن لي به علم فلم أكتب شيئاً عنهم حتى لا أظلم أو أجور .. وبعد ظهور هذا المقال إذا بمجلس قيادة الثورة يصدر قراراً بوضع مجلة التحرير تحت الرقابة .. وهو قرار يعلم أصحابه سلفاً أنني لن أقبله .. وقد استقلت على الفور من العمل .. ولكني فوجئت بعد ٢٤ ساعة أخرى بإبعادي من مصر .. لأكون ملحقاً عسكرياً في سويسرا .. وبطبيعة الحال ليس هناك علاقة بين مقال مجلة التحرير وبين نقلي ملحقاً عسكرياً في أوروبا .. فالواقع أن هذا المقال قد اتخذ ذريعة لنقلني من منصبى كاركان حرب لسلاح الفرسان في ذلك الوقت .. وليس المجال هنا هو المجال المناسب لشرح تلك الظروف ..

• د . ثروت عكاشة : تعدد الوظائف بالنسبة لحضرتك واختلافها ، هل ده كان خوفاً منك أم ثقة فيك ؟

• « المنصب الخاص بالملحق العسكري في سويسرا أو في باريس .. أعتقد وعندى الدليل على إنه كان تحسباً من مجلس الثورة من أن أقوم بجولة مضادة بواسطة سلاح الفرسان كما توهموا » .

• « وصدر في ١٠ فبراير سنة ٥٣ دستور مؤقت قضى بأن تكون أعمال السيادة لمجلس الثورة الذي يكون له حق تعيين وعزل الوزراء .. وتقرر أن تكون هناك فترة انتقال ٣ سنوات تنتهى في ١٦ يناير سنة ٥٦ ...

• « ويقول كمال الدين حسين : « لا أحد يكره الديمقراطية .. ولكن لما نقول عندنا برنامج كذا .. والإصلاح الزراعي كذا .. والأحزاب تطهر نفسها .. ونخرج الإنجليز من مصر .. طيب إزاي ننفذ الكلام ده ومين اللي ينفذه ؟ قلنا نقعد فترة ٣ سنوات علشان نعمل العملية دي » .

• « وخطب عبد الناصر في الشعب قائلاً « ارفع رأسك يا أخى فقد مضى عهد الاستعباد » .

• « وفي ١٢ فبراير سنة ٥٣ وقع اللواء محمد نجيب اتفاقاً بين مصر وبريطانيا بشأن تقرير المصير للسودان .. وكان الدكتور محمود فوزى سفيرنا في إنجلترا في ذلك الوقت قد أصبح وزير الخارجية ..

• « ويقول أحمد حمروش : « كان أسلوب معالجة قضية السودان قد اتسم بأخطاء عديدة .. مما أدى إلى قيام حكم مستقل في الخرطوم .. وضاعت فرصة اتحاد مصر والسودان » .

• « وأسأل عباس رضوان : فيه رأى بيقول .. « تركنا السودان وبحثنا عن سوريا » .. إيه تعليقك ؟

• « يمكن فيه اختلاف في المرحلتين .. أو في ظروف المرحلتين .. السودان كان مرتبطاً بالجملاء عن مصر .. وطالما أنت بظالم بالجملاء عن مصر .. فلنترك السودان .. دى بالعكس كانت خطوة كومية أن يقال للسودان : أنت تختار إيه .. على الأقل كان حييقي مايفيش نوع من العداء أو شبه العداء .. والموقف السياسى أو الموقف العام اللي بيننا وبين الإيجازي بخصوص الجملاء عن مصر .. مع وجود مشكلة السودان .. كان يستدعى أن الحل الأمثل أن السودان متروك لظروفه .. يتوحد أو لا يتوحد .. إنما يستقل .. وتعمل استفتاء في السودان والسودان اختار .. مش اختار الانفصال .. اختار الاستقلال .. إذن يقينا « حيايب » من غير مشاكل » .

• **ويقول أحمد أبو الفتح :** « ونشرت الصحف صباح ٢٢ مايو ١٩٥٣ مقالاً لى وعنوانه « نعم للدستور » قلت فيه : (١) إن مصر الآن وقد انقضى على الحركة قرابة عشرة أشهر لا تزال دون دستور .. (٢) إن الأحكام العرفية التي فرضت في عهد فاروق لا تزال مفروضة حتى اليوم .. (٣) إن المعتقلات التي كانت مفتوحة منذ ٢٦ من يناير لا تزال مفتوحة حتى الآن .. (٤) إن الرقابة على الصحف مفروضة عليها .. أما رد الصاغ صلاح سالم على مقالتي فقد قال فيه تحت عنوان « الباكور والمتباكور » : « ماذا أفاد الفلاح من سياستكم الماضية .. ومن برلمانات الماضي .. وديساتير الماضي .. إلا الوعود من تجار ومحترفي السياسة !! » . »

• ولم يبق من كل أركان النظام القديم سوى الملكية ...

• وفي مساء ١٨ يونيو سنة ٥٣ قرر مجلس الثورة إلغاء النظام الملكى وإعلان الجمهورية ..
• ولخلى الملك أحمد فؤاد الثانى من على عرش مصر .. وصار يوم ١٨ يونيو من الأعياد الوطنية الرسمية .. وفي ٢ مايو ١٩٥٣ جلس الملك حسين على العرش فى الأردن ..
كما جلس الملك فيصل على عرش العراق ...

• وأسأل الملكة ناريمان : كيف تلقى الملك فاروق نبأ إلغاء الملكية .. كان متوقعها .. كان منتظرها ؟

• « فى البداية كان يقول مفاجأة .. وخانوني » .

• وماذا كان رد فعله أو انطباعه يومها ؟

• « بالعكس .. بالليل كان عادياً جداً .. وكنا نخرج نتعشى فى أى مطعم شيك .. ونضحك .. وهو كان مايحبش يعبر عن شعوره » .

• وأسأل الملكة دينا عبد الحميد : حضرتك كنت على علاقة بالأسرة المالكة .. بالملك فاروق والملكة ؟

• « لأ .. لكن كنت أعرف أفراداً من الأسرة » .

• والملك حسين كان مؤيداً لثورة يوليو ؟

- « أعتقد ما لمستش فيه عدم تأييد » .
- وهكذا حلت أحداث جمهورية محل أقدم مملكة في إفريقيا .. وأصبح اللواء نجيب أول رئيس للجمهورية المصرية .. كما تولى رئاسة الوزراء ..
- وأصبح جمال عبد الناصر نائباً لرئيس الوزراء ووزيراً للداخلية ...
- وفي اليوم نفسه عُيّن الصاغ عبد الحكيم عامر قائداً عاماً للقوات المسلحة .. ورفق إلى رتبة اللواء ...
- ويقول محسن عبد الخالق : « المشير عامر كان رجلاً طيباً .. صعيدياً وشهماً .. ولكن أقول حاجة بسيطة .. الشيشكلي جاء في سبتمبر بعد قيام الثورة في مصر .. واستدعانا عبد الناصر في سمراميس القديم وكان عامل حفلة للشيشكلي .. بعد الحفلة أخذني عبد الناصر .. وقال : الشيشكلي يقول لي حاجة .. « الخطر حييجي من الجيش .. مين اللي تثق فيه تمسكه الجيش ؟ » قال له : عبد الحكيم عامر .. وعبد الحكيم كان مدير مكتب محمد نجيب .. قال له : ده بس صاغ .. قال له : أنت في ثورة سياسية .. صاغ إيه .. ترقيه ويمسك عبد الحكيم الجيش .. وقد كان .. فهو كان يقول لي الكلام ده .. علشان يمهد لعبد الحكيم أنه يرقى ويمسك الجيش بعد إعلان الجمهورية .. ودي كانت معروفة من يوم ما مشى فاروق » .
- ويقول عبد اللطيف بغدادى : « أنا كنت أصلاً في البداية خالص ضد تعيين عبد الحكيم عامر قائداً عاماً .. كان عبد الناصر اللي اقترحه سنة ٥٣ .. وأنا اعترضت .. وأنا كاتبها في مذكراتي .. وخالد جابها في مذكراته .. اعترضت لأنى وجدت إن جمال عبد الناصر بيرسم على إن القوة تبقى في جانبه عن طريق الجيش وإحنا نبقى بره واللى يحقق له الغرض ده عبد الحكيم عامر .. بحكم الصداقة اللي كانت بينهم » .
- وكان عبد الحكيم عامر في الوقت ده صاغ ؟
- « كان في هذا الوقت صاغاً .. وبعدين اترقى للواء .. فاعترضت .. لما اعترضت قلت لهم : أنا رأيي اللي يمسك الجيش ده حد محترف .. رد جمال عبد الناصر وقال : مش ممكن نمسك رفاقينا لواحد مش مننا .. قلت له : ممكن قوى .. بس نجيب ناس حواليه نثق فيهم .. وهو بالتبعية جبرج إلينا .. قلت له : لأن فيه محصلة تاريخية معروفة إذا تدخل الجيش في السياسة .. فسد الجيش وفسدت السياسة .. قال لي : لأ مانقدرش .. أخذوا الرأي .. الكل وافق .. أنا الوحيد اللي رفض .. واتعين عبد الحكيم عامر قائداً عاماً .. وفي الوقت ده اتعينت أنا وزير حربى .. وجمال عبد الناصر وزير داخلية .. وقعدت سنة في وزارة الحربى .. وبعدين سببتها ورجت الشئون البلدية .. لما سبت الحربى مسكها حسين الشافعى .. وكان حسين الشافعى في السوارى » .
- كما تولى صلاح سالم وزارة الإرشاد القومى التى أشرفت فيما أشرفت على الإذاعة والفنون ...

• **ويقول أبو الفضل الجيزاوى :** « أنا اخترت إدارة شئون العاملين .. لأنى كنت فى ذلك الوقت فى ليسانس الحقوق جامعة القاهرة .. وعاوز أخلص وأدرس دراسات عليا .. ولقيت نفسى الهواية بتاعتى إنى أشغل فى ميدان الإعلام .. فرحت مع السيد وجيه أباطة أركان حرب الشئون العامة للقوات المسلحة لإدارة التوجيه المعنوى اللى كانت بتقوم بكل الأعمال لوزارة الثقافة .. الإعلام والإذاعة كل ده كان بيخضع لنا » .

• **والفنانون ومشاركتهم ؟**

• **شارك عبد الحليم حافظ وعبد الوهاب وأم كلثوم ..** وإلحنا اللى كنا بنحط الأغاني ونعمل الحفلات .. وبنشوف السيناريو بتاع الأفلام .. ومافيش حاجة بتتعمل إلا بتصديق من الشئون العامة للقوات المسلحة .. فدى أعطتنى فرصة أنى أكتب فى بعض المجلات وبعض الصحف .. وكان لى دور كبير فى توجيه وسائل الإعلام .. دى كلها من أجل إنجاح الثورة » .

• **ويقول جمال الليثى :** « أنا شخصياً لما قامت الثورة .. وبعد نجاحها .. بعوتنى إدارة الشئون العامة للقوات المسلحة بقيادة وجيه أباطة الله يرحمه .. كان عظيماً .. والشئون العامة للقوات المسلحة دى كانت وزارة الثقافة ووزارة الإعلام بتاعة الثورة .. كان كل العناصر اللى فى الثقافة والرقابة كانت تبع الداخلية .. الفنون الشعبية كانت تبع الشئون الاجتماعية .. كان مافيش وزارة ثقافة ولا وزارة إعلام .. فكان وجيه أباطة هو رجل الإعلام بتاع الثورة وعملنا أفلاماً دعاية للثورة .. وعملنا « بوسترز » بتعلق فى الشوارع .. وعملنا مهرجانات .. وعملنا احتفالات .. ده الدور اللى بتقوم به وزارة الثقافة أو الإعلام فى الوقت ده .. لغاية ما أول وزارة اتشكلت .. وانحط فيها المرحوم فتحى رضوان وزيراً للإرشاد القومى » .

• **وأسأل فهمى عمر :** هل كان الضباط الأحرار يوجهون الإعلام فى بداية الثورة ؟

• **بعد قيام الثورة بعشرة أيام ..** جاء قائد الجناح (وجيه أباطة) .. وأصبح له مكتب فى الإذاعة .. وكان وزير الإرشاد القومى المرحوم صلاح سالم .. فيالقطع كان للثورة هذا التأثير على الإذاعة حتى تتمشى الإذاعة مع الأهداف اللى تصبو إليها الثورة » .

• **وأسأل على خليل :** من من الفنانين كان أكثر تحمساً للثورة فى بدايتها وجاء علشان يغنى ويشترك فى الاحتفال ؟

• **فى الواقع إن الفنانين كلهم مثل الشعب المصرى ..** مثلنا كلنا .. كانوا مبتهجين .. لأنه زالت هذه الغمة .. أم كلثوم قبل الثورة بشهور .. كانت بتسجل إسطوانات لشركة تجارية .. لأنها لم تكن مسجلة طول مدة الحرب .. لأول مرة بتسجل مجموعة أغانيها اللى طلعت طول مدة الحرب .. كان فيه أغنية لها « يا ليلة العيد » وفيها كويليه يقول « عز وتمجيد لك يا ملكى » .. فهى بتسجل .. وأنا كنت حاضر التسجيل .. قامت غيَّرت وقالت « عز وتمجيد لك يا حبيبى » .. بعد ما خلصت .. قالت لى أنا قاصدة .. وكذلك عبد الوهاب كان متحمساً وغنى « كل ده كان ليه » .

- وأول أغنية وطنية غنيت للثورة كانت إيه يا فندم ؟
- « كانت » مصر التى فى خاطرى « لأم كلثوم .. وبعدين كان فيه أغنية للبللى مراد بنقول « الاتحاد والنظام والعمل » .
- بينما نقول تحية كاريوكا : « بفت شللية .. إنما الفنانين أيامها كان نفسهم الفن يفضل بالمستوى اللى هو فيه .. كمغنين .. إنما بصيت لغيت نفسى لوحدى .. كل واحد جرى وراء الحكم .. دلدول .. ومنهم ناس كنت بأحبهم .. أم كلثوم وعبد الوهاب .. وكانت آخر واحدة قلت لها إنت مشهورة .. إنت بتجرى علشان جبابة .. الواحد لازم يقول رأييه ولو راح فى داهية » .
- ويقول صلاح أبو سيف : « لا أفكر أى نوع من تشدد الرقابة .. لكن أسوأ غلطة عملوها .. هى حذف صورة الملك اللى أيام الملكية .. لأنهم حذفوها .. أنا عملت فيلم « لا وقت للحب » .. وكان فيه عملية تعذيب لواحد من اللى مسكوه علشان يقول ويعترف على ناس تانية .. وكان ده المفروض قبل الثورة .. فطبعاً عملت عملية التعذيب والبوليس وراه صورة الملك فاروق علشان أقول إن ده مش فى عهد الثورة .. ده فى عهد الملك .. ورفضوا المشهد وشطبوه .. علشان ما أطلعش صورة الملك فاروق .. ده غلط » .

● وفى سبتمبر عام ٥٣ قرر مجلس قيادة الثورة مصادرة أموال وممتلكات الملك السابق فاروقى ...

- وأسأل الدكتور الجوهري : إيه اللى حصل للثروة الكبيرة الضخمة ؟
- « والله إحنا لما بنيجى نقول الثروة .. دى كلها جمعت فى خزائن الغرف المصفحة للبنك الأهلى .. اللى هو دلوقتى البنك المركزى .. كان هو بنك الدولة .. فيه غرفة مصفحة .. وكان شاهد على هذه العملية دكتور زكى هاشم .. وهو حى يرزق لا يزال .. كان سكرتير عام البنك الأهلى .. وكان كل الحاجات اللى بنستولى عليها .. أو بنفتحها من الخزائن .. نستلمها لجان .. مافيش فرد لوحده يتصرف فى حاجة .. ماحصلش .. وكان كل الحاجات دى بدروح البنك المركزى وتحفظ فيه » .

• أنا بأقول راحت فىن النهارده ؟

- « فيه جزء منها لا زال فى البنك .. وجزء كبير جدا انعمل متحف .. وجزء كبير بيع فى مزاد علنى .. النهارده إحنا بنتكلم للتاريخ علشان الناس تبقى عارفة .. الحاجات دى كلها كانت تسجل تسجيلاً دقيقاً جداً فى محاضر .. وهذه المحاضر لا زالت إلى الآن النسخ الأصلية بناعنها موجودة فى مجلس قيادة الثورة .. كان حاول محمود بونس بأخذها معاه قناة السويس .. فالترئيس عبد الناصر مارضيش فى هذا الوقت .. وأصر إنها نفضل فى أماكنها .. فى القصور اللى آلت إلى وزارة الخارجية .. زى قصر الطاهرة وقصر الضيافة .. كانوا هم ببسملوا بعض .. وكان لما بحصل مشكلات .. تغيير فى شكل تحفة .. حاجة ناقصة .. كانوا بيرجعوا إلى هذه

المحاضر .. فيه ناس كثير جداً فاكرين إن العملية كانت سابية .. وإن ماكانش فيه حصر للحاجات دى .. بالعكس .. دى الثورة جابت أكبر شركة فى العالم .. وحصرت الحاجات دى وموجودة فى كتالوجات دقيقة جداً بالتاريخ بتاعها .. بالسعر التقديرى وقتها لكل حاجة .. وهو اللى اتباع فى المزاد العلنى سنة ٥٤ .. فيه بقى القصور زى أى حاجة فى الدنيا .. فيه حاجات ثمينة جداً .. وجنبها فيه موبيليا عادية .. وحاجات عادية كان بيتعمل لها مزايدات عادية .. وكان الشعب يشتريها .. وبلاقى حاجات عليها رسم التاج .. وتلاقى واحد بقول لك أنا رحت بيت فلان .. لقيت ستارة عليها التاج .. دول سرقوها .. ولقيت كرسياً .. طيب ما كل ده اتباع .. الناس هى اللى اشتريته » .

* **ويضيف د . الجوهري :** جاء الرئيس عبد الناصر فى وقت من الأوقات وإحنا فى مجلس الثورة .. كان الحاجات بتعرض عليه .. قال العملية طولت جداً .. أولاً أموال الملك انصفت فى ظرف سنة .. وأنا أذكر الفضل الشديد جداً للدكتور على الجريتلى الله يرحمه .. لأنه كان رجلاً حاسماً .. جابنى أنا ومحمود يونس وقعد معنا .. قولوا لى كل الحاجات دى بتاعة الملك .. ده إيه وده إيه .. نقول دى تروح هنا .. ودى تروح هنا .. وكان يعتمد هذه القرارات الرئيس جمال شخصياً .. فكان بيعتمد هو التوزيع ده .. وأنا أذكر إن التوزيع كان أحياناً بيعترض عليه .. أنا أذكر كان فيه قصر حورية حمذى اللى هو موجود عند كوبرى الجامعة دلوقتى .. كان جاء مجلس الدولة .. وكان عاوز يعمل لمحكمة القضاء الإدارى .. وكان اتوسط فى هذه العملية محمد فهمى السيد مستشار الرئيس للشئون القانونية .. وهو قريب للرئيس عبد الناصر .. وجاءت تأشيرة إن هذا القصر يسلم لمجلس الدولة .. فكان مين المشرف على الأموال المصادرة .. كان فيه لجنة عليا برئاسة عبد اللطيف بغدادى مرة .. وزكريا محيى الدين مرة .. وكان بغدادى ربنا يديله الصحة والعافية .. كان حازماً جداً .. ولما جيت عرضت عليه الموضوع قال لى .. القصر حنديه علشان يقعدوا فيه ٣ مستشارين مرة كل ١٥ يوم يحكموا فى قضية .. ما نعمله أى حاجة مهمة .. شوف أنت إيه دلوقت .. كان حصل زلزال وكانت مدارس كثير وقعت .. ومحتاجين للمدارس .. قال لى أنا رأيى يروح لكذا .. قلت له ده فيه تأشيرة من الرئيس إن ده يروح لكذا .. وفهمى السيد حييجى ويسألنى عملت إيه فى تأشيرة الرئيس .. قال لى مالکش دعوة .. كلم هو الرئيس .. وقال له أنا رأيى يروح لكامل حسين فى التربية والتعليم .. أفيد مما يروح لمجلس الدولة .. واتفق القرار .. فيه حاجات طبعا حصلت إحنا ما قدرناش نعمل فيها حاجة .. زى صلاح سالم ما أخذ جزءاً كبيراً جداً من قصر عابدين وعمله وزارة الإرشاد .. ده كان خطأ كبيراً جداً .. دى من ضمن المشاكل اللى حصلت بين الرئيس وصلاح سالم فى يوم من الأيام .. لأنه كنا قررنا أننا نعمله متحفاً .. وعملنا له فعلاً ترتيبات المتحف .. وكانت الناس بتزوره .. وضمناه إلى وزارة السياحة فى ذلك الوقت .. ماكانتش وزارة حتى .. كانت مصلحة السياحة » .

* **ألم يكن المفروض أن كل القصور تصبح متاحف ؟**

* **»** يعنى كان ممكن إن كل القصور تفضل متاحف .. وده كان أفضل .. ده من ضمن اقتراحاتنا ..

وكان يصعب علينا جداً أنه يحصل أى تصرف .. يعنى قصر يتعمل مدرسة .. أو وزارة من الوزارات .. قصر يقعد فيه ناس يشغلوه بشغل غير مفيد .. كان ممكن يستفيدوا به .. استفادة بالغة .. هى كانت كمية كبيرة جداً من القصور .. ما أقدرش أقول إن الدولة تحتمل تحويلها إلى متاحف .. لكن مين اللى قرر البيع .. هى دى النقطة اللى الناس بتسأل عليها .. مين اللى قال بيعوا ؟ اللى قال بيعوا وزير المالية د . عبد الجليل العمري .. اقترح هذا وأقنع مجلس الوزراء وأقنع جمال والمجموعة كلها .. أنه لابد أنهم بيعوا الحاجة اللى زائدة عن الحاجة .. اللى مالوش أى قيمة تاريخية .. ودى اللى اتباعته .. والتجربة بتاعة البيع ممكن أفتعت أكثر ... نيه .. لأن إحنا لما جينا .. عملنا مزاداً عالمياً سنة ٥٤ وجبنا دول العالم كلها .. علشان تشتري الحاجات المهمة جداً اللى اتكلمت عليها أنت .. طوايع ومجموعات وحاجات مهمة جداً .. اللى هى مقتنيات الملك .

• واللوحات والأسلحة والسجاجيد ؟

• « لأ .. الأسلحة دى ما اتباعتش .. دى فى المتحف الحربي .. لم يباع منها نهائياً .. وكان المشرف على المتحف .. يوسف السباعى اللى الرئيس اختاره .. وكان يوسف السباعى وقتها هو المسئول عن المتحف الحربي المصري . »

• والمجوهرات والتيجان ؟

• « المجوهرات والتيجان والحاجات دى كلها .. موجودة .. جزء منها فى المتحف اللى اتعمل فى الاسكندرية .. وأنا شفت بعضاً منه . »

• يمكن ١٠٪ ؟

• « ما هو الباقي ما زال موجوداً لغاية دلوقتى .. موجوداً فى الغرفة المصفحة .. فى البنك المركزى .. الأهل سابقاً .. من أيام ما كانت اتعملت ومضى عليها محمود يونس .. فيه حاجات بلمضاء محمود يونس لحد دلوقتى .. كله موجود . »

• فى كتب حضرتك اللى قرأتها .. بتقول مسئولية عبد الناصر هى المسئولية الأولى فى كل هذا .. وأحياناً مسئولية عامر ؟

• « أيوه صحيح . »

• هل لأن الرئيس عبد الناصر كان يتدخل فى كل صغيرة وكبيرة ؟

• « ده صحيح .. ما أقدرش أقول إن إحنا فى واقعنا كان فيه تفرقة بين الأوامر اللى بيعطيها المشير وأوامر الرئيس .. لكن أحياناً لما كان المشير يتدخل .. كنا بنعرض برضه على الرئيس .. وكان الرئيس بأخذ جانب المشير .. واللى بيقوله بيمشى .. يعنى أنا أنكر فى يوم من الأيام .. جاءت لى رسالة عاجلة من عابدين .. بتقول لى مطلوب الحضور عاجلاً إلى مكتب القائد العام .. فرحت مكتب القائد العام .. ولأول مرة وجدت المشير عبد الحكيم عامر .. اللى

ببغالبنى بترحاب فلقينته زعلاناً منى .. بيقول لى : إنت ليه ماطلعتش النظارات اللي فى قصر القبة .. إديت أوامر يطلعوها علشان إحنا عندنا مناورة وعندنا نقص فى نظارات الميدان .. قلت له : سيادتك عندك فكرة عن هذه النظارات بالضبط .. قال لى : شمس بدران راح شافها وقال تصلح .. وأنت اللي مارضيتش تطلعها .. قلت له : النظارات دى عبارة عن نظارات معظمة .. كلها مطعمة بالذهب الخالص والألماظ .. ودى تحف ماهياش نظارات ميدان علشان نطلعها الجبل علشان الملحقين العسكريين اللي حيججوا يحضروا المناورة .. فده غير ممكن .. فابتدا يقتنع .. قام قال لى : والخزن اللي أنت حايشها فى القبة ولم ترضى أن تعطيتها للمخابرات .. كان محمد على عبد الكريم رئيس المخابرات .. أنا كاتب الكلام ده فى كتابى .. وبعدين مدير مكتبه حافظ إسماعيل كان موجوداً فى هذا المكتب .. اللي هو أصبح مستشار الرئيس للأمن القومى فى وقت السادات .. قلت له : الاتنان طالبين هذه الخزن .. دى شغلة سيادتك أنك تقول مين اللي يأخذه .. واللى حقوله هو اللي حنفضه .. فكان ده معروفأ .. وكان معروفأ مين اللي بيدى التعليمات .. وكان فيه مكتب القائد العام كان فيه ثلاثة : صلاح نصر وعباس رضوان وشمس بدران » .

* **ويقول د . حسن رجب :** .. قبل ما أسافر .. رحى لجمال عبد الناصر .. قلت له إحنا الآن بنعمل علاقات كويسة مع الصين .. لا لينا هناك سفارة .. وليس هناك معدات .. كل هذه حاجات نحن محتاجين إليها .. علشان نعمل سفارة على الأقل نصف مليون حنيه إسترلينى علشان تليق بمقامنا .. وبمقام الصين أيضاً .. الرئيس جمال عبد الناصر قال لى روح قابل الدكتور عبد المنعم القيسونى .. أنا أعطيت له تعليمات أنه يحل المشاكل دى .. فرحت أقابل الدكتور القيسونى .. قال لى شوف .. إن كنت بتدور على فلوس .. ماعندناش جنبها واحدا إسترلينيا نقدر نعطيه لك .. إحنا مرتبطين بحاجات كتيرة جداً وبالتزامات كتيرة جداً .. ما أقدرش أعطي لك أى حاجة .. قلت له وإيه العمل .. قال لى شوف .. فيه عندك حوالى ١٥ قصراً مصادراً من بتوع النبلاء والأمراء والأسرة المالكة .. روح لم منها اللي أنت عاوزة كله .. فمكنت أنا ومراتى ٣ شهور ننقى .. فى الحقيقة نقينا أحسن الحاجات .. واللى يروح الصين النهارده يشوف الأثاث اللي موجود فيها .. يقول لك فى الواقع إن دى أفخر سفارة مصرية لنا فى الخارج .. إنما للأسف كل العلامات اللي عليها من عهد الملكية .. إنما ده لا يمنع أنه جزء من تاريخ مصر » .

* **وأسأل الملكة ناريمان :** هل التحف النادرة مش موجودة دلوقتى فى القصور الملكية ؟

* **» بيعت فى مزادات .. ودى خسارة .. وده تراث كبير » .**

* **هل كان فيه ممتلكات للملك بصراحة خارج مصر .. بحيث كنتم رايحين وعارفين أنه فيه ما يكفيكم وزيادة ؟**

* **» لا .. الأسرة المالكة الإيطالية نصحوا الملك وقالوا إحنا كلنا طلعنا الفلوس .. متفكرة مأكناش فيه المبلغ .. يادوب على القد .. وأنا اتكلمت بصراحة مع مدام جيهان أيام السادات .. ومام**

سوزان قابلتها فى منزلها .. أنا متذكّرة .. كان الملك واضعاً كل ما يملك فى أحسن مجاميع فى العالم .. نقود مثلاً وساعات جميلة .. وكان غاوى المجاميع الفنية وساب مجاميع حلوة جداً .. تنفع للمياحة .. زى تركيا أو روسيا .. ماتضيعش كده » .

• وقبّل ذلك كانت قد تكونت « محكمة الغدر » التى حاكمت فيمن حاكمت عثمان محرم وكريم ثابت ومحمد حسن من حاشية الملك فاروقى ...

• وتشكلت محكمة الثورة فى منتصف سبتمبر عام ١٩٥٣ ...

• ويقول أحمد أبو الفتح : « تألفت محكمة الثورة .. وكان القضاة الثلاثة أعضاء فى مجلس القيادة وهم البغدادى وحسن إبراهيم والسادات .. وكان رئيس مكتب التحقيق والادعاء هو اليكباشى زكريا محبى الدين عضو مجلس قيادة الثورة أيضاً » .

• وفى خلال ستة شهور تمت محاكمة ٢٤ شخصية .. وقد صدرت بعض الأحكام بالإعدام .. وغدّل اثنان إلى المؤبد .. أحدهما على إبراهيم عبد الهادى باشا رئيس الوزراء الأسبق .. وقُدّم لمحكمة الثورة أيضاً شخصيات سياسية كثيرة مثل فؤاد سراج الدين ، وزينب الوكيل حرم النحاس باشا ، وإبراهيم فرج ، وعباس حلّيم ، وعثمان محرم ، والإخوة أبو الفتح ...

• ويقول المستشار يحيى الرفاعى : « لما جاءت الثورة أنشأت محاكم خاصة ومحاكمات سياسية بعيدة عن القضاء القعلى والمحاكمات القانونية » .

• ويقول حلمى سلام : « الأستاذ أحمد أبو الفتح وطنى بلا شك .. لكنه عندما كشف عن رؤيته الخاصة للنظام التى اختلفت فى أزمة مارس عن رؤية الرئيس عبد الناصر تحول من صديق إلى نقيض » .

• ويقول أحمد أبو الفتح : « استطاع عبد الناصر .. ليس فقط غلق « المصرى » ومنعه عن الصدور .. بل أيضاً نهب كل ثرواتنا بحكم أملاه على محكمة الثورة .. وكانت أسرة أبو الفتح هى الأسرة الوحيدة التى صودرت أملكها غير الأسرة الملكية » .

• وأسأل أبو الفضل الجيزاوى كرّجل قانون .. ماذا يقول لنا عن محاكمات الثورة ؟

• « محاكمات الثورة فى ضوء قانون عسكرى ونظام عسكرى .. كلها تمت سليمة .. وكانت الأحكام فيها شىء من الردع .. علشان نخوّف الناس .. كانت دائماً الأحكام تتراوح من ٣ سنين إلى ١٥ سنة .. فلإحنا كنا نعطى أقصى العقوبات .. علشان نخوف الناس ونردعهم .. كانت محاكم ذات طابع خاص .. محاكم عسكرية » .

• ويقول سعيد حلّيم : « محاكمات الثورة كان الهدف منها .. إظهار الفساد السابق .. وفى نفس الوقت الرجعية لا تعود » .

• ويقول إبراهيم شكرى : « محاكمات الثورة بلا شك كانت تتسم بنوع من الشدة .. التى كانوا

يعتبرونها إنها من مستلزمات الثورة .. إلى أن تستقر الأمور .. ولذلك حُكم على أناس ليس لأنهم افترقوا ذنباً بقدر ما أنهم كانوا مهمين .. وكذلك بالنسبة لبعض من حكم عليه من الإخوان بالإعدام أو غيره .. كانت لا شك أحكاماً .. ليس لأنهم ثبت إتياناً يقيناً .. أنهم يستأهلونها .. وإنما لأنهم لهم أهمية ولهم أثرهم .. كذلك بالنسبة للسياسيين .. حتى الناس حوكموا ووضعا في معتقلات .. ليس لأنهم افترقوا شيئاً بقدر ما هي يمكن أن يكون لهم خطورتهم .

* **ويعلق رشاد مهنا فيقول :** « محاكمات الثورة .. يعنى يكفى هذا اللفظ .. وهى عبارة عن أوامر تلقى وألفاظ تقال » .

* **وأسأل كمال الدين حسين :** لماذا لم تكن عضواً من أعضاء محاكم الثورة ؟

* « أفكر أن جمال عبد الناصر خشى من صراحتي المطلقة .. وطبعي إن هذا صراط مستقيم .. فانبهوه .. ده قرآن .. والحاجات دى عاوزه شوية مرونة .. ولم أدخل فى أى محاكمة » .

* **ويقول عبد اللطيف بغدادى رئيس محكمة الثورة :** « محكمة الثورة .. حتى الإعدام اللي حكمته .. كان على واحد خائن تعاون مع الإنجليز ضد الفدائيين .. وحاجات محدودة جداً .. لكن ماكناش فيه تفكير باستخدام القوة » .

* **هل أنت راض بعد مرور كل هذه السنوات عن كل ما أصدرته من أحكام ؟**

* « الحمد لله .. كنت بأرضى ضميرى .. وكان الناس بيترأفوا على الحكم اللي حيصدر .. وكثير من القضاة سألوني إذا كنت دارساً قانون .. إدارتك للمحكمة وقدراتك .. وحصل خلاف كبير بيني وبين عبد الناصر حول بعض الأحكام » .

* **زى إيه يا فندم ؟**

* « مثلاً محاكمة محمود أبو الفتح .. كتبت عنها .. أيام أزمة محمد نجيب .. كان فيه رقابة على الصحافة .. وبعدين ألغيت الرقابة على الصحافة .. وبعدين أحمد أبو الفتح كتب فى المصرى « قوانين .. قوانين .. إلى أين » .. فقال لك نحاكمهم .. وكان أحمد أبو الفتح صديق عبد الناصر الذى طلب منى محاكمته .. قلت له شوف واحد تانى .. حأعمل عيان .. وتختار واحد تانى يقوم بالعملية .. قال إزاي نجيب حد تانى ؟ قصة طويلة عريضة .. تفاصيلها فى مذكراتي .. وأحمد أبو الفتح زى ما تقول .. كتبها فى الوجد .. بالكامل » .

* **أشدت بدور فؤاد باشا سراج الدين .. فى أثناء ما كنت رئيس المحكمة ؟**

* « فؤاد سراج الدين حوكم أماننا .. وكان يحاكم كسكرتير حزب الوفد .. حزب الأغلبية .. كانت الأسئلة كلها منصبة حول هذا .. هو بيشير لها دائماً .. يفخر بالحنة دى .. ولما اتكلم عن الذمة المالية .. قلت له لا .. ماحدش بيشكك فى ذمتك المالية .. لكن كنا بنحاكمه سياسياً » .

* **وأسأل عبد المنعم أمين :** هل محاكمات الثورة كانت تتحرى الدقة وكانت منصفة فى أحكامها ؟

• « أنا شخصياً أقول لأ .. أنا كنت بره ماليش دعوة .. ولكن مما كنت أقرأه فى الجرائد ومن الهيئة التى كانت موجودة بتحكم .. رئيس المحكمة من محاكم الثورة ببحاكم الإخوان المسلمين .. وبعدين ببقولوا له إن دى حاجات .. إحنا كنا نأكل الساندوتش ونقعد .. قال له « ها أوأو » .. « إحنا كنا نقعد على الأرض كما الآخرين » .. يعنى كانت مش محكمة .. لازم يبقى عليها الوقار .. أى محكمة يكون عليها الوقار وتشتغل بضمير مش « ها أوأو » وموجودة ومسجلة .. أنت لازم تعرف ده مين .. ما أنت عارفهم كلهم » .

• مين يا فندم ؟

• جمال سالم !! .

• ويقول خالد محبى الدين : للتاريخ أسجل أن على ماهر والسنهورى وسليمان حافظ وفتحى رضوان كانوا يحرضون الصباط على تجاهل البرلمان والدستور .. وطبعاً كانت أغلبية الصباط يستجيبون لذلك بحكم إنهم يستشعرون مصلحتهم فى الاستمرار فى حكم البلاد بأنفسهم » .

• وفى ٨ نوفمبر سنة ٥٣ تقرر مصادرة أموال وممتلكات أسرة محمد على ...

• وأسأل د . محمود الجوهري : مين كان وزير القصر ؟

• « أحمد حسنى وبعديه حسن إبراهيم .. أحمد حسنى فى أول الثورة .. وبعدين بعد كده كان حسن إبراهيم هو وزير القصر » .

• وفى النهاية هل أنت راضٍ عن المصادرات الللى عملتوها بصراحة ؟

• لأ .. غير راضى » .

• وبينما كانت عملية هدم الدعائم التى قام عليها النظام القديم قائمة على قدم وساق .. فإن الصباط من خلال جولاتهم أسعدتهم كثيراً الاستقبالات الشعبية فى كل مكان .. ونظمت الثورة المقاومة الشعبية وتعددت الحوادث ضد الجنود الإنجليز ...

• وبدأت المؤشرات تشير إلى أن الرجل القوى فى مجلس الثورة هو جمال عبد الناصر ...

• واتضح تدريجياً أن الرجل الثانى هو عبد الحكيم عامر ...

• وبدأ اقتراب محمد حسنين هيكل من عبد الناصر ...

• وأسأل أحمد سعيد : محمد حسنين هيكل ؟

• « أحسن تعبير يقال عنه هو أولاً الصديق الشخصى فى أغلب ليالى عبد الناصر .. عبد الناصر لا ينام غير لما يشوفه .. الحاجة الثانية إنه هو الصحفى الذى إذا لم يقل الحقيقة كاملة وهو يعرفها فيبقى هو يجرم فى حق نفسه وفى حق البلد » .

• ويقول محسن عبد الخالق : « على أمين ومصطفى أمين عرفا أن عبد الناصر هو القوة

الحقيقية داخل ثورة يوليو .. فأرسلا محمد حسين هيكل علشان يلزم عبد الناصر .. كلام عبد الناصر له .. أنا لا أقول صح ولا غلط .. أدى مكتب عبد الناصر .. أدى مكتب السكرتارية .. أدى مكتب محمد نجيب .. محمد حسين هيكل بيقد هنا في مكتب السكرتارية .. يخش عبد الناصر يلاقه قاعداً .. يطلع عبد الناصر الظهر يلاقه قاعداً .. يخش بعد الظهر يلاقه قاعداً .. يطلع الساعة الواحدة يلاقه قاعداً .. فيقول لى عبد الناصر : أنا مرة قلت له أنت عاوز إيه ؟ قال أنا عاوز حديثاً .. قال له طيب اركب معى .. وأخذته معى فى العربية .. ورحنا اتغدينا وقعدنا ندرش .. تانى يوم جاء لى بالحديث مكتوباً .. ده قعد فى مخى .. ده قال اللي أنا كنت عاوز أقوله وما قلتهوش .. أنا ماقدش أستغنى عنه !! » .

* ويقول د . عبد العظيم رمضان : « كانوا كلهم ضباطاً صغاراً اعتقدوا عندما وجدوا الناس تؤيدهم .. أن هذا التأييد لأشخاصهم فحكموا » .

● وقبل أن تنتهى سنة ٥٣ كان جميع الثوار يحكمون .. وكان جميع رجال « العهد البائد » مبعدين أو معتقلين فى السجون ...

يعيش نجيب .. يسقط نجيب

- احتفلت مصر بأول عيد للثورة في ٢٣ يوليو سنة ١٩٥٣ ...
- وكان على رأس قيادة حركة الجيش اللواء محمد نجيب ...
- يقول د . ثروت عكاشة : « كان الرئيس محمد نجيب رحمه الله قائداً مرموقاً في الجيش وذلك لأسباب ثلاث : أولاً خلقه الرفيع .. ثانياً ثقافته الواسعة .. فقد كان خريج كلية أركان حرب وحاصلاً على ليسانس الحقوق وكان يجيد أكثر من لغة .. وثالثاً شجاعته الفائقة في أثناء القتال في حرب فلسطين التي نال عليها أرفع الأوسمة كما ظفر بتقدير الضباط واحترامهم .. ما من شك بأن محمد نجيب كان على علم بتنظيم الضباط الأحرار وعلى علم بأسماء العديد من الضباط في التنظيم ولكنه لم يبيع قط باسم أي منهم .. وكان يعطف عليهم جميعاً ويعاملهم وكأنهم أبناءه .. وفي ١٩ يوليو ٥٢ .. توجه إليه جمال عبد الناصر وعبد الحكيم عامر .. ليلبغاه أنه قد تقرر القيام بالثورة أو الانقلاب أو الحركة - أو كما نشاء - في اليوم الخامس من شهر أغسطس .. فيبدون تردد ويدون تمحيص .. قبل المسؤولية التي أسندت إليه بشجاعة .. مما جعل موقعه في قائمة الأعمال البطولية التي يستحق عليها أن يلقب بفائد الثورة .. التي كان جمال عبد الناصر صانعها » .
- وأسأل إسماعيل فريد : التقى اللواء محمد نجيب بمن أسموهم برجال العهد البائد .. مثلاً التقى بالزعيم الراحل مصطفى النحاس كما التقى بالراحل الهضيبي .. وآخرين .. بحكم اقترابك منه ماذا تقول ؟
- « دول كثيرين جداً .. البلد كلها جاءت .. يعني الكل كان يتقرب وهم ليسوا عارفين اتجاهاتنا .. كله يتقرب للثورة وده سبب من أسباب الفساد بتاع الثورة .. إن السياسيين لما دخلوا وكل واحد يتكلم على كيفة .. كل واحد يعطى توجيهات .. والقوانين وخلافه .. من جميع الاتجاهات .. وكله عاوز يركب وعاوز يسيطر .. الأحزاب الوحشة والأحزاب الكويسة .. كل ده من أسباب انفصال الثوار بعضهم عن بعض .. والخلافات بيننا وبين بعضنا » .

• وتتابع الأحداث .. واكتسب الرجل شعبية عريضة في خلال شهور قليلة .. وكانت الجماهير تهتف في كل مكان « يعيش محمد نجيب » .. واقترن اسم الرجل بالنجاحات الأولى التي أحرزتها الثورة في كل ميدان ...

• وأسأل إسماعيل فريد : هل كنت الباور أو سكرتيره العسكرى في أثناء رئاسته لمجلس القيادة أم في أثناء رئاسة الجمهورية ؟

• انتقلت معاه في جميع المراحل .. وهو قائد عام .. وهو رئيس مجلس الثورة .. وهو رئيس مجلس الوزراء .. وهو رئيس الجمهورية .. بعد ١٨ يوليو ٥٣ لما صدر قرار الجمهورية .. وصدر بعدها قرار تعيينه رئيساً للجمهورية .. بعد فترة الوصاية والانتقال .

• ويضيف إسماعيل فريد : « طبعاً الكلام اللى يقول إن إسماعيل فريد كان ماسكاً العصايا من النصف .. إسماعيل فريد زى ما كتبها أحد الكتّاب فى « الآن أتكلّم » .. أنى أنا كنت عينا على نجيب لصالح عبد الناصر .. ورفعت عليه قضية وكسبتها واعتذر فى المحكمة .. قال أنا لا أقصد حاجة ضد إسماعيل فريد .. إحنا عارفين وطنيته وعارفين مركزه ولكن ده اللى سمعته واللّى شفته .. كان وضعاً غريباً من خالد محبى الدين إنه يتكلم مثل هذا الموضوع .. طبعاً خالد محبى الدين هو شيوعى وماركسى .. وخبلى الشيوعيين هم اللّى عملوا كل حاجة .. حتى دورنا فى توزيع المنشورات أنا وعباس رضوان لم يذكره إطلاقاً » .

• ويقول رياض سامى : « إسماعيل فريد فعلا كان عين على محمد نجيب .. وقلت لنجيب : كيف ترضى لسكرتير عسكرى أن يقول لفؤاد وياسين سراج الدين ببساطة : « الرئيس مش فاضى ونحدد بعد ذلك ميعاداً » .. فرد نجيب : « أنا ما بأعملش أى حاجة غلط علشان أخشى منه » .. لكنه كان عين عبد الناصر على محمد نجيب » .

• ويقول حلمى سلام : « قيل إن إسماعيل فريد كان عين عبد الناصر على نجيب لإنه من أولاد عبد الناصر .. لكن إسماعيل أحب نجيب فأصبح ولاؤه أكثر لنجيب » .

• ويقول كمال الدين حسين : « محمد نجيب .. رجل حرب كويس فى حرب فلسطين وكان شجاعاً فى الحرب وإحنا كلنا احترمناه ورشحناه علشان يكون رئيساً للنادى .. وقيل ترشيحه ليكون رئيس للنادى .. دى شجاعة برضه .. وكنا عاوزين رمزاً .. إحنا كنا صغيرين .. أنا كان سنّى ٣١ سنة .. أكبر واحد كان ٣٥ .. علشان فيه ناس تقول دول شوية عيال جايبين يعملوا ثورة وحاجات من دى .. فكان محمد نجيب رمز للعملية دى .. وكنا بنقول إنه رمز .. وكنا لما بيمشى فى موكب كنا إحنا نركب على العربية زى الحرس اللّى ببحرسه .. الموتور يسعنا .. وتأخذ ضرباً ولم تكن نبص لنفسنا إطلاقاً فى هذا الموضوع .. لكن هو كان شغلته أنه يطلع من البيت إلى المكتب بموتوسيكلات والناس تصفق .. ويروح مستشفيات ويروح الجمعيات ويفرّق فلوس .. وإحنا هلكانيين من الشغل .. ولا أحد دريان .. هو بدأ يستغل العمليات دى .. وبدأ يظهر » .

* **ويقول وجيه أباطة :** « نجيب كان رجلاً عظيماً وكان طبيباً قوياً .. وأنا لا أقول هذا من فراغ .. أنا كنت مدير مكتبه للشئون العامة .. فى الوقت الذى كنت فيه مدير الشؤون العامة للقوات المسلحة .. كنت مدير مكتب محمد نجيب للشئون العامة » .

* **وأسأل فريد عبد الخالق :** علاقة الإخوان بالرئيس محمد نجيب ؟

* « كانت علاقة حسنة .. وكانت مع الثورة .. لأن محمد نجيب كان يتمتع باحترام وتقدير منهم .. وهو انضم للضباط الأحرار قبل الثورة .. مش بفترة طويلة قوى .. ومش قصيرة .. انضم لهم وكأنه منهم .. فهم وجدوا أنه صورة مطمئنة عند الجيش وعند الشعب .. فهم أstoodوا إليه المسئولية ليسير بالتجربة .. لما أنسوا إليه » .

● **وعقدت أول مباحثات مع الإنجليز للجلاء ولكنها توقفت .. وتوترت العلاقة بين مصر وإنجلترا ...**

● **وكانت العلاقة قوية بيننا وبين السودان .. وتعلق أهل السودان الشقيق .. باللواء نجيب .. لأنه من مواليد جنوب الوادى ...**

* **ويقول إسماعيل فريد :** « كانت شخصية نجيب محبوبة لأن والدته سودانية وهو عايش فى السودان واختلاطه بالسودانيين كبير ومعرفة بهم كبيرة .. وكان من يحضر من السودان لازم ينزل عنده ولازم يأكل عنده الويكة والحاجات السودانية » .

● **وكان اللواء محمد نجيب قد وقع اتفاقية السودان ...**

* **ويقول أمين شاكر :** « الذى جاب الاستقلال للسودان هو عبد الناصر فى أثناء المباحثات .. وأنا قاعد بجانبه .. رئيس الوفد البريطانى سأله سؤالاً .. أحب أن يخرج .. قال له إحنا ما نقدرش ننسحب من وادى النيل كله فلما السودان وإما مصر .. فقال له السودان .. فكانت مفاجأة شديدة جدا للجماعة الإنجليز .. وخرجوا الجماعة الإنجليز من السودان .. وراح للسودان الاستقلال على طبق من ذهب » .

● **وعرفت الشهور الأولى من عام ٥٣ بداية الخلافات والاختلافات بين محمد نجيب وأعضاء مجلس قيادة الثورة .. الذين نجح جمال عبد الناصر - مؤسس حركة الضباط الأحرار - فى تكتيلهم حوله ...**

* **ويقول مصطفى كامل مراد :** « إحنا كنا بنحب محمد نجيب قوى .. لأنه كان شخصية لطيفة .. لما تقعد معاه كأنك تعرفه من ٢٠ سنة .. كان متواضعاً محبوباً .. كان يمثل جيل الآباء بالنسبة لنا .. يعنى كان فارق السن لا يجعل العقلية متفكة .. وبعدين ثورة الشباب .. فلم يحدث انسجام .. كان لابد إن واحد فىهم يسيطر على الثورة .. عبد الناصر استطاع أن يسيطر وأن يبعد محمد نجيب .. وإحنا كنا معاه بالرغم من حبنا لمحمد نجيب .. لكن وجدنا أن مصلحة الثورة تقتضى إبعاده » .

• **ويقول كمال الدين حسين :** « يعنى نحن نقول ثورة .. يقول لا تقولوا ثورة .. قولوا حركة مباركة .. ليه ؟ علشان فى الثورة رأس المال الأجنبى يهرب .. عرفوا الناس إن فيه خلاف .. وإن فيه مركز القوة .. بدأوا اللي مش عاوزين نجاح الثورة ينضموا إلى نجيب وصفقوا له .. من الأحزاب كلها بلا استثناء .. بعض ضباط الجيش اللي لم يدخلوا فى العمليات .. قالوا الحكاية سهلة ننضم .. بدأ هو يعمل ويتعصب لنفسه أكثر من اللازم .. قال مش أنا قائد الثورة ؟ ضحكنا .. وبعدين لما عيناه رئيساً للجمهورية .. بكى وكان بيقول أنا عملت إيه علشان أستاهل أبقي رئيس جمهورية .. كان أقصى ما يتمناه أن يكون وزير حربى مثلاً ولأ رئيس أركان حرب .. لكن هو أدى الدور بتاعه .. لكن الذنب مش ذنبه .. فرق كبير فى السن بينه وبيننا .. فرق كبير فى التفكير بيننا .. لم يكن ممكن رأيته يتنفذ فى هذا الوقت .. واللى يقول لك هو كان مع الديمقراطية .. هو فى الأول لأ .. لم يكن مع الديمقراطية .. كان معانا لغاية آخر لحظة .. لدرجة كان موافقاً على « لا رجوع للأحزاب ولا عودة للدستور .. » طيب ما إحنا أول ناس نتحاكم بدستور ٢٣ .. لأن إحنا شيلنا الملك وغيرنا النظام . »

• **ويقول أمين شاكر :** « محمد نجيب مالوش دعوة بالثورة .. أنا كنت أركان حربى .. وأنا بأحبه جداً رحمة الله عليه .. إحنا صحبناه من النوم بعد ما نجحت الثورة .. وبعد ما احتلنا البلد عسكرياً .. القاهرة على الأقل .. إنما فى هذا التاريخ لعلك تعلم .. الناس كان السن له عندها قيمة معينة .. فقلنا نجيب رجل كبير فى السن يكون مقدمة لنا .. هو الواجهة بتاعتنا .. فكرنا فى فؤاد صادق .. وفكرنا فى محمد نجيب .. أنا رحلت لفؤاد صادق لقيته متردداً جداً .. رحنا لمحمد نجيب .. فنجيب وافق فوراً .. بعدين .. « يحيا نجيب منقذ مصر .. يحيا نجيب منقذ مصر » .. وحصلت مصر « وهو يشاور بالبرنيطة .. فقام صدق أنه منقذ مصر وإن هو اللي عمل الثورة .. وحصلت أزمة بينه وبين مجلس قيادة الثورة .. مين اللي يبقى صاحب النفوذ وصاحب الكلمة العليا .. قام عبد الناصر بنفسه .. وبدون أى ضغط من أى جهة .. تنازل عن قيادة المجلس لمحمد نجيب .. فأصبح نجيب قائد مجلس قيادة الثورة ورئيس وزراء .. وبرضه اتضح إن ده لا يكفيه .. ليه ؟ لإنه عاوز يرجع الأحزاب القديمة .. وهو اللي يعين الحزب ده .. وهو اللي يشيل الحزب ده .. وهو يبقى يجمع الناس حواليه ويخلينا نظهر أمام الناس بأننا ضد الديمقراطية .. وهو كان تفكيره إن رجوع الأحزاب هو رجوع للديمقراطية » .

• **ويقول أحمد أبو الفتوح :** « كان الشيوعيون يعتقدون أنهم عن طريق أحمد فؤاد وخالد محبى الدين وبعض الضباط الشيوعيين سيستطيعون السيطرة على الحركة .. فلما اتضح لهم عكس ذلك نشطوا ضد عبد الناصر وضد حركته بل كانوا فى مقدمة من هاجموا الحركة فى منشورات سرية .. وقد بدأوا بالهجوم خلال شهر سبتمبر من سنة ١٩٥٣ .. إذ أصدر أول منشور لهم ضد الحركة وضد زيارات محمد نجيب للأقاليم .. وكان المنشور تحت عنوان « رحلة البهلوان فى آخر الزمان » . »

• **وبعد (إبعاد يوسف صديق وعبد المنعم أمين من مجلس القيادة .. وقضية ضباط المدفعية**

ومحاكمة الدمنهورى .. رفض نجيب التصديق على حكم إعدام إبراهيم عبد الهادى أحد كبار زعماء العهد الملكى ...

• وبدأت الإحتسامات .. وحمل خالد محبى الدين لواء المعارضة فى مجلس قيادة الثورة ...

* ويقول خالد محبى الدين : حدث الخلاف فى أزمة مارس وهو صراع على قضية الديمقراطية كما هو معروف فى التاريخ .. بعدما انتهت أحداث مارس .. كان لا يمكن أن أنا أقعد .. لأنه فيه خلاف .. خلاف على منهج الحكم وعلى أسلوبه .. وإن لم يكن خلافاً على أهداف مصر ..

* حضرتك كلمتنا عن أزمة مارس فى سطر .. ونريد منك سطوراً كثيرة مثلما كتبت بقلمك « الآن أتكلم » ؟

* « هو أنا أصلى من الأول كنت راغياً أن الثورة على وجه السرعة - وده الخلاف - تعود إلى الوضع العادى ونحكم بأسلوب تقليدى .. برلمان وانتخابات .. والزلاء كانوا يرون أن عليهم واجبات يؤدوها .. ودى وجهة نظر .. قيل أن نعود إلى الوضع العادى .. طبعا الفكرتان انتهت إزاء هذا إلى ما يسمى بفكرة الانتقال .. ليه فكرة الانتقال ٣ سنوات .. كانت فيه اتجاهات إنها تمتد .. فيه ناس بتقول إنها نقل أو تقصر .. وبين الاثنين كان فيه صراع .. وفيه ناس كان رأيها إن الحكم يجب أن يكون ثورياً .. يعنى بدون الالتزام بالإجراءات الشرعية والدمشور والانتخابات .. وفيه رأى بيقول لأنه لابد أن يكون هناك دستور وقانون وانتخابات .. الخلاف كان موجوداً بين الاتجاهين .. والصراع دخل فيه جوانب أخرى .. محمد نجيب كان الأول مؤيداً للاتجاه الأول .. وهو البقاء والاستمرار والإجراءات الثورية .. لكنه لما اصطدم غير .. أنا كان موقفى واحداً من الأول .. كنت حريصاً أنه من الأول إن أحسن حاجة لمصر أن يعود الوضع بسرعة إلى الوضع الطبيعى .. ودى وجهة نظر .. ناس كان بيروا إنها تبقى غلط دلوقتى .. لكن أنا بأتكلم عن ساعتها .. بصرف النظر إيه الصواب وإيه الخطأ .. وكان رأيهم أنه كان لازم الثورة تؤدى واجبتها .. ونعمل الإصلاح الزراعى .. والتصنيع .. وكل ده .. وبعدين نتكلم عن الموضوع الآخر .. الديمقراطية .. فالصراع حصل .. »

* ويقول رياض سامى : « قرأت كتاب « الآن أتكلم » .. ونكر فيه حقائق كثيرة .. أما الفترة لما تأزم الموقف مع نجيب .. وأبلغه قائد الحرس محمد رياض وقال له فيه مظاهرات حنطلع بكره .. وده كان آخر تحرك لإنهاء الوضع وإعادة الأحزاب .. وقالوا إنه فيه مبالغ دفتت .. وإن البلد حتتأمر عليك .. وكان محمد نجيب يشعر أنه وحيد فى الميدان .. فى كفاحه لعودة الديمقراطية .. وعودة الأحزاب .. واستدعى خالد محبى الدين وقال له استعد .. وخالد محبى الدين وقف معاه .. لكنه لم يصمد للنهاية وسافر إلى الإسكندرية وقعد يومين ثلاثة .. وإن جاز أنكر للتاريخ أن الرئيس محمد نجيب كان جديراً بالتقدير من الشعب المصرى والسلطات المصرية .. ما كان يجب ما عمل فيه خصوصاً بعد التتحية .. أقولها لجميع إخوانى الضباط الأحرار ولأعضاء مجلس الثورة .. أن لب الخلاف بين محمد نجيب والآخرين من

زملاته أيام الثورة .. كانت الديموقراطية .. كان مصراً عليها لآخر أيامه قبل أن يعتقل في المرج ..

• **يقول إسماعيل فريد :** « كانت البلد حتروح .. كان الجيش حيزرب فى بعضه .. كان الطيران تحرك فعلاً .. علشان يضرب السوارى .. والدبابات كانت مدورة والمدفعية مصوبة مدافعها على سلاح الفرسان نتيجة الاختلافات بتاعة خالد محبى الدين .. اللى هو طبعاً كتبها حلو وكتبها له رفعت السعيد .. الرجل الماركسى .. ليس هذا كلام ثورة .. ولازم الناس تعرفه صراحة من غير تدخل الرقابة عندكم ع هذا هو الوضع .. كنا سوف نفتل مع بعض .. وبالتالى الشعب سوف يقتل مع بعضه .. وبالتالى الإنجليز سوف يدخلون من السويس ويحتلوا البلد مرة ثانية .. إسماعيل فريد كان لا مع ده ولا مع ده .. إسماعيل فريد مع الجميع .. علشان نبغى كتلة واحدة زى ما دخلنا كتلة واحدة .. وبإما أنا أصلحت ببى جمال عبد الناصر وعامر مع محمد نجيب .. بفضل الله وعون الله .. ولا يعلم هذا الكلام الكثير من الضباط أعضاء مجلس الثورة الكبار زى بدادى وزى زكريا .. لا يعلموا حاجات كثيرة أنا كنت بأعملها .. وأنا لا أبغى شهرة ولا حاجة » .

• وفى ١٤ يناير سنة ٥٤ أصدر مجلس الثورة قراره بحل جماعة الإخوان بتهمة التآمر مع السفارة البريطانية لقلب نظام الحكم ...

• **ويقول أمين شاكى :** « والله اللى حدث إن عبد الناصر كان ماشى معاهم فعلاً بما يرصى الله .. وهم زى ما قلت لك لهم قدرات كبيرة جداً فى الاتصال بالمواطنين .. وكانوا ناجحين فى هذا إلى درجة كبيرة .. لإن الثورة كانت بتعمل كل حاجة بتعود على الناس بالخير .. لما أحسوا باحتياج الثورة لهم .. قام قال لك لازم بيغى لنا دور مهم ومعترف به .. فلقبت الهضبيى بيكلمنى فى التليفون .. وقال لى أنا عاوز أقابل السيد جمال عبد الناصر ضرورى وبسرعة .. فحددت له ميعاداً وجاء ودخل .. وعبد الناصر قال لى افعد ففعدت .. وبعدين من ضمن الكلام .. لقيت الهضبيى يقول له : والله أنا جاى علشان أقول لك إن أى قرارات تعملوها .. وأنا ما بقولش إن القرارات دى سيئة .. لكن أى قرارات بتتخذوها ما تعلنوهاش ولا تتخذوها قبل ما تأخذوا رأينا .. لأن إحنا أمام الناس أصحنا مسئولين عن اللى بيحصل فى مجلس قيادة الثورة .. فلازم تأخذوا رأينا .. فالرئيس حتى اتضايق .. وكانت دى بداية النهاية » .

• وكان حل جماعة الإخوان .. هو نقطة التحول فى موقفهم من الثورة .. واعتقلت الحكومة سنة ٥٤ المرشد العام حسن الهضبيى ...

• وأعلن زكريا محبى الدين وزير الداخلية أن عدد المعتقلين ٤٥٠ ، واتهم الإخوان بتدبير مظاهرة مسلحة فى جامعة القاهرة يوم ٢٨ فبراير سنة ٥٤ وأوقفت الدراسة فى الجامعات المصرية ...

• وكان تعيين الصاغ عبد الحكيم عامر - كما سبق أن ذكرنا - قائداً للجيش بناء على رغبة جمال عبد الناصر ضد رغبة نجيب ...

● وشعر محمد نجيب باستحالة استمراره مع مجلس القيادة .. وشكا من تعرضه لمضايقات عديدة ...

● وكانت شكوى أعضاء مجلس قيادة الثورة من نجيب لأسباب مختلفة ...

● وأسأل إسماعيل فريد : أول خلاف كان بين الرئيس نجيب ومين ؟

* « هو فى الواقع أول خلاف كان مع صلاح سالم .. كان إحدى اهتمامات نجيب باستمرار إن خطبه تذاع كذا مرة .. طيب ما أنت لك كذا خطبة .. فكان يهتم إن الخطبة دى لماذا لا تذاع .. صلاح سالم كان يبذيع الخطب اللى إحنا محتاجين لها كثورة ومحتاجين لها كشعب .. لم يكن يتصور أن ده حيزعل نجيب .. لدرجة إن ابنه يوسف قال له : أنا كل ما أفتح الإذاعة ألقى نجيب .. ما فيش حاجة ثانية .. قلت له أهو شايف ابنك من دمك وزق .. قال لا لازم الخطب تذاع .. كان هنا الخلاف شديداً جداً .. وأنا قلت هذا الكلام فى اجتماع مجلس قيادة الثورة .. وينكر هذا بعض الذين كتبوا كتب النهارده .. إننى جيت استقالة نجيب .. وقلت له خذ أدى الاستقالة بتاعتى .. أنا فضلت أترجى فيه وعيط .. والبلد ومش البلد .. إلى آخره .. وسلمت الاستقالة لجمال حسين باعتباره سكرتير مجلس الثورة .. لم أعطيها لجمال عبد الناصر إلا بعد ما تفاقم الخلاف واشتد خالص .. وقدمت استقالتي .. قلت على نجيب إن هو العظيم المهدى المنتظر .. والشعب سمع كلامكم على أنه الرجل أعظم رجل فى العالم .. النهارده نقول عليه أوحش رجل إزاي ؟! إما فى الأول كنا كذابين .. يا إما دلوقتي إحنا بقينا كذابين . »

● ووقع فى فبراير سنة ٥٤ حادث مفاجئ هو استقالة محمد نجيب .. وفوجئ الناس بذلك المنشور فى الصحف .. وكان صلاح سالم مسئولاً عن الإرشاد القومى ...

● ويقول توفيق عبده (إسماعيل) : « هم كانوا يجتمعوا كثيراً بدون محمد نجيب .. كانوا بيتفقوا .. الجلسة بالليل .. وفيها محمد نجيب .. يبقوا على اتفاق قبل ما يدخلوا بحيث أن محمد نجيب ما يبقاش رأي له تأثير كبير فى القرار وكان يُبلغ بالاتفاق .. وإذا أحب بتناقش تبقى الأغلبية ضده .. وهو كان رجل ديموقراطى .. فيرضخ لحكم الأغلبية .. واستمرت الأمور فى الفترة التى عاشها بهذا الشكل إلى فبراير ٥٤ لما ما عجبوش الحال واستقال .. والأزمة دى نشأت أساساً لما محمد نجيب قدم استقالته .. لاحظ المرحلة الأولى الـ ٥ - ٦ شهور الأولى من الثورة لحد يناير ٥٣ .. كان لنا اجتماعات دورية يبحضرها جمال عبد الناصر وعبد الحكيم عامر وكمال حسين وصلاح سالم وحسين الشافعى وخالد محبى الدين وثروت .. اجتماعات مستمرة ودورية نناقش فيها فى أمور البلد كلها .. إنما بعد حركة المدفعية بتاعة يناير ٥٣ أوقفت هذه الاجتماعات .. إنما كان فيه علاقات للضباط الأحرار ببعض .. واستمر الحال بهذا الشكل لسنة .. القيادة أو مجلس قيادة الثورة بيؤدى أدواره تمام .. ما فيش اجتماعات إلى فبراير ٥٤ .. محمد نجيب قدم استقالته .. فيلجأوا لمين علشان يحاولوا يحموا ظهرهم فى الجيش .. فقالوا الضباط الأحرار .. فجابوا الضباط الأحرار فى مجموعات مختلفة .. مجموعة المدفعية .. مجموعة المشاة .. ومجموعة الفرسان أصرت على عدم قبول الاستقالة وطلبت

محاكمته إذا كان أخطأ يحاكم .. ولو لم يخطئ لازم تتعاونوا مع بعض ولازم نسرع بخطوات إعداد الدستور والديموقراطية .. وكانت الاجتماعات في مجلس قيادة الثورة وبعض الضباط .. رغم صغر سنهم .. كانوا يقولوا كلام كثير من اللي بسمعه النهارده بعد ٤٠ سنة من الثورة عن الديموقراطية وحرية الرأي .. وندى الشعب حقه أن يشارك ويختار .. في الحقيقة بعض أعضاء مجلس قيادة الثورة منهم جمال سالم اعتبروا ده تطاولاً واحتدوا في المناقشة على الضباط الأحرار .. انسحبنا ورجعنا أسلحتنا .. أنا كنت في الكلية الحربية .. بقية السلاح رجعوا .. إنما الضباط لم يعجبهم .. شافوا في الجرنال الصبح .. قبول استقالة نجيب .. طلب احنا لا نقبل استقالته .. وبقلم الاستقالة ليه .. قالوا لأ .. يبقى إحنا لا يصح أن نقعد في الجيش .. لازم نستقيل .. مانستقلش لوحدها .. نخلي كل الضباط تستقيل .. فعلوا اجتماعاً ودعوا حسين الشافعي يحضر .. ماجاش .. انفض الاجتماع وفيه نوع من التمرد ..

• **وأسأل عبد اللطيف بغدادى : هل كنت من المؤيدين لفكرة أنه يبقى رئيساً للجمهورية ؟**

• « محمد نجيب عملناه رئيساً للجمهورية .. لكن حصل خلاف على السلطة .. وبعدين محمد نجيب جنبناه .. عندما كنا ضباطاً صغيرين ماحدش يفتتح بينا .. فلحنا جنبناه على إنه كبير .. وكنا عملنا انتخابات نادى الضباط وإحنا كنا وراه ونجناه وبقي موجود .. ضابط كبير له سمعته الكويسة .. فى حرب فلسطين كان مقاتلاً .. هو اعتبرنا إحنا أركاننا حربه .. وابتدا يتعامل على هذا الأساس .. ولما حصل خلاف فى الأول وحصلت له شعبية ورد فعل الناس معه .. ابتدا يطلب سلطات ديكتاتورية .. باين كل ده تفصيلياً فى مذكراتي .. من هنا أخذنا موقفاً مضاداً له .. وحصلت صراعات .. وما أقدرش أحكى لك ٨٠ صفحة تفصيلياً شفهيّاً » .

• **ويقول حسين الشافعي :** « هو محمد نجيب رجل شجاع له دوره اللي أداه ولا أحد ينكره .. لكن هو كان الحلقة اللي ممكن تتجمع حولها العناصر المضادة للثورة .. يعنى لقوا الحلقة اللي ممكن من خلالها ينفذوا .. وهو بحكم تكوينه .. أصله كان رقيقاً وبشوشاً .. فهو أخذ المسائل بأسلوب طمّع الناس .. ومافيش شك أنه لما قدم استقالته يوم ٢٣ فبراير سنة ٥٤ .. كان بإيحاء من سليمان حافظ والسنهوري .. ليه ؟ لأنهم قالوا له إنت الكل فى الكل وإنت رئيس الثورة » .

• **ويقول إسماعيل فريد :** « الخلاف بدأ طبيعياً .. طبعاً فارق السن دى واحد .. السلطة ٢ .. وأنا لما أكلّم عن الثورة بأقول الحقائق لأنه لم يكن هناك تخطيط .. مش أكثر إن إحنا بننظف الجيش ونطهره .. كان كلامنا على هذا الأساس .. ولما نجحنا نجاحاً كبيراً .. وبدأنا نمسك الحكم .. بدأ يتعين كل عضو فى مجلس الثورة فى وزارة من الوزارات .. كمال حسين مسك التربية والتعليم .. صلاح سالم راح الإرشاد .. زكريا محبى الدين مسك الداخلية .. بدأ يدخل فى دماغنا السلطات من هنا .. هو بدأ الخلاف الفعلى الحقيقى ما بين أعضاء مجلس الثورة أنفسهم ونجيب .. لأن نجيب كان يحضر ١٧ حفلة فى اليوم أو ١٠ اجتماعات وفيه شغل ماشى فى الدولة .. والموظفين والجيش والطلبة والتعليم والصحة .. مين بيدير هذا الكلام ؟ وأصبحت سلطة القيادة لمجلس الثورة للى قاعدين بيعملوا .. وهو منفصل عنهم فى جانب آخر هام جداً ..

لا يمكن إنكاره .. ولا يمكن الاستغناء عنه .. وهم شغاليين .. هنا حصل الانفصال .. يبقى أصبح أنتم لماذا لا تقولوا لى على الحقة دى وطيب إحنا نشوفك فين .. ثم أنت قلت تصريح كذا وكذا .. من هنا دب الخلاف » .

• **ويقول أبو الفضل الجيزاوى :** « هو أنا رأى بصريح العبارة .. إن كل واحد بيلعب دوره لازم يأخذ وضعه الطبيعى .. فمما لا جدال فيه وبدون مناقشة وبدون جدل أن القائد الحقيقى للثورة هو عبد الناصر .. وهو قائد التنظيم وهو الذى كان مع الضباط .. وهو الذى أعطى ساعة الصفر .. وهو الذى قال اخرجوا .. فالحظ الأساسى لعبد الناصر أن هو جاء برتبة أكبر علشان تبقى أمام الراى العالمى فيه واحد لواء .. هو كان بكياشى (مقدم) فجاب محمد نجيب وعمله رمز للثورة .. أو من ناحية الشكل العام هو قائد الثورة .. الحقيقة غير كده .. والحقيقة إن عبد الناصر هو المنفذ والمحرك .. محمد نجيب كان لا يملك شيئاً من أمره .. طبعاً محمد نجيب وافق .. وهو رجل مهم قيل فيه فهو رجل عسكرى مضبوط وشرىف ونزىه وكان معاناً فى حرب فلسطين مثلاً للجندى والرتبة الكبيرة العظيمة .. وأصيب فى حرب فلسطين وأخذ نياشين .. بعد كده ظهر الخلاف الحقيقى .. لابد أن يظهر وأن يطفو على السطح .. مَنْ قائد الثورة : عبد الناصر ولا محمد نجيب ؟؟ فاصطدم الاثنان .. عبد الناصر باعتباره هو المرتبط أكثر مع الضباط ومع التنظيمات كلها استطاع أن يكسب الجولة وأن ينتصر على محمد نجيب .. وأنا أيدت عبد الناصر لاستمرار الثورة فقد كان القائد المحرك لهذه الثورة .. مش معقول حنجيب محمد نجيب ونخله بمسك زمام الأمور .. وهو بعيد عن هذه الأفكار وهذه الأحداث كلها » .

• **ويقول خالد محبى الدين :** « لما تفجرت أزمات محمد نجيب .. والصراع على السلطة .. واصلت فيها عمل الديموقراطية والعودة إلى الحياة النيابية ووضع الدستور والإسراع به وفترة الانتقال تقصر .. العوامل دى بتفرض نفسها على الظروف ما حش بيفرضها .. فانفجر الخلاف مع محمد نجيب .. انفجر باستقالة محمد نجيب وانفجر بالاتجاهات اللى كانت موجودة » .

• **ويقول فتح الله رفعت :** « هو الذى كان مؤيداً للرئيس محمد نجيب هو خالد محبى الدين » .

• **وأسأل خالد محبى الدين :** هل كنت مع الرئيس محمد نجيب قلباً وقالياً ؟

• « كلمة » كنت مع الرئيس نجيب قلباً وقالياً « دى مش صحيحة .. إحنا اتفقنا أنه الأول .. كان رأيه إن فترة الانتقال تبقى ٥ سنين وتمتد لأنه هو كان علاقته حسنة بالمزلاء وما فيش مشاكل .. لما المشاكل بدأت بدأ يتجه اتجاهاً آخر .. هو وجد لأنه هو شخصية محبوبة إنه لو أجريت انتخابات .. الناس حتنخبه .. فمايفش بقى من الديموقراطية .. لكن كان عنده الجانب الخاص بتاعه .. أنا مختلف عنه .. حتى لو بنتفق فى فكرة عودته هو بينظر لها نظرة وأنا بأنظر لها نظرة أخرى .. فإحنا كنا بملتقى ولكن ما نقدرش نقول قلباً وقالياً .. لأنه هو كان عنده اتجاهات أن يصفى المجموعة دى وأنا ما كنتش عاوزة يصفىها .. فمانقدرش نقول إننا معاه قلباً وقالياً ..

لكن التقينا فى أهداف بلا جدال .. والزملاء كانوا فى اتجاه آخر .. فمن هنا نقدر نقول إن أزمة مارس كانت خالد ونجيب فى حنة .. وباقى المجموعة فى حنة أخرى .

• **وتداعت ردود فعل الاستقالة .. داخل الجيش بحركة فى سلاح الفرسان .. وقامت محاولة لقلب نظام الحكم بقيادة أحمد المصرى ...**

• **ويقول جمال منصور :** « دعى ضباط سلاح الفرسان إلى اجتماع عاجل فى الميس الأخضر .. حضره عبد الناصر ودارت مناقشات واسعة للمطالبة بعودة الحياة النيابية .. وأن يبتعد الجيش عن الحكم » .

• **يقول خالد محيي الدين :** « كون أنا فى سلاح الفرسان .. بأقول رأبى ده مع الضباط .. والضباط الفرسان كانوا مقتنعين بوجهة النظر دى .. بأن من أنفسهم .. أنا من يمثلهم .. وكانوا مقتنعين .. فكان اتجاه الضباط الفرسان .. كانوا يمثلوا فى الثورة الاتجاه الديموقراطى .. بقى باين على طول الصراع اللي دار فى ٥٤ .. إن ضباط الفرسان كانوا يقصدوا اتجاءاً وبقية الضباط الأحرار للقوات المسلحة فى اتجاه .. وبعدين الوضع العادى إن الاتجاه الآخر هو اللي كسب .. إيه اللي كان حيحصل .. ماحدش يعرف .. القديم حيعود بالكامل ولا نص نص .. والجيش حيجمع إيه ؟ ماحدش يعرف .. يعنى كان فيه أوضاع صعب التنبؤ بها .. بس إحنا بنحكى ما جرى .. الصراع ده جرى .. وانتهى بالنتيجة دى .. الناس تؤرخ بقى .. ونحن نحكى عن الحدث » .

• **ويقول توفيق عبده (إسماعيل) :** « عبد الحكيم عامر فى هذه الفترة مسك مسدس وقال أنا حانتحر إذا كانت الأمور فى الجيش اللي أنا بأقوده تحصل إلى هذا الحد من التناحر والتناذب والخناقات .. أوقفوا كل حاجة وأنا حأتصرف كقائد للقوات المسلحة .. فهدأت الأمور وطلع الناس المعتقلين .. وألغى الحصار الموجود أمام سلاح الفرسان .. وبدأت عملية اقترابه من ضباط سلاح الفرسان .. عاوزين كلنا نتآلف مع بعض ومحمد نجيب حيرجع .. وإحنا نقعد معاه .. عندكم مانع .. لأ ماعندناش .. واستمرت الأمور إلى ٥ مارس .. ورجعت « ريماء إلى عاداتها القديمة » .. طيب ما هو معنى كده .. إن إحنا حنسيب محمد نجيب ويبقى سلاح الفرسان مشى كلامه .. فطلع بيان ٥ مارس بيقول حنعمل أحزاباً .. ورجع ثانى ٢٥ مارس استقالة مجلس قيادة الثورة ومانتقرش نعاون مع محمد نجيب » .

• **وأسأل أحمد المصرى :** هل قنت انقلاباً ضد الرئيس الراحل جمال عبد الناصر ؟

• **« نعم .. حدث فى أبريل ١٩٥٤ .. ولعل هذا السؤال حيجرنى إلى ملابسات الحكاية دى .. القضية بدأت حين انتهى مجلس الثورة إلى قرار بعزل اللواء نجيب .. وماكانتش قضية نجيب فى حد ذاتها هى المحك .. إنما كانت عملية تفرغ الثورة أولاً بأول من رجالها وأبنائها وقيادتها .. وقد تكررت هذه المسألة أكثر من مرة .. ووضع أن مجلس الثورة ببنتهجه نهجاً بعيداً جداً عن أهدافها .. ولعل أهمها من وجهة نظرى هى الديموقراطية والحرية العامة .. وبدأ**

الموضوع بالنقاش في مجلس الثورة .. استغرق حوالي ٨ - ٩ ساعات .. طلبنا فيه أنه يتراجع مجلس الثورة عن قراره بإقصاء نجيب .. مجلس الثورة أصدر قراره صبيحة اليوم التالي مباشرة من هذا النقاش لينهى فيه موضوع نجيب .. بل البيان الذي أصدره صلاح سالم إلى الأمة .. كان مليئاً بالمهاترات والثغرات وألفاظ لا تجوز .. وقررنا أن نقاش جمال عبد الناصر شخصياً في القرار الذي اتخذته مجلس قيادة الثورة .. ومحاولة الرجوع بالبلاد مرة أخرى إلى وضع طبيعي .. وبالتالي ينسحب مجلس الثورة من مكانه وينتخب رئيس جمهورية وتشكل وزارة ديموقراطية وطنية ويتعمل دستور للبلاد وتبدأ هذه الحكومة الانتقالية لـ ٦ شهور .. تكون كل هذه الإجراءات تمت وتعود البلاد مرة أخرى إلى النظام الديموقراطي .

• **عندما تقول قررنا وعملنا .. تقصد من ؟**

• « أقصد كتلة الضباط الأحرار في سلاح الفرسان بل وضباط سلاح الفرسان أيضاً .. الذين ناقشوا عبد الناصر في هذه الليلة .. كانوا حوالي ٤٠٠ ضابط .. وانتبهنا إلى أن صباح الغد سيصدر مجلس قيادة الثورة قراراً في شأن نجيب .. إما بالإبقاء أو بتغييرات .. وانتهت هذه الأزمة باعتقال عدد كبير جداً من الضباط .. وتراجع جمال عبد الناصر عن ٥ قرارات أرضتنا .. أصدرها هو شخصياً .. وهي العودة إلى الحياة الديموقراطية وعودة نجيب رئيساً لجمهورية برلمانية وتشكيل حكومة وطنية بقيادة خالد محيي الدين وإنسحاب الضباط الأحرار إلى الجيش .. وتعود الحياة المدنية للبلاد من جديد .. بعد ساعات من هذا القرار ألغوا هذا القرار مرة أخرى .. ألغاه جمال عبد الناصر ومجلس الثورة .. وفي ظني أنه أصدر قرار بعد كده في ٥ مارس .. يتراجع فيه عن كل هذا الكلام .. وأصبح الموقف سيئاً جداً .. وظلت البلاد لمدة شهر كامل تتصارع .. الكتل السياسية في الشارع .. تضطرب .. الصحافة تقول ما تريد أن تقول .. ولم يعد هناك ضابط ولا رابط إلى أن قبض علينا .. نسيت أقول قبض علينا صبيحة هذا اليوم .. التي هو انتهت فيه القرارات الـ ٥ .. وأفرج عنا بعدها بساعات .. نتيجة الضغوط الشعبية في الشارع .. البلد كلها بقت في الشارع .. بتطالب بعودة نجيب مرة أخرى .. القضية ليست قضية نجيب بقدر ما هي قضية نظام الحكم .

• **وقامت المظاهرات في الشوارع تهتف بحياة نجيب وضد عبد الناصر .. في كل من القاهرة والخرطوم ...**

• **ويقول أحمد حمروش : « انعكست خلافات مجلس الثورة مع نجيب على نفوس السودانيين ووصلت المشكلة إلى الذروة عندما استقال » .**

• **ويقول خالد محيي الدين : « كان عبد الناصر صامتاً دون حراك وإلى جواره حسين الشافعي يبيكي في صمت .. وقلت له : إيه يا جمال حنسيب البلد يحصل فيها مذبة .. فرد بهدوء وقال : والله أنا مش فاهم حاجة !! » .**

• **ويقول كمال الدين حسين : « فعلا في مارس ٥٤ كان يحصل انقسام في الجيش .. وحصل انقسام نتيجة الآراء المختلفة » .**

• وأسأل محمد على عبد الله ابن شقيقة اللواء محمد نجيب : أزمة مارس ٥٤ .. هل حضرتها ؟

• « حضرتها .. وأنا جايب لسيدتك صور منها .. كنت ضابطاً في القوات المسلحة برتبة ملازم ثاني بعد ما قدم استقالته .. هو استقال والجمهير قامت بروح عفوية لا بترتيب ولا بنظام ولا بأى حاجة من الحاجات دى خالص .. قامت بمظاهرات شديدة جداً أجبرت مجلس قيادة الثورة على رفض الاستقالة وإعادته ثانية إلى جميع وظائفه التى كان مستقياً منها بالكامل وهو كاتبها بالنص فى الاستقالة « من جميع الوظائف الرسمية » .. يومها رحت له البيت وكان كوالدى تقريباً وقعدت معاه .. وكان الناس ائلمت وماكانش حتى بعنوا له عريية علشان يرجع بيها لمكتبه .. ما أمكنش وصولها من كثرة العالم اللى كانت موجودة فى الشوارع .. وحوالين بيته فى الزيتون .. أذكر ذلك اليوم تماماً » .

• ويقول رياض سامى : « أقول لك موقفاً .. عندما أطيح بمحمد نجيب فى المرة الأولى .. زارنى فى الصباح الباكر .. ٧ صباحاً .. الدكتور « هرنيزويك » وهذا مدير وكالة ألمانية ومعها باقة من الورود .. وقال لى : « ألم تقرأ جرائد الصباح وعلمت بإزاحة محمد نجيب ؟ » .. ثم ذكر لى قولاً أعجبني .. قال لى : « إذا أراد شخص أن يقتل محمد نجيب لا يمكن أن يقتله إلا من الخلف .. ولو نظر إليه لا يمكن أن يصيبه أو يحاول قتله » .. كان تعبيراً عن انطباع الشعب بمحمد نجيب وتعلقه به » .

• ويقول على خليل : « وقامت مظاهرات كبيرة جداً تؤيد نجيب .. ورجع نجيب واسترد .. وخسر الجولة عبد الناصر .. واستعد لجولة أخرى » .

• ويقول أحمد طعيمة : « إحنا فى هذه الفترة كانت المظاهرات تجوب القاهرة .. إلى السجن يا جمال .. إلى السجن يا صلاح .. وعبد القادر عودة - الله يرحمه - ماسك قميصه الملوث بالدم والمطخ بالدم وطلع به فى شرفة عابدين ومعاه الرئيس محمد نجيب .. الأمور كلها تجري فى غير اتجاه هيئة التحرير وثورة يوليو .. وطبعاً فيه تعليل لهذا الوضع .. إن كل الأحزاب القديمة بغض النظر عن أسمائهم .. والإخوان والشيوعيين لما اتصلوا بنجيب حاولوا إنهم يكسبوه لصفهم كل منهم بغرض محدد .. هو أن يستغل محمد نجيب كلافنة لحين أن يثبوا إلى الحكم ويحققوا أغراضهم ثم يتخلصوا منه .. محمد نجيب لم يدري ولم يتصور أن كل المحيطين به دول واللى بيؤيدوه بياحوا أنهم يجعلوه يأخذ موافقاً ضد مجلس الثورة وثورة ٢٣ يوليو اللى هم جابوه أصلاً .. وزى ما اعترف وقال : « إنتم جيتونى وقمتم بكل حاجة .. وإننا اللى ضحيتوا » .. ولم يتخيل إن هو مطعم لهم وإن هو خطوة فى سبيل كل منهم .. الشيوعيون علشان يوصلوا للحكم .. والوفد يسترد نفسه ويسترد الحكم .. أو الإخوان المسلمين يثبوا إلى الحكم .. فنجيب استغل استقلالاً كاملاً فى هذه الفترة الحساسة » .

• ويقول رياض سامى : « محمد نجيب قال لى روح للهيبيى أسأله لو أصريت على عودة الأحزاب ما موقفه ؟ وكان موجود صحفى اسمه سامى الليثى .. وكنا فى الزوف .. وقلت له :

الرئيس محمد نجيب بعثني أنا .. فى كفاحه لدولتى لعودة الديموقراطية موقف سيادتك إيه ؟ قال لى لكل وقت ظروفه .. فنقلت لمحمد نجيب اللى دار بينى وبينه .. فقال لى : مش معقول هو يوافق على عودة الأحزاب علشان الوفد بيحى خصمه المعتاد .

• **ويقول إسماعيل فريد :** « أنا تركته بعد ما انحاز للإخوان وعودة الله برحمه خطب فى الشعب من شرفة عابدين .. قلت له هذا لا يصح .. لأن فيه خلاف مع الإخوان وأنت ومجلس الثورة وكل الثورة فى جانب .. والأحزاب السياسية والإخوان فى جانب آخر .. طبعاً إذا كانوا هم ببؤيدوك النهاردة لصالحهم ليس لصالحك وليس لصالح البلد .. لأنهم سوف يأكلوا الجزء الأول وسوف يدوروا على الجزء الثانى .. ده كان كلامى .. بعد هذا الكلام قلت له أحب أنك .. كان فيه قرار صدر من مجلس الثورة بتنحية جميع هيئة المكتب إلا إسماعيل فريد .. قال لى أنا أفضلك كده يا إسماعيل علشان لا يبقى فيه كلام عليك .

• **وأسأل مأمون الهضيبي :** ما رأى الإخوان فى عزل الرئيس نجيب ؟

• **« كان أيامها النزاع بين الإخوان ورجال الثورة كلهم .. محمد نجيب كان فى الأول مع رجال الثورة ضد الإخوان وبعدين لما انداروا عليه ولقى إنهم بيعزلوه ابتدا يحاول يقول إنه مع الحريات وإنه مع الإخوان .. ولكن طبعاً هو لم يكن فى ذلك الوقت له قوة فعالة .. حتى إنه يستطيع أنه ينفذ شيئاً فى هذا الوقت .. إنما هو أصلاً من رجال الثورة وكان معهم فيها .. وكان بالعكس .. ويقال إن الحل بتاع ١٤ يناير والاعتقال هو كان مؤيداً لهذا الإجراء .**

• **ويقول خالد محبى الدين :** « قرار حل الإخوان صدر بالإجماع وتنصل محمد نجيب من موافقته وهذا ليس مطابقاً للحقيقة .

• **ولم يجد رجال القيادة بدأ من قبول عودة نجيب .. واستبعدت فكرة تشكيل خالد محبى الدين للوزارة ...**

• **وأعلن البيان على الشعب وجاء فيه :** « يعلن مجلس قيادة الثورة حفاظاً لوحدة الأمة .. عودة اللواء أركان حرب محمد نجيب رئيساً للجمهورية .. وقد وافق سيادته على ذلك .

• **ويقول خالد محبى الدين :** « وابتهج عشرات الآلاف بعودة نجيب وساندوا فى ذلك الإخوان وانحاز القسم الأكبر إلى جانبه .

• **ومثلت عودة نجيب انتصاراً كبيراً له ...**

• **وأسأل إسماعيل فريد :** قالوا إن « الثورة سابت السودان ثم بحثت عن سوريا .. فما تعليقك ؟

• **« الثورة لم تترك السودان .. هو صلاح سالم كان متولياً السودان .. ومعه محمد أبو نار ومعه شلة كبيرة من الضباط وكانوا بيروحوا يعملوا زيارات هناك فى السودان .. وكانوا بيحضروا علشان تعمل الوحدة وكان حزب الاتحاد ده حزب الوحدة .. وكانت العملية ماضية فى هذا**

الاتجاه .. اللى أجبر جمال عبد الناصر على ترك السودان .. إن يكون لهم حق تقرير المصير .. أنا قلت خذوا بالكلم من السودان .. لما ضربنا نجيب .. فأصبح السودان قال إذا كان بيضروا الرجال بتاعهم منهم فيهم .. يبقى إزاي إحنا نتحد مع الناس دول .. اتفقوا على إعطاء حق تقرير المصير .. طبعاً انتصر استقلال السودان .. لكن مصر لا تسبب السودان وعمرها ما تسببه .. إحنا واحد .. مش ممكن .. فيه ٥ مليون سودانى هنا .. والإجراءات اللى بتعملها السودان النهاردة دخيلة وليس لها أى أساس من الصحة » .

• **ويقول محسن محمد :** « لا شك أن ابتعاد نجيب كان السبب الأول فى ابتعاد السودان وانفصاله » .

• **ويقول أحمد حمروش :** « إن مشاركة صلاح سالم لقبائل الدنكا بالرقص معهم « رقصه الحرب » قد جذبت إليه قلوب الجنوبيين .. وأطلقت عليه الصحافة البريطانية اسم « الصاغ الرافص » .. أراد صلاح سالم أن يينذل محاولته الأخيرة فى إنجاح الاتفاقية لصالح الاتحاد بين مصر والسودان .. وخطب إسماعيل الأزهرى قائلاً : إن لحم أكتافى من مصر .. وقد دخلتها لابساً « حذاء كاوتش » .. ولكن هل يرضيكم أن يحكمنا صلاح سالم والعسكريون فى مصر ؟ .. وكانت المعاملة التى عومل بها نجيب قد أثرت بالسلب على نفوس السودانيين وانعكست عليهم وأثرت على الوحدة معنا » .

• **وبينما كان نجيب يحاول أن يدعم موقفه .. ألغيت الرقابة على الصحف .. وألغيت الأحكام العرفية .. وتخلى ناصر لنجيب عن رئاسة الوزراء .. وتقرر حل مجلس قيادة الثورة والسماح بقيام أحزاب .. وكان ذلك فرصة لظهور اتجاهات جميع الأطراف علناً ...**

• **ويقول أحمد المصرى :** « بعد كده بشهر بدأ عبد الناصر يلغى قرارات ٥ مارس .. ويعيد ما يسمى بقرارات ٢٥ مارس .. اللى عطلت الحريات .. ورجعت الأمور إلى الدستور المؤقت .. بعد كده انتهت حرية الصحافة .. وفرض رقابة صارمة على الصحافة فى مصر .. وكيبت كل الأصوات .. وبدأت الاعتقالات .. فى هذه الأثناء لم يكن بدأ أن نعمل عملاً من شأنه أن نزيح مجلس الثورة .. وده السؤال اللى سألته .. أيوه أنا فعلا كنت أريد أو على وشك إننى أنهى انقلاباً لصالح الديمقراطية فى مصر .. وقد تسألنى كيف تقوم الديمقراطية على انقلاب ؟ .. أفوكك الوسيلة اللى بدأت بها الثورة ممكن تبقى هى الوسيلة اللى تنهى هذا الحكم العسكرى » .

• **وماذا كانت الخطة ؟**

• « أولاً نحدد هدفنا علشان نقدر نقول إحنا جنعمل إيه .. هدفنا هو إنهاء بصراحة شديدة حكم مجلس الثورة .. وبالمناسبة مجلس الثورة لم يشكله أحد ولم ينتخب ديموقراطياً من الضباط الأحرار ولم يشترك الضباط الأحرار اللى عملوا الثورة فى اختيار حتى ممثلهم .. إنما هو اختيار شخصى للرئيس عبد الناصر .. وكان الهدف تغيير النظام وتغيير الحكم .. وإسناد العملية

إلى رئيس جمهورية مؤقتة .. وكان في ذلك الحين محمد نجيب أيضاً .. على أن خلال ٦ شهور يكون وضع دستور للبلاد وأطلقت حرية تشكيل الأحزاب وتم إجراء انتخابات ديمقراطية تأتي بحكومة نيابية برلمانية » .

• هل كنتم حثروا مجلس قيادة الثورة وتحتلوه ؟

• لا ماكنش مجلس قيادة الثورة هدفاً .. كانت كل الاجتماعات بتتم في القيادة العامة للقوات المسلحة في كوبرى القبة .. فكان يكفى جداً إن إحنا نحاصر القيادة لإجبارهم على الاستقالة .. كل هذه المسائل وضعنا خطتنا في التغيير .. وكان معايا مش أقل من ٢٢ من ضباط سلاح الفرسان .. وفيه من ضباط المدفعية أيضاً ناس .. وفيه من المشاة ناس .. وفيه أسماء وقادة وحدات وقادة ألوية مدفعية وقادة ألوية فرسان » .

• « الحكم كان إيه بعد كده لما فشلت المحاولة ؟

• الحكم كان ١٥ سنة من محكمة ثورة خاصة .. من خمسة من كبار الضباط كلهم من رتب كبيرة وقضيت ٥ سنوات تقريباً » .

• هل كان ده أول انقلاب بعد الثورة ؟

• « لأ .. كان فيه كثير قبل كده .. كان فيه حركة المدفعية اللي قبض فيها على رشاد مهنا ومحسن عبد الخالق .. ومجموعة من الضباط .. ودول كان طلبهم بسيط قوى وليتهم سمعوه .. إن مجلس الثورة يبقى بالانتخاب من الضباط الأحرار .. وأقم على هذه المجموعة رشاد مهنا لأنه لم يكن مشتركاً ولم يكن له أى علم بهذا الموضوع » .

• هل كان هناك انقلابات أخرى ضد الرئيس عبد الناصر ؟

• « ١٨ انقلاب .. وبالصدفة في هذه اللحظة أحبب الأستاذ أحمد بهاء الدين باعتباره أحد كتابنا العظام .. هو اللي ذكر هذه الانقلابات .. وأنا بالصدفة بأقرأ العمود بتاعه راجعت فلفت في العمود لقيتهم ١٨ انقلاباً » .

• وهنا تحرك رجال هيئة التحرير بقيادة الطحاوى وطعيمة ..

• وفى ٢٧ مارس كانت المظاهرات تهتف بسقوط الحرية وسقوط المتعلمين ...

• وأضرب عمال النقل احتجاجاً على عودة الأحزاب مما شل الحركة في مصر .. ونزل الجيش إلى الشارع لحفظ النظام ...

• وأسأل جمال حماد : هل تقصد أنهم كانوا يخططوا ويرسموا ؟

• « آه معظم ضباط الجيش .. العمال .. هيئة التحرير .. الناس اللي هم استفادوا من الثورة .. أو يخشوا إذا صفتت الثورة ورجعت الأمة إلى ممثلها الشرعيين حيث حكموا .. فالغرض كان من ٢٥ مارس إثارة هؤلاء الناس وإثارة الجيش علشان يلغى قرارات ٥ مارس .. وهذا

ما حدث .. لأنه عندما علقت قرارات ٢٥ مارس .. بدأت على طول المؤتمرات وتجميع الضباط في الأسلحة ويعملوا مؤتمرات مطالبين بأنه لازم إلغاء القرارات .

• وأسأل أحمد طعيمة : فى مارس ٥٤ كان لهيئة التحرير دور مهم ومؤثر فى مجريات الأمور ، تذكر عنه إيه ؟

• سأحدث عن دور هيئة التحرير من الناحية الفعلية فى مارس ٥٤ .. ناس كثير اعتبروا إن هيئة التحرير هى التى قامت بانقلاب ٢٩ مارس ٥٤ .. الواقع أن هيئة التحرير فرض عليها التصرف .. وكان تصرفها رد فعل لفعل .. لأن الفترة دى كانت حساسة جداً وخطيرة جداً فى تاريخ مصر .. كان الجيش فيه قلائل كثيرة سواء فى الفرسان أو فى المدفعية أو .. أو .. ما فيش استقرار فى القوات المسلحة .. وفيه اضطرابات لا أعزوها لأخطاء بقدر ما أعزوها إن ده وضع طبيعى بعد أى ثورة .. أن تبدأ عناصر تتحرك لأسباب أو لغير أسباب لمطامع أو لغير مطامع .. الله أعلم بها .. قطعاً لو الشعب المصرى كمان يصاب بمثل هذه القلاقل .. يبقى ضاعت مصر .. لا جيش مستقر ولا شعب مستقر .. فوجئنا فى ليلة من الليالى أعتقد ليلة ٢٥ مارس .. بدخول الصاغ أحمد الصاوى .. الذى سموه بعد كده « صاوا صاوا » .. ومعاه واحد اسمه محمدى عبد القادر .. الله يرحمهما الاثنين .. وكان سكرتير عام اتحاد النقل المشترك .. دخلوا علينا الساعة ١٢ بالليل .. أنا فوجئت بمجيئهم فى وقت زى ده فسألنا الصاوى فى إيه .. خير ؟ قال لى أنت عارف إحنا جايين منين ؟ قلت له لا ما أعرفش .. قال إحنا جايين من بيت محمد نجيب .. الله الله تعملوا إيه فى بيت محمد نجيب ؟ .. قال لى أصل يوسف صديق .. الذى كان عضواً فى الثورة فى البداية .. قريبي وبعث لى .. فاضطريت أروح له .. فلما رحنا له قال لى تعالى حنروح بيت محمد نجيب .. رحنا هناك .. وهذا موضوع كما نقله لى الشهود الأصليين أن محمد نجيب ويوسف صديق .. وخالد محيى الدين كان يعلم علم اليقين بهذا .. لا أذكر إذا كان حضر فى الجلسة أو قيل اسمه فى الجلسة أنا لا أذكر .. إنما قالوا إنهم طلب منهم إن قرارات مارس بحل مجلس الثورة وعودة الضباط للثكنات وقيام جمعية تأسيسية .. الكلام ده المفروض تنفيذه فى ٢٣ يوليو ٥٤ .. المطلوب منهم أن يطالبوا بتنفيذ هذه القرارات فوراً ومايقاش فيه انتظار من مارس إلى يوليو .. خوفاً من أن عبد الناصر أو مجلس الثورة يرجع يستعيد الأوضاع كما كانت .. هذا الخوف والقلق من جانبهم خلاهم يعرضوا على اتحاد النقل المشترك أن يبدأ بإضراب عام .. ثم اعتصام .. وتقلده جميع نقابات العمال على الاضراب والاعتصام إلى أن تستجاب مطالبهم .. بتنفيذ قرارات مجلس الثورة فوراً .. والعودة إلى الثكنات .. وتسليم البلد إلى الأحزاب القادمة .. وعرضوا عليهم ١٠ آلاف جنيه .

• مين الذى عرض ؟

• « نجيب ويوسف صديق .. عرضوا عليهم ١٠ آلاف جنيه .. وقالوا إحنا رفضنا نأخذ مليماً وجينا لك علشان نعرف إحنا نعمل إيه .. الموقف أكبر منا .. ومش قادرين نقدر مصلحة البلد فىن .. إحنا اشتغلنا معاكم الفترة التى فاتت .. من أول الثورة لغاية دلوقتى .. وثقتنا فيكم ثقة

عمياء .. إحنا بصراحة لا نعرف محمد نجيب ولا جمال .. إنتم عاوزين منا إيه .. ومصلحة البلد فين ؟ كانت مفاجأة وصدمة بالنسبة لى .. إن الطرف الآخر وصل بالتأمر إنه يعرض ١٠ آلاف جنيه .. وإنه يقلق البلد ويعمل فتناً .. يبقى الجيش فيه قلاقل وكمان الشعب فيه قلاقل .. يبقى مصلحة مصر فين ؟ ربنا وفقنا بفكرة .. قلت والله ممكن نعمل اللي هم عاوزينه .. تعملوا اعتصاماً وتعملوا إضرابات ونعمل كل حاجة .. بس بدل ما نطالب باللى هم طلبوه .. حنطلب العكس .. قالوا إيه .. قلت لهم « إلغاء قرارات مجلس الثورة وحل المجلس وعودة الضباط للكنات » .. يلغى هذا الكلام .. ويعود المجلس كما كان .. قالوا خلاص إحنا موافقين .. حتملوا إيه ؟ قالوا نجيب بقى رؤساء النقابات وهم بنفسهم عملوا اجتماعاً .. يمكن حصل حوالى الساعة ٣ صباحاً .. لموا مجموعة نقابات ضخمة وانفقوا على أنه يبدأ الإضراب .. بتوقف المواصلات العامة والخاصة .. حتى سواقين التاكسى .. علشان يدوا فكرة للشعب المصرى على إنه فيه حاجة فى البلد .. على أن يتبع ذلك زيادة الموجة .. بحيث يوم ٢٩ مارس .. يحدث إضراب كامل يشمل جميع مرافق الدولة بما فيها السكة الحديد التى لم تضرب من سنة ١٩ .. ما عدا هذا يعنى المخازن والكهرباء والمياه .. لا يتم فيها إضراب .. علشان دى مرافق الدولة .. وأهم نقطة يهمنى أن أركز فيها .. إنه لو مكاينتش مبداءى الثورة مقبولة للعمال ومطمئنين ١٠٠٪ إن مصالحهم ومستقبلهم مرتبطين بالثورة .. ما كانوا اقترحوا هم إنهم يججوا ويضعوا أنفسهم تحت تصرف الثورة .. وهم جاءوا لى باعتبارى كمان إحنا بنشتغل مساعدين .. أنا والطحاوى مع عبد الناصر .. وهم كانوا مع نجيب .. فجباين لبتوع عبد الناصر يشوفوا إيه الموقف .. وعاوز أقول على النقطة التى عملت نوع من اللبس الغريب .. والاستهانة بعقلية الشعب المصرى وبضمانه .. إنه بيدو فيه حديث بين جمال والأخ بغدادى .. أو بين عبد الناصر وخالد محيى الدين .. كما ذكرنا فى منكراتهما .. إن موضوع مارس ده كله كلف الرئيس ٤ آلاف جنيه ؟ فىبقى الشعب المصرى لا يستحق الحياة .. إذا كان يشتري بـ ٤ آلاف جنيه .. ملايين الناس بتشتري بـ ٤ آلاف جنيه .. اشترينا السكة الحديد وعمال السكة الحديد بـ ٤ آلاف جنيه !! ولا نول مين اللى أخذهم ؟ شىء عجيب !! إنما الرقم صحيح وسليم .. بس أنا حأوضحه علشان اللبس ده ينتهى للأبد .. مايفش عامل فى مصر .. أقسم بالله .. تقاضى جنيهاً واحداً .. ولكن بمجرد ما جاءوا لى وأخبرونى بمؤامرة يوسف صديق .. وإنهم عرضوا عليهم ١٠ آلاف جنيه .. أنا طلبت عبد الناصر فى التليفون فوراً وكان الوقت متأخراً من الليل .. قال لى فيه إيه خير ؟ قلت له حصل كذا وكذا ودلوقى هم معنا .. وإحنا نجعل كذا .. رد على قال لى : محمد نجيب جاهز بمشتنتين لك والطحاوى .. أنا باعتبار أنك لم تكلمنى فى الموضوع ده .. وأنا بأقول لكم وبأحذركم من أى تصرف لأنه ناوى لكم .. وبعدين قفل التليفون .. ساعها قبل ما يقفل قلت له : والله أنا مش بأكلمك علشان أستاذك أو أشركك معنا .. أنا بأكلمك لمسبب واحد هو إن لو قمت الصبح ولفيت البلد فيها إضراب لا تتصور إن هذا الإضراب ضدك .. ولكنه معنا .. وقلنا التليفون على هذا .. فوجئت به بعد ربع ساعة طلبنى .. قال لى عاوز أبعت لك ٥٠ ألف جنيه .. قلت له ليه ؟ قال هم مش يقولوا عارضين ١٠ .. ندفع إحنا ٥٠ ألف .. قلت له : أنا لا أسمع أن أدخل فى مثل هذه المواضع ..

وشراء الذمم .. والضماير فى موضوع وطنى .. وإحنا لنا تجربة فى السودان .. لما وزعنا فلوس مع صلاح سالم الله يرحمه .. كانت النتيجة فيه إن غيرنا وزع أكثر .. أنا مش حأخش فى هذا المضمار إطلاقاً .. ده ضد مبدأى .. اللى عاوز يشتغل معانا بقلبه ويفيدنا بروحه أهلاً وسهلاً .. واللى عاوز ما بنضمش لنا وهو له أجر فى حته ثانية بأخذها إنما أنا لأ .. قال لى : ما أبعتش لك الـ ٥ آلاف جنيه .. تعوزوا تعملوا يفت .. والله زى ما بأقول لك يفت وتأجروا عربية نقل مش عارف إيه .. أى مصاريف نثرية .. قلت له : خلاص ممكن .. قال لى : طيب حأبعت لك ٥ آلاف جنيه .. قلت له : حأقترح أنا أبعت منهم ألفين لليثى عبد الناصر فى الإسكندرية .. لأن أنا مش حأعرف أتصرف فى الإسكندرية .. لكن أنا غير إسكندرية .. أمسكها لأسوان .. إنما الليثى نسيه فى إسكندرية .. ونبعت له ألفين » .

• وهو كان فى هيئة التحرير ؟

• « أبوه كان فى هيئة التحرير فى ذلك الوقت .. وأنا حيفضل معايا ٣ آلاف جنيه .. لما جينا يوم ٢٩ مارس .. بأبلغه عن الحساب بتاع الـ ٥ آلاف جنيه .. قلت له للعلم .. الليثى أخذ ألفين .. وإحنا كل اللى صرفناه من ٢٥ مارس إلى ٢٩ مارس ألفين جنيه .. يبقى جملة الإنفاق ٤ آلاف جنيه .. لما تنقل هذه الصورة فى مذكرات ويقال إن الرئيس عمل حركة مارس كلها بـ ٤ آلاف جنيه .. هذا أمر لا يصدق عقل ولا منطق » .

• هل المظاهرات قامت تقول « لا ديمقراطية ولا دستور » .. الخ ؟

• « شوف .. المظاهرات كلها كانت بتقول عاشت الثورة والكلام ده .. لكن إنت عارف فى بعض الأحيان عدو عاقل خير من صديق جاهل .. من كثر الناس وانفعالها إن إزاي الثورة اللى لم يبق عليها إلا سنة ونصف وعاوزين يقضى عليها .. فيه ناس كثير مستنيين الثورة دى .. مش ضرورى بس الضباط اللى كانوا بيفكروا فى الثورة .. أو مش عاجبهم الأوضاع اللى كانت موجودة .. ناس كثير مننيين .. من هؤلاء الشباب .. أنا متذكر أنه فيه أحد منهم الله يرحمه اسمه مأمون الباز .. توفى ده من كثر انفعاله .. هتف « تسقط الحرية » .. ده مش معناه إنه تسقط الحرية بمعنى تسقط الحرية .. هو يقصد تسقط الحرية اللى هم عاوزين يعطوها لنا .. ودى مش حرية .. حريتنا مع ثورة ٢٣ يوليو .. ده حقيقة الهتاف نفسه واسم صاحبه كمان » .

• واجتمع الثوار .. وقرر المجلس حمل المسؤولية كاملة مرة أخرى .. واستمر محمد نجيب رئيساً للجمهورية شكلاً فقط دون أية سلطة ...

• « ويقول توفيق عبده إسماعيل : « ٢٦ مارس وحركة الصاوى أحمد الصاوى والإضراب العام للعمال وضرورة عودة مجلس قيادة الثورة .. و « تسقط الحرية والديمقراطية » .. مانشيتات كثير ظهرت فى الصحف فى ذلك الوقت .. والشعب كان له موقفاً معيناً .. وانتهت عملية مارس .. إن محمد نجيب رئيس شكلى .. جمال عبد الناصر هو الرئيس الفعلى .. وهو رئيس مجلس الوزراء .. واستمرت الأمور بعد كده لحد أكتوبر لما خرج محمد نجيب » .

- **ويقول أحمد حمروش :** « لكن الدور الذى لعبه الصاوى أحمد الصاوى لم يتففع له .. فقد اعتدى عليه أحمد أنور بعد ذلك بالضرب فى مطار القاهرة أمام المودعين أثناء سفر عبد الناصر لباندونج .. وانتهى دوره بعد أن اعتصرت فائدته » .
- **ويضيف جمال حماد :** « وفى الآخر يوم ٢٩ مارس اجتمع مجلس الثورة وصدر القرار بتاع ٢٩ مارس ينص على إلغاء قرارات ٥ مارس الديمقراطية .. وتكوين مجلس وطنى من ممثلى الشعب والجمعيات .. ولكن عمره ما اتعمل المجلس الوطنى » .
- **كان القرار الأخير لمصلحة مين من مجلس قيادة الثورة ؟**
- **« لمصلحة جمال عبد الناصر طبعاً » .**
- **ويقول خالد محبى الدين :** « قابلنى صحفى فرنسى مرموق يدعى روجيه ستيفان كان بالقاهرة ممثلاً لجريدة « فرانس أوبزرفاتور » .. وهمس فى أذنى قائلاً سأبلغك نبأ هام : الدوائر الحاكمة فى الغرب قررت مساندة جمال ضد نجيب .. ومكنتى هذه الهمسات من أن أعرف الاتجاه الحقيقى للريح » .
- **ويقول رياض سامى :** « عرفت أن السفير الإنجليزى عزم مجموعة الثورة دون محمد نجيب .. وعلمت فيما بعد أن مدير الوكالة الفرنسية أبلغ شخصاً معيناً أن عبد الناصر اتفق مع الإنجليز لو تعاونوا معه .. يستسأله معهم فى اتفاقية الحلاء .. ومدير الوكالة الفرنسية قال إنهم اتفقوا مع الإنجليز على هذا الوضع » .
- **واستباح البعض إهانة د . السنهورى فى مجلس الدولة والاعتداء عليه ...**
- **ويقول جمال حماد :** « نكر كل من خالد ويغدادى فى مذكراتهما إن فترة ما بعد أزمة محمد نجيب شهدت انفجارات متعددة فى القاهرة .. قال عبد الناصر إنها من تدبيره ليشعر الناس بحاجتهم لمن يحميهم .. ثم قام اليهود بتفجير أهداف أمريكية وبريطانية .. وعرفت مؤامرتهم باسم « لافون » واكتشفت بسبب قبيلة فى ملابس أحدهم » .
- **ويقول أحمد حمروش :** « وفى يوم ١٩ مارس انفجرت أربع قنابل فى أنحاء منفردة من القاهرة .. وفى صباح ٢٠ مارس كان اجتماع المؤتمر المشترك .. وأثيرت قضية الانفجارات .. طلب جمال سالم وزكريا محبى الدين اتخاذ إجراءات صارمة للضرب على أيدى هؤلاء المخربين » .
- **وأسأل المستشار مدوح نجيب :** لو عدنا بالذاكرة للوراء لسنة ٤٥ بالتحديد وما حدث للدكتور السنهورى رحمة الله عليه .. مع أنه كان مسانداً للثورة فى بدايتها .. كيف تفسر هذه الواقعة ؟

- **« سلطان الحكم الشمولى أطلق أنخابه للاعتداء على السنهورى .. السنهورى ده له كتب ومقالات عن القضاء .. يعنى رجل فقيه الفقهاء .. السنهورى ده يعتدى عليه بالضرب داخل مجلس**

الدولة .. كيف أفسرها إلا بأنها فوضى .. شملت الجميع للأسف .. ولم ينجو منها أحد .. لمجرد اعتراض أو قد يكون يقصد المشورة .. هذا غير مقبول .. ده يعتدى عليه ؟ هذا غير طبعى وغير معقول » .

• **ويقول المستشار يحيى الرفاعى :** « الدسائس صورت أن الدكتور السنهورى يجتمع لمقاومة النظام ورفع راية العصيان .. وثبت أن هذا غير صحيح .. وقامت المظاهرات بمجموعة كبيرة من العمال - مثلاً قال عبد اللطيف بغدادى فى كتابه إنه قد تم دفع مبلغ أربعة آلاف جنيه لهم - وهجموا على مبنى مجلس الدولة .. ونصح أحد من الضباط السنهورى باشا بالطلوع لهم .. فهجموا عليه وفتكوا به وكادوا أن يجهزوا عليه .. وكان ذلك يوم ٢٩ مارس سنة ١٩٥٥ .. واجتمعت الجمعية العمومية لمجلس الدولة وكتبت بياناً أرسلته للحكومة .. ورد نائب رئيس مجلس قيادة الثورة وهو جمال عبد الناصر .. يستنكر هذا الاعتداء » .

• **وبعد أزمة مارس سنة ٥٤ قررت الثورة تأمين نفسها .. وأعلنت تطهير الصحافة والجامعات ...**

• **ويقول أحمد حمروش :** « وأصدر مجلس قيادة الثورة كشفاً بأسماء الصحفيين الذين تقاضوا مصروفات سرية ومنهم حسين أبو الفتح .. إحسان عبد القدوس .. إدجار جلال .. كريم ثابت وكامل الشناوى .. وكانت هذه المصروفات تدفع قبل الثورة » .

• **ويقول د . ميلاد حنا :** « لحد مارس ٥٤ كانت الجامعة هى مصدر التحرك الرئيسى .. بانتهاء ٥٤ واستيلاء عبد الناصر على السلطة .. وطرد محمد نجيب .. وطرد أساتذة الجامعة فى سبتمبر وأكتوبر ٥٤ .. شالوا السياسيين على بعض الناس اللي مش كويسين .. وبقت حركة التطهير .. كله هس مافيش .. وكله مقهور فى الجامعة .. لحد ٥٦ » .

• **وأسأل د . حلمى مراد :** حضرتك كنت أستاذاً فى الجامعة عندما حدث ما يسمى بتطهير الجامعة ؟

• « تعليقى على هذا .. إن الله جنبنى أن أكون ضمن الذين أبعدوا من الجامعة وقتئذ لأننى قبض على واعتقلت وأودعت فى السجن الحربى فى سنة ٥٤ .. وقت أن نشب الخلاف بين الرئيس محمد نجيب وبين المغفور له جمال عبد الناصر » .

• **كنت فى صف نجيب وليس فى صف عبد الناصر ؟**

• « أنا كنت فى صف الديمقراطية .. لست فى صف أحد .. وقبض على وقتئذ فى قضية أسموها قضية « الجبهة الوطنية » .. وكان معتقلاً معى فيها بعض طلبة الكلية التى أعمل بها .. وكان معتقلاً أيضاً المرحوم الأستاذ إحسان عبد القدوس .. والأستاذ إسماعيل الحبروك » .

• **وهل كانت حركة التطهير عادلة فى رأيك .. بصراحة ؟**

• « لأ .. طبعاً غير عادلة .. لسبب بسيط أنه كل ما وجهوا من اتهامات ترجع إلى الفكر والرأى

واختلاف وجهات النظر وكيف تساس البلد .. وكيف نحقق الآمال والأهداف التي أعلنت يوم قيام ثورة الجيش .. فإذن ده خلاف فى الرأى وممكن من النقاش أو من الحوار إن أحد الطرفين يعدل فى رأيه ونستمر على وئام ووافق » .

● وأجبر بعض الوزراء المدنيين على الاستقالة .. وخرج سليمان حافظ من منصبه كمستشار للرئيس .. وحُرم البعض من حقوقهم السياسية بقرار ١٥ أبريل ...

● ويقول خالد محبى الدين : « بعد سفرى إلى الخارج تعرض رجال الفرسان لعنت شديد وحدث ما سُمى « بانقلاب الفرسان » حيث قبض على أحمد المصرى وعدد من ضباط الفرسان وحوكموا .. ولكن لعل ضباط الفرسان وموقفهم الشجاع دفاعاً عن الديمقراطية .. هو خير رد » .

● وألف عبد الناصر الوزارة الجديدة .. وانغمس الضباط فى العمل السياسى من خلال منصب مندوب القيادة فى إدارات الحكومة ...

● ويقول إسماعيل فريد : « طلع جمال سالم يقول إحنا أعطيناك نيشان فى الإخلاص فى العمل والثورة وإنكار الذات .. علشان أبقى ملحق عسكرى .. وعينونى بعد ما سبت نجيب أن أمسك أركان حرب مخابرات القيادة أنعملة وده مركز خطير لأن كل شىء يصب عندى .. قلت لهم لأ لأن الكلام كثير حولى .. أنا أحب أبعد شوية علشان الناس ترتاح ورحت يوغوسلافيا » .

● ويقول صلاح الدسوقي : « بأفكر إن جمال عبد الناصر أول ما جاء وزير داخلية طلب منى حاجة .. قال لى يا صلاح أنا لا أعرف حاجة فى الداخلية وإنت مسئول عن الداخلية .. لأن أنا مشغولياتى كثيرة .. بس عاوز منك طلبين اثنين : (١) إنه لا يحصل لى زى ما حصل للنقراشى باشا .. قُتل فى حرم وزارة الداخلية (٢) لا تأتى معلومات من خارج أجهزة وزارة الداخلية الللى لازم تكون أقدر أجهزة على معرفة المعلومات فيما يتعلق بالأمن العام والأمن السياسى .. وفعلاً هذا حصل » .

● وأسأل أمين شاکر : الرئيس محمد نجيب فى جملة واحدة ؟

● « الرئيس محمد نجيب رجل كويس جداً .. وضابط شجاع جداً .. ونكى جداً .. ولكن للأسف الشديد .. كان فى مجلس الثورة له سلطات وله نفوذ وهو عاوز ينتزع هذا النفوذ لنفسه .. فهنا نشأ الصدام » .

● وتقرر حل نقابة المحامين والصحفيين وإغلاق « المصرى » ...

● ويقول أحمد الخواجة : « أحداث الجمعية العمومية لنقابة المحامين فى ديسمبر ٥٤ الللى كانوا ببطلابوا فيها بعودة الضباط إلى التكنات لازلنا نذكرها .. وحلت فيما بعد نقابة المحامين .. لما عبد الناصر حل النقابة سنة ٥٤ .. جاب أحسن محامين وعملهم أعضاء مجلس .. يعنى جاب

مؤرخ مصر العظيم عبد الرحمن الرفاعي نغياً وجاب كبار المحامين .. واختار رموزاً من الأقباط المحامين » .

• وأسأل لطفي وادك : المرحوم أحمد لطفي السيد .. خالك .. في أيام ما حدث خلاف بين الرئيس عبد الناصر وأعضاء مجلس قيادة الثورة وبين الرئيس محمد نجيب .. هل فعلاً رشحه الرئيس عبد الناصر لكي يصبح رئيساً لجمهورية مصر .. الكلام ده أعلنته الـ B.B.C ؟

• « فعلاً أعلنته الـ B.B.C ومصطفى أمين كتبه في عموه .. إنما ح أقول لحضرتك حاجة .. على معلومة سابقة على دى .. فى مارس أو أبريل ٥٢ المرحوم عبد الناصر استدعانى وقال لى فيه خلاف بين القيادة حوالين التحرك وفيه ناس مش عاوزة تتحرك بتقول إننا لو اتحركنا وفشلنا حنهد الحركة الوطنية فى مصر .. وناس وأنا من ضمنهم رأينا أن نمارع بالتحرك وإلا القصر وأذنا به حيقضوا علينا وعلى الحركة الوطنية جميعاً .. فانا عاوزك تروح تستشير الأستاذ لطفي السيد خالك .. فذهبت لاستشارته .. قلت له أنا عاوز أعرف رأيك .. قال لى إنتم لو عاوزين تتحركوا خايفين من إيه ؟ فقلت له إحنا مش خايفين بس فيه ناس تتخوف من فشل الحركة ومن أن يكون فشل الحركة الوطنية له رد فعل .. قال لى روح بلغ إخوانك عن لسانى .. إنكم إذا تحركتم ضد هذا النظام ونجحتم فقد أديتم لمصر عملاً عظيماً .. وإذا تحركتم وفشلتم فقد أديتم لمصر عملاً عظيماً .. لأنكم إذا فشلتم لن تكون هى المحاولة الأخيرة » .. دى كانت أول رسالة .. بعدها أصبح هناك فيه نوع من العلاقة الودية بين عبد الناصر ولطفي السيد .. لما حصل الخلاف بين مجلس الثورة ومحمد نجيب استدعانى عبد الناصر فى البيت .. وكانوا عاقدين اجتماعاً فى « أوضة السفرة » .. وقال لى الموضوع كذا وإحنا دلوقتي متفقين على إزاحة محمد نجيب .. ومختلفين على مين اللى بييجى مطرحة .. وإحنا متفقين على أن اللى بييجى رئيس للجمهورية يكون مدنياً .. زى الهند نهرو رئيس وزارة وفيه رئيس جمهورية كده رجل طبيب .. فاتفقنا دلوقتي جميعاً على حل إن إحنا نعرض الأمر على لطفي السيد فإذا قبل فكلنا موافقين .. فرحت له وقعدت أتكلم معاه حوالى ساعة ونصف وهو رفض رفضاً باتاً .. وقال لى دى حاجة تضحك إن رجل كبير فى السن يشغل منصب النهارده .. فلما فشلتم معاه رجعت لجمال عبد الناصر تانى .. فقال لى ما فيش أمل تانى .. قلت له أنا عندى أمل .. قال لى إيه .. قلت له آخذ جمال سالم وصلاح سالم معايا ونروح تانى » .

• لإقناعه بأنه يصبح رئيس جمهورية ؟

• « آه .. قال لى ليه نقيت الاثنين دول .. إحنا بنتكلم فى أوضة بره .. قلت له لأن دول سمعتهم تخوف الناس فى التعامل معهما .. فلو راحوا واتكلموا معاه وهم يعرفوا يتكلموا كويس فيشعر إنه مش داخل على عصابية يعنى .. فراحوا معايا .. بعد ما قعد يقول لهما نفس الكلام اللى قاله لى .. وبعدين لما يتسوا قالوا له طبيب ترشح مين ؟ قال لهم واحد منكم .. فقالوا له مين مننا ؟ هما الاثنين قاعدين بقى .. فقال القائد بتاعكم مين فيكم ؟ فقالوا له لا القائد هو جمال

عبد الناصر .. فقال إذن أرشح جمال عبد الناصر .. فطبعاً أسقط فى أيديهما هما الاثنان ..
ورحنا بلغنا مجلس قيادة الثورة إن الترشيح بقاعه هو لجمال عبد الناصر .

* كيف علم مصطفى أمين بهذه المعلومة ؟

* « هو كان على علاقة مع جمال عبد الناصر لمدة طويلة .. وجمال عبد الناصر كان يعلم مزايه
وعيوبه ويتعامل معه على هذا الأساس » .

* طبيب والد B.B.C عرفت إزاي ؟

* « الد B.B.C عرفت من مصطفى أمين يمكن » .

● وحاول الملك سعود مصالحة نجيب مع أعضاء المجلس وهم يودعونهم فى المطار يوم
٢٩ مارس .. وبمجرد رحيل الملك اشتدت المشادة على مسمع من الجميع ...

* ويقول رياض سامى : « اتصل بى الدكتور حسنى خليفة مدير وكالة أنباء مصر وقال لى فيه
مشادة عنيفة بين نجيب وأعضاء مجلس الثورة فى مطار ألماظة والإنجليز يتحركون عند
الكيلو ٩٩ .. أخذت عربية جيب وتوجهت مباشرة إلى مطار ألماظة .. دخلت لقيت الرئيس
نجيب قانع الجاكطة الرسمية وقاعد بالفانلة ووجهه شاحب جداً وأعضاء مجلس الثورة ملتفين
حوله .. دخلت وعظمته وقلت له سلامتك يا فندم .. سلم على وطلب منى الاستمرار فى
الكلام .. أخذت عبد الناصر على جنب وقلت له : أنت مصرى ونجيب مصرى وأنا مصرى ..
بلغنى إن الإنجليز تحركوا عند الكيلو ٩٩ .. لكنه طمأننى وقال لى لأ ما تقلقش » .

● ومرت الأيام .. ثم اعتقل نجيب وحددت إقامته فى المرج ...

* وأسأل وجيه أباطة : هل وافقت على عزله ؟

* « أنا لم يكن لى دور فى هذا .. من أول ما دخلنا فى الناحية المدنية طلعنا معاش أنا والطحاوى
وطعيمة ومجدى حسنين .. ليه ؟ علشان ماكانش يصح أن نبقى بنشتغل فى أعمال مدنية وإحدا
ضباط » .

● وعاش نجيب سنوات طويلة فى المرج .. وكانت صورته وسيرته ممنوعتين .. وخروجه
أيضاً ممنوعاً ...

* وأسأل محمد أبو الفضل الجيزاوى : كُتِبَ التاريخ أنكرت وجود محمد نجيب كرئيس
للجمهورية ، ويمكن قَال البعض إن معاملته وهو فى معتقله بعد عزله .. كان فيها شيء
من اللاإنسانية .. حضرتك موافق على الكلام ده ؟

* « موافق طبعاً .. القضية إن الثورة ما فيهاش عواطف .. الثورة عبارة عن أهداف محددة نضل
إليها .. دى معركة حربية .. أنا عاوزك تخلى الموقع ده .. فالثورة قامت علشان تحقيق مبادئ
معينة .. طبعاً محمد نجيب خالى الذهن عن هذه المبادئ وليس عنده استعداد إنه يطبقها ..

فكان لازم ولابد يحصل صدام .. محمد نجيب اختلف .. إحنا كنا سايبينه على أساس رمز وماشى .. لما اختلف مع عبد الناصر أو اختلف مع الثورة بمعنى أصبح لأن عبد الناصر هو كل الثورة .. فالاختلاف ده حيترتب عليه إيه .. قطعاً حيترتب عليه صدام .. وينتهى أمر محمد نجيب ويعزل .. بالطبع إحنا ماعملناش فيه حاجة .. هو كل ما هناك إننا عزلناه من قيادة الثورة .. حصدنا إقامته لأنه كان وجوده بره خطراً وفيه أعداء للثورة كثيرون .. إحنا حطمانا الإقطاع ووزعنا الأراضي على الفلاحين .. يعنى أعداؤنا كثيرون جداً .. فمش ممكن نسييه علشان يبقى كارت يلعب به الغير .. فحددنا إقامته وانتهى أمره بهذا .. وكان لابد أن هذا يحدث .

• ويقول محسن عبد الخالق : « لابد أن تخجل ثورة يوليو من نفسها .. بمعاملتها لشخصيتين لعبوا أدواراً هامة .. رشاد مهنا ومحمد نجيب .. رشاد مهنا فضل معتقل فى منزله ٢٥ سنة إلى أن أتى أنور السادات .. ومحمد نجيب وضع فى المرح هذه المدة مع القطط والكلاب .. رجل محترم .. رجل قاد ثورة ونسبت إليه ثورة يوليو .. يعنى لو كانت فشلت .. لأعدم هذا الرجل .. والرجل تقدم بمنتهى الشجاعة ليكون الواجهة .. هل يعامل مثل هذه المعاملة ؟ دى نقطة سوداء فى تاريخ الثورة . »

• وأسأل د . ثروت عكاشة : أتوافق أم ترفض ما عومل به الرئيس نجيب بعد تنحيته ؟
• « أنا لا أوافق إطلاقاً على الطريقة التى عومل بها الرئيس نجيب .. وقد كان من الحكمة أن يعالج الأمر بطريقة أكرم من ذلك .. فشتان بين ما عومل به الملك فاروق يوم ٢٦ يوليو ٥٢ .. يوم ما غادر الاسكندرية من تبجيل واحترام .. وبين ما عومل به الرئيس نجيب .. وهو من هو شجاعة ونبلأ . »

• ويضيف إسماعيل فريد : « كان لابد أن ينتصر جانب .. ولم ينتصر محمد نجيب .. لكن نهايته لا تليق به بالقطع . »

• قال البعض - لا تؤاخذنى - إنك كنت وراء نهاية الرئيس محمد نجيب المؤسفة ؟

• « هذا القول غير صحيح وعارى من الصحة خالص .. لأ أنا كنت بأزوره فى المعتقل وأنا محافظ .. وهو كان فى المرح كنت أزوره كثيراً ويطلب طلبات وأنفذها له .. ويتصل بعبد الحكيم عامر وعبد الناصر .. وكنت بأزوره .. ولم يكن هناك شيء بينى وبينه . »

• ويقول فتح الله رفعت : « أقول إن محمد نجيب كان ضابطاً ممتازاً .. وأنا حضرته فى حرب فلسطين .. وأنا بالمناسبة واخذ ترقية استثنائية فى حرب فلسطين كنت أظن ملازم بقيت يوزباشى قبل دفعتى .. وكان القائد الوحيد كبير الرتبة الذى يبقف فى الأولوية فى الحرب .. وجمعنا وأنت تعلم .. فى حكاية النادى ... الخ .. يمكن أنا ذكرت ذلك فى كتاب واحد صحفى جاء أخذ منى أنا وعشرة .. أنا وعبد المنعم أمين وعباس رضوان ومحسن عبد الخالق والجيزاوى .. علشان يكتب كتاب عن الضباط الأحرار .. قلت إحنا كنا فى السجن واللى كان

بیتعالج واللى كان .. والحاجات دى كلها حصلت وإحنا مش موجودين » .

• **وأسأل رياض سامى : فى أثناء فترة مرض الرئيس نجيب كنت حريصاً على زيارته بانتظام ؟**

• « الحقيقة عندما كان يتردد مرات على مستشفى المعادى كنت أواظب على زيارته .. وما حركنى ما كُتِبَته الصحف العربية عن المعاملة الغير طيبة التى كان يعيش فى أحوالها الرئيس نجيب بين القلط والكلاب .. فذهبت لأمين رئاسة الجمهورية الصديق العزيز دى الخلق اللواء عز الدين مختار وأطلعته على بعض هذه الصحف .. وقلت له ليس يشرف مصر أن الصحف العربية بالذات تتأثر وتأسف لنجيب .. فساعدنى وكان ذلك فى أول عهد الرئيس مبارك فى إيجاد مقر له من المرج إلى القبة » .

• **وعلق مصطفى كامل مراد فيقول :** « باعتمد أنه ظلم .. لأن مجلس الثورة حاكمه محاكمة سرية .. وأعطى له ١٥ سنة سجن أو حاجة زى كده .. ولم يعلن هذا » .

• **بأى اتهام يا فندم ؟**

• « باتهام بأنه يحاول قلب نظام الحكم !! » .

• **وهل كان يفعل ذلك ؟**

• « لا أقدر أقول ذلك .. ولكن هو لم يكن متفقاً مع أعضاء مجلس الثورة .. يعنى كان يرى أن الجيش يعود إلى التكتات .. وإحنا كنا نرى لا .. كان يرى أننا نتفق مع الأمريكان ونأخذ منهم معونات ونسوى المشكلة الفلسطينية على أساس تقسيم ٤٧ .. وإحنا كنا رافضين هذا .. يعنى الكلام الذى كان يقوله فى ذلك الوقت لم يكن مقبولاً مننا خالص .. يعنى كان ماشياً فى اتجاه عكسى ومضاد .. وبعدين بدأ الاتصال بالأحزاب السياسية .. وكلهم اتفقوا الوفد وغيره إنه يبقى رئيساً برلمانياً .. يعنى لا يحكم .. دى أوجدت الصدام بينه وبين عبد الناصر .. أو بينه وبين ثوار الثورة بمعنى أدق » .

• **ويقول أحمد حمروش :** « كان للسودانيين دور فى منع محاكمة محمد نجيب .. ولكن عزل نجيب كان غلقاً لباب الأمل فى الوصول إلى اتحاد مصرى سودانى » .

• **وأسأل محمد على عبد الله : تكلمنى عن أولاد الرئيس ؟**

• « هو كان متجوزاً السيدة الله يرحمها زينب أحمد وخلف منها بنت واحدة اسمها سميرة .. هذه البنت كانت فى كلية الحقوق .. وتوفيت فى ريعان شبابها وكان عمرها حوالى ٢٠ سنة وهو كان مازال نقيباً أيامها .. وبعدين زوجته الثانية المرحومة عيشة لبیب خلف منها ٣ أولاد .. فاروق وده بعد الثورة غيّر اسمه عمله صلاح .. وعلى ويوسف .. الثلاثة دول توفوا فى خلال حياة الرئيس .. فاروق مات بالقلب الله يرحمه .. على كان بيدرّس هندسة فى ألمانيا وكان قائماً برئاسة رابطة الطلاب العرب فى ألمانيا ضد اليهود وكانوا بيعملوا اجتماعات ويشتموا اليهود

فاغتالوه اليهود هناك فى ألمانيا .. كان راجعاً يوم من الجامعة بالليل وضربته عربية مجهولة وتوفى فى هذه الحادثة .. وأذكر تماماً لما جابوا جثته هنا فى مصر .. كان محمد نجيب فى المعتقل .. رُفِضَ إنه يعمل له جنازة أو يمشى فى جنازته .. وطلب منهم إنه يشوفه بس ويتأكد إن هذا هو ابنه فُرفض هذا أيضاً .. واندفن عادى .. أما ابنه الصغير يوسف فمات من حوالى ٥ - ٦ سنين كده .. لكن أولاده ما زالوا موجودين دلوقتى فى المرح » .

• قيل إنه عمل سواق تاكسى .. هل هذا صحيح ؟

• « أبوه عمل سواق تاكسى .. ماكانش فيه معاش ولا حاجة .. وكان رصيده فى البنك لما توفى ٧٠٠ جنيه .. وكان اشتغل فعلا سواق تاكسى .. والمهندس عثمان أحمد عثمان لما عرف كان مثقله فى شركة المقاولون العرب سواقاً .. وكانوا هم عايشين فى بيت محمد نجيب .. لما مات .. القصر اللي كان عايش فيه فى المرح فكوا عنه الحراسة ورجع لأسرة زينب الركيل .. وعثمان أحمد عثمان أعطى له فيلا فى شارع ولى العهد فى كوبرى القبة هنا .. وكان عايش فيها هو وابنه يوسف اللي فضل .. ومعه أحفاده أولاد يوسف .. هذه الفيلا يوم ما توفى محمد نجيب وفى أثناء الجنازة تم تفريغها .. شالوا منها الأولاد والعفش والمكتبة » .

• وراحوا فين ؟

• « لهم خالاتهم راحوا عاشوا هناك معاهم .. وعثمان أحمد عثمان إدى لهم بيت مازالوا عايشين فيه لحد الآن فى عين شمس فى مساكن الألف مسكن » .

• وانتهت حياة الرئيس نجيب وهو فى مستشفى المعادى على ما أظن ؟

• « هو توفى يوم ٢٨ / ٨ / ١٩٨٤ فى المستشفى العسكرى بكوبرى القبة » .

• ماذا كان يقول لك الرئيس نجيب عن الأحداث التى حدثت وهو داخل المعتقل ؟

• « والله ماكانش يقدر يقول لى لأن كان معانا أحد دائماً حاضراً الزيارة نفسها .. بس الحاجات دى ظهرت فى كتب بعد كده .. يعنى الطريقة الاستفزازية اللي كانت بتحصل معاه وكده .. هو كان صبوراً لأقصى حد وبيتهيا لى مافيش أحد شاف اللي شافه هذا الرجل رغم إنه مافيش عليه حاجة .. هذا الرجل لو عليه أى حاجة ماكانوش حتى سابوه .. ونحن لا نعرف حتى إنه اتحكم ولا أدين فى أى شئ .. أسباب اعتقاله ١٨ سنة إيه ماحدث يعرفها لغاية النهارده .. الأساس إنه كان عاوز تعود الحياة الديموقراطية للبلد .. والضباط والعساكر تعود إلى تكناتها .. والبلد يحكمها المتخصصون والجيش يراقب طبعاً ويبقوا عاملين حسابهم لو وقعت أى حاجة .. ده كان وجه الخلاف الأساسى لا كان طامعاً فى سلطة واستقال فى عز مجده وشعبيته .. ويرضه من الحاجات اللي أتكرها واللى بتحصل كانت خالتي فى مرض الموت وطلبت تشوفه فتأجلت المدة وأخيراً سمحوا له ييجى .. وأذكر تماماً هذا اليوم أنا كنت موجوداً .. شارع المنيل فى منيل الروضة فضوه من الناس كلها وشغلانة جامدة ودخل قائد الشرطة العسكرية .. وكانت

توفيت هي في هذا اليوم .. قام ورفع من على وشها الملاية ولا احترام لحرمة موتى ولا حاجة .. خايف يكون هي مش موجودة .. وينكذب .. وبعدين سمح له يخش يشوفها نظرة أخيرة .. وقال يلا يلا خلاص .. يعني برضه الإنسانية ماكانتش موجودة » .

• هل تأثرت شخصياً بحكم كونك ضابطاً في القوات المسلحة وبحكم أنك ابن أخته ؟

• « طبعاً أنا ما كملتش .. خرجت من الجيش وأنا مقدم وأنا عمري كان حوالى ٣٥ سنة وكان معاشى ٣٦ جنيه وكنت متجوزاً وعندى ولدين ولم أحاكم ولم أسأل .. واعتقلت مدة بسيطة حوالى ٢٨ يوم وأنا على المعاش .. ولا أعلم لغاية دلوقت السبب .. لأن أيامها كانت السكنية حامية شوية وأى واحد مش عاجبهم يمشى .. والرئيس أنور السادات أمر إن أى ضابط خرج من الجيش بدون محاكمة تأديبية يتساوى برتبة زملائه فى هذا التاريخ وأنا زملائى كانوا عمداً فأخذت المعاش بتاع عميد وبأصرفه لحد دلوقت .. بس ربنا أكرمنى بعد كده وسافرت الكويت صحيح تعبت لغاية ما كُوتت نفسى واشتغلت شغلة كويسة فى شركة كبيرة قوى .. والحمد لله يعنى ربك ما بينماش حد » .

• وهكذا كتبت الأحداث السقوط الدرامى لهذا الرجل الذى عاش وحيداً .. يكاد لا يرى أحداً .. أو يراه أحد ...

• وأسأل محمد على عبد الله : كنت بتزور الرئيس نجيب فى أثناء فترة اعتقاله .. أو نقدر نقول تحديد إقامته فى المرج ؟

• « كان مسموحاً للأسرة بزيارة السيد الرئيس بعد ما فرجت شوية .. بعد ما اتوفى الرئيس عبد الناصر » .

• لأ قبل وفاة الرئيس عبد الناصر ؟

• « لأ كان ممنوع الزيارة إطلاقاً » .

• يعنى عاش وحيداً ولم يتصل به أحد ؟

• « عاش وحيداً .. بس أخيراً سمحوا فى بعض الأوقات له إن مراته راحت معاه وأولاده .. وكان فيه بعض الحاجات بتحصل ما فيش داعى أقولها » .

• لأ أفضل قول ..

• « كان دائماً أولاده يشتكوا لنا .. كانوا بيبجوا لنا أوقات يشتكوا من بعض الاستغزات .. يعنى لواحد فى سن كبير زى ده .. العساكر حواليه الحراسة كأنهم بيحرسوا مستعمرة كبيرة جداً .. مش شخص كبير فى السن .. كانوا بيعملوا طوابير المشاة بتاعة العساكر فوق « أوضة التوم » بتاعته بالليل علشان يقلقوا راحته .. يضربوا ناراً فى وسط النهار كده جنب الشباك .. يعنى حاجات لتحطيم الأعصاب وحاجات مش تمام .. وكان غير مسموح بالزيارة .. وبعد مدة طويلة

مش أقل من ٧ - ٨ سنين سمحوا بالزيارة للأهل .. وكنا بنروح يوم الأحد .. أذكر كنا نروح لمدة ساعة واحدة .. وكان يتواجد معنا باستمرار أحد الضباط من المخابرات علشان يعرف إيه اللي بنقوله له .. بعد كده السادات رحمة الله عليه سمح له بخرج بعد كده يوم فى الأسبوع .. كان بيبجى يزور العيلة فى البيت ويلف على الناس » .

• وأسأل رياض سامى : من كان يتصل بالرئيس محمد نجيب فى أواخر سنوات عمره ؟

• « لا أحد .. عدم وفاء .. كنت عنده وهو فى المرح ووجدت القطط والكلاب تعيش معه .. والمجلات والصحف العربية نثرت صوراً له .. وتحدث عن إهمال هذا الإنسان .. ونقلناه إلى مكان متواضع جداً فى القبة .. أما فى المستشفى فلم يكن يزوره أحد .. ورغم ذلك وجدت عنده صدفة عبد العزيز حجازى رئيس الوزراء .. جمال سالم جاء مرة فى مجلس الثورة قال لمحمد نجيب إحنا عاوزين ثلاثة بيعندوا عنك .. صلاح الشاهد وأنا (رياض سامى) ومحمد أحمد رياض .. فقلت له يا سيادة اللواء إحنا ضباط مكاننا الجيش .. وتانى يوم رحنا لعبد الحكيم عامر كما طلب منى نجيب فأقسم يميناً بوالدته إن ما فيه سبب .. وقال لى حتشوف فيما بعد يا رياض .. وفعلأ بعد ما تركته بشهرين راح حسن إبراهيم وعبد الحكيم عامر وأخذوه إلى المرحج .. وأذكر أنني ذهبت إلى محمد نجيب فى المعادي بعد النكسة فقال لى أنا رحنا يا رياض إلى جمال سالم وهو عيان فى أيامه الأخيرة .. وفضل يقول لى « سامحنى يا ريس الشيطان هو اللي كان بيجرطنى عليك » .. وهذه شهادة منى أمام الله » .

• هل نصحوا الرئيس محمد نجيب بعمل كتاب ؟

• « د . عبد العزيز حجازى طلب من محمد نجيب أن يكتب ذكرياته أمانة للتاريخ .. قال له أنا كتبت كلاماً للتاريخ .. وأخذتها منه أمانة للتاريخ وجعلت محمد نجيب يهديها إهداء للرئيس محمد حسنى مبارك » .

• وماذا أطلق فيها على الثورة ؟

• « قال إنها عورة » .

• تؤكد نهاية الرئيس نجيب أن فى تاريخ الثورات لا تخضع الأحداث دائماً لمنطق الأمور ...

• وتوفى اللواء محمد نجيب فى ٢٨ / ٨ / ١٩٨٤ .. وكان عمره يناهز ٨٤ عاماً قضى منها فى الأضواء ٢١ شهراً فقط لا غير ...

• واختلفت الآراء حول الرئيس نجيب .. فالبعض من شهود العصر ذكره بالخير .. والبعض الآخر كان له عليه تحفظات مختلفة .. ولكن من المؤكد أنه كان أول رئيس للجمهورية فى تاريخ مصر .. ونترك الشهود يتكلمون ...

• يقول د . مصطفى خليل : « الثورة على وجه العموم كانت بتتغير .. قائد الثورة الحقيقى كان جمال عبد الناصر .. ومحمد نجيب أثير من بعض الناس أنه كان على علم بالثورة لكن ماحدث

يقدر ينكر دوره .. أنه لولا وجوده ماكانش قبول الناس لهذه الثورة بهذا الشكل قد تم .. ولكن وجود محمد نجيب ووجود صانعي الثورة الأساسيين أوجد نوع من الخلافات الداخلية اللي كلنا عارفينها .. وتميزت الثورة في هذا الوقت بعدم الاستقرار الداخلي داخل نفس رجال الثورة .. لابد أن إحنا كمصريين نعترف بفضل ودور كل من الزعماء اللي كانوا موجودين والأدوار التي أدوها » .

* **ويقول إبراهيم شكرى :** الرئيس محمد نجيب لاشك أنه كان رجلاً مستقيماً صادقاً .. لاشك أنه أدى دوراً كبيراً جداً للثورة .. وفي اعتقادي لولا أنه أعلن أن الرئيس محمد نجيب هو رئيس الثورة ما كان يمكن أن يتقبلها الشعب .. لأن كانت هناك مقومات .. لأنه هو الذي انتخب رئيساً لنادى الضباط .. وهو يحوز على رتبة كبيرة وأيضاً فكرة أنه بأخلاقه يمكن أن نتفاهم معه » .

* **ويقول أحمد المصري :** محمد نجيب أنكر له بالخير أشياء كبيرة .. إن هو اللي حال دون إعدامي .. لكن نجيب إنسان طيب القلب يصلح زعيم .. إنما لا يصلح قائد دولة » .

* **ويقول د . نور الدين طراف :** محمد نجيب أهم معيزاته أنه كان محارباً شجاعاً .. ده جرح مرتين .. وكان رجل عنده بساطة المصريين الفطرية ولا يعرف الخبث .. ولذلك هو كان من السهل عليهم .. يعنى محمد نجيب لو إنه عنده خبث أو مكر ماكانوش تمكنا منه .. كان هو اللي تمكّن منهم .. وهو البلد كلها كانت هاشية وراه ومعتبراه الزعيم .. وهو رجل فيه فجوة بين تفكيره وتفكير هؤلاء الشبان اللي قاموا بالانقلاب العسكرى » .

* **مين كان الأحسن في رأيك بصراحة ؟**

* **جمال عبد الناصر قطعاً » .**

* **ويقول خالد محبى الدين :** « هو رمز .. لو كان فيه شخص تاني اتحط على رأس الثورة وهى قائمة .. ماكانش استقبال الناس لها يبقى كده .. مصر تحب رجلاً كبيراً وجهه صبح باسم متعلم .. محمد نجيب ده رجل متعلم .. ضابط أركان حرب معاه ليسانس حقوق ومعاه ماجستير .. سمعته القتالية كضابط فى حرب فلسطين جيدة .. فهو اسم حسن .. فده من حظ مصر إنه اتحط على رأسها .. هو يعنى ماكانش عنده القدرة التنظيمية الفائقة .. وماكانش عقلية سياسية ترتب وتخطط .. ولكن كان هو رجلاً طيباً .. يعنى « هلهلى » شوية .. ودى طبعاً فى السياسة لا تنفع .. ولكنه أدى دوره الضرورى وبذونه ماكانش ممكن » .

* **ويقول مصطفى أمين :** « فى أزمة مارس أيدت جمال عبد الناصر ضد محمد نجيب لأنى أنا رأيى كان زعيم الثورة الحقيقى هو جمال عبد الناصر » .

* **وماذا تقول عن اللواء محمد نجيب أول رئيس لجمهورية مصر ؟**

* **« هو كان أول رئيس لجمهورية مصر .. إنما أول حاكم مصرى كان جمال عبد الناصر .. ومحمد نجيب كان رئيس جمهورية بلا جمهورية » .**

• **ويقول رياض سامي :** « قائد عسكري مثقف .. وعلى دراية .. مارس الحياة .. ولولا هذا لما كانوا لجأوا إليه .. وكل الجيش وراءه في انتخابه رئيس نادى الضباط .. والملك فاروق عرف هذه الحقيقة .. وعندما جاء كان لا يتصور إنهم حيحكوا .. محمد نجيب عاش ومات يسعى للديموقراطية » .

• **ويقول د . حسن رجب :** « محمد نجيب كان في نظري أطيّب رجل قابلته .. كان رجلاً « ذوق » وظريف .. وابن حلال .. وكل شيء كويس فيه .. لكن أشك أنه كان ينفع لو كان أصبح رئيس جمهورية لأن المثالية لا تكفى » .

• **ويقول أحمد مظهر :** « الحقيقة كان متمعاً بأخلاقيات عالية بنفكره .. فهو كان برضه من الأصحاب .. وكانت الأخلاقيات العالية عنده قبلية .. لأنه هو كانت أمه سودانية .. وكان على بك نجيب شقيقه ضابط سودانى من الخطيرين جداً .. أول واحد كان يبنط بالحصان عربيتين كارو يحطهم وينط من فوقهم بالحصان .. كان « خيالة » برضه .. فكنا بنتذكر على بك نجيب لحد ما شفتا محمد نجيب » .

• **حضرتك كنت مؤيداً أم معارضاً موقف رجال الثورة من الرئيس نجيب ؟**

• « أنا كنت بأحب الرئيس نجيب .. لكن أقدرش أمد سلاحى ناحية عبد الناصر بأى صورة .. يعنى هما أمران .. كلاهما مر » .

• **ويقول محسن عبد الخالق :** « الرئيس محمد نجيب .. مش ممكن جمال عبد الناصر كان يوافق إن الثورة تنسب إلى محمد نجيب وكان لجمال عبد الناصر طموحاته .. وهنا اصطدم مع محمد نجيب .. فكان لابد من إزاحة محمد نجيب » .

• **ويقول أحمد سعيد :** « محمد نجيب له خاصيتين رئيسيتين .. الخاصية الأولى : إن هو كان الرجل الغدائى أو الضابط الغدائى الأول .. الذى وضع نفسه فى وش المدفع يوم ٢٣ يوليو .. الخاصية الثانية : إنه كان أول رئيس مصرى من صلب مصرى من أجيال طويلة منذ أيام الفراعنة .. هذا محمد نجيب » .

• **وكانت نهاية نجيب هى البداية الرسمية العلنية لقيادة عبد الناصر ...**

• **ويقول أمين هويدى :** « محمد نجيب كان رجل يتسم بالطيبة وتم التأثير عليه بواسطة السياسيين القدامى .. وبدأ بالرغم من أن كان دوره هام ولكن لم يكن فى أهمية الآخرين .. كان يطمع فى الانفراد بالثورة .. عبد الناصر كان يرى ألا يجوز إن الثورة تتخلى عن نفسها وتسلم نفسها إلى نفس القدامى الذين تسببوا أو كانوا أحد أسباب هذه الثورة .. فكان صراعاً على مراحل .. انتهى بتجنيب محمد نجيب وانفراد عبد الناصر بالسلطة » .

• **وبدأت تدريجياً .. تتكوّن ملامح الزعيم ...**

الملف السادس

وسطع نجم عبد الناصر

- رغم الانتصار الذي أحرزه عبد الناصر على نجيب بعد أزمة مارس سنة ٥٤ .. لم تكن شخصيته معروفة أو مقبولة جماهيرياً .. ولم يكن الزعيم الذي طبقت شهرته الأفاق بعد ذلك ...
- وقع حادثان هامان غيرا تماماً مجرى الأمور وأسهما في صناعة النجم : الأول جلاء الإنجليز عن أرض مصر .. والثاني محاولة اغتيال عبد الناصر ...
- الحدث الأول : كان موضوع الجلاء .. فقد استؤنفت المباحثات في يوليو سنة ٥٤ ...
- وفي ١٩ أكتوبر سنة ٥٤ وقع عبد الناصر على الاتفاق النهائي للجلاء الذي كان أمل كل المصريين ...
- ويقول عبد اللطيف بغدادى : « عملنا مفاوضات على الجلاء .. جمال عبد الناصر وصلاح سالم وعبد الحكيم وأنا .. كنا لجنة المفاوضات .. وكان مصطفى أمين الحقيقة متعاوناً وأدانا معلومات بناء على طلب عبد الناصر .. يعنى الحقيقة مصطفى أمين قام بدور كويس فى الحكاية دى » .
- وأسأل توفيق عبده إسماعيل : يقول البعض إن التحرير كان سيأتى فى موعد لاحق .. بناء على اتفاق سابق .. فما هو تعليقك ؟
- « هو ميعاد الجلاء كان سنة ٥٦ .. إنما بناء على معاهدة ٣٦ كنا حانخش فى مفاوضات .. فلجنا عملنا المفاوضات دى سنة ٥٤ وخلصناها والجلاء تم سنة ٥٦ نهائياً وبلا رجعة .. ده أساسى .. ثانياً : إن المعاهدة ألغيت سنة ٥١ إنما ماكنش فيه ما يسمى الأثر التنفيذى بتاع الإلغاء .. ورقة انقطعت إنما الناس قاعدين .. فما كنش ممكن يطلعوا إلا بعمليات الفدائيين اللي تمت والمنظمات اللي قام بها عدد كبير جدا من الضباط الأحرار كلهم قبل وبعد الثورة .. أنا شاركت فى مجموعات قبل وبعد الثورة كما شارك كمال رفعت وشارك وجيه أباطه وغيرنا » .

- وأسأل د . عبد القادر حاتم : نقدر نقول البداية كانت متى وكانت إزاي ؟
- حينما بدأ الرئيس عبد الناصر في الثورة اختارني لكي أكون مدير مكتبه .. بدأت في العمل بالنسبة لنواحي الإعلام المختلفة في الصحافة والإذاعة والاتصالات المختلفة .. وكان هذا عملاً ضرورياً للثورة وخصوصاً إن الإنجليز كانوا موجودين في ذلك الوقت وكان الإنجليز لهم قاعدة في السويس .. لذلك بدأت في عمل محطة سرية كانت أصلاً هي محطة خاصة بالملك فاروق كان محضرها لنفسه .. وهذه المحطة كنا نذيع منها سرى ولا يعلم عنها أحد من القوات الإنجليزية .. بمعنى حرب نفسية ضد الإنجليز في القناة . المحطة دى اللى سميت فيما بعد بمحطة « أم كلثوم » .. وناس كثير حتى أم كلثوم نفسها رحما الله لم تكن تعلم إن إحنا بنذيع من هذه المحطة أصلاً ولا تعرف مكانها فين » .
- الحدث الثانى : هو محاولة اغتيال عبد الناصر (حادث المنشية) التى كانت بداية تبدد الشكوك الوطنية من البعض حول الرجل وبداية التعاطف الشعبى الكبير معه ..
- ويقول جمال حماد : « أدى حادث المنشية إلى التخلص من الإخوان .. وكذلك من الرئيس محمد نجيب » .
- وأسأل مصطفى كامل مراد : ألم تكن الثورة متعاونة مع الإخوان من البداية ؟
- « نعم .. في أول سنتين .. لكن بعد محاولة اغتيال الرئيس الراحل جمال عبد الناصر .. انقلبت عليهم الثورة انقلاباً شديداً » .
- ويقول خالد محيى الدين : « لما جاءت حركة الإخوان المسلمين وانضرب عليه الرصاص .. ما أعرفش لو كنت محله كنت أعمل إيه .. لكن أنا بأنكلم لغاية أنا ما مشيت وأنا لم أشارك في الحكم .. علشان كده ماقدرش أحكم عن نفسى .. لو جاء إالى الحكم وناس حاولوا بالقوة المسلحة يعملوا حاجة لازم كنت حاقم .. ماقدرش أحكم على ناس إلا بالظروف اللى كانوا فيها » .
- ويقول أحمد حمروش : « كان اعتقال محمد نجيب .. بعد محاولة الاعتداء على جمال عبد الناصر » .
- ويقول د . عبد العظيم رمضان : « حسن الهضبي لم يوافق على اغتيال عبد الناصر .. لكن الجهاز السرى هو الذى فعلها .. والأجهزة السرية عموماً حتى في الدول العظمى يكون لها نفوذ وقرارات ولا يستطيع أحد منعها » .
- وأسأل عبد اللطيف بغدادى : هل حادث المنشية كان تمثيلية للإطاحة بالإخوان ؟
- « لا .. أنا كنت في القاهرة في الحادث ده .. كنت رئيس مجلس الخدمات .. وكنت قاعد في المجلس ويرأس الجلسة وبعدين أبلغت وأنا في الجلسة بمحاولة الاعتداء دى .. وبعدين قلت لإخواننا حصل كذا وكذا ولكن ما فيش خسائر وقلت أتصل بعبد الناصر في التليفون وجدته

راح الاستراحة وقالوا نام .. وبعدين دليل إنها مش تمثيلية إن اللي جانبه أصيب .. كان فيه واحد سودانى جنبه قاعد .. أصيب .. مش ممكن تكون تمثيلية .. هو طبعا الإخوان بيحاولوا يدعوا إنها تمثيلية الآن لكن غير صحيح .. وجمال عبد الناصر كان متعاوننا جدا مع الإخوان فى الفترة دى قبل عملية الاعتداء وكنا إحنا ضد الفكرة .. وكنا نهاندهم .. وكان لهم أطماعهم السياسية » .

* **وأسأل مصطفى أمين : حادث المنشية ؟**

* « أعتقد أنه حقيقى » .

* **ويقول أحمد طعيمة :** « مما يؤسف له أن يحاول البعض أن يصور أن حادث المنشية مؤامرة مدبرة من عبد الناصر ومن الثورة ضد الإخوان .. وهذا قسم أقسم بالله العظيم إن هذا باطل باطل .. وأن الحق المجرد إن الإخوان هم مدبرى حادث اغتيال الرئيس عبد الناصر فى المنشية .. الإخوان غيروا طبيعة عبد الناصر بحادثة اغتيال المنشية .. لأنه بعد كده بدأت حملة الاعتقالات وكل الكلام اللي حصل للإخوان .. ده بشر .. أنت بنتقتلى وعازبنى بعد كده أطيطب عليك .. كان أمرا طبيعيا إنه يحصل رد فعل لجمال عبد الناصر .. ونو كان الإخوان أخذوا وضع معارضة عبد الناصر دون النظر للاستيلاء على الحكم لكان مستقبل مصر قد تغير » .

* **سيد قطب كان دوره إيه يا فندم ؟**

* « سيد قطب من دعاة الإخوان المسلمين » .

* **وسجن وحكم بمناسبة هذه الواقعة ؟**

* « ما تقدرش تقول فيه واقعة للإخوان محددة .. وقائع الإخوان .. تصرفات الإخوان عموما .. وعلى كل حال كان فى حادثة المنشية أحد المتهمين اللي حوكموا اسمه « الرئيس » مش متذكر اسمه .. قال فى المحكمة حاجة أثارت انتباهي .. قال إحنا كان المفروض مش حنصطلم بالثورة فى تاريخ حادثة المنشية .. كان قدامنا لسه سنة علشان نستعد .. أنا استنتجت ليه هم استعجلوا .. لأن لما حصل الانقسام داخل الإخوان المسلمين .. هذا الانقسام ماكانش علنيا .. بس ابتدا كمان ينزل الشرخ إلى الجهاز السرى .. اعتقد الإخوان إنهم تعجلوا قبل استكمال التدبير بتاعهم فى المؤامرة .. لأن ما كنتش المؤامرة اغتيال عبد الناصر فقط وبعدين اغتيال آخرين والاستيلاء على الحكم ... هذا الشرخ خافوا إنه لو استمرت الأيام بالشكل ده الشرخ حيزيد مش حيقدرنا يسيطروا على الجماعة .. واعتقدوا إنهم لو تعجلوا بمؤامرة المنشية واغتيال عبد الناصر ونجاحهم فيها إنهم حتى المنشقين حيرجعوا يلتئموا وكأن لم يحدث شيء وترجع الجماعة موحدة مرة أخرى » .

* **ويقول مأمون الهضيبي :** « موضوع المنشية هذا هو الخاتمة فى عملية الإجهاز النهائى اللي بدأت بحل الجماعة فى ١٤ يناير عام ٥٤ واعتقال المرشد وجميع أعضاء مكتب الإرشاد وعدد كبير من الجماعة فى السجن الحربى » .

- هل لاقى الإخوان تعذيباً ما فى السجن ؟
- « هذه مسألة أصبح يعرفها الصغير والكبير والجاهل والعالم .. أنواع التعذيب اللى كانت بتحدث فى السجن الحربى مسألة لا يتخيلها بشر .. يعنى مش مسألة انتزاع اعتراف من أحد .. لا .. هذه عملية تعذيب يومية .. يعنى يومياً طابور يقفوا من الصبح للظهر فى ساحة السجن الكبير والعساكر واقفة بالكرياج تضرب فى الناس .. لمدة أشهر .. يعنى الناس دول مش مطلوب منهم اعترافات .. اللى اتحاكم اتحاكم واللى اتعمل اتعمل » .
- ويقول أحمد أبو الفتح : « كيف يكون القاتل جالساً فى الصفوف الأولى الأمامية دون أن يعرفه أحد وهذه الصفوف مخصصة للشخصيات الهامة .. وكيف لا يعثر معه على المندس الذى استعمله .. ثم يعثرون عليه بعدما بأيام ملقياً على الأرض ؟! كل هذا يؤكد أن محاولة الاغتيال ما هى إلا تعظيية ، على كل حال سواء صحت هذه الرواية أو صحت غيرها .. لقد حقق الحادث لعبد الناصر ما أراد .. واستغله أسوأ استغلال فى البطش .. وفى اعتقاده أن مصر لم ترى فى تاريخها الحديث .. أبشع مما شاهده على يد عبد الناصر » .
- وتأكد عداء عبد الناصر للإخوان ، وتكونت « محكمة الشعب » وأصدرت أحكامها ضد الإخوان .. نفذ الإعدام فى ستة منهم وعلى رأسهم محمود عبد اللطيف .. وتزايد عدد المعتقلين منهم .. وشنت الإذاعة والصحافة حملة شديدة عليهم .. بقيادة صلاح سالم ...
- ويقول د . عبد العظيم رمضان : « كان أمام الإخوان فرصة أن يقفوا مع القوى الشعبية .. التى تنادى بإعادة الجيش إلى ثكناته وسيادة الديمقراطية .. لكنهم خانوا الحركة وانضموا إلى عبد الناصر وبمجرد أن انتصر ضرب تنظيمهم » .
- ويقول طارق البشرى : « ما مورس مع الإخوان المسلمين بعد تصفيتهم واعتقالهم فى أكتوبر ١٩٥٤ مما لم يكن سراً ولا خبراً مكتوماً حتى فى وقتها .. وكانت آثار ما لحق بهم ظاهرة على أجسامهم .. فكان ذبوع العلم بما حدث مما ترك فى النفس المصرية من الجراحات .. أكثر ما ترك فى جسد المعتهم من آثار » .
- وأسأل فريد عبد الخالق : لما المرحوم سيد قطب سجن بعد محاكمات ٥٤ كتب كتاب اسمه « معالم على الطريق » ، رد عليه الهضيبي بكتاب « دعاة لا قضاة » .. تقدر تقول إيه عن هذين الكتابين ؟
- « والله الحقيقة إن سيد قطب أصله أديب وثقاف وأقبل على الإسلام وأقبل على الدعوة حتى فى أمريكا فهو كتب هذا الكتاب وفيه اجتهاد .. وكان يؤمن بأن الإسلام علشان يخدم عايز ناس يؤمنوا به إيماناً متماسك فده عمل نوع من التشنج عند الشباب .. لدرجة إن « معالم على الطريق » لما جاء نسخه لا أخفى عنك إنه بعثه لى من السجن لأطلع عليه عن طريق أخوه وأنا كنت آنذاك فى دار الكتب وقلت أنا لما اطلعت عليه إنه فيه مداخل قد بساء استخدامها خاصة بالنسبة للشباب .. فكلمت حسن الهضيبي ورحت له البيت قلت له إننى أرى عدم طبع « معالم

على الطريق .. قال لى إن ده كلام إسلامى .. قلت له أنا أخشى إنه فيه نوع من التشدد قد يساء استعماله .. وجاءت الأيام ودخلت السجن وسئلت أنا : « أنت ليه قلت للمرشد ما يطبعش الكتاب .. إيه اللى فيه ؟ » .. أنا ما اتكلمتش وبعدين هو لما كتب الكتاب ده .. ولما الكتاب ظهر فى السوق .. كان له رد فعل لأنه كان يحمل فكرة فيه نوع من التشدد .. يمكن أصوله سليمة والإسلام أصله يتسم بالرفق والاعتدال .. لما حصل أزمة فكرية فى الجماعة .. والكتاب ترك بصماته وتوجهاته .. خرجت من خط الاعتدال .. مبن بقى تولى العملية دى حسن الهضيبى رحمه الله عليه .. كتب « دعاة لا قضاة » وهو فى السجن أيضا وقال يا إخوان لسننا محتكرين للحقيقة ولسنا راغبين فى السلطة .. وإن إحنا مبينين للإسلام فقط ومش حنبقى أكثر من سيدنا محمد .. ربنا قال له عليك البلاغ وعلينا الحساب .. فخذوا الأمور بسعة صدر معهم .. فحن لم نبعث ولم نكلف إن إحنا نخطئ ونصوب وندخل الجنة وندخل النار .. دى شغلة ربنا .. إحنا علينا بكل تواضع كجماعة تؤدى رسالة إن إحنا نبين الإسلام بقدر اجتهادنا .. ده تقريبا فحوى الكتاب .. وأنا لا أخفى عنك أن السجون وخصوصا فى سجون عبد الناصر .. دى حقيقة والناس لازم تعرفها .. كان فيها تعذيب .. هذه الضغوط هو شايف إن فيها محكمة ظالمة وسجان يتعامل بكل صرامة .. ده عمل رد فعل سببى لدرجة إنه قال إن دول مش ممكن يكونوا مسلمين بالطريقة البلدية كده .. لغاية ما انتشرت الحكاية إنها ليست بالإسلام وليست بمنهج الإخوان .

* **ويقول مأمون الهضيبى :** « أولا أحب أصلح حاجة تاريخية .. الأستاذ سيد قطب شهيد الإسلام والدعوة الإسلامية رحمه الله صاحب كتاب « معالم على الطريق » كان كتبه قبل المحاكمات وقيل كل شيء » .

* **ودخل بسببه السجن ؟**

* « دخل بسببه السجن .. كان هو اتهم فى مؤامرة .. وكان من ضمن الأدلة عليه هذا الكتاب .. طبع الأستاذ سيد قطب فيلسوف الدعوة وله مقامه الكبير وهو صاحب التفسير الذى يعتبر فيه أعلى درجات الأدبية لتفسير القرآن الكريم والمعتمد لدى كل المجامع والفقهاء وعلماء الإسلام .. « معالم على الطريق » اختلف فى فهمه البعض .. أنا أشهد بكده .. أنا لم تأت لى الفرصة أن أتحدث مع سيد قطب .. هو كان فى الزنزانة اللى جانبى فى السجن الحربى وأخذ لإعدامه من جانبى فى الزنزانة .. ولكن لما ظهر كلام عن التكفير ودعوة التكفير .. أشهد الله أن الأستاذ عمر التليسمانى وهو إنسان صادق ولا يمكن يكذب أخبرنا وأخبر غيرى وأكثر من مرة إنه سأل سيد قطب رحمه الله فنفى له هذا الادعاء إطلاقا ونفى إنه يكون صاحب دعوة التكفير .. « دعاة لا قضاة » كُتب أساسا ونحن فى معتقل طره السياسى فى أواخر ٦٨ تقريبا .. فوجئنا يوم الحملة زى ما إحنا بنسميها فى المعتقل .. فوجئنا إنهم حيجبوا المرشد حسن إسماعيل الهضيبى من ليمان طره إلى معتقل طره السياسى .. وفعلا جابوه وكانت مسألة التكفير دى وأخدة مناقشات حادة جدا بين الإخوة المعتقلين فى معتقل طره السياسى .. فلما جاء .. الناس مايتش متصورة إنه حبيات ليلة واحدة وحيسيوه هنا فكانوا فى غاية الشوق إنهم يعرفوا آراءه فى الحكاية دى .. وفعلا سألوه وهو بقى يستغرب من هذه الدعاوى وخاصة إنه كان منسوب إليه إنه كان أعطى

هذا الفكر ووافق عليه .. ولما سمع من بعض الناس الإخوة واللى مقبوض عليهم واللى معتقلين أو مسلمين هذا الفكر قال لهم إحتا دعاة مش قضاة .. إنتم كأنكم الآن تقضون على الناس .. نحن دعاة ولسنا قضاة ثم قال إن هذا الفكر له منهج فطلب إنه نجتمع ونعمل بحثا فقهيا للرد على هذا المنهج .. فهذا البحث عمل كمذهب فكرى فقط .. وليس للرد على إنسان معين .. ونحن لا ننسب لشهيد الإسلام وفيلسوف الدعوة سيد قطب هذا المذهب إطلاقا .. ولا نقبل أن ينسب إليه .. وخصوصا بعد الشهادات التى شهد بها عديد من الناس وفى مقدمتهم الأستاذ عمر التلمسانى بأنه سأل سيد قطب فنفى عنه هذا .. إذن هو الكتاب أو البحث كما قيل إنه بحث آنذاك واستغرق إعداداه نحو سنة .. ونحن فى معتقل طره السياسى .. وانتهى .. ثم كان الناس الذين يعملون فى هذا البحث يعملون تحت إشراف المرشد حسن الهضيبي المرشد آنذاك وكان يتابع ويوجه ويأمر ويقول ويحذف هذا .. إلى أن انتهى جمع بعض أصحاب هذا المبدأ وأعطاهم نسخ من هذا البحث .. وقال لهم أنا مسئول عن كل كلمة فى هذا البحث .. بعد ذلك لما خرجنا من السجن والمعتقلات وبعد وفاة حسن الهضيبي سنة ٧٣ تجددت فى الساحة دعاوى التكفير فالإخوة رأوا إنهم يطبعوا هذا البحث فى كتاب ويصدروه للناس .. علشان أولا هداية الناس عموما .. وتأكيد على فكرة الإخوان المسلمين ونفهم لهذا الفكر وبعدهم عنه .. واجتمعوا به وسألوه نسميه إيه ووردت على أذهاننا عبارته رحمه الله « نحن دعاة ولسنا قضاة » فأسمينا هذا البحث بهذا الاسم .. وطبع وابتدا ينتشر وأصبح هو المعتمد عندهنا .. وأكد إنه ليس رداً على سيد قطب إطلاقا .. ونحن نوهنا إلى ذلك فى مقدمة الكتاب وقلنا ليس ردا على إنسان معين .. وإنما هو مذهب لتأكيد المبادئ الفقهية وتأكيد لمذهب الإخوان ومنهج الإخوان وعقيدة الإخوان وفكر الإخوان ليس إلا » .

- وأسأل عباس رضوان : وقت توليك وزارة الداخلية هل استمرت عمليات التعذيب وما قيل عن السجون والمعتقلات أم توقفت ؟
- « هو يمكن الموقف يختلف لأنه من ٥٢ إلى ٥٨ الثورة ما فى شك قوبلت بعداوة .. لم يكن خلاف مع الإخوان المسلمين فقط ولكن مع الشيوعيين أحيانا .. مع كل هؤلاء .. وكان التصرف معهم اللى فى الجيش بيكون مع الشرطة العسكرية فى معظم الأحيان .. فى وقت كانت مشكلة الإخوان تعتبر منتبهة لأن المحاكمات كانت خلصت والمعتقلين محدودين » .
- ويقول عبد المحسن أبو النور : « يعنى ما حدث مسك الإخوان المسلمين غير لما هم اعتدوا على الثورة .. وثاروا على رمز الثورة فطبعاً مش ممكن أبدا إن دول يتسابقوا .. وكان معروفاً أن الإخوان المسلمين لهم تنظيم عسكري معروف » .
- وأسأل عبد اللطيف بغدادى : هل رفضت محاكمة الإخوان المسلمين أيام ما كنت رئيسا لمحكمة الثورة ؟

- « لا .. لم يطلب منى ومن محكمة الثورة إنها تقوم بمحاكمة الإخوان المسلمين .. يعنى المجلس .. مجلس الثورة لم يطلب منى هذا .. إنما عملت محكمة جديدة يرأسها جمال سالم » .

- بدونك ليه يافندم ؟
- « لأننى لى مواقف بالنسبة للمحاكمات .. لأننى اعتبرونى عامل قاضى .. وأعامل ضميرى فى المحاكمات دون أخذ رأى المجلس فيها .. ودى محاكمات سياسية وأنا كنت ضد هذا . »
- **ويقول د . عبد العظيم رمضان :** جمال سالم ومجموعته .. قضاة عسكريون .. ينظرون فى عشرين أو ثلاثين قضية فى ست دقائق بالإعدام .. هل هذا معقول ؟! لا شك أن صفحة القضاء بهذا الأسلوب أيام عبد الناصر كانت سوداء .
- **وأسأل حسين الشافعى :** نعرف مدى تدينك وحبك لديننا الحنيف . هل هذا يجعلك إلى حد ما أسفاً على إنك كنت عضواً فى محاكمة الإخوان المسلمين ؟
- « ده موضوع حديث على بعضه لأن ربنا بيقول ﴿ ومن أحسن قولاً ممن دعا إلى الله وعمل صالحاً وقال إننى من المسلمين ﴾ ولم يقل من الإخوان المسلمين .. الإخوان المسلمين دى جاءت فى مجال الفرقة ﴿ واعتصموا بحبل الله جميعاً ولا تفرقوا وانكروا نعمة الله عليكم إذ كنتم أعداء فألف بين قلوبكم فأصبحتم بنعمته إخواناً ﴾ .. فكلمة الإخوان بتعبر عن الانشقاق .. إنما المطلوب منا إن نكون مسلمين .. ﴿ ومن أحسن قولاً ممن دعا إلى الله وعمل صالحاً وقال إننى من المسلمين ﴾ .. الإخوان المسلمين هم الللى بتصرفهم وصلوا الأمور إلى أنهم يُحاكموا .. وبالعكس الثورة أبقت عليهم دوناً عن جميع التنظيمات السياسية والأحزاب تقديراً لدعوتهم وتقديراً لدور البعض منهم الللى شارك فى حرب فلسطين .. وحاكمنا إبراهيم عبد الهادى أساساً لتصرفه الغليظ مع الإخوان المسلمين .. هم لهم دور ولهم جهد ولكن تجاوزوا حدودهم .. لأنهم تصوروا إنهم بيؤسسوا إسلاماً جديداً واعتزوا بالعدد والعملية مش عدد إنما العملية استعداد للبلد والتضحية .. فهم مارضيوش يشتركوا معنا فى الثورة لأن قال لك سيب الناس دول يعملوا وإحنا بتنظيمنا وعددنا نقدر نحترهم .. ولذلك بيعتبروا إن إحنا خطفنا منهم حاجة .. إحنا ما خطفناش منهم حاجة » .
- **وتجلى اسم عبد الناصر فى أمرين :** أولاً مؤتمر باندونج .. ثانياً رفض الأحلاف ...
- **أولاً :** المشاركة فى مؤتمر باندونج الذى كُتبت فيه شهادة ميلاد مجموعة دول عدم الانحياز والحيد الإيجابى ...
- **وسافر جمال مع صلاح سالم وزير الإرشاد ود . محمود فوزى وزير الخارجية إلى باندونج فى أبريل سنة ٥٥ .. وقابل نهرو وشو إن لاي وتيتو إلى جانب سوكارنو .. وتكونت صداقات حميمة بين عبد الناصر وبينهم ...**
- **ويقول أمين شاكر :** « مؤتمر باندونج كان ببينل أساساً فى إطار السياسة الإسلامية بتاعتنا .. كنا عابزين نخلى الدول الإسلامية على علاقة بينا .. لأن الإسلام كان فى تصورنا أقوى من الوطنية .. فإذا الدول الإسلامية اتحدت وتعارفت معنا حنقى قوة كبيرة جدا .. إندونيسيا أكبر دولة إسلامية فى العالم الإسلامى .. وباكستان وماليزيا .. ولكنها كانت دول متأخرة .. فبعتنى

عبد الناصر أنا وأُور السادات نروح هذه البلاد قبل مؤتمر باندونج .. وقابلنا نهرو .. وانتقنا لازم يتعمل مؤتمر علشان خاطر إن هذه الدول كانت بتستغل استغلالاً بشعاً من الدول الاستعمارية .. ونقدر نخلّي هذه الدول تتعامل مع بعضها .. وتقل من مدى الاستغلال الذي كانت تعرض له .. يعني حأعطيك مثلاً .. إندونيسيا أكبر دولة فى العالم بتنجنج البهارات .. كانت هولندا بتأخذ هذه البهارات وتعبأها وترجع تبيعها للهند وباكستان بأربع أضعاف ثمنها .. فمن الخسران ؟ شعب إندونيسيا الجعان . ماليزيا عندهم أحسن ملاحات فى العالم وأحسن أنواع الأسماك كانوا مش لاقيين ياكلوا .. وللعلم أنا اللي بنيت لهم الجامعة واللى مولّنى الأمير فيصل أيامها رحمة الله عليه .. ودى أول مرة بتنشأ جامعة فى ماليزيا .. وكل المتولين المناصب الرئيسية فى ماليزيا النهارده من خريجي هذه الجامعة .. ويعتث ناس من الأزهر .. اتنين اتعينوا أستاذة فى هذه الجامعة .

• **وَأَسْأَلُ مَبَارَكَ رَفَاعِي : كُنْتُ مَلْحَقاً عَسْكَرِيّاً عَلَى اتِّصَالِ بِالرَّئِيسِ سُوكَارْنُو أَيَّامَ الْحَيَادِ الإِجْبَائِيِّ فَمَا الَّذِي تَذْكُرُهُ عَنْ هَذِهِ الْفَتْرَةِ ؟**

• « هي الفترة دى فى الحقيقة اللي أنا خدمت فيها فى إندونيسيا .. يمكن من ٦٠ حتى ٦٤ كانت فترة نشطة جداً فى إندونيسيا .. أولاً كانت الثورات الوطنية اللي قامت فى الجزر كانت بدأت تخمد وبدأت تتحد كلها كدولة واحدة .. دى أول حاجة .. وكان النشاط فيها ضعماً والحيد الإيجابي اللي كان موجوداً .. وإسرائيل كانت عايزة تصل إليه ولم تتمكن والحمد لله فى ذلك الوقت . كانت فترة غنية وفترة مثمرة فى العمل . »

• **وَيَقُولُ عَبْدِ اللَّطِيفِ بَغْدَادِي :** « كَانَ فِيهِ الْقُوَّةُ الشَّرْقِيَّةُ وَالْقُوَّةُ الْغَرْبِيَّةُ وَالصَّرَاعُ بَيْنَهُمَا .. جَاءَتْ دُولُ الْعَالَمِ الثَّلَاثِ زَى مِصْرَ وَالْهِنْدَ وَيُوغُوسْلَاوِيَا وَقَتَهَا .. بَقِيَ لَهُمْ ثَقَلٌ وَوِزْنٌ .. فَابْتَدَأُوا يَعْمَلُوا دُولَ عَدَمِ الْإِنْحِيَاذِ وَسُوكَارْنُو كَانَ لَهُ نَشَاطٌ فِي النَّاحِيَةِ دَى » .

• **وَيَقُولُ سَعِيدُ كِمَال :** « أَقُولُ لَكَ بِأَمَانَةٍ .. أَنَا يَنْكُرْنِي طَبِيعاً بِوَثِيقَةٍ هَامَةٍ اطَّلَعْتُ عَلَيْهَا وَأَنَا ذَاهِبٌ إِلَى تُونِسَ لِنَصْطَلِحَ مَعَ اتِّحَادِ طُلَّابِ تُونِسَ .. بِدَعْوَةٍ مِنْ هَذَا الْإِتِّحَادِ الَّذِي طَبِيعاً كَانَ وَاقِفٌ مَعَ الرَّئِيسِ بُورْقِيَّةٍ كَمَا تَذْكُرُ ..عِنْدَمَا دَعَا الْفَلَسْطِينِيِّينَ .. فَاطَّلَعْتُ عَلَى وَثِيقَةٍ .. وَثِيقَةٍ فِي بَاندُونْجِ عِنْدَمَا كَانَ عَبْدُ النَّاصِرِ مَعَ نَهْرُو وَنُكْرُومَا وَرئيس وزراء الأردن وتيتو .. بطبيعة الحال وجدت إنه يطالب (أى عبد الناصر) أن لايد أن يتوجه المجتمع الدولي والفلسطينيين إلى قبول قرار التقسيم .. أنا حأقول كذا مرة وأكررها إن الفلسطينيين أخطأوا التقدير فى سياسة مصر فى عهد عبد الناصر .. وفى نفس الوقت فى عهد السادات .. عبد الناصر هو من طلب التقسيم .. فهبت مظاهرات فى منطقة المشرق العربى كيف يكون ذلك .. منذ ذلك الحين أدركت بإننا نسير فى ظل ظروف بالغة التعقيد .. ولأن مصر مستهدفة من أيام محمد على ومازالنا .. وحكمة القائد دائماً هى فى كيفية الخروج من المطبات والمنعرجات .. فلما هو طالب بالتقسيم .. الفلسطينيين والعرب فى المشرق العربى هبوا ضد هذا الموقف اضطر يقول أصحاب القضية هم اللي مش

عاوزين .. يعنى الحقيقة عبد الناصر كان يحس نبض الشارع .. ومثلى وراءه الشعب اللي كان بيطلبه ويطالب مصر بحكم موقعها بالكثير .

• وأسأل د . حسن رجب : حضرتك كنت أول سفير لمصر فى الصين واقتربنا من الصين على أيامك .. إيه اللي تذكره عن هذه الفترة ؟

• « إزاي أنا عيّنت .. وده موضوع أثار استغراب ناس كتير جدا .. ده راجل مهندس وبishtغل فى أسلحة وذخائر ومصانع حربية .. علشان إيه ده يختاره .. وطبعاً ده كان متار نقد كبير جدا من بتوع الخارجية أنفسهم .. يعنى دى عملية دبلوماسية جايين المهندس ده ليه .. وده راجل بيشغل فى عملية بعيدة خالص .

• اشرح لنا إزى كيف كانت البداية ؟

• « اللي حصل إنه فى سنة ٥٥ حصل مؤتمر باندونج .. ومؤتمر باندونج زى ما نقول جمع ما بين كل الجماعة الذين يحتضنون فكرة عدم الانحياز .. لما اجتمعوا هناك اللي حصل إن جاء أيضاً من الصين شو إن لاي علشان يحضر هذا المؤتمر .. كمتسمع مش كعضو .. هناك نعرف على جمال عبد الناصر .. وجمال عبد الناصر فى ذلك الوقت كان بيستعد لتأميم قناة السويس .. إنما سرأ .. وما كانش حد عارف .. وظهر واضحاً من أحاديث إيدن أن جمال عبد الناصر بصد أنه ينوى تأميم القناة .. قال يعنى بيحذر إنه مش لازم تتعمل حاجات زى دى لأن الحروب قامت فى الماضى لأسباب أقل من كده بكثير .. فعرف جمال عبد الناصر أنه لا مفر من قيام حرب وابتدا بعد كده إنه يدور على أصدقاء .. يدور على ناس تساعد .. يدور على ناس تعاون .. تبدله سلاح تبدله ذخائر تبدله إمدادات تبدله أى حاجة من الحاجات دى .. ولقى شو إن لاي الاثنين بيزمروا فى مزيكا واحدة وانفقوا على إنه يحصل تبادل فى التمثيل السياسى مابين مصر والصين .. طبعاً الصين فى ذلك الوقت لم تكن عضواً فى الأمم المتحدة .. كان علشان تبقى عضواً إنها تحصل على أكبر عدد من الأصوات .. فكون مصر تيجى وتتبادل التمثيل الدبلوماسى ده مكسب كبير جدا للصين .. وإحنا لما دولة زى الصين ناهضة وعندها سلاح تقدر تدى لنا وذخائر وحاجات كده .. طبعاً إحنا نرحب بها .. وإن لم تكن من الناحية المادية على الأقل من الناحية المعنوية فيه ناس بتساعدنا .. وانفقنا على التبادل الدبلوماسى .. شو إن لاي على طول أسرع وبعث السفير بتاعه هنا .. وكان قبل ما يقوم جمال عبد الناصر من باندونج كان السفير الصينى وصل .

• وبدأت أول محادثات لبيع الأسلحة لمصر بعد المؤتمر .. وعقدت أول صفقة أسلحة تشيكية فى سبتمبر سنة ٥٥ ..

• ويقول أمين شاكى : « وإحنا فى إندونيسيا فى مؤتمر باندونج وقابلنا شو إن لاي فى بورما .. وطلب مقابلة عبد الناصر .. ولم يحضر هذه المقابلة غير صلاح سالم وأنا .. وفى هذه المقابلة وجننا شو إن لاي ده إنسان ذكى جدا ومهذب جدا وعازيز يفهم إيه هى مصر أولاً وإيه هى ثورة مصر ؟ وقامت ليه ؟ وإيه هى الأوضاع التى كانت موجودة قبل الثورة ؟ وإيه الأوضاع

اللى إحنا عاوزين نحققها بعد الثورة ؟ ده إنسان بيفهف .. ده على عكس دالاس .. ده دالاس لما جاء سنة ٥٤ .. جاي يقول لنا اعملوا كذا وإذا لم تعملوا كانت عظامكم الأمور .. كما حدث .. وبعدين سأل شو إن لاي عبد الناصر ما هي أكبر مشاكلك ؟ قال له : مشاكلي إن بن جوريون لما عرف إن الضباط اللي عملوا الثورة هم اللي كانوا يبحاربوا في ٤٨ قال إن الضباط دول حيحاولوا علشان يقتصوا من الهزيمة بقاعة سنة ٤٨ .. فحب يفرض علينا اتفاقية سلام بشرطه .. وكانت دول الغرب والشرق الاتنين بيساندوه وإحنا مافيش أحد .. فعلنا عدوان على غزة .. ودخل غزة مرتين ودخل خان يونس .. ومر هنا لغاية العريش واللى كانوا بيطلعوه هم الأمريكان .. وكان السفير الأمريكي كافر ي كان بييجي هنا على الكنية .. وهو كان بييجي كل يوم ثلاثاء يقابل عبد الناصر .. وعبد الناصر كلمه عدة مرات علشان الولايات المتحدة تدينا أسلحة دفاعية فقط ولكن بالنفوذ الإسرائيلي هناك ما أمكنش .. وكما تعلم راح عبد النعم أمين وعلى صبرى وقبولوا مقابلة سيئة جدا ورجعوا وما عملوش حاجة .. فقال شو إن لاي طيب لما الأهداف بتاعتكم دي تتركز في كثير مما كان يحلم به القيصير وحكام روسيا زمان .. وإنتم عاوزينهم يعطوكم سلاح علشان تدافعوا عن أنفسكم .. قلنا له والله إحنا علاقتنا بالاتحاد السوفيتي علاقة شكلية ولا تصل إلى الحد الذي يسمح لنا نطلب منهم سلاحاً .. لأن طبعاً مثل هذا الطلب لن يؤخذ مأخذ الاعتبار .. فقال طيب تسمحو لي أن أكلمه .. قلنا له والله يبقى كتر خيرك جدا .. فقال دلوقت حنروح المؤتمر فنقعد حوالي أسبوعين .. وبعد ما نرجع من المؤتمر إدوني من أسبوعين لثلاثة .. وأنا حابيت لكم نتيجة اتصالاتي مع ستالين .. وفعلنا بعد مضي ثلاثة أسابيع بالضبط من عودتنا من باندونج .. جت برقية شغرية من ثلاثة صفحات على مكتبي إلى عبد الناصر من شو إن لاي فعلت لها طباعة ودخلتها له وأنا كنت سعيداً جداً لأنه جاء فيها إنه تكلم مع ستالين .. وكانوا مترددين لأسباب كذا وكذا وفي الآخر قبلها .. على أن الإمدادات الأولى لهذا السلاح متجيش من روسيا نفسها .. تيجي من بلد من بلاد شرق أوروبا وبالذات اقترح تشيكوسلوفاكيا والمجر .. وجاء عبد الناصر وقال لي بسرعة تجيب لي ملحق جوي وملحق عسكري فجببت عز الدين رمزي من سلاح الطيران .. وجبت إسماعيل فريد من الجيش .. فقلت إسماعيل فريد أحل بيه مشكلتين .. مشكلتنا مع محمد نجيب .. ومشكلته هو لأن إسماعيل فريد طول عمره ضابط ويانا ومن الضباط القدامى .. وما عملش حاجة يعني .. وبدأت تأتي الإمدادات من هذه الدول .

• **ثانياً : النزعة الاستقلالية لعبد الناصر .. تأكدت في رفضه كل الاقتراحات الغربية بدخول مصر في أي تحالف غربي .. وهو الموقف الذي بلغ أشده في الحملة الضارية التي شنها الإعلام المصري على مؤتمر حلف بغداد .**

• **وقال أحمد سعيد : « بدأنا بعد العراق ما وقّعت حلف بغداد .. بدأنا حملة ضد الحلف .. بنعنف .. عنف شديد .. وحاولوا إنهم يفرضوا الحلف على الأردن وقالوا سترسل الجنرال « تمبلر » .. وكان ده رئيس أركان حرب القوات المسلحة البريطانية .. وجاي علشان يحضر احتفال توقيع الأردن عليه .. يومها كان فيه ثقة في مشاعر الجماهير وإنت بتكلمها .. ورغبتنا**

في ارتباطها بالقاعدة النضالية في مصر .. وفي الرئيس عبد الناصر .. وثقتنا في وجهه نظره .. كل هذه العوامل جعلتني أطلب من الشعب الأردني بعد صلاة الجمعة بكره تطلع مظاهرات في جميع أنحاء الأردن » .

• قال شمس بدران : « كانت بريطانيا قد تبنت مشروعاً لعودة إسرائيل إلى خطوط الهدنة وحل مشكلة الفلسطينيين ورفضت إسرائيل .. وعرض إيدن على عبد الناصر الابتعاد عن دول الحياد ووعده بحل مشكلة إسرائيل ولكن عبد الناصر رفض » .

• وعلى الصعيد العربي .. في أوائل سنة ٥٥ عقد مؤتمر الحكومات العربية الموقعة على معاهدة الدفاع المشترك وانتهى بوحدة الفكر المصري السعودي في مواجهة الأحلاف .. ولعب صلاح سالم دوراً هاماً في تقريب وجهات نظر العرب .. وكان أول احتكاك مباشر بين عبد الناصر والحكام العرب ...

• ويقول مصطفى أمين : « في بداية الثورة كانت مصر علاقتها بكل الدول العربية كويسة .. كانت مصر زعيمة البلاد العربية بدون أن تتدخل في السياسة الداخلية لأي بلد عربي .. كان يخفى أن نقول في أي بلد عربي .. إنك إنت مصري .. حتى تفتح لك جميع الأبواب » .

• وعلى الصعيد الإسلامي أصبح القامقام أنور السادات سكرتير المؤتمر الإسلامي ...

• وعلى الصعيد المحلي بدأ مشروع مصنع الحديد والصلب بالتعاون مع ألمانيا .. ومشروعات تابعة للشئون البلدية والقروية كإدخال الماء العذب إلى القرى .. وبناء كورنيش النيل الذي بدأ في مايو سنة ٥٤ وتكلف ٢ ونصف مليون جنيه تحت قيادة بغدادى ...

• ويقول وجيه أباطة : « بغدادى كسر الروتين » .

• وأسأل عبد اللطيف بغدادى : « هل نجاحك هو الذى خلّى الرئيس يغير منك زى ما قلت ؟

• « قالوا صاحب العصا السحرية .. وناس بيقولوا إن البغدادى لو مر من هنا تلاقى كذا .. كلام كثير عن إنجازاتى السريعة إنى شغلت الناس ٢٤ ساعة .. كانوا يشتغلوا وردية ٨ ساعات أنا قلت لهم لا .. المقاولين قلت لهم عاوز أشتغل ٢٤ ساعة ٣ ورديات .. قلت له بدل ما تشتغل وردية واحدة فى عملية تقعد فيها ١٢ شهر .. حاتمعلها فى ٤ شهور .. وفلوسك ستدور أكثر ونفس المصاريف هى هى .. فابتدت العملية من هنا .. الكورنيش مثلاً ٦٥ كيلو من حلوان ونفس الطريق للقناطر .. اتنفذ فى ٣ شهور ونصف .. ٤ شهور .. واتردمت قطع من النيل .. ومصانع ومطبعة الأهرام اتشالت .. والكوبرى علشان المياه لا تقليه اتعملت خرسانة من تحت الكوبرى التى بتعدى من فوقه السكة الحديد .. أهم حاجة أنا عملتها فى شئون البلدية إننا عملنا كورنيش النيل .. وأهم حاجة عملتها فى شئون البلدية والقروية تعميم مياه الشرب الصالحة فى الأرياف .. كنت فى الأرياف بأشرفهم ببشربوا من مياه البرك .. ويحببوا الميه من آخر الدنيا .. فتعميم مياه الشرب ده بالنسبة لصحة الناس » .

- ماذا تقول لنا عن عبد اللطيف بغدادى رئيس مجلس الأمة ؟
- « هي أحد المناصب التى تقلدتها .. وزارة الحربية .. شئون بلدية وقروية .. مجلس الخدمات .. مجلس الإنتاج .. وزارة التخطيط .. وزارة الخزانة .. كل ده بسرعة بسرعة » .
- وتبنى جمال سالم فكرة إقامة السد العالى .. وكان من أشد المتحمسين للإصلاح الزراعى ...
- ويقول سيد مرعى : « كان جمال سالم يعتبر الإصلاح الزراعى مسألة حياة أو موت بالنسبة له .. ولذلك كان يقف بكل جهده وتفكيره وراء خطواته .. وكانت وجهة نظر جمال سالم أن الإصلاح الزراعى هو نقطة التحول الأساسية فى حياة القاعدة العريضة من الشعب المصرى .. ولذلك لابد أن تلقى الثورة بكل ثقلها وراءه .. وخرجت يوما من اجتماع مجلس قيادة الثورة بعد دعوة جمال سالم لى .. وأخذت على عاتقى المهمة الصعبة .. ليحضرُوا توزيع الأرض على الفلاحين .. وقد كان .. وأخذ موكب رجال الثورة يشق طريقه بصعوبة وسط الاستقبال الحماسى الجارف .. وهنأته الفلاحين .. وتتابع زيارات جمال عبد الناصر لمناطق الإصلاح الزراعى بعد ذلك » .
- ويقول توفيق عبده [إسماعيل] : « جمال سالم فجر له دوراً فى الإعلام عن طريق قانون الإصلاح الزراعى ... ولكن تصرفات مثل الممدس الذى يضعه على الترابيزة فى الاجتماع .. وبعد قانون الإصلاح بدأ اتجاه من أعضاء مجلس قيادة الثورة للإقلال من دوره » .
- ولكن جمال سالم خرج من التشكيل ...
- وكان د . عزيز صدقى وزيراً للصناعة ...
- ويقول د . عزيز صدقى : « رجعنا وقامت الثورة فى ٢٣ يوليو .. وعندما قامت الثورة حرصت على جمع أكبر عدد من الشخصيات التى أعتقد إنها تقدر تفيد .. وأنا كنت من بينهم .. وحدثت اجتماعات فى مجلس الثورة .. وحضرها بعض المسؤولين فى ذلك الوقت بما فيهم بعض أعضاء مجلس الثورة .. وكانت قد شكلت وزارة فى أول الثورة كان من بين أعضائها ناس أنا أعرفهم : د . وليم سليم حنا .. الأستاذ فؤاد جمال .. نور الدين طراف اتصلوا به على أساس ممكن الاستعانة به .. وكان فيه حاجة اسمها المجلس الأعلى للتخطيط والتنسيق ، ومجلس الخدمات ومجلس الإنتاج .. وكلمنى د . سليم حنا علشان اشترك وعينت خبيراً فى المجلس الأعلى للخدمات .. الخدمات كان فيها حاجة اسمها الأموال المصادرة .. ١٤ - ١٥ مليون جنيه خصصت لعمل خدمات .. أساس العمل أن نعمل عملاً منظماً .. فعملت تخطيط ليه الخدمة الصحية اللى موجودة .. وإيه اللى يجب أن يكون .. ولابد نعمل إيه ؟ نتوزع إزاي ؟ أسلوب جديد فى ذلك الوقت .. فى ذلك الوقت كان رئيس المجلس عبد اللطيف بغدادى .. طبعاً كنا على اتصال به .. ثم الرئيس جمال عبد الناصر الله يرحمه قرر أن يأتى ليحضر جلسة من جلسات المجلس .. فأحضرت له الخرائط اللى عملناها .. قعد معى على مدى ساعتين وكان ببسأل فى كل صغيرة وكبيرة وبعدين عندما انتهينا عاد وحضر جلسة المجلس .. وقال أنا سعيد

بما شهدته لأنكم وضعتهم أيديكم على أول الطريق .. طبعاً هذه كانت البداية .. ثاني يوم كلمنى محمد حسنين هيكل .. وكنت أعرفه لكن لم يكن صديقاً .. طلب مقابلتى .. أهلاً وسهلاً .. قال الرئيس كلمنى وقال فيه واحد ماسك الخدمات وعاوزك تروح تشوفها .. بأحكي لك إيه اللي حصل وأورى لك بداية العلاقة .. فى أول يوليو ٥٦ كانت الأسرة فى الاسكندرية وكلمنى سامى شرف فى التليفون وطلب حضورى .. أهلاً وسهلاً .. كنت فى بيت والدى .. قال لى بكرة فيه ميعاد فى منشية البكرى .. سامى قال حنشوف بعض كثيراً إن شاء الله .. ذهبت هناك وجدت سيد مرعى ومصطفى خليل فى الصالون .. دخلونى الأول حسب الأقدمية كعضو سابق فى مجلس الخدمات لى الأولوية .. لقيت الرئيس .. كان هو جالس وبجانبه أنور السادات وكنت شفته كذا مرة .. قال لى أنا طالبك علشان إنت عارف عملنا كذا وكذا .. الحقيقة جيبنا نعمل حاجة فى الصناعة ومجلس الخدمات .. أنا عاوزك تمسك الصناعة .. مكنش فيه حاجة اسمها وزارة الصناعة .. كان اسمها التجارة والصناعة .. والصناعة كانت مصلحة مع مصلحة التجارة .. شوف تقدر تعمل إيه .. دى البداية .. ده للشباب علشان يعرف التاريخ الذى لم يعاصره .. النهارده الناس بتتكلم عن الصناعة وكأنه أمر واقع كبير وهو كبير فعلاً .. كيف بدأت وزارة الصناعة .. أنا ثاني يوم قلت فى مكتبى .. قالوا فى وزارة التجارة والصناعة .. كان فيه مكتب معى لوزير التجارة محمد أبو الخير .. فجاء لى وسلم على وقال لى الحجرة أهى .. مكتب وكمرسين .. أما المكتب ولا ورقة ولا بنى آدم .. قال لى إنت مت عنده أحد تحب يبقى سكرتير معك .. قلت آه .. قال فيه واحد كويس عندى هنا اسمه محمد مراد .. قلت ابعثه لى .. جاء قال لى أقعد فى .. قلت له دور لك على مكان .. مش عارف .. مافيش فى الوزارة مافيش غير حجرتى .. جابوا له ترابيزة صغيرة فى الطرفة بره علشان يقعد عليها .. هكذا بدأت الصناعة .. مافيش ورقة .. مافيش موظف .. مافيش وزارة شغالة .. يخش للوزير الوكلاء ويقولوا له يافندم الشئى الفلانى .. أنا ماحدث دخل قال لى إزيك حتى .. لإنى مافيش موظفين » .

* من هذا المنطلق نستطيع أن نقول إنك الرائد ؟

* « ما أحكيه لكى يعرف ويفهم الشباب كيف قامت الثورة .. وكيف بدأ التصنيع فى مصر » .

● وكلف دكتور مصطفى خليل للمواصلات ...

* ويقول د . مصطفى خليل : « إن بداية علاقتى بثورة ٢٣ يوليو كانت اختياري عضواً فى مجلس الإنتاج فى لجنة كانت موجودة خاصة بالنقل والمواصلات لأنى أنا فى نفس الوقت ده كنت فى الجامعة فى نفس هذا المجال .. والفضل كله يعود إلى الدكتور عزيز صدقى فى مجال الصناعة .. قبل ذلك كان الهدف بدون شك إنه مافيش دولة تستطيع أن تقف على أرجلها أو تنافس فى الأسواق العالمية أو تستطيع أن تواجه متطلبات شعبها إذا كانت بتركز فقط على الزراعة .. بدون شك لن نستطيع أن ننسى دور شخص مثل طلعت حرب .. ابتداء التصنيع فى مصر من سنة ٢٣ وابتداء فى إنشاء البنوك وكان وقتها شيئاً متعذراً جداً فى ظل الاحتلال ..

ولكن لما جاء الرئيس عبد الناصر أراد أن يعطى تركيزاً كبيراً على التحول فى تصنيع البلد حتى يمكن النهوض بمستوى البلد والدخل القومى على وجه العموم » .

• وكلف المهندس سيد مرعى بالإصلاح الزراعى ...

• ويقول سيد مرعى : « عبد الناصر قال لى لقد اخترتك لتكون وزير دولة للإصلاح الزراعى فى الوزارة الجديدة .. وكان هذا القرار آخر ما توقعته .. وقررت الاعتذار .. ولكن لم تفلح محاولتى لإبقاء الإصلاح الزراعى بعيداً عن قيود الروتين .. ولم تكن هناك وسيلة غير القبول .. وأصبحت وزيراً » .

• وكلف الدكتور نور الدين طراف وزيراً للصحة ...

• ويقول د . نور الدين طراف : « قعدت وزير مدة مع رجال الثورة .. الواقع إنه كان فيه علاقة ود قوية لما تعرفت بجمال عبد الناصر .. كنت بأحبه جدا وهو يبجبنى .. وكان كلهم أصدقائى وأعتقد إن ده سبب استمرارى لفترة » .

• هل كان الرئيس جمال عبد الناصر مستمعاً جيداً ومنصتاً إلى رأى المعارض ؟

• « جدا جدا وكان بينافش .. وكان له حجة وكان يحتمل المعارضة .. ولم أشعر فى يوم من الأيام أنه غضب .. ماعرفش مناقشتهم هم مع بعض فى مجلس قيادة الثورة يوم ما كانوا يجتمعوا .. إنما فى داخل مجلس الوزراء هذه الصورة هى التى كانت موجودة » .

• لماذا تركت المنصب بعد ذلك إذن ؟

• « الواقع أننى لم أترك المنصب .. أنا أنكر أننى استقلت مرة فى أثناء تولى وزارة الصحة .. والله كان محمد التابعى هاجم وزارة الصحة بمقالات اتكلم عن التقصير .. أنا أعتقد وكنت أعلم أن محمد التابعى صديق لهيكل وهيكى كان على صلة بعبد الناصر .. أنا حسيت إن ده قد يكون بإيعاز من عبد الناصر .. فكنتب الاستقالة له وأرسلتها له عن طريق الأخ محمود الجيار الذى كان يعمل معه .. وبعد يومين اتصل بى محمود الجيار وقال لى الرئيس عاوزك ضرورى تفوت عليه فى البيت النهارده .. ورحت منزله فى منشية البكرى .. قال لى إنت بعت لى جواب فهمت منه إنك تحملنى مسؤولية ما كتب ضدك .. أنا يا أخى لا أعرف التابعى ولا أقالبه .. وعمرى ما قلت لمحمد هيكى شىء من هذا القبيل .. وده تفكير غلط منك .. وأنا شايف مافيش مبرر للاستقالة .. قلت له وهو كذلك وسحبت الاستقالة .. الواقع إنه كان لا يضيق بآن الواحد يقول له رأى » .

• وتولى حسين الشافعى الشؤون الاجتماعية .. وتولى كمال الدين حسين وزارة التعليم ...

• وأسأل كمال الدين حسين : حضرتك كنت المسئول الأول عن التعليم فى بدايات الثورة .. هل حضرتك تستطيع أن تكلمنا عن التغيير الذى تم فى سياسة التعليم لكى يحدث التوافق ما بين ما يتعلمه الأطفال والشباب .. وبين مبادئ الثورة ؟

« أنا عمري ما أقول إنني أعرف كل حاجة .. وأنا بالعكس .. تقدير الموقف .. تعبئة الناس لعمل ما .. الناس المضبوطون علشان عمل معين .. دى هى وظيفة القيادة .. مش أنا أعمل بنفسى .. وأنا رحت ووجدت الوزير بيعطى أمر نقل مدرس من أسوان أو جزء لمدرس فى أسوان .. الكلام ده غير مطلوب إطلاقاً .. الوزير حاجة تانى خالص .. غير كده أنا كان دورى سياسى فى وزارة التربية والتعليم .. أن أدرس الحالة من باب المعلومات وأعرف الحالة شكلها إيه وبعدين أجيب كل المختصين اللى ممكن أجيبهم علشان يقولوا لى إيه الحلول .. أنا كنت جايب مستشار وزارة التربية والتعليم عميد من معهد التربية .. ومدير التعليم الابتدائى كان عبد العزيز السيد .. كان وكيل كلية التربية .. جايب فطاحل الناس .. جايب أستاذ جامعة كويس جدا علشان يمسك التعليم الفنى .. يعنى كنت مختار مجموعة كبيرة من الناس وعاملين مجلس وكلاء ومجلس كذا علشان ينفذ السياسة .. والمجالس الكثيرة عيني جمال عبد الناصر أيضاً رئيسها .. كان مجلس الفنون والآداب أو مجلس العلوم أو لجنة الطاقة الذرية أو مجلس رعاية الشباب .. بالنسبة لوزارة التربية والتعليم كان موضوع أساسى موضوع المعلم .. مثلاً المدرسة عبارة عن أولاً معلم وبعدين مبنى مدرسة .. علشان تلم الناس .. وبعدين منهج » .

• وأسأل د . سليمان حزين عن مستوى التعليم عندما كان السيد كمال الدين حسين وزيراً للتعليم فى مصر ؟

• « بصراحة طبعاً لأن ده تاريخ إذا بيتصف بالكذب الكلام دلوقت يبقى أنا لا أصلح أن أشتغل مربياً أبداً .. الصديق أهم ميزة تعلمتها من والدى .. السيد كمال الدين حسين أولاً كان ضابطاً ولكنه كان متفتحاً أكثر التفتح وكان مستعداً إنه يتعلم من مروضيه .. ويستمتع إليهم .. مش مجرد استماع وإنما ليأخذ برأيهم .. أنا قلت له أمرين مهمين فى التعليم .. أولاً المعلم .. ثانياً التعليم الابتدائى فى ذلك الوقت، ماكنش لسه فيه إلزامى .. اجتهد وقرر إنه يعقد أول مؤتمر للتعليم الابتدائى » .

• وأسأل د . سليمان حزين عن رأيه فى التعليم فى ذلك الوقت بصراحة ؟

• « كنت دخلت بدلا من طه حسين فى ذلك الوقت .. وكان أستاذى وصلنى به كانت قوية جداً لأبعد الحدود .. وطه حسين كان له ميزة كبيرة جدا فى إنه أدخل المجانية واعتبر التعليم كالماء والهواء .. ودى صيغة جديدة جدا فى ذلك الوقت .. أنا خلفته .. ومنذ اليوم الأول أنا اعتبرت التعليم مش حق فريضة .. واجب يعنى .. إذا كان حق تأخذ حقه من التعليم وتسقط فى المدارس زى ما إنت عاوز وتقع فى كلية الهندسة ١٢ سنة وتحرم غيرك بتضيق مبدأ آخر عمله طه حسين مع نجيب الهلالي .. وعاصرتهم أنا فى ذلك الوقت سنة ٣٨ .. وهو مبدأ تكافؤ الفرص .. المجانية المطلقة .. وأنه حق كالماء والهواء وماحش يقدر يرفدك منه .. وتقع ترسب فيه كما تشاء .. ده يترتب عليه أن تأخذ فرص غيرك وبالتالي أهدرت مبدأ تكافؤ الفرص ومبدأ التفاوت بين الناس » .

• **ويقول كمال الدين حسين :** « طبعاً تاريخ ثورة ٢٣ كان لازم يدخل .. لكن نحن لم نلغى تاريخ أى حد .. لم يحدث .. لم يحصل إلغاء زعامات أو إلغاء إنجازات .. لأ لا لم يحدث .. حتى أنا سألت اللي بيتعلموا من القرايب قالوا كلنا شغنا سعد زغلول وثورة ١٩ .. كله كان موجوداً وإن لم يحدث هذا الكلام يصيح إجراماً .. أنا اللي بأقول لك .. وأنا نتاج ثورة ١٩ .. لأن التتكرر للماضى مش طبيعى .. مش ممكن نتتكرر للماضى أبداً .. بل بالعكس نأخذ منه عظة » .

• **ويقول د . يونان لبيب رزق :** « أنا عملت بالتدريس من سنة ٥٥ وأستطيع أن أقول إن كتب التاريخ غير مسؤولة بقدر أجهزة الإعلام .. ولاحظت أن سعد زغلول عُين حقه .. بينما عرابى أخذ أكثر من حقه .. وأسرة محمد على أسوأ إليها وهذا خروج عن الموضوعية التاريخية .. فأظهرت كتب التاريخ مثلاً أن إسماعيل كان أبله ومسرماً وسعيد أعطى امتياز القناة لحبه للمكرنة .. وهذا إخلال بالحقيقة التاريخية » .

• **بينما كان عبد الناصر رئيساً للوزراء ...**

• **وزاد الاهتمام بجهاز المخابرات الذى أنشأه زكريا محيى الدين لحماية الثورة وتأمين الجيش ...**

• **ويقول توفيق عبده إسماعيل :** « لما أعلنت الجمهورية فى ١٨ يونيو سنة ٥٣ فضل هو ماسك المخابرات وجمال عبد الناصر تولى وزارة الداخلية .. بعد شوية عبد الناصربقى نائب رئيس الوزراء وزكريا محيى الدين تولى وزارة الداخلية .. وكان مشرفاً على جهاز المخابرات الحربية فى نفس الوقت .. فترة إلى سنة ٥٦ أنشأ جهاز المخابرات العامة على أساس مجموعة من ضباط المخابرات الحربية اللي تم تدريبهم على يد زكريا محيى الدين لتولى العمليات الخارجية .. فى الحقيقة هو دوره كان محورى .. على صبرى قعد فترة بسيطة جداً فى الجهاز .. من أواخر ٥٦ إلى فبراير ٥٨ . وزكريا محيى الدين كان بيعرف التفاصيل ولازم يناقشها » .

• **وأسأل محمد فائق : هل بدأت معه فى تأسيس وتكوين المخابرات العامة وأجهزة الأمن فى مصر ؟**

• **« بالضبط .. بس أنا لم يكن لى أى علاقة بالأمن كأمن إطلاقاً لأن من طبيعتى ماليش علاقة بجهاز الأمن كجهاز ولكن جهاز المخابرات لما قام فى بداية الثورة كان ده الجهاز السياسى للثورة .. تبص تلاقى على صبرى .. كمال رفعت .. شعراوى جمعه .. محمد فائق .. حامد محمود .. هم خريجو هذا الجهاز لإنه لم يكن هناك حزب صانع للثورة .. وكنا بنواجه المخابرات الإنجليزية أو المخابرات الفرنسية وعملية كبيرة جداً .. فكان الجهاز ده هو الجهاز السياسى لجمال عبد الناصر فعلاً .. فبدأننا من البداية خالص إنشاء هذا الجهاز مع زكريا محيى الدين .. لكن عملية الأمن نفسها لم يكن لى أى علاقة بها » .**

• **ويضيف سعيد حليم :** « هذا الموضوع لا يخصنى إنما يرجع إليه ، والله هو ده مبدأ عنده وهو

رجل ذو مبادئ .. وده اللي أقدر أقوله إنه مادام يقرر شيء فهذه حاجته الشخصية .. ولولا صداقتي وإعزازي لك ما كنت أتكلم فى موضوعات كهذه .. لأن ناس كثير قوى اتكلمت فيها .. ولو الواحد اتكلم حيتعرض لآراء مختلفة وبعدين ما يفدرس يرد عليهم لأنك مش حتعطينى فرصة أرد فى التليفزيون تانى » .

• **تكوين الجهاز الأمنى لمصر من خلال عملك مع السيد زكريا محبى الدين .. كيف جاء وكيف بدأ ؟**

• « والله الثورة أو الانقلاب لما حدث كان فيه فترات من الضرورى تأمين الجيش علشان يبقى فيه استقرار .. وكان الهدف وطنياً وكان اختيار الضباط اللي عملوا فيها اختياراً دقيقاً .. ثانياً كان البوليس السياسى بوجهه القبيح وكان من الضرورى إنه تعمل تنظيم لتأمين البلد فدرست عدة مشروعات .. منها مشروع المخابرات العامة ونفذ .. وده كان الجهاز الأمنى الذى كان موجوداً فى ذلك الوقت .. ومع هذا تعددت الأجهزة .. يعنى كان هناك كثير من الأجهزة إلى أن انتهت بالتنظيم السرى فى أواخر حياة الرئيس جمال عبد الناصر » .

• **هل كانت أجهزة الأمن مسخرة لحماية السلطة ؟**

• « أى أجهزة أمن بتلبى الاحتياجات سواء للحكومة أو للشعب .. مش جاية بس للحاكم إنما للشعب .. وبعدين بها أنشطة معروفة .. نشاط مكافحة الجاسوسية .. ونشاط المعلومات بتقدمه للقيادة .. أما النواحي الداخلية فالمسئول عنها البوليس » .

• **وماذا كانت مسئولية السيد زكريا محبى الدين فى هذا المجال ؟**

• « هو إحنا عملنا جهاز المخابرات وخلص اشتغل » .

• **وتولى سامى شرف سكرتارية الرئيس للمعلومات ..**

• **ويقول جمال حماد : « وشاية سامى شرف بشقيقته التى تناقض المبادئ الإنسانية وصلات الرحم كانت تستهدف الاستحواذ على ثقة عبد الناصر المطلقة » .**

• **وأسأل سعيد حليم : هل كانت هذه الأجهزة تتعارض أو تراقب بعضها البعض ؟**

• « هو جمال عبد الناصر كان يرمى إلى أن يجيء له معلومات من مصادر مختلفة .. للتأكد .. وإن كان يعنى أيضاً فيه بعض التضارب .. لا يوجد شك » .

• **ويضيف سعيد حليم : « هو شوف يعنى يجب الإنسان إنه يفرق ما بين عهد مجلس الثورة .. وما بين رئاسة السيد جمال عبد الناصر للجمهورية .. مجلس الثورة فى ذلك الوقت كان حكماً سيادياً جماعياً فكان كل عضو فى مجلس قيادة الثورة من حقه يقول رأيه .. وكان يقول بصراحة ويناقش .. إنما عندما حل مجلس الثورة .. خلاص أصبح عملية عادية .. رئيس الجمهورية يشكل وزراء ويشكل كل حاجة .. خلاص » .**

• والسيد زكريا محبى الدين كان معه فى ذلك الوقت ولا كان ترك فى المرحلة التى حدث فيها أن الرئيس جمال عبد الناصر انفرد بالسلطة ؟

• « انحل مجلس الثورة وطلب البعض من الأعضاء إنهم يكملوا .. فيه ناس رفضوا زى المرجوم جمال سالم .. وفيه ناس تعاونت معه فى تشكيل حكومة والخ .. زكريا محبى الدين استمر زى ما كلهم استمروا » .

• وقبل ذلك كان خالد محبى الدين قد أبعد وغادر البلاد ...

• وأقول لخالد محبى الدين : سؤال محرج .. هل أبعدت أم ابتعدت ؟

• « والله الاثنان .. أولاً أنا قررت إنى أمشى .. البقاء مع زملاء انشروخت العلاقة معهم .. لكن أنا كنت عاوز أقعد فى مصر .. ثم بالمناقشة الهادئة وجدت إن البقاء فى مصر حقيقى متعباً .. فالأفضل إنى أغادر .. فخرجت وتركت مصر » .

• وفى أغسطس سنة ٥٥ قُبلت استقالة صلاح سالم من مجلس قيادة الثورة التى قيل إنها بسبب تعثر سياسته فى السودان

• وأسأل أمين شاكى : لماذا ترك صلاح سالم ؟

• « صلاح سالم كان طموحاً جداً ويرضه كان يتكلم كثيراً وكان عايز الناس تعرف إن عبد الناصر لم يكن أحسن منه ولا أندر على قيادة هذا البلد منه .. وكان لا يعرف حدوداً لتصرفاته .. سواء داخليا أو خارج مصر .. ومن هنا أصبح من الصعب بقاءه فى منصبه » .

• بسبب السودان كما قيل ؟

• « من أخطائه الخارجية السودان والعراق .. وكل البلاد التى زارها ارتكب فيها أخطاء كثيرة » .

• ويقول أحمد حمروش : « بدأ عبد الناصر يخلع أنصاره الذين استنفذوا أغراضهم .. والذين شوهت صورتهم أمام الجماهير .. وتماقطت فى هذه الفترة أسماء كان الشعب قد قاض به الكيل من كثرة ما سمعه عنها .. وما لمسه من تصرفاتها .. جمال سالم .. أحمد أنور قائد البوليس الحزبى .. إبراهيم الطحاوى وأحمد عبد الله طعيمة .. وكانت هناك انفراجة نسبية فى موضوع المعتقلين والمعتقلات » .

• ولم يجتمع المجلس بعد ذلك حتى يناير سنة ٥٦ وذلك لمناقشة الدستور الجديد .. وتقرر إجراء استفتاء عليه بعد ذلك بشهور قليلة

• ويقول كمال الدين حسين : « كلنا مضينا على الدستور .. وهو كان لازم يعنى نمضى على الدستور .. الدستور الذى فيه يصبح للمصريين اتحاد قومى .. علشان يبقى هو وسيلة ديموقراطية .. وكنا معتقدين بإخلاص إن ده سيمتد فى حدود الاتحاد القومى .. وفى حدود المناقشة والانتخابات الحرة .. ده برضه كان حذر من عبد الناصر فقد أخذ درساً فظيماً فى سنة ٥٤ وكلنا أخذنا الدرس ده .. بس هو اتحملة أكثر » .

• **ويقول أمين شاكِر :** « قلت له إحنا ضباط جيش مش بوليس .. وإحنا جايين من معسكرات نائية خلف أسوار عالية مش مخالطين المواطنين .. فلحنا مانقدرش نعرف إيه هم المواطنين على وجه التحديد .. بيفكروا إزاي عاوزين إيه ؟ وإيه اللي يسعدهم ؟ فلابد إنك تقابل بعض من هؤلاء المواطنين علشان تعرف الناس دى بتفكر إزاي ؟ وعازية إيه ؟ فرحب بهذا يعنى ما استعلاش ورفض .. جيت له عيود باشا .. جيت له سيد ياسين .. جيت له على باشا إسلام .. جيت له سابا حبشى .. جيت له غالى .. كل هؤلاء الناس اللي كانوا بيمثلوا الطبقة الرأسمالية ..جيت له رشدى بك بتاع بنك مصر .. العسال .. وبعدين جيت له من الطبقة المتوسطة بعض رؤساء الإدارات والمصالح علشان يكلموه عن الجهاز التنفيذى ومشاكله .. وماشى إزاي ؟ ومين يتدخل فى عمله ؟ وجيت له من العمال وقعد معاهم .. وكان نيه على إن فى كل هذه المقابلات لازم أكون حاضراً وكنت بأحضر ومعنى نوتة وأكتب بـSHORT HAND (الاختزال) ملخص المقابلة .. كان يطلب منى أن أنسخها وأعطيهها له .. أولا كنت بألاحظ إن اللي داخل لعبد الناصر ركيه بتخبط فى بعضها .. لكنه هو كان وجهه مريح .. وكان يحسك إنه سعيد بلقائك وعاوزك تتكلم فتلاقي الضيف بالتدريج كده .. لسانه ينطق ويتبدى يتكلم بحريته .. وكان هو ينصت بمنتهى الاهتمام .. وما كنش يقاطع أبدا الضيف وهو يتكلم إلا إذا ظهرت نقطة هامة يجب أن يعلم عنها أكثر فيقوم يطلب من الضيف إنه يعطى له شوية تفاصيل عنها .. وينصت إلى آخر المقابلة .. ويقوم عبد الناصر يشكر الضيف على تفضله بالجنشور وعلى المعلومات الهامة اللي قالها .. وإذا كانت هناك بعض النقاط الهامة جاءت فى الحديث وهو بيهمه أن يعرف عنها معلومات أكثر .. يقوم يسأل ضيفه إذا كان لديه وقت أنه يكتب له تقريراً عن هذه النقاط .. وباعتقد إن دى من أكثر الحاجات اللي نفعنا عبد الناصر وساعدت على تكوينه سياسيا .. يمكن أن يدير بلدأ ويتحمل مسئوليات هذا البلد .. ودارت الأيام وجاءت المشاكل الخارجية .. وإحنا فى بداية الثورة كل ما فى ذهننا من مشاكل خارجية الاستقلال التام أو الموت الزوام .. يعنى يوم ما نطلع الإنجليز يبقى خلاص انتهت مشاكل مصر .. بصينا لقينا إن المشاكل بتبتدى ولا تنتهى .. السودان وبعدين سوريا وبعدين السعودية وبعدين المغرب وبعدين تونس .. وثورة الجزائر أيضاً » .

• **وَكُونُ الاتحاد القومى ...**

- **ويقول أحمد حمروش :** « قال لى زكريا محبى الدين : إن جمال عبد الناصر كان يريد أن ينتزع من الثورة صفنها العسكرية .. لذا كانت محاولاته لتكوين تنظيم شعبى (الاتحاد القومى) » .
- **يقول إسماعيل فريد :** « الثورة قامت على مُثل وعلى أساس إننا نقوى الجيش ونظهر الجيش .. بعد كده لما وضح أنه لا يمكن نرجع لمواقفنا فى الجيش وأصبحنا قوة ذات سيادة .. مجلس الثورة أصبح ذا سيادة وأصبح يحكم .. وبعد كده زى ما ظهر كانت الخلافات تدب بين مجلس الثورة » .
- **ويقول أحمد حمروش :** « الاتحاد القومى مأخوذة برامجه من قوانين وضعها حاكم البرتغال

سألازار الذى مكث بحكم ربع قرن وكان رجلا متخلفا .. وبالتالي لم يكن ممكناً أن يكون تنظيمياً شعبياً بمعنى الكلمة » .

• وأسأل سعيد حليم : كيف خلّ مجلس قيادة الثورة .. طبعاً حضرت كل هذا ؟

• « آه طبعاً حضرته .. هو كان فى ذلك الوقت الأمور لازم تستقر .. طبعاً مش ممكن الاستمرار فى الحكم الاستثنائى .. وبالتالي نوّقش هذا الموضوع فى مجلس قيادة الثورة .. ووفق على أن مجلس الثورة يُحل أو يحل نفسه واللى عاوز يستمر يستمر » .

• وكان إيه وجهة النظر المسببة لذلك ؟

• « كما قلت إن دى كانت فترة استثنائية والأمور لازم تبقى مستقرة قوى وتأخذ الشكل الطبيعى للحكم » .

• ويقول د . محمود الجوهري : « لما الرئيس جمال حب أن ينفرد بالسلطة فقال الطريقة الوحيدة .. وده كان بناء على نصيحة محمد حسنين،هيكل على ما أعتقد .. بعد أزمة مارس .. كانت فكرته إن هو طول ما أعضاء مجلس الثورة موجودين وفيه خلافات شديدة جداً .. مع جمال سالم وصلاح سالم مثلاً .. وده طبيعى .. الخلاف موجود فى أى مكان .. الخلافات اشتدت جداً .. وكان بيحس إن الخلاف ده معوق للمسيرة الثورية .. فقال لك إن أحسن حاجة أرتج الناس دول أعملهم وزراء .. ابتدا هو ينفرد بالسلطة وابتدا يجرب المجموعة الأولى .. عمل أربع وزراء .. وبعد شوية يعمل تعديلاً وزارياً يقعد الأربعة وزراء دول بره .. ويعين أربعة غيرهم .. لغاية ما عينهم كلهم وبعد كام سنة كان كلهم بره » .

• ويضيف إسماعيل فريد : « وتولى العملية جمال عبد الناصر المسيطر سيطرة تامة على مجلس الثورة .. ما عدا شوية خلافات مع صلاح سالم ومع جمال سالم .. لكن دائماً هو وفريقه وعبد الحكيم عامر هم الأغلبية .. وإن الضباط تبعهم .. وإن الجيش تبعهم .. وهو الأول والأخير .. يعين نواب رئيس الجمهورية ويشيل منهم من يشاء » .

• وبدأ عبد الناصر الانفراد بالسلطة .. واكتساب الخبرة السياسية إلى جانب السمعة الدولية ...

وانتصر عبد الناصر

- لما كان جميع الناس فى حاجة إلى بطل قومى يغسل عار سنوات الاستعمار .. فقد لقى الزعيم جمال عبد الناصر هوى شديداً فى النفوس ...
- وبدأ نجم عبد الناصر يسطع شينا فشيناً أكثر فأكثر .. عندما تولى يوم ٢٥ يوليو سنة ٥٦ رئاسة الجمهورية ...
- وانتقلت السلطة إلى عبد الناصر دستوريا بعد أن وافق الشعب فى الاستفتاء عليه بنسبة تكاد تصل إلى ١٠٠ ٪ .. كما استفتى الشعب على الدستور الجديد ...
- وحلف عبد الناصر اليمين الدستورية فى مجلس الشعب ...
- ويقول سامى شرف : « أعضاء مجلس قيادة الثورة بعد ٥٦ .. يعنى بعد الاستفتاء وانتخاب الرئيس رئيساً للجمهورية .. كلهم قدموا استقالاتهم » .
- ويقول إسماعيل فريد : « فى سنة ٥٦ أعطى عبد الناصر لضباط قيادة الثورة .. كل واحد قلادة النيل .. وهم أعطوا له تفويضاً بتولى الحكم كيفما يشاء .. وهنا بدأت فترة حكم جمال عبد الناصر .. وأصبح هو المسئول عن حكم الدولة وليس مجلس الثورة » .
- ويقول كمال الدين حسين : « فى سنة ٥٦ برضه كانت الأحزاب مع الغرب .. ده خلى الدستور اللي اتعمل سنة ٥٦ فيه سلطات أكثر لرئيس الجمهورية .. وبصراحة اعترض على هذا جمال سالم الله يرحمه .. بس كلنا كنا متفقين .. إما نعمل الدستور بالشكل ده .. لكى لا تحدث الهزات اللي اتعملت قبل كده .. أو نخلى الدنيا سايبه .. وكان لنا ثقة كاملة فى جمال عبد الناصر .. وكلنا مضينا على الدستور » .
- ويقول خالد محيى الدين : « أوضح لى صلاح سالم أنه عندما أبعد محمد نجيب وتولى عبد الناصر رئاسة مجلس الوزراء وأصبح الرئيس الفعلى للبلاد .. طلب هو بنفسه منّا أن نعامله كرئيس أمام الآخرين .. لكن ما لبثت الأمور أن استقرت على أن نتعامل معه جميعاً على أنه « الرئيس » » .

• وأسأل جمال الدين حسين : كنت تقول إن الرئيس أنور السادات هو اللي ابتدع كلمة « ياريس » ؟

• « إحنا كنا دائماً نقول يا أخ جمال .. وبعدين يوم من الأيام وجدنا أنور السادات بيقول « ياريس » .. وبيقول لنا لازم نقول ياريس .. علشان أمام الناس ده دليل احترام وتقدير .. على الرغم من إننى شايف لو أقول أخ جمال ما فيهاش حاجة أبداً .. تقلل من القيمة .. لكن طبع ما كانش ممكن جزء يقول ياريس .. وجزء لا يقول ياريس .. وسارت كلمة يا ريس » .

• **بينما يقول أحمد أبو الفتح :** « كان يوم افتتاح البرلمان يوم تطور جديد فى علاقة عبد الناصر بزملائه المقربين .. لقد كانت علاقته بهم علاقة صداقة ومودة ومساواة .. فكانوا ينادونه باسمه مجرداً من أى لقب .. وأراد عبد الناصر أن يضع فاصلاً بينه وبينهم فأصدر أمره بأن يدخل وحده من الباب الرئيسى للبرلمان .. واستطاع من ذلك اليوم أن يخلق لنفسه مركزاً وهو مركز الرئاسة .. وأصبح اسمه يقترب بالرئيس » .

• **ويقول لطفى واكد :** « كنت أقول لعبد الناصر فى الفترات الأولى « يا أخ جمال » وبعد لما بقى رئيساً وبدأ يأخذ سمات الرئاسة والكل يقول له ياريس .. بقيت أقول له ياريس » .

• **مين اللي بدع هذه الكلمة ؟**

• « الله أعلم ما أعرفش .. إنما كل المحيطين به بتوع مجلس الثورة .. والموظفين اللي كان جايهم علشان يحولهم إلى زعماء فى المستقبل هم دول اللي كانوا بيقولوا له ياريس » .

• **ويقول أمين شاكى :** « كنا ننادى عبد الناصر ونقول له « يا جيمى » .. وشيئاً فشيئاً بدأت أشعر بالخرج معه ومنه .. وأنا اللي مشيت كلمة ياريس دى » .

• **وشغل مشروع الرى الطموح (السد العالى) ذهن عبد الناصر وتصدر قائمة مشروعاته ..**

• **وضغطت أمريكا على البنك الدولى فسحب مشروع تمويله للسد العالى ...**

• **ويقول جمال حماد :** « كان إعلان البنك الدولى هذا بشكل فظ من جانب وزير الخارجية الأمريكى دالاس » .

• **وأقدم عبد الناصر كرد فعل لهذا .. على العمل الذى صنع نجوميته فى يوم ٢٦ يوليو سنة ٥٦ بعد شهر وبضعة أيام من جلاء آخر جندى بريطانى عن التراب المصرى .. وكان القرار الجمهورى ٢٨٥ لسنة ٥٦ بتأميم قناة السويس ...**

• **ويقول خالد محبى الدين :** « ٥٦ .. دى حقيقى فى الجزء الثانى من مذكراتى لكن أقولها لك .. أنا كنت رايح أزور جمال عبد الناصر .. وكان أعلن إلغاء قرض السد العالى لقينه قاعد فى حالة متوترة .. ويكلم عبد الحكيم عامر فى التليفون .. وقال له أنا درست الموضوع وحأخذ قرار بتأميم شركة قناة السويس .. ماعرفش الناحية الثانية بيرد بيقول إيه .. قال له أنا دارس

لكل الوضع واحتمالاته .. وقفل .. فأنا طبعاً قلت له أيوه ده خبر جامد قوى .. قال وإحنا ماقدمناش حل تانى .. رداً على إلغاء القرض .. كانت أرباحها ١٠٠ مليون استرليني .. ونحطها فى بناء السد العالى .. وهو كان رايح يومها يزور بيت أحد الشهداء اسمه الصاغ مصطفى حافظ .. ده كان ضابط مخابرات غزة .. بعثوا له شنطة فيها متفجرات انفجرت فيه .. وأنا قمت رحت معاه .. وركبنا العربية وبدأ يتكلم فى السكة .. ووصلنا البيت عزيزنا الأسرة ورجعنا .. علشان كده جمال عبد الناصر لما جه يخطب خطبته المشهورة فى ميدان المنشية .. أصر على أنه يجيب أعضاء مجلس الثورة السابقين ويحضرُوا ويقعدُوا معاه على المنصة .. إعلاناً منه أن مصر موحدة وراء هذه الخطوة .. ده فى ٥٦ .. وعدت معاه فى القطار من الإسكندرية للقاهرة .. طبعاً بعد الإعلان عبد الناصر أخذ شعبية ضخمة .

• **ويقول د . حسن عباس زكى :** « أنا كنت مدير عام النقد .. وكنت ساعتها على أن أدبر بقى المشاكل بتاعة النقد لما تأملت واتصادرت أموالنا » .

• **هل تأميم قناة السويس كان خطوة بلا داع . لأنها كانت ستعود إلى مصر بعد قليل من يوم تأميمها .. أم كانت خطوة شجاعة وضرورية ؟**

• « لأهى مش ضرورية .. دى كانت اضطرارية .. لأن هو ماكانش فى تفكيره إنه يعمل دى .. لكن اتعملت لما أمريكا أوقفت عنا تعاونها فى السد العالى .. وعاوز فلوس .. ووقت عن إنها تستد به بالقرض .. فالارد الطبيعى إنه يحاول يلاقى أموالاً .. فالك تأميم قناة السويس .. القول بإنها تنعود إلينا .. ده كلام ليس اللي كنا نتخيله هو ده اللي حيدثت فعلاً .. طبيب ما هو إحنا الآن كلنا بنشوف حاجات صغيرة بتنوع بها ومابتتمش .. والصلح وإسرائيل نقول كذا وما فيش حاجة .. وبعدين اتفاقيات آمى اتمضت وتمت ولا بتننفش .. وأنا أشك أن الغرب كان حيسلم القناة .. لكن الحمد لله أخذناها وكسبناها .. وأفادت الشعب لأنه أصبح فى إيده قناة السويس .. ووجدت ناس يديروها أحسن مما كانت » .

• **ويقول د . ميلاد حنا :** « ٥٦ هو الميلاد الحقيقى من وجهة نظرى لثورة يوليو .. تأميم قناة السويس .. أنا بقيت بأسمع الخطاب وبأتنطط .. قاعد على مكتب وبأتنطط مش مصدق عبد الناصر وهو يقول « رئيس الجمهورية .. تأميم قناة السويس » .. ده كان بالنسبة لنا حدث لا يقل عن أحداث ثورة ١٩ بتاعة سعد زغلول .. فى هذا الإطار أخذت الثورة تأييد الشباب وفضل هذا التأثير طويلاً » .

• **وأسأل المهندس عبد الحميد أبو بكر :** الرجل الثانى فى هيئة قناة السويس بعد التأميم .. كيف عرفت بقرار التأميم ؟

• « هى لها قصة .. كان الرئيس جاء يفتح خط أنابيب البترول من السويس للقاهرة .. وأثناء الاحتفال قال لمحمود يونس أنا عاوزكم تأنوا لى الساعة ١٢,٣٠ .. رحنا .. كان فى مجلس الوزراء .. دخل محمود يونس وبعدين استدعانى .. دخلت له سألنى سؤالاً غريباً قوى قال لى :

تعرف إليه عن قناة السويس .. قلت له : والله فيه نادى هناك اسمه النادى الفرنساوى .. ولما يأتى ضيوف أجانب بنزم فيه الخواجات فى النادى .. لأن فى ذلك الوقت الرئيس خلانا مسئولين عن البترول .. دى كل معلوماتى .. ضحك وقال : « والله أنا قررت تأميم قناة السويس .. وأنت سوف تذهب مع المهندس محمود يونس علشان تنفذوا قرار التأميم » .. الكلام ده كان قبل تأميم قناة السويس بـ ٥٥ ساعة .. طلبنا منه أن يبقى معنا واحد ثالث اللي هو كان المهندس محمد عزت عادل اللي هو رئيس القناة .. وقال لنا إن ده سر ماحدش يعرف عنه حاجة .. وأعطانا بعض الكتب كانت بجواره .. وقال : أنا فى الإسكندرية يوم الخميس سوف أقول خطبة .. وكلمة المر سوف تكون « ديليسبس » .. ساعة ما تسمعوا كلمة « ديليسبس » تروحوا تنفذوا الخطة وتستولوا على قناة السويس .. كان قبل التأميم بـ ٥٥ ساعة .

• **ويعد كلمة « ديليسبس » .. بعد ما الرئيس عبد الناصر قال كلمة السر .. وبعد ما أعلن جهاراً نهاراً تأميم القناة .. كيف كان تصرفكم مع المرشدين الأجانب والمرشدين المصريين اللي حلوا محلهم ؟**

• « كان المفروض إن الخطبة تبدأ الساعة السابعة تأخر الرئيس إلى ٨,٣٠ لأن كان فى اجتماع مجلس الوزراء فى الإسكندرية .. وكلمة « ديليسبس » قالها حوالى الساعة ١٠ .. إحنا كنا مقسمين أنفسنا ٣ مجموعات .. مجموعة لبورسعيد ومجموعة فى السويس .. لكن المجموعة الثالثة الرئيسية فى الإسماعيلية .. وركبنا عربية من العربيات طلعنا بها .. العربية الأولى كانت فيها المهندس محمود يونس وأنا ومحمد رياض اللي هو كان محافظ القناة .. ووراءنا العربيات الثانية .. وصلنا مدينة الإسماعيلية المبنى بتاع هيئة قناة السويس .. وكان بيقول « الآن إخوان لكم يقومون بتأميم قناة السويس » .. فى هذه اللحظة .. كنا إحنا أمام الباب .. درجة إن الناس فى البيوت المحيطة بمبنى هيئة القناة فتحوا الشبابيك .. علشان يشوفوا الناس دول .. والإسماعيلية زى ما أنت عارف الساعة العاشرة ليلاً ما فيش حس .. فجأة لقوا عربيات .. وساعة لما دخلنا أنا كان معى واحد اسمه سلطان ده كان الوحيد منا الللى دخل قناة السويس قبل كده .. إحنا كنا مجموعة عبارة عن ٢٤ واحد الللى قمنا بعملية التأميم .. شاور لنا قال هنا مكتب بتاع رئيس الهيئة اتجه إليه محمود يونس والقلم معاه .. وقال تعالوا مكتب حركة العمل .. هو بيدبر مكتب الحركة فى القتال أخذنى أنا وهو ومعنا المهندس عزت عادل والمهندس مشهور ورحنا إلى المكتب .

• **المهندس عبد الحميد أبو بكر : من كان رئيس هيئة قناة السويس وقتها ؟**

• « مش متذكر اسمه كان فرنساوى .. وكان كل المديرين الأربعة فرنسيين .

• **وهل كنتم مسلحين ؟**

• « اللى كان مسلحاً محمود يونس وأنا وعادل بس .. أنا بأعتبر من أسباب نجاح عملية التأميم بالذات أن الرئيس اختار الشخص المناسب .. محمود يونس .. كان أستاذ الإدارة فى كلية أركان

حرب .. لما الرئيس كان موجوداً فيها أعطى محمود يونس سلطات رئيس الجمهورية فى منطقة القتال .. خلاه يختار معاونيه ولم يفرض علينا شخصاً فى قناة السويس » .

• كان لهذا العمل الجرىء ردود أفعال واسعة فلم يكن التأمين مجرد عمل اقتصادى .. بل كان عملاً وطنياً بالدرجة الأولى .. لما كانت تمثله القناة فى ضمير المصريين كرمز لعهد الاستعمار .. وفرح الشعب المصرى .. وامتدت الفرحة إلى سائر الشعب العربى ...

• وغضب الغرب وأعلنها صراحة فى كلمات قادته .. ومانشطات صحفه .. وكان إيدن رئيساً لوزراء بريطانيا .. وجى موليه رئيساً لوزراء فرنسا .. وانضم إليهم منزيى رئيس وزراء أستراليا الذى زار القاهرة بمشروع لتدويل القناة ...

• ويقول سامى شرف : « سكرتارية الرئيس للمعلومات فى أرشيفها جميع التسجيلات للقاءات واجتماعات الرئيس جمال عبد الناصر .. وبدأنا هذه العملية من سنة ٥٦ على وجه التحديد منذ بدء زيارة منزيى . لما جاء منزيى يعطى إنذاره بتأجيل لجنة المنفعين .. من يومها الرئيس أعطى هذه الأوامر » .

• وزاد من الفرحة القومية .. الموقف الصلب الذى التزم به عبد الناصر فى مواجهة المحاولات الغربية لدفعه إلى الرجوع عن موقفه .. وكان أشهرها مؤتمر هيئة المنفعين بالقناة فى لندن ...

• وقرر الغرب سحب المرشدين الأجانب يوم ١٤ سبتمبر بعد تجميد أموالنا فى باريس ولندن ...

• ويقول عبد الحميد أبو بكر : « بدأنا نشعر أن المرشدين اللئى كانوا فى الإجازات بره .. لم يحضروا .. وبدأوا تدريجياً ينسحبوا .. وإحنا شعرنا إن هم ناويين ينسحبوا .. فحطينا من أول دقيقة خطة : كل واحد إنجليزى أو فرنساوى أو أجنبى .. كنا نضع معاه واحداً مصرياً خصوصاً المديرين الكبار .. كل مدير معاه واحد من المجموعة بتاعتنا ملازمه .. وبدأ كل واحد يعرف العملية .. وكان باين عليهم قوى .. وجاء يوم ١٤ ، ١٥ سبتمبر وقرروا ينسحبوا إحنا كنا مستعدين لهذه العملية » .

• وصدر أمر عسكري بفرض الحراسة على المؤسسات والأموال البريطانية والفرنسية .. ثم صدرت فى يناير ١٩٥٧ قوانين تمصير المؤسسات الاقتصادية وتحريرها من السيطرة الأجنبية ...

• ويقول د . عبد العزيز حجازى : « المرحلة الأولى اللئى هى من ٥٢ إلى ٥٩ هى مرحلة تمصير فعلاً .. وهنا يمكن أن نركز على مجموعة عناصر أساسية فى الواقع .. أولاً محاولة أن يملك المصريون إرادتهم .. ٥٦ تعتبر نقطة ترتب عليها تأمين قناة السويس .. نقطة فى هذه السبع سنوات بما حدث فيها من حرب ثم تأمين بعض البنوك والتجارة الخارجية بوجه خاص .. لرفع السيطرة الأجنبية عن الجهاز المصرفى والتجارة .. وهم عنصران أساسيان فى المرحلة

الأولى .. وأيضاً ظهور هيئة التحرير .. كجهاز سياسى .. يلعب دوراً فى الفترة الأولى فعلاً .. وكان الرئيس عبد الناصر يقود فكرة الاستقلال الوطنى ثم تحرير الشعوب .. ثم التفكير فى أن يدار الاقتصاد لصالح المواطنين » .

• وحضر عبد الناصر مؤتمر بريونى بدعوة من صديقه الرئيس اليوغوسلافى المارشال تيتو تأكيداً لسياسة الحياد الإيجابى .. وجاءت قراراته امتداداً لقرارات مؤتمر باندونج ...

• وأسأل محمد نسيم : اشتركت فى حرب ٥٦ وكنت ملازماً أول .. وقبلها على طول .. حدثت وفاة أخيك فى حادث طائرة .. تحكى لنا تفاصيله ؟

• « فى ٢٨ أكتوبر كان المشير عبد الحكيم عامر فى سوريا .. هو ومجموعة من القيادة .. وكان أخويا فى الوقت ده .. ضابط شرطة فى الحرس الموجود مع المشير .. أو مع الرئيس عبد الناصر .. فكان المشير فى مأمورية هناك .. وابتدت العملية تيان بالنسبة للخطة الإسرائيلية البريطانية الفرنسية .. واتضح إنه كان فيه تركيز كبير على اصطياذ القوة المصرية .. وبعد ما اتضحت الأمور دى .. صدرت تعليمات عاجلة أن لازم المجموعة ترجع تانى إلى مصر .. أو تعبر القناة وتيجى داخل البلاد .. أنا فى الوقت ده ماكنتش أعرف حاجة عن موضوع أخويا إلا لما رجعت إلى القاهرة وبعدين عرفت طبعاً اللي حصل » .

• وكم شهيداً كان فى الطائرة ؟

• « لأ كان فيه عدد .. وده كان عددأ غير بسيط ومنهم ٢ أو ٣ كانوا بيستعدوا ليصبحوا أبطالاً عالميين .. مثلاً أخويا اللي كان فى الـ Water polo (كرة الماء) والسباحة » .

• كان اسمه إيه يا فندم ؟

• « أحمد فؤاد نسيم .. يوسف عباس مثلاً كان فى فريق الباسكيت فى غزة .. يعنى كان فيه مجموعة » .

• فى مساء يوم الإثنين ٢٩ أكتوبر بدأ العدوان الإسرائيلى على مصر .. وهوجمت الكونتيل .. ثم هوجمت أبو عجيل .. ودارت المعارك فى رفح وشم الشيخ ..

• ولم يكد يبدأ الهجوم الإسرائيلى حتى وجهت بريطانيا وفرنسا إلى مصر إنذاراً بوقف إطلاق النار وسحب القوات إلى مسافة ١٢ كيلو متراً من قناة السويس ..

• ورفض عبد الناصر الإنذار .. وبناء عليه بدأ هجوم الدولتين الكبيرتين ..

• وأسأل د . ثروت عكاشة : حضرتك أيامها كنت ملحقا عسكريا فى الخارج .. وحصلت على خطة الهجوم على مصر .. وأبلغت بها القيادة المصرية .. ماذا تقول لنا عن هذه الواقعة ؟

• « هذا موضوع طويل أنا ذكرته بالتفصيل فى مذكراتى .. ولكن إليك نبذة .. فى مطلع عام ٥٦ أحسست وأنا فى موقعى بباريس ملحقا عسكرياً إن الحكومة الفرنسية قد تلجأ إلى خطوات غير

ودية تجاه مصر .. بالإضافة إلى اشتداد أوار الحملة الصحفية الموجهة ضد مصر وضد الزعيم جمال عبد الناصر وقتذاك .. فقد نجح العسكريون الفرنسيون المستعمرين في الجزائر .. واليمن المتطرف .. والصهاينة .. في إشغال النفوس ضد مصر وسياسة مصر .. وللأسف انضمت إليهم أخيرا وزارة الخارجية بعد أن قاومت هذا الاتجاه المضاد لمصر فترة طويلة .. وذلك بعد أن فقدت الأمل في إقناع الحكومة المصرية .. بالتخلي عن مساعدة أو تقديم العون المادى والمعنوى للجزائر في ذلك الوقت .. وفى ٢٦ يوليو على وجه التحديد أعلن الرئيس عبد الناصر قراره الشهير بتأميم قناة السويس .. فقامت الدنيا ولم تقعد .. وكان طبيعيا فى ذلك الوقت أن ينصب كل اهتمامى على رصد كل تحركات القوات المسلحة البرية والجوية والبحرية والتحركات العسكرية بهذه القوات ومراكز احتشادها .. وفى نفس الوقت المضى فى عملى أو مهمتى الأساسية وهى تتبع النشاط الإسرائيلى فى فرنسا .. وعلمت فى ذلك الوقت من بعض مصادرى أن هناك اجتماعات مريبة تجرى بين مسئولين فرنسيين وإسرائيليين فى باريس .. يشتم منها خطة موجهة ضد مصر .. وسرعان ما ربط بين هذه الاجتماعات وبين ما أعلن عنه فى الصحف والإذاعة والتليفزيون من اجتماع « جى موليه » رئيس الوزراء بالسفير الإسرائيلى اجتماعا مطولا .. وفى نفس الوقت حدث فى يوم ٢٧ أكتوبر أن وفقتى الله فى الحصول على خطة العدوان .. وعلمت أن الأوامر قد صدرت بالفعل بالتنفيذ على أن ينتهى منها فى موعد أقصاه ٤ نوفمبر حتى يكون هذا التاريخ قبل الانتخابات الرئاسية فى أمريكا .. وبطبيعة الحال كان لا بد من إرسال هذه الخطة إلى مصر .. فعمدت إلى الأستاذ عبد الرحمن صادق الملحق الصحفى بسفارة مصر فى باريس لما كنت أتوسم فيه من وطنية وحسن التصرف وسعة الحيلة .. أن يحمل هذه الرسالة إلى الرئيس جمال عبد الناصر شخصيا .. وقام بدوره والتقى بالرئيس عبد الناصر فى مكتبته ظهر يوم ٢٧ ليبلغه بهذه الرسالة .

- ويضيف خالد محبى الدين : « حرب ٥٦ .. كان فيها تقديرات مختلفة .. فيه حرب أو مافيش حرب .. فيه رأى كان يرى أن الإنجليز إذا عملوا مغامرة الحرب يخسروا كثيرا لأن قناة السويس حثثقل .. وفيه رأى آخر يقول مهما كان لازم جيعملوا خطوة .. وإلا حيشجع آخرون ويعملوا إجراءات ضد إنجلترا .. فطبعا بان على طول إن إنجلترا بتعتمد وحصلت الحرب . »
- وكانت مصر قد قطعت علاقاتها بكل من فرنسا وإنجلترا .. واعتدت الطائرات البريطانية والفرنسية على القاهرة ...
- ويقول توفيق عبيد إسماعيل : « نشيد مصر الأولانى اتغير سنة ٥٦ واخترنا « والله زمان يا سلاحي » بتاع السيدة أم كلثوم .. ده النشيد اللى استمر معانا فترة طويلة . »
- كما أغارت الطائرات على مدن القناة والإسكندرية .. وأغارت على محطة الإذاعة فى « أبو زعبل » .. وبلغ عدد الغارات الجوية على بورسعيد الباسلة نحو ١٠٠٠ غارة .. واستبسلت بورسعيد فى الدفاع وصدد العدوان .. واضطر عدد كبير من سكانها إلى هجرتها ...

• وبدأ نشاط الفدائيين على طول القناة ...

• ويقول كمال الدين حسين : « عبد الناصر نادى على .. وكان بغدادى بايت يومها معنا .. وقال لى أنا عاوزك تروح تشوف إيه اللي بيحصل فى القناة .. وتمسك المنطقة بتاعة القناة علشان الجيش المصرى ناوى ينسحب غرب النيل .. بالتالى أنا ومجموعة من الضباط بتوعى اللي كانوا معى فى ثورة ٢٣ يوليو .. رحنا من غير ما أسأل رتبة أو مش رتبة وده كان غلط منى أنا .. علشان أنا لما أروح ألاقى قوات جيش هناك أتعامل معهم إزاي ؟ أنا رحت « بأوفرو » .. بس كان من غير رتب .. المهم كان فيه طائرات جوية عاملة تأثيراً مش تمام .. رحت بقيت أمشى فى الخنادق أمام الناس كأن ما فيش أى حاجة .. المهم نظمنا المقاومة الشعبية هناك .. وبعدين رجعت مركز القيادة فى الاسماعيلية .. علشان هى وسط بين بورسعيد والسويس .. وكان فيه احتمال إنهم يأتواهم السويس .. المهم .. فى يوم من الأيام وجدت جمال عبد الناصر هو وبغدادى .. إنتم جايين تعملوا إيه هنا ؟ قالوا إحنا جايين علشان نشوف بورسعيد .. نشوف القوات .. وإذا كانت سوف تقوم حرب نموت مع قواتنا هنا .. وبعدين قالوا لى عاوزين نروح بورسعيد .. كانوا جايين متأخرين قبل الفجر بحاجة بسيطة .. قلت لهم الفجر سوف يؤذن الآن والنهار يشفق والطريق من هنا إلى بورسعيد حقيقى مضروب .. أرجو أن تباتوا معى الليلة دى وتقضى طول النهار هنا .. وتشوفوا البلد شكلها إيه .. وبقى نروح الليلة الجاية بورسعيد فى الفجر .. كانوا الإنجليز والفرنسيين يبنزلوا .. دول فى بورسعيد ودول فى بورفؤاد وبدأ الضرب .. بلغنهم البلاغات اللي كانت تأتى إلّى من بورسعيد .. ولما صبح الصبح انتفضل أنت يا ناصر على مكانك فى مصر وقلت إطمئن هنا .. إحنا نقاتل لآخر قطرة وآخر رجل وكلها موتة .. هو شاف المواقع بتاعة العساكر وحولهم المدنيين ومعاهم السلاح .. والطرق والعربات المكسرة والديابات المكسرة وحالات من الهرج والمرج .. هو رجع .. ورجع مطمئن يعنى إنها مش تحتحصل كده زى السكينة فى الزبدة .. وهو برضه كان ناوى يناكف فى هيئة الأمم .. رجع مصر وبعدين خطب فى الأزهر .. وبعدين حصل إن الناس كانوا بيقولوا له سلم .. ده حتى قبل الإنذار .. لما سليمان حافظ بعث لعبد الحكيم عامر وقال لهم : أنا عاوز أقابل جمال عبد الناصر .. وجمال عبد الناصر لم يرضى وقال روحوا شوفوه عاوز إيه ؟ وهو قال إن إحنا نسلم .. نروح الكتيبة ٦ ويسلم لمحمد نجيب ويتفق معهم محمد نجيب ونخلص من العملية دى .. »

• ويقول محمد فائق : « دخلت بورسعيد على أنتنى صباد .. وكنا دخلنا كمجموعات كثيرة .. فكان فى بعض الوحدات من الحرس الوطنى .. وبعض العمليات الفدائية حتى من الأحزاب القديمة المختلفة .. الحقيقة كل مصر كان لها امتداد داخل بورسعيد .. وأنا كنت رحت مع الأخ محمد عبد الفتاح أبو الفضل للواء سمير غانم لعملية التنسيق بين كل الأجهزة .. والحقيقة كان شيئاً رائعاً إن شعب بورسعيد والمقاومة وفيه تعاون وتفانى الناس هناك .. كان الهم كله يوم الإنجليز ما نزلوا بورسعيد .. وبمجرد ما الواحد دخل جوه أصبحت العملية كلها عملية مقاومة .. كنا ننام كل يوم فى بيت وننقل الأسلحة والأجهزة اللاسلكية .. لغاية ما وأنا خارج

مسكنى الإنجليز .. وكنت لايس ملايس صياد والدنيا كانت برد .. فكننت لايس بالطو .. وبلوفر كشمير تحت لبس الصياد .. وساعة معقدة شوية فقالوا لى إنت مش صياد .. لكن الحقيقة أنا كنت مرتباً قصة إن أنا مدرس وداخل أوصل فلوس لأبويا جوه بورسعيد .. مسكونى يوم وأخيراً سابونى فى مركب من المراكب اللى بتروح المطرية من حتة اسمها « بوز القرد » .. القصص دى كلها بقت للتاريخ .. إنما المهم إننا اشتركنا فى العمل الفدائى مع الكثير جداً من السياسيين والتيارات المختلفة .. كانت مصر الحقيقة بتقاوم .. وكل واحد كان عاوز سلاحاً أخذ سلاحاً ..

• وكسبت مصر تعاطف الدول العربية التى اشتعلت سورة غضبها تضامناً مع مصر بناء على إذاعة صوت العرب .. ودمرت أنابيب البترول فى كل من السعودية والأردن والعراق وسوريا .. وقامت المظاهرات فى الكويت والبحرين .. ورفض الملك السنوسى فى ليبيا استعمال مطاراته كقاعدة للهجوم على مصر ...

• ويقول أحمد سعيد : « كان فيه فكرة عندنا إننا نوقف الإرسال ساعة ما بيتدى الإنذار أن فيه طائرات جاية .. الرئيس جمال رفض وقال يستمر الإرسال .. ننضرب ننضرب .. دى معركة .. قائد الطائرة كان من الغباء زى ما قلت لك بحيث إنه ضبط قنابله والقنابل زمان ما كانتش صواريخ زى دلوقتى .. ضبط قنابله وموقع طائرات السرب بتاعة اللى حيهدف القنابل كلها .. على المكان الذى فيه الإريالات « أنتينات » .. مش على المحطة اللى فيها الأجهزة الغالية .. يعنى زى ما نقول ضبطها على حديد .. وعلى الإريال الأخرانى الذى بيث الذنبيات .. فكانت النتيجة أن الآريال اتكسرت والبنابات كلها سليمة .. لذلك استطعنا فى خلال ٤٨ ساعة أن يعود إرسالنا مرة أخرى .. من المقطم .. وقبل المقطم .. من جهاز كان خاص بالثورة الجزائرية موجود فى مبنى المخابرات القديم الذى كان وراء مبنى مجلس الثورة الحالى » .

• وعاد صوت العرب أو صوتك بمعنى أدق ليدوى ؟

• « لحسن الحظ أن قبل العدوان كان لنا سبعة مذيعين من مصر واستعنا بالبرنامج العام ومذيعيه .. لأن ما كنش عندنا .. كنا بندربهم فى الوطن العربى .. كان فيه إضراب عام فى المنطقة العربية قبلها بيوم احتجاجاً على منع الولايات المتحدة تفريغ السفينة كليوباترا فى ميناء نيويورك .. كمقاطعة لمصر .. قبل العدوان .. فالمذيعون كانوا موجودين .. فوجئوا بأن جميع الإذاعات العربية بتكلمهم وبتسلمهم الميكروفون .. والإستوديوهات بتقول لهم اعلنوا إنكم صوت العرب بالقاهرة .. فكان يومها إحنا اتضربنا لمدة ساعتين وما كنش فيه إرسال بتاعنا .. بس طلع صوت العرب من لبنان .. صوت العرب من دمشق .. صوت العرب من عمان .. صوت العرب حتى من تونس .. من جميع البلاد العربية اللى طلعوا فيها مذيعين .. مفاجأة بدل ما تكون صوت العرب من القاهرة بس .. بقيت المنطقة العربية كلها صوت عرب والحمد لله » .

• واستقال همرشولد سكرتير عام الأمم المتحدة احتجاجاً على الموقف .. وبدأت تصريحات استفزازية لبن جوريون فى إسرائيل ...

• وصنعت إنجلترا وفرنسا أكبر أزمة سياسية عرفها تاريخ الحرب الباردة بين الكتلتين

الشرقية والغربية مما وضع العالم كله على حافة حرب عالمية ثالثة .. ووجهت روسيا بقيادة خروشوف ويولجانين وزير الخارجية إنذاراً بعد قرار الأمم المتحدة الذي جاء بالأغلبية لوقف إطلاق النار واتسحاب المعتدين .. وتدخلت أمريكا لإجبارهم على الاتسحاب ..

• وكانت هناك بداية خلاف بين القائد العام اللواء عبد الحكيم عامر والرئيس عبد الناصر بسبب الحرب ووضع الطيران ...

• ويقول كمال الدين حسين : « حصل شوية خلاف بين جمال عبد الناصر وعبد الحكيم عامر .. عبد الناصر لم يكن متبعاً الموقف كويس ويمكن عبد الحكيم عامر لم يكن يبلغه أولاً بأول بالذي يحدث » .

• وتولى عامر تنفيذ خطة انسحاب الجيش المصري من سيناء .. وكانت النتيجة أن سلم الإنجليز لليهود رفح والعريش وشرم الشيخ .. وتلكأت إسرائيل في الانسحاب إلى سنة ٥٧ ...

• ويقول شمس بدران : « والانقلاب اللي حصل بعد كده مع المشير إن عبد الحكيم عامر .. لما ابتدت الطائرات تضرب .. قال عبد الحكيم عامر لعبد الناصر عاوزين نقعد نبحت الموقف .. ولا نسيبهم يضربونا ويكسروا محطات الكهرباء ويضربوا محطات المية ويخربوا البلد .. مش نقعد نتكلم .. فاعتبر عبد الناصر .. ده من دعاة الهزيمة .. وكما قال لكمال رفعت : ده أنا جالي اثنان هنا مستعدين يروحوا يقتلوه .. أنا استغريت جداً إنه يقول لى هذا الكلام .. هو كان بيعتيرنى كاتم أسراراه .. طبعاً ما قلنش أنا الكلام ده لعبد الحكيم عامر ومش ممكن أقول له الكلام اللي اتقال » .

• ويقول الفريق محمد فوزى : « الكلام ده كان ظاهراً لى .. كان فيه صراع موجود خفى .. وأنا أقول خفى ليه .. لأنى أنا شايغه ولكن لا الرئيس عبد الناصر ولا المشير عبد الحكيم عامر لهما مصلحة إنى واحد إن هو يذيعه أو ينشره .. المسألة كانت على الضيق بعد العدوان الثلاثى مباشرة .. واستمرت كل هذه السنوات .. والله .. البارز فيها العدوان الثلاثى وكان عاوز يشيل ٢ قادة من الكبار .. المشير لم يوافق » .

• وأسأل عبد اللطيف بغدادى : حضرتك كنت معترضاً أيامها على عبد الحكيم عامر - الله يرحمه - ودارت الأيام والرئيس عبد الناصر قال لك بعدها عن الخلاف ؟

• عبد الناصر فيما بعد قال لى .. كنت على صواب .. لأننا جينا ٥٦ قلنا عبد الحكيم يسبب الجيش .. ماحصلش .. ولقيناه رفض إنه يشيل صدقى من الطيران » .

• وأسأل سامى شرف : ما هو القرار الذى اتخذته الرئيس وبعد كده ندم على إنه اتخذ ؟

• هو لم يندم لكن زعل أو تمنى لو كان أصر عليه .. قرار تعديل شكل القيادة العسكرية بعد

٥٦ .. كان من رأى الرئيس جمال إن القيادة العسكرية أو المؤسسة العسكرية كان لازم تبقى محترفة » .

• **ويقول حسين الشافعى :** « حرب ٥٦ بقى كان فيها أخطاء عسكرية .. فكان لازم يبقى فيه محاسبة عليها .. ولكن للأسف النجاح السياسى اللى ترتب على إن العملية دى اتعملت من تحت ذقن الدول الكبرى .. اللى فى يدها الحل والربط .. طبعا لم يكن لها مصلحة إن الاستعمار القديم الممثل فى إنجلترا وفرنسا يرجع ثانية لهذه المناطق فكل من أمريكا وروسيا تخلا عن العملية بعد ما حسوا إن فيه مقاومة فى مصر » .

• **ويقول جمال عامر :** « واحد كاتب على العدوان الثلاثى يقول لك مصر هُزمت فى العدوان الثلاثى .. طيب إنت عاوز إيه يعنى ؟ دى مصر بتحاربها فرنسا وإنجلترا وإسرائيل .. ده لو جابوا مونتجرى مش حيعرف يهزمهم لوحده .. ما هو شىء بالعقل .. وعاملين يخلوا ويقولوا كلاماً غير منطقى .. بلد طالعة من احتلال من فترة قصيرة .. فوجئت بعدوان عليها .. وظروفها كانت صعبة جداً .. إزاي النهارده تيجى تقول هزيمة ٥٦ هزيمة عسكرية ؟ أقول لك دى حاجات غير مفهومة » .

• **ودخلت القوات الدولية مصر لأول مرة فى نوفمبر ...**

• **ويقول د . يونان لبيب رزق :** « وبلغت خسائرنا من الأرواح أثناء الكفاح فى سيناء وبورسعيد ٢١٠٠ من العسكريين ونحو هذا العدد من المدنيين .. واستشهد فى بورسعيد وحدها ألفان من المواطنين » .

• **ويقول شمس بدران :** « صلاح سالم .. قال لعبد الناصر .. الإنجليز دلوقت عاوزين رأسك أنت .. روح سلم نفسك وخلص البلد » .

• **ولكن فى النهاية انتصرت الإرادة المصرية .. وجاء فشل العدوان الثلاثى ليصنع زعامة عبد الناصر ويدعم مكانته كأحد كبار زعماء العالم الثالث .. ويتلأأ نجم عبد الناصر فى سماء كل العالم العربى ...**

• **ويقول محسن عبد الخالق :** « بعد ٥٦ بقى بطل قومى .. وقلت لجمال عبد الناصر فى وقتها لقد حققنا كل شىء : إصلاح زراعى .. تحديد ملكية .. العدالة الاجتماعية .. رأس المال الأجنبى مشى .. وتحرر الاقتصاد المصرى وتحقق الاستقلال .. دلوقتى تحقق الديمقراطية .. فقال لأمش دلوقت .. لسه شوية » .

• **ويقول د . عبد العظيم رمضان :** « كان عبد الناصر يعمل وهو جالساً على « حجر » أمريكا .. ويقوم بضرب الاستعمار القديم بالاستعمار الجديد .. وكان يجيد ذلك بمهارة .. ولذلك كانت أمريكا تؤيده » .

• **وانسحب المعتدون .. وأعلن إيدن استقالته فى أوائل سنة ٥٧ لفشله .. وأعلن عبد الناصر إنهاء شروط اتفاقية الجلاء .. وعادت الملاحة فى قناة السويس ...**

• **ويقول د . مصطفى خليل :** « حرب ٥٦ طبعاً كلنا عارفين انتهت إلى إيه .. ولابد أنى أكون فى منتهى الصراحة إن حرب ٥٦ انتهت بموافقة مصر على مرور البضائع الإسرائيلية فى غير السفن الإسرائيلية .. وفى نفس الوقت فتح خليج العقبة .. ووصلت قوات الأمم المتحدة بس مش على الحدود بين مصر وإسرائيل .. وإنما وضعت بين تقريبا طابا النهارده وجنوباً لغاية شرم الشيخ الللى هو الضفة الغربية لميناء .. التى هى ليست حد ما بينى وبين إسرائيل .. ولكن مصر قبلت فى ٥٦ هذا الوضع » .

• **ويقول عبد اللطيف بغدادى :** « حرب ٥٦ كانت نقطة تحول بالنسبة لشخصية عبد الناصر .. ثلاث دول تهاجمنا منهم دولتان عظيمتان إنجلترا وفرنسا .. وبعدين لم تستسلم إرادتنا لهذا الاعتداء .. وصمدنا وقاومنا وحققنا الهدف بتاعنا .. وكان نصرأ سياسياً كبيراً جداً .. ولأنه مش معقول كنا سننتصر عسكرياً .. فهذه أعطت لجمال عبد الناصر مكانة عربية ودولية » .

• **ويقول مصطفى أمين :** « كان موقف جمال عبد الناصر كويس جداً .. لأنه رفض هذا العدوان وقاومه .. واستطاع أن يصمد أمام هذا العدوان » .

• **ويقول نجيب محفوظ :** « الحقيقة .. الغلطة كانت خارجية .. واللى نجانا الخارج برضه .. رد على نفسه » .

• **وفى يناير سنة ٥٧ كشرت أمريكا عن أنيابها .. وأرادت بالضغط ضم العرب إلى حلف بغداد .. وجمدت أموال مصر ورفضت تزويدنا بالأغذية والأدوية .. وصرحت أن « هناك بعد انسحاب فرنسا وإنجلترا فراغاً فى المنطقة نرى ضرورة ملته » .. وأعلن أيزنهاور مبدأه هذا .. ورفضه عبد الناصر ...**

• **وبدأ بناء السد العالى بأموال وسواعد المصريين .. وبلغت تكاليف هذا المشروع الضخم حوالى ٤٠٠ مليون جنيهأ مصرياً .. الخمس للمعدات والأجهزة المستوردة .. وقد استوردناها من روسيا .. والباقى لتكاليف المشروع محلياً .. وكان المهندس عثمان أحمد عثمان والمقاولون العرب وراء هذا الإنجاز الكبير ...**

• **ويقول المهندس عثمان أحمد عثمان :** « كان السد العالى من العمليات الضخمة .. استغرق العمل فيه عشر سنوات كاملة .. كان أكبر عملية فى مصر والعالم كله فى ذلك الوقت .. وكان اهتمامى الكبير بالسد واحداً من أسباب تصفية معظم أعمالى فى السعودية والكويت .. لأستفيد بجهود كل العاملين من عمال ومهندسين لبنى لبنة ذلك الصرح الكبير .. وكان الفضل كله إلى الفريق المتألف الذى تضمه « المقاولون العرب » .. وكان السد العالى مدرسة كبيرة بالنسبة للمقاولون العرب .. وأعطى لمصر الكثير .. ويكفى أن أقول أنه لولا المياه التى يوفرها السد العالى ما كان يمكن أن تفكر فى مشروعات غزو الصحراء التى نعلق عليها أمل مصر كلها الآن » .

• **وهكذا انتصرت الإرادة المصرية .. وانتصر جمال عبد الناصر ...**

تحيا القومية العربية

- كانت هزيمة العرب في حرب فلسطين سبباً في انقسام الحكومات وفقدان الشعب المصري إيمانه بالعروبة .. وجاءت ثورة يوليو ولم يكن في مخططها في البداية فكرة القومية العربية ...
- ويقول جمال حماد : « كان موقف الثورة من القضية الفلسطينية موقفاً معتدلاً في بادئ الأمر .. لاقتناع الثورة بصعوبة حل مشكلة فلسطين طالما أن مصر مازالت مستعمرة » .
- ويقول أحمد حمروش : « كان برنامج « هيئة التحرير » بلا كلمة واحدة عن « القومية العربية » أو الاشتراكية » .
- ويقول د .عبد العظيم رمضان : « لم تظهر فكرة القومية العربية قبل الثلاثينات .. وكان ذلك نتيجة لسقوط فكرة الجامعة الإسلامية .. وبعد نجاح القومية المصرية في ثورة ١٩١٩ وتحقيقها لبعض المنجزات .. وكانت القضية الفلسطينية عامل جذب للقومية العربية ضد الخطر الصهيوني .. وتحققت فكرة الوحدة في الحرب العالمية الثانية في شكل تجمع حكومات وليس تجمع شعوب .. ثم ظهر فشلها بعد هزيمة حرب فلسطين سنة ٤٨ » .
- ويقول صلاح الدسوقي : « زكريا عمل « وزارة الداخلية » .. وعينى أركان حرب لها .. وكان منصّباً جديداً .. وأنا افكر وأنا سكرتير الحكومة المركزية .. فوجئت - وده كلام يمكن ماحدش كثير يعرفه - وأنا مع الرئيس بالليل يوم كنت أمر عليه على العشاء ونتكلم .. قال لى سؤالاً غريباً جداً .. قال لى إيه رأيك إن إحنا نتفاهم مع إسرائيل ؟ .. ونبدأ نتجه للبلد وننطل « الهوسة » اللي إحنا فيها دى ؟ .. دى ماحدش كثير يعرفها .. وجمال عبد الناصر نفسه قالها وأنا فوجئت مفاجأة غريبة جداً .. قلت له والله باريس .. الحقيقة دى مفاجأة كبيرة .. وده خط سياسى جديد أتصور إن سيادتك إن حبيت أن تأخذه .. لابد إن جميع أجهزة الإعلام فى مصر تأخذ الاتجاه ده من ٣ إلى ٥ سنوات .. ويبقى واضح أمامها إن إنهاء الصراع فى الشرق الأوسط يقابله ارتفاع مستوى المعيشة فى مصر وإلا سيقى انتحاراً سياسياً .. قال لى يعنى إيه ؟ قلت له يعنى إن جميع أجهزة الإعلام فى مصر وخارج مصر والوطن العربى بتقول وتعيد إن إنت

عندك القوة الضاربة التي سوف تظهر الأراضي العربية من إسرائيل .. وانتقل إلى موضوع ثاني .. بس أنا قلت .. فسألت صديق عزيز على .. عم مراتي الدكتور نور الدين طراف .. كنت اثق فيه جدا وأثق في تقديره السياسي .. قلت له أنا إمبراح فوجئت بسؤال غريب جدا وكذا .. فضحك وقال لي أنا عارف .. والمارشال تيتو .. كان جمال عبد الناصر وقتها مقتنعا جدا بتيتو .. قال مهما اتكلما عن عدم الانحياز .. إن لم يكن الشعب يحس نتيجة هذه السياسة وارتفاع مستوى المعيشة .. في الآخر الشعب مش حيصدق كلمة نقولها له .. وقد يقوم علينا وننتهي .. ويشوف قيادة أخرى غيرنا .. قال لي ده كان تأثير المارشال تيتو على عبد الناصر .. لكن بعدها لم يقل شيئا » .

● ولكن الاعتداء الإسرائيلي المتكرر على غزة ابتداء من فبراير سنة ١٩٥٥ أجبر الثورة على اتخاذ موقف إيجابي من الوجود الإسرائيلي .. وحرك بالتالي الشعور الكامن في ضمير الشعب ...

● ويقول كمال الدين حسين : « في أوائل الثورة .. إحنا نحاول ألا نكون أعداء لأحد .. وبعدين طلبنا من أمريكا ومن الغرب إنها تعطينا سلاح .. ولكن لم يرضوا أن يعطونا أى سلاح .. بن جوربون راح له واحد إنجليزى كبير فى تل أبيب .. وكان هنا فى مصر قبل كده .. فيقول له إيه أحوال مصر ؟ وإيه رأيك فى جمال عبد الناصر ونوابه بالنسبة لليهود وبالنسبة لإسرائيل ؟ قال هو لم يأتى بسيرة إسرائيل .. وهو مهتم اهتماماً مطلقاً بالتنمية بتاعة بلده .. قال ده أسوأ خبر سمعته فى حياتي .. بن جوربون يقول إن هذا أسوأ خبر سمعه فى حياته .. ليه لإنه عارف التنمية فى مصر ورفاهية مصر .. دى ضده .. على الأقل مش حقدور ينال اللي هو عاوزه .. بدأ يعمل حركات تحدى .. عملية الصابحة .. عملية غزة .. وقتل فيها مصريون كثيرون .. وبعدين بعثوا قوة كبيرة تهاجمهم وتقضى عليهم وتمشى .. الغرض من ده إيه ؟ هدم ثورة ٢٣ يوليو .. إننا ندافع عن سيناء أو عن بلدنا .. اضطرنا أن نطلب سلاحاً من أمريكا .. وبعدين اضطرنا أن نأخذ السلاح من الكتلة الشرقية .. القيامة قامت ولم تقعد ثاني .. طيب نعمل إيه يا ناس ؟ ده كان الكلام ده فى مؤتمر باندونج » .

● ويقول د . ميلاد حنا : « أول من ابتكر وصياغ حزب البعث والقومية العربية .. كان المسيحيون بتوع سوريا .. وعندما جاء عبد الناصر .. رفع شعار القومية العربية .. دى حته تاريخية مهمة قوى » .

● ويقول د . عبد العظيم رمضان : « حزب البعث سمي كذلك على اعتبار إنه حزب لبعث فكرة القومية العربية .. وكان عدوان غزة قد أشعر الثوار بخطورة الوجود الصهيوني على مصر » .

● وفى نفس الوقت استغز حلف بغداد الثورة المصرية .. وكان قائماً فى ذلك الحين لخدمة المصالح الاستعمارية .. وكان مكوناً من العراق وتركيا « مع بريطانيا » .. ثم انضمت إليه كل من إيران وباكستان ...

● وقد أدى ذلك إلى صدام بين ثورة يوليو أو بين مصر .. وكل من إسرائيل والغرب .. وزاد التحدي باعترافنا بالصين الشعبية ...

* وأسأل عارف عبد الرزاق : حلف بغداد أعلن الرئيس عبد الناصر عداؤه له .. تفكرت فيه ؟

* « حلف بغداد كان حلفاً سياسياً يتكون من ٦ دول .. إيران والعراق وتركيا وباكستان .. وأمريكا وبريطانيا بصفة مراقب أولاً وبعدين دخلوا أعضاء .. الغرب في حلف بغداد أن تركيا عضو في « الناتو » وباكستان عضو بالـ « سيتو » .. فالتركيبة كانت قائمة على العراق وإيران .. فعبد الناصر طلع للمسرح السياسي طبعاً الهدف كان عرض على عبد الناصر قبل تشكيله في ٥٥ .. ورحب بالدخول لأن ما كان هناك هدف لمعاداة بدون ثمن .. فذه اللي أعتقدته بالنسبة لعبد الناصر »

* وأسأل أحمد سعيد : ماذا تقول عن حلف بغداد ؟

* « القوى الاستعمارية حاولت أن تفرض على المنطقة ما يسمى في ذلك الوقت حلف بغداد .. حلف بمقتضاه بتعطي شرعية للتواجد العسكري وللنفوذ الاقتصادي والسياسي بالتبعية .. في المنطقة العربية كلها . وكانت فكرة القوى الغربية في ذلك الوقت إن هذا سيكون جداراً أمام الامتداد الشيوعي .. كان في العراق نوري السعيد .. وبدأنا حملة ضد الحلف بعنف .. عنف شديد .. فهم حاولوا أن يدخلوا بعض البلاد العربية الأخرى وخاصة الأردن .. وحاولوا إنهم يفرضوا الحلف على الأردن .. فبدأنا نضع الحملة لغاية ما جينا يوم الخميس .. ورغبة في ربطها بالقاعدة النضالية في مصر .. كل العوامل هذه جعلتني أطلب من الشعب الأردني بعد صلاة الجمعة .. بكرة تطلع مظاهرات .. راديو الأردن ما نقلت صلاة الجمعة .. ففهمنا إن فيه حاجة مضطربة .. وربنا ستر الجماهير كانت عند حسن الظن وقامت بالواجب » .

● وتغير اسم وزارة الإرشاد القومي لتكون وزارة الإعلام ..

* ويقول د . عبد القادر حاتم : « أول ما جاءت الثورة قالت نعمل وزارة اسمها وزارة الإرشاد القومي .. وبعدين كلفتني أن أكون وزيراً لها حوالي سنة ٥٨ .. فأول شيء قلته لا يمكن يكون حاجة اسمها وزارة إرشاد قومي لأن الشعب لا يمكن أن أرشده .. لأن إحنا خدام الشعب .. فيجب أن أعلمه وليس أرشده .. والإعلان العالمي لحقوق الإنسان ببناي بأنه يجب على الشعب أن يكون لديه المعلومات الكافية .. فلذلك قلت نغير الاسم ونسميها « الإعلام » .. من الطريف بقي إن بعض الناس التي أرادت أن تؤيدني في هذا الرأي كانت تقول أه فعلاً ضروري نعمل وزارة « للإعلام » .. لأن « الإعلام » ده رمز كبير قوى للوطنية .. أقول له « الإعلام » يعني Information ياسيدي مش « الأعلام » اللي هي Flags !! » .

● واختلف عبد اللطيف بغدادى مع عبد الناصر .. واستقال ..

* وأسأل أول رئيس لمجلس الأمة ، عبد اللطيف بغدادى ، عن أول تجربة ديمقراطية تحت القبة ؟

• « لغاية ما حصل خلاف بيني وبين جمال عبد الناصر .. كان المجلس مرتبطاً بى شخصياً فى الحقيقة .. قعدت فى المجلس كذا شهر .. بس جاء يوليو وأجازة الصيف بعدها .. وبعدين بدأ فى نوفمبر واتحل فى فبراير .. لما حصلت الوحدة مع سوريا .. اتحل واتعمل مجلس اتحادى بعد كده ومسكه أنور السادات .. ولأنه جاء المجلس وأنا رئيسه يناقش مسألة مديريةية التحرير .. زى ما تقول كان فيه كلام كثير بين الناس عن مديريةية التحرير ومجدى حسنين .. كانت أول مشروع استصلاح أراضى فى أرض الصحراء .. ومصر لم تكن لها خبرة فى العملية دى قبل كده .. لما كنت أنا بحكم منصبى ماسك وزارة الشؤون البلدية والقروية .. عضواً فى مجلس إدارة مديريةية التحرير مع عبده الشرباصى وكمال حسين .. كنا ماسكينه جامد .. ولما فى المجلس اتكلموا عن مديريةية التحرير .. أنا قلت لهم بدل ما الكلام يبقى مثنى مبنى على أساس .. يستحسن تتعمل لجنة لتقصى الحقائق وتروح المديرية .. وعلى الطبيعة تشوف هناك وتيجى تقول لنا إيه الموقف » .

• وده زعل مين يافندم ؟

• « أنا جاي لك .. اتعملت لجنة .. بعدها بيومين جالى سيد جلال الله يرحمه .. سيد جلال كان نائب قديم من الناس الرأسمالية اللي بنوا أنفسهم .. فقال لى أنا سمعت إن مجدى عين ناس من لجنة تقصى الحقائق بتوع المجلس .. فى المديرية .. وأنا عاوز أقدم استجواب فى الموضوع ده .. قلت له حقك وأنا أساعدك فيه ولم أسأله عين مين وقلت له اكتب .. ثانى يوم نشر فى الأهرام أسماء اللي مجدى عينهم .. قرأتهم فى الجرنال زى أى واحد قلت ده انحراف .. ولا بد أن نعمل كمجلس كويس له وزنه وله سمعته .. لازم نضرب الانحراف من البداية علشان ما يتكررش .. ففكرت نعمل حاجة .. نسقط عضوية الأعضاء دول .. وكلمت جمال عبد الناصر لإننى لا أشتغل من ورائه .. وقلت له الموقف ونعمل كذا .. قال لى بس دى عايزة ترتبياً .. كلم الأعضاء يقوموا يتفقوا مع أعضاء المحافظة بتاعتهم .. وبعدين جالى جواب من لجنة الصناعة وكان فيه بعض اللي عُنُوا فى المديرية ومن ضمنهم مجدى ومحمود القاضي وكام واحد .. هم كانوا أربعة .. وانتشر فى الجرائد « إهانة أعضاء المجلس » .. وعابزين رئيس المجلس يتخذ موقفاً لحماية كرامتنا .. حاجة عابمة كده .. أنا قلت دى فرصة أقدم الاستجواب .. حياخذ دوره وندخله .. فقلت فى بداية الجلسة فيه رسالة جاية موجهة لوم لى .. وهاتوا فلان من لجنة الصناعة .. كرامة المجلس من كرامتنا .. ومطلوب منا أن نحافظ على كرامتنا قبل ما نطلب إننا نحافظ على كرامة المجلس .. والصحافة حرة لو أخطأت نحاسبها والقانون أمامها .. لكن أنا مش فاهم باعنتين الجواب ليه .. قولوا لنا إيه الحكاية .. يقوموا يتلخبطوا .. ضغطت من هنا وهنا .. افتتح الموضوع ومديرية التحرير والتعيين واللى حصل .. طب إزاي تقبلوا حاجة زى كده .. دى عملية ممنوعة قانوناً .. ابتدوا اللي يعنتر واللى يعيط .. أنا اعتبرت ده درساً كافياً .. وإن ماتتكررش العملية دى .. جمال عبد الناصر أخذ موقفاً .. كان موافقاً ويعت لى إبراهيم الطحاوى وطعيمة .. وأوامرك إيه ؟؟ وكلم على صبرى اللي جاب وجيه أباطة من الشرقية .. لقيت ده كله فى يوم .. أنا كلمته قلت له حصل كذا .. وبأكتفى بلومهم .. لأن

الأعضاء أنفسهم حصل لهم هلع .. وابتدوا يعتذروا ويعيطوا .. قال مر علي .. فمريت عليه لقيت عنده الأعضاء اللي هم كلهم عسكريين في المجلس .. الطحاوي وطعية .. وكان زكريا عنده وبعدين خرجنا ورحت على المجلس .. في المجلس جالي سيد جلال .. وكان داير في المجلس يقول الرئيس مايعرفش الموضوع ده وهو ضد ذبح الأعضاء .. بجيلي الأعضاء نعمل إيه ؟ وأقول لهم إنتم الشعب .. كل واحد يتصرف كما يملئ عليه واجبه وضميره .. يعني مش عاوزة توجيه مني .. وبعدين كلمت عبد الناصر في التليفون قلت له فيه أعضاء يقولوا كذا وكذا وبيضغطوا على اللجنة الدستورية .. كنا أحياناً الموضوع على اللجنة الدستورية على أن مديرية التحرير قطاع خاص .. وسألته هل أنت أعطيت تعليمات بكده .. قال هو أنا لم أقول لك ولا إيه ؟! .. قلت له لا أنا كنت عندك وشايف فلاناً موجوداً وفلاناً موجوداً وماقتلش .. ولما إنت لك رغبة في كده ماقتلش فيه ؟ شوف تفكر إزاي تصلح الموقف اذا كنت عاوزة بأسلوب ثاني .. بدل ما تخلي الأعضاء يقولوا علينا شغل عيال .. متشكرين .. وقلت السكة .. وهو طبعاً أنا فاعمه بقي .. المجلس بقي قوة وده المجلس اللي بيرشح رئيس الجمهورية ويمكن بعد كده يرفضه .. بحكم إن عقلية عبد الناصر .. بأقولك تآمرية .. ومتهاي لي إن ده تفكيره .. وبعدين لجنة تقصى الحقائق قدمت تقريراً بأن مديرية التحرير بتعتبر قطاعاً خاصاً والقانون يسمح بهذا .. قلت اللي موافق مين .. قامت الأغلبية رفعت إيدها فأنا قلت إجماع .. عندئذ أنا قلت المجلس ده لا يصلح وبعدين قدمت استقالتي .

* وسألت أحمد طعية : حصلت مشاكل بين بغدادى وبين الرئيس عبد الناصر .. تذكرها ؟

* « والله كان الموضوع كما فهمته من الليثى عبد الناصر .. آخر جمال .. إنه كان فعلاً الرئيس جمال اتكلم مع الأخ عبد اللطيف بغدادى فيما يختص بمديرية التحرير ومجدى حسنين .. وبعدين لما تقدم لاستجوابه .. وفهم إن الموضوع واخذ حدة شديدة داخل المجلس وإن أى تصرف كان حقيقى ضد مجدى وحقيقى يعنى زيادة عن المطلوب .. الرئيس كلمنى أنا والطحاوي .. وأنى بنا وقال لنا اتصرفوا دلوقت فيه مشكلة بغدادى والاستجواب .. إحنا ما نعرفش إن بغدادى عنده « جرين لايت » (مطلق الحرية) من عبد الناصر بإنه يتصرف فى هذا الموضوع مع مجدى حسنين الله يرحمه .

* إزاي ؟

* « ما كانش عندنا فكرة وإلا الرئيس ما كانش استدعانا وقال لنا الحقوا أحوكم مجدى .. وطبعاً كنت أنا والطحاوي ومجدى نعتبر زى ثلاثة أخوات وكنا أعضاء مجلس الشعب .. أنا والطحاوي طبعاً رحنا جمعنا الأعضاء اللي تبعنا فى هيئة التحرير وقلبنا الجلسة سرية وباظ موضوع الاستجواب ده .. فهذا عمل شبه زعل بين بغدادى وبين جمال كما فهمت من الليثى .. لإنه قال له لما إنت مش عاوز نعمل حاجة قلت لى فيه ؟ » .

* ويقول أحمد حمروش : « كان جمال عبد الناصر قد أظهر تخليه عن مجدى حسنين .. فتحمس ضده عدد كبير من أعضاء المجلس .. ثم غير رأيه .. وعندما شعر عبد اللطيف بغدادى بهذا

التحول .. ترك منصة الرئاسة وخطب قائلاً : « إن هناك خللاً دستورياً وتدخلاً من السلطة التنفيذية في شئون السلطة التشريعية » .. وقرر أن يستقيل .. وقدم كمال الدين حسين إلى عبد اللطيف بغدادى استقالته من عضوية مجلس الأمة .. احتجاجاً على تصرفات مجدى حسنين .. وأدت هذه المواقف والاستقالات المرفوضة إلى زيادة اعتماد عبد الناصر على عناصر جديدة من العسكريين .

• **ويضيف سيد مرعى :** « قال لى عبد الناصر : « اسمع ياسيد .. تقرر إن مديرية التحرير تتبع وزارة الزراعة .. وأنا « حاشيل » مجدى حسنين » .. وكان السبب الحقيقي هو الانحراف والمخالفات التى اكتشفها الرئيس عبد الناصر فى المديرية وكذلك « الفوضى المنظمة » التى يدار بها المشروع » .

• **ويقول محمد أبو الفضل الجيزاوى :** « لما اتعمل مجلس الأمة سنة ٥٧ وأنا كنت عضواً بمجلس الأمة .. حصل اختلاف بينى وبين عبد الناصر .. قلت له عايزين بقى تحقق هذه الشعارات إلى واقع .. اصطدمنا مع بعض .. وانتهى الأمر باعتقالى » .

• **ومن ناحية أخرى كان قد بلغ صدام عبد الناصر مع الغرب الذروة .. بسبب قضيتين هامتين فى تاريخ مصر .. وهما - كما علمنا - قضية تسليح الجيش .. وقضية تمويل السد العالى .. ليشد الشعب العربى إلى الزعامة المصرية التى تتحدى الاستعمار ...**

• **وانعقد أول مؤتمر للشعوب الإفريقية الآسيوية فى نهاية ١٩٥٧ ...**

• **ويقول أحمد حمروش :** « وانعقد المؤتمر فى القاهرة يوم ٢٦ ديسمبر ١٩٥٧ .. انتخب المؤتمر أنور السادات رئيساً له .. وانتخب يوسف السباعى سكرتيراً عاماً » .

• **وبذل الأسطول الروسى مياه البحر المتوسط لأول مرة ليؤازر عبد الناصر الذى أصبح الزعيم الأول فى العالم العربى ...**

• **ويقول محسن عبد الخالق :** « عبد الناصر قبل الثورة كان رجلاً ودوداً طيباً .. ولهذا اخترناه .. بعد ٥٢ دخل ما نسميه الصراع على السلطة .. مقالب ومؤامرات ومناورات .. ده صراع شديد على السلطة .. بعد ٥٦ بقى بطلاً قومياً وقلت لجمال عبد الناصر فى وقتها لقد حققنا كل شيء .. الإصلاح زراعى .. تحديد الملكية .. العدالة الاجتماعية .. دلو قسى نحقق الديمقراطية .. قال لأ .. ده الدور لسه بعيد .. آمال دور إيه ؟ قال لى الآن دور الثورة العربية .. ولأول مرة أسمعها « من الخليج إلى المحيط » .. ودخلت مصر فيما أسميه عصر المغامرات .. كان ممكن أن نحقق الإحساس العربى لإبنى مختلف أصلاً مع إن البلاد العربية تبقى دولة واحدة .. عمرها ما كانت دولة واحدة خالص .. كان ممكن أن نحقق الانتماء العربى بإعطاء النموذج .. لو كانت مصر دولة ديمقراطية .. مؤسسات .. نظم .. والنظم الإدارية والنظم القانونية » .

• **ويقول عبد اللطيف بغدادى :** « هنا بدأت شخصية عبد الناصر تتغير نتيجة الشعبية التى أخذها .. وحاول أن ينفرد بالسلطة .. وتمكن من هذا » .

• **حضرتك كنت رئيس مجلس الأمة سنة ٥٨ ؟**

• « المفروض كنا قرنا إنه بعد الاستقلال .. فترة الانتقال .. ثم ييجى مجلس الأمة .. علشان تبقى الحياة ديموقراطية وفيها برلمان .. وبعدين جاء الاعتداء الثلاثى ٥٦ .. فجاء مجلس الأمة فى يوليو ٥٧ .. كان متفقاً إن أنور السادات يمسكه .. فجاء جمال عبد الناصر على آخر لحظة .. قبلها بيومين ثلاثة بس .. قال لى مجلس الأمة جاى .. ٣٥٠ عضو كل عضو جاى يمثل نفسه .. يعنى ٣٥٠ حزب إحنا مانعرفش أحداً منهم .. أنور السادات حبيقى غير قادر على إنه يقود المجموعة دى .. فتتولاها إنت .. قلت له ماشى .. أنور ذكر فى « البحث عن الذات » وقال فى حديثه برضه الحقة دى اللي كانت مضايقه .. أنه فوجيء بإسناد المهمة لى .. المهم مسكت المجلس .. الحقيقة حظيت فى ذهنى التوازن بين المجلس وجمال عبد الناصر .. إن المجلس يبقى له وزنه وله ثقله وله رأيه .. فابتديت أعمل على هذا الأساس .. ولازم أبنى له شخصيته المستقلة .. فاعتبروها مدرسة .. كان أى واحد عاوز يقابل وزيراً ييجى مكتبى ويأخذ ميعاداً ترشح باب مكتبه وتدخل على طول ماتتنتظرش عند السكرتير .. أنا أبعت له وهو يرد علينا كتابة .. مش عاوز كمان يبقى هو محتاجاً للوزير .. مادام الوزير حيعمل له خدمة .. يبقى خلاص يفوت .. وابتدينا ننظم أنفسنا فى تكوين اللجان .. وإزاي الاستجوابات وإزاي الأسئلة .. باختصار .. المجلس ظهر أنه بقى له شخصية .. وكان مصطفى أمين يحضر كل جلسة ويكتب ما تحت القبة » .

• **وأعطى التأييد الكبير الذى اتفق عليه العرب .. الأمل فى قيام وحدة بينهم .. وقد تهايا الطريق للوحدة عندما تعرضت سوريا لضغوط خارجية ...**

• **ويقول جمال حماد :** « اضطر عبد الناصر إلى إرسال قوات مصرية إلى سوريا لمساندتها وتأكيد الدعم المصرى لها .. وقبل وصول القوات المصرية فى أكتوبر سنة ٥٧ كانت الحشود التركية تتجمع على الحدود السورية .. وكان لبنان يتعرض لغزو عسكرى من الأسطول الأمريكى السادس » .

• **وكان السوريون هم المقبلون على الوحدة والطالبون لها ...**

• **ويقول خالد محبى الدين :** « أنا كنت عضواً بمجلس الأمة .. وكنا سافرن سوريا أيام التهديد بالعدوان .. وهناك لاحظنا الخلافات العميقة اللى بتجرى داخل سوريا .. والرغبة من الضباط السوريين إنهم يعملوا وحدة .. فلما رجعنا وجمال عبد الناصر خرج من المعركة منتصراً ٥٦ .. جاءوا له وعرضوا عليه إن مصر يجب أن تقود .. وعرضوا عليه فكرة الوحدة .. وطبعاً هو الاتجاه العربى كان هاماً جداً عنده .. فمشى فى الخطوات .. وكان قد تردد أولاً خوفاً من الظروف .. لكن إزاء إصرار الضباط السوريين .. وبعض القيادات السياسية فى سوريا على أهمية الوحدة .. هو قبل » .

• **ويقول عبد الهادي البكار :** « لما صارت الوحدة كنت أنبئ الأخبار في إذاعة البرنامج العام في القاهرة ومعلقاً سياسياً في صوت العرب .. كنت أول سوري يأتي إلى هذه البلد بعد قيام الوحدة .. الوحدة لم يطلبها عبد الناصر ده لازم يكون مفهوماً ولا عبد الناصر كان رايد يعمل اغتصاباً لنول ولا إمبراطوريات في الحقيقة .. الذي حدث إن مصر المحبوبة اندلقت عليها الشعب السوري لأسباب تاريخية وثقافية وفنية .. طه حسين اللي خلانا نطلب الوحدة .. عباس العقاد .. أم كلثوم .. ألهم وعبد الحامولي .. المسرح والكتاب المصري .. وبعدين جاءت الإذاعة والسينما فكانت أنت فقير عم بتخطب بنت سلطان السلاطين .. السوريين خطبوا ود مصر وترجوها .. عبد الناصر قال لأ .. ده في البداية .. إحنا مجتمع فردى الإبداع فردى .. ومجتمع مش جماعى اجتماعى مثل عندكم .. والمصالح فردية تتصارع فحصل خلافات سياسية وأحزاب وحزب سوريا في حلف بغداد وتركيا صارت عم بتهدد .. فكانت عملية تعالى يا مصر اتقنينا .. وعبد الناصر كان حرام أقول لك كلمة معبود في الحقيقة كان الناس بيبتكروه النبي المؤجل ظهره .. عبد الناصر اللي هو رمز مصر .. اللي هو ٥٦ .. اللي هو جاء من قاع الشعب المصري .. وأقولها صراحة الذين ذهبوا إلى سوريا من مصر لم يكونوا مؤهلين قط للتعاون مع شعب عربي آخر وخاصة من خلال صبغة الحاكم أو الطرف الأقوى .. هذا النوع في بلاد الشام القريب إلى الصحارى والبادية فيه ديموقراطية .. ماقدروش أوصفها لك إياها .. مختلفة عنكم هنا .. ديموقراطية نفسية إدارية .. يعنى أنا مراقب برامج التلفزيون فيه وزير الإعلام جنبى يروح يقرب عليه مرحباً فلان ويقول له : خش أنا هنا » .

• **وأسال عارف عبد الرزاق :** ألم يكن عبد الناصر رائداً في مجال اجتماع كلمة العرب ؟

• **عبد الناصر قبل ٥٨** ماكانش بيفكر في جمع العرب .. في ٥٨ العرب هم اللي جاءوا عليه .. يعنى الوحدة مع سوريا هي اللي جاءت مش هو اللي راح » .

• **وأجرى الاستفتاء على الوحدة يوم ٢١ فبراير** وانتخب جمال عبد الناصر .. رئيساً .. وأصبح رئيس سوريا شكرى القوتلى « المواطن الأول » .. وتكونت الجمهورية العربية المتحدة من الإقليم الشمالي « سوريا » والإقليم الجنوبي « مصر » .. وتغير السلام الجمهورى والعلم .. وتغيرت أسماء الرتب العسكرية في مصر .. وألغيت الأحزاب في سوريا ...

• **وسألت د. محمد الدكرورى :** حضرتك كنت مديراً لمكتب الوزير السورى الكيالى أيام الوحدة .. ماذا تذكر عن هذه الفترة ؟

• **الوحدة حينما قامت في سنة ٥٨** كان أول انتصار وانطلاقة عربية وكان صداها عميقاً في مصر .. وفي سوريا كان صداها أقوى .. حيث كان السوريون أكثر سعادة من المصريين .. بدأت وكل الآمال متعلقة بها » .

• **ويقول توفيق عبده (سماعيل) :** اخترنا العلم أبيض وأسود وأحمر .. سنة ٥٨ مع الوحدة .. العلم اتغير مع الوحدة » .

• ويقول أحمد أبو الفتح : « ألعنى أشد الألم وأعتقد أن كثيرين من المصريين يبادلوننى نفس الشعور .. أن يتغير علم مصر الأخضر الجميل .. بسبب الوحدة » .

• ويقول عبد اللطيف بغدادى : « الوحدة مع سوريا أنا باعتبارها كانت ضرورية وأساسية .. لأن الأمة العربية لن يكون لها كيان إلا إذا توحدت وبقت إمكاناتها موحدة .. غير كده حفضل ضعيفة .. وقوى أخرى حفضل مسيطرة عليها » .

• وأسأل الملكة دينا : ماذا كان رأى الملك حسين فى الوحدة بين مصر وسوريا ؟

• « ما أعرفش مش قادرة أتذكر بالتحديد .. لكى لا أعتقد إنه كان سلبياً .. لأنه فى وقتها كنا بدون استثناء متحمسين لأى وحدة .. ولكن ليست وحدات مجزئة .. يعنى مرحلية .. أيوه مش تكون وحدة على حساب وحدة ثانية .. وحدة على حساب بلد آخر .. طبعاً ده صعب جداً أن يكون الوافق عاماً والتفاهم عميقاً بالشكل ده .. لكن أعتقد إن مشاعرنا جميعاً كانت إيجابية فى ذلك الوقت » .

• ويقول أحمد حمروش : « لم يتورع خروشوف عن القول بأن عامر يعيش فى سوريا فوق « خازوق » فى مقعده .. كان ذلك فى أواخر العام عندما ذهبنا لعناقشة المرحلة الثانية من السد العالى أنا وصلاح سالم لمقابلته » .

• وأبلغ السراج ناصر بخطة مؤامرة تدبر ضده .. من ورائها المملكة العربية السعودية والد CIA ...

• ويقول عبد الهادى البكار : « المهم عبد الحميد السراج عمل شغلة كبيرة فور قيام الوحدة .. صار أحد الملوك العرب عمل معاه اتفاقاً أوهمه إنه متفق معه .. على أساس إنهم يسقطوا طائرة عبد الناصر وهو جاى على سوريا .. فهو دخل بالعملية وأخذ شيك بالملايين .. المفروض يقبضه إذا قتل عبد الناصر .. وإجه على سوريا فأعطاه إلى عبد الناصر .. وانفضحت القضية فى سوريا وعبد الناصر خطب خطبة أول ما راح هناك .. هذه جعلت عبد الناصر سلم رقبته إلى عبد الحميد السراج .. ثم تبين إن عبد الحميد السراج عم ينشط أيضاً لمصلحته .. والحقيقة عبد الحميد السراج سيطر أيضاً على المباحث والمخابرات فى سوريا .. إذا واحد عم بيتنفس عم ببسجل له .. إذا عم ببشوف واحد حاله فى المراقبة يخاف يكون بيتجسس على نفسه .. زرع فينا هذا الهول فأوضح الناس » .

• ماذا تقول عن السيد عبد الحميد السراج ؟

« أنا عارف عبد الحميد السراج وأنا أتلقى السؤال بكل جسارة .. لأن أنا لست من الذين يبصمون على مواقف السراج .. وأنا رفضت وأرفض حكم المباحث والمخابرات فى أى دولة .. أرفضنا جداً وأرفض الشعب السورى جداً وأرفض المباحث والمخابرات وكان له تطلعات شخصية جداً .. وأنا أعرفه ليس بشكل حميم بأنه أبيض اليد يعنى مش بتاع فلوس .. والحقيقة ترعرع وولد فى مدينة حماة ابن عامل بسيط خباز .. أنا مش عم أقولك هذه تعنى أشياء .. أنا بزمانى جارى

عربية كارو وبائع قوطة وخيار فى قريتي فى طفولتي .. نحنا طلعلنا درجات السلم .. هو هكذا .. ثم دخل الجيش .. عبد الحميد السراج عندما استطاع أن يسيطر سراً على سوريا ما قبل الوحدة من خلال الشعبة الثانية يعنى المخابرات والمباحث .. كل حاجة تؤيده سراً .. نسق مع مصر لإن كان فيه صراع على سوريا بين السعودية والعراق .. ثم دخلت مصر .. أرسل محمود رياض .. الله يرحمه صديقى .. وكانت سوريا وحدها تعبانة .. فيه نهش عليها وأطامع .. وكل واحد عاوز يصير رئيس جمهورية ..

• وبدت معالم التغيير والمشروعات المشتركة تظهر فى البلدين .. وكان تعداد سكان مصر ٢٣ مليوناً وسوريا ٥ ملايين نسمة ...

• وزار عبد الناصر دمشق يوم ٢٤ فبراير ١٩٥٨ فاستقبله الشعب السورى بمظاهرات منقطعة النظير .. وسعد ناصر لذلك جداً ومكث شهراً ...

• ويقول عبد الهادى البكار : « بالمناسبة أنا كنت إلى جانب جمال عبد الناصر والرئيس السورى السابق شكرى القوتلى رحمهما الله أول يوم راح عبد الناصر على سوريا بعد يعنى كام يوم من قيام الوحدة الدستورية .. فأنا أنكر جيداً كان معى ميكروفون وكنت مذبذباً فى إذاعة دمشق .. فى الجامع الأموى .. فيه جانب منه أظنه الشمال فيه ضريح صلاح الدين الأيوبي وهو سورى مولود فى تكريت .. كردى زى عبد الرحمن الكواكبي ده كردى سورى .. الرئيس القوتلى رحمه الله قال كلمة أهتم فيها جداً وكانت حلوة كثير .. للأسف ما عديش منها نسخة الآن .. شكرى القوتلى قال له أسلمك يا فخامة الرئيس سوريا .. يعنى فوق ضريح رأس صلاح الدين الأيوبي .. أسلمك شعباً فيه ٥ ملايين زعيم .. وكان عدد الشعب السورى كله ٥ ملايين » .

• ويوم ١٤ يوليو سنة ٥٨ قامت ثورة العراق ، وكان أول قرار لها هو اعترافها بالجمهورية الوليدة التى كانت الملكية تعارضها ...

• وأسأل عارف عبد الرزاق : ماذا تقول لنا عن كل من : عبد الكريم قاسم وعبد السلام عارف ؟

• « ابتدا مخلصين لهدف وغاية ينشدها الكل .. لكن للأسف بتأثير بعض الناس انحرفوا عن الخط الثورى للمنافع الشخصية .. وتخوف أحدهما من الآخر جعلهما يتقسمان .. وأعتقد إنهما تلاميذ مدرسة واحدة .. يعنى مدرسة المراوغة ومدرسة الخط غير الصحيح .. ماكانوش صادقين لا مع أنفسهم ولا مع أصدقائهم » .

• هل هناك وجه للشبه بينهما وبين بعض من كانوا فى مصر ؟

• « النفوس البشرية تختلف .. البشر عبارة عن مخ وأعصاب وشوية دم وهذه تنوب ذوبانها كثيراً .. فالإنسان يتأثر بالكتاب اللى يقرأه والجلس اللى يقعد معاه .. بابنه المريض .. بزوجته .. بالعيشة .. بالمنطقة اللى يعيش فيها .. كل هذه الأشياء تؤثر على شخصية

الإنسان .. والإنسان نفسه يتغير بين فترة وأخرى .. فلا بد من وجود شبه ما يس أرجوك اعفيني » .

• ويقول عبد المجيد فريد : « أنا كنت لسه ضابطاً .. فى ٥٨ قامت ثورة العراق المعروفة بـ ١٤ تموز (يوليو) .. كنت فى ذلك الوقت ضابطاً بالقيادة العامة للقوات المسلحة .. وأنكر الأخ حافظ اسماعيل كان فى ذلك الوقت مدير مكتب القائد العام للقوات المسلحة .. وطلبنى وقال لى فجر اليوم حصلت الثورة فى العراق وإحنا عاوزين واحد يمثل ٢٣ يوليو ويبقى على اتصال بنا لأن من أيام مشاكلنا مع نورى السعيد ماكانش فيه سفير .. وفى نفس الوقت عاوزين تأخذ جهاز لاسلكى علشان يربط الثورة بالإقليم الشمالى « سوريا » .. ففعلاً رحل المطار لقيت طائرة .. نزلنا مطار دمشق أخذنا جهاز لاسلكى وأخذنا أحد ضباط الإقليم الشمالى وعدينا الصحراء لأن المطارات كانت مقفولة .. الثورة حصلت الصبح فقلوا المطارات وقفلوا الحدود .. فوصلت مبنى وزارة الدفاع فى بغداد ظهر ١٥ يوليو ٥٨ وطلعت فوق قابلت الاثنين اللى كانا قائمين بالثورة عبد الكريم قاسم وعبد السلام عارف .. وقلت لهما أنا مرسل من الرئيس عبد الناصر ومن ثورة ٢٣ يوليو .. وتأكدوا أننا ندعم هذه الثورة .. وإن التهديدات التى تواجهها هذه الثورة .. لأن كان فيه إنجليز فى مطار الحبانية .. وكان فيه الأسطول السادس فى البحر الأبيض .. ونورى السعيد كان صديق الغرب وصديق بريطانيا وصديق ملكة بريطانيا .. فأحنا مستعدين ندعم هذه الثورة .. وأنا معاها جهاز لاسلكى على اتصال بالأسراب الجوية بالإقليم الشمالى .. فطبعا رحبوا بى ترحيباً كبيراً جداً وأخذت الغرفة المجاورة لإقامة عبد السلام وعبد الكريم .. إقامة ومكتب .. وفتحنا الجهاز اللاسلكى واتصلنا واستمرت علاقتنا مع القيادة العراقية » .

• وصدر الدستور المؤقت ..

• ويقول د . نور الدين طراف : « وبعدين لما حصلت الوحدة .. اخترت أنا رئيساً للمجلس التنفيذى لمصر .. ويرضه ماكنتش أعرف ليه اخترت رئيس المجلس التنفيذى » .

• على أن الوحدة بين دولتين تتطلب فى الأساس قيام نظام اقتصادى متشابه .. وهو ما لم يكن قائماً ...

• ويقول جمال حماد : « عبد الناصر اختار طريق الاشتراكية وكانت سوريا بطبيعتها دولة رأسمالية » .

• وكان الصدام الفكرى قد بدأ منذ الأسابيع الأولى .. وهكذا كان عمر الوحدة قصيراً .. ولم يدم طويلاً ...

• ويقول د . عبد العظيم رمضان : « وشعر السوريون وهم القطر الأصغر بأن مصر تحاول أن تفرض إرادتها .. واعترضوا على قانون الإصلاح الزراعى .. ولم يقتنعوا بإعلان الاتحاد

القومى .. وأدى ذلك إلى النفور من الوحدة .. واستقال بعض الوزراء السوريين وهم فى مصر فجأة .. وشعر عبد الناصر إنها طعنة له من الخلف » .

- ويقول محسن محمد : « قُتل فيما بعد أحد وزراء الوحدة فى القاهرة على يد شاب سوري » .
- ويقول أمين هويدى : « هل تعلم وقت الوحدة لم يكن يسمح للمخابرات العامة المصرية أن تتواجد فى الإقليم الشمالى » .

• وكانت التأميمات مصدر خلاف ..

• وأسأل د . حسن عباس زكى : بدأت مع الدكتور القيسونى وحضرت التأميمات ؟

- « آه بدأت معه .. وكلمت بعد كده .. الله يرحمه .. فى الواقع فى هذه الفترة الرئيس قال لى : أنا حاسم لتأميم لإن ماعندناش فلوس .. قلت له : مانعمل الزكاة ونحصلها ودى ضريبة على رأس المال .. قال لا .. قلت له : العملية دى حتعمل لنا مشكلة مع سوريا .. مشكلة كبيرة .. لإن السوريين تجاراً وأحراراً .. وفيه حرية تجارة ودى دولة شبه رأسمالية .. قال : لا إحنا مالبين ايدينا من هذا الموضوع بالنسبة لسوريا » .

• ويقول جمال عامر : « السوريون مجتمع تجار ونتيجة تطبيق القوانين الاشتراكية هناك حصل نوع من الاستياء » .

• وأسأل أحمد كامل : نهبت المشير عامر لتبليغ الرئيس عبد الناصر باحتمالات الانفصال .. تفتكر هذه الواقعة ؟

- « كنت منتدباً لتدريب وحدات الدفاع الجوى فى سوريا كلها .. جميع وحدات الدفاع المضادة للطائرات .. هم كانوا عندهم الحاجات دى وماكانش عندهم القدرة على تشغيلها .. فأنا اختارونى رحت مسكت رئاسة التدريب فى الحقة دى .. أولاً .. سوريا تختلف عننا تماماً لأن الإخوة السوريين متمكنين فى السياسة من زمن بعيد جدا .. وهم اعتبروا أنفسهم وطنيين وعرب قبل كل شئ والعروبة فى نملهم .. وكانوا متصورين أن وجود القوات المصرية فى سوريا وإن إحنا اللى بتدرب وبنعلم أحياناً .. كانوا يقولوا علينا « جيش الاحتلال المصرى » .. بعد ما خلصت التدريب وكانت عملية شاقة جدا .. لأنى كنت بأدير ١٧ دورة تدريبية فى وقت واحد .. قالوا لى تشغل معانا فرفضت .. من قائد المدفعية لقائد الجيش الأول يرجونى إنى أقعد .. قلت لهم أنا خلاص علمت الناس بتوكم وأنا حارجع القاهرة .. من كتر عشتى للضباط السوريين والجنود السوريين حسيت فيه فرق كبير جدا بيننا .. كان واضح إنه مثلاً بدل السفر اللى بيأخذه الضابط المصرى هناك يمكن يعادل مرتب قائد الجيش .. والضابط السورى مرتبه زى الضابط المصرى الموجود هنا فى مصر .. اللى بيأخذ مرتبه بس ما بيأخذش بدل سفر .. وهنا كان فيه بعض الوحدات السورية وكانت بتأخذ بدل سفر .. بس مصر باتساعها وبقدراتها .. الضباط السوريين مابوش .. إنما بلد زى دمشق صغيرة اللى كل الناس عارفة بعض فيها بان الأثر ده .. الضابط المصرى بيصرف ببذخ .. فأحدث بعض الغيرة بين الضباط الموجودين » .

• ويقول شمس بدران : « السبب الرئيسى للانقلاب هو القرارات الاشتراكية .. ماتمشيش عندهم .. فلسطين التى كان فيها اليهود يشتغلوا عمال أجريين .. اليهود فى أى حقة فى العالم أصحاب رأس مال وجواهرجية .. الحقة الوحيدة فى العالم التى ماكنش يقدروا يأخذوا فيها حاجة .. كانت سوريا لإن السوريين أحسن منهم » .

• وأسأل د . محمد الدكرورى عن ظروف الانفصال ؟

• « الوزراء السوريين كان لهم تركيبة غريبة شوية .. فكان أغلبهم من البعثيين .. على رأسهم السيد أكرم الحورانى .. وكانوا هم الأغلبية .. وكانت هناك عناصر قليلة وطنية تعشق الوحدة أكثر من نظرة حزب البعث للوحدة .. والوزير فخرى الكيالى - وكنت أعمل فى مكتبه - كان يعشق مصر ولكن كنت أحس دائما إنه يحس ببعض المرارة لأن الوزراء البعثيين كانوا أقرب إلى الرئيس عبد الناصر .. وكان مثلهم فى سوريا .. وهذا من أحد أسباب الانفصال بين سوريا ومصر .. وكان وزير العدل آنذاك نهاد القاسم .. وحاول أكثر من مرة أن يلتقى بالرئيس عبد الناصر حتى يبلغه ما حدث .. والذى لم يكن لصالح الوحدة العربية .. وفى النهاية كتب استقالة وأتى بها إلى زميله السيد فخرى الكيالى .. واستعرض فيها أن البطانة التى حول الحاكم تحول بينه وبينهم .. وقال فيها « ولا أضرب بالحاكم فى علاقته بالحكوم من ضعف الذاكرة » .. وكانت من ضمن مظاهر عدم نجاح السياسة المصرية فى الوحدة مع سوريا » .

• وبدأت القلاقل فى سوريا .. وكثرت الروايات والمبررات .. وأعلى عبد الناصر عبد الحميد السراج من منصبه لتهدئة الجو ...

• ويقول عبد الهادى البكار : « انفرضت الوحدة على عبد الناصر فرضا لطيفا .. ومصر قبلت الزواج بسوريا التى خطبتها .. كان بائع الشراب بالشارع عنده وهم بينه وبين نفسه نوهم إنه الأعظم والأقوى .. عندنا مجتمع ديموقراطى يعنى أنا الوزير أقدر أقابله بسهولة .. أنا لما جيت لهون شفت محمد أمين حماد الله يرحمه رئيس الإذاعة كان عنده صديقنا وزميلنا الله يرحمه سعد زغول نصار .. واقف أمامه .. ينحنى إلى السلطة .. ثم مرت ربع ساعة وصادفت أن وجدت سعد زغول نصار أمام مذبح جديد مش عارف اسمه .. واقف كالفرعون .. عندكم مجتمع هرمى فى العلاقات الإدارية والنفسية .. شوف هذا غير موجود عندنا .. نحن عندنا مجتمع أفقى » .

• إلى جانب القرارات الاشتراكية ؟

• « مش هى الأساس .. فيه أبعد يا أستاذ طارق بكثير .. فيه المزاج الجغرافى - أنا بأنفرد بهذا التعبير وأرجو أن يكون جائزا - مزاج المجتمع .. التى عايش فى مجتمع صحراوى غير مزاج التى عايش فى المناطق الباردة غير المجتمع التى فيه حوض الأنهار غير المجتمع التى عايش فى الجبال .. فيه مزاج مختلف .. ده الذى حصل .. أنا مسئول كبير فى التلفزيون وعندى فراش .. أقعد أنا وياه إذا مافيش أحد وكل يوم نفطر سوا .. مافيش هرمية أنا فوق وهو تحت .. هو يؤدى واجبه .. عندما تأتى المواجهة رأسا يلتزم فيقف يحترمنى » .

• أليس هذا من النظام الاشتراكي ؟

• « نحنا أول من نادى قبل لينين وماركس وإنجلز بالنظام الاشتراكي .. ولم يكن قد حصل ثورة الاتصال .. وأدوات أو وسائل الانتقال .. فكنا نعرف بعض من بعيد لبعيد .. هذا الاحتكاك العملي الميداني النفسى أدى إلى أن يكتشف السوريون أن هناك بعض الاختلافات فى المزاج .. والمصريون كذلك » .

• هل أصبح الاتهام نتجه نحو القادة العسكريين وبالذات اللى كانوا فى سوريا ؟

• « لا لا .. انا لا أحمل لا عبد الناصر ولا الانفصاليين خراب الوحدة .. لأنه لابد أن ندرس قضايا هامة جدا .. وحدة عربية ما بتصور .. نحن مجتمعات مختلفة .. أنا سورى .. خليجى الآن .. ولكن عندنا فى بلاد الشام الصراحة فضيلة أنا لما باقول لك ما بحبك يا أخى وزعلان منك .. ده اكتشفته بعد ٢٨ سنة .. خربت كل علاقتى من أجل الصراحة .. عندهم عيب فى الخليج هذه الصراحة .. هذه وقاحة .. هم عارفنى تماما ما يعضبوا من صراحتى لأنها فضيلة .. ولو أنا يعرفهم تماما ما بزعل من كتمانهم وحرصهم على عدم البوح بما يحسونه ويشعرون به .. إنما أقول إذن إن كان حصل تصادم على مستوى الجماهير المصرية والجماهير الشامية .. من خلال اختلاف المزاج الجغرافى .. فكان الشعبان ما يعرفوا بعضهم بالقدر الكافى .. جاء مرة إلى هنا عفيف البرزى .. مرة السراج بده يقابل عبد الناصر إجت الهرمية الإدارية انتظروا عند السكرتير وحتى يطلع ده مافيش .. نحن لا نقبل هذا .. أنا ند معاك .. أنا زميل ثورة معاك .. أنا مثلك .. وإن كنت أنت أعلى » .

• ويقول مصطفى أمين : « الوحدة مع سوريا حصل فيها نفس الخطأ .. إن إحنا فكرنا إن معنى تحرير سوريا أن نحكمها .. ودى أكبر غلطة عملناها .. لأن كان يجب إن إحنا نعمل وحدة مع سوريا دون أن نتدخل فى شئوننا الداخلية .. ونضع أسماء .. ونعين أشخاصاً .. ونرفض أشخاصاً .. ونتدخل فى كل شئونها .. طبعاً يرفضوا هذا فقاموا ضدنا » .

• ويقول نجيب محفوظ : « الوحدة مع أى بلد عربى أهلاً وسهلاً .. لكن مش بالطريقة دى .. بأن ٥ أو ٦ يقولوا عاوزين وحدة .. يجب أن يسمعو رأى العروسة قبل عقد الجواز .. فيطلع شئ ثابت .. ثم فى رأى الوحدة بين العرب .. مش وحدة بلاد .. دى وحدة ولايات .. يعنى يبقى فيه قومية عربية .. فيه جامعة متعاونة اقتصادياً وثقافياً .. وحاجات زى كده .. وعلى المهمل .. إنما ده كل عربى عاوز يبقى رئيس تقوم تدمج الدولة .. ماكانش له لازمة أبدا » .

• وأسأل د . الجوهري : قلت فى كتابك « من أجل الزعامة ضحى عبد الناصر باسم مصر » ؟

• « آه فعلاً وأنا ماكنتش أحب قوى إن مصر تبقى الإقليم الجنوبى .. كنت أحب إن مصر تفضل مصر .. يمكن أنا لما كنت رئيس وفد مصر للإعلام فى أيرلندا .. رحنا علشان خاطر نعيد الحجز بتاعنا فى شركة « إير لينجوس » اللى هى شركة الطيران الأيرلندية .. مارضيوش إنهم يحجزوا لنا قالوا « اليونانيد أراب ريبابلك » دى تبقى إيه ؟ قلنا لهم مصر مع سوريا عملوا كذا ..

قالوا يعنى انتم منين ؟ قلنا لهم .. تعرفوا الهرم ؟ قالوا آه .. تعرفوا أبو الهول ؟ قالوا يعنى إنتم من EGYPT .. ووافقوا لنا على التنكزة وركبنا .. لكن علشان نقول الإقليم الجنوبي كان مافيش أحد فى العالم يعرف الإقليم الجنوبي من الإقليم الشمالى ولا اسم « اليوناييتد أراب ريبابلك » يعنى الجمهورية العربية المتحدة » .

• ويقول عبد اللطيف بغدادى : « وجاء انفصال سوريا .. عبد الحكيم كان هناك وبعدين ساب العملية وجاء .. ولما سابها وجاء قلنا العملية انهارت وخلص .. لأن الناس كانوا لسه متمسكين بالوحدة .. لقوا القيادة بتاعتهم سايياهم وماشية حيسلموا إلى القيادة الجديدة .. وانتهت فعلا العملية .. وعبد الحكيم نفسه قال أنا ماقدرش أواجه الجيش ولا الجنود ولا الضباط .. غيرونى وشوفوا واحد تانى غيرى .. وجمال عبد الناصر برضه وافق ورجع تمسك به » .

• بحكم الصداقة ولا إيه ؟

• « بحكم الصداقة .. لكن لما تمسك منكراى وتبص فيها .. تجد الخلافات اللي موجودة جاييها بقى كلها وإزاي المجلس أخذ القرار .. وإزاي رجع بقى فى القرار ده » .

• وأسأل د . محمد الدكرورى : ومن الذى كان وراء هذه الأمور ؟

• « كل هذه الأمور أدت إلى خلق رأى عام فى سوريا .. السياسة المصرية كانت متروكة للمشير عامر .. الذى كان يترك للسراج الأمور كلها .. وأعتقد أن القوات المصرية فى سوريا كانت تتعامل معهم بشكل يجعلهم يعتقدون أنهم محتلون .. فأصبح الرأى العام متأكد أن الروابط المصرية السورية ضعفت .. حتى جاء الانفصال » .

• ويقول عبد الهادى البكار : « جاءت القرارات الاشتراكية وكانت مرتجلة .. وكان فيه جفاء فى التصرف .. أنا كنت فى الإستوديو فى التلفزيون فى هذا اليوم .. وجاءت القرارات الاشتراكية فى ظرف مقفول وكان مطلوباً من عبد الحميد السراج وأكرم الديرى الله يرحمه وزير الاقتصاد .. بأنهما يعملوا المؤتمر الصحفى .. وما حدش عارف شو حيصير .. فتحوا الظرف وجدوا قرارات اشتراكية معدة فى القاهرة .. يا سيدى فى سوريا يعنى ما فيه إقطاعيات .. صادروا معامل صغيرة للناس .. واحد عامل معمل سكر .. صار فيها انتقام .. لأنهم عملوا قرارات هنا .. وهنا غلط .. هنا مش زى هناك .. نحنا مجتمع تجارى حق قائم على المتاجرة الفردية مافيش إقطاعيات إلا قليلاً » .

• وبعدها بأيام حدث المتوقع .. فُبض على المشير عامر ورحل إلى مصر .. وهكذا حدث الانفصال يوم ٢٨ سبتمبر على أيدي بعض فرق الجيش السورى .. ومنهم مدير مكتب المشير نفسه .. عبد الكريم النحلاوى ...

• وأسأل شمس بدران : هل المشير كان سبباً من أسباب انفصال سوريا عن مصر كما قيل ؟

• « سوريا أصلها لا يمكن أن تحكم .. لأن هى فيها اضطرابات وخلافات » .

- **طبيب المشير إزاي كان أحد الأسباب ؟**
- « ما كنش أحد الأسباب .. هو كان فيه خلاف بينه وبين السادات .. لأن السادات على عبد الناصر لهم شلة » .
- **بس كان موجوداً فى سوريا أيامها وقبضوا عليه ؟**
- « هو له شلة تانية آه .. وطلع واحد ماهواش من الشلتين دول .. عبد الكريم النحلاوى .. وكان مش من شلة عبد الحكيم كان مش من الشلة اللي هى تبع الناس اللي بيشتغلوا فى القيادة .. عمل انقلاباً وهو هناك .. فعبد الحكيم عامر مش مسئول عن الانقلاب » .
- **ويقول عبد اللطيف بغدادى :** « أخطاء الوحدة هى تصرفات السراج فى سوريا والطرق البوليسية التى كان يتبعها وتزمر الشعب السورى منها .. حتى أطلق عليه اسم « السلطان عبد الحميد » .. وكان هناك خطأ آخر جسيم هو طريقة إدارة دفعة الجيش .. وعبد الحكيم عامر كان عادة يترك الأمور لمساعديه .. وهم كانوا لا يحسنون التصرف لدرجة إهانة وجرح كرامة كثير من الضباط السوريين » .
- **ويقول أحمد كامل :** « قابلت المشير عامر .. قلت له بصريح العبارة : الجماعة السوريين دول لو بيجبونا حيشحنونا على مراكب .. لو ميجبونا ش حيجمعونا ويضربونا بالرصاصة .. ولم يقتنع بهذا الكلام .. وبرضه من الشلل المحيطة .. كانت النتيجة إنه قُبِض عليه هو شخصياً .. وأنزل بالطائرة إلى القاهرة » .
- **ويقول جمال عبد الحكيم عامر :** « الرئيس عبد الناصر كلف والذى إن هو يكون مسئولاً عن سوريا فى هذه الفترة وكان تقريباً مقيماً هناك .. كان السوريين جيشهم فيه عدم استقرار ودائماً فيه انقلابات .. طبعاً هو كان موجوداً فى الفترة دى فى سوريا وهم هاجموا البيت بتاعه وضربوا غرفة النوم بتاعته كسروها خالص .. وشاء القدر إن هو كان قد أبلغ وراح القيادة ونجا من الموت .. وبعدين حصل نوع من التسوية ورجع مصر .. فذه كان تكليفاً من الرئيس للمشير إن هو يتولى سوريا فى هذه الفترة .. وهو اتهم المشير إنه هو السبب فى الانفصال .. طبعاً مش ممكن يكون هو السبب .. لأن هو كان علاقته كويسة وكان محبوباً هناك وكان فيه ظروف تانية خارجة اللي سببت الانفصال فى تلك الفترة » .
- **وأسأل كمال الدين حسين : هل اختلفت مع الرئيس عبد الناصر بخصوص الوحدة مع سوريا ؟**
- « لا أنا لم أعترض .. لكن تخوفت من موضوع الوحدة .. هو طبعاً العملية كانت مفاجئة جداً .. وأنور السادات راح مرة مجلس النواب ما أعرفش عمل إيه بيننا وبينهم .. ولازم نحن نكون متصلين ويبقى فيه وحدة .. بعدين التيار جارف .. عبد الناصر قال مش إحنا اللي بنقى السبب .. فيه فرصة للوحدة .. وإحنا نعترض عليها .. ونحن ننادى بالقومىة العربية والكلام

اللى بالشكل ده .. إحنا كنا غلطانيين فى هذا .. يعنى مما لا شك فيه إن الحوادث سبقتنا وحصل ضغط ويمكن حزب البعث كان له تأثير فى هذا الموضوع .. وكان لهم مصلحة .. وأنا بأقول لك حزب البعث اللي عمل الانفصال وحزب البعث اللي أراد الوحدة .. لغاية ما استولى على الحكم فى سوريا .. بعد ما عمل كذا انقلاب وكذا تطهير .. وبقي هم فى إيديهم الجيش .. ويتوع العراق نفس الموضوع وبعدين اختلفوا كما هى طريقة الأحزاب .. المهم هو كان موضوع سابق لأوانه .. لكن كان استجابة لعمليات روحية ونفسية للشعب المصرى والسورى .. ولكن السياسة فيها ألعيب كثيرة بيلعبوها السياسيون .. وإحنا كنا لسه بنتمرس فيها .

• **ويقول عبد المجيد فريد :** « المشير عامر نائب رئيس الجمهورية والقائد العام كان شبه معتقل .. والمدرسون يبطروا ويحبسوا .. فكان موقف تعباناً جداً .. وبدأ جميع زملائه .. كمال حسين ونواب الرئيس وأعضاء مجلس الثورة .. بدأوا يفكرون فى كيفية مواجهة الموقف .. ولأسيما إن جزء من الإقليم الشمالى فى حلب كان ومازال يئنض .. وإنه مازال جزءاً من الجمهورية العربية المتحدة وإن اللي قاموا بالعملية دى هم من يتوع الشام فى دمشق .. ولذلك بدأوا يخططوا على أن من الممكن إعادة الجمهورية العربية المتحدة من حلب .. والتحرك جنوباً .. فبدأت فى إعداد قوات مظلات ومركب تشيل تشكيلات .. وحتى قصة ما قلتهاش قبل كده .. وهى إن الرئيس عبد الناصر طلب منى مع ٣ أو ٤ زملاء إن إحنا ندخل سوريا من طريق بيروت .. لنتحرك سياسياً مع القوى السياسية فى الوقت الللى الجنود والتشكيلات بتصل اللاذقية .. والمظلات تنزل بواسطة جلال هريدى قائد المظلات فى ذلك الوقت .. ووصلت بيروت وتحركت للحدود .. وطلعت مشاكل فى الحدود لأن كانت الثورة أو الانقلاب الجديد قفلوا الحدود .. وسهل التعامل معهم بشكل أو بآخر .. وبدأت أدخل وبتاتصال تليفونى من السفارة ارجع فوراً .. لأن الرئيس عبد الناصر وجد إنها حقيقى فيها عملية دم .. وتغير تفكيره .. وأنا كنت غادرت ورحت بيروت إنما حضرت الجزء الأول بتاع التخطيط العسكرى .. الجزء الثانى عرفته لما رجعت إن حقيقى فيه عملية دم والموضوع يتحول إلى نزاع سياسى وليس عسكرياً .. ورجعت التشكيلات .. وكان حتى المظلات وجلال هريدى وفريق الاستطلاع الأولى نزل على الأرض .. واتمسكوا واعتقلوا وسجنوا .. وأنا قدروا يسحبونى من الحدود اللبنانية السورية فى آخر لحظة وبعدين كلفت أن أروح الحدود .. استقبل المصريين العائدين .. كان فيه قصص غير مريحة من المصريين العائدين من سوريا .. لأسيما فى الأيام الأولى .. من معاملة سيئة .. والسبب وجود الجيش هناك والعسكريين والمشير عامر من أسباب الانفصال .

• **ويقول جمال عبد الحكيم عامر :** « كان فيه قرار من الرئيس أن يحاولوا يستردوا الوضع تانى بالقوة .. لكن تراجعوا عن هذا .. وجدوا إنها مش حقيقى عملية .. وسيكون فيها خباياير ومواجهة بين الشعب السورى والمصرى ففضلوا الانسحاب . »

• **ويقول عبد الهادى البكار :** « عبد الناصر كان نائماً وقواته أبحرت ناحية سوريا .. وطلابع ٧ طائرات مليئة بالكومندوز المصريين .. بقيادة جلال هريدى .. عم يقاوموا الانفصال عسكرياً

وتثبيت الوحدة بالقوة .. بعد ما اطمئنوا وصارت كل البواخر بالإسكندرية هنا محملة .. فاتصل به السفير الروسي بالليل - أنا نشرت هذا في جريدة الشرق الأوسط من كام سنة - قال السفير الروسي لسكرتارية عبد الناصر « ضرورى تصحوه » صحوه وقال له : « لدنى برقية من الكرملين يا سيادة الرئيس ناصر .. دع سوريا وشأنها » .. وهكذا حدث إن الروس وقوه » .

• ويضيف عبد الهادى البكار : « قدمت استقالتى على شاشات التلفزيون .. بعدما اتذبحت الوحدة وحصل الانفصال .. وأتيت إلى هنا .. ليس كمنذع .. كنت أنا جاي أودى واجبى السياسى اللى أنا مقتنع به » .

• لاجئاً سياسياً ؟

• أنا ما جئت لاجئاً سياسياً .. جىء بى .. بعد أن أدبت واجبى على شاشات التلفزيون وهاجمت الحكومة الانفصالية أمام الناس كلها وأهنتها وأعلنت استقالتى .. وأنا ما فيش معاى أكثر من أربع جنبيات .. وصلت وتمكنت قبل اعتقالى من الوصول إلى بيروت .. وعلم عبد الناصر من الصحف إننى موجود فأرسل لى طائرة وقالوا لى تعالى فجئت .. والحقيقة بدهم يعطونى بيت .. وعبد القادر حاتم وسامى شرف والجميع عايشين .. أنا خيرت فى أى مكان أسكنه وأى راتب .. فقلت أبداً أنا جاي كمناضل وحدوى .. نعيد الوحدة اللى إحنا ناضلنا من أجلها .. رفضت أى راتب كبير أخذت ٨٠ جنيه لأننى طلبت ٨٠ جنيه .. وندمت فيما بعد لإنهم كانوا مش كافيين .. وصرت أعيش فى شقق مفروشة » .

• واستطاع السراج الهروب من سجن المزة بدمشق .. ووصل إلى القاهرة لاجئاً سياسياً ..

• وأسأل محمد نسيم : كنت ضمن مجموعة تهريب السيد عبد الحميد السراج من دمشق فى عملية اسمها جمال ؟

• « فعلا .. وكان فيه أزمة بين المشير عبد الحكيم عامر والسراج .. وبعد كده السراج استأذن الرئيس ورجع على سوريا .. بقعد شوية .. وبعد كام يوم حصل الانقلاب .. وتخيلنا إن عبد الحميد السراج وراء هذا الكلام أو تردد هذا .. الحقيقة بقى شخص زى عبد الحميد السراج رجل قومى جدا ومؤمن بالوحدة .. لكن المفاجأة خلت أى أفكار تيجى للواحد .. لكن اتضح العكس .. المجموعة اللى قامت بالانقلاب أيامها كانت مجموعة متناقضة .. كان فيه مجموعة فى تصورهما قابلة إنها تصحح زى مهيب الهندى .. دى مجموعة مؤمنة .. وفيه مجموعة ثانية انفصالية جدا زى مثلا الكزبرى وموفق عصاصة دول مجموعة ضد الوحدة من زمان .. لذلك هم أنفسهم اختلفوا مع بعض .. لكن فى الفترة دى طبعاً حاولوا يكسبوا جانب السراج .. ولما ما وافقش سجنوه فى سجن المزة » .

• وحُكم عليه بالإعدام ؟

• « لا أتذكر .. لكن هو كان فى سجن المزة .. وكانت عليه حراسات شديدة .. لكن فى نفس الوقت ما هو عدد كبير من الناس وعدد كبير من الضباط كانوا وحدويين إلى آخر مدى .. تم

التخطيط لتحرير السراج بالتنسيق بين القاهرة وبينى .. وكنت أرسلت إلى بيروت علشان أشتغل هناك .. وتم التنسيق والتخطيط لعملية طويلة .. إنتم ممكن تتخيلها .. نائب رئيس الجمهورية فى سجن المزة وعليه حراسة .. ثم إذا اتهرب يأتى إلى بيروت زى الأخ سامى شرف ما قال فى كتابه .. وأنا كنت متولياً الإخفاء بالنسبة له .. جنبه عندى .. الكل ماعناش عارف فى هذا الوقت لما جاء إلى بيروت .. الناس كانوا متعاونين معانا .. أسأل عبد الحميد السراج فى حين ؟ ويقولوا عند الروس أو الأمريكان .. وهو عندى فى البيت مستخفى .. وأولادى والمدام قاسوا معى كثيراً .. إلى أن تم التنسيق لإعادته إلى القاهرة تانى يوم .. وفوجيء الناس بماتشيت هيكل يقول « عبد الناصر يستقبل عبد الحميد السراج » .

- وجاء عن طريق البحر أم عن طريق الجو ؟
- « جاء عن طريق الجو » .
- وفى ديسمبر أصبح ناظم القدسى رئيساً للجمهورية السورية ...
- وأسأل نور الدين طراف : إيه شعور عبد الناصر بعد الانفصال .. وحضرتك كنت رئيس المجلس التنفيذى ؟
- « كان شعور إحباط شديد .. ولكنه لم يكن يئأس إطلاقاً .. كان يقول إحنا بنغلط ولازم نسوى الغلطة » .
- ويقول محمود فهم : « انفصال سوريا .. ده اللى خلى الرئيس تأثر جامد جدا » .
- ويقول كمال الدين حسين : « لما تبجي فى الآخر يحصل الانفصال ويتعمل فى عبد الحكيم عامر اللى اتعمل فيه ويعدين تقوم إذاعات الانفصال تشتم فى عبد الناصر .. وفى مصر .. وفى الوحدة .. وفى كل الناس .. ده طبعاً أثر فيه كثيراً جدا » .
- ويقول حسين الشافعى : « إطلاقاً ما كنتش معترضاً على الوحدة .. بس الواحد تبين له بعد كده .. أن قد تكون من ضمن الخطوات اللى اتخذت علشان يخرجوك من خطك .. ويوجهوا إليك لكمة سياسية بالانفصال .. لأن اللى عمل الوحدة هو اللى عمل الانفصال .. وبالتالي مصر نلقت طعنة أثرت فيها تأثير فظيع جدا معنويًا وسياسيًا » .
- ويقول خالد محبى الدين : « أنا رأيى إن الوحدة كانت مهمة تاريخياً .. لكن مادام فيها عيوب فى الدراسة .. والتطبيق .. أدت إلى الانفصال » .
- ويقول د . محمد الذكورى : « أنا أعتبر إن نهاية الوحدة بين مصر وسوريا .. كانت هى بداية هبوط أسهم ثورة ٢٣ يوليو .. ومن مراحل العثرات الشديدة التى قابلها الرئيس عبد الناصر .. وكانت بعدها سلسلة التخبط التى انتهت بالنكسة .. وللأسف كانت تجربة لم يقدر لها النجاح » .
- وأسأل عبد الهادى البكار : قال الرئيس عبد الناصر رحمه الله « أنا شفت من البعث ما لم يراه أى إنسان » .. إيه رأيك أو تعليقك على هذا الكلام ؟

• « الحقيقة إذا كان قول عبد الناصر هكذا فهو قول ليس دقيقاً .. لأنه مش من البعث .. ربما كان قصد عبد الناصر من بعض البعثيين .. شوف أنا بكل صراحة بأقول لك وبأعتقد هذا الكلام هام .. لقد سجت عام ٦٣ في دمشق لما بدأ يسطر حزب البعث .. وعذبت جسدياً وآثار التعذيب مازال .. كهرباء في حلقى .. وشردت عن وطني .. حتى الآن صار لي ٣٤ سنة .. ولازم نفرّق بين حزب البعث كفكر .. وأنا ذهبت إلى بغداد أرسلني عبد الناصر كمصري يطلب من عبد السلام عارف .. قدت حملة إعلامية من إذاعة بغداد سنة ٦٤ إلى سبتمبر ٦٦ وتوجتها بالكشف عن اليهودي « كوهين » من شبكة التجسس الإسرائيلية .. أنا كاشف الشبكة هذه واسمى وارد في المحكمة وبقيت سنين أعوى .. الكلب ينبع إنما أنا أعوى كالذئب .. ضد نظام الحكم البعثي في دمشق .. شوف حزب البعث هو النذى الذى رضع فيه عبد الناصر مبادئ الحرية والوحدة والاشتراكية .. دى طلعوها سنة ٤٧ قبل عبد الناصر .. الآن أنا مش زعلان منهم .. لكن الحقيقة طبعاً كان فيه صراع .. طبعاً حزب البعث .. وهو برضه عذبهم جداً .. لكن شوف .. أنا أحمل كل مسئولية في تلك الفترة للجميع .. بما فيهم عبد الناصر وبما فيهم كل قادة حزب البعث فاعليين ومؤثرين .. كل ما تعاني منه أمتنا العربية من سنة ٦٧ .. سببه حزب البعث مع عبد الناصر وعبد الناصر مع حزب البعث .. لو ماحصلش هذا التصادم وأمكن إنجاح تجربة الوحدة بين سوريا ومصر لتحولت إلى بستان زرعت فيه أشجار كل الأنظار العربية الأخرى .. بلطف مش عن طريق المباحث والمخابرات والتأمر والقتل .. لا .. لأن كأتى عربى فى أى قطر عربى إن كان مسلماً أو نصرانياً ولا كان أى حاجة .. شيعى ولا سنى ولا أرثوذكسى .. إحنا كبلاد عربية يا أخى إذا توحدا أحسن .. نحننا مختلفين على أسلوب التوحد مش على الفكرة .. حصل تجربة وفشلت نعاودها بشكل أفضل .. ما فيش واحد بالوحدة العربية راح يخسر .. شوف الوحدة قوة لكل الأجزاء .. وهى أمنية مشتركة .. ولا خلاص لأمتنا العربية من هزيمتها الحضارية ونظامها الحضارى إلا بالتوحد » .

• وأسأل سامى شرف : هل كانت النكسة سبب مرض الرئيس الشديد ولا كان الانفصال قبل ذلك ؟

• « لا .. الرئيس أول مرة جاء له السكر كان سنة ٥٧ .. حتى قبل الوحدة .. بالمناسبة أنا عندي كل الأوراق بتاعة مرض الرئيس جمال عبد الناصر .. السكر اللي كان عنده زى السكر العادى .. مش كما ادعى البعض البرونزى والزئبقى .. لا سكر عادى .. إنما الجهد العصبي والمجهود العصبي وحرقة الدم والحرب الشعواء من الداخل ومن الخارج .. والتي لم تنقطع يوماً .. كانت دى تهد جبل » .

• يقول عبد المجيد فريد : « الرئيس كان فى الحقيقة متأثراً .. أنكر فى ذلك اليوم أنه كان مصدوماً صدمة كبيرة جداً .. وبدأت مشاكله الطبية منذ ذلك الوقت .. صحيح الأزمات القلبية جاءت فيما بعد .. بس مشاكله الطبية عامة بدأت من ذلك الوقت .. وكانت صدمة بالنسبة له لأنه ماكنش يتصور إلى هذا الحد .. وبدأت تأتى البرقيات عن سوء معاملة المصريين .. وسوء معاملة القيادة » .

- وتقول د . هدى عبد الناصر : « الانفصال كان نكسة لكن والدى بحكم طبيعته تحرك .. وزاره ضيوف كثيرون .. كنت أيامها فى الجامعة وكان نراقب من بعد .. ونشاهده مع الضيوف من شباك « الفراندة » وطالت المقابلات .. ووجه بياناً للناس وقرر عدم التدخل » .
- وهل كان ثائراً أم حزيناً ؟
- « كان حزيناً للغاية » .
- وأدى الانفصال إلى إضعاف فكرة الوحدة العربية .. وأصيب الرئيس عبد الناصر بالإحباط الشديد .. وأثر فى صحته وشخصيته ...

ويسقط الاستعمار

- كان دعم حركات استقلال الشعوب فى كل من العالم العربى والعالم الإفريقى خطأ سياسياً رئيسياً فى السياسة المصرية ...
- ويقول خالد محبى الدين : « هو كان مقتنعاً بهذا الدور .. قيادة الأمة العربية .. وكان مقتنعاً إن الأمة العربية هى قيادة العالم الإسلامى .. وده صحيح .. ومصر لها أيضاً دوراً إفريقياً .. يعنى كان عنده الدوائر الثلاثة دى واضحة جداً فى ذهنه لمصلحة مصر » .
- وكان أروع إنجازات السياسة المصرية الخارجية .. هى المشاركة فى تحرير الجزائر وإنجاح ثورة المليون شهيد .. التى كان يقودها بن خدة وين ببلا وباقى القادة الوطنيين الجزائريين ..
- ويقول الفنان كمال الطويل : « كما أصبح نشيد « والله زمان يا سلاحي » من ألحاني .. هو السلام الوطنى المصرى .. أصبح السلام الوطنى الجزائرى من ألحان الفنان الراحل محمد فوزى » .
- يقول أمين شاكور : بن ببلا جاء قال لنا فى أوائل سنة ٥٤ إن الفرنسيين لا ينووا الجلاء أبداً عن بلادنا ومحتلين بلادنا .. تونس والجزائر والمغرب مدة ١٢٨ سنة .. ولغوا الذاتية الخاصة لهذه البلاد .. لم يعد هناك شىء اسمه الجزائر أو تونس أو المغرب كانوا يطلقون عليها (Territoire Francais D'outre Mer) أى « أرض فرنسا عبر البحار » .. وكانوا يملكون كل حاجة تقريبا .. فين ببلا قال مافيش فائدة خالص أن نستقل ونستعيد حريتنا إلا بالثورة .. الكلام ده لعبد الناصر .. فعبد الناصر وافقه وقال له توكل على الله .. فقال له ما عندناش سلاح .. فقال له أقمسى ما يمكن من سلاح سوف أرسله إليك إما بالبر أو بالبحر .. وبدأت الثورة على هذا الأساس » .
- حضرتك كنت قلت لى إن كان هناك مراكب مصرية غرقانة فى الجزائر ؟
- « ٧ مراكب .. كان الفرنسيون عرفوا إننا نرسل السلاح .. وكان فى تونس فى ذلك الوقت

رئيس تونس اللي كان عندنا ورجع .. نرسل الشحنة يأخذ نصفها تقريبا .. طب يا أخى لو كنت أنت بتحارب مطهش .. لما جاء الاعتداء عليك فى بنزرت بعتنا جيشاً يحارب معك .. لكن دول ناس يقاتلون الفرنسيين .. الذين كانوا بيبنحوا الجزائريين نبخ .. تقوم أنت تأخذ السلاح ده ليه ؟ والبحرية الفرنسية تبيننت هذا .. فاضطررنا أن نرسل السلاح بالمراكب التجارية على اعتبار إنها شايلة بضاعة .. لكن الفرنسيين تبينوا هذا فابتدوا يغرقوا هذه المراكب .. وغرق لنا ٧ مراكب أمام ساحل الجزائر ..

• وأسأل أحمد سعيد : ماذا قلت وماذا تقول عن ثورة الجزائر ؟

• يجب أن نضع فى الاعتبار ما قلناه نحن لثورة الجزائر إحنا قلنا إيه لثورة الجزائر .. ثوروا لتتحرروا .. الجزائر لها طبيعة خاصة وكنا دائماً نكلمها من المنطلق الإسلامى .. لأن هناك فيه منطقة إسمها منطقة القبائل .. ودى منطقة ليست عربية الأصل .. وتسمى فى المراجع التاريخية منطقة البربر .. فكان لابد أن تكون جميع توجهاتنا ونداءاتنا إسلامية المنطلق .. فكانا نقول لهم ثوروا لتتحرروا وآيات قرآنية مثل ﴿ فَضَّلَ اللَّهُ الْمُجَاهِدِينَ بِأَمْوَالِهِمْ وَأَنْفُسِهِمْ عَلَى الْقَاعِدِينَ دَرَجَةً ﴾ .. وانتصروا وتحرروا بعد أن قدموا مليون شهيد .. وقدمت مصر تضحيات ضخمة على رأسها أجهزة مخابرات من مصر اشتغلت فيها .. إلى أن استقلت الجزائر ...

• ويقول الفريق سعد الشاذلى : « من المعروف أن مصر كانت تساعد وتؤيد ثورة الجزائر وتدعمها بالسلاح ... وبعد محدود من الأفراد .. الذين يقومون بتعليم الجزائريين .. مصر كانت فاتحة المدارس بتاعتها للجزائريين .. علشان يجوا يتدربوا هنا ويعودوا مرة أخرى » .

• نقصد حضرتك المدارس العسكرية ؟

• نعم المدارس العسكرية .. يعنى نقدر نقول إن المساعدة كانت فنية .. وإن جاءت بالسلاح ولكن لم نرسل مصر قوات مقاتلة إلى الجزائر .. هم لم يكونوا فى حاجة إلى هذا لأن عندهم المقاتلين .. بس هم كانوا عايزين الخبرة الفنية وعايزين السلاح ..

• وقدموا المليون شهيد ؟

• آه وقدموا مليون شهيد .. مليون ونصف .. الأول كان مليون وبعد ما حصروهم طلعوا مليون ونصف المليون شهيداً ..

• ويقول عبد اللطيف بغدادى : « الثورة كانت مهمة بحالة الأمة العربية ككل .. وكان لها دور كبير فى ثورة الجزائر فى تمويلهم بالسلاح .. وفرنسا لم تدخل حرب ٥٦ إلا علشان ثورة الجزائر .. علشان ضرب ثورة الجزائر فى مصر » .

• وساعدت الثورة المصرية العراق .. فى إلغاء الحكم الملكى فى سنة ١٩٥٨ .. وسقط حلف بغداد وقتل الملك فيصل والأمير عبد الإله ونورى السعيد ...

• **وتقول الملكة دينا :** « الذاكرة تخوننى .. ثورة العراق حصلت لما رجعت إلى مصر سنة ٥٨ .. وأعتقد مهما كان التغيير اللي حصل لصالح الشعب أو غيره .. ولكن لازم للتاريخ نقول إنه كان خطأ فادحاً بالطريقة التي قتل بها الناس » .

• **وماذا قال لك الملك حسين في هذه الفترة عن الرئيس عبد الناصر ؟**

• « أنا أتصور إنه كان وكنا جميعاً متحمسين لخير البلد .. ويعمل بتقدم وحماس .. وبعدين طبعا العلاقات اتغيرت وطرأت عليها غيوم وتباعد » .

• **لماذا طرأت هذه الغيوم زى ما حضرتك قلتي .. والوئام لماذا لم يستمر ؟ هل كان بسبب حلف بغداد ؟**

• « طبعا لأ .. لم تكن مؤيدى له .. هى حاجة انفرضت علينا وللأسف مع احترامى للأهل فى العراق .. لكن كانت حاجة فرضوها علينا جامد .. وبعدين الحمد لله إن جاءت بعدها فترات قومية » .

• **ويقول عارف عبد الرزاق :** « معركة ٥٦ سرعت بالثورة فى العراق خاصة بعد أن تمت الوحدة بين سوريا ومصر .. وكان الهدف الأول من ثورة العراق هو الدخول فى الوحدة العربية اللى بين سوريا ومصر .. باعتبارها دخول قطر ثالث إليها .. الضباط الأحرار فى العراق كانوا قبل هذا التاريخ .. الضباط كانوا يتحينون الفرص أن يظهروا للوجود .. لكن ثورة يوليو سرعت فى وجودها » .

• **ماذا تقول لنا عن نورى السعيد ؟**

• « نورى السعيد سياسى عراقى مخضرم .. يؤمن بمصلحة العراق .. لكنه يعتقد أن مصلحة العراق يجب أن تقترب بموافقة إنجلترا .. تخوفه من نفوذ الإنجليز وسطوتهم فى المنطقة جعلته يثق بهم للنهاية .. لكن ليس هناك شك أنه وطنى ويعرف مصلحته لكن بمقدار صداقته وتعاونه مع الإنجليز » .

• **وتولى عبد الكريم قاسم الحكم .. وبعد إعلان الجمهورية .. وجد الشيوعيون الفرصة سانحة لى يحلوا محل الغرب .. بعد استمالة عبد الكريم قاسم إليهم ...**

• **ويقول محسن محمد :** « حمل خروشوف فى مارس سنة ١٩٥٩ على القومية العربية ومصر ووصف الرئيس عبد الناصر بالزعيم الصغير » .

• **ويقول أحمد حمروش :** « أطلقت إذاعة عمان على جمال عبد الناصر ألفاظ (مجنون - عميل - فاروق الصغير - ديكتاتور - متآمر) وصحب ذلك اعتراف الملك حسين بنظام عبد الكريم قاسم فى ١٩٦٠ .. وشن عبد الناصر هجوماً على الملك حسين فى دمشق .. وقال يعتمد الاستعمار على الملك الأجير ويعتمد على حفنة قليلة من العملاء الذين يستغلون الشعب

ويجمعون الأموال .. ووقع الانفصال في ٢٨ سبتمبر ١٩٦١ وتبين أن بعض الضباط الذين قاموا به كانوا على صلة بالأردن ، .

• **ويقول د. مراد غالب :** جمال عبد الناصر بعد ٥٦ بعد الانتصار وبعد الوحدة مع سوريا .. كان يحرك جماهير الشعب كلها من الخليج إلى المحيط .. ونشأ صراع بين قائد شاب معتز بنفسه بانتصاراته وعنده طموحاته وأماله وبين زعيم معسكر بحاله وأحد رؤساء إحدى قوتين في العالم وزعيم الأحزاب الشيوعية في العالم كله .. وبالتالي كان فيه في الأول مش صراع .. مواجهة بين الشخصيتين .. المواجهة دى ازدادت أكثر من ٥٨ .

• **ويقول عارف عبد الرزاق :** عبد الكريم قاسم هو الأقدم في الجيش .. وشاف نفسه معزولاً من الرجل الثاني .. التي تقدم بالطلب عبد السلام عارف .. الشيوعيون التفوا حول عبد الكريم قاسم وقالوا إن هذا سيتغلب عليك ويجعلك في الصف الثاني .. وأنكر إن أنتوني ناتنج كان وزيراً للمستعمرات البريطانية .. جاء وحذر عبد الكريم قاسم .. وقال له إن الجماعة حيسبوا لك مثل ما أساءوا لمحمد نجيب .. وعبد الكريم قاسم تلقى رسالة من سفارة الجمهورية العربية المتحدة مؤرخة في ١٨ / ٧ أى بعد الثورة بأربعة أيام وأضيفت إليها جملاً لم تكن في أصل البرقية .. والذي أضاف الجملة هم الشيوعيون .. الظاهر كان عندهم مكتب استخبارات .. بتتلقى المخابرات من السفارة .. وأضافوا هذه الجملة « أن الجماعة يبيتوا لك للخلاص من عبد الكريم قاسم .. فهنا حدث الانشقاق .. وجاء الشيوعيون وكسروا موجات الوحدة .. وأعلنوا نحن ما نريد وحدة بل اتحاد فيدرالى .. لم يكونوا يؤمنوا بالوحدة ولا بالاتحاد الفيدرالى لكن حتى يكسروا الموجة .. يعنى أعتمد الأطعمة الشخصية بين الشخصيتين هي التي قادت إلى الابتعاد » .

• **ويقول أحمد حمروش :** دخلت العلاقات مع الاتحاد السوفيتي في مرحلة فتور .. خروشوف يقول « لا تبصق في بئر قد تحتاج إلى مياهه » .. واستأنفت أمريكا مساعداتها الاقتصادية لمصر .. وعادت العلاقات مع بريطانيا » .

• **ويقول طارق البشري :** « في ختام عام ١٩٥٨ بادر حسين عرفة فور سماعه هجوم عبد الناصر على الشيوعيين في خطبته في ٢٣ ديسمبر باعتقال الضباط ذوى الميول اليسارية قبل أن تصدر إليه أوامر بذلك » .

• **ويقول عبد المجيد فريد :** « وبعد أشهر زاد نشاط الشيوعيين في بغداد وبدأ يؤثر على العلاقات القومية ما بين مصر ومندوبيها وبين القيادة العراقية .. وتصور الشيوعيين في ذلك الوقت أنه يمكن يبقى الاتحاد السوفيتي بدلاً لعبد الناصر .. تحركوا من القاهرة إلى بغداد .. والثورة العسكرية ما عندهاش مساندة في الشارع فهم أعطوها المساندة من الشارع .. مظاهرات في الشارع .. لوح .. هتافات شعبية .. فطبعاً أخذت مساندة من الشارع .. واستمرت علاقتنا لعدة أشهر .. بعدها ساءت العلاقات .. وحصلت ثورة داخلية « ثورة الشواف » ساندوها .. واتحاکم

هناك في العراق .. وعندنا من بغداد قعدت سنة أشهر .. ثم توليت منصب أمين عام رئاسة الجمهورية » .

• ويقول عبد اللطيف بغدادى : « كنا نسعى أن العراق تنضم إلى سوريا وتبقى وحدة عربية شاملة .. وعبد الكريم قاسم كان ضد هذا .. سيطر عليه الشيوعيون وحدث صدام بيننا وبينهم » .

• وفي هذه الأثناء .. وكما وقع خلاف بين ناصر وبعض زملائه .. وقع الخلاف بين ناصر وعامر بعد أن قرر ناصر تكوين مجلس للرئاسة ...

• ورفض عبد الحكيم مجلس الرئاسة شكلاً وموضوعاً .. وقبل عبد الناصر الأمر الواقع .. وهذا الصراع بين الرجلين ...

• ويقول محمد فائق : « فى ٦١ بعد الانفصال عن سوريا .. كان حصل أزمة فى داخل مجلس الرئاسة وقتها ... وانفرد عبد الحكيم عامر بالجيش تماماً وأغلق الجيش عليه .. لدرجة أنى سمعت الرئيس عبد الناصر نفسه بيقول هذا الكلام : بأعتقد إنه حصل إنقلاب جزئى .. كان المفروض يعنى عبد الناصر كان عاوز أن التعيينات فى القيادات كلها تتم بمجلس الرئاسة وكان عاوز يعمل تغييرات جذرية فى قيادات الجيش .. وعبد الحكيم عامر غضب وقعد فى الصعيد .. وبطبيعة الحال كان الوضع دقيقاً جداً وكان ده يعتبر نوع من الانقلاب الجزئى لعبد الحكيم عامر .. وبطبيعة الحال الموضوع ده طال شوية ولم يعالج العلاج الحاسم فى وقتها لأسباب كثيرة .. كان فيه أسباب كثيرة جداً » .

• وأسأل الفريق أول مرتضى : أساس الخلاف بين المشير وبين عبد الناصر ؟

• « كان الأساس كله إن مجلس قيادة الثورة كان عاوز المشير لا يدخل فى أى مهمة تنفيذية .. المشير كان القائد العام للقوات المسلحة .. وعبد الناصر هو الذى كان يقول لى هذا الكلام .. فبعد ما وافق المشير على هذا الإجراء أن هو ما يقلش دعوة بالقوات المسلحة .. رجع تانى فى كلامه وأصر على إنه يستمر قائداً للقوات المسلحة .. ده السبب » .

• ثم عاد المشير ؟

• « آه عامر رجع فى كلامه وقال أنا لا أترك القوات المسلحة .. علشان كده عبد الناصر عمله علشان يغطى هذا الموضوع نائب القائد الأعلى .. وليس قائد القوات المسلحة » .

• ويقول محمد أحمد : « هو لما كان عمل مجلس الرئاسة بعد الانفصال .. وعلشان عبد الحكيم عامر يترك الجيش .. والثانى غضب وراح إلى مرسى مطروح .. وبدأت المشاكل .. وهو كان حريصاً على عدم حدوث أى انقسامات أو مشاكل فى الجيش بالذات » .

• وأسأل د . الجوهري : حضرتك ذكرت فيما ذكرت « قرارات مجلس الرئاسة كانت حبراً على ورق لأنها كانت تصدر بالتمرير » ؟

• « هذا صحيح .. الحقيقة القرارات بتاعة مجلس الرئاسة كانت بتتعمل فى إدارة شئون الضباط .. وكان فيه مجموعة منهم طلعت خيرى بتاع الشباب .. القرارات بأخذوها يمرروها على الأعضاء .. اللى يوقعوا عليها .. ماحصلش اجتماعات فى مجلس الرئاسة » .

• ويقول أحمد حمروش إن زكريا محبى الدين قال له : « مجلس الرئاسة كان تشكياً يستهدف إبعادنا عن السلطة التنفيذية الفعلية .. وإنه لم يتحول أبداً إلى قيادة جماعية » .

• وأسأل عبد المجيد فريد : هل كان الرئيس يعلم كل شىء .. ولا بعض الأشياء كانت مخفية عنه ؟

• « الرئيس قال لعامر أحنأ دلوقت فات على الثورة ١٠ سنوات .. ففى رأى أن موضوع القيادات العسكرية نجيب فيها ناس فنيين لهذا الموضوع .. إحنا نبقى سياسيين .. مننيين فقط .. بما فى ذلك وزير الحربية .. بمعنى إن المشير عامر .. لا يبقى وزيراً للحربية لكن مسئولاً مننياً فى داخل الحكم .. نائباً للرئيس .. إنما لا يقود التشكيلات والقيادات العسكرية .. المشير عامر فى ذلك الوقت اعتبرها إنه بيجاول يزحلقه فزعل .. كان فيه اجتماع لمجلس الرئاسة وكان طلب منى الرئيس عبد الناصر كسكرتير الاجتماع أن أحضر قراراً جمهورياً يحد من سلطة وزير الحربية والقائد العام .. فى الترقية وتولى المناصب القيادية الكبرى .. بمعنى رتبة عقيد فقط فما فوق تبقى سلطة مجلس الرئاسة .. اعتبرها المشير سلباً لسلطاته وغضب ومشى وبعدى حصل فترة كان فيه انفصال ما بين القائد العام ووزير الحربية والجيش ورئاسة الجمهورية .. أحس عبد الناصر ذلك من بعض المعلومات وبعض الاتصالات .. وبدأ الزملاء اللى فى مكتب عبد الحكيم عامر يوصلوا إلى التشكيلات العسكرية يقولوا لهم لو حصل خلاف بين عبد الناصر وعبد الحكيم إنتم حبيبوا فىن ؟ تكررت فى المنطقة المركزية .. وتكررت فى المنطقة الشمالية .. تكررت فى منطقة أسبوط من القيادات العسكرية .. فهنا الرئيس خاف على أن تحدث حرب أهلية لو استفحل هذا العداء .. فوطى رأسه وقبل ما طلبه عبد الحكيم عامر بأن يبقى الوضع كما هو ويبقى هو المسئول الأول والأخير .. ومنذ هذه اللحظة بدأ لا يعرف كثيراً عن الجيش .. لأنه كان هذا من ضمن شروط عبد الحكيم فى ذلك الوقت .. إن المعلومات من الجيش ما تجيش إلا عن طريقه .. فهو المسئول وهو اللى يعطيه المعلومات » .

• ويقول الفريق أول محمد فوزى : « فى مجلس الرئاسة وقت ما الرئيس عبد الناصر وزملاؤه كانوا عايزين يخلوا لمجلس الرئاسة شيئاً من الكيان من ناحية السلطة بأنهم يعينوا القادة الكبار للقوات المسلحة .. بدأت الأزمة .. من الصعب الشعب يعرف هذه الأحداث ولا القوات المسلحة تعرف حاجة من الاثنين .. بالرغم من إنهم كانوا أصدقاء جداً .. طبعاً » .

• وأسأل أمين هويدى : هل كان هناك صراع على السلطة بين القادة ؟

• « أنا سأقول لك حكاية .. مرة لما مات الرئيس عبد السلام عارف أنا كنت وقتها وزيراً للإرشاد .. الرئيس عبد الناصر كلمنى فى التليفون الساعة ٧ صباحاً .. وكان الرئيس

عبد السلام راكباً طائرة وقيل إنها تاهت أو أن العاصفة حجزتها .. الرئيس قال لى إيه أخبار طائرة عبد السلام ؟ قلت له الأخبار حتى الآن مش واضحة .. الرجل قال لى .. يا أمين .. عبد السلام مات وشبع موت .. وصوته إنكسر .. وكأنه كان يبكى على الطرف الآخر من الخط .. وقال لى فوت علّى لأنك سوف تسافر مع عبد الحكيم فى بعثة علشان التعزية .. فت عليه قبل الميعاد اللى كان مخصصاً للمشير بنصف ساعة .. تكلمنا وقال لى اللى هو عاوزه .. جاء الموعد بتاع المشير ولم يحضر .. حببت أستاذن من الرئيس قلت له أسبق على المطار .. قال لى ما إنت قاعد شوية .. فات عشر دقائق .. ربع ساعة .. ثلث ساعة .. نصف ساعة ولم يحضر المشير .. الرئيس قام ولونه كان متغيراً وقال لى يأخى .. المشير حتى المواعيد أصبح لا يحترمها .. شىء غريب .. عبد الحكيم اتخذ سياسة بعد الانفصال الذى تسبب فيه .. بإینه حجب أى تدخل من أى جهة داخل القوات المسلحة .. وأنا أؤكد أن الرئيس عبد الناصر لم يكن قادراً على أن يبذل أى جهد أو يتخذ أى إجراء ضد القوات المسلحة .. تقول لى هل يصح هذا .. حاقول لك لا .. من المسئول على أن يوصل الأمور إلى هذا الكلام .. أقول لك الرئيس .. ما كان يجب عليه أن يسمح لقائده فى القوات المسلحة أن يفرد بالقوات المسلحة بهذا الشكل ..

● ونادت مصر بالقومية العربية من المحيط إلى الخليج ..

● وكما ساعدت مصر العراق والجزائر .. ساعدت أيضا المغرب ..

● ويقول حسن فهمى : « إحنا ساعدنا المغرب فى بعض النواحي .. أسلحة للقطاع الشمالى .. ومن حسن حظ المغاربة أن الأسباب كانوا يحتلون الجزء الشمالى والمنطقة الجنوبية .. والفرنسيين فى الوسط .. السلطان فى الرباط .. ونائب السلطان فى المنطقة الشمالية فإحنا أرسلنا سلاحاً .. وأرسلنا ضابطاً اسمه عاطف عبده سعد .. قعد معاهم علشان يعملوا حركات ضد الفرنسيين .. وكان زميلى أحد الضباط الـ ١٩ اللى اتقبض عليهم معى .. لكن المغاربة قاموا بثورة كبيرة بيسموها ثورة الملك والشعب ضد الفرنسيين .. حتى لما قامت حرب ٥٦ وإسرائيل هجمت على مصر .. جاء بعض المغاربة ووقفوا معنا وذبحوا كام واحد .. »

● وأسأل أحمد سعيد : لو رجعنا بالذاكرة للوارع ماذا تقول لنا عن ما قلته أيام زمان عن نفى الملك محمد الخامس من المغرب ؟

● « أتذكر شيئاً مهماً جداً .. عندما قامت الثورة قررت أن نعمل برنامجاً .. يعبر عن وجهة النظر العربية الثورية والتحررية والوحدوية .. بدأ البرنامج تقليدياً لمدة نصف ساعة يومياً .. يعنى مواد تقليدية .. إلى أن فوجئنا بعد شهر من بداية صوت العرب وإحنا لسه نصف ساعة .. فوجئنا إنه حصل صدام بين مستعمرة فرنسا اللى فى المغرب .. وبين الملك محمد الخامس .. وإن الملك محمد الخامس رفض المطالب الفرنسية لدرجة إنهم عزلوه وعرضوا العرش على ابنه الحسن .. الملك الحالى .. ورفض الحسن أيضاً هذا رغم صغر سنه .. وعدم إدراكه الوضع السياسى بصفة عامة .. فكانت النتيجة محمد الخامس وإبنه ومراته وولاده وبناتهم إنشالوا هيلاً بيلا أرسلوهم إلى المنفى فى المحيط الهندى .. وإحنا بنقول إننا إذاعة ثورية وحدوية تحررية

فوضع طبيعى إننا نعبر عنها .. وهذا محسوب للحقبة الناصرية فى المنطقة العربية لأن عبد الناصر اعتبر فى العالم زعيماً للمنطقة وأصبح له تأثيراً فى دول إفريقيا .. ودول آسيا .. ودول أمريكا اللاتينية .. وخرج عبد الناصر من تحت العباءة المصرية .. إلى العباءة العربية .. إلى العباءة الإفريقية .. إلى العباءة العالمية .. فهذا أهم حدث .

• ويقول أمين هويدى : « بوجه عام أنا أعتقد أن الخدمة فى جهاز المخابرات العامة .. هى من أشرف الأعمال والمسئوليات التى التى إلى ويمكن لمواطن أن يتحملها .. وأنا أعتبر نفسى أحد الذين بنوا هذا الجهاز من أوائل نشأته وتدرجت فيه إلى أن وصلت لرئاسته .. حدث وزى ما قلت .. أنا أقول إن المخابرات العامة قامت بأعمالها فى البلاد العربية .. يعنى مثلاً أول من اكتشف المفاعل النووى لديمونة بتاع إسرائيل كان المخابرات العامة المصرية وإحنا اللى اكتشفناه » .

• وأصبحت مصر .. تتزعم الدول العربية .. وأصبح ناصر زعيم العرب ..

• وأسأل حافظ إسماعيل : ألم يكن يريد الرئيس عبد الناصر كما يقول البعض أن يصبح زعيماً لكل العرب ؟

• « عبد الناصر كان زعيماً لكل العرب شئنا أو لم نشأ .. وكان زعيماً حياً أو ميتاً .. لأنه تحدى النظام الحاكم للمنطقة ولم يكن يريد أن يتغلب على الملك فيصل أو إمام اليمن .. كان يريد الزعامة بمعنى أن تصبح الهيمنة فى المنطقة العربية للإرادة العربية .. ولكن ترجمة هذا إلى أفعال فى عالم تسيطر عليه أمريكا .. ثم روسيا .. كان عملية صعبة جداً .. إن الحقيقة إن العرب كانوا يحترموا عبد الناصر ... حتى لما يكرهوه .. فيه احترام شديد جداً .. وكانوا يريدوا الشخص القوي اللى يستندوا إليه .. وفى نفس الوقت ما يتبعهوش » .

• ويقول أمين شاكر : « أيوه إحنا عملنا الحزب الوطنى الاشتراكى .. وعملنا له قواعد فى السودان .. وانتخابات برئاسة إسماعيل الأزهري ودى اللى أثارت علينا حزب الأمة .. ويعدين سوريا .. ويعدين العراق .. ويعدين السعودية ويعدين المغرب .. لإنك عارف إن الفرنسيين كانوا عاوزين يخلطوا الملك محمد الخامس من على المركب وإحنا نزلناه فى السويس .. ويعدين تونس وعدوان بنزرت .. وثورة الجزائر » .

• ويقول خالد محبى الدين : « هو كان فى أعماقه إن مصر لا تقدر أن تعيش بدون سياسته .. وهو يمارس هذه السياسة سواءاً كانت صحيحة أو خاطئة فى جرة .. والصدمات كان يمكن تجنبها ولكن هذه قصة ثانية .. ولكنه كان مقتنعاً أن مصلحة مصر مع مصلحة الأمة العربية أمناً .. اقتصاداً .. سياسة .. وأن مصر قيمتها فى أنها قيادة .. والا ٣٠ مليون مصرى هم اللى يبقودوا لأن دورهم قيادى فى الأمة العربية » .

• وأسأل أحمد كامل : يقولون تدخل الرئيس عبد الناصر فى شئون الدول العربية كان أحياناً لمصلحة الدول العربية .. وأحياناً أخرى لمصلحته الشخصية .. هل هذا الكلام صحيح ؟

• « لا .. الكلام الصحيح إن عبد الناصر كان يتدخل في الشؤون العربية أحيانا .. دفعاً للاستعمار بعيداً عن الدول العربية .. ولو نظرنا إلى الخريطة قبل ٥٢ .. وشفت الاستعمار الفرنسي والبريطاني في كل الدول العربية وحتى الإفريقية ستجد أن شكلها تغير بعد عبد الناصر كثيراً جدا » .

• وأسأل لطفی واکد : حضرتك قدت إنقلاباً ضد عبد الناصر .. ألهذا سجنك ؟

• « أنا عمرى ما قدت إنقلاباً ضده .. ولا كنت أرضى أن أشارك في إنقلاب ضده .. أنا كنت بأعمل إنقلاباً لمصلحته » .

• اللی هو إیه ؟

• « اللی هو أنا أنبهه دائما إلى مخاطر الديكتاتورية .. إذا كانت المسائل كانوا ببوصلوها خطأ .. تبقى الأجهزة هى المسئولة إلى درجة تصويرها بالتآمر .. هو من المؤكد إنه كان متأكداً إن مافيش تآمر » .

• فی أى فترة یافندم ؟

• « ٦١ بعد انفسال سوريا مباشرة » .

• وحوکمت وسجنت ؟

• « حوکمت فی محاكمة مع الدجوى .. وكان متخصصا فی إصدار الأحكام الباطلة ويحلف على المصحف ويحكم ضده .. فأنا أعطاني ١٥ سنة ما قعدتش منهم غير ٢٧ شهر وخرجت .. وأنا فضلت صديقاً حقيقياً له حتى جئنا بعد الوحدة .. بدأت الصداقة تتحول إلى علاقة رئيس بواحد مرؤوس .. إنما قبل كدة كانت علاقة اثنين من الأصدقاء .. كانت عملية تجريده من الصديق دى قضية مؤامرة ضده .. فالإنسان لا يستطيع أن يكون مستقراً نفسياً وليس له صديق » .

• ویقول حلمی سلام : « تدخل عبد الناصر كان دائما من أجل تحرير الدول .. وهذا يحسب له » .

• وحدث خلاف جزائری مغربی على الحدود .. كما حدث خلاف عراقی کویتى ...

• ویقول سامی شرف : « لما عبد الكريم قاسم وهو نظام جمهورى .. بغض النظر إنه كان شيوعياً ده مش موضوعنا .. لما حاول يعتدى على الكويت جمال عبد الناصر .. لم يتردد أن يدافع عن الكويت .. الحكم الملكى » .

• كان إمتی یافندم ؟

• « بعد سنة ٦٠ .. وراح إبراهيم عبد الغفور العرابی اللی هو كان رئيساً لأركان القوات المصرية أيام حرب الخليج .. قائداً لكتيبة المدرعات اللی راحت دافعت عن الكويت .. ضد محاولة

عبد الكريم قاسم .. فالمسائل دى لم تكن تؤخذ بشكل شخصى ولم تكن مزاجية .. لكن كانت مبدأ .. المبدأ حاليه فى كلمتين .. « نحن مع التحرر » .

• وأسأل الفريق سعد الشاذلى : واشتركت قواتنا المصرية العسكرية فى العراق .. ماذا نتذكر عن هذا ؟

• « أرسلت كتيبة إلى العراق لإن كانت فيه مشكلة أثّرت بين العراق والكويت .. وكان هناك تهديد بالتدخل الغربى فى هذه العملية .. فى هذه البقعة .. جمال عبد الناصر سبق الأحداث بأنه قال إن الموضوع يسوى عربيا .. وأرسل قوة كتيبة على ما أذكر بس أنا لم أكن موجوداً فى القاهرة كنت ملحقاً عسكرياً .. أرسل قوة إلى العراق علشان تشرف على هذه المنطقة .. وتمنع التدخل الأجنبى » .

• وساعدت مصر دول القارة الإفريقية مساعدة كبيرة .. وكانت بصماتها واضحة فى كل من كينيا .. وتجانينا وزنبار .. وفى محاربة الانفصال فى نيجيريا .. ودعم الحكم الجديد فى الكونغو ...

• ويقول د . حاتم : « الشعب المصرى بطبيعته إنه يقول نكت ولو على نفسه .. لأنه يحب النكتة .. وهذه طبيعة من قديم الزمان .. فكان مثلاً نتيجة الإذاعات الموجهة كان عندنا إذاعات موجهة لجميع أنحاء إفريقيا .. ٣٤ لغة .. كل يوم تطلع ثورة نتيجة الإذاعات المصرية الموجهة .. ثورة فى غينيا وكنت أنا المتحدث الرسمى .. فيقولوا صرح عبد القادر حاتم بأن الحكومة المصرية تؤيد ثورة غينيا .. تانى يوم ولا ثالث يوم تقوم ثورة فى غانا .. صرح فلان الفلانى بأنه يؤيد كذا .. وهكذا كل دولة إفريقية .. وكانت الثورات مستمرة .. ففى يوم من الأيام كان فى فيلم اسمه « ثورة على السفينة باونتى » فقالوا صرح عبد القادر حاتم بأن ثورة مصر تؤيد الثورة على السفينة باونتى !! »

• وأسأل د . مراد غالب : ووقفت مصر إلى جانب أكثر من حركة تحريرية أخرى فى إفريقيا ؟

• « مصر كانت مركزاً لتحرر إفريقيا .. وكل الزعماء الكبار الللى إحنا بنشوفهم لا ينسون مصر .. ولا ينسون جمال عبد الناصر .. ولا ينسون الأستاذ محمد فائق .. وأنا بأقول وبأفتخر به لأنه كان المسئول عن الشؤون الإفريقية .. وهو كان حلقة الوصل بين الرئيس وبين إفريقيا .. أحدهم مثلاً يكى مرة وهو يتكلم علينا .. قال بعد ٦٧ نحن لا ننسى جمال عبد الناصر .. مصر كانت بتعلب دوراً مش بس فى إفريقيا .. يمكن فيه ناس ما يعرفوش إن الثورة المصرية كان لها تأثير كبير جداً فى العالم الثالث كله ولها تأثير حتى فى أمريكا اللاتينية .. وكانت مجموعة من الضباط فى الأرجنتين كانت مسمية نفسها « ناصريزم » بالنسبة إلى عبد الناصر .. دى كانت مجموعة من الضباط الأحرار .. عاوز أقول إن الثورة أعطت الكثير لحركات تحرير إفريقيا .. وكانت نموذجاً بالنسبة للعالم الثالث فى التطور السياسى والاجتماعى .. وخصوصاً فى معركة الحرية » .

• **ويقول تحسين بشير :** « مصر كانت تؤيد تأييداً سياسياً الحركات الجديدة .. فكان الوفد المصرى فى نيويورك .. وكان يستقبل زعماء الحركات السياسية اللى بعد كده أصبحوا زعماء الدول .. ولما كانوا يبيجوا إلى مجلس الوصاية ويتقدموا بطلبات يطلبوا الحرية وإحنا كنا بنساعدهم سياسيا .. وكان الرجل المختص بالعملية دى فى مصر وفى إفريقيا السيد محمد فائق .. وكان يقوم بعمله بكفاءة شديدة جدا .. وكانت الأجهزة المصرية بتساعدهم دون أن تعلم عليهم أى شئ » .

• **يقول محمد فائق :** « كنت فى الرئاسة .. كنت مدير مكتب رئيس الجمهورية للشئون الإفريقية لكن كنا بنجد إنه من المهم أن نعمل علاقات ومصالح اقتصادية ونناجر مع إفريقيا .. فيه عقبات صغيرة جدا لا يمكن تمشى مع الروتين العادى .. لازم ينكسر هذا الروتين .. وأنا كنت بأحاول أكسر هذا الروتين .. مثلا « شركة النصر » لما بعثناها إلى إفريقيا .. تأخذ عملية التجارة مع إفريقيا كلها .. فكنا بتدعمها بهذا العمل فاستطاعت أن تلعب دوراً مهماً جداً حتى فى تسويق البضائع الإفريقية .. مش بس لها .. ولكن العمليات الأخرى .. بإعتبار شركة النصر كان لها مكاتب فى كل أنحاء العالم .. وباعتبار إننا كنا فاتحين على الكتلة الشرقية وما كنش أى بلد من دول تستطيع أن تتعامل معها .. فكان المهم لإيجاد مصالح مشتركة مع الأفارقة باستراتيجية معينة .. إحنا نحاول أن ندعم هذه الدول من غير أن نتدخل فى شئونها أيضاً » .

• **ويقول جمال حماد :** « كانت شركة النصر للاستيراد والتصدير بمكاتبها المختلفة فى إفريقيا متعددة الأغراض » .

• **وأسأل سعيد حليم :** هل كانت فيه أموال مرصودة لتأمين الثورة وكان فيه شركات تتكون لأغراض سياسية ؟

• **هو المفهوم خاطيء ..** المعروف إن أى جهاز مخابرات فى العالم لا يمكن للحكومة أن تمول نشاطاته وبالتالي أداء عمله .. بيسموها محطات .. إن أنا أعمل مثلا شركة يبقى فيها أفراد المخابرات من الخارج علشان تغطى إن هؤلاء مخابرات .. وهى شركة تجارية .. إنما لم يكن أصلا الهدف منها الربح .. بل هو تغطية لعمل المخابرات .. ومع هذا عملية إنشاء الشركات لتغطية أعمال المخابرات دى موجودة فى كل العالم .. يعنى مثلا شركة شل فى مصر زمان كانت للإنجليز » .

• **كانت شركة إيه بالنسبة لنا إحنا ؟**

• **مش فاكسر بس اللى أعرفه إن مثلا فيه مكاتب تجارية اتعملت فى بعض الدول الشرقية .. حتى عملية « الحفار » .. كان مندوب الشركة هو اللى كان أصلا بيعمل فى هذا الموضوع » .**

• **وأسأل الفريق سعد الشاذلى :** كنت قائداً للقوات المصرية التى شاركت فى الكونغو بالتحديد ؟

• **فى هذا الوقت كانت هناك وحدة بين مصر وسوريا .. وعندما وافق جمال عبد الناصر أن**

يرسل قوات تحت علم الأمم المتحدة اختاروا كتيبة مظليين مشتركة من المصريين والسوريين .. وكانت تسمى الكتيبة العربية بالكونغو .. وكنت أنا القائد لها .. هذه الكتيبة كانت مكونة من حوالي ثلاثين من مصريين .. والثلاث سوري .. وذهبنا إلى هناك .. وكان في هذا الوقت الحكم في يد لومومبا وكانت اتجاهات لومومبا كقائد ثوري تتماشى مع اتجاهات عبد الناصر .. ولكن بعد أن مكثنا هناك بضعة أشهر حدث انقلاب موبوتو .. وكان موبوتو معادياً للسياسة المصرية .. ومن هنا خلال هذه الفترة كانت هناك مشاكل بينى كقائد للكتيبة العربية وبين قيادة الأمم المتحدة .. هذا من ناحية .. ومن ناحية أخرى العلاقة بين الكتيبة والقوات الكونغولية .. قعدت هناك حوالي ٧ أشهر .. وعندما اشتد الخلاف بين جمال عبد الناصر من ناحية وبين القيادة الزائيرية أو القيادة الكونغولية في هذا الوقت تقرر سحب القوات .. وحصل خلال هذه الفترة ما كان له أثر على العلاقة بينى وبين أحمد إسماعيل الذى عين فيما بعد ذلك وزيرا للحربية وقائداً عاماً للقوات المسلحة .. فى خلال المرحلة الأولى لما كانت العلاقة طيبة بين مصر وبين الكونغو .. طلب لومومبا إرسال بعثة مصرية لتقوم بالإشراف على تسليم الجيش الكونغولى .. وعين أحمد إسماعيل فى هذا الوقت رئيساً لهذه البعثة .. وكان برتبة عميد وأنا كنت وقتها قائداً للكتيبة عقيد .. فلما وصل أحمد إسماعيل إلى الكونغو وحصل الانقلاب بتاع موبوتو وأصبحت عملية البعثة المصرية مرفوضة رفضاً باتاً - أصبح أحمد إسماعيل فى الكونغو بدون عمل - فحاول أن يجد لنفسه عملاً بدير بقاءه فحاول أن يتدخل فى شئونى كقائد للكتيبة العربية بصفته إنه عميد وأنا عقيد .. قلت له لا إنت جاي فى مهمة ... وأنا هنا قائد القوات ورفضت هذا .. واشتد الخلاف بيننا ، .

• ويقول أحمد حمروش : لم يتردد جمال عبد الناصر فى مساعدة لومومبا .. وثوار الكونغو .. وجعل من القاهرة مقراً لحركات التحرر الإفريقية ، .

• ويقول د . مراد غالب : « وقتت إفريقيا معه أو معظم الدول الإفريقية .. وطبعاً آسيا أيضاً .. الهند والصين وقوا أيضاً مع لومومبا .. وبالتالي كانت معركة كبيرة جداً .. ماقعدناش مدة طويلة فيها لأنه أخرجونا من الكونغو بعد لومومبا بعد ما قبضوا عليه .. لأنه هرب من مكانه .. لكن إحنا استطلعنا على كل حال - وأنا أقدر أقولها دلوقت - تهريب أولاد لومومبا وزوجته بعد كده .. وطبعاً ده خلاهم يشيطوا غضباً .. لأننا استطلعنا إن إحنا نهربهم تحت أعين المخابرات البلجيكية والأمريكية .. وكان معى المشير أحمد إسماعيل كمستشار عسكري فى السفارة .. وكان معى مجموعة كبيرة من الضباط على جانب كبير من المعرفة والدراية .. منهم من أصبحوا سفراء زى مدوح مصطفى حنفى .. فنول كانوا معى فى الكونغو .. كانت معركة واترعضنا فيها لهجمات بالأسلحة المختلفة .. وأنكر إنهم هاجموا السفارة ودخلو المكتب بتاعى بالسنتكى ولكن استطلعنا إن إحنا نفلت من كل هذا ، .

• وانتهجت مصر (عبد الناصر) الطريق الاشتراكى ...

• ويقول د . عبد العظيم رمضان : « ترتب على الطريق الاشتراكى تغيير مفردات الوحدة ..

وهى التى عبر عنها عبد الناصر بتعبير « وحدة الهدف قبل وحدة الصف » .

• **ويقول د . حسن عباس زكى :** « الواقع إن فعلاً بالنسبة للدول العربية النظام الاشتراكي لا يناسبها .. لأنه نظام ما يتماشى مع تفكيرنا الإسلامى ده من ناحية .. بعض الدول ترى أن هذا النظام فيه بعد عن الأسلوب والتقاليد والعادات فى حرية التجارة وحرية التحولات وحرية أن يختار الإنسان لنفسه أى شىء وإن ده فيه تدخل أكثر مما يلزم .. وبعدين فيه خوف أن تطالب الطبقات الكادحة فى هذه الدول - وهى طبقات لها قوتها - بحقوقها إن هذا النظام يؤثر فيهم .. النقطة المهمة أيضا إحنا لازم نسلم مثل علشان إحنا مصريين يعني .. إن ما يسرى فى مصر يؤثر على المجتمع العربى كله .. مصر تبقى اشتراكية .. المجتمع العربى يميل إليها .. ولذلك بعد كده تلاقى سوريا والسودان وليبيا تحولوا .. وتلاقى إتحادات كثيرة حصلت فى إفريقيا .. لأن عبد الناصر كانت له قيادته الحقيقية وكان له اسم .. والناس كانت بتطمئن إلى الخطط التى يضعها .. فهذه أثرت طبعاً على الدول العربية وما كانتش مستريحة لهذا الوضع » .

• **وأصبح من العسير إقامة وحدة بين مصر وأى دولة عربية لا تأخذ بالنظام الاشتراكي ...**

• **ويقول محمد فائق :** « هذا لا يمنع إن الوحدات التى تمت كانت نموذجاً جيداً .. لأنها ما فيش شك حلت بعض مشاكل هذه الأقطار .. لكن كان فيه اعتقاد إن الوحدة علشان تتم وتبقى .. لا بد إن مثلاً من توحيد الجيش .. التوحيد الثقافى .. التعليم .. الخ .. لكى تبقى الفكرة قائمة معنى .. قد تختلف الأساليب .. طول عمرنا بنقول إن الوحدة بتديك قوة ما فيش شك » .

• **ويقول عبد الرحمن البيضاني :** « الخطأ كان فى التدخل فى الشئون الداخلية للدول العربية الأخرى .. وأعتقد أنه عندما ينادى بالوحدة العربية فلا بد أن يهاجم العناصر التى تعارض الوحدة العربية .. لكن الخطأ الأكبر فى نظرى أو الخطأ الوحيد .. إن الدعوة إلى الوحدة السياسية سبقت الدعوة إلى التكامل الاقتصادى العربى .. كان المفروض أن تبدأ الدعوة بالتكامل الاقتصادى العربى .. يعنى لا حل إلا أن نوحّد الاقتصاد العربى طبقاً لاتفاقية الوحدة الاقتصادية التى وقعناها فى أبريل ٥٣ فى « بعمدون » فى لبنان .. كنا ٧ دول وقعنا هذه الاتفاقية للتبادل والتعريفية الجمركية .. لو تكاملنا اقتصادياً .. التكامل الاقتصادى سيفرض التكامل السياسى وليس العكس .. ولذلك .. الخطأ الوحيد إننا بدأنا بالتكامل السياسى والوحدة السياسية وحاربت التكامل الاقتصادى بالاشتراكية والتأميمات وما إلى ذلك .. مع احترامى لكل ما حدث فى مصر .. لكن هذا رأى الشخصى » .

• **وأسال حسين الشافعى :** يقال إن الثورة بدأت تتدخل فى شئون الشعوب المجاورة .. ودخلت فى معارك كلفت المصريين الكثير .. ما رأيك ؟

• **« شوف يا طارق .. اللى إيده فى النار مش زى اللى إيده فى الماء .. ودى تبقى التقديرات اللى ما يقدرش عليها إلا اللى حاسس بالمسئولية الكاملة لأن إحنا كبدا لها تاريخها .. وأنا بأعتبر إن مصر دى المكان القائد فى العالم العربى إذا ما كانتش أهلها على مستوى القيادة فى دورات**

الزمن فلا بد وأن تتصارع أقوى القوى ليكون لها موضع قدم في هذا المكان .. هي جعبة السمها .. كنانة الله في أرضه .. من مسها بسوء قسم الله ظهره .. ولما يقول الرسول ﷺ : « إذا فتح الله عليكم مصر فاتخذوا منها جندا كثيفا فإنهم خير أجناد الأرض » .. فيسأله أبو بكر لماذا هم خير أجناد الأرض يا رسول الله ؟ .. فيقول : « لأنهم هم وزوجاتهم في رباط إلى يوم القيامة » .. رباط اجتماعي .. فلازم يكونوا حملة سلاح لأنهم في المكان القائد .. هذا قدرنا .

• أدى ذلك إلى إنقسام العالم العربي إلى قسمين .. قسم يتبع المنهج الاشتراكي ويعتمد خارجياً على الاتحاد السوفيتي .. وقسم يتبع النظام الرأسمالي ويعتمد سياسياً على الولايات المتحدة الأمريكية .. وهددت الجمهورية العربية المتحدة بالانسحاب من مؤتمرات القمة وكانت حرب اليمن إحدى ظواهر هذا الانقسام ...

• ويقول محسن محمد : « في أواخر سنة ١٩٦١ هاجم الإمام أحمد القوانين المصرية الاشتراكية وانتقدتها في قصيدة .. فأعلن عبد الناصر حل اتفاقية للدفاع مع اليمن .. وبدأ الإعلام المصري بهاجم الإمام » .

• وكانت اليمن تعيش في العصور الوسطى عندما قامت بها الثورة التي دعمها عبد الناصر ...

• ويقول عبد اللطيف بغدادى : « حرب اليمن جاءت صدفة .. للحق وللتاريخ .. وأول طائفة نزلت في تاريخ حياتها كنت أنا سنة ٤٨ مع ثورة الوزيري وقالوا بعثوا وفتين للجامعة العربية .. وأنا اللي رحلت بالوفد ده .. كنت عارف طبيعة اليمن .. عصر ما قبل التاريخ .. وحصلت ثورتهم .. كان أنور السادات يعرف البيضانى .. وعن طريق البيضانى قالوا يظهر حيحصل ثورة في اليمن غير ثورة الوزيري ودى سنة ٦٢ .. جمال عبد الناصر الحق يقال قال مالناش دعوة .. لأنه كان حصل الانفصال وكان فيه مؤتمر شتورة في لبنان .. وسمع بقى العرب ببهاجموه .. والصحفيون اللي كانوا بيقتدوا يمدحوا فيه .. ببسبوا ويلعنوا فيه .. فقال لك ماليش دعوة .. وبعدين حصلت الثورة .. طالبوا بقوة رمزية مساعدة .. علشان تأييد الوضع .. وقالوا البدر ولى العهد في ذلك الوقت .. قُتل .. من هنا إلى هنا .. جمال عبد الناصر بعث بقوة بسيطة .. فصيلة على مركب بعد ١٥ يوم » .

• وقد وجد عبد الناصر عند إرسال الجيش المصرى بقوات كبيرة إلى اليمن أن اليمنيين منقسمون فيما بينهم .. فالبعض مؤيد للثورة بقيادة السلال ورفاقه .. والبعض الآخر مثل قبائل الشمال تعادياها .. وزار ناصر اليمن ...

• وأسأل الفريق أول عبد المحسن كامل مرتجى : كنت قائداً لحملة اليمن .. تكلمنا عن ظروف الحرب في اليمن ؟

• « حرب اليمن من ضمن الحاجات التي كانت لها تأثير مش كويس على القوات المسلحة .. في حربها مع إسرائيل .. ليه ؟ في اليمن طيران عندنا ودبابات وعربات مصفحة وهم

ما عنددهمش .. إذن كل حاجة كانت فى إيدنا .. يعنى العملية كانت عبارة عن حرب عصابات ..
يظهروا فى حته نروح نضربهم يعنى المناورة والديناميكية بتاع المعركة ما كنتش موجودة ..
كل الناس اللي كانوا موجودين أخذوا فكرة خاطئة عن الحرب .. يعنى التصميم للمعركة اللي
إحنا بنعمله فى وقت السلم إن إحنا نخلى القائد والعسكري تحت ظروف الحرب .. دى ماكانتش
موجودة .. وأثرت تأثيراً كبيراً جداً على التدريب .. علاوة على كده كان الناس لما ييجوا من
مصر القيادة بتدلعهم .. أسوأ وقت مر على القوات المسلحة .

• سيادة الفريق .. هل حرب اليمن كانت خطأ ؟

• « مائة فى المائة كانت خطأ .. كنا عاوزين إيه من اليمن ؟! كل اللي هناك .. قائم بالأعمال
محمد عبد الواحد .. وكان فيه ناس كثير من الثورة موجودين هنا .. زى البيضاني والوزير ..
فاللى كان قائماً بالعملية دى السادات .. فقال خلاص الثورة قامت وأى قوات تيجى بس تكون
رمزية .. فبعتنا سرية من الصاعقة .. هذه السرية وصلت من ٢٠٠ عسكري إلى ٥٥ ألف
عسكري .. بعدين ... ياما كتبتنا للرئيس وقلت له إن اليمن لا تفيدنا .. إنما هو كان متصوراً
إزاي يخرج من الحصار الاقتصادي اللي حواليه .. بلإن هو يبقى ماسك قناة السويس .. البحر
الأحمر من فوق وخليج باب المندب من تحت .. أنا أفكر إحنا لما كنا فى اليمن .. وبعدها جمعنا
ناصر فى المعتزله .. وكان البعض قد طالب أن نهاجم منطقة جيزان .. اللي هي حدود السعودية
واللى هي أصلها يمنية .. المشير ومعه البعض كان بيحذرن إن إحنا نهاجم جيزان .. فأننا فاكرو
الرئيس يقول لى إنت رأيك إيه ؟ أنا عارف اليمن وخدمت فى اليمن .. قلت له إحنا دخلنا اليمن
بسرية ... بقى فيه ٥٥ ألف دلوقتي .. لو دخلت جيزان حادخلها بقى إيه .. كان معمول حسابهم
أن ندخل بلوائين .. قلت له حتقدر تصمد إلى متى خصوصاً إن الأمريكان لابد إنهم حيساعدوهم
بالطيران .. فالبعض منهم رد وقال إن الأمريكان ملخومين فى فيتنام .. قلت لهم بالعكس دول
عاوزين يثبتوا وجودهم فى الأرض المكشوفة هنا بالطيران بتاعهم .. فأننا من وجهة نظرى
العملية فى بدايتها ممكنة لكن ما بعدها هو اللي حيبقى متعب .. فهز دماغه وقال لى شوف إحنا
ما نعملهاش كده .. زى ما هم بيقولوا إحنا نعملها واحدة واحدة .. نروح نضرب بالطيران
ونرجع نشوف حيحصل إيه .. تمسك فى حته وتثبت فيها شوية وترجع .. يعنى عملية « step
by step » (خطوة بخطوة) .. على العموم أنا رايح أقابل فيصل وإن شاء الله نحل موضوع
اليمن .

• ويقول الفريق سعد الشاذلى : « اليمن كان لها عيوب .. ومن ضمن العيوب بتاعتها إن الضباط
والجنود اكتسبوا عادات سيئة .. لأن الحرب لم تكن نظامية .. لأن الحرب لم تكن جيش ضد
جيش .. ده جيش ضد عمليات فدائية .. مافيش طيران معادى .. دى أكسبت القوات النظامية
بعض العادات اللي تضرهم عندما يدخلوا فى حرب نظامية .. لكن تقدر تقول برضه إذا نظرنا
إلى القوائد .. إنه إحنا فى اليمن كنا بنساعد كل الحركات التحررية فى عدن والخليج .

• وهكذا كانت حرب اليمن استنزافاً لموارد مصر .. وسبباً فى الخلاف مع السعودية ...

• وأسأل عبد الرحمن البيضاني : الوحدة مع مصر .. هل كانت مجرد فكرة ؟

• « فعلا كانت الوحدة أمل جميع اليمنيين .. وأتذكر أن اليمنيين كانوا يشترون أجهزة الراديو الترانزستور من عدن .. ويضبطوها على إذاعة صوت العرب .. ولا يحركون المؤشر عن صوت العرب أبدا .. ولذلك كان لحسن الحظ .. أن سمح الرئيس عبد الناصر في ٢٢ / ١ / ١٩٦٢ سمح لي بالإذاعة من صوت العرب داعيا الشعب اليمني إلى الثورة وإلى الجمهورية .. وأذكر إنني قبل سفرى إلى صنعاء مع الثورة التقيت بالرئيس عبد الناصر وتكلمنا فى موضوع الوحدة بحضور المشير عامر والسادات .. وكنا كلنا متحمسين للوحدة .. إلا أن الرئيس عبد الناصر أصر على أن الوحدة لا يمكن أن تتحقق بين اليمن ومصر إلا بعد أن ينسحب آخر جندي مصري من اليمن .. وبعد أن يتم استفتاء شعبى على مستوى شعب مصر من أقصاه إلى أدناه وشعب اليمن من أقصاه إلى أدناه .. وبعدئذ يفكر فى قيام الوحدة .. وأعلنت هذا فى مؤتمر شعبى فى تعز فعلا لأن الجماهير كانت تتادبنى « الوحدة الوحدة » .. فأجبتهم - وهذا الكلام منشور فى الأهرام - بأن الوحدة أمر مطلوب وهدف وأمنية لجميع مجلس قيادة الثورة إلا أن الرئيس عبد الناصر هو الذى يريد تأجيل إعلان الوحدة إلى أن يتم كذا وكذا .. فى نفس هذا الوقت .. موسكو أجلت عودة القوات المصرية من اليمن .. هذا التأجيل كان فى يونيو ٦٣ .. ولكن الخطاب الذى ألقيناه فى تعز كان فى أكتوبر ٦٢ » .

• وأسأل عبد اللطيف بغدادى : إذن حرب اليمن لم تكن ضد المملكة العربية السعودية ؟

• « لأ .. هى جت بعد ذلك .. لما راحت مصر ويعدين ظهر إن البدر ما تقتلش .. إنما ظهر إنه هرب على الحدود السعودية .. فى بلد إسمها جيزان .. ويعدين تبنته السعودية .. فالسعودية من وجهة نظرها وأمنها .. إن مصر بقت على حدودها فى اليمن وده لا ترضى به .. ثورة هنا وقاعدة تساعد وتعمل على مساندة الثورات فى الدول العربية .. كانت مصر عملت فى الوقت ده ضد السعودية منشورات ... فمن هنا فيصل تبنى البدر وقرى البدر .. وابتدوا يشتروا القنابل ضد الوجود المصرى فى اليمن .. وابتدت عملية العند بقى بين جمال عبد الناصر وبين فيصل فمن يتغلب على الآخر ؟! اللخبطة جاءت من هنا » .

• والمحصلة النهائية فى حرب اليمن كانت لصالح مصر ولا بالعكس كانت نكسة أخرى كما قيل ؟

• « هو كان سنة ٦٣ .. سافرت لندن لأعمل عملية المראה .. كان جمال عبد الناصر مر على يشوفنى قبل ما أسافر .. فكان لى رأى قلت له نخرج من اليمن بأقصى سرعة لأن ده بيشتبهنى بأسبانيا أيام نابليون لما عملوا له بؤرة قلاقل داخل أسبانيا .. وكان عمل أخوه ملك أسبانيا .. فانشغل بها واستنزفته .. أنا قلت له نخرج بقدر المستطاع هاودنى .. لكن الللى فى ذهنه كان حاجة تانية .. لأن بعد ٦٧ يوم .. ما حصل وكمال حسين راح له فقال له كمال : نسيب اليمن للبدر .. لكن هو عنيد .. والعند ينفع فى حاجات وماينفعش فى حاجات .. لازم يبقى فيه مرونة .. فهو كان ضد الخروج من اليمن » .

- وأسأل الفريق أول مرتجى : خسائر حرب اليمن قد إيه يا فندم ؟
- « أنا بأنصور إنها فى حدود ١٠ - ١٥ ألف عسكرى » .
- وضابط طبعاً ؟
- « آه طبعاً .. ده فيه ضباط برتب كبيرة ماتوا » .
- ونذكر هنا فيمن نذكر من أبطالنا الشهداء فى اليمن .. عبد المنعم سند وسامح مرعى ونهبل الوفاد وآخرين كثيرين بالمئات ...
- ويقول كمال الدين حسين : « حرب اليمن كانت من سوء الطالع لمصر .. عجيب جداً فى حرب اليمن .. قطعاً إحنا خرجنا شعب من القرون الوسطى للعصر الحديث .. يعنى فيه ناس لحد النهارده تقول لك إحنا عملنا خبراء لكن على حساب إيه ؟! هو ده الذى يمكن مناقشته .. العملية لم تجد اعتراض الأول شوية سلاح ونفزين ثلاثة يروحوا يودوا السلاح فى طائرة بس عملية بسيطة .. تطورت العملية دى لغاية ما بقى فيه جيش علشان يقاتل فى اليمن .. استغلت العملية دى استغلالاً سيئاً .. وطبعاً لما يكون جيشنا يبحارب مكان ما لكن إعلان المعارضة دى عملية غير مستحبة .. وأنا قلت لجمال عبد الناصر إن إحنا تورطنا فى حرب اليمن .. زى الأمريكان ما تورطوا فى حرب فيتنام .. ويجب أن نسحب قواتنا من هناك فى أسرع ما يمكن .. لكن لم يكن سهلاً على جمال عبد الناصر بعد عملية الانفصال بتاعة سوريا .. كان عاوز جو يتنفس فيه شوية .. الاندفاع بتاع حرب اليمن كان نتيجة الانفصال عن سوريا .. ويرضه انفصال سوريا عن الاشتراكية .. والاشتراكية لا يبينها إلا الاشتراكيون .. وتعمل ذنباً للاتحاد القومى لأن هو المسئول فى هذا الموضوع » .
- ويقول د . ثروت عكاشة : « كانت مغامرة غير محسوبة .. لها إيجابياتها ولها سلبياتها .. أما إيجابياتها فهى تحرير اليمن من أغلال القرون الوسطى .. وأما سلبياتها فهى فى رأى ودون الدخول فى التفاصيل .. كانت أحد العوامل الأساسية فى هزيمة ٦٧ » .
- ويقول صلاح الدسوقي : « الضباط والجنود المصريين راحوا يدافعوا عن الاشتراكية .. وأكبر كارثة هو الإغراء .. إغراء جمال عبد الناصر بأن اليمن لو بعثنا قوات بسيطة سوف ترد اعتبار وزعامة عبد الناصر فى العالم العربى بعد الانفصال السورى .. وكانت النتيجة أن اليمن تبثلع قوة وراء قوة .. وبقت مذبحة للجيش المصرى » .
- وأسأل الفريق أول مرتجى : فى النهاية ماذا تقول فى جملة واحدة عن حرب اليمن ؟
- « الحملة التى لا داعى لها » .
- طيب نفذت التعليمات أو الأوامر ليه ؟
- « أنا قائد .. ببقولوا روح كده .. بنروح وحاضر .. وبعدين أنا ما كنتش قائد اليمن فى الأول .. الفريق أنور رياض الله يرحمه هو الذى كان قائد اليمن » .

• **ويقول مصطفى أمين :** أكبر أخطائنا .. لأن لا يمكن إنك تدخل تفرض حكم بالذات .. اترك الشعب اليمني هو الذى يقرر مصيره بليده لكن لا ترسل قوات مصرية تحارب .. نتج عن هذا أن كثيراً من البلاد العربية خافت إن احنا نعمل لها زى ما عملنا فى اليمن .. ونتيجة لهذا اليمن بعد ما كانت صديقة حميمة لنا .. تعمل اللى إحنا عاوزينه .. أصبحت ضدنا »

• **هل أضافت حرب اليمن إلى رصيد الثورة المصرية الدائن أم إلى رصيدها المدين ؟**

• **أعتبر أنها رصيد دائن وإيجابى وحضارى ..** وسوف ينكر ذلك التاريخ .. قد يكون هناك آلام نتجت من هذا ولكن سينكر التاريخ إنه بفضل مصر صحت الأمة العربية وتحررت من الاستعمار وتحررت من بعض أنواع التخلف .. نبنت فى مشاعر المواطنين العرب فكرة القومية وفكرة الحضارة الحديثة والارتقاء العالمى .. بلا جدال إنه لولا ثورة مصر ولولا دعم مصر لثورة اليمن لم تكن لليمن أن تقوم ثورة حضارية فيها » .

• **ويقول أمين شاكى :** عبد الناصر كان مؤمناً إيماناً راسخاً لا يتزعزع أن العالم العربى وحدة والتجزئة التى أفرضت على العالم العربى تجزئة استعمارية .. فلما اليمن كان فى جزء استراتيجى مهم .. على الساحل الشرقى للبحر الأحمر .. وعلى مدخل البحر الأحمر .. لكن الجماعة الإنجليز والأمريكان قدروا إنهم يخلقوا عداوات بين اليمن وبين المملكة العربية السعودية .. فذه وده بقوا يلجأوا للأمريكان علشان يساعدوهم .. فاليمن عند إمكانات كبيرة .. لكن الجماعة الإنجليز ما إدولهوش الفرصة علشان يستغل هذه الإمكانيات » .

• **وهل كان دخولنا حرب اليمن تجربة ناجحة ؟**

• **« أعتقد هذا .. لأن دخولنا حرب اليمن ترتب عليه إخراج النفوذ الأجنبى خروجاً كاملاً ..** وبعدين الوحدة الوطنية ظهرت .. وللأسف الشديد إن بعد كده ظهر قسم يفسر الوحدة الوطنية بصورة معينة اللى هى اليسارية .. وقسم يفسرها بالصورة الليبرالية .. والعداء بينهم امتد إلى الصدام المسلح .. وانتهت الحرب الحمد لله .. ودلوقتى فيه عملية تنمية كويسة فى اليمن .. وإن شاء الله بعد مدة قصيرة سيكون لليمن وضع ملموس فى الأمة العربية » .

• **ويقول خالد محبى الدين :** « حرب اليمن كانت ردأ على انفصال سوريا .. وأن دور مصر العربى لم ينتهى .. لأنه فعلاً انفصال سوريا .. كان فيه ضربة لدور مصر القيادى العربى .. فلما حصلت ثورة اليمن وجد عبد الناصر فيها اتجاه إنه يعيد إلى مصر دورها القيادى فى دعم الثورة فى بلد متخلف .. وفعلاً حرب اليمن مع كل خسائرها وتضحياتها .. ثبت إن اليمن شماله وجنوبه .. ساعد مصر بعد ذلك فى حرب ٧٣ .. وقفل خليج باب المندب عن طريق اليمن » .

• **ويقول حسين الشافعى :** « إذا اعتبرنا أن الوحدة مع سوريا دى أول خطوة لاستدراجنا وإخراجنا من خندقنا لتوجيه الضربة لنا .. فحرب اليمن كانت التدبير الثانى لاستدراجنا فى العملية وكانت للتأكد من أن رد الفعل حىستجيب للدعوة بالنسبة لحرب اليمن لأن اتعملت وأعلنت يوم ٢٦ سبتمبر سنة ٦٢ أى قبل الذكرى السنوية الأولى للانفصال بيومين .. فطبعا كانت

بالحساب السيكولوجى تبقى وسيلة للتغطية بالنسبة للوضع السياسى فى المجال العربى .. علشان يبقى لنا عزوة فى البلاد المتحررة .. ولو عزوة معنوية لأن إحنا مالناش سند تانى .. طب هم قوة كبرى عندهم أسلحة بالشىء الفلانى ... طب إحنا سندنا إيه .. إلا قاعدة الأحرار .. كل ما نتسنع كل ما يتبقى لنا سند » .

• **ويقول سعد الشاذلى :** « جمال عبد الناصر بدأت شعبيته فى العالم العربى تزيد .. وبعث قوات فى اليمن .. يعنى إحنا رجعنا من الكونغو سنة ٦١ فى فبراير أو مارس تقريبا .. وبعدين قبل نهاية سنة ٦١ أرسلت قوات إلى اليمن على طول » .

• **وماذا تقول لنا عن حرب اليمن ؟**

• « الحقيقة قيل الكثير عن حرب اليمن .. وهوجم جمال عبد الناصر من أعدائه بخصوص حرب اليمن .. لكن تقدر تقول إن حرب اليمن كانت لها فائدة أكثر من عيوبها .. قيل الكثير إن مصر صرفت ملايين الدولارات فى اليمن .. حسب علمى إن المصاريف الفعلية كانت فى اليمن حوالى ٤٠ مليون دولار .. بخلاف الميزانية الأساسية بتاعة وزارة الدفاع .. لأن وزارة الدفاع عندها الضباط والعساكر بيقضوا الماهيات بتاعتهم ويأكلوا ويلبسوا زى ما يلبسوا .. ولكن الـ ٤٠ مليون دولار كانت تغطى المصاريف الإضافية التى يترتب عليها النقل والمكافآت الإضافية وخلافه خلال هذه السنة .. فهذا مبلغ بسيط ٤٠ مليون دولار فى خلال ٥ أو ٦ سنوات لم تكن مشكلة » .

• **٤٠ مليون دولار فى السنة بافندم ولا فى الست سنوات ؟**

• « لأ ٤٠ مليون دولار فى السنة .. لكن أستطيع أن أقول إن لولا حرب اليمن .. لم تكن منطقة الخليج حصلت على استقلالها حتى الآن .. وإحنا فى اليمن كنا بنساعد كل الحركات التحررية الموجودة فى عدن .. وفى المناطق دى ضد الوجود البريطانى .. من غير وجودنا فى اليمن .. لم يكن ممكناً أن نوصل هذه المساعدات والأسلحة إلى كل هذه القوات .. يعنى الدول الخليجية أخذت استقلالها بعد نجاحنا فى اليمن .. لأن مصر لم تكسب حاجة بالعكس خسرت .. أعتقد أنه يكون ألف قتيل فى اليمن وكذا ألف من الجرحى .. وخسرت اقتصادياً زى ما قلت لك .. يعنى حوالى ٢٠٠ أو ٢٥٠ مليون دولار .. ولكن المكسب الحقيقى إن الدول الخليجية حصلت على الاستقلال بتاعها وما كان هذا ممكناً بدون حرب اليمن » .

• **إحافاً للحق .. هل كان هذا يغضب المملكة العربية السعودية ؟**

• « صحيح كان فيه خلاف بين مصر وبين المملكة العربية السعودية فيما يتعلق بحرب اليمن » .

• **وذهب عبد الناصر إلى جدة بعد أن تبين له أن استمرار القتال فى اليمن يؤدي إلى تمزق عربى .. وتوصل إلى اتفاق مع الملك فيصل سنة ١٩٦٥ يقضى بانسحاب الجيش المصرى ...**

- وأسأل عبد الرحمن البيضاني : قلت فيما قلت « عبد الناصر لعلمه أن القوات المصرية تستنزف في اليمن سافر سنة ٦٥ للاتفاق مع الملك فيصل .. ووقعا معا اتفاقية جدة » ؟
- نعم .. ثم بعد أن وقعا اتفاقية جدة .. الاتحاد السوفيتي طلب المشير عامر إلى موسكو .. وسمعنا أن الاتحاد السوفيتي عرض دعماً مالياً جديداً لاستمرار القوات المصرية في اليمن .. وتعثرت أهداف مؤتمر « حرز » التي أدت إليه اتفاقية جدة .. وفوجئنا أيضاً بأن هناك عراقيل من جانب بعض الجهات .. التي كان لا يعنيه السلام في اليمن .. وفي السياسة لا يوجد عنصر واحد ينفرد بالتأثير على مجرى الأحداث إنما هنالك عناصر كثيرة تتداخل مع بعضها وتكون النتيجة النهائية تفاعل هذه العناصر .. فكان موقف الاتحاد السوفيتي أحد العناصر التي تدخلت ولكن الرئيس عبد الناصر كان فعلاً مخلصاً في استعادة القوات من اليمن .. لا سيما أنه في يونيو ٦٧ أعادها فعلاً .
- ويقول محسن محمد : « إلا أن الخلاف بين اليمنيين أدى إلى عدم تنفيذ هذا الاتفاق بين الملك فيصل وعبد الناصر في جدة .. وفي هذا الوقت لجأت بعض الطائرات السعودية إلى مصر .. ولم تنسحب مصر من اليمن إلا بعد سنة ١٩٦٧ » .
- ويقول عبد اللطيف بغدادى : « هو خرج أظن بعد مؤتمر الخرطوم .. اتقابل مع فيصل هناك .. وحصل فك اشتباك .. ومن أيام كندى كانوا يبسعونوا لفك الاشتباك بيننا وبين السعودية في اليمن .. جمال عبد الناصر كان اشترط شرطاً إننا ننسحب ونفضل قوة هناك لتدريب جيش اليمن .. زى ما تقول مسامحاً جاً .. فمأحصلش اتفاق » .
- وأسأل عبد الرحمن البيضاني : رحلة المشير عامر والملك سعود رحمة الله عليهما إلى اليمن سنة ٦٧ بالتحديد .. إيه ذكرايتك عنها خاصة إن بعدها أعلنت اليمن الحرب على السعودية ؟
- أتذكر أنه في يوم ٢٠ / ٤ / ٦٧ استدعاني الرئيس عبد الناصر .. وكلف المشير عامر بأن يطلعننى على تقرير هام جاء من صنعاء على يد اللواء طلعت حسن قائد القوات المصرية في اليمن .. وكان يطالب بعونتي إلى اليمن .. وفوجئت أثناء الحديث مع المشير عامر .. بأن الملك سعود سيعود معنا إلى صنعاء .. كان الملك سعود في تلك الأيام قد عُزل عن العرش ... ولجأ إلى اليونان .. ثم جاء لزيارة مصر .. فوجدت أن سفرى معها لن يحقق الهدف المقصود من عودتي .. وهو العمل على تحقيق الاستقرار واستعادة موقف اليمن الدولي .. وما إلى ذلك من الأمور التي وجدوا أهل الحل والعقد المصريون واليمنيون ضرورة البدء فيها .. لما علمت أن الملك سعود سيكون معنا وجدت أن هذا سوف يحرق هذه المهمة التي طلبت من أجلها فاعتذرت عن السفر معها .. سافرا مع الرئيس السادات إلى اليمن يوم ٢٢ / ٤ / ٦٧ .. وفي يوم ٢٤ / ٤ / ٦٧ أعلن الملك سعود وهو معزول عن العرش اعترافه بالنظام الجمهورى اليمنى .. وأعطى مساعدات للحكومة اليمنية .. ثم أعلن أنه سوف يسعى بكل جهد لاستعادة عرشه مهما كان الثمن .. ثم أعلن بعد ذلك المشير عامر في نفس المؤتمر الشعبى المنعقد في صنعاء « أن

الحرب الدفاعية عن الجمهورية اليمنية قد انتهت .. وقد بدأنا الحرب الهجومية على السعودية .. وهذا منشور في جريدة الأهرام على ما أتذكر يوم ٢٨ / ٤ / ٦٧ وأعتقد أن دى كانت أكبر جتر من جنور عدوان ٥ يونيو ٦٧ .

• وبعد عودة عبد السلام عارف للحكم فى العراق .. ظهر فى الأفق مشروع اتحاد ثلاثى بين مصر وسوريا (بعد الانفصال) والعراق ...

• ويقول د . يونان : « ولم يكتب النجاح لهذا الاتحاد فلم ير النور نتيجة اختلافات وخلافات حزب البعث مع عبد الناصر سنة ٦٣ .. وتعهد الرئيس عبد الناصر إظهار محاضر المفاوضات الخاصة بهذا المشروع .. وإعلانها للناس حتى يظهر رغبة العرب فى الاتحاد .. وإحجامه عن تنفيذ الفكرة » .

• وأسأل أمين هويدى : كنت سفيراً لمصر فى العراق بعد ثورة عبد الكريم قاسم وبعد وفاته بالتحديد .. إيه ذكرياتك عن هذه المرحلة ؟

• « فى تلك الأيام كان هناك مد قومى من المحيط للخليج .. كانت الشعوب العربية تتطلع إلى تحقيق الوحدة .. ولم يثنها عن عزمها هذا حركة الانفصال التى تمت بين الإقليم الشمالى والإقليم الجنوبى ... وكان عهد عبد الكريم قاسم قد اتسم بانحراف عن هذا الخط .. الذى كان يعتبره القوميون العرب فى تلك الفترة حاجة مقدسة .. الكل يسعى إلى تحقيقها .. لما رحلت كان الجميع يظن أن العقبة الوحيدة لتحقيق التطلعات العربية قد زالت » .

• ويضيف أمين هويدى : « للأسف الشديد فى أول أيامى فى بغداد شعرت أن هناك محاولات للوقوف أمام هذه الأحلام .. كانت المرحلة صعبة جدا وفى تلك الفترة قامت ثورة سوريا أيضا لكى تصحح ما أسموه تصحيح الانفصال .. وبدأ ما كان يسمى مباحثات الوحدة الثلاثية التى انتهت باتفاقية ١٧ أبريل ١٩٦٣ وكان هناك وحدة بين الأقطار الثلاثة .. وعمل لها مباحثات وجولات أنا ككتيبته بالتفصيل .. فى كتاب لى « كنت سفيراً فى العراق » .. صورت فيه المرحلة تماما .. ولكن للأسف الشديد كان هناك عدم تقدير لمثل هذه الأمور وانتهت هذه الاتفاقية إلى لا شيء .. ثم توالى الانقلابات فى بغداد .. وعاصرتها كلها .. ويمكن الواحد يتذكر وأنا سفير هناك كنت أصل إلى المطار قادما من القاهرة لكى أستقل عربة مصفحة أو دبابة علشان توصلنى إلى بيتى .. وكانت السفارة دولابها أو أحد دولابها مليون بقسماط وعلب محفوظة تحسبا للظروف .. لإن دائما كان فيه منع تجول .. وكنا أحيانا كثيرة بنبات على الأرض .. كان العمل بعكس ما يظن الآخرون عمل السفير فى تلك الفترة .. خصوصا فى البلاد العربية .. كان عملاً شاقاً .. ولكنه كان جليلاً .. تعلمت منه الكثير .. وقد صقلتنى هذه التجارب .. ولمست أدرى هل الجهد الذى بذل فى تلك الفترة ذهب هباء ؟ وده سؤال يلح على الإنسان بعد ما تجاوز السبعين من عمره .. هل ضاعت هذه الأمور سدى ؟ أنا أعتقد يعنى فيه نعمة النهارده تكفر بالعروبة .. إزاي أنا مش عارف .. يعنى العروبة دى لم يخلقها عبد الناصر .. ولم يخلقها البعث .. ده شيء موجود فى المنطقة إتريبنا عليه .. إحننا وأبأونا وجدودنا .. إزاي الإنسان

يكفر بهويته وأصله أو بجذوره .. أنا لست أدرى .. المحاولات كانت جادة أصبنا في بعض النقط حقتناها .. ولم نحقق البعض الآخر .. ولكننا رفعنا العلم ولن نسمح لأى فرد أن يسقطه من أيدينا .

• ولم يكن حزب البعث هو من عادى عبد الناصر فقط .. بل كان هناك عدد من النظم وثيقة الصلة بالدول الغربية تعاديه أيضاً .. وهكذا بدأ نوع من المناورات والتآمر بين الدول العربية .. وشنت إذاعة صوت العرب هجومها على أعداء عبد الناصر .. وشعرت كل الدول ذات النظام المخالف لنظام مصر بأنها مهددة بالخطر فعلاً ..

• وأسأل سامى شرف : الرئيس كان فى بعض الحالات نقده لأذع لبعض الرؤساء والملوك العرب .. هل كان بإيعاز من شخص ما .. ولا ده كان من تلقاء ذاته .. ولا كان ذلك لآته مضغوط ؟

• « عمر ما جمال عبد الناصر حمل ضغينة لشخص .. ولكن جمال عبد الناصر كان صاحب رسالة وقضية .. ولو تفتح الفرصة فى تسجيل آخر أو لقاء آخر نقدر نجمع كل الشعارات اللى طرحها جمال عبد الناصر من ٥٢ إلى ٧٠ .. نجد الشعارات تحوى مضموناً وقيمة .. وهى قيمة لصالح الإنسان ولصالح قضايا لم تكن فى يوم من الأيام شخصية .. ولم تكن فى يوم من الأيام بغرض فرض رأى أو لوى ذراع أو إهانة .. ولكن عندما تكتشف .. إنت كرئيس دولة .. وتمت وحدة بينك وبين سوريا مثلاً .. إن أحد الملوك دفع ٢ مليون جنيه استرليني لثائب رئيس الجمهورية ليحدث انقلاباً ضد الوحدة » .

• **اللى هو عبد الحميد السراج ؟**

• « حنقول له بس .. ولا حنقله فف مكانك .. ده مثلاً .. وعندما جاء اليمن يتحرر من العصور مش القديمة .. ما قبل التاريخ .. ده من العصور الحجرية .. اليمن سنة ٦٢ كان عايش فى عصر حجرى .. يتحرر هذا الإقليم .. لما تلاقى قوم يعادونك وقوم بيجاربوك فى اليمن .. حنطيطب عليهم حنقول بس متشكر إنك إنت بتحاربنى .. متشكر إنك إنت تحول دون تحرر وطن عربى وشعب عربى وإنسان عربى .. ليعيش فى القرن اللى إحنا عايشينه .. قول لى أنا حارضى بالحكم اللى إنت حتحكمه .. كون إن يبقى فيه اللفظ قاسى .. إحنا كعرب مع بعضنا لما نحب نمدح واحد بنمحه بشيعة .. مش عاوز أقولك يعنى إيه هى الشتيمة .. إنت بتقول فلان ده كذا .. وده مدح كبير قوى .. لا إحنا كعرب .. إحنا فى سنة ٩٦ عندما تتأزم المسائل وتستدعى أن يلتزم العرب .. وهم كانوا يلتزموا بمنتهى السهولة » .

• **ويقول محمد أحمد :** « هو كان حريصاً جداً على علاقته بالعرب .. إنما كانت تبصل إليه بعض المعلومات إن فيه مؤامرات ضده وضد ثورته .. حيعمل إيه ؟! » .

• **وهل كان نقده لاذعاً ؟**

• « للأسف الشديد كان فيه بعض الحاجات نقده فيها كان لاذعاً .. بس أنا شخصياً عقيدتى من

جوه ومازلت مؤمناً بها .. هو كان لا يقولها دفاعاً .. إنما كان بيقال له هذا الكلام .. وكان فى النقد ببيكون موضوعياً .. إنما بعض ساعات كانت بتيجى بعض الألفاظ فى خطبه أو حاجة بتعتبر لاذعة وقاسية » .

• ويقول عبد اللطيف بغدادى : « جمال عبد الناصر كان بخطبة يسقط وزارة .. أى وزارة فى أى دولة عربية .. ليه ؟ لإنه أصبح أمل الشعب العربى » .

• بس كان بيزعل بعض الحكام العرب .. ولا إيه رأيك ؟

• « آه ما هو كان بأسلوبه يخوفهم ويشتمهم .. وكنا نقول له لا يصح .. لكن هو كان مقتنعاً بالأسلوب ده .. ولو شخط فى واحد فيهم .. يرقص !! » .

• ويقول عباس رضوان : « فى خطب الرئيس عبد الناصر كان بيؤخذ عليه هذا الكلام .. يؤخذ عليه مافيش كلام .. وإن مرة قال حاجة بخصوص الملك فيصل رحمه الله وأنا أخنتها عليه .. وعلى الملك حسين كمان » .

• ويقول رشاد مهنا : « تذكر إن رئيس دولة يقف ويسب رئيس دولة بألفاظ لا يقولها السوقى .. عاوز أقول لك رئيس دولة يقف ويصف الملوك والرؤساء دول بألفاظ لا يقولها السوقى .. يبقى مين .. ويبقى إيه ؟! » .

• وأسأل تحسين بشير : علاقة عبد الناصر بالملوك والرؤساء العرب ؟

• « الملوك والرؤساء العرب حتى الذين كرهوا عبد الناصر .. كانوا يحترمونه .. فلولا قيام مصر وقيام عبد الناصر .. بتحدى الإمبراطورية الإنجليزية لما استقلت معظم الدول بما فيها الدول الخليجية » .

• وأسأل د . د . حاتم : وما هو رأيك بصراحة فى الإعلام .. الذى بدأ بوجه نقداً قاسياً لبعض الملوك والرؤساء العرب ؟

• « هو شوف هو فيه مزج بين النقد والدعوة للإصلاح .. يعنى إنت لما بتقول إن بعض الملوك فى ذلك الوقت أو بعض الأشخاص فى ذلك الوقت كانوا بيتعاملوا مع الاستعمار .. فكان لابد إنك إنت وإنت تقوم بثورة تهاجمهم وتبين للشعوب هذه العمالة لكى تسقط .. خصوصاً إذا كانوا هم بيهاجموك .. فده نوع ثانى من الحرب الوقائية فى ذلك الوقت .. لكن تعجب من تاريخى كله وأنا كنت حريصاً عليه .. وحتى الملك فيصل الله يرحمه قال « لم نسمع من وزير الإعلام المصرى كلمة نابية إطلاقاً فى حياته » .. إذن ليس للإعلام كلمات نابية .. إنما الإعلام أن تبين وتشرح بأسلوب مهذب .. لأن حتى لما سيننا موسى وأخوه هارون ومعهم الرسالة النبوية .. الله سبحانه وتعالى أرسلهما لمين ؟ لفرعون .. وقال لهما « اذهبا إلى فرعون إنه طغى فقولا له قولاً ليناً لعله يتردد أو يخشى » .. إذن هنا الإعلام ليس شتائم .. لا يمكن أن نوافق على الشتائم .. وبعدين مين كان يقدر يقول للرئيس .. « لا تقل هذا الكلام ! » .

• نجحت في جمع شمل العرب دون أن يراك أحد .. لأن أيامها لم يكن هناك تلفزيون ..
والآن تعشق قبل العين أحيانا .. لكن هل الحماس الجارف يعنى أن اللسان اللاذع أو نقدر
نقول حتى السليط مستحب ؟

• هو ما كنش فيه سلاطة .. أنا لا أنكر إنه كان فيه سلاطة بمعنى سلاطة .. إنما هو اللسان
اللاذع ليه ؟ أنت في مرحلة صدام وصراع غير محتاج إلى إنك تغلف الأشياء بورق سلفان ..
الاستعمار يعنى استعمار .. عميل يعنى عميل .. حنقول عليه إيه صاحب فكر في التعامل
والخضوع للمخابرات الإنجليزية ولا الأمريكية ولا الفرنسية .. وبعدين فيه نقطة مهمة جداً ..
الراديو للجماهير .. والقطاع العريض مش المتقنين .. القطاع العريض أغلبه أمى ويستهو به
اللفظ الفخم الواضح المعانى .

• ويقول د . يونان ليبب رزقي : « في هذا الوقت عرف الناس الراديو الترانزستور الذى يستطيع
الإنسان أن يسمعه في كل مكان .. فكان العرب يستمعون إلى صوت العرب وأحمد سعيد ..
وحتى الوثائق البريطانية والأمريكية تبين أن الشكوى كانت مرة من قسوة ما يقدمه صوت
العرب .. ولكن في أى صراع دولى عام أنت تلعب بكل أدواتك .. والإعلام أحدها .. فعليك
أن تلعب به لأقصى درجة » .

• وهكذا أصبح وجود النظام الناصرى .. ومخابراته .. وإعلامه الملهب للمشاعر .. خطراً
على بعض النظم العربية الموجودة ...

• ويقول مصطفى أمين : « حلت سياسة أخرى .. وهى التدخل فى سياسة كل بلد عربى ..
أصبحنا أعداء لهم لأن هم كأي بلد ترفض إن أى دولة تتدخل فى شئوننا .. إحنا نتدخل ..
ونقول إن ده يبقى رئيس وزارة وده يخرج من الوزارة .. مثلاً فى سوريا .. فى لبنان .. فى
ليبيا .. أى مكان نتج عن هذا أن أصبح لنا أعداء فى كل بلد عربى .. وهذه غلطة لأن مصر
بدون أن نتدخل فى أى شئ .. هى زعيمة البلاد العربية » .

• ويقول أحمد حمروش : « قام صوت العرب بحملات شهيرة ومؤثرة فى كل الوطن العربى ..
لكن الواقع كانت فيها تجاوزات .. والدليل على ذلك أن عبد الناصر لم يتحدث عن إزالة إسرائيل
الذى كان يعلن فى صوت العرب .. ولا شك أن الإعلام كان يحتاج إلى شئ من المراجعة » .

• ويقول د . يونان ليبب رزقي : « كانت هناك حملات عنيفة متبادلة .. تشتم وتلمح ..
« وتلق » .. وعبرت الحملات الإعلامية الخطوط الحمراء .. فكانت إذاعة الأردن تنذع يومياً
أكثر من مرة أغنية « البوسطجية اشتكوا » .. وإذاعتنا ترد بأغنية « سونة يا سنن جتلك أهو » !!

• ويقول أمين شاكر : والله عبد الناصر .. ما كنش عاوز يتدخل فى الدول العربية .. إنما كانت
السياسة العربية بتاعة الثورة .. أن تصبح كل دولة عربية مستقلة وحره وفيها الحد الأدنى من
النظام الديموقراطى .. وأن تكون القرارات لمصلحة الشعب أولاً وأخيراً .. الدول الاستعمارية
كانت ضد هذا .. ومن هنا نشأت الخلافات بيننا وبين الدول الاستعمارية إنجلترا وفرنسا وبعدها

للأسف أمريكا .. وربنا وفقنا وقدرنا نوقف كل المشروعات الاستعمارية والأميرالية بتاعة الدول الثلاثة الكبرى .. الحاجة المؤسفة جدا أن جزءاً غير قليل من حكام الدول العربية لقيناهم منحايزين للدول الاستعمارية ضدنا زى نورى السعيد مثلاً .. والأستاذ اللي إحنا جنبناه من على القهوة بتاعة بديعة وعملنا له حزب اللي هو الحزب الوطنى السودانى .. وعملنا انتخابات وراح هناك وبقي رئيس وزراء وألف أول حكومة بعد الاستقلال .. لأنه اللي جاب الاستقلال للسودان هو عبد الناصر .. وخرجوا الإنجليز من السودان .. وراح لهم الاستقلال على طبق من ذهب .. وأخونا اللي كان هنا فى مصر لاجئ راح هناك ألف أول وزارة وكان اسمه الأزهرى .. رحى لقيته قاعد على قهوة بتاعة كازينو بديعة قالوا لى ده بيغطر هناك كل يوم .. فلما شافنى ركبته خبطت فى بعضها .. لما قلت له الرئيس عبد الناصر عايز يشوفك .. كان حيق من الكرسي .. فقلت له ده خير وأخذته معى فى العربية .

• ولماذا اخترتوه ؟

- انتقال لعبد الناصر إن ده رجل كويس ووطنى .. وكان لاجئاً هنا .. بياخذ مرتب من وزارة الأوقاف .. واللى ساعدنى فى الوصول إليه الله يرحمه الشيخ الباقورى وكيل وزارة الأوقاف .. بعد ٦ أشهر راح إنجلترا .. بيسألوه سؤالاً هل السودان سينضم إلى مصر ؟ قال لهم لا إطلاقاً السودان حريص جدا على استقلاله وسيبقى مستقلاً عن جميع الدول الأخرى .. طبعاً دى كانت صدمة كبيرة بالنسبة لنا .. لأن إحنا كنا معلقين آمالاً كبيرة حدا على إقامة دولة وادى النيل .
- وأسأل مصطفى أمين : التدخل كان من مصلحة الدول العربية .. يعنى مصر ساعدت الجزائر واليمن والسودان .. ساعدت غيرها علشان تقف على قدميها وتطرد الاستعمار ؟
- إنما نتيجة تدخلنا فى السياسات .. حولنا هؤلاء الناس من أنصار .. إلى أعداء .

- ويضيف أمين شاكر : « البلد الثانى اللى تعبنا معه هو العراق .. لأن العراق له وضع خاص كما تعلم .. هو البوابة الشرقية للعالم العربى .. لكن نورى السعيد كان مقتنعاً اقتناعاً كاملاً بأن العرب من غير إنجلترا حيزيعوا وأنا قعدت معه فى بيته .. وفهمته .. إن مايفش إطلاقاً ما يشير إلى أن الجماعة السوفيت حياولوا إنهم يعتدوا على دول الشرق الأوسط .. يبقى الإنجليز لزمهم إيه .. الإنجليز خلاص الفترة بتاعتهم خلصت .. وهناك فى بلدهم بياكلوا الكرنب مصلوقاً .. فلحنا نننهر الفرصة ونسقل ونبقى دول مستقلة .. إطلاقاً ما أمكنش إقناعه .. السعودية .. كما تعلم كان الملك سعود علافته وثيقة جداً بالأمريكان وكان ثمن البترول ببطلع بشيك باسم الملك .. وكان هو يظهر يحبب الفلوس ففروته تضخمت تضخماً كبيراً جداً من هذا .. وكان علشان يبقى الملك هناك أى مكان فيه قبيلة يبقى كل ما فى هذه الأرض يبقى ملك الملك .. لذلك فى السعودية هناك يقولك إيه « أرض عبد العزيز » .. ما يوقلكش المملكة العربية السعودية .. فلحنا حيننا بكل طريقة نقنع الملك سعود يعمل مجلساً استشارياً علشان الشعب يحس إنه بيشارك فى اتخاذ القرارات .. ولكنه لم يرضى واعتبر هذا تدخلنا منّا فى شئون المملكة وبقي فيه نوع من العداوة بيننا وبينه .

- وأسأل حافظ إسماعيل : ما رأيك في موضوع التدخل المصرى فى شنون الدول المجاورة .. هل هذا التدخل كنت توافق عليه أم ترفضه ؟
- كنت أوافق مع الجزائر .. مع اليمن .. مع سوريا .. مع الفلسطينيين .. مع السودان .. مع الدول العربية .. لكن الدول غير العربية لدى اعتراضات على التدخل « .
- وأسأل عارف عبد الرزاق : هل حدثت فجوة بين العرب وبين مصر فى يوم من الأيام فى رأيك .. يعنى كان فيه خلاف بين الثورة المصرية والثورة العراقية .. هل كان هناك مثل هذه الخلافات بين مصر والدول العربية ؟
- « والله العرب بصورة عامة لا يحسدوا على موقفهم .. فهم دائما مختلفون « .
- وأسأل أنيس منصور : هل حدثت شروخ فى الجدار العربى .. فى هذا الوقت ؟
- « ده فى كل وقت .. يعنى زمان « برنارد شو » له عبارة مشهورة عن الأمريكان والإنجليز .. يقولك إنها أمة واحدة تفصل بينهما لغة واحدة !! إحنا بقى أمة جغرافية وتاريخية ودينية ومصلحية .. لكن اختار أى دولتين عربيتين متجاورتين .. وقل لى إيه اللى بينهما دلوقتى .. وفى أى وقت ؟ يمكن أيام عبد الناصر كانت الواقعة أشد وكانت الناس بتخاف منه أو بتخاف من سطوته ومن لسانه أو من جواسيسه .. والعرب إذا كان اتجهوا إلى مصر فده خوفا منه وليس حبا له .. بعد كده العرب .. اتفقوا واختلّفوا .. اتفقوا واختلّفوا .. وسوف يختلفون دائما « !!
- وكان هذا هو ما أوجد الحرب الباردة بين مصر وشقيقاتها يوماً بعد يوم .. وهو ما أحدث فى الجدار العربى شروخاً ...

التحول الاشتراكي

- فكرة الاشتراكية ربما كانت أقدم في مصر من فكرة القومية العربية ...
- ويقول د . يونان لبيب رزق : « وبعد ثورة سنة ١٩١٩ ظل الفكر الاشتراكي يمثل عنصراً هاماً في الفكر السياسي المصري وأملأ طموحاً تصبو إليه أذهان بعض المصريين وبعض الجاليات الأجنبية » .
- وعندما حدث الالتقاء بين عبد الناصر والاتحاد السوفيتي .. كان هناك تقاعس من الرأسمالية المصرية عن عملية التنمية الاقتصادية بسبب خوفها من النظام العسكري المصري ...
- وبدأت مصر تتأثر بسياسة روسيا وفتح الباب لها .. ولم يكن للاتحاد السوفيتي أي نفوذ في الشرق الأوسط أو حتى إفريقيا .. لولا أخطاء الغرب ضد العرب ومصر ...
- ويقول أمين شاكور : « إزاي الشيوعيون أصبحت لهم سلطة سياسية في مصر ؟ في الأول كان لهم سلطة عسكرية نتيجة اتفاقية السلاح .. أنا مابلومش عبد الناصر على إنه وقع اتفاقية السلاح .. كان على حق .. لإن بن جوريون طلع عينينا ونزل مرة لغاية العريش .. ولكن هم حولوا هذه العملية إلى نفوذ اقتصادي أولاً .. ومن نفوذ اقتصادي إلى نفوذ سياسي .. واللى خلاهم نجحوا في المخطط بتاعهم .. الأمريكان ودالاس يغيانه .. لكن اللي حصل إن الشيوعيين توصلوا إلى أن يصبخوا القوة السياسية الأساسية في مصر » .
- متى يافندم ؟
- « من سنة ٦٠ كده .. كان فعلا هم أصبحوا القوة السياسية .. وحطوا عبد الناصر نموذجاً محطوط كده وهم بيعملوا كل حاجة .. ففي هذا الوقت طلبوا له حاجة جديدة .. إن أهم حاجة في أي ثورة هي الأمن أي ال security لقائد الثورة .. وفي سبيل هذا الأمن مافيش مانع تعمل أي حاجة .. فشمس بدران في ناحية .. وصلاح نصر في ناحية ثانية .. وسامى شرف في ناحية

ثالثة .. كل يوم يبتهموا جهة من الجهات إنها بتعمل على إسقاطه .. وهو عبد الناصر يجيى يتخذ ضدهم إجراءات مغالياً فيها » .

• إذن دى كانت بداية علاقتنا بالاتحاد السوفيتى والشيوعية ؟

• « أنا عاوز أقول لك على التغيير اللي حصل فى عبد الناصر .. الناس دول أدونا سلاح فى الأول .. وماقالتش حاجة أبداً .. كانت كأنها عملية تجارية بسيطة .. أنا بأشترى منك السلاح زى ما أكون بأشترى منك أى حاجة أخرى وبأدفع لك ثمنها .. هم ابتدوا .. يفرضوا رأيهم .. الأول بالراحة مش بالعنف .. ويعدين بعد كده ابتدوا يصروا على وجهة نظرهم » .

• ويضيف أمين شاكر : « مع الوقت ابتدوا يترجموا عملية الإمداد بالسلاح إلى نفوذ سياسى .. فيقروا يقولوا لعبد الناصر فى المشاكل العالمية مصر ينبغي أن تكون موقفها كذا .. مع إن عبد الناصر كان حريصاً جداً على أن تتحرر الإرادة المصرية من أى ضغط أو توجيهات شرقية أو غربية .. وأن يصبح لمصر ولأول مرة منذ أيام محمد على ومن قبله كمان من أيام الحكم التركى .. رأيها التابع من ضميرها ومن تفكيرها هى .. لمصلحة شعبها وليس لمصلحة أى شخص آخر .. مش ضد مصلحة الآخرين .. لأ .. الآخرين ممكن أن يكون لهم مصلحة .. إنما ماتكونش متعارضة مع مصلحتنا .. لكن هم ابتدوا يفرضوا رأيهم » .

• وأسأل نجيب محفوظ : السياسة الخارجية لمصر فى عهد الرئيس عبد الناصر كيف تراها ؟

• « كان العالم منقسماً إلى قسمين .. وكان عبد الناصر له أحلام .. فكان لابد تأخذ أحد الطرفين .. والظروف بتاعتنا حتى الاجتماعية خلته يتجه نحو الشرق .. الشرق عمل لنا الكثير .. ولكن كان مش ممكن يصم حاجة ... وده اللي فهمه بعد كده السادات » .

• وأسأل د . عبد العزيز حجازى : هل كان الفكر الاشتراكى فى ذلك الوقت مدروساً بعناية ، وهل كان لأهداف سياسية .. ولا كان لأهداف اقتصادية ؟

• « لما ترجع للوراء الحقيقة .. فيه خلفيات .. وده سمعته من أكثر من شخصية عامة من الخارج .. إن عدم تمويل السد العالى كان البداية .. والرئيس عبد الناصر اضطر أن يلجأ إلى الشرق للحصول على السلاح .. وبالتبعية كان الموقف الغربى بالنسبة لمصر واضحاً إن لا مساعدة حتى لما جينا فى السنوات التالية اللي هى فى الفترة الثالثة .. تقريبا كان هناك توقفاً حتى فى التعامل الاقتصادى .. وكان تمويل القمح توقف .. ده معناه الضغط على مصر فى ذلك الوقت .. وكان هناك أسباب لا شك .. إنما أنا أعتقد إن التحول الاشتراكى كان فيه أخطاء ، ..

• ويقول صلاح الموسقى : « إنت عارف الثورة تأتى عليها بعض التيارات السياسية .. والتيار السياسى لما يجيى قوياً يؤثر على البوصلة السياسية .. ولما تخرب البوصلة السياسية يجوز الإنسان يصل إلى منطقة الرمال المتحركة اللي يطلع منها الخطورة .. اللي حصل فى فترة

الستينات والدخول في تيار الاشتراكية ده .. بداية من العلاقة مع المارشال تيتو .. ثم انتهت بالعلاقة الخطيرة مع الاتحاد السوفيتي .. وكان أحد السفراء اللي يحضر إلى في فنلندا وأنا سفير هناك .. كان اسمه صلاح التريزي سوري وكان سفيراً أيام الوحدة وأنا كنت سكرتير الحكومة وكان متخصصاً في البلاد الشيوعية .. وكان كل ما عبد الحكيم عامر يحب يروح رحلة لازم يأخذه معاه لأنه كان مستشاره الأول .. قال لي « أنا حذرت مصر من الدخول مع الاتحاد السوفيتي في المسائل العقائدية والتنظيمات الحزبية .. لو دخلوا فيها مش حيطلعوا » .. وفعلنا ده اللي حصل .. البوصلة اهتزت واستمرينا ..

• هل اختلفت مع أحد من رجال الثورة ؟

• « أنا ما كانت لي اختلاف مع أحد .. فيه اختلاف في السياسة .. يعني أنا ضد حاجة اسمها الاشتراكية .. وأنا محافظ .. أحد رجال الدين كان مرشحاً أكثر من مرة يكون شيخ للأزهر .. هوجم فانا دافعت عنه بمقالين في أخبار اليوم .. وكان أحمد بهاء الدين هاجمه لأنه يظهر هاجم بهاء الدين في مجلة صغيرة .. واحد قابلي قال لي إنتم بقيتم شيوعيون .. قلت له إزاي ؟ قال أكبر رجال الدين يهاجم ولا أحد يدافع عنه .. فجاني كمال رفعت وقال لي إنت بتعمل إيه إنت بتدافع عن الشيخ .. قلت له مهما قلت الاشتراكية بتاعتكم دون العنصر الأخلاقي والروحي .. تبقى مصر ليس لها قيمة والأزهر في مصر له قيمته الكبرى .. وكان عزيز المصري دائماً يقول هذا الكلام لو فهما الدين الإسلامي على حقيقته نبقي أحسن بلد في العالم .. ده كان الخلاف مع كمال رفعت .. لكن كتبت برضه مقالاً مرة والأخ عبد القادر حاتم قال لي الرئيس قال إن ده يُعنع لأنه مقالاً سياسياً .. وكان أفكر خاصاً بالإعلام لأن أحد رجال الإعلام هوجم وأنا دافعت عنه وانتهت العملية .. دون خلاف شخصي ... ولم يكن هناك خلاف شخصي » .

• وأسأل د . مراد غالب : يقال إنه كان لا دخل لروسيا في إفريقيا أو الشرق الأوسط .. لكن سياستنا أتاحت للدب الروسي الأحمر فرصة الاقتراب منا ومن مصادر البترول .. فهل توافق على هذا القول ؟

• « معركة التحرير كانت معركة كبيرة جداً في إفريقيا .. معركة التحرير أصلاً كانت ضد المستعمر والمستعمرين الغربيين .. وبالتالي إذن كان الاتحاد السوفيتي هو الحليف الطبيعي لحركات التحرير بتاعة آسيا وإفريقيا .. وبالتالي هم مش جم مصر علشان ينفذوا إلى إفريقيا أو إنا اللي نفدناهم إليها .. لكن اللي خلاهم يتواجدوا في إفريقيا هي حركة التحرير الكبيرة اللي حدثت فيها .. ودخل مش بس الاتحاد السوفيتي .. الصين أيضاً .. وبالتالي صحيح فيه حاجة هنا لازم أقولها .. إنهم كانوا ببساعدوا مصر أو كانوا يجبوا أن تكون مصر مثلاً ناجحاً بالنسبة لإفريقيا كلها والعالم الثالث .. في العلاقات اللي بيننا وبين الاتحاد السوفيتي اقتصادياً وعسكرياً وثقافياً » .

• وأسأل أبو الفضل الجيزاوي « اليسار والثورة » ؟

• « عندما قامت الثورة لم يكن هناك يسار مطلقاً .. كلنا كنا منضمين للإخوان واتجاهاتنا دينية .. وكنا مساييسين الإخوان .. إنما اللي حصل لما دخلنا حرب فلسطين .. وأمريكا أبدت إسرائيل تأييداً مطلقاً .. ومدتها بجميع الأسلحة .. واستشهد عدد كبير جداً من الضباط زملاننا من الأسلحة الأمريكية أو المصدرة إلى إسرائيل .. فابتدينا نحتاج إلى قوة خارجية .. تساعدنا في مواجهة هذا العدو الإسرائيلي .. فاتجهنا بعد قضية العدوان الثلاثي وبعد مؤتمر «باندونج» للتحالف مع الثورة الاشتراكية العالمية .. وعلى رأسها الاتحاد السوفيتي .. هنا ابتدت حركة اليسار تدخل في الجيش .. وبعد العدوان الثلاثي وبعد موقف أمريكا من تأييد العدوان الثلاثي .. ابتدت تظهر تنظيمات يسارية في داخل أفرع القوات المسلحة المختلفة .. منهم الأستاذ أحمد حمروش وخالد محيي الدين وإسماعيل صبرى عبد الله وأسماء كثيرة .. وكانوا ناس أشرف واتجاهاتهم سليمة ومتقنين .. فابتدت الثورة تأخذ اتحافاً جديداً .. واتجهت إلى اليسار .. وابتدت تعمل تنظيمات يسارية .. مش شيوعية .. يسارية بالمعنى الأوضح .. علشان نخلص على التيارات اللي كانت مسيطرة على الجو العام في مصر » .

• ورأى عبد الناصر أنه لم يعد أمامه من بديل لإتمام عملية التنمية الاقتصادية سوى السيطرة على وسائل الإنتاج ...

• ويقول خالد محيي الدين : « أنا كنت بره .. يعنى فى البيت أيام قرارات سنة ٦١ .. أصل هى لها سبب .. كان مافيش أمام عبد الناصر غير هذا الطريق .. ليه بقى ؟ لأن عبد الناصر حاول أن يجعل الرأسمالية المصرية تسهم فى مشروعات التنمية لكن هى ما كانتش عايزة .. هو الأول عمل قرار سنة ٥٩ بالتدخل فى البورصة .. فالرأسمالية المصرية حسبت إن ده تدخل فى شئوننا .. تضررت وقررت الامتناع عن المساهمة فى المشروعات .. فجاءت أول سنة فى الخطة الخمسية ٥٩ / ٦٠ الرأسمالية المصرية ما ساهمتش بحاجة .. فأخذ إجراءاته بتاعة تأمين بنك مصر والبنك الأهلى .. وسنة ٦١ إجراءات بالتأميمات الشاملة علشان يقدر يسيطر على المخدرات الموجودة ويقم خطة تنمية .. وفعلاً عمل خطة التنمية الأولى .. دى ضرورة كانت بتواجهه إذا كان يريد أن يتقدم .. إذن كانت فيه ضرورة سياسية وضرورة اقتصادية » .

• ويقول د . حسن عباس زكى : « والله إحنا نتكلم فى الموضوع ده بشيء من الصراحة .. التحول الاشتراكي ده لم يأتى إلا من صاحب الثورة .. قامت الثورة .. وبذه يحمى الثورة ولقى إن الشعب فقير .. ٩٠ ٪ من الشعب فقير و ١٠ ٪ يملكون ٨٠ ٪ من ثروة البلد .. وما يملكونهاش نتيجة جهد .. لا .. زى ما شغنا فى الأرضى الزراعية .. الملك يوزعها والإبديات وما إلى ذلك .. وكانت نفس البنوك تشارك فى خلق طبقات .. فكانت دى الوسيلة اللي يقدر بها يحط إيده عليها .. هو نوع من أنواع التحول الاشتراكي اللي الدولة تبقى فيه لها اليد الطولى فى كل شيء .. ليه ؟ وجد فى وقت من الأوقات مثلاً إن المتاجر تسمتورد السلع اللي هى عايزاها .. عملت حصة .. طيب عملت حصة واستوردت .. ويبقى بيع بالسر اللي يعجبه ويكسب .. يبقى أنا اللي جبت له النقد الأجنبى وهو اللي بيكسب به .. قال الله طيب

يبقى أنا اللى أوزع أو أأمم أو أحط إيدى على هذه المحلات .. بحيث إن يبقى فيه سياسة معينة للتحويل الاشتراكى .. لكن هذا علشان يتم يحتاج فلسفة وفكر .. الواقع يمكن دى كان فيها عيب شوية .. لأن حينما تكون الفكرة بنت شخص .. وهو صاحب الفكرة .. ولذلك فأنا أكثر فى وقت من الأوقات بعض الصحفيين للأسف .. ده اللى بيصنع الدول .. تتلاقى واحد عاوز يناقش يقول الاشتراكى دى ما فيش أحسن منها .. دى كذا وكذا ويشرحها .. نسمع ثانى يوم أن رئيس الجمهورية جابه وقال له الكلام ده إزاي ؟ فأنا مرة حتى قعدت قلت له طيب ما تقوللى بالضبط .. عاوزين تفسير لهذا علشان يبقى فيه أسلوب فى الاشتراكية .. أنا نفسى بسأله مرة .. قلت له يا سيادة الرئيس ليه أخذت الناحية الاشتراكية دى ؟ أنا فاهم الأسباب الاقتصادية لكن إيه اللى دفعك لهذا ؟ زى كل شىء فيه أسباب مباشرة وأسباب غير مباشرة .. قال لى فى كل مكان أحضر حفلة لأم كلثوم وتقول « الاشتراكيون أنت إمامهم .. الشعب كله يصفق .. قلت الله ده الشعب عاوز اشتراكية » !! حقيقى حصل هذا .. فأحس إن ده مطلوب .. يقول لك .. نبض القائد الصبح اللى هو يعكس إحساس الشعب له وسائل الإعلام فى الصحافة والإذاعة أيضا .. الناس بتصفق له ويتفرح .. من هنا استوحى الفكرة ودرسها فعلاً وخرج منها إلى إن ده السبيل الوحيد اللى يمكنه يحط إيده على كل شىء ويجس التوزيع .. فمثلاً يقولك لازم بالبطاقات .. أضمن إن كل واحد أخذ حقه .. الفقير أخذ حقه والغنى اللى هو قادر يأخذ حقه بقدر معين .. والباقي يدفع الثمن المطلوب .. الناحية الأخرى ودى أيضا مهمة أنه لا ننسى إن الدول الغربية بتعاضد النظام وتعاوى الثورة .. وكان فيه كثير من المؤامرات وكثير من المشاكل اللى خلقتها لنا زى المد العالى .. وزى محاولة عدم إقراض مصر زى تجميد الأرصدة فى وقت من الأوقات .. لما كانت عندنا أرصدة .. وخلقنا أنظمة اقتصادية خاصة .. وكانت فيه اتفاقيات ثنائية مع بعض الدول الاشتراكية لأن هى اللى بتقتنع بهذه الاتفاقيات الثنائية كانت تتيح لنا فرصة إا نستورد سلع وما ندفعش ثمنها .. أحط ثمنها فى البنك يشتروا به سلعاً .. يعنى فى الوقت نفسه لقيت مجالاً للتصدير .. فهذا الأسلوب يفيد الدولة داخلياً .. يفيدها فى تجارتها الخارجية .. ويفيدها فى التعامل العالى .. وأيضاً التأييد السياسى أو العسكرى .. أو النقطة اللى كانت تهمة أيضا وهى الحصول على السلاح اللازم .. وما كانش فيه سبيل للحصول عليه إلا من هذه الدول .. ويندفعه فى الحسابات اللى بتشتري منها سلع فى مصر ..

• وبدأت القرارات الاشتراكية والتأميمات ...

• ويقول د . حسن عباس زكى : « أنا أذكر لما اتعمل التأميم والناس حسنت إنه هناك إتجاه لهذا الوضع الاشتراكى .. أنا واحد من الناس اللى طلب منى أن أنفذ هذا .. ويمكن أنا كنت أول واحد أعرف قبل ما يعلنها الرئيس » .

• ويقول سامى شرف : « شوف موضوع التأميمات لم يكن له معنى لا أول ولا ثانى ولا مليون .. إنك تضر أشخاصاً .. لكن كان معناه بالدرجة الأولى والمليون .. إنك بتعيد توزيع الثروات .. لا يمكن دين أو أخلاق أو قيم أو مبادئ تقبل إن واحد يعيش وواحد لا يعيش ..

الرسول عليه الصلاة والسلام قال إن الناس سواسية كأسنان المشط .. سيدنا عمر قال الناس شركاء في الماء .. والأديان بقول كده .. وأنا ما أقدرش أقولك إن أنا متبرح في الأديان الأخرى .. لكن أكيد الأديان خطها الرئيسي واحد .. لأنها منزلة من الخالق سبحانه وتعالى .. فأكد إن جميع الأديان الأخرى يتحض وتدعو إلى المساواة وإلى التوازن على الأقل .. معنى دائما يقول لك إيه خير الأمور ؟ الوسط .. معنى إيه الوسط ؟ .. الوسط فى كل شىء معنى لا أبقي متطرفاً فى دى .. ولا متطرف فى دى .. الوسط معنى التوازن .. أحد أهداف هذه الثورة اللى اتفق عليها وأقرت فى الميثاق إقامة مجتمع الكفاية والعدل .

• **ويقول أمين شاكى :** « بعدين بعد كده ابتدا الروس يصروا على وجهة نظرهم فى موضوعات معينة . وبدلوا يقدروا على عبد الناصر أن يطبق فى مصر بعض النظم المطبقة عندهم زى التأمين .. ده ما كانش تفكير عبد الناصر ده تفكيرهم هم .. أن تصبح الدولة هى المالكة .. ما هو أصل التأمين ده معناه ملكية الشعب لمصادر الإنتاج .. ده معنى التأمين يبقى ملك للشعب .. هذا المصنع أو وحدة الإنتاج دى اللى ملك الفرد تبقى ملك المجموعة .. الواقع هو ده اللى موجود فى روسيا وأن كل أجهزة الإنتاج ومصادر الإنتاج أصبحت ملك للدولة .. عملت رأسمالية للدولة وهى أسوأ أنواع الرأسمالية .. ودى ضارة جدا بالعمال .. لأن العامل لما يكون أنت المالك يبقى أنت شخص يقدر يكون خصماً معاك .. ويروح معاك المحكمة .. ويأخذ حقه .. الخ .. لكن لو الخصم بتاعه الدولة .. ما يقدرش يأخذ منها حاجة .. لأن الدولة لو لقت إن العامل ده حيقدر يأخذ منها حاجة حتطلع قانون توقفه وتوقف الإجراءات اللى هو بيعملها وهكذا .. ففرضوا عليه عملية التأمينات .. صحيح فى سنة ٥٧ و ٥٨ هو عمل تأمين المؤسسات العالية وده كان ضرورياً جدا .. لأن إحنا ما كانش عندنا غير بنك مصر وبنك القاهرة .. كل البنوك بخلافها حتى البنك الأهلى كانوا تحت السيطرة الأجنبية .. فقطاع المال ماكانش فى إيدنا ودى عملية خطر جدا .. لأن قطاع المال له دور أساسى فى التنمية الاقتصادية والاجتماعية فى البلد .. لكن ما كانش فى تفكير عبد الناصر إنه يأخذ الوحدات الإنتاجية اللى هى ملك أفراد وينقلها للدولة .. وما كانش فى رأى عبد الناصر أيضاً مركزية التخطيط .. لا .. هو كان عاوز يعمل تخطيط علشان المصانع الكبرى التى لا يمكن للقطاع الخاص أن يقوم بها زى صناعة الحديد والصلب .. زى « كيما » فى أسوان دى أكبر صناعة سماء .. زى السد العالى .. دى حاجات ما يقدرش يعملها القطاع الخاص .. ده كان تفكير عبد الناصر .. لكن مع الوقت فضلوا وراه .. وطبعاً قدروا يصطادوا على صبرى ومحمد أبو نصير اللى كان وزير التجارة وخلوه بأمر كل ممتلكات القطاع الخاص .. لأنهم دخلوا فى ذهنه إن الشخص المالك اللى عنده إمكانيات مالية ممكن أن يكون خطراً على الثورة وأن أهم حاجة يجب أن يفكر فيها هى أمن النظام .. وهكذا انتقل عبد الناصر من النقيض إلى النقيض .. وهم عندهم نظام محكم لا يمكن لأى إنسان أن يغيره .. معنى سكرتير الحزب يتغير أو رئيس الحزب يتغير فلان يتغير فلان .. لكن الـ « System » (النظام) ما يتغيرش أبداً .. وبذلك عبد الناصر عمل هذا النظام الخطأ اللى أخذ ضرورته من اللى موجود فى الاتحاد السوفيتى .. ولذلك دى ما كانتش اشتراكية .. الاشتراكية

هناك دى اسمها شيوعية .. لأن كان فيه اشتراكية فى السويد وفى النرويج وفى إنجلترا لكن غير هذه .. هذه بتحرمك من الملكية وتحرمك من الحرية .. من الاثنين .. وهذا ما حدث فى مصر .. وكان غير مسموح لأى إنسان مهما كان وفى أى منصب إنه يحاول تغيير هذا النظام .

• كما صدر قانون تنظيم الصحافة ...

• ويقول أحمد حمروش : « حرية الصحافة تأثرت بعد الثورة أو بعد التأميم لأن فى السنوات الأولى من الثورة التأييد كان جارفاً لثورة ٢٣ يوليو والناس كلها كانت حاسة إنها فعلاً تحرر من الظلم ومن القيود الاجتماعية .. لكن مع تطور الوقت أصبحت الصحافة .. تحت ضغط مبالاة الحاكم ومحاوله إرضائه » .

• هل لأنها مؤمنة ؟

• « مافيش شك إن التأميم كان ضربة لحرية الصحافة .. يعنى لو إن الصحافة بقيت كما هى وأصحاب الصحف استمروا فيها لكان فيه ديمقراطية .. لأن الديمقراطية لا تختلف ولا تتفصل عن حرية الصحافة .. فحزب الديمقراطية يعنى ضرب حرية الصحافة » .

• وأسأل شمس بدران : موضوع تنظيم الصحافة حصل إزاي .. هل أوحى أحد للرئيس به ؟

• « أيوه .. طبعاً هيك .. وكان هو الوحيد فى الدولة اللي بيأخذ فى الوقت ده ٥ آلاف جنيه .. الوحيد فى الدولة اللي بيأخذ مبلغاً أكبر من أى واحد فى الدولة » .

• أكبر من رئيس الوزراء ؟

• « آه .. كان وقتها يعنى .. الوحيد اللي كان مستثنى من الحد الأعلى للأجور والمهيات » .

• تقول فى مذكراتك إن « الأستاذ هيك كان حريصاً على أن يصنع من الرئيس عبد الناصر أسطورة » .. توضح لى هذه النقطة ؟

• « هو كان زى ماوتسى تونج مثلاً .. أصبح زعيماً وله تأثير على العالم كله .. فكان جمال عبد الناصر له تأثيراً على العالم العربى على الأقل .. فمن هنا نشأت الفكرة بتاعة خلق الأسطورة .. فكون هيك ببطلق الأسطورة .. ما نقدرش نقول إنه كان بيعمل كده تزلفاً فلما مات عبد الناصر أصبح هيك فى موقف الدفاع .. وده لا يعيب الأستاذ هيك .. أنا مش بادافع عن هيك أو بأهاجم هيك .. أنا بأقول الوقائع .. وطبعاً حينكر الكلام ده لو أحد قال له .. هو طبعاً مش حيرد على الكلام ده .. آه خلق الأسطورة وده موضوع لا جدال فيه » .

• ويقول د . عبد العظيم رمضان : « أنا رأى الشخصى فى الأستاذ هيك أنه لا يكتب بموضوعية المؤرخ ولكنه يوظف الوثائق والأحداث حسب رأيه السياسى .. ويستطيع أن يغير رأيه وبالتالي يغير استخدامه للوثائق والأحداث » .

• **ويقول خالد محبى الدين :** « أنا كنت الأول رئيس تحرير « المساء » .. وبعدين كنت رئيس تحرير « أخبار اليوم » ٦٤ / ٦٥ .. لكن سنة ٦٠ وهو يجهز للسيطرة رأى إنه يجب أن يسيطر على وسائل الإعلام .. أخذ بنك مصر وأخذ البنك الأهلى وجعل الشركات ملكية عامة للشعب وعمل قانون سلطة الصحافة .. علشان يقدر يتحكم فيها .. دى كانت ضرورة من الضرورات .. ما هو مادام يخطط إنه يعمل مجتمع موجه .. فالتوجيه يشمل الإعلام .. عاصرت فترة التأميمات كلها .. فترة التأميمات فى سورية وفترة التأميمات فى مصر » .

• **ويقول مصطفى أمين :** « كان فيه رقابة شديدة على الصحافة وعلى الإذاعة والتليفزيون طوال الثورة .. يعنى كان فيه عندنا رقيب فى الجرنال .. الأول كان رقيباً عسكرياً وبعدين بقى رقيباً مدنياً .. مصر زعيمة البلاد العربية فيها أقوى صحافة وفيها أقوى مسرح وفيها أقوى سينما وفيها الكتاب المصرى وهو الكتاب الأول .. كل ذلك فقدها .. على سبيل المثال إحنا مثلاً أخبار اليوم كانت تبيع فى بيروت ٢٥ ألف نسخة .. بعد التأميم تبيع فى لبنان ١٥٠٠ نسخة » .

• **ويقول أنيس منصور :** « دى حكاية طويلة .. تأميم الصحافة ده خط سياسى .. بلد اشتراكية شيوعية إلا شويه .. طبيعى إن الدولة تسيطر على كل وسائل الإعلام أو المعرفة .. فتأممت الصحف كلها واتخط فى كل صحيفة رقيب .. أنا أنكر أول اجتماع عمله الرئيس عبد الناصر لرؤساء تحرير الصحف .. أنا كنت رئيساً لتحرير مجلة الجيل .. فرحنا قابلنا الرئيس .. فدار الكلام أشكلاً وألواناً .. فسأل الرئيس عبد الناصر .. عاوزين الصحافة حرة ولا عاوزين تكونوا إنتم رقباء على الصحف ولا أحط لكم رقيباً ؟ .. مصطفى أمين وعلى أمين وفكرى أباطه مدوا أيديهم .. وقالوا لأ حططنا رقيب .. ليه بقى .. لأن الرقيب عارف إيه اللى يتنشر وإيه الذى لا ينشر .. لكن عندما مايبقاش فيه رقيب .. نحن اللى نتولى الرقابة وما نعرفش إيه اللى يصح وإيه اللى لا يصح .. فطالبا أو طالبا أكبرنا سنا وقدرنا بالإبقاء على الرقيب فى كل صحيفة » .

• **وأسأل صلاح أبو سيف :** والسينما ؟

• **و لا ..** السينما لم تؤم حتى فى الستينات لما عملوا القطاع العام .. برضه كان مسموحا للقطاع الخاص إنه يشتغل لكن ده باتجاه الفنانين أنفسهم .. اقتناعهم بالثورة واقتناعهم بأن فيه تغيير فى المجتمع .. وأن النظريات الاجتماعية أبدت تتغير فابتدت المواضيع كلها تتغير .

• **والهدف من التأميم لم يكن خدمة الجماهير العمالية فحسب .. لكنه كان أيضاً لهدم الطبقة الرأسمالية التى تستطيع التحرك ضد نظام الحكم فى مصر .**

• **ويقول عبد اللطيف بغدادى :** « التأميمات دى ماكانش لينا خبرة فيها .. عبد الناصر كان عنده اتجاه للسيطرة الكاملة على أنوات الإنتاج على أساس إنك مادمت بتسيطر اقتصادياً يبقى بتسيطر سياسياً .. ده كان فكره » .

• **ويقول مصطفى كامل مراد :** « التحول الاشتراكى حدث بعد ميثاق العمل الوطنى فى سنة ٦٢ لكن التحول الأكبر بدأ بعد ٦٧ .. هى كانت الفكرة مزيداً من التأميم ومزيداً من الاستيلاء على

أموال الناس ومزيداً من المصادرة بشكل لم يكن منظماً .. بغرض إن مصر دولة اشتراكية مثل الاتحاد السوفيتي » .

• **مش لكسر رأسمالية المصريين وأصحاب المال ؟**

• « كانوا اتكسروا من زمان لكن الفكرة إني معنى مصر تتحول إلى نظام اشتراكي محكم .. والحمد لله لم يتم » .

• **ويقول د . عبد العزيز حجازي :** « أنا عاوز أقول حاجة حقيقية لابد أن نضعها في دماغنا .. لأن النقد سهل .. ٧ سنوات من ٦١ إلى ٦٧ حتى لم يحصلوا ٦ سنوات .. فترة التأميم .. كانت شاملة .. ودي كانت الخطورة .. ده كان القرار الصعب بتأميم كل القطاعات .. وبالتالي رأس المال المصري خرج لم يبق فيه مشاركة من مدخرات الأفراد .. هذا العمل للأسف بقدر ماخدم المعركة من توفير السلع والخدمات اللازمة للمعركة في ذلك الوقت .. بقدر برضه ما خدم توظيف العاملين في الدولة .. برضه نعتبر كانت هناك أخطاء في الضغط على القطاع الاقتصادي .. هو حقق إيجابيات ولكن كان له سلبيات .. والرئيس نفسه اعترف بذلك » .

• **ويقول عبد المحسن أبو النور :** « عاصرت فترة التأميمات كلها وعاصرت فترة التأميمات في سوريا وفي مصر » .

• **ويعلق د . مصطفى خليل فيقول :** « ثورة يوليو .. أهم إنجازاتها .. الأفكار اللي بشرت بها قبل سنة ٦١ » .

• **وأنشأ عبد الناصر الاتحاد الاشتراكي ...**

• **ويقول أحمد حمروش :** « كان الاتحاد القومي خاضعاً لنفوذ العسكريين .. كذلك كان الاتحاد الاشتراكي كما هو واضح في تشكيل الأمانة (٩ ضباط) .. ونص قانون الاتحاد الاشتراكي على عضوية أفراد القوات المسلحة في الاتحاد الاشتراكي .. كما نص أيضاً على عضوية رجال الشرطة ورجال القضاء » .

• **ويقول محسن عبد الخالق :** « سمعت راشد البراوي .. يقول لعبد الناصر لكي تبقى ثورة لابد أن يعطى لها أيديولوجية فكرية .. لتحقيق أهدافها .. والأيديولوجية التي يمكن أن تعطى للثورة هي الاشتراكية التي تحورت بعد كده إلى الاشتراكية العلمية .. الخ . وتلى ذلك إجراءات .. يعني تحديد الملكية الزراعية لا خلاف عليه .. لكن بعد ذلك المصادرات والحراسات والسجون وامتهان الإنسان .. هذا ما كان يجب ألا تفعله ثورة يوليو » .

• **وكان عبد الناصر قد أصدر ما أطلق عليه « الميثاق » من منطلق أن كل ثورة اشتراكية لابد أن يكون لها فكر يعبر عنها .. وتم الاستفتاء على الميثاق ...**

• **ويقول أحمد حمروش :** « عهد عبد الناصر إلى محمد حسنين هيكل بالصياغة في الصورة التي عرفت باسم الميثاق » .

• وأسأل مصطفى كامل مراد : ماذا تقول عن الاتحاد الاشتراكي ؟

• « هو حزب واحد طبعاً .. حزب الثورة تحت مسميات مختلفة .. هيئة التحرير حتى سنة ٥٧ .. ثم الاتحاد القومي من ٥٧ إلى ٦٣ .. ثم الاتحاد الاشتراكي العربي من ٦٣ حتى ظهور المنابر في سنة ٧٥ .. حزب الثورة مازال شغالاً لحد النهاردة تحت مسميات مختلفة .. حزب مصر ثم الحزب الوطني وإحنا كلنا منيعنا حزب واحد .. فيما عدا طبعاً الوفد والإخوان المسلمين .. ودى لم تكن من أحزاب الثورة » .

• وأسأل سامى شرف : ما الذى تأخذه على الاتحاد الاشتراكي ؟

• « أنا لى مآخذ على التنظيم الطليعى وعلى الاتحاد الاشتراكي .. نمرة واحد .. البيروقراطية .. نمرة ٢ الانتهازية .. بمعنى جيد مش بمعنى سيء .. أى واحد فى المجتمعات النامية وفى دول العالم الثالث بيشفو السلطة عايزة إيه » .

• يراضيه ؟

• « ما أعرفش أظن الإجابة واضحة مش محتاجة تفسير .. يعنى دول يمكن العنصرين الأساسيين اللى بأعترهم سلبيات بالنسبة لتجربة التنظيمات السياسية فى مصر .. بدءاً من هيئة التحرير فالإتحاد القومى فالإتحاد الاشتراكي .. وهذه العدوى انتقلت إلى حدّ ما إلى التنظيم الطليعى بشكل أقل أو أدنى .. يمكن أقدر أقول إن البيروقراطية تحكمت بشكل ما فى آليات وطبيعة عمل التنظيم الطليعى .. ولكن هذا التنظيم الطليعى نشوفه النهارده .. من تدرب فيه وتعلم فيه واستفاد منه وأصبح إيه ؟! » .

• ويقول كمال الدين حسين : « يمكن آخر الحاجات اللى قلتها لجمال عبد الناصر « لكم دينكم ولى دين » فى مفهوم الاشتراكية طبعاً وما يستتبعه من حاجات مالية وحاجات فى السلطة .. يعنى الديمقراطية أو عدم الديمقراطية والحكم المطلق علشان كل الثورات والانقلابات التى حصلت فى إفريقيا والعالم الثالث .. كلهم تبنيوا موضوع الاشتراكية علشان البقاء فى السلطة .. علشان نفوذ حزب واحد .. هو اللى بيحكم .. ولو إحنا فى الميثاق وتقرير الميثاق حددنا ملامح الاشتراكية اللى الناس موافقة عليها علشان كانت نقال فى الميثاق كلمة كده الناس أخذوا بالهم منها على طول وانزعجوا لها كلمة « الاشتراكية العلمية » .. بالمفهوم الماركسى فى كتب ماركس تؤدى إلى الشيوعية فى الآخر .. لكن سألوه فى المؤتمر .. اشتراكية علمية يعنى إيه ؟ قال لهم إحنا بنحل مشاكلنا بأسلوب علمى .. طيب اقتنعنا بكده ، ولجنة تحضيرية عملت حاجة اسمها تقرير الميثاق .. وحددت فيه ضوابط الاشتراكية والمجالس الشعبية والحاجات دى .. وبعدين وجدت الضوابط دى مش ماشية وحصل مناقشة فى مجلس الوزراء .. كنا راجعين من الجزائر .. المفروض إننى استقيل قبل كده قال لى تعال معايا رحلة الجزائر ويوغوسلافيا وحضرنا ورجعنا .. ولم نتكلم فى الموضوع أبداً .. وبعدين حضرت جلسة مجلس الوزراء .. وتكلمت عن تأميم ٣ لوارى وتأميم محليج مش هو ده اللى متفقين عليه .. اللى شاف يقول كده

مافيش حاجة تتعمل أكثر من اللي اتعمل بعد قوانين الاشتراكية غير لما المجالس الشعبية المنتخبة تقرر .. وإحنا كان لسه ما فيش مجالس شعبية منتخبة اتعملت .. وفعلا كان ميعادها ٢ نوفمبر سنة ٦٢ ولم تعمل فى ٢ نوفمبر ولا سنة ٦٣ كلها .. وبدأ يفكر فيها فى مارس ٦٤ لما اتعمل الدستور المؤقت .. ومع ذلك طلع معاه القانون ١١٩ .. المهم إحنا بنتناقش فى هذا الموضوع بقول إحنا ملتزمين بالميثاق .. قال لا ما فيش حدود للاشتراكية .. يعنى إيه ما فيش حدود للاشتراكية ؟ يعنى الاشتراكية تم الاشتراكية ومزيد من الاشتراكية انتم إيه فاهمين إيه .. ده الجزائر سبقتنا فى الاشتراكية .. ده إحنا ملتزمين بالميثاق وتقرير الميثاق .. طيب مين اللي قال إن الجزائر سبقتنا فى الاشتراكية ؟ ومين قال إن إحنا فى سباق مع الجزائر ؟ ومين قال إن الجزائر نجحت فى الاشتراكية ؟ وأنا أعلم إن الجزائر بتتعرض فى الاشتراكية رغم كل البترول اللي طلع لهم .. وبعدين إحنا متفقين مع الناس على نوع معين من الاشتراكية .. قال لا مفيش هنا الكلام ده .. وبعدين حصلت مناقشة تاني فى مارس ٦٤ آخر مناقشة حصلت بيننا يعنى كان هو يسترضينى وكنت قاعد فى البيت .. وبدأنا نتكلم تناقشنا ومن ضمنها موضوع الاشتراكية قلت له .. والبقال والورشة حتأممهم برضه ؟ قال آه .. أنا قلت كلمة ما فيش داعى نقولها .. ولو إن مصطفى أمين كتبها » .

* مصطفى أمين قال إيه ؟

* « قال » فى المشمش !! وبعدين يقول لى عبود أحسن ولا ستالين .. هو إحنا أتباع عبود .. أنت بتسألنى الشيطان أحسن ولا إبليس ؟ ما هو ده شيطان وده إبليس !! أنا ضد الرأسمالية اللي بتظلم الناس .. ويبقى ناس عندهم أموال لا حصر لها بدون وجه حق .. وناس آخرين بيعموتوا من الجوع .. مش ممكن أن أكون مع الرأسمالية بالشكل ده وأنا برضه مش مع الاشتراكية .. إحنا مفهوم الاشتراكية هو مفهوم العدالة الاجتماعية فى الإسلام .. وكنت دائما أقول كده وهو تقريبا اللي اتقال فى تقرير الميثاق .. الميثاق لم يصدق عليه كميثاق من الشعب أو مندوبى الشعب .. يمكن ألف واحد أو ألفين انتخبوا انتخاباً حراً مباشراً فى جميع طوائف مصر .. موظفين وتجار وصناع ومعلمين وكل طوائف مصر مثلت فى هذا .. ده مكتوب ده يعنى الإنسان يستمد قوته من التقرير .. ولكن اتلغى التقرير واتلغى الميثاق واتلغت كل حاجة » .

* ويضيف كمال الدين حسين : « لينين قال إن لعبة الديمقراطية نلعبها علشان نستولى على الحكم .. وبعدين تأتى ديكتاتورية البروليتاريا .. النظام الشيوعى وديكتاتورية الحزب وديكتاتورية اللجنة المركزية والمكتب السياسى .. وبعدين ديكتاتورية ستالين فى الآخر .. لما تيجى تناقش الواحد فيهم زى ما تناقشنا كثيرا مع الماركسيين سواء قبل الثورة أو بعد الثورة يقول لك ما هى دى المرحلة وما يقدرش يقول إيه .. ومع ذلك الماركسيين دول فى آخر الأيام بعد إحنا ما خرجنا حتى والاتحاد الاشتراكى هو اللي ماشى .. وهم قالوا إن إحنا خلينا الحزب الشيوعى إنحل .. وراحوا داخليين فى الاتحاد الاشتراكى كماركسيين .. وهم ركبوا الموجة وأخذوا السلطات وكل حاجة ولم يعملوا حاجة بالنسبة للديموقراطية .. وبعدين فى رسالة من الرسائل كان أحمد فؤاد فى المكتب بتاع الأخ خالد محبى الدين وكان بعت لخالد قبل الثورة

ويقول له إنت لازم ترجع قريباً علشان سننقل بره السلاح .. لازم ترجع قريب علشان العملية استوت وبعد سنين قليلة جداً سوف نستولى على الحكم .. معنى العملية فى الآخر نستولى على الحكم .. مش الوصول للحكم بالطرق الشرعية .. قال أنا مش مصدق الكلام الللى اتقال والللى بسببه حصل الانقسام ده .. إن كان فيه ديمقراطية حقيقى منتظر إنها تتم على يدى أحد من السلطة .

• ويقول نجيب محفوظ : الميثاق فى الحقيقة مادة تنفع لمستور قومى لو نفذ صح .

• بينما يقول د . ميلاد حنا : جاء الاتحاد الاشتراكى ٦٢ .. هس .. كلنا اتحاد اشتراكى .. الللى يخرج من الاتحاد الاشتراكى بيبقى فيه عليه كلام .. وفصلت الحركة الكلامية ناتجة وتحت الإطار والمظلة بتاعة الناصرية .. ما حدش يخرج عنها .. اليسار لا يقدر يخرج عنها .. واليمين لا يقدر يخرج عنها .

• وأسأل فكرى مكرم عبيد : بماذا تسمى هذه الفترة ؟

• أسميها نكسة للديموقراطية .. لأن الديمقراطية بغير أحزاب ديكتاتورية .. الديمقراطية هى رأى والرأى الآخر أيا كانت تفاهته .. أيا كانت ضلالتة .. أيا كانت أخطاؤه .. فهو رأى آخر إنما يجب أن تقارن الحجة بالحجة .. أنت لما تكون ملاكماً فى حلبة لابد يكون أمامك واحد تلاكمه ويلاكمك .. تتغلب عليه أو يتغلب عليك .. إنما يوم ما تكون فى الحلبة لوحدك منظر لك تقول غير مقبول .. لا يمكن أن تجمع بين الوطنية .. بمعنى التمسك بأهداف الوطن وبين الاشتراكية الللى هى عالمية كما كانت أيام الشيوعية .. لأن الشيوعية والاشتراكية متقاربة .

• وأسأل عبد اللطيف بغدادى : ماذا نقول لنا عن الاتحاد الاشتراكى ؟

• تنظيم سياسى واحد .. فاشل .

• وأسأل د . ثروت عكاشة : موافق ولا لأ على الميثاق ؟

• اشطب هذا السؤال .

• والاتحاد الاشتراكى ؟

• بالنسبة للاتحاد الاشتراكى .. كانت سلبياته تزيد على إيجابياته .. إن كانت هناك إيجابيات أصلاً .

• وأسأل عبد المحسن أبو النور : لو تكلمنا عن الاتحاد الاشتراكى وقد كنت أميناً عاماً له .. هل تقدر نقول إن التجربة حققت ما كانت تصبو إليه من أهداف ؟

• ما كنش ممكن بأى حال من الأحوال إن التنظيم الشعبى يجمع ضمن عناصره ناس أضيروا من هذه التأميمات .. فكان لابد أن يكون هو الوعاء السياسى للكادحين .. فئة العمال وفئة المتقنين والجنود والرأسمالية الوطنية الللى هى قامت الثورة فعلاً لصالحهم فتكون منهم الاتحاد

الاشتراكي .. الاتحاد الاشتراكي يمكن بعض الناس تقول لك لم يكن له فاعلية كبيرة ، دون شك إن الاتحاد الاشتراكي حزب كبير كان فيه أعداد بالملايين .. هذا الاتحاد الاشتراكي خلق سياسيين كبار » .

• هل كانت هناك معارضة ؟

• « لا .. ماكنش فيه أحزاب قصاده بس كان فيه داخله عناصر أيضا لها رأيها .. كان يحتمل الآراء المختلفة .. وكان فيه كلام وردود على هذا الكلام .. فيه الآراء المختلفة حتى إن مثلا فى اللجنة المركزية اللي كان بيرأسها عبد الناصر .. كان فيه أخذ وعطاء فى المواضيع السياسية والاقتصادية لا أول لها ولا آخر .. معنى لم يكن عملية ناس يقولوا أمين .. لأ ناس ببيحثوا الأوضاع المختلفة الاقتصادية والسياسية والعسكرية فى البلد ويقولوا رأيهم فيها ورأى الأغلبية بيمشى .. دون شك إنهم دربوا أعداداً كبيرة .. عايز أقول كل العناصر اللي تنتمى للأحزاب الموجودة حالياً على اختلافها كلهم كانوا أعضاء فى الاتحاد الاشتراكي .. واتربوا داخل الاتحاد الاشتراكي » .

• ولماذا إذن نسمع بعض التشنيعات على الاتحاد الاشتراكي ؟

• « طبعاً العناصر النهرادة اللي بتهاجم الثورة بتهاجمها عن طريق الاتحاد الاشتراكي .. وتقول إن الاتحاد الاشتراكي كان سلبياً وما كنش بيعمل حاجة وكان بالعكس بيبيلج عن الناس ويكتب تقارير .. آه كان الاتحاد الاشتراكي يكتب تقارير بس تقارير فى المشاكل بتاعة الناس اللي فى القرية .. فى المدينة .. فى خلافه .. بيطالب بتصليحها لكن ماكنش بيقول فلان الفلانى قال على فلان كذا والله امسكوه .. مافيش حاجة من هذا القبيل .. هذه تشنيعات بتنتقل من الناس اللي هى مضادة للثورة أصلاً .. فطبعاً تخترع أى كلام من هذا القبيل .. تقدر تقول لى العناصر اللي باقول عليها دلوقتى اللي هى مكونة للأحزاب الموجودة حتى الحزب الوطنى .. أعضاء تربت وترعرعت وتعلمت السياسة داخل الاتحاد الاشتراكي .. دى كانت بكتب تقارير فى الأخرى .. علاو زين نفهم من رئيس الحكومة إلى أصغر وزير وأصغر وكيل وزارة وخلافه كانوا أعضاء فى الاتحاد الاشتراكي وتنظيماته ولا واحد فيهم ما كنش كده ؟ » .

• كلمة اللجنة المركزية أليست من النظام الروسى ؟

• « أى تنظيم سياسى بيبقى متدرجاً بهذا التدرج .. سواء كان مسمى بهذا الاسم أو مسمى باسم تانى » .

• ويقول عبد المجيد فريد : « كان عملاً جماهيرياً كبيراً بغض النظر عن الملاحظات اللي قُلت عن الاتحاد الاشتراكي إنما كانت القيادات الموجودة فى ذلك الوقت بتحاول تخدم الناس خدمة كبيرة جداً .. وكانت المباشرة وقتها لهذا الموضوع » .

• وأسأل د . سليمان حزين : معلوماتى إنك كنت أحد كتّاب الميثاق .. ما الذى تذكره عن هذه الواقعة ؟

• ، اللي أنكره إنه عندما قرر الرئيس عبد الناصر أن يُدخل الميثاق .. كان سنة ٦٢ هو اختار ١٢ شخصاً أنا كنت واحد منهم ليضع كل منهم تصوراً للميثاق .. هو يعلم عنى بالذات إن أنا لا أقبل أن يملئ على رأى ولا أن أوجه وإنما شعر إن الصديق والأمانة تقتضى أن أتحمل مسئولية ، .

• ومين كان مع حضرتك ؟

• لما تكلمنا فى الموضوع ده مع عبد الناصر .. جم عرضوا علينا الميثاق .. كما وضعه عبد الناصر وأعتقد إنه ساعده فى كتابة الميثاق محمد حسنين هيكل .. ده اعتقاد منى إنما كانت فيه كثير من الأفكار التي ذكرتها واللى ذكرها غيرى .. وأنا لا أعرف الآخرين .. لإن كان عندنا تعليمات .. يعنى أول واحد كلمنى فى ذلك الوقت كان كمال الدين حسين .. وكان أيضاً على صبرى .. وأنا كنت واحداً من الأعضاء فى التنظيم اللي دخلوا .. وأنا كنت أول واحد رئيس جامعة .. رأيت أن أدخل فى السياسة محتفظاً باستقلالى .. وألا أكون تابعاً .. وأنا لما دخلت فى السياسة كان فى الاتحاد القومى لم يكن فيه أحزاب .. وإنما لو كان أحزاب ومنابر كنت احتفظت لنفسى بمنبر خاص .. أنا مش مع الأحزاب .

• وهل طبق الميثاق فعلاً يا . حزين ؟

• الميثاق لم يطبق .. لإن أنا كنت متصوراً بعض أشياء مختلفة تماماً .. وهو كان له اثنين سكرتير عام .. واحد هو المرحوم السادات .. والثانى كان كمال الدين حسين .. أنا كنت أقرب بالاتصال بكمال الدين حسين منى للسادات .. إنما أنا عينت مقررًا للميثاق بقرار خاص من عبد الناصر .. وجدت إنه من واجبنى أن أتصل بالنائب الآخر اللي هو السادات .. اتصلت به اتصالاً رقيقاً خلال الفترة كلها .

• وكما علمنا من قبل أن صلة عبد الناصر بالفكر الماركسى قديمة ترجع إلى ما قبل الثورة سنة ١٩٥٢ .. وجدير بالذكر أن عبد الناصر كان مؤمناً بتعاليم الدين الإسلامى .. ويكره التفكير الطائفى ..

• ويقول محسن محمد : إن بعض منشورات الضباط الأحرار كانت تطبع فى مطبعة التنظيم الشيوعى المعروف « حنتو » .. وقد صادرها الرئيس عبد الناصر بعد ذلك .. وهاجم الشيوعية بشدة .

• وأسأل سامى شرف : ماذا تقول عن عبد الناصر والكنيسة ؟

• الرئيس عبد الناصر كان دائماً يرفعى الكنيسة .. وكان فيه علاقات خاصة وشخصية بينه وبين البابا كيرلس .. وأنا كان لى لقاء إسبوعى كل يوم إثنين مع الأنبا صموئيل اللي هو أسقف الخدمات .. كنا إما نلتقى عندى فى المكتب يا إما بأرواح له فى الكاتدرائية .. وفى يوم من الأيام جاء لى أحد رؤساء مجالس إدارات شركة بناء وقال لى إن فيه فكرة عند البابا - هو

مسيحي يعنى - إنه يعمل كاتدرائية جديدة ومحتاجة إلى دعم مادي والكنيسة مش حقدرة .. أنا قلت للرئيس .. فحذر شيك بمبلغ أياها كان يساوى النهاردة أرقام فلكية ولو قلته دلوقت حبيقي متواضعاً .. وأنا سلمته للأتبا صموئيل وصله للبابا كيرلس وجاء لى الأتباء صموئيل تانى يوم وقال لى البابا عايز يقابل .. كان تعباناً حتى إنه كان راقداً على السرير .. قال لى أنا كنت عاوز أنزل أقابل الرئيس علشان أشكره لكن إنت شايف أنا راقد .. وراح مساكنى حضنى وبابى من هنا ومن هنا وقال توصل دول للرئيس جمال عبد الناصر .. العلاقات فى المجتمع العربى .. بين القبطى والمسلم كانت ممتازة طول الوقت وما كانتش فيها مشاكل .. ولما كان فيه مشاكل كانت بتتحل فى نفس اليوم سواء فيه كنيسة بتتبنى أو كنيسة بتتهدد . كانت بتتحل فى نفس اليوم » .

• وأسأل البابا شنودة : كانت علاقة البابا كيرلس بالرئيس عبد الناصر إيه ؟

• « فى الأول لم تكن تمام .. وبعدين أصبحوا أصدقاء .. والعلاقة أصبحت كويسة » .

• ليه ما كانتش تمام فى الأول ؟

• « ربما لم يكونوا يعرفوا بعض ! » .

• إذن نستطيع أن نقول إن عبد الناصر تأثر بالفكر الماركسى لكنه لم يتبناه .. وكان لابد من الخروج بنظرية جديدة لأننا دخلنا فى مرحلة الاشتراكية ..

• يقول د . عبد القادر حاتم : « لكل وقت ظروفه علشان تشرح الوضع فى ذلك الوقت .. الاتحاد السوفيتى كان عاوز ينشر الشيوعية أبوه كان عاوز ينشر الشيوعية والمنطقة كلها مشغلة وكلها يتمول بأسلحة مختلفة .. فكان لابد لعبد الناصر أن يبحث عن السلاح فى كل مكان .. وهذا ما بدأه فى أوائل الثورة .. هو لجأ للاتحاد السوفيتى ليه ؟ .. لما طلب الأول من أمريكا ما أعطوش وكان فيه أخطاء فى السياسة الخارجية من الأمريكان أو من بعض الدول مما جعله إنه يتجه إنه يجيب سلاحاً يحمى نفسه وده حماية لمصر .. أما إن إحنا نقول الظروف دلوقتى تنطبق على اللي فات لأ .. الوضع مختلف تماماً فى هذا » .

• يقول د . حلمى مراد : « اشتراكية عبد الناصر بدأت بالرغبة فى إعادة توزيع الثروة العقارية بالذات .. والزراعية بصفة أخص .. حتى إنه ما سماه الإقطاع تحول إلى مساحات محدودة وتوزع على صغار الفلاحين .. يمكن المعنى جميل والصورة طيبة .. ولكن كان المفروض أولاً لا نزع للملكية إلا بتعويض .. ولو بتعويض مقسط على فترة طويلة .. النقطة الثانية إنه يجب أن يعطى هؤلاء الفلاحين الإمكانات التى تمكنهم إنهم يزرعوا هذه الأرض دون تدخل من جانب السلطة .. أما إنها عملية إنهم ينتقلوا من عاملين أو شغالين عند كبار الملاك .. إلى شغالين وعاملين عند هيئة الإصلاح الزراعى .. أى موظفين فى الدولة ويعاونوا نفس المتاعب ولا يحصلوا على حقهم كاملاً .. يبقى ما غيرناش فى الواقع شيئاً .. وبذلك إحنا بنجد ثمن محصول القطن اللي كان وقتها المحصول الرئيسى اللي بتستولى عليه الدولة من الفلاحين أقل

بكتير من السعر اللي بتصدر به الدولة .. هذا الفارق كان من حق الفلاحين .. ولكنه أصبح ضريبة مستترة مفروضة عليهم .. إذن هنا الفلاح ما اتغيرش وضعه .. ولذلك حتى الآن .. إحنا بنجد القرى لازالت فى الصورة الاجتماعية والعمرانية والمعيشية القديمة .. ما حصلش تحسن فى المجتمع الرفي .. ويمكن هذا أوضح فى الصعيد من وجه بحرى .. السؤال الآن كيف ننقل الاستثمارات إلى الصعيد .. علشان ننقذه من هذا الوضع المتردى والفقر الشامل الذى يسوده » .

• والاستيلاء على الأموال ؟

« كل هذا ينطبق عليه هذا المعنى .. إحنا بننقل السيطرة من فئة إلى أخرى ولكن هذا لم يؤدى إلى تحسين حال الشعب فى مجموعه .. ومن هنا بنجد إن إحنا دلوقتي بنتكلم عن الخصخصة بدلا من القطاع العام والتأميم .. ليه ؟ .. لأنه تبين لنا عمليا إن هذا لم يحقق الآمال المنشودة من حيث نهضتنا الصناعية .. وإن إحنا بقينا ننقل المصانع اللي نشترها من الخارج بآلاتها .. دون أن نحاول أن نقلدها ونصنعها ولذلك إذا أصابها البوار .. أو إنها تحتاج إلى قطع غيار نرجع نلجأ للمصدر اللي اشترينا منه هذه الآلات .. فبقينا مرتبطين بدول معينة ونبتعها اقتصاديا .. ولم ننقل صناعها عنها كما نرى فى النمر الآسيوية أو فى سنغافورة أو فى اليابان .. فبذلك لم نتحول إلى دولة صناعية إنما بقينا إحنا بنشغل مصانع أجنبية لحسابنا .. ونتبع هذه الدول فى تجديدها أو تغييرها » .

• وأسأل مراد غالب : موسكو .. هل كانت فى فترة من الفترات تحكم مصر ؟

« الحقيقة أنا عاوز أقول لكم بمنتهى الأمانة إنها لم تكن فى يوم من الأيام تحكم مصر .. الرئيس جمال مؤكد إن الناس عارفينه كويس قوى .. هذا الرجل كان حريصاً حريصاً شديداً جداً على كرامة مصر وعلى كرامته هو شخصياً كزعيماً لمصر .. كان حريصاً جداً على استقلاله بالقرار » .

• وجدير بالذكر أن عبد الناصر كان يوماً على استعداد لتقريب المسافة مع الرئيس كنيدي .. إلا أن كنيدي اغتيل سنة ١٩٦٣ وخلفه جونسون المؤيد لإسرائيل .. وهكذا ازدادت العلاقة فتوراً ..

• ويقول د . يوثان لبيب رزق : « خلف جونسون كنيدي الذى كان قد اختلف مع إيزنهاور فى وقته ضد العدوان الثلاثى سنة ١٩٥٦ » .

• وفى العيد العاشر للثورة شهدت مصر استعراضاً عسكرياً كبيراً للقوات المسلحة .. واحتفلت بإنتاج صواريخ « الظافر » و « القاهر » ...

• ويقول د . حلمي مراد : « يعنى مثلاً الرئيس عبد الناصر كان مهتماً بشعار « من الإبرة إلى

الصاروخ .. هذا لا يمكن أن يتأتى .. مافيش دولة فى العالم تستطيع أن تنتج كل شيء وتستغنى عن العالم بأسره .. مش ممكن » .

• ولم يؤثر الخلاف الذى كان قد وقع بين عبد الناصر وعامر .. على الأقل فى الظاهر .. على العلاقة بينهما .. واستمر الرجلان معاً .. وعين عبد الناصر عبد الحكيم عامر على رأس لجنة « تصفية الإقطاع » ...

• ويقول شمس بدران : « شكّلت ٣ لجان وعبد الحكيم عامر كان رئيسها .. رئيس هذه الثلاثية » .

• متى ؟

• « دى حصلت بعد حادثة .. الحادثة بقاعة إنهم ضربوا واحداً وموتوه .. فى « كمبش » .. الإقطاعيون ضربوا واحد .. الواحد ده كان صاحب حسين عبد الناصر .. أخو جمال .. فالعملية بقى تجسست وعبد الناصر ما صدق لقي حاجة بمسك فيها علشان بيتدى يخلص على الإقطاعيين .. لأنه أحس إن دول لسه لهم سلطة » .

• كان لسه فيهم الروح ؟

• « آه .. فمسك فى الموضوع ده .. وعمل بقى لجنة تصفية الإقطاع .. وكنت أنا فى اللجان دى كلها » .

• ويقول د . محمد الذكرورى : « لجنة تصفية الإقطاع كانت من الإجراءات التى تمت فى مصر .. وكانت تهدف إلى تصفية لما يمكن اعتباره قوة ثانية قد تكون مضادة للثورة فى مصر .. قانون الإصلاح الزراعى عندما جاءت الثورة سنة ٥٢ .. كان مقبولاً على اعتبار إنه فيه الحد الأقصى للملكية .. وهذا ما كان يسمى بالإقطاع السياسى والزراعى .. والثورة حتى تؤمن نفسها كانت تضرب كل القوى حتى لا يمكن أن يكون هناك من يقف أمام الثورة .. وأعتقد إن هذا لم يكن فكراً مصرياً خالصاً فاختلقت قضية تصفية الإقطاع ولم يكن لها هدفاً حقيقياً .. والدليل إن كل من خضعوا للجنة وأخذوا أحكاماً ... اللجنة المشكلة لإعادة النظر برأتهم جميعاً » .

• ولماذا كان المشير عبد الحكيم عامر على رأس هذه اللجنة ؟

• « فى الفترة الأولى من الثورة حتى وفاة المشير .. كانت هناك ثنائية فى الحكم .. ناصر وعامر .. وكان كل شيء مختلفاً فقد كانا رفقاء سلاح وعمداء الثورة .. وكان دائماً يحاول أن يصبح فى يده أكبر قدر من الخيوط التى تحكم البلد .. ولجنة تصفية الإقطاع طلب المشير عامر أن تكون تحت إشرافه .. وللتاريخ إن الرجل كان دائماً يلوم الأجهزة .. ويقول لهم إنتم عاوزين تصفوا البلد كلها .. وأنا أؤكد أن الرجل عندما طلب أن يرأس هذه اللجنة كان من أجل منع

حدوث تجاوزات .. ورغم ذلك حدثت تجاوزات كثيرة .. لكنه كان أحد صمامات الأمان فى اللجنة ، .

• وأسأل إبراهيم بغدادى : اشتركت سنة ٦٥ فى أحداث « كمشيش » .. ما الذى تذكره عن هذه المرحلة ؟

• « أحداث كمشيش الحقيقة بدأت بمقتل مواطن نتيجة خنافة على محطة سكة حديد بتاعة كمشيش .. زى ما بيحصل فى أى قرية مصرية ، ناس من قرية مسافرين اتخانقوا مع بعض فى الصباح .. رجعوا فى القطار بعد الظهر كملوا الخنافة .. طلعت طلقة مات صلاح حسين .. لغاية هذه اللحظة مافيش ولا إقطاع ولا أى حاجة .. صلاح حسين كان له أخ ضابط طيار زميل حسين عبد الناصر أخو الرئيس جمال عبد الناصر الذى كان متزوجاً بنت المشير عامر .. فمراته اتصلت بعبد الناصر وأبلغته إن الاقطاعيين بتوع كمشيش قتلوا جوزها .. الحقيقة غير كده ... الحقيقة إنها مجرد خنافة عادية .. طبعاً حسين أبلغ المشير عامر والرئيس جمال عبد الناصر .. وبعثوا المباحث الجنائية العسكرية علشان تحقق فى الموضوع علما بأن الموضوع كان تم عن طريق النيابة العامة .. كأى جريمة قتل أو ضرب أفضى إلى موت » .

• وكان المشير أيامها رئيس لجنة تصفية الإقطاع ؟

• « ما كانش لسه اتعملت لجنة تصفية الإقطاع .. وقالوا الإقطاع هو الذى قتله وبالتالي صدر قرار بتشكيل لجنة لتصفية الإقطاع .. واللى حصل إن المباحث الجنائية العسكرية تدخلت بناء على تعليمات المشير طبعاً وشمس .. أنا حضرتت بنفسى العملية وما كانتش ماشية فى التحقيق بطريقة سليمة .. وأنا الذى بأقوله إنهم لما جم شكلوا لجنة الإقطاع .. طيب لقد صدرت قوانين بتحديد الملكية وأصبح كل عيلة عندها الحد الأقصى ٢٠٠ فدان .. طيب ٦٦ لما حصلت الحادثة دى .. هل الدولة ماكانتش حاسة إنه فيها إقطاع موجود .. كان فيه إقطاع بس إقطاع نفوذ .. وكان داخل الاتحاد الاشتراكي واستنادا على التنظيم السياسى الوحيد .. كانت الناس الللى لهم مركز فى بلادهم أو كانوا من أصحاب الأراضى .. كان لهم قوة فى المركز بتاعهم .. ولم تتغير .. الللى حصل إن البوليس الحربى أو المباحث الجنائية العسكرية على وجه التحديد .. أساءت التصرف فى الإجراءات الللى اتخدتتها .. وكنا معزومين فى فرح بنت شعراوى جمعة .. كنت أنا أيامها محافظ المنوفية .. والشيوخ حسن مأمون كان شيخ الأزهر أشتكى للرئيس جمال والمشير عامر بأن فيه شيخ من الأزهر ضربه واحد من المباحث الجنائية العسكرية رغم إنه لا علاقة له بالإقطاع .. فالريس جمال استاء جداً وقرر فوراً تشكيل مجلس عسكرى عالى لمحاكمة الضباط الللى اتسببوا فى هذه الواقعة .. وقومونى من الفرح ورحت شبين الكوم .. وجاء ورايا الفريق عبد المحسن مرتجى كان رئيس المجلس العسكرى العالى لمحاكمة ضباط البوليس الحربى .. أنا من الأول قلت إن العملية دى لا علاقة لها بالإقطاع .. إنما لما جم شكلوا لجنة الإقطاع أصبحت عملية تصفية حسابات .. واحد متضايق من واحد يبلغ عنه إنه عنده أكثر من ٢٠٠ فدان .. وعملوا تشكيلة فى الإقطاع .. بقى ده إقطاع أرض ، وده نفوذه إجرامى ،

وده تاجر مخدرات ، لا علاقة لها بالإقطاع بمعناه الحقيقي .. أما بالنسبة لقضية كمشيش .. اللي حصل المحكمة برأت الناس اللي اتهموا بأنهم قتلوا صلاح حسين .. والشيوخيون أشعلوا الواقعة وكانوا فى هذا الوقت يتبوعوا مراكز الصحافة والإعلام وهيجوا الدنيا .. واستمرت لجنة تصفية الإقطاع فى إجراءاتها وما يقتش بس فى المنوفية .. بل شملت القطر كله .. وفيه ناس كثير أضرخوا ظلما فى هذا الموضوع .. إلى أن بدأت عملية ٦٧ فماتت عملية تصفية الإقطاع وانتهت قضية كمشيش » .

• ويقول د . محمود جامع : « الذى أثير فى قضية كمشيش أن صلاح حسين قتله الإقطاعيون .. ولكن الحقيقة إنه قتل للأخذ بالثأر .. وأذكر هنا عندما حضر كل من المفكرين سارتر وبيمون دى بوفوار .. زارا المنطقة وعقدت اجتماعات شعبية خاصة بالاشتراكية لكى يثبتوا لهما إنها حركة جماهيرية وليست مجرد جريمة فردية » .

• ويقول توفيق عبده (إسماعيل) : « أى واحد حتى مش إقطاعى وفيه عدد من الناس مش إقطاعيين اتظلموا علشان مقولة إن دى نصفية إقطاع .. ما كانوا إقطاعيين إطلاقاً ما كانت عندهم أراضى .. ظلموا بسبب تصفية الإقطاع » .

• وأسأل د . ثروت عكاشة : قرأت فى كتابك أنك تقول : « أقحمت المؤسسات العسكرية نفسها فى كل المجالات وأصبحت مصر إقطاعيات .. إقطاعية الجيش وإقطاعية الاتحاد الاشتراكى وإقطاعية مجلس الأمة .. وإقطاعية الحكومة » ؟

• « نعم » .

• وانشغلت المؤسسات العسكرية عن مسارها الأسمى .. وكان شمس بدران مديراً لمكتب عامر الذى بدأ يهيمن على أكثر من هيئة مدنية ...

• وأسأل شمس بدران : هل عبد الناصر كان يطلب من المباحث الجنائية العسكرية مراقبة أجهزة الدولة المدنية .. وكنت أنت المسئول عن الرقابة ؟

• « آه ناصر قال لى أنا غلبت من وزارة التموين .. لا المباحث العامة نافعة .. ولا مباحث التموين نافعة ولا جهاز الرقابة الإدارية بتاع الدولة نافع .. فلحنا مافيش حل قدامنا غير إن إحنا نجيب المباحث العسكرية بتاعة البوليس الحربي .. فهو اللي كلفنا بالعملية دى .. مش بس التموين .. والأتوبيسات لهيئة المواصلات .. وأصبحنا مسئولين عن الأتوبيسات بتاعة القاهرة .. وكلفنا بتوع الصيانة بتوع القوات المسلحة يصلحوا جزءاً كبيراً منها ومشيت الأتوبيسات واتصلحت فعلاً » .

• بس ده مش كان على حساب حاجات تانية .. الاهتمام بالعسكرية فى المقام الأول ؟

• « لا مش على حسابه ده بيتعمل فى جميع الدول .. يعنى الجيش ساعات بيبنى فيه قوات قاعدة

ما يتشتغلش فييكلفوها بمهام مدنية بدل ماهى قاعدة من غير شغل .. ومش أول مرة يتعمل فيها .. ده بيتعمل فى العالم الغربى دايما فى أمريكا وإنجلترا .

• وأسأل الفنانة برلنتى عبد الحميد : إزاي اتعرفتى على المشير عامر ؟

• « هى المقابلة كانت سياسية فى الأول .. لأنه كان فى الفترة دى فيه اجتماعات متنوعة .. وكانت التنظيمات نشطة جداً .. فكان لى صديقة صحفية كان لها علاقة بالتنظيمات .. فقالت لى على اجتماع منهم فأننا قلت لها إيه الغرض من الاجتماع ده ؟ قالت لى لأ ده غرض عظيم جداً .. القادة عاوزين يعرفوا رأى الناس فى المشاكل وإيه اللي مضايقهم .. لأن التقارير الرسمية أحياناً ما بتناقش دقيقة بالشكل الكافى .. ففعلنا رحنا .. ودى كانت أول مرة أقابل المرحوم المشير عبد الحكيم عامر .. وأعقد إنه هو أخذ باله منى .. لإننى أثرت سؤالاً عمل شبه توتر .. كان لى صديقة والدها اغتفل وماحدش عارف طريقه .. أنا كنت قلقانة قوى علشان الموضوع ده .. فقلت له إذا سمحت ممكن تدينى الأمان وأتكلم بصراحة .. قال لى معاكى الأمان .. قلت له .. صديقتى كذا كذا .. طبعا حصل هرج ومرج فى الاجتماع لأنه كلام جرىء إننى أقول معتقل ومختفى وماحدش عارف طريقه .. فيمكن الصراحة والشجاعة دى كانت عجبته » .

• وأسأل برلنتى عبد الحميد : متى تزوجتما ؟

• « فى مارس ٦٣ » .

• وفرضت الحراسات واستمرت التأميمات ...

• وأسأل هدى عبد الناصر : كان والدك الرئيس عبد الناصر يحضر لكم لعباً وأشياء ثمينة أو كمالية .. تستطيع أن تقول إنها كانت عكس ما نادى به من أفكار ومبادئ اشتراكية .. فماذا تقولين عن ذلك ؟

• « لقد جاءتنى اللعب وأنا كبيرة .. كانت إمكانياته لا تسمح وأنا صغيرة بشرائها .. العبرة ليست بالأشياء التى نستخدمها ولكن بالفكر .. والذى كان يركب سيارة كاديلاك وعاشين فى بيت كبير فى منشية البكرى » .

• وكان بليس كرافات « سولكا » ويدخن سجائر « كنت » ؟

• « أيوه لكن كل بدله كانت صناعة مصرية .. وكنا نمضى الصيف فى المعمورة لكن كان فيه توجيه فكرى إن دى حاجات ملك للدولة مش ملكنا .. وبالتالي والذى جاء ولا يملك شيئاً وترك المنصب وهو لا يملك شيئاً .. العبرة ليست بممارسة الحياة اليومية أو بما نملكه .. ولكن كيف ننظر إلى هذه الأشياء .. هذه وجهة نظرى » .

• وأسأل شمس بدران : قرارات التأميم حصل عليها خلافات ليه ؟

• « أنت عارف بقى اللي كانوا ملكيين أكثر من الملك .. مجلس الثورة ما كانش اسمه مجلس

الثورة سنة ٦٢ كان مجلس الرياسة في الوقت ده وبيعملوا طبقات اشتراكية جديدة .. فكان بي فكر في تخفيض الحد الأدنى لملاكية الأرض الزراعية من ٢٠٠ فدان لإلته كان سنة ٥٢ بعد الثورة الحد الأدنى ٢٠٠ فدان وانتقال في الوقت ده إن ده آخر تخفيض .. فجأة فكر في تخفيض تاني .. اللي موجودين بقى ملكيين أكثر من الملك .. هو عاوز يخفض ل ١٠٠ يقولوا له لأ ١٠٠ كثير قوى ٥٠ فدان كويس ياريس .. ٢٥ فدان كويس ياريس كلام بالشكل ده .

• وأسأل د . الجوهرى : شقق الحراسات أين ذهبت ؟

• شقق الحراسات .. الشقق التي لم تخصص لأغراض حكومية سمح للناس إنهم يأخذوها بالدور المطلق .

• مش كبار رجال الدولة وكبار الضباط ؟

• لا بالدور المطلق .. حصلت إعلانات .. حتى لما جم يعملوا هذا النظام على المصايف حصل إن شخصيتين يمكن أنت تكون تعرفهم .. محمد التابعى كان عاوز يأخذ بيت إلهامى حسين اللي في العجمى .. وكان معمولاً عنه إعلان .. الإعلان اللي يقدم عطاء أكبر .. كمان « مفار » بتاع العربات .. فآتر جينا مفار إنه بدى البيت ده للتابعى .. حصل تنازل لكن ما حصلش أمر .. كله بالدور ولم يخرج عن الدور إطلاقاً .. حصل مرة واحدة أو اتنين والرئيس صلح الخطأ .. الناس اشتكوا له قالوا له إحنا كنا فلان قبل فلان .. قال صلح الخطأ وإدى لفلان اللي يستحق قبل فلان .. ماحصلش إن فيه تخصيص لواحد وقال له خذ البيت الفلانى أو الشقة الفلانية .

• ويقول عبد اللطيف بغدادى : « د . رشوان فهمى - الله يرحمه - كان تقبى الأطباء وصديقنا .. اللي هو أول من بعث برفقية تأييد للثورة فى يوليو ٥٢ باسم جامعة الإسكندرية .. ومن هنا تقرر عمل الاحتفال فى الإسكندرية كل يوم ٢٦ يوليو بسبب برفقية الدكتور رشوان فهمى .. وبعدين كانوا بيحتفلوا بتعيين مدير للقصر العينى وقام اتكلم وقال لو بيقولوا القصر العينى ويتكلموا على تطويره يقارنونا بقناة السويس .. قال إدونا الإمكانيات اللي منحوتها لقناة السويس .. فجاء على أثر هذا قرار بفصله من النقابة .. وكان صديقى واتحط تحت الحراسة وهو ما عندهوش حاجة .. راح اللي بيعمله الحراسة قال له .. حطيتك تحت الحراسة وإنت عندك حجرة وصالة فى الاسكندرية .. قال له إسأل جمال عبد الناصر .

• وأسأل د . مصطفى خليل : حضرتك حضرت التأميمات والحراسات ولابد إنك لك رأى فيها ؟

• « حضرتها .. وأستطيع أن أقول إن كل قرار بيتأخذ طبقاً لوقت معين ولظروف معينة .. ولا يمكن إننا نحكم على قرار من هذه القرارات إلا طبقاً للظروف والأوضاع اللي كان يتخذ فى ظلها .

• حدث عديد من الاعتقالات وبعض التجاوزات ...

• يقول طارق البشرى : « كانت ظاهرة العنف تشدد فى معاملة الخصوم السياسيين سواء فى

المعتقلات أو خارجها .. على ما حدث في ١٩٥٩ و ١٩٦٠ مع المعارضة الشيوعية من وقائع التعذيب أثبتتها فيما بعد الكتب وأحكام المحاكم .. وعلى ما حدث مع معارضة الإخوان المسلمين في أعوام ١٩٦٥ و ١٩٦٦ .. وما تلاهما من اعتقالات وتعذيب الآلاف المؤلفة » .

• ويقول إبراهيم شكرى : « سمعنا الكثير عن أوضاع يمكن تكون فيها التجاوزات تخرج عن المعاملات التي يمكن أن تكون طبيعية بالنسبة لسجون بها قواعد يجب أن تُحترم » .

• ويقول مأمون الهضيبي : « هذه مسألة أصبح يعرفها الصغير والكبير .. والجاهل والعالم .. أنواع التعذيب التي كانت تحدث في السجون الحربية مسألة لا يتخيلها البشر .. بمعنى مش مسألة انتزاع اعتراف من أحد .. لأ .. هذه عملية تعذيب يومي .. يعني يوماً طابور تقف من الصباح للظهر في ساحة السجن الكبير .. والعساكر واقفة بالكرايبج تضرب الناس .. لمدة أشهر .. يعني الناس دول مش مطلوب منهم اعترافات .. اللي اتحكم عليه اتحكم واللى اتعمل اتعمل وخلص .. وهذا أيضا تكرر سنة ٦٥ وأنا اعتقلت وعذبت في ٦٥ وأنا عارف بالضبط ما حدث .. وأنا لا أستطيع أن أكذب نفسي » .

• وماذا كان سبب الخلاف في ٦٥ ؟

• « يقال فيه مجموعة أعادت نشاط الجماعة .. ثم قيل إنها فكرت في اغتيال جمال عبد الناصر » .

• للمرة الثانية ؟

• « وقيل نجيب أسلحة .. لأ .. نخاف .. لأن هم حبيبتوا يعملوا فينا زى ما عملوا عام ٥٤ .. هذه القضايا كلها حققت من جانب واحد .. من جانب السلطة التي كانت قائمة بكل إمكانياتها وبكل ضغطها وبكل جبروتها .. ولكن حقيقتها إيه ؟ دى عاوزة باحثين يعودوا ويبحثوا ويعملوا تحقيقات جديدة علشان نعرف الحقائق إيه » .

• هل أجرى معك تحقيق ؟

• « أنا أولاً أخذت من بيتي بالليل .. وبعدين حطوني في إدارة المباحث العامة على البلاط كذا ساعة .. وبعدين عرفت إني رح « أبو زعل » .. لما وصلت هناك غموني طبعاً .. ولقيت رجلياً فوق ورأسى تحت والضرب بينزل .. وبدأت أسئلة غريبة وعجيبة .. أنا في ذلك الوقت لم يكن لى اتصالات بالتنظيمات الإخوانية .. يعني يمكن مبولي إخوانية .. ولكن لم يكن لى نشاط داخل الجماعة .. ولم أعرف تنظيماتها ولم أكن متداخلاً فيها » .

• وهل كنت على علاقة مثلاً من قريب أو من بعيد بسيد قطب ؟

• « لا أبداً ولا كان لى أى اتصال به .. أعرفه كشخص .. مشهور .. معروف .. لكن عمرى ما ترددت عليه ولا عمره جاء زارنى ولا أى حاجة » .

• وخُيِّم على كم شخص ؟

* « دى حاجة معروفة هم ٨٣ واحد .. حكم عليهم أيامها .. لكن المجموعة مظلومة .. أصلهم هم أخذوا فى الساعة دى كل اللي قابل التانى أو قعد مع التانى .. قالوا يتحاكم .. اللي دفع قرش بقى يتحاكم .. أنا حوكت لأنى كنت بأوصل مبالغاً من المال اللي بتأتى من بعض الجهات للجهة المسئولة عن بيوت الناس المسجونين والمعتقلين من الخارج ومن الداخل .. كانت بتدفع فلوس علشان الأسر التى تريد أن تأكل وتلبس وأبنائها يروحوا المدرسة » .

* ويقول عبد المحسن أبو النور : « اتكررت سنة ٦٥ على نطاق ضيق جدا بسبب أن الإخوان المسلمين بدأوا تانى يتحركوا داخل الجيش .. بدون شك أن بعض الناس منهم حصل معهم شىء من التجاوز .. لكن قلة قليلة للغاية » .

* ويقول د . حاتم : « هو فيه حاجة يجب إن إحنا نقولها عن هذا الموضوع .. عبد الناصر كان ضد التعذيب .. الإعلام لم يكن يعلم إطلاقاً بأى نواحى من التعذيب .. وأنا طبعاً كنت المسئول عن الإعلام وما كنتش أعرف إن فيه تعذيب وماحدث بيقر التعذيب .. بعض القضايا أظهرت هذا الاتجاه .. لكن كان فيه رقابة .. أيوه كان فيه رقابة .. أقر هذا .. لمصلحة مصر وكل مرحلة ولها ظروفها الخاصة .. لإن طبعاً أنت عندك دول كبيرة فى المنطقة ودى منطقة الشرق الأوسط كان يقال عليها منطقة فراغ كأننا لسنا شعباً فى هذه المنطقة » .

* ويقول أحمد كامل : « الإنسان الذى لا يلتزم بالحقوق الإنسانية للفرد فى عملية تحقيق أو فى عملية استجواب .. ده خطأ كبير جدا .. وأنا دائماً - لما يقال أعمال التعذيب - أعيد هذا إلى ضعف النظام فى التحقيق .. الإنسان البدائى يستخدم يديه إنما الإنسان المثقف الواعى يستخدم رأسه وفكره » .

* طبيب حالات التعذيب والاعتقالات مش دى كلها كانت فى وقت من الأوقات منسوبة للمخابرات العامة كما قيل ؟

* « والله المخابرات لا تقوم إلا بضبط واقعة وهذه الواقعة تمس أمن الدولة .. بعد كده التحقيق بيتم بواسطة القيادة العامة وبواسطة أجهزة التحقيق .. إنما المخابرات ليست وظيفتها إطلاقاً القيام بالتحقيق .. فيه بعض الناس بتقول لك إن عملية التحقيق دى يستلزم فيها إنك أنت تهز وجدان الشخص الللى أنت بتحقيق معاه .. فترتكب شوية حاجات كده .. ما يعتبرش فى عرف أجهزة المخابرات إن ده خارج عن القانون .. إنما هو بده يصل إلى الحقيقة من الفرد الللى أمامه الللى بتحقيق معاه .. بس تجاوز هذا الحد يعتبر خطأ .. لا يمكن التسليم به ولا يمكن الدفاع عنه » .

* وأسأل أحمد الخواجة : كانت هناك تجاوزات مع المتهمين .. وبعض المعتقلين السياسيين .. وبعض من كانوا يدعوا بأعداء الثورة .. من الذى كان مسئولاً عن كل ذلك ؟

* « الثورة هى الحكومة .. ومادام بتقول فيه اعتقال طبيب بتدور على تجاوز تانى ليه ؟ ما الاعتقال

في حد ذاته تجاوزاً .. الاعتقال إن الإنسان موجود بغير ذنب في سجن بغير حكم المحكمة المختصة .. البلد كانت في أول الثورة يعنى شأن أى ثورة .. لكن أن تستمر هذه التجاوزات فترة طويلة فى بلد زى مصر صعب .. ولذلك كانت النتيجة اللى إنتم شوفتوه .. يعنى ابتعاد الناس عن العمل السياسى .. وسلبية الناس » .

• وأسأل سامى شرف : هل كان الرئيس جمال عبد الناصر على علم بكل الأحداث التى تجرى فى مصر ؟

• « كونه رئيس الجمهورية لازم يعرف ما يدور فى الداخل .. وما حوله وفى الخارج .. أنا بأعتبرها حتمية من حتميات العمل .. ليه ؟ كل ما وسعت قاعدة المعلومات وكل ما كانت الصورة واضحة بالنسبة لرئيس الدولة .. كل ما كان القرار سهل اتخاذه ويكون القرار بقدر الإمكان قرار أقرب إلى الصواب .. فكل ما اتسعت قاعدة المعلومات وقاعدة المعرفة بصفة عامة ييسهل على الرئيس أو القائد عموماً .. ودى تنطبق على رئيس الدولة وعلى رئيس العمل .. وعلى القائد فى الميدان وحتى عمل الضابط الصغير بالنسبة للساكر » .

• ويقول سامى شرف : « عبد الناصر كان بشراً إنساناً لا يعلم شيئاً ولكن فور ما يعلم بشئ يضر شخص .. أو شخص أضره كان بيتخذ إجراء .. وعمر ما جمال عبد الناصر علم إن هناك شخص مضار أو قضية أضررت بشخص أو جهاز أضر بشخص ولم يأخذ إجراء .. الشواهد على كده كثيرة وحاضرب لك أمثلة .. ودى ممكن نحكى فيها كثيراً .. قضية الشراقوى عندما علم بالموضوع .. أحيل للثائب العام على طول واتحقق مع جهاز المخابرات ومع كل الناس اللى اتهموا فى هذا .. وفيه قضية عبد المنعم الغزالى قريب زينب الغزالى .. فى عملية ٥٦ بتاعة الإخوان المسلمين جاء اتهام لزينب الغزالى .. إنها داخله فى مؤامرة بتاعة الإخوان المسلمين .. عبد المنعم الغزالى أخو زينب الغزالى .. والأجهزة قبضت عليه باعتباره أخوها .. وعندما علم عبد الناصر إن عبد المنعم الغزالى قبض عليه ضحك .. ليه ؟ لإن عبد المنعم الغزالى شيوعى .. مش ممكن يكون إخوان مسلمين .. وأفرج عنه فى الحال .. سيف الغزالى أخوها الثالث وفدى أفرج عنه فى الحال .. عندما يعلم بضرر أو بإجراء ما خطأ .. كان بيأخذ قراراً فوراً بتصويبه أو بتعديله أو بمحاسبته من اتخذ هذا القرار » .

• ويقول توفيق عبده إسماعيل : « جهاز المخابرات كان لا يصح أن يشارك فى الأمن الداخلى ولا فى أمن النظام .. الأمن الداخلى دور الشرطة .. أمن النظام المفروض الشعب اللى يعمل ما يفرض من النظام .. كان نظاماً مستقراً وكان نظام راضية عنه الناس لفترات طويلة جداً .. جهاز المخابرات العامة مشاركته فى الناحيتين دول هم اللى أساءوا للجهاز إساءة بالغة .. وبدأت بعض الأمور زى حركة الإخوان المسلمين فيها تعذيب .. مافيش سلطة بتراجعهم .. النيابة ما كانت عندها إمكانية إنها تراجع وتتابع المعتقلين زى ماتابعهم فى أقسام الشرطة أو فى السجون العامة .. فتمادى الجهاز فى أخطاء كثيرة » .

• ويقول محمد أحمد : « دى إحدى أدلة الإضبط .. بس عبد الناصر ما كانش غاوى البطش ..

لأنما كان فيه ثورة قامت .. قضية مافيش شك .. بتقاومها من الداخل ومن الخارج وهو يحاول يمنع فشل هذه الثورة .. وكان جنبنا مثلاً قريباً اللي هو كان سوريا وما حصل فيها من ثورات وانقلابات » .

• ويقول د . عبد القادر حاتم : فى ذلك الوقت الحالة نفسها اللي كانت موجودة كانت بتتطلب نوعاً من القيد على الحريات العامة censorship .

• الرقابة ؟

• « آه وخصوصا الرقابة على الصحف .. كان فيه ١٢ محطة سرية ضدك عاوزين يهدموا النظام الموجود .. والنظام الموجود كان يشع بثورات مختلفة فى إفريقيا وفى البلاد العربية .. فكان النظام يحاول أن يحمى نفسه .. وكان لابد أن يقضوا على هذه الشعلة المتقدة التى تثير ده .. من الإذاعة بتهاجم الاستعمار من المغرب إلى الخليج .. فى إفريقيا رئيس غينيا سيكوتورى كان يقول إن مصر تمتلك سلاحاً قوياً جداً يجعلنى أنا متين فى حكمى .. وهو سلاح الإعلام المصرى .. فإذن كان لابد منها لأن الاستعمار كان موجوداً فى المنطقة » .

• وأسأل أمين هويدى : هل كان يحدث تجاوزات قبل ٦٧ يافندم ؟ وهل كان الرئيس عبد الناصر على علم بأخبار وأسرار المخابرات العامة ؟

• « قبل ٦٧ أشك .. لأن الأخ صلاح نصر كان أقرب للمشير منه إلى الرئيس .. وكان يخبىء ويغطفى بواسطة أعوانه .. عن كل ما يحدث بالتفصيل داخل الجهاز .. ولكن تسرب بعض هذا الكلام قبيل النكسة .. وكان من أول الحاجات التى صدمتنى .. أول ما مسكت رئاسة الجهاز .. كانت مثل هذه الموضوعات » .

• وأسأل الجوهري : قلت المرحوم الليثى عبد الناصر كان حاكم الاسكندرية ؟

• « ده حقيقى حتى فى وجود حسن إبراهيم أمين عام الاتحاد الاشتراكي كان الليثى موجود معاه وكان حسن إبراهيم يعنى راجل decent وظريف جداً .. لكن الليثى كان هو مركز القوى اللي موجود فى الإسكندرية .. دى حقيقة » .

• هل كان مستغلاً كونه شقيق للرئيس ؟

• « مافيش كلام .. من غير هذا كان حقيقى إزاي مركز قوى ؟! » .

• وقامت محكمة الدجوى بالحكم على الإخوان وأحد زعمائهم سيد قطب .. بعد تجدد الصدام معهم واتهامهم بعودة النشاط السرى .. ووقع أكثر من حادث تعذيب ضد الإخوان والشيوعيين والإقطاعيين ..

• ويقول د . عبد العظيم رمضان : « محاكمات الدجوى .. أو محاكمات هلال .. للإخوان أو الشيوعيين .. كانت كلها فبركة » .

• **ويقول عبد المحسن أبو النور :** « الكلام حقيقى أنا لا أنفى هذا .. ودون شك إن وقت الإخوان المسلمين سنة ٦٤ حصل شيء من التجاوز فى السجن الحربى .. للإخوان المسلمين بس مش لهذه الدرجة » .

• **ويقول أحمد سرحان :** « أيام الرئيس عبد الناصر فيه أحداث كثيرة جدا تستدعى رفع درجات الاستعداد فى الأمن .. على سبيل المثال لا الحصر سنة ٦٥ أيام حركة الإخوان المسلمين والقبض على بعض المنتمين إلى هذا التنظيم » .

• **وأسأل سامى شرف :** ألم يكن على علم بالأحداث التى تقع فى السجن الحربى فى فترة الحراسات والاعتقالات ؟

• « مش ممكن رئيس الدولة يبقى قاعد زى ما إدعى البعض فى الكتب التى صدرت .. إنه كان عنده جهاز تصوير وكاميرا وخط تليفونى .. كل ده كلام فارغ يدل على إن رئيس الدولة فاضى .. إنما فيه مؤسسات بتعمل وأنت دولة مؤسسات .. هذه المؤسسات بتأخذ التكليف أو لها مسئوليات بتطبق هذه المسئوليات المنوطة بها .. قد تخطىء وقد تصيب .. إذا أصابت فلها أجرها .. ولو أخطأت بتحاسب .. فعندما كان عبد الناصر يعلم إن هناك خطأ إرتكب لم يكن يسكت عليه » .

• **وأسأل الفريق أول عبد المحسن مرتجى :** هل كان الرئيس عبد الناصر يعلم بالتعذيب ؟

• « ما هو إذا كان يعلم فهذه مصيبة . وإذا كان لا يعلم تبقى المصيبة أكبر .. أنا شخصيا ماكنتش متصوراً إن عبد الناصر يكون يعلم .. لكن بعض الشهود يقولوا إنه كان يعلم .. معنى حاقول لك زينب الغزالى قابلتها مرة فى مستشفى المعادى .. وأقسمت إنهم كان يجيبونها كلاب علشان تهاجمها .. وهى كانت بتقول الله الله .. وجابولها فى يوم من الأيام .. عبد الحكيم عامر وعبد الناصر وشمس بدران .. فشمس بدران قال لها قولى عبد الناصر وشوفى حيصلك إيه .. فهى رفضت فكل كلامها كان « الله الله » .. فهل هو كان يعلم أو ماكانش يعلم .. مائة فى المائة كان يعلم » .

• **ويقول سامى شرف :** « مسألة «دبة النملة» .. أثرت وأنا قصدت أثيرها فى الحوار مع أخونا الأستاذ عبد الله إمام وأكررها هنا تانى لسبب .. هى أثرت مش بشكل بناء .. أثرت فى شكل إلقاء نوع من الظلال أو تلوين الصورة بالرمادية .. بمعنى إنه كان بيتقال إن هذا الحكم كان حكماً بوليسياً وإنه هو حكم فيه تجسس وفيه الأب بيتجسس على إبنه .. والبنيت بتجسس على أبوها .. وإن ده فيه مراقبات تليفونية وتكميم الإخوان وكل الشعارات التى أطلقت .. وأطلقت بعد ما مات جمال عبد الناصر .. وبضوء أخضر وبشكل معين مش عاوز أتعرض له دلوقتى وحأتعرض له فى حديث آخر .. لكن كان الغرض منها تنفيذ مخطط الغرض منه هو مسح وغسيل مخ لحقبة ١٨ سنة كانت فيها إيجابياتها وسلبياتها .. لكن ببساطة وبجملة مختصرة اتغير المجتمع ١٨٠ درجة من مجتمع النصف فى المائة إلى مجتمع ٩٩ % بس كانت التريقة فى بعض

الأحيان يقولوا لك ٩٩,٩ ٪ .. نرجع لموضوع « دبة النملة » .. دبة النملة أترجمها أنا ترجمة علمية مش ترجمة سوقية زى ما أريد أن تكون بها الصورة .. الترجمة العلمية إن ده شىء يشرفنى إن إحنا كنظام وكمسولين فى هذا النظام لما هذا النظام يستطيع أن يعرف دبة النملة على أرضه إذن يستطيع أن بينى وأن يقاوم وأن يضع رجله أين .. وأين يسير وإلى أين يصل .. لكن إذا كنت أنا باشتغل بالمجهول وباشتغل عفوا فى اللفظ بطريقة الـ ٣ ورقات .. دى ماتيقاش دولة ومايقاش نظام .. لكن الـ system دائما القائم على النظام العلمى .. هو ما بينى على قاعدة المعلومات الصحيحة .. عبد الناصر كان يعلم وكان لا يعلم .

- **وتقول هدى عبد الناصر :** « أعتقد أن « دبة النملة » لأنه لم يكن عنده وقت لكل شىء . »
- **ألم يكن يعرف بالمعتقلات والسجون ؟**
- **طبعاً كان يعرف ويتتبع القضايا .. وكل جهاز كان يتخذ إجراءاته بمعرفة الجهاز نفسه لكنه هو شخصياً كان لا يصدر قراراً بالاعتقال . »**
- **وأسأل أمين هويدى :** **هل المخابرات كانت تبليغ الرئيس عبد الناصر بحيث تجعله فى الصورة ؟**
- **« كنت أبلغه حتى عن عائلته .. وكنت ألاحظ فى هذا الخطأ الكبير الذى ارتكبته بعض الأجهزة أنها كانت بتغطى على الحقيقة لغاية عبد الناصر .. وعبد الناصر وقف فى اللجنة المركزية وقال الآتى .. أمين هويدى يقول الحق ولو على نفسه .. ويبلغنى كل شىء حتى عن نفسه .. هذه كانت علاقتى كرئيس جهاز مع جمال عبد الناصر رئيس الدولة . »**
- **بتقول جهاز واحد نسلم له دقننا لا .. لكن تعدد الأجهزة ده مش ببخيلها فى الآخر تتصارع وتتضارب ؟**
- **« هذا جيد . »**
- **ليه جيد ؟**
- **« لأن إذا سبت تقدير كل شىء لعين واحد أو فرد واحد هذا خطر جداً .. لكن عليك أن تبص للمسألة من وجهة نظر واحد أو اثنين وإن تحكم فى النهاية .. لأن صاحب القرار له البصيرة بتاعته اللي يقدر يحكم بها على ما يريد . »**
- **المخابرات دائماً يقال فيها ما قاله مالك فى الخمر .**
- **« مش عندنا بس .. يعنى تعالى شوف اللى تعرضت له الـ C.I.A (المخابرات المركزية الأمريكية) .. والمخابرات البريطانية فيها فضائح أخلاقية دائمة .. بس اللى كويس أن تنتشر هذا الكلام .. وبعدين إذا كان يقال هذا عن المخابرات طب ليه تستثنى المجالات الأخرى ؟ » .**
- **ويقول أنيس منصور :** « شوف كتب الإخوان المسلمين .. شوف كتب اللى كتبوا المذكرات

السياسية .. وأنت تجد أشكال التعذيب اللى كانت عندنا زى اللى كانت فى ألمانيا النازية .. بالضبط .. أشكال وألوان .. كل أنواع التعذيب .. يعنى هو عُرف فى أجهزة الأمن القومى .. إن هى تنزع الحقيقة أو المعلومة بالكهرباج أو بوسائل أخرى يعنى بالأجهزة الكهربائية .. بالصدمة ... يعنى عاوزه تعرف بأى شكل .. علشان تصل للمعلومة بالتخويف والترهيب والبهلة للشخص ولزوجته وليبته ولأمله .. وأنا لا أعقد إنه حدث فى تاريخ مصر ما حدث من تعذيب زى اللى حصل أيام عبد الناصر .. أذكر أن كامل الشناوى كان له عبارة هاجم بها حكومة النفراتى باشا أيام إبراهيم عبد الهادى أيام حزبه ما كان يبحكم .. قال لك إنه همّ بيحطوا الناس فى السجون علشان يحلوا مشكلة السكن .. أنا متهاى لى إن ده لا ينطبق إلا على عهد جمال عبد الناصر .

• وأسأل سعيد حليم : ما قيل عن التعذيب وعن الاعتقالات ؟

• « التعذيب فى أى فترة » .

• فى فترة الرئيس عبد الناصر ؟

• « فترة عبد الناصر دى لم أحضرها .. وبأقول لك حتى بعد ٥٨ .. مافيش تعذيب على الإطلاق حصل لغاية ٥٨ .. التعذيب حصل فيما بعد مع الإخوان المسلمين .. إنما الإقطاع لا أعرف بأسمع زيك » .

• ويقول طارق البشرى : « جاءت أحداث اعتقالات الإخوان المسلمين ١٩٦٥ وتولتها فى الأساس الشرطة العسكرية على يدى شمس بدران .. فى ظروف شاء فيها شمس بدران أن يسحب اختصاص مباحث أمن الدولة التابعة لوزارة الداخلية » .

• ويقول أحمد أبو نار : « لا يعيب شمس بدران إلا تحقيقاته مع الإخوان المسلمين .. حيث إنه المسئول عن التعذيب » .

• وأسأل شمس بدران الإخوان وشمس بدران .. توليت محاكمتهم .. وتعذيبهم ؟

• « لأ .. ما تولتش أنا محاكمتهم .. ولا تعذيبهم .. همّ اتعذبوا آه .. الناس اللى حققوا معهم .. فيه ناس منهم اتعنبروا .. التحقيقات دى كانت فى أنحاء كثيرة جدا من الدولة .. المباحث العامة كانت يتحقق والمباحث الجنائية العسكرية كانت يتحقق .. وكان التحقيق بتاعها فى السجن الحربى .. والسجن الحربى ده مسئولية سياسية .. يعنى كان اللى بيديروا السجن الحربى سياسيين .. المسئولية كلها سياسية » .

• تكصد وزارة الداخلية مثلا ؟

• « لا الرئاسة .. فالسجن الحربى كان تقريبا تابعاً للرئاسة .. رغم تبعيته لوزارة الحرية الشكالية لكن تقريبا كان تابع للرئاسة .. فإذا كان يحصل تعذيب طبعاً فى السجن الحربى .. ما تمش قدامى .. بمعرفتى آه .. أما موضوع الإخوان بقى .. جت قضية الإخوان دول وكان فى

تقديرهم إنهم ينسفوا كل المرافق الحربية بقاعة الدولة .. وكان عندهم فتوى من الشيخ سيد قطب بالكلام ده .. إن ده حلال .. وواحد منهم تعالى وقال طيب المد العالى لو ضربنا المد العالى وغرقنا الدولة كلها .. قال لهم اللى حيفرق الكفار مافيش مسلمين فى الدولة إلا إحنأ .. إحنأ المسلمين الحفيين والباقى كله كفره !! .. وبعدين اتمسكوا الإخوان المسلمين .. وهم فى البيت ومعهم السلاح ومعهم الذخيرة والقنابل وراحين فعلا ينفذوا عمليات نفس كبارى ومحطة الإذاعة ومحطة توليد كهرباء وخلافه .

● وكان عبد الناصر قد سحب السلطة من مجلس الرئاسة تدريجياً .. وسلم فيما بعد سنة ١٩٦١ السلطة التنفيذية لعللى صبرى مدير مكتبه السابق والذى عمل أيضاً مديراً للمخابرات .. واختار عبد الناصر زكريا محيى الدين نائباً له .. وأصبح السادات رئيساً لمجلس الأمة ...

* وأسأل كمال الدين حسين : حضرتك قلت للرئيس عبد الناصر .. « اتقى الله » ؟

* « أنا كنت بره فى الفترة دى سنة ٦٤ .. فترة المحاكمات .. وكان فيه ناس يتقبض عليها وتحتبس .. وأسمع إنهم بيتعذبوا حتى الموت .. سمعت الكلام ده وأنا فى بنها .. وفيه عمدة أخذوا ابنه واتعذب ومات .. وقالوا له ابنك تعالى استلمه .. محطوط فى رقم كذا فى حنة كذا .. الحقيقة أنا ماقدرش أطيق .. وأنا مصرى .. إذا لم أقدر أقول لعبد الناصر حاجة .. مين يقول له ! نبعت له جواب وقلت له « اتقى الله » .. وقلت له إن ربنا قالها للنبي .. والنبي قالها للصحابه .. والصحابه قالوها لبعض .. واتقالت لعامة المؤمنين .. وبعدين كلمة « اتقى الله » كان أى واحد مسلم يقولها للخليفة .. ولم تلغى إلا بعد معاوية .. « اتقى الله » أخذ معناها بمعنى آخر .. وبعدين حصل اللى حصل .

* ويقول عباس رضوان عن مجلس الأمة : « الحقيقة أنا لم أحضر أكثر من مجلس واحد يمكن اللى هو بعد الانفصال .. وده كان المجلس اللى تولاه على ما أذكر يمكن المرحوم أنور السادات » .

* إذن لم يكن هناك تلاعب فى الانتخابات ؟

* « مقدش أجزم ١٠٠ ٪ .. على المستوى المحلى محتمل .. الانتخابات فى مصر طول عمرها مرتبطة بعصية .. قيادة محلية .. هى التى تقود الناس للمرشح الفلانى أو الآخر » .

● وظهرت وجوه جديدة قديمة .. إلى جانب على صبرى وسامى شرف .. منهم عبد المحسن أبو النور وكمال رفعت وعبد المجيد فريد .. وصلاح نصر الذى حل محل على صبرى فى المخابرات .. واتسع نفوذهم ...

* ويقول توفيق عبده إسماعيل : « جهاز المخابرات تولاه صلاح نصر حتى ٦٧ .. صلاح نصر كان بيدى حريات كاملة للناس العاملة معه بطريقة مختلفة عن زكريا محيى الدين » .

• وأسأل مرتجى : هل صلاح نصر كان مظلوماً .. لإنها تعليمات الرئيس .. كما قلت .. وهل كانت تعليمات بدون تأشيرة كتابية ؟

• « أنا عاوز أقول لك حاجة .. عبد الناصر زى ما كان بيقول لى لو اجتمعوا ٢ واتضم عليهم الثالث أنا أعرف .. فإذن عبد الناصر فى تصويرى كان عارف .. وله شبكات تجسس فى كل مكان .. فيعرف كل صغيرة وكبيرة بتحصل فى البلد » .

• ويقول أمين شاكور : « شخصية عبد الناصر شخصية طاغية .. وكان ذكياً ولماحاً .. وكان بطبيعته طيب القلب جدا .. ويكره الأذى .. لغاية ما جم الجماعة الشيوعيين واستولوا فعلا على البلد .. فابتدوا يأتروا على عبد الناصر ويغيروا فى أخلاقياته » .

• تكلمنا عن على صبرى ؟

• « على صبرى الحقيقة لما جابه عبد الناصر وعينه رئيس التنظيم اللي أنا بنيتة .. بصيت لقيت أعداء عبد الناصر اللي كانوا لا يطيقوا إنهم يبصروا فى وشه .. هم اللي خلوه جاب على صبرى .. أول من جاء به جمال سالم وعينه سكرتير فى مكتب أعضاء القوات الجوية اللي كانوا أعضاء فى الحزب .. كان سكرتيراً وكان لا يجرؤ إنه يخط على الباب بتاعى .. فلما جابه قلت له لا يمكن أبداً .. لأن أنا عامل إدارة اسمها الإدارة الثقافية والإدارة السياسية وأنا المدير بتاعها على درجة وكيل وزارة .. قلت له أنا اشتغل بدرجة وظيفتى تحت على صبرى .. قلت له أنت حر وده مكتبك جيب فيه ما شئت .. لكن ده إنسان سيء .. وأنا اعتبر إن علاقتى بهذا المكتب انتهت .. وفعلا صممت ومشيت وطلعت سفيراً فى جنيف » .

• وصلاح نصر ؟

• « صلاح نصر كان كذاباً إلى أبعد حد ممكن .. لإن تقاريره اللي كان بيعيها لعبد الناصر كانت بتجبنى أنا الأول كنت بأشطب عليها كده وأقول إن هذا الكلام لا يمكن أن يكون صحيحاً والمقصود به كذا وكذا وكذا .. وكان عبد الناصر بيقول لى ده لو قدر بمسكك حيقطعك » .

• وهل كان صلاح نصر من مراكز القوى ؟

• ده كان مركز قوى جدا ، .

• بس صلاح نصر طلع ٦٨ مع النكسة ؟

• « آه .. إنما قبل كده كان من مراكز القوى .. لعب دوراً كبيراً واتصلوا به الشيوعيين وجندوه وأصبح عميلاً كبيراً للسوفيت فى مصر » .

• وأسأل توفيق عبده إسماعيل : « دولة المخابرات كانت تحكم مصر » .. هل هذا الكلام فيه افتراء .. ولا كان فيه شيء كبير من الصحة ؟

• « إحنا عملنا جهاز المخابرات الموجود حتى الآن سنة ٥٦ .. السيد زكريا محيى الدين تولى

إدارة المخابرات الحربية ويتولى الدور الذى أداه جهاز المخابرات فى تأمين الثورة وتأمين مصر فى نفس الوقت .. إنما ده عمله سنة ٥٢ وتولى أول وظيفة له فى ٢٣ يوليو الصباح .. زكريا محبى الدين قد فيها لحد ٥٦ .. و ٥٦ أنشأ جهاز المخابرات العامة وتولاها على صبرى .. ثم صلاح نصر ٥٨ .. هذا الجهاز كان مختلطاً عليه الأمور .. واجباته كانت مختلطة .. أمن النظام ثم الأمن الداخلى ثم الأمن الخارجى .. أدى أدواراً بطولية فى الأمن الخارجى .. جهاز المخابرات بتاعنا .. اخترق أجهزة مخابرات كثيرة جدا وعمل مهاماً فائقة البراعة .. وكان على مصاف أى جهاز مخابرات أخرى فى العالم زى الـ « K.G.B » (المخابرات الروسية) والـ « C.I.A » .. وعمل حاجات متميزة حتى الآن لما بنتذكرها نفتخر بها .. والعرب كلهم يفتخروا بها .. إنما لما يجى دوره فى الأمن الداخلى .. ده كان خطأ كبيراً .

• **نتكلم عن الأمن .. جهاز المخابرات والداخلية .. وبعض الأسماء .. ونبدأ بالسيد زكريا محبى الدين ؟**

• « أنشأ جهاز المخابرات العامة على أساس مجموعة من ضباط المخابرات الحربية التى تم تدريبهم على أيدي زكريا محبى الدين لتولى العمليات الخارجية .. وفى الحقيقة هو دوره كان محورياً .. على صبرى بعده قد فترة بسيطة جدا فى الجهاز من أواخر ٥٦ إلى فبراير ٥٨ .. إنما زكريا محبى الدين كان بيعرف التفاصيل ولازم يناقشها » .

• **ويضيف توفيق عبيد إسماعيل :** « عباس رضوان كان ماسك مدير مكتب المشير ... وما يسمى بالشئون العامة .. وكان صلاح نصر مديراً للمكتب .. وبعده عباس رضوان .. وبعدين شمس بدران .. كانوا الثلاثة مع بعض من أول يوم .. كانوا فى القيادة بس مسئولين عن الشئون العامة .. أعمال الإعلام .. الاتصال بالناس .. الاتصال بالجماهير .. الاتصال بالضباط .. راح تولى عباس رضوان الجهاز إلى أن دخل الوزارة بعد منها بشهر أو اثنين جاء وزيراً للداخلية سنة ٥٨ برضه » .

• **وأسأل نجيب محفوظ :** المخابرات العامة ؟

• « المخابرات العامة ده جهاز إنشائى وبناء من غير إرهاب ورعب .. إنما مش زى ما كان ماشى » .

• **وأسأل أحمد طعيمة :** تقول إن مجموعة على صبرى عملت حاجزاً على الرئيس عبد الناصر ؟

• « ما هو على صبرى أنا بأعتبره أحد المسئولين عن ضياع ثورة ٢٣ يوليو وانصرافها عن أهدافها .. كفاية إنه كان بيكتب مقالاً فى الجمهورية كل أسبوع .. حياهم محلات الحلاقة والصالونات والبقالة والمكوجية وكله !! .. ما خلاص حاجة إلا خيضة للتأمين .. وكان له بطاقة طبعاً وأعوان ودول أنا بأعتبرهم أكبر شر حاق بعبد الناصر .. بطاقة السوء .. وكمان سامى شرف .. كل دول كانوا بيحاولوا يعزلوه » .

• **ويضيف أحمد طعيمة :** « فيه أمور كانت بتجرى فى البلد من على صبرى وعبد المحيد فريد .. وكانوا عاملين نشاطاً زائداً جداً فى معسكرات الشباب والطلبة والعمال والكلام ده .. ومحاضرات ماركس ولينين بتطبع وتوزع .. وهذه المحاضرات .. وصلت السفارة الأمريكية فى مصر .. وشبابنا دلوقتى بتعرض لمحنة ومبادئ ماركس من غير ما يطلق لهم الاختيار فى أمور أخرى .. فلما أنا أخذه فى معسكر وأعلمه هذا الكلام حتكون النتيجة إن أنا بأشتر الشيوعية .. أنا كنت معزوماً عند المهندس صدقى تركى اللى كان نائباً لوزير السد العالى وكان واحد من السفارة الأمريكية موجوداً .. فواحد قريبه موجود قال .. ليه جونسون وعبد الناصر ما يبقوش هما الاثنان كويسين مع بعض ويضعوا أيديهم فى إيد بعض .. رد بتاع السفارة الأمريكية وقال له وعلى صبرى كده .. فطبعاً الكلمة أنا فهمتها .. يعنى هم حتى لو كانوا بالنسبة لعبد الناصر عارفين إنه مش شيوعى .. إنما الجهاز بتاعه ببشتر الشيوعية فى مصر .. قلت له إذا كانت هذه المعلومة موجودة عندهم يبقى الحكومة الأمريكية بنظامها كله مكانها مستشفى الأمراض العقلية .. لو إنهم ما يضرّبوناش .. دول يستمروا فى حرب فى فيتنام ١٠ سنين يضحوا بالدم الأمريكى .. وبالمال الأمريكى ويخسروا الراى العام .. علشان محاربة الشيوعية » .

• **وأسأل مصطفى كامل مراد :** قيل إن على صبرى كان يوزع فى معسكرات الشباب وبين الطلبة محاضرات ماركس ؟

• « آه كان فيه محاضرات اشتراكية .. يعنى كان دائما التنظيم الطليعى ده والكوادر اللى بيعدهوا كانوا يلتقونهم مافيش شك بمبادئ الاشتراكية والماركسية وإلى آخره .. وإن كان النظام فى مصر لم يكن ماركسياً ولا حاجة .. يعنى كان نظام اشتراكى » .

• **وأسأل شمس بدران :** هل كان فيه خلاف بينك وبين سامى شرف ؟

• « لأ مافيش علاقة بينى وبين سامى شرف .. علاقتنا علاقة عمل » .

• **وكنتم على وفاق ؟**

• « ما أعرفش تقصد إيه .. ما كانتش فيه حاجة تدعو إلى وجود عدم وفاق .. يعنى علاقة .. هو ببحوال لى التقارير وهو كان سكرتيراً لرئيس الدولة » .

• **وصلاح نصر ؟**

• « كان يعطى حريات للضباط اللى معاه .. كان عنده أجهزة .. فيه هيئات مختلفة فى المخابرات العامة لها تنظيم معين يصدر بقانون ما يصدرش بقرار من رئيس المخابرات .. ولوائحه ونظمهم بتصدر بقانون .. تناقش فى جلسات سرية .. إنما بتصدر بقوانين » .

• **وقيل عن المرحوم صلاح نصر الكثير ؟**

• « قيل عنه كثير .. قد يكون صدق .. وماكنتش قريب فى هذه الفترة .. كنت باشتغل فى شركة خاصة » .

- وأسأل حافظ إسماعيل عن سامى شرف ؟
- « مرؤوس وفى » .
- وأسأل د . محمد الدكرورى : على صبرى ؟
- « السيد على صبرى كان أكبر شخصية مفكرة فى مجموعة مجلس الثورة .. وكان يساوى أعضاء مجلس القيادة .. وقد كان مفكراً ومخططاً .. لكن لم يكن حركياً .. لم يكن بالصورة التى صور بها سياسياً .. وكان أحد العناصر الأولى التى تلقت نوع من الأحاسيس العدوانية من مجموعة المشير .. وكانوا يطلقون عليه إشاعات منها إنه كان شيوعياً .. وهو كان تقدماً ولم يكن شيوعياً » .
- وأسأل أحمد سعيد : على صبرى .. الله يرحمه ؟
- « هو على صبرى أنا كنت أتمنى إنه يعنى ما يكون ضابطاً وما يكون له علاقة بالثورة .. متنبهاً لى كان يحخدم عبد الناصر ويخدم مصر ويخدم الثورة كثير » .
- وأسأل د . الجوهرى : تقول سامى شرف كان معه « كاش » فى الشنطة باستمرار .. فماذا تعنى ؟
- « يعنى سامى دى طبيعة عمله يتقاضى هذا .. إنهم يأخذوا ويسحبوا أموالاً للصرف بطريقة معينة .. وتبقى معاه .. لكن ماخذه من أسرة محمد على حاجة ولا أخذ منا حاجة .. دى أموال كانت تحت تصرف الدولة .. يعنى أنا أذكر إن القيسونى كان فى سنة من السنين نسي يحط مبلغاً فى ميزانية الدولة .. للمصاريف المصرية بتاعة رئاسة الجمهورية .. وقتها مليون ونصف ما حظهاش .. وعلى صبرى راح اشكى للرئيس وقال له إنه حاول أن يخفى هذا المبلغ عمداً .. وعملت أزمة بين القيسونى وجمال .. وإنتهت بأن القيسونى طلع .. لكن المبلغ أعيد طبعاً وكان فى ميزانية المخابرات العامة هذا المبلغ » .
- ويقول أحمد حمروش : « كان جمال عبد الناصر يعتمد على أجهزة الأمن ولكنه يشك فى سلامة موقفها وإخلاصها للثورة .. كانت هذه الشكوك تعيش فى نفسه وتنمو مع الوقت .. ولعل هذا الشعور هو الذى دفعه إلى الموافقة على تعدد أجهزة الأمن والمخابرات بقيادات مختلفة .. بحيث تصب كافة معلوماتها فى النهاية عنده وحده .. بل إنه أنشأ فى مكتبه فيما بعد جهازاً خاصاً للمخابرات والعمليات والاتصالات الخاصة .. كان يشرف عليه سكرتيه الخاص للمعلومات سامى شرف .. دون تبعيته لأى جهاز آخر من أجهزة الأمن » .
- ويقول جمال حماد : « تضمنت الصفحات من ٥١ إلى ٥٣ من كتاب « K.G.B » من إصدار ريدرز دايجيست سنة ١٩٧٤ لجون بارون .. ما يلى « كان سامى شرف فى ذلك الوقت عيلاً من أهم عملاء المخابرات السوفيتية فى العالم كله » .
- وأسأل سامى شرف : قيل إن سامى شرف الصديق الصدوق للروس .. إيه تعليقك ؟

• « يعنى إيه الصديق الصدوق للروس ؟ » ..

• يعنى كنت قريباً منهم ؟

• « نقلنا عن كتاب الـ K.G.B ، ولا نقلنا عن مين ؟ .. هذا الموضوع أثير فى كتاب مجهول بتاع واحد مجهول اسمه جون بارون .. عمله وأنا كنت فى السجن .. أثار الموضوع مرة ثانية الأخ جمال حماد .. رفعت قضية عليه فى محكمة الجنايات .. جنائية بقى ومحكمة الجنايات .. كان مفروض .. تنظر فى الموضوع .. لم تنظر محكمة الجنايات فى الموضوع ونظرت فى الشكل » .

• وقضت بعدم الاختصاص ؟

• « لا ده من اختصاصها .. رفضوا ينظروا فى الموضوع .. والموضوع لم يبت فيه وأنا أصريت على أن ينظر الموضوع .. مسألة الصديق الصدوق ومش الصديق الصدوق .. يعنى إيه أنا مش فاهم .. يعنى إيه صديق صدوق ؟! مثلاً أنا مش سنة ٥٢ لغاية الستينات أو الآخر لغاية ٧٠ ضابط الاتصال مع الـ « C.I.A » وكل يومين تلاقينى فى الـ « C.I.A » .. لإنهم يجوا ويلتقوا معايا وتعاملنا معاهم فى تبادل المعلومات .. وعملية الـ « C.I.A » كانت فى الرئاسة ما كانتش فى المخابرات .. يعنى يمكن كمان سنة سنتين أو النهاردة واحد يقول لك .. ده سامي شرف عميل الـ « C.I.A » .. العبرة فى هذه المسائل أولاً بالإثبات .. ثانياً بالتوجه .. ثالثاً ما يبقاش الكلام علناً .. مصر كلها من أصغر مواطن لأكبر مواطن فى الفترة من ٥٦ لغاية ٧٣ أو لغاية ٧٢ كانت صديقة الاتحاد السوفيتى .. ليه ؟ لأن الاتحاد السوفيتى ساعدك فى بناء السد العالى .. الاتحاد السوفيتى ساعدك فى التسليح .. الاتحاد السوفيتى دعمك سياسياً فى المحافل الدولية .. فيه مبدأ نحن نصادق من يصادقنا ونعادي من يعاديها .. لكن نعمل عمالة .. لأ ما بنعملش عمالة .. اللي عنده ما يثبت غير هذا يجي يتفضل يواجها .. ويتكلم معنا » .

• ويقول جمال حماد : « تدخلت الحكومة فى علاقة المستأجر بمالك الأرض الزراعية لمد أجلها وتثبيت القيمة الإيجارية .. وحددت المرتبات بحد أقصى خمسة آلاف جنيه .. وصدرت قوانين لحماية العمال .. ووقعت أحداث فى قضايا رد الخلوات .. ونسب إلى محافظ القاهرة سعد زايد قوله « القانون فى إجازة » .

• وأسأل أحمد الخواجة : هل كان القانون فى عهد الرئيس عبد الناصر فى إجازة كما يدعى البعض ؟

• « صحيح .. واللى طلع الحكاية دى المحامين مافيش حد تانى .. أنا سوف أقول لك شيء .. على سبيل المزاح .. أنا فى أول انتخابات اترشحت فيها .. لقيت ناس رافعين ٣ صواب كده طيب واحد يرفع صابعه كده واحد .. إنما الثلاثة دول ليه .. أنا كنت سكرتيراً لإتحاد الجامعة .. كنت رئيساً لإتحاد طلبة كلية الحقوق .. وعلاقاى بجيل الطلبة كويسة جدا .. سألت إيه الحكاية .. قالوا القانون ١١١ لسنة ٦٤ .. قلت لهم ماله القانون ده .. قالوا شوفه .. رحت جيت

المجموعة .. كان فيه فى الوقت ده قانون موظفى الدولة .. من يشترك فى وظيفة إدارية يكون حاصل على مؤهل على .. لقيت القانون بيقول استثناء من أحكام قانون موظفى الدولة رقم كذا لسنة ٥١ واستثنى طارق سليمان عزت ويعين بالدرجة السادسة الفنية بالبحرية .. يعنى يطلع قانون علشان أعين واحداً فى الدرجة السادسة .. يعنى ده مش غياب الحاكم ده غياب المستشار أيضا .. لأنه فى سنة ٦٤ كان عندنا قطاع عام كان يقدر يعينه مديراً فى قطاع عام ولا يشترط مؤهلات وينقله مديراً مش فى الدرجة السادسة ينقله مديراً فى البحرية .. لكن .. ماحدش بيستشير حد .. واحد قال علشان يتعين فى الدرجة السادسة لازم يكون معه مؤهل على .. مين اللى يقول الكلام ده .. القانون طيب يطلع قانون بالاستثناء من قانون .. طبعاً فيه حاجات من دى حصلت كثير .. شوف حيث تغيب الديمقراطية .. خلاص » .

• وأصبح للعامل والفلاحين ٥٠ ٪ من مقاعد مجلس الأمة .. وانطلق القطاع العام ...

• وأسأل إبراهيم شكرى : ماذا نقول لنا عن الثورة الاشتراكية والتحول الاشتراكي ؟

• والقوانين التى اتخذت .. ومنها قانون تحديد الملكية الزراعية ثم بعد ذلك التأمين للشركات الكبرى .. كل هذه أمور تدخل كلها فى إطار النظم الاشتراكية .. ولم يكن هذا غريباً فى العالم لأنه كان جزءاً كبيراً من العالم يأخذ بهذا النظام .. هو المهم إنه لا يكون هناك نقل كامل لبعض الأنظمة وبعض الطرق إلا بقدر ما هو مفيد لنا .. لكن تأمين الدكاكين الصغيرة إلى الشركات الكبرى .. هذا كان نوع من التجاوزات التى يمكن إنها مست الفكرة .. يمكن أن يكون التوجيه فى يد الحكومة وفى نفس الوقت إعطاء فرص كبيرة جداً لكثير من المهنيين العمال الصغار أن يجتهدوا ويعملوا .. وليس الأمر إن الكل سيحصل فى هذه المصانع المؤممة لكى لا تنضم بعد ذلك الأعداد التى تعمل أو أن تأخذ الحكومة على نفسها أن توظف كل إنسان يخرج من الجامعة » .

• ويقول د . عبد العزيز حجازى : « الفترة من سنة ٥٩ نضيف عليها ٧ سنين تبقى ٦٦ .. نجد أنفسنا أمام حرب اليمن .. مرة أخرى معركة يقصد بها التحرير .. ثم التحول الاشتراكي الذى حصل سنة ٦١ بالميثاق .. وطبعاً جر معه مجموعة من التأميمات فخلق قطاعاً عاماً ضخماً .. وقد يكون لذلك أسباب .. قطعاً كانت النظرة إلى دعم الطبقة المتوسطة بالذات وبالتالى كان الهدف منها الحصول على موارد من القطاع العام بهدف التوسع فى التكافؤ الاجتماعى فى البلد .. سواء كانت من مراكز ثقافية أو صحية أو التعليم .. الخ .. أما الفترة الثانية طبعاً الميثاق يلعب دور أساسى فى السياسة الاقتصادية فى مصر » .

• ويقول د . مصطفى خليل : « سنة ٦١ كانت نقطة التحول إلى الأخذ بأسلوب الاقتصاد الاشتراكي .. إنما الجزء الأكبر الذى هو كان ابتدا يبلور سياسية اقتصادية على فلسفة قيام الاقتصاد على أساس سيطرة الدولة حدث ابتداء من عام ٦١ .. وكانت فكرة الرئيس عبد الناصر .. القطاع العام يستطيع أن يكون الركيزة الأساسية للاقتصاد فى تطوره وفى دفعه .. طبعاً عمليات التصدير فى حد ذاتها مش كان مطلوب منها على وجه الإطلاق إنها تكون

مصادرة للأموال أو إقفار للناس .. ولكن كان المقصود منها إن الدولة تسيطر .. وكانت الأمثلة كثيرة أمامنا في الدول الاشتراكية .. وكان الاتحاد السوفيتي أول دولة أرسلت سفينة فضاء إلى الخارج .. فكان ده النموذج اللي معظم الدول في ذلك الوقت وخاصة الدول النامية بتتخذه .. نستطيع أن نقول إن ما يصلح في فترة ما وما يصلح في ظرف ما ربما لا يصلح في فترة أخرى ولا يصلح في ظرف آخر .. لكن في اعتقادي إن ما تم في ذلك الوقت كان مبنياً على أساس اعتقاد وطني قائم .. على ضرورة دفع اقتصاديات البلد إلى الأمام .. في ظل هذه السياسة في ذلك الوقت بدون شك تدخل القطاع العام وأوجد نوعاً من سيطرة البيروقراطية ووجود موظفين لم يسبق لهم العمل في هذا المجال .. وكذلك الحياة الاقتصادية كلها .. اهتمت الدولة أن تسيطر عليها .. ده له ضرر من ناحية معينة إن أرزاق الناس نفسها ارتبطت بالدولة .. وده انعكس على الوضع السياسي وطبعاً ترجمته كان وجود التنظيم السياسي الواحد وهو الاتحاد الاشتراكي .. وطبيعياً أن عدم وجود أحزاب سياسية في ذلك الوقت كان فيه شيء مقبول من عامة الشعب على وجه العموم .. وبعد ذلك تطورت الأمور » .

• ويقول د . عزيز صدقي : « التأميمات كما ذكرت .. إن ما كانش فيه صناعة بالقدر اللي نتكلم عنه علشان أفهمك قصدى إيه .. شركة زى المحلة .. شركة عظيمة جداً .. شركة المحلة بدأت بـ ١٢ ألف عاملاً لما أنشأناها .. النهارده فيها على ما أعتقد حوالي نصف مليون .. لغاية تأميمها كانت ١٢ ألف كانت وصلت مثلاً ٧٠ - ١٠٠ ألف .. القطاع العام اللي إحنا كمان أنشأناه .. الحديد والصلب .. السمد .. مصنع الأسمنت .. الألومنيوم .. كل المصانع اللي من الإسكندرية إلى أسوان .. أنشئت من جديد ولم تكن موجودة وكانت بتمول من الدولة .. طبيب من يديرها .. أنت النهارده لما تنشئ شركة النصر .. مش من حقاك أن تدير .. هو ده .. لذلك موضوع القطاع العام ده شيء لزوم الشيء .. عاوز تصنع .. أنت إذن الصبح يبقى قطاع عام .. هل الإنجليز مثلاً شيوخيين .. طب همّ لما جم في مصر .. مش همّ اللي عملوا التليفونات .. مش همّ اللي عملوا السكة الحديد .. طبيب ما عملوهاش ليه قطاع خاص .. الشيء لزوم الشيء .. عاوز تعمل هذه الخدمة ما كانش فيه حد يعملها إلا الدولة » .

• وتكون لأول مرة ما عرف بالتنظيم الطليعى الذى ثارت حوله الكثير من الأقاويل ...

• ويقول سيد مرعى : « بدأت أنا وكيل مجلس الأمة أشعر بمظاهر غريبة تحت قبة البرلمان .. اجتماعات سرية وخلايا يجرى تكوينها .. وتنظيم سرى يتم الترتيب له .. هذا تنظيم غير معلن » .

• وأسأل سامى شرف : التنظيم الطليعى .. الرئيس عبد الناصر كان شخصياً مشرفاً عليه ، وكانت الأسماء سرية وتعرض عليه .. الكلام ده صح ولا غلط ؟

• « صح ! » .

• وأسأل د . محمد الدكرورى : لماذا لم ينضم الرئيس السادات لهذا التنظيم ؟

« التنظيم الطليعي لا علاقة له بضم السادات .. لأن الرئيس السادات وغيره من عمالة مجلس قيادة الثورة لم يكونوا أعضاء فيه .. وكان هذا التنظيم خاص بالرئيس عبد الناصر .. وكان المسئول عنه السيد شعراوي جمعه .. وكان التنظيم سرى وهدفه إيجاد قوة أخرى منظمة تنقل الرأي العام .. وكان وقتها بدأت بوادر صراع بين مجموعة المشير ومجموعة عبد الناصر تأخذ شكل أكثر وضوحا .. وكان الجيش بتشكيلاته المختلفة في ناحية والمشير هو المسيطر عليه .. وكان لابد من ظهور تنظيمات سياسية أخرى والتنظيمات المستحدثة غير الاتحاد الاشتراكي لأنه لم تكن فاعليته واضحة .. وكانت التشكيلات هي الشباب والتنظيم الطليعي » .

• وأسأل د . الجوهري : تقول إن على صبرى كان يشرف على تنظيم سرى مع شعراوي جمعة والدكتور لبيب شقير ؟

• « آه .. ده التنظيم الطليعي .. ماهو منه لسه ناس يشتغل لحد الآن موجودين فيه .. منهم وزراء .. التنظيم الطليعي ده هو كان من ضمن التنظيمات اللي كانت خطأ لأنه أنا لما جاء لي لبيب شقير بعث لي علشان أدخل التنظيم .. قلت له أنا لا يمكن أتلقى تعليمات من القوار .. وأنا واحد منهم .. دى نمرة ١ .. نمرة ٢ أنا ما اشتراكتش في حياتي في تنظيم سرى مرتين .. أنا أخذت دورى في هذه العملية واعتذرت لأنى ما كنتش أحس إن له فاعلية » .

• ومين كان على رأس هذا التنظيم ؟

• « على صبرى هو اللي كان متولى هذه العملية » .

• وأسأل د . مراد غالب : حضرتك كنت من مؤيدى التحول الاشتراكي فى مصر ؟

• « بكل صراحة كنت من مؤيدى التحول الاشتراكي فى مصر .. ولكن هنا يجب أن نكون واضحين تماما .. وحتى بالنسبة لجمال عبد الناصر .. ليس معنى هذا بناتنا إن إحنا نعمل نظام زى الاتحاد السوفيتي .. وليس معنى هذا أن نتخلي عن قيم محددة بالنسبة لمصر .. كجزء من العالم العربى وإفريقيا والعالم الإسلامى .. الدين كان بالنسبة لنا مهما جدا .. استقلالية الفكر المصرى كانت مهمة جدا .. وأنا بأقول لك إن كان فيه منظمة الشباب وكان بيرأسها الدكتور حمدين كامل بهاء الدين رجل فاضل وله مواقف رائعة » .

• وأسأل د . ثروت عكاشة : ماذا تقول لنا عن التنظيم الطليعي ؟

• « لقد تفاديت الاشتراك فى التنظيم الطليعي .. لعدم إيماني بجدوى مثل هذا التنظيم السرى فلم تجرى العادة أو ليس من المنطقى أن تتولى السلطة إعداد أو تشكيل تنظيم سرى من أعلى إلى أدنى » .

• ويقول أحمد كامل : « التنظيم الطليعي كلمة بسيطة جدا .. لولا التنظيم الطليعى ما كان هناك عمل سياسى فى مصر » .

• إزاي يافندم ؟

• انظر إلى جميع الموجودين النهارده .. وكثير منهم فى أعلى مناصب الدولة .. كانوا فى التنظيم الطليعى .. وهو كان تدريب وخبرة لإنشاء حزب .. وليس للكلام الفارغ الذى يبتقال .. كتابة التقارير .. والتصنت والتسجيلات .. كل ده خطأ » .

• بينما يقول صلاح الدسوقي : « أنا كنت ضد الأسلوب الشيوعى .. ضد نظام طليعى يتجسس على بعض .. وقلت لجمال عبد الناصر .. يا سيادة الرئيس أنا بعيد عن الموضوعات دى .. لأنى لا أؤمن بأن شخص يتجسس على قريبه .. قال لى أنا عارفك وعارف أخلاقك أنت بره الموضوع .. ده خلاص .. لما رحنت سفيراً وأنا فى فنلندا كتبت تقاريرى كلها أخطر من الدخول أكثر من اللازم مع الاتحاد السوفيتى .. وكان الله يرحمه الشبراوى قال لى كل التقارير اللى بتعتها كانت بتروح السفارة الروسية .. قلت أنا لا يعينى من ينقلها للسفارة الروسية أنا برضه وطنى .. أرضى ضميرى .. الدخول زيادة عن اللزوم بهذا الشكل ده فى المنطقة .. اللى أسميها الرمال المتحركة .. من الصعب الخروج منها » .

• وأسأل نجيب محفوظ عن منظمة الشباب ؟

• منظمة الشباب نجحت فى تجميع الشباب .. وفى اللعب والرياضة .. لكنها فى الحقيقة لم تربي الشباب كما يجب .. الشباب اللى عاوز يربيه علشان ينتمى ويبقى عندنا شباب منتمى .. يجب أن يربطه بسياسة بلده من الابتدائى .. مش يمنعوا السياسة من المدارس والجامعة .. منع السياسة من هنا يعنى منعك من الحياة العامة .. فتطلع غير منتمى إليها تبقى منتمى لنفسك .. منظمة الشباب كان يجب تكون هى اللى بتدرس على طريقة تجريب كل مشكلة فى مصر .. وتبدى رأيها فيها » .

• وأسأل عباس رضوان : قالوا وصلنا لدرجة أنه كان أى واحد يبقعد مع أى واحد من أصدقائه فى مجتمع عام .. ممكن يكون الصديق ده بيراقبه أو ببسجل كلامه ثم يفتن عليه ؟

• « والله حتخلينى أدخل فى موضوع التنظيم الطليعى .. التنظيم الطليعى أنا كنت عضوا معاهم .. جمال يرأس اللجنة اللى ماسكة هذا التنظيم يرأسها وأنا معه .. وعلى صبرى واثنتين ثلاثه آخرين .. التنظيم ده مش مخابرات ومش معلومات ومش يفتن على الناس بالعكس .. التنظيم ده كان فيه خيرة شباب مصر وأساتذتها سواء كان على مستوى الجامعات أو على مستوى أى أنشطة أخرى .. كون واحد أو جهاز من أجهزة الأمن زى ما نقول مثلا .. توسع أو اهتم أكثر من اللازم بلان ده لازم يبقى كده .. مش معناه إن كل واحد كان بيتجسس على الآخر .. أنتكر إنه كان التنظيم الطليعى فيه وزراء لم تُعرف إلا من التنظيم الطليعى .. الدكتور مصطفى كمال حلمى وكل من تولى الوزارة ابتداء من عبد الناصر ثم أنور السادات إلى الآن جزء كبير منهم كان فى التنظيم الطليعى سواء كانوا أساتذة جامعة أو فى وظائف أخرى .. هذا لا يمنع إن أى حاكم أى مكان بيبقى عرضة لناس متسلقين .. إن لم يكن حريصاً جداً .. فيحاولوا يفتنوا له إنهم أحرص عليه من نفسه .. ممكن بعض شخصيات أو بعض الأفراد .. حاولوا أن يظهرها هذا إنما كان عبد الناصر مخه كبير » .

• وأسأل نجيب محفوظ : التنظيم الطليعى ؟

« التنظيم الطليعى ده فكرة لم تتحقق .. وأنا شخصياً .. يوسف السباعى قال لى فى يوم من الأيام إحنا هنعمل تنظيماً طليعياً .. وأنا اخترتك معى .. واجتمعنا مرة واحدة .. ولم أعرف ما هو التنظيم الطليعى هذا » .

• وأسأل أحمد الخواجة : كنت فى التنظيم الطليعى .. نتكلم عن هذه التجربة ؟

« هذه التجربة مرتبطة بالناس الذين يمارسون العمل فى التنظيم الطليعى .. وسلوك الناس يختلف وأخلاق الناس يختلف .. وأنا كنت فى التنظيم الطليعى مسئولاً عن مدينة الجيزة .. أنا أستطيع أن أقول إننى خلال ٣ سنوات لم أتلّق تقريراً فى شخص ولم يقدم من التنظيم الطليعى حتى أكتوبر ٦٨ تقريراً فى شخص .. بالعكس كانت التقارير موضوعية .. وكان العمل موضوعياً لأن التنظيم كان مختاراً وكان معظم اللي فيه من كبار القائمين على العمل التنفيذى .. وأذكر أنهم فى مرة قدموا خدمة للناس .. زرعوا محافظة الجيزة خضار وصدروه لباريس .. فتعلق الفلاحين بهم تمام التعلق .. إنما نتيجة الأمر فى السنة التالية الفلاحين ما عرفوش لا يصدروا ولا يعبوا ولا يغلّفوا .. طبعاً كان فى التنظيم الطليعى سلوكيات كثيرة مختلفة وطموح البشر فى ظل أى نظام ليس له حدود .. إنما المهم بنشرف على العمل .. بنعمل فيه إيه .. إذا كان الذى يشرف على العمل أميناً مع نفسه وأميناً على الناس وأميناً أمام الله .. يستطيع أن يحمى أى مسيرة .. لأن هو قيل إن التنظيم الطليعى ده القصد منه هو إخفاؤه عن الناس .. فيه ناس لا يحب مهمّا أخفيتهما كانت تباهى إنها أعضاء فى التنظيم الطليعى .. أكثر من كده التنظيم الطليعى كان كثيراً ما يجتمع فى أحد الأندية .. فى الزمالك مثلاً كان فيه ناس بعدما تخلص عملها فيه .. تستنى على الباب علشان تعرف مين اللى جاى .. مع إنه المفروض يبقى أميناً على هذه الأسرار فيما يتعلق بذاته .. فلا يجوز أنه يتطلع على أسرار الآخرين » .

• وأسأل مبارك رفاعى : التنظيمات السرية كانت تكلف ميزانية الدولة أموالاً طائلة .. إيه تعليقك ؟

« تنظيمات الضباط الأحرار السرية لم تكلف الدولة أى شيء .. حتى التنظيم الطليعى اللى بيقال عليه .. هو يعنى فيه آراء بتنأوله بالإيجابية والسلبية .. والنقد والتجريح .. لكنه لم يكلف الدولة شيئاً » .

• كنت رئيس التنظيم الطليعى فى محافظة كفر الشيخ .. وقبل كده كنت فى محافظة الإسماعيلية ؟

« لا أنكر ذلك .. وكان فيه ناس كثير أفاضل .. لم يكن هناك أحد يبنضم إلى التنظيم الطليعى كفرد .. التنظيم الطليعى كان بيختار العضو ويفاتح على إنه عضو فى التنظيم الطليعى .. يعنى مافيش أحد يجيى ويأخذ استثماراً ويقدم ويقول لك عاوز أروح التنظيم الطليعى .. لا ده بمستدعى نتيجة اختبار ونتيجة متابعة ونتيجة أن القيادة السياسية ترى إنه عضو صالح .. يمكن الاستفادة

به .. فيه أسماء كثيرة .. مشهور أحمد مشهور .. عزت عادل .. دكتور عبد العزيز حجازى .. دكتور فؤاد محبى الدين .. كل دى أسماء لامة وأسماء طبية وخدمت فى مجالها بمنتهى الأمانة والصدق .. الدكتور محمود شريف .. دكتور حسين كامل بهاء الدين .. وأنا لا أدافع عنهم أنا أقول الحقيقة .. استدعينا للتنظيم الطبيعى بالاختيار .. وهدفه إن مجموعة من الأفراد فى مجالات وتخصصات مختلفة يقدموا لقيادة السياسية بصدق رؤى صادقة عن المشكلات أو مطالب المجتمع أو الجماهير » .

• هل حصل إنحراف من البعض والتجسس على البعض واستغلال البعض للعضوية .. وأكد هذا أساء إلى هدف التنظيم الطبيعى ؟

• « أى عمل أو أى تنظيم .. سواء سياسى أو تنفيذى أو إدارى قد يحدث فيه هفوات .. وقد يحدث فيه تجاوزات .. لكن إحنا نتحاسب على الهدف .. أنا لا أدافع عنه .. يعنى سمعنا أنه فيه تجاوزات .. أنا يمكن فى مجموعتى ما شفتهاش .. أو فى المجموعة الللى كنا فيها .. عموماً هذه التجاوزات لا تعيب الكيان نفسه أو التنظيم نفسه أو الفكر نفسه اللى وراء التنظيم » .

• واحتفلنا فى مايو ١٩٦٤ بتحويل مجرى النيل .. ومما هو جدير بالذكر أن مشروع السد العالى قام على أكتاف رجال « المقاومون العرب » بقيادة المهندس عثمان أحمد عثمان ...

• ووجه عبد الناصر خطاباً لخروشوف يقول فيه : « شعب الجمهورية العربية المتحدة لن ينسى على الإطلاق ومهما طال الزمن الجهد الذى بذلته شخصياً فى عملية بناء السد العالى » .

• وكان هذا إعلاناً عن نهاية خلاف عبد الناصر وخروشوف ...

• ويقول أحمد أبو الفتح : « رأى عبد الناصر أن يسرع بإصلاح ما بينه وبين خروشوف .. فأرسل إليه فى نوفمبر ١٩٦٣ صلاح سالم .. وكانت إسرائيل أعلنت بدء عملية تحويل مجرى النهر التى تلحق أضراراً بالغة بالأردن وسوريا » .

• ويقول إبراهيم بغدادى : « هم الشيوعيون كان مقبوضاً عليهم لغاية سنة ٦٤ وكانوا معتقلين من أوائل ٦٠ ولما جاء خروشوف علشان يفتح السد العالى طلب من الرئيس عبد الناصر إنه يفرج عن الشيوعيين علشان ييجى .. وتم الإفراج عنهم فعلاً .. وتويعوا لهم أخذوا مراكز فى الصحف والإذاعة وكان لهم اليد العليا فى توجيه رأى العالم باعقائهم إن احنا متجهين إلى الاشتراكية المتطرفة .. وده كان الوضع القائم سنة ٦٦ » .

• ويقول أحمد أبو الفتح : « وكسبت الكتلة الشيوعية اعتراف مصر .. وانتهزت هذه الفرص الذهبية .. فنظمت وسائل دعائيتها المعارض .. ووفدت فرق الفنون والرياضة .. وأصبح من الطبيعى أن نجد الأفلام الروسية تعرض فى دور السينما المصرية » .

• وهاجر كثير من العقول المصرية .. وهاجم عبد الناصر الارستقراطية والارستقراطيين ..

• وأسأل سامى شرف : فى إحدى خطب الرئيس هاجم الارستقراطيين اللى هم فى نادى الجزيرة والأندية الأخرى .. هل هذا صحيح ؟

• « لأ مش نقد وهجوم .. فيه ناس بتبقى معزولة عن الطبقات الحقيقية للشعب ورجل الشارع اللى هو صاحب المصلحة الحقيقية .. وبيقعدوا فى أبراج عاجية .. وزى أنت ما بتقول فيه بحث أكاديمى علمى على الورق وفيه بحث ميدانى على الطبيعة وده أسلوب علمى فى التعامل مع الأشياء والأشخاص .. أستاذ الجامعة اللى بيبقى عامل دراسة ميدانية بتبقى « More Efficient » وأكثر قيمة فى التطبيق وفى التنفيذ وفى التدريس عن النظرية الجامدة .. فيه ناس الواحد يفضل معاك لغاية لما تحصل جيبه إذا حصلت جيبه يقول لك لأ « Stop » .. هى العملية عملية التمييز دى عملية نقدية الأسهم .. كان فيه ناس بتتكلم فى هذا الموضوع على أساس إن ده مش لصالحهم ومش لصالح البلد » .

• دول من أندية معينة ؟

• « كان Mainly (أساسا) فى نادى الجزيرة .. أصل أيامها كان معروف فى ظل نظام ثورة ٢٣ يوليو لغاية وفاة الرئيس جمال عبد الناصر نادى الجزيرة ونادى هليوبوليس .. والناديين الأهلئ والزمالك كانوا أندية رياضية لم تكن أندية تجمع جماهير وشغل » .

• ويقول أحمد أبو الفتوح : « قال عبد الناصر عندما أخبر أن فؤاد سراج الدين جالسا بضحك فى نادى الجزيرة .. هو لسه له نفس بضحك !؟ .. وهذا الكلام محض افتراء لأن واقع الأمر أن جميع السياسيين القدامى كانوا ممنوعين من دخول الأندية » .

• ويقول د . يونان لبيب رزق : « عبد الناصر من الطبقة الوسطى كأغلب الشعب المصرى .. وكان الباشوات والباكوات يمثلون الطبقة الارستقراطية .. لذلك كان يعاديههم باعتبارهم ممثلين للإقطاع » .

• يقول أحمد حمروش : « وانتشرت فى مصر لأول مرة مظاهرة هجرة الشباب إلى الخارج » .

• وأعيد انتخاب عبد الناصر رئيساً للجمهورية وحلف اليمين فى مارس سنة ١٩٦٥ ...

• واستكمالا للأحداث المحلية تولى النائب زكريا محبى الدين رئاسة الوزراء سنة ١٩٦٥ من على صبرى بعد أن تعثرت بعض خطوات وزارته نتيجة التضخم ..

• وأسأل شمس بدران : زكريا محبى الدين ماذا تقول عنه ؟

• « رجل كفء فى عمله جدا .. اتجاهاته كانت دائما أمريكانى .. وعلشان كان ماسك دائما المخابرات والحاجات دى .. فكانوا الإخوة بيتريقوا بقى .. وجمال عبد الناصر كان مسميه « بربون » « بريا » اللى هو رئيس مخابرات السوفيت أيام ستالين » .

• وأسأل د . محمد الدكرورى : ماذا تقول لنا عن زكريا محبى الدين ؟

• « زكريا محبى الدين رجل فاضل وتاريخه فى ظل الثورة من بدايتها حتى اليوم .. لا يتكرر له إلا إنه كان رجلاً وطنياً .. وكان رجلاً عاقلاً وهادئاً .. ده كل ما نسب إليه بكل الأمانة والصدق » .

• **ويقول أحمد سعيد :** « هو زكريا محبى الدين بتيجى سيرته دائما مع المخابرات وحاجات كده .. هو فيه مثل بيقول ماقدروش على الورد قالوا عليه يا أحمر الخدين .. هو المطلوب إيه من وزير الداخلية .. المطلوب إيه من رجل المخابرات ؟ أولاً حفظ الأمن وإذا كان فيه ثورة حفظ الثورة من أعدائها من الداخل والخارج .. إذن لازم إيده تكون ثقيلة على دول .. ثانياً رجل المخابرات لازم يكون « صاحى » ومفتح .. فإلى حد ما الرجل ده مظلوم » .

• **وأسأل أحمد طعيمة :** هل قال الرئيس مرة « زكريا عزلنى » ؟

• **قلت له مرة لازم تسبب السبيل للمعارضة .. فرد بنقول لى أحزاب ؟ ده أنا زكريا محبى الدين عملته رئيس وزارة .. فى ظرف ٦ أشهر كان عزلنى .. ما بتقش دريان البلد جاية منين ورايحة فين .. ده كان رده فى هذا الموضوع » .**

• **ويقول أمين هويدى :** « كيف كانت الأنظمة قبل الثورة تضمن بقاءها .. أجهزة المخابرات العامة لم تكن موجودة .. لكن كان موجوداً الجهاز السياسى .. البوليس السياسى .. وكان موجوداً المخابرات الحربية وموجود الجيش الإنجليزى وكانت موجودة مخابرات القصر إلى آخره .. إنشاء المخابرات العامة كان مجازة لما كان يدور فى الدول الأخرى من وجود جهاز يقوم بهذا الواجب .. أقول لك على حاجة .. جهاز المخابرات العامة شغله خارجى أكثر منه داخلى .. يعنى يهتم جداً بالحصول على معلومات من الخارج ولا يهتم كثيراً بالناحية الداخلية .. صحيح بيشتغل فيها للأمن بتاع البلد لأنه لا يصح أن تسلم ذقنك لجهاز واحد .. جهاز المخابرات بيشتغل فى مجال خارجى أكثر منه داخلى .. يعنى جاسوس .. يحصل على معلومات عن العدو .. وكان فيه أجهزة سياسية موجودة .. ليه بنشغل الأجهزة السياسية .. ما هى الأجهزة السياسية .. أى رئيس بيثبت حكمه بإيه ؟! » .

• **وفى هذه الأثناء قبض على الكاتب الكبير مصطفى أمين سنة ١٩٦٥ بتهمة التخابر مع الأمريكان ...**

• **بينما يقول عبد المنعم أمين :** « معلوماتى أن مصطفى أمين كان مكلفاً بشوية حاجات من عبد الناصر .. والمقابل دى كانوا دائماً يعملوها .. دى كانت خطة عبد الناصر مع كل الناس » .

• **وأسأل مصطفى أمين :** هل الخلاف مع الرئيس عبد الناصر كان شخصياً أم كان فكرياً ؟

• **« أنا رأى كان فكرياً .. يعنى أنا لم أكن موافقاً على التعذيب واعترضت عليه .. وقالوا لى ما فيش تعذيب وأكندوا لى هذا .. وعندما سمعت من راديو إسرائيل أن معركة قامت فى سجن**

طرة وقتل فيها ٢١ واحد .. أنا كلمت الرئيس عبد الناصر وقتلت له راديو إسرائيل يقول إنه حصل معركة وقتل ٢١ من الإخوان المسلمين ،

• كنت مؤيداً للثورة فى البداية .. ولكن حصل خلاف بينك وبينهم .. نقدر نعرف سبب هذا الخلاف ؟

• السبب انى كنت أطالب بتطبيق المبدأ السادس من الثورة .. وأطالب بحياة ديموقراطية صحيحة .. كان رأيى إن مادام الحركة أعلنت هذا المبدأ يجب أن تنفذه .. ولكن وجدوا إن الحكم الديكتاتورى أسهل .. لأنه يعطى أوامر وتنفذ .. وإنما حكم الشعب ثنائى وتُفَعِّع وهم غير مستعدين لهذا .. لجأوا إلى الحكم الديكتاتورى قالوا يعملوه لمدة ٣ سنوات وبعدين مدوا إلى ٣ سنوات إلى مالا نهاية .. عبد الناصر قال لى التعذيب غير صحيح .. قلت له غير صحيح خالص ؟ قال لى آه .. فصدقته .. إلى أن دخلت السجن .. دخلت أوضة علشان أقعد فيها .. وجنتها مليانة خروم فى السقف وفى الجدران .. قلت للعسكرى ده ده .. قال ده لما حصلت معركة الإخوان المسلمين .. جم وقتلوا ٢٢ داخل الزنزانة .. فعرفت إن الخبر لم يكن صحيحاً وإنهم لم يكونوا ٢١ كانوا ٢٢ ،

• وكنت همزة الوصل أو حلقة الاتصال بين الثورة وأمريكا .. فما الذى حدث ؟

• أنا شخصياً مش عارف هو عمل كده ليه .. أنا كنت مكلفاً .. وعبد اللطيف بغدادى شهد أمام المدعى الاشتراكى أن جمال عبد الناصر كان يقول لهم إن مصطفى أمين أرسلته يقابل سفير أمريكا وقال له كذا وكذا .. كانوا عارفين .. وبعدين قال لا بعثناه ولا سألنا عليه .. هو من نفسه ،

• تفكر ليه ؟

• أنا أعتقد إنها سئاس داخلية إنه كان فيه ناس بتتصيد لى قوى لأنى كل مناسبة أكتب عن الديموقراطية ،

• مين .. من رجال الثورة ولا من رجال الصحافة ؟

• من الاثنين .. مش عاوز أحكم على هذا .. أسببها للتاريخ ،

• وأسأل عبد اللطيف بغدادى : الرئيس عبد الناصر كان بيطلب من مصطفى أمين معلومات ؟

• أيوه .. كان بيستعين به ،

• وبعدين اتهمه بالتجسس ؟

• عملية التجسس دى أنا كنت مستقيلاً فى مارس ٦٤ .. والمدعى الاشتراكى سألنى بالنسبة لمصطفى أمين من الناحية دى .. قلت لهم مصطفى أمين كان جمال عبد الناصر بيستفيد منه .. ومن المعلومات اللى بيحببها من السفارة الأمريكية أو الإنجليزية .. ومصطفى أمين بالتبعية

لازم يديهم حاجة علشان يأخذ مقابلها معلومات .. أمر طبيعى .. وفى ٥٦ كان مصطفى أمين أول واحد خرج من هنا بالطيارة وسافر أمريكا فى الأمم المتحدة علشان يعلن الاعتداء الثلاثى .. والخصائر اللي فى بور سعيد والقنلى وكلام من ده .. عبد الناصر كان مستفيداً منه .. لكن ٦٦ بقى دى ما أعرفش عنها حاجة .

• وأسأل شمس بدران : الأستاذ مصطفى أمين كان أدلى بمعلومات واخدها من مجلس الأمة وأعطاهم للسفارة الأمريكية .. بتقول ذلك فى أوراقك ؟

• آه .. هو كان متهماً بالتجسس لحساب أمريكا وكانت المخابرات العامة بتعمل له تسجيلات عن طريق واحدة كان بيحبها هو .. والمخابرات خلقتها تعمل له تسجيلات .

• واحدة إيه ؟

• واحدة مثلة أو مطربة .

• وأسأل د . الجوهري : ماذا تقول عن خلاف الأستاذ محمد حسنين هيكل والأستاذ مصطفى أمين ؟

• والله أنا يمكن باعتبارى برضه عندى دكتوراه فى الصحافة .. وعشت مع الناس دول قبل الثورة وبعد الثورة .. أقول إن مصطفى أمين مافيش شك شىء كبير جدا فى تاريخ الصحافة المصرية .. وخلافه مع هيكل أنا لا أحيدّه إطلاقاً وكنت أتمنى إنه هو يكون وفيّاً لمصطفى أمين أكثر من كده .. ده أنا قلته فى كتابى .. لأن الكتب بتاعة هيكل فيه جزء كبير منها صفقات نشر تجارية .. ما أعتقدش إنها تهدف إلى هدف معين .. وأنا أحب الوفاء جدا .. الوفاء ده عملية مهمة .

• ويقول تحسين بشير : « الاثنان عباقرة .. الأستاذ مصطفى أمين والأستاذ هيكل .. والاثنان اتهم بأن لهما علاقة بالمخابرات الأمريكية .. ولكنى أعتقد أن كلاهما حتى إذا تعامل مع أى جهاز من الأجهزة .. كانا يبنظرا إلى مصلحة مصر لا إلى مصلحتهما الشخصية .. والخلاف بين « فرعونين » الصحافة .. هيكل وهو طاووس كبير جدا .. والأستاذ مصطفى أمين اللي بيعمل بطريقة أخرى .. يعمل عن طريق تفريخ صحفيين جدد يستمروا فى المدرسة دى ويعاونهم بغض النظر بيشتغلوا مع الوفد أو الإخوان .. كلاهما من الشخصيات العملاقة اللي نشأت فى مصر .. أنوا دوراً مهماً ولعل فى خلافتها ما يثرى الصحافة المصرية » .

• وأسأل أتيس منصور : إيه الإشكال أو الخلاف الذى حدث بين الأستاذ هيكل والأستاذ مصطفى أمين ؟

• « برضه دى قصة طويلة عريضة .. يعنى أنا أعتقد أن هيكل له دخل كبير فيها .. طبعا هيكل الصديق المفضل والمتحدث الرسمى باسم الرئيس عبد الناصر .. أو بالأصح الرئيس عبد الناصر المتحدث باسم ما يكتبه هيكل .. لإنه رجل فصيح ومبين فكان لا يريد أحداً أن

يقترّب منه .. كان فيه حادثة معينة معروفة عند كل الصحفيين .. فى يوم من الأيام جلال الحمامسى قابل عبد الناصر وقال له يعنى إيه هيكل ده اللى أنت مقربه منك .. فبعد الناصر استمع واستمع وقال له يا أخى عاجبنى .. وأذكر أنى وجلال الحمامسى اترفدنا فى ورقة واحد وفى يوم واحد .. فهيكل طبعاً الصديق الأثير المفضل عند عبد الناصر .. ولم يكن يسمح لأحد أن يقترّب منه .. وسواء كان مصطفى أمين أو على أمين كانوا بيكلّموا جمال عبد الناصر لكن هو ماعندهوش ثقة فيهم أبداً .

• هل هو ما عندوش ثقة فيهم أصلاً ولا يعنى الأستاذ هيكل نمى هذا الشعور .. كما قال البعض .. وأبعد بينهما حتى كان ما كان ؟

• « كل الأقلام حطمت وكسرت وانفرد به وبنا .. كاتب صحفى كبير هو الأستاذ هيكل » .

• « قبض على بعض من اشترك فى تشييع جنازة النحاس ...

• ويقول أحمد أبو الفتوح : « قبض على عدد من السياسيين لمشاركتهم فى تشييع جنازة الزعيم مصطفى النحاس » .

• ويقول د . يونان لبيب رزق : « شيع عدد كبير من الجماهير جنازة الزعيم الراحل مصطفى النحاس .. الذى أكد يوم وفاته أن شعبيته كانت لا تزال فى قلوب الناس .. ولم يسعد هذا التجمع أولى الأمر » .

• وتوالت الأحداث خارج مصر .. وكانت أمريكا وراء معظمها .. فقامت مجموعة من الانقلابات .. انقلاب الجزائر الذى قاده يومدين ضد زميله بن بيل يوم ١٩ يونيو ١٩٦٥ ، والانقلاب الذى حدث على الرئيس الإندونيسى أحمد سوكارنو ، ثم شهدت إفريقيا الانقلاب الأخطر الثانى وهو الانقلاب على نظام الرئيس الغانى كوامى نكروما .. ثم توالت الانقلابات فى آسيا وإفريقيا وأمريكا اللاتينية .

• ويقول د . يونان لبيب رزق : « كانت علاقتنا مع القبارصة أفضل من علاقتنا مع تركيا بحكم أن عدونا مشترك وهو الإنجليز .. وكانت اليونان وكذلك قبرص لم يعترفوا بإسرائيل .. وكانت مصر تساعد حركة التحرير المعروفة باسم « أيوكا » .. وكان عبد الناصر صديقاً للأشقف مكاريوس » .

• ولجأ الملك سعود المعزول إلى مصر .. وتمت إزاحة عبد الكريم قاسم من الحكم فى العراق .. وفى اليونان تنازل الملك قنستنتين عن العرش .. وقبل ذلك أعلن إنشاء منظمة التحرير الفلسطينية .. واستمررنا فى الاحتفال سنوياً بعيد الوحدة ..

• ويقول عارف عبد الرزاق : « وصارت حركة التصحيح اللى سموها « حركة الشواف » .. لكن مع الأسف لم يتم لها النجاح إلى أن تهيأت الظروف سنة ٦٣ وتم إزاحة عبد الكريم قاسم » .

• وسألت عبد المجيد فريد : تصادف وجودك في الجزائر يوم قيام الرئيس بومدين بثورته ضد الرئيس بن بيللا ؟

• أنا موعود بحوادث في الأفطار العربية .. رحلت الجزائر كان فيه مؤتمر عدم انحياز حيكون هناك ولخبرتنا لإننا كنا في عام ٦٤ عملنا ٣ مؤتمرات وكنت أنا المسئول عنها : المؤتمر الإفريقي .. مؤتمر القمة العربية .. ومؤتمر عدم انحياز .. فكان فيه مؤتمر عدم انحياز على ما أذكر في يونيو ٦٥ وكان معنا مجموعة من المترجمين الفوريين ومجموعة وزارة الخارجية ومجموعة من الأمن نعاونهم في إعداد المؤتمر في ذلك الوقت .. تذكر في ذلك الوقت كانت الثورة نجحت وبين بيللا هو الذي تولى وكان أصلاً موجوداً في القاهرة .. فكان محسوباً أيضاً على جمال عبد الناصر وعلى الجمهورية العربية المتحدة .. الجيش قام بثورة داخلية أو انقلاب داخلي برئاسة بومدين فكنت موجوداً أذكر جيداً في فندق في عاصمة الجزائر .. وبعدين في الفجر سمعت طلقات رصاص وضرب هاونات .. لبست قميص وبنطلون ونزلت وعرفت إنه حصل انقلاب عسكري .. وبعدين قلت موقف بن بيللا إيه وموقف مساعديه إيه .. لغيت على المساعدين القريبين لبن بيللا وجذتهم ببقلوا شنطهم ومتحركين إلى خارج العاصمة الجزائرية إما بعيداً عن الموقف أو بعيداً عما يحدث في العاصمة الجزائرية .. فقلت إذن الانقلاب الجديد بتاع بومدين ماحدش يتحرك ضده .. إذا كان همّ دول اللي المفروض بيقيموا مساعدين بن بيللا أو المؤيدين لبن بيللا .. مافيش مؤيدين لبن بيللا وبومدين مفرج الموقف فبعثت برقية شفوية إلى عبد الناصر أقول له الموقف الحقيقي وأنا بأنصح أنه إذا كان لنا موقف مع بن بيللا موقفاً إنسانياً .. لأن الجماهير العادية متحركة مع الانقلاب الجديد .. وفيه أخطاء من نظام بن بيللا .. والحقيقة عرفت بعد كده من الرئيس عبد الناصر إن البرقية دي لعبت دوراً جيداً لأنه هو عاطفياً كان متأثراً لموقف بن بيللا لأن هو اللي عمل الثورة الجزائرية وتحمل جزءاً كبيراً منها » .

• ويقول أحمد حمروش : « ساعد على اشتعال الحساسية بين الجزائر ومصر ما كتبه محمد حسنين هيكل في جريدة الأهرام عقب عودته مع المشير عامر في يونيو سنة ١٩٦٥ .. ويشابه هذا الموقف ما سبق أن حدث في السودان بعد ثورة ٣١ أكتوبر كرد فعل على مقال محمد حسنين هيكل .. ولكن الأمور لم تتطور إلى الأسوأ حرصاً من جمال عبد الناصر وهوارى بومدين على العلاقة الطيبة بين البلدين » .

• وشكلنا مع العراق مجلس وحدة .. وتحسن الموقف العربي مع الملك حسين والملك فيصل الذي تولى الحكم في السعودية .. كما شهدت هذه الفترة بداية استقلال الخليج .. وثورة كوبا .. وحرب فيتنام .. في عهد يوثانت سكرتير عام الأمم المتحدة .. وكان ليفي أشكول في ذلك الوقت رئيساً لوزراء إسرائيل .. وكان ويلسون في بريطانيا .. وديجول في فرنسا .. كما توفي نهرو في الهند .. وأبعد خروشوف من حكم روسيا ...

• ويقول الفريق سعد الشاذلي : « وإحنا في اليمن كنا بنساعد كل الحركات التحريرية الموجودة في عدن .. وفي المناطق دي ضد الوجود البريطاني .. من غير وجودنا في اليمن .. لم يكن

ممكناً أن نوصل هذه المساعدات والأسلحة إلى هذه القوات وكل القوات دى .. يعنى الدول الخليجية أخذت استقلالها بعد نجاحنا فى اليمن .. وبعد سنة ٦٧ » .

• ويقول سامى شرف : « إن تحرير اليمن ترتب عليه بما شمله من شهداء أو أرض ارتوت بدمائهم مكسباً كبيراً .. كان المكسب أكبر بكثير جداً من تحرير اليمن والإمارات كلها .. وزال النفوذ البريطانى من عدن ومن مدخل البحر الأحمر وأصبح لأول مرة البحر الأحمر بحيرة عربية » .

• ويقول د . يونان : « سنة ٦٣ حدثت أزمة « خليج الخنازير » .. فقد أعطى الاتحاد السوفيتى كوبا صواريخاً .. وكان كاسترو صاحب موقف ضد الغرب .. وكان على علاقة بعبد الناصر لأنهما أصحاب مبدأ مشترك وهو التحرير .. وكانت هذه الحركات ذات وهج خاص فى تلك الفترة .. وكادت أن تصل الأزمة إلى حافة حرب عالمية ثالثة » .

• وكان عبد الناصر قد اقترح قيادة عسكرية مشتركة للدول العربية .. أسهمت فيها مصر ودفعته حصة تساوى حصة السعودية بعد مؤتمر القمة العربية ...

• وقدمت مصر الدعم للمناضلين فى اليمن الجنوبي ضد الإنجليز .. وكانت يد مصر سباقة فى رفع علم الاستقلال ...

• وتدفلت الأسلحة على إسرائيل من أوروبا ..

• وفى نفس الوقت أعلن عبد الناصر اعترافه بألمانيا الشرقية ...

• ويقول د . يونان : « كانت إسرائيل دائماً وراء سوء العلاقات بين مصر والعرب من ناحية والغرب من ناحية أخرى .. وطالبت إسرائيل ألمانيا بتعويضات كبيرة وأسلحة .. ونتيجة للضغط وافقت ألمانيا مما مثل خطورة علينا » .

• ولم يجد عبد الناصر مفرأ من الاعتماد على روسيا .. وحضر عبد الناصر اجتماعاً ثلاثياً مع تيتو وأندريأ غاندى لحماية دول عدم الإنحياز من المد الأمريكى ...

• ويقول د . أشرف غربال : « أول مرة التقيت بجمال عبد الناصر كان فى سنة ٦٦ فى مؤتمر ثلاثى فى الهند .. كنت أنا مع محمود رياض كمستشار .. وكنا مراقبين للرئيس عبد الناصر » .

• فى هذه الفترة كان النظام فى مصر يعانى من أزمة اقتصادية وسياسية .. وظهرت آثارها على المصريين ..

• ويقول جمال حماد : « وظهرت مشاكل فى التموين .. وبدأت ظاهرة الطوابير أمام الجمعيات الاستهلاكية .. ورفضت أمريكا تجديد المعونة لمصر » .

• ويقول د . حسن عباس زكى : « مثلاً تيجى تطلب قمح من أمريكا لا تعطيلنا .. أنا سافرت مخصوص مرة من المرات مثلاً لروسيا .. لكى نتفاوض على إننا نحصل على كميات قمح لإن

ماعندناش قمح كفاية .. وكانت أكبر دولة عندها قمح هي أمريكا وامتنعت .. والإمتناع كان سياسة .

• ويقول أحمد طعيمة : بدأت معركة القمح .. وكان ذلك مقصوداً منه تجويع مصر .. ولعبت دوراً هاماً وأنا في المكسيك للحصول على كميات منه أرسلناها لمصر .. كما لجأت مصر إلى أستراليا لتحصل على كميات أخرى .

• واشتعلت المواجهة مع أمريكا ...

• وأسأل د . حسن عباس زكى : هل الخطة الخمسية الأولى نجحت أم فشلت ؟

• الخطة الخمسية .. ده أنا أكاد أقول إن دى كانت الخطة الحقيقية اللى اتعملت فى البلد .. ده إحنا لما اتعملت الخطة الخمسية أذكر إن قبلها بستنين راحت بعثات الهند وبلاد مختلفة لكى تدرس كيف نضع خطة .. واتعملت وزارة للتخطيط وجابوا خبراء .. الدكتور حلمى عبد الرحمن كان من كبارهم .. وكان هو أول من تولى عملية التخطيط واتوضع له سياسة وأسلوب علمى صحيح .. وكان فيه خطة ومداخلات ومخرجات بالتعبير العلمى الصحيح .

• إذن ما كانش فيه أزمة ؟

• لأ .. أشك .. دليل حاجة بسيطة قوى إحنا بنبحث عن النمو .. الناتج القومى .. كان بيزيد فى سنوات الستينات كان ما بين ٥ ، ٧ ، ٨ % .. الآن ما هوش ٣,٥ أو ٤ % .. يعنى طبعاً فيه أسباب قلته مشروعة أو مقبولة .. لكن فى ذلك الوقت كان وصل إلى قدر كبيراً .

• وقيل بعد ذلك إن مصر ابتدت تبيع الذهب بتاعها وهو احتياطى الجنيه المصرى .. فهل كان هذا القرار قراراً صائباً ؟

• أولاً هذا القرار غير صحيح .. أنا كنت أول وزير خزانة فى مصر وأنا اللى أنشأت وزارة الخزانة .. وبعد كده كنت وزيراً للاقتصاد والتجارة الخارجية وأنا دخلت الوزارة عدة مرات .. لكن إحنا لم نبيع أبداً .. إحنا فى فترة واحدة صحيح بيع حوالى ١٠ مليون فقط .. اتباعت لأن لا تنسى إنه فيه وقت من الأوقات إحنا كان لينا عشرات ومئات وملايين وجمدتها إنجلترا .

• عشرة مليون بافندم زمان يعنى مليارات النهارده ؟

• لأ ماتسويش عشرة مليارات أنا بأقول عشرة مليون جنيه مش دولار .. واستخدمت ليه ؟ ما كانش عندها حاجة تمكنا أن نستورد .. ماعندناش فلوس جمدت أرصدتنا .. وأرصدتنا موجودة لكن بعد كده استردينا الذهب وزاد .. لكن ما حصلش إننا نقول الذهب بيع .. ده جزء من الذهب أظن لا يزيد عن ١٠ % أو ١٥ % أظن كده .

• وهل كان الاتحاد السوفيتى صديقاً لمصر فعلاً بمعنى الكلمة .. ولا كان له مصالح هى التى جعلته يؤيدنا فى بعض الحالات ؟

• « أنا شعورى الشخصى إن الاتحاد السوفيتى فعلا كان يساعد مصر إلى حد ما . لكن لا شك إن ذلك تنفيذا لسياسة تخصصه وتهمه .. يرى أنه يجب أن دولة انتهجت المنهج الاشتراكى وفتحت باب الاستيراد لسلعه .. ودولة تقدر تؤثر على دولة أخرى فتحت سوقاً له ولتجارته .. فتحت سوق لبيع السلاح له .. وبعدين بقت تعامله .. لكن مانقدرش نقول روسيا دولة صديقة بمعنى الصديق .. وإلا ماكانتش تتوقف أيام الرئيس السادات تمنع عنه السلاح أو قطع الغيار فى أهم الأوقات الللى كنا فيها .. يبقى إذن ده ماكانش خدمة لمصر .. لكن هو توافقت مصلحتها مع مصلحتنا .. الصديق مش كده يساعد فى جميع الأوقات . »

• ه جنيه بدل السفر ومنع التعامل فى العملة الأجنبية .. هل ده كان عملاً عادلاً بالنسبة للشعب ؟

• « لأ شوف هو كان فيه نوع من التقيد أكثر من اللازم مافيش شك .. أنا حاقول لك شيئاً يمكن ماتناش فى البلد دى من قبل .. إحنا فى وقت من الأوقات ماكانش عندنا ٣ أو ٤ مليون .. اسأل البنك المركزى .. عمل حديث مع بتوع البنك المركزى الللى عاصرونا بفكره .. إحنا ماكانش بنام .. مافيش فى إيدنا أموال مش ملناش لكن فى البنوك بره وصادرتها إنجلترا .. فلازم تقيد الاستخدام لكن ليس معنى هذا أنه كان مثلاً فيه واحد بيأخذ جنيه وواحد بيأخذ نصف مليون جنيه .. لأ كان الكل مايقدرش على السفر .. وما حدش يقدر يهاجر . »

• من منطق أن المساواة فى الظلم عدل ؟

• « لأ مش ده .. من منطق أنه طالما الظروف تقتضى هذا فى ذلك الوقت .. لكن الللى حصل إنها زادت شويتين .. إنك تيجى لأسرة ورجل فقير يقول لك « كلوا يا أولاد على قنكم » .. فأعطاك أقل شوية من الللى تقدر عليه خوفاً من إنه ما يقدرش يعطيك غيره .. بس الظروف فعلاً كانت قاسية .. ده مش معناه تبرير .. لأ .. لكن الظروف لما بتزول .. عملنا معارض هنا فى مصر .. معارض دولية ما ننسهاش .. وإحنا أول من عملنا المعارض حتى فى العالم العربى كله .. المعارض الصناعى الكبير فى أوائل الستينات كنا بنسمح بالتعامل بالعملة الحرة بدون السؤال عن المصدر .. بس بقى بعض الجهات إياها تقول للناس لأ ممنوع .. ففيه طبعاً صراع بين الفكر الحر وبين الاشتراكية وأصحاب التقيد فى طريقة التفكير . »

• وكان الإعلام المصرى الملتهب للمشاعر مستمراً فى طلفاته النارية ضد أعداء النظام ...

• ويقول د . عبد القادر حاتم : « كل من قال كلمة نابية بيبقى هو مسئول عنها .. لكن أنا لست مسئولاً إلا على ما أقوله أنا .. أو جهاز الإعلام . »

• وكان كل الإعلام موجهاً بالطبع .. والرقابة محكمة على كل ما ينشر أو يعلن .. ومنعت الصحف الأجنبية من الدخول إلى مصر .. مما حجب الكثير عن عيون المصريين ...

• ويقول الفنان زهدى : « مثلاً فى فترة الرقابة فى سنة ٥٩ كان ممنوع الحديث عن الرقابة ..

ومع كل .. كان الرقيب اسمه موفق الحموى كان رجلاً متفهماً .. شاف نكتة كنت عاملها أنا لواحد ماسك بانرون بتاع خياطة وماسك جرائد وماسك مقص ويقول : إليكم الأنباء بالتفصيل .. دى طالعة مباشرة ضد الرقابة ومع كل فانت إنما هى كانت كل شوية بتشد ..

• وهل جراً أحد الفنانين والرسامين على كاريكاتير كان له ضجة .. أو كان له ذكرى فى نفسه ؟

• لا أظن ..

• ويقول حمروش : « وامتدت يد عبد الناصر تلتقى من جديد مع أيدى الماركسيين .. وأصدر قرارات بتعيينات كبيرة فى الصحافة .. وأصبح المسئولون عن الصحف جميعاً أعضاء عاملين فى طليعة الاشتراكيين ..

• ويقول د. يونان : « حل الحزب الشيوعى نفسه وقرر أن ينضم إلى الاتحاد الاشتراكى والانخراط داخل النظام .. والسؤال هو : هل حصل اليساريون على الكوادر الكبيرة نتيجة لأنهم من صفوف المثقفين .. أم أن ذلك كان لترويضهم واستئناس اليسار .. أعتقد أنه كان للسبب الأخير ..

• وأسأل مصطفى كامل مراد : وهل توغل اليسار فى الإعلام المصرى فى هذه الفترة ؟

• نعم توغل فى الإعلام المصرى صحيح .. ولكن عبد الناصر لم يعطى للشيوعيين فرصة .. بالعكس كان يمتثلهم وقت اللزوم .. لكن فيه عناصر يمارية طبعاً تسربت فى الإعلام والصحافة وفى أجهزة الحكومة كلها .. ده صحيح ..

• هل الإعلام كان موجهاً ومعتماً للحقيقة فى وقت من الأوقات ؟

• طبعاً الإعلام كان موجهاً مافيش شك فى هذا .. ده شئ طبيعى .. ومافيش شك أن بعض الحقائق لم تكن تذكر كأى وضع ثورى .. فيه إعلام يحاول أن يبرز الثورة .. ويبرز أعمالها .. ويحاول أن يغطى على كل ما هو ضد الثورة ..

• وأسأل نجيب محفوظ : علاقة حضرتك كانت إيه مع رجال الثورة ؟

• والله علاقائى كانت على أحسن ما يكون .. لإنى اشتغلت معاهم فى القطاع العام .. واللى فتح لى الطريق وقدمنى هو ثروت عكاشة .. أحد رجالهم .. وطبعاً بموافقة عبد الناصر .. وكل التكريم اللى أخذته فى حياتى فى عهد عبد الناصر .. والعلاقات بينى وبين رجاله كانت حسنة جدا وما تزال إلى الآن على هذا النحو ..

• هل لجأت للرموز فى رواياتك تجنباً لأذى بعض رجال الثورة ؟

• لا فى عهد عبد الناصر كتبت بعض الروايات رمزية مكتوفة .. لكن رواياتى كانت ضد الحاجات اللى أعتقد إن عبد الناصر نفسه كان ضدها زى الفساد .. زى التسبب والديكتاتورية ..

هم أنفسهم قالوا الديموقراطية .. ولذلك لم يمسننا سوء .. لأنهم يعرفوا الأعداء من الأصدقاء .. لا بأعمال لحساب حزب ولا سفارة ولا مش عارف إيه .. ولا بتجنيى فلوس من بره ولا من الداخل .. لذلك لم أمس بسوء بل بالعكس كُرمت رغم إن أنت عارف فى عهد عبد الناصر طلع « الشحات » والحاجات والبلاوى دى كلها » .

• وكيف كانت حرية الصحافة ؟

• « الصحافة بتاعة رأى وخبر .. وفى الثورات الرأى والخبر تابع للثورة ولذلك إحنا عندنا مش صحافة إنما موظفين فى الصحافة » .

• وأسأل أمين شاكى : علاقة الرئيس عبد الناصر بالأستاذ هيكى ؟

• « والله شوف أنا مش عاوز أتكلم عن هيكى .. لكن أنا فى تصورى إن هيكى أخطأ فى حق هذا البلد من ناحية إيه ؟ كلنا بنخطئ أو نصيب .. هيكى كان كل وظيفة إنه يقول للناس وبصفة مستمرة إن ما يقوله عبد الناصر وما يفعله عبد الناصر .. هو صحيح .. وما خلاف ذلك فهو خطأ .. ده غلط إيه .. لأن ده خلى مع الوقت عبد الناصر يصدق نفسه .. ويتصور فعلاً أن هو رأييه هو الصواب .. وأن أى رأى ثانى يبقى خطأ .. وده غلط جداً لأنك علشان تأخذ قرارات سليمة استمع إلى أكثر من رأى حتجد فى الآراء الأخرى بعض حاجات حتقنك لتكون رأياً صحيحاً .. هيكى فعد ١٨ سنة يقول للناس إن اللى بيعمله عبد الناصر هو الصح .. واللى يقول عبد الناصر هو الصح .. وأى كلام على خلاف هذا يبقى غلط .. حتى لو كان اللى يقول ناس مخلصين وعاوزين مصلحة البلد ومصلحة عبد الناصر » .

• « ويقول محسن عبد الخالق : « أنا ألوم الإعلام فى فترة عبد الناصر والصحافة التى آلهته تأليهاً شديداً لدرجة إنى دخلت عليه كان أحد الكتّاب لا يذكر عبد الناصر إلا الملهم العبقري البطل .. الخ .. فأنا كنت عنده فقال لى أنا ملهم .. فظهر الاندهاش على وجهي .. فقال لى تنكر إن عندي إلهام الوقت أو إلهام الحوادث .. قلت له لا .. فأذن مصر كانت سيئة الحظ وكان يمكن لثورة يوليو أن تنجح بحب وتنجز برضا من الشعب .. وقلت مرة لجمال عبد الناصر أنت لو دخلت الانتخابات لدوقتى حتتنجح لمرة ثانية وعندك فترة انتقال ٣ سنين يبقى ١٣ سنة دون أن تنزلق للديكتاتورية .. إذا لم تحقق شيئاً فى ١٣ سنة .. من الخير لمصر أن تترك الحكم » .

• وأسأل أحمد المصرى : هل الثورة كانت بتملئ على الفن إرادتها .. ولا الفن من منطلق ذاتى بيهتم بها ويشجعها ؟

• « علشان نحسم القضية دى فى جملتين .. مافيش أحد بيملى على الفن شيئاً .. لا يستطيع أى إنسان أن يملئ فناً .. قد يملئ خطبة .. قد يقول مقالة .. قد يضغط لإصدار جرنال مثلاً .. إنما أن تملئ على كاتب السينما أن يقول شيئاً خاصاً مش ممكن .. أن تملئ على كاتب مسرح أن يكتب مسرحاً غير ممكن .. الذى تم فى ٦٧ من كتاب كبار جداً .. « بلدى يا بلدى » لرشاد رشدى .. « المسامير » لسعد الدين وهبه .. « العرض الحلى » لميخائيل رومان .. وغيرها من

المسرحيات التي ناقشت أوضاعاً ولم يكن يعترض عليها عبد الناصر بالعكس .. ده أنا رحيت المسرح أساساً علشان أخلى الناس تنفّس .. ده التعبير اللي قاله عبد الناصر .. يوم أن كُلفت أرواح هيئة المسرح .. قال عاوز الناس تنفّس .. وإحنا عندنا فنانين وكتاب مقتدرين » .

• وأسأل محمد فائق : هل الفن يافندم كان بيساير الحكم بحكم أنه دائماً فى كل عصر حتى أيام الملك كان يساير الملك .. ثم ساير الرئيس عبد الناصر ثم ساير الرئيس السادات ؟

• « أقول لك حاجة .. فى كل عهد ممكن تلاقى أغنية بتمدح .. لكن الإبداع مش ممكن .. مستحيل وده ما يجيش بتعليمات أبداً .. يعنى الكلام اللي كان بيطلع من صلاح جاهين وأغانى عبد الحليم حافظ .. مستحيل تكون بتعليمات .. لازم واحد منفعل بها .. وده الفرق .. أغانى الثورة فى الفترة دى الناس كانت منفعة تماماً .. اه معاك إن بيحصل أغانى مجاملة .. لكن الإبداع لا يحدث إلا من تفاعل الشخص وتفاعل الفنان وده اللي حصل فى بداية الثورة .. علشان كده .. فيه أغانى عبد الحليم حافظ عن الثورة .. مؤرخ الثورة كلها .. كلام صلاح جاهين وغيره وغيره كثير جداً .. ما كانتش تعليمات أبداً .. عمر ما حد جاب الفنان وقال له طلع لى أغنية إطلاقاً » .

• وأسأل سامى شرف : خطب جمال عبد الناصر .. هو كان بيتدخل فيها بحرقيتها ولا بيكتيها له شخص هو بيتلى فيه ؟

• « كل خطبة كان لها شكل .. وفيه خطب الرئيس عبد الناصر ارتجلها ما حدش محضرها له .. زى إيه يافندم ؟

• « زى خطبة الأزهر فى عدوان ٥٦ دى مش متحضرة .. فيه خطبة أخرى فى مناسبات فى زيارته للأقاليم فى مصر .. بيزور قرية أو بيفتتح مشروعاً وخلافه .. يبقى فيه تجمع سكانى كبير يلقي خطبة ما فيش تحضير تبقي مرتجلة ونقال .. خطبه اللي كانت فى أول الثورة لغاية يمكن سنة ٥٥ كلها كانت مرتجلة اللي هي كانت فى زيارته للمحافظات أغلبها كانت مرتجلة » .

• ومين اللي كان بيكتب له خطبه بعد ذلك ؟

• « ما أنا واخذ الموضوع على مراحل .. لما ابتدأت مرحلة تحضير الخطب .. الإطار العام والعناصر الرئيسية للخطاب .. وزى ما بتسموه أنتم فى الإعلام الخط الدرامى بتاع الخطاب .. كان ببعده جمال عبد الناصر .. فى أحيان كان بيشترك فى الـ « Editing » التحرير يعنى .. الصديق الأستاذ محمد حسنين هيكل .. وكان الرئيس بيعطى هيكل العناصر الرئيسية للخطبة اللي كانت محتتال .. وهيكل يعدها وبعدين ترجع تانى تراجع .. فيه حاجات كانت بتتشطب وفيه حاجات كانت بتضاف .. وفى أحيان كان الرئيس بيقول لهيكل سيب فجوة لإنى حاتكلم فيها بطريقتى أنا وبأسلوبى أنا عما أريد أن أقوله » .

• وتولى المهندس صدقى سليمان الوزارة بعد أن استقال زكريا محيى الدين ..

* ويقول د . عبد العظيم رمضان : « استقال زكريا محيي الدين عقب إعلان رفع بعض أسعار السلع .. وكان على خلاف مع الرئيس في سياسة مصر الخارجية .. كما كان يريد إعطاء الأولوية لتصحيح الأوضاع المالية بينما عبد الناصر يريد المحافظة على المكاسب الاشتراكية » .

* وأسأل شمس بدران : اختيارك وزيراً للحربية .. متخطياً رتباً كثيرة .. ده كان ليه ؟

* « والله يُسأل عبد الناصر في الموضوع ده » .

* هو كان اختيار الرئيس عبد الناصر ؟

* « آه .. طبعاً .. آمال مين اللي بيختار ؟ » .

* يعني ما كانش فيه إيعاز من المشير مثلاً ؟

* « لأ .. لأ .. بالعكس .. ما أفكرش المشير كان محبباً الخطوة دي .. هو عبد الناصر جاء بعد الحكومة اللي كان زكريا محيي الدين رئيسها ... وحصل حاجة في التمويل .. زود أسعار حاجات تموينية والبلد هاجت .. على طول كان عاوز يغير الحكومة .. فأنا كنت عنده فقال لى .. أنا مختار دلوقتى أجيب حكومة جديدة .. ما أعرفش أجيب مين ولا حأعمل إيه .. فكان عنده حالة تردد كده .. فقلت له الدولة دلوقت عبارة عن دولة مؤسسات .. الدولة عبارة عن مؤسسة كبيرة .. فسيادتك إذا كنت عاوز رئيس حكومة ناجح .. فشوف واحد مسك عملاً كبيراً وحققه بنجاح وبسرعة .. فقال لى زى مين .. فقلت له زى صدقى سليمان .. بعد السد العالى ما اتلخبط بين كذا وزارة وما اتنفذش .. لما راح له صدقى سليمان نفذ السد العالى « In No Time » بسرعة وكفاءة تامة .. فقال لى طيب .. وقال لى مين ثانى تفكر ينفع .. قلت له أنا شوف برضه السياحة بالنسبة لنا ممكن تحقق دخلاً كبيراً إحنا مش مستغلين السياحة خالص لإن مافيش وزير متطوع .. وأمين شاكرا اللي كان سفيراً فى أوروبا فى دولة ما .. قلت له أنا أعتقد أن أمين شاكرا لو مسك وزارة السياحة حيحيها .. وحيعمل دخل من السياحة » .

* كان بيستمع إلى رأيك ويأخذ به لثقته بك ؟

* « آه .. ما هو جاب الاثنين اللي قلت له عليهم .. عمل صدقى سليمان رئيس وزارة .. وجاب أمين شاكرا وزير سياحة » .

* وعملك إنت وزير حربية ؟

* « عملنى وزير حربية غصب عنى .. بجد .. أنا كنت عاوز أمشى .. ماكنشش عاوز أقعد !! » .

* وأسأل أمين شاكرا : حضرتك اتعينت وزيراً للسياحة إمتى ؟

* « اتعينت وزيراً للسياحة يوم ١ يناير سنة ٦٧ » .

* وهل شمس بدران هو اللي كان رشحك للرئيس عبد الناصر ؟

« كذب .. اللي رشحني لهذا المنصب هو جمال عبد الناصر شخصياً .. ليه ؟ لإن الوزير اللي قبلي اللي ده اسمه إيه أساء للوزارة أكبر إساءة .. وكان سمعته في الوزارة سيئة .. وعلاقته بالموظفين سيئة وطلع من الوزارة أغلب الناس الكوميين .. فالوزارة انحرفت لدرجة إن أنا لما حيت أمسك الوزارة كان إجمالي دخل السياحة في مصر ٢٣ مليون جنيه .. لو كان القيسوني عايش كان قال لك هذا الكلام .. أنا وصلت بها لقرب المليار في سنة ونصف .. لإن إحنا عندنا إمكانيات سياحية ضخمة .. يكفي أن تعلم أن مصر فيها ٣٠ ٪ من الـ « Monuments » (الآثار) في كل العالم .. بس أيام ما اتعينت وزير سياحة ماكانش في مصر فندق واحد نجوم غير الهيلتون .. لذلك لما جبت بتوع شيراتون علشان يكملوا .. عبد الناصر قال إيه الحكاية حتجيب فلوس منين .. قلت له مالکش دعوة أنا حاجيب القرض .. أمال حاجيب السواح وأنيهم فين » .

• وتولى على صبرى أمانة الاتحاد الاشتراكي .. وزاد التقارب مع روسيا ...

• ويقول أحمد حمروش : « كان ثروت عكاشة يستعين في وزارته بالماركسيين أيضاً .. وهكذا استقرت الثقافة في أيدي أكثر العناصر اقتناعاً وقدرة على خدمة التطور نحو الاشتراكية » .

• وأسأل د . ثروت عكاشة : طالبت الرئيس عبد الناصر بتعدد الآراء والاتجاهات .. فهل أدى ذلك إلى خلاف شخصي بينكما ولا كان دائما خلاف في الرأي ؟

• « لا لم يؤدي أبداً إلى خلاف بيننا » .

• واستقال عبد اللطيف بغدادى من مجلس الرئاسة ...

• وأسأل عبد اللطيف بغدادى : لماذا استقلت .. لماذا تركت المنصب والمسئولية ؟

• « إحنا كنا عملنا مجلس رئاسة .. مجلس الرئاسة ده .. يمثل قيادة جماعية .. تناقش المسائل العامة كلها وتأخذ فيها الرأي بالأغلبية .. على أن يصدر رئيس الجمهورية القرار المنفذ لرأي الأغلبية .. استمرينا المرحلة الأولى كويس .. كام شهر .. وبعدين جمال عبد الناصر جمدها تقريباً .. وأنا اعتبرت إننى مسئول تاريخياً أمام الرأي العام .. فبعثت استقالتي ومنطوقها واضح في مذكراتي .. أنى باستقيل لأن القيادة الجماعية فشلت .. وأنا مسئول أمام التاريخ وأمام الرأي العام على أى قرار يُتخذ وأكون غير مشارك فيه .. ولا يمكن الاستمرار وتحمل هذه المسئولية » .

• وابتعد كمال الدين حسين ...

• وأسأل كمال الدين حسين : رفضت سياسة الرئيس عبد الناصر وهى السلطة المطلقة والاشتراكية ؟

• « خلى بالك الاثنان مرتبطين ببعض .. طبعا كان خروجى النهائى رسمياً .. كان فى مارس

سنة ٦٤ .. في ٦٤ عمل الدستور المؤقت .. وقال نشيل الأحكام العرفية ونخلى الحرية تسود .. ولكن عمل قانوناً اسمه القانون ١١٩ لسنة ١٩٦٤ .. هو عاوز يضمن الزمام لا يقلت من إيده .. وهو طبعاً كان عاوز الدنيا لا تسقط عليه .. فالقانون ١١٩ بيقول لرئيس الجمهورية أن يضع في مكان أمين الأشخاص اللي يعملوا كذا وكذا .. وعدد جملة حاجات إن لو عملها أى أحد .. رئيس الجمهورية له الحق أن يضعه في مكان أمين .. وبعدين قال إيه لا يجوز الطعن في قرار رئيس الجمهورية بخصوص هذا القانون أمام أى جهة كانت .. يعنى أنا لو دخلت مكان أمين أشتكى لمين .. مافيش أحد أبداً .. قلت رينا هو اللي نشتكى له .. يعنى هو كان بيراد به إن اللي أعطى باليمين .. يؤخذ بالشمال .. وعاوز أقول برضه علشان لا أعظم جمال عبد الناصر قوى .. فى سنة ٦٤ لما اتأليت الدنيا كلها ضد جمال عبد الناصر وثار العنف بتاع الأحزاب .. وناس اعترفوا لى من أحزاب معينة إن كان فيه اتصالات أجنبية إنجليزية وأمريكية وشيوعية .. وبعدين اعتقلت .. وأهلى تم القبض عليهم وراحوا السجن الحربى .. والوالد في بنها اتعمل عليه تحديد إقامة .. واللى كانوا عندى في المكتب ليلة ما قبضوا على كلهم راحوا السجن الحربى .. طيب إيه لم تناقشنى فى هذا .. برضه الواحد لا أشعر بمرارة قوى .. ده كريس يعنى فضل برضه من ثورة ٢٣ يوليو إنها لم يحصل فيها مثل الثورات الثانية .. يعنى كمال أتاتورك راح لأصحابه اللي قاموا معاه بالثورة علشان اختلف معاهم فى رأى .. ضربهم بالطبنجة في بيوتهم وموتهم !! الثورة الروسية موتت كل الناس .. الثورة الفرنسية أصحابها كلهم اتعلقوا في المشائق أو قُطعت رقبتهم على المقصلة .. والثورات والانقلابات اللي حصلت .. ما اتعملتش انقلابات وقتلوا بعض وضربوا بعض وموتوا بعض وكله راح .. إحنا الحمد لله لم يحصل .. مش علشان إحنا بس وعلشان الناس .. حتى يعنى أنا لا أؤيد التعذيب ولا القتل .. لأن كل شيء لا يرضى الله .. أنا ضده .. ولكن عاوز أقول إننا حساسين زيادة عن اللزوم .. وحصل ظلم مما لا شك فيه .. حصل ظلم على ناس معينة لكن لا يقارن بالظلم اللي حصل في الخارج .. وفي الثورات الأخرى .. نجد أن إحنا أقل الناس ظلاماً .. أنا لا أبرئ شخصاً أو شيئاً .. ولكن دى الحقيقة .

• ويقول محسن عبد الخالق : « فضل البعض مع عبد الناصر لأنه كان مثلاً واحداً منهم يقول لك .. ده ملهم .. ده بيسبح بحمد جمال عبد الناصر ليل ونهار .. وقعد لحد ٦٢ - ٦٣ وعندما شاله بعث له جواب يقول له .. « اتقى الله » .. طب ما اتقتش الله إيه في العشر سنين » .

• كما ابتعد حسن إبراهيم ..

• ويقول أحمد حمروش : « وصارح حسن إبراهيم عبد الناصر بإن على صبرى يوقع بينهما .. فقال له عبد الناصر : « هل تتصور إن على صبرى يقدر يمشينى ؟ .. إنه لا يزيد عن سكرتيرى مهما كان فى أى منصب » .. ولم يجد بدأ من تقديم استقالته الثالثة والأخيرة فى ١٨ يناير ١٩٦٦ .. وقال لى حسن : سبب استقالتي أن عبد الناصر عايز يحكم لوحده » .

• وأسأل أمين شاكور عن حسن إبراهيم ؟

- حسن إبراهيم ما أبعده .. حسن إبراهيم الجماعة بتوع الطيران أقتعوه بإنهم يظنوا مع بعضهم ككتلة .. فلما أبعده جمال سالم .. وأبعد البغدادي .. أخذوا حسن إبراهيم ويأهم .. إنما حسن إبراهيم ما أبعده .. وكان عبد الناصر يحب حسن إبراهيم جدا ويثق فيه جدا » .
- وأسأل محسن عبد الخالق : تخلص عبد الناصر من أعوانه وشركائه واحداً بعد الآخر .. هل توافق على هذا ؟
- « ابتدا يتخلص من أعوانه .. هو كان له شخصية قوية .. وتخلص على مدى السنوات من كافة الأعوان أو الزملاء » .
- وأسأل أبو الفضل الجيزاوي : كنت مؤيدا لعبد الناصر .. ثم أصبحت معارضا لدرجة أنك سجننت .. إيه تفاصيل هذه الحكاية ؟
- « كل إنسان يأخذ سلطة بلا حدود لابد أن ينحرف .. فوضع الضوابط والقيود على أى إنسان فى مركز قيادى مهم جدا .. وعبد الناصر لما انتصر على محمد نجيب وأخذ سلطة مطلقة .. ابتدا هو يعمل اللي هو عاوزه .. بدون أن يرجع إلى أى أحد .. حتى مجلس الثورة لم يكن يأخذ برأيهم .. فبدأ من المبادئ الأساسية فى الثورة الديمقراطية .. كيف يمكن أن يتحقق مبدأ الديمقراطية بهذه الصورة .. دى حالة ديكتاتورية مطلقة وما يريد عبد الناصر « كن فيكون » .. فأنا اختلفت من هذه الزاوية .. لابد أن يكون هناك ضوابط وأن يكون هناك ديمقراطية حقيقية لإن هذا العصر هو عصر الديمقراطية .. فاختلعت مع عبد الناصر على هذا الأساس .. فاضطر أن يقبض على ويعتقلنى » .
- وأسأل أمين شاكر : لماذا تركت عبد الناصر ؟
- « أنا تركته لعدة أسباب .. ولكن السبب الرئيسى أظنك تعلم أننى كنت رئيس « جمعية الوعى القومى » .. دى جمعية أنا عملتها علشان تقف فى وجه الاتحاد الاشتراكى .. الاتحاد الاشتراكى كان بيلم اللمامة وكان واجهة زائفة لديموقراطية زائفة .. أنا جمعت الناس أصحاب الفكر والرأى وقت لعبد الناصر إن فى هذا الوجود عالم وعامل ماقدرش أقول إن العامل زى العالم .. العالم بيععمل ماكينة بتشغل ألف عامل .. أنا جمعت الناس دول لما كان فيه وحدة بيننا وبين سوريا .. كان عندى عمداء الكليات ومديرين الجامعات والأساتذة ووزراء سابقين وإلى آخره » .
- وأسأل عبد المنعم أمين : يقال ياقتندم إن الرئيس عبد الناصر أبعده تدريجيا كل من حوله للتخلص منهم واحدا بعد الآخر .. هل فى هذا القول ظلم ؟
- « لا ليس فيه ظلم .. بالعكس » .
- وتقول هدى عبد الناصر : « أنا لا أعرف لماذا ابتعد هو وزملاؤه .. يمكن اختلاف التوجهات والسياسات .. لكن ظلت العلاقات الإنسانية بينه وبينهم مستمرة » .
- وبابتعاده عن مجموعة أخرى من زملاء الأمس .. أحاط أكثر بالرئيس رجاله المقربون ..

* ويقول لطفى واكد : « طبعاً كان فيه مجموعة حواليه بتحاول تدس بينه وما بين الناس اللي هو ببيحيهم » .

* زى مين ؟

* « يعنى بعض أجهزة المخابرات .. وعلى رأسهم صلاح نصر .. وبعض أجهزة الصحافة ولا داعى لذكر أسمائهم .. وبعض الأجهزة الأخرى .. لكن كان فيه ناس معينين بتتعمدوا يجردوا عبد الناصر من علاقة الصديق الحقيقى » .

* وأسأل د . عبد القادر حاتم : لماذا ابتعدت ؟

* « والله حاقول لك حاجة .. أنا لقيت اتجاهات موجودة فى ذلك الوقت .. الشيوعيون كانوا منشترين - بصراحة متناهية - كانوا موجودين فى الإذاعة والتلفزيون .. وأنا ضد الشيوعية وهذا الاتجاه الشيوعى .. ولذلك الحمد لله النهارده الفكرة بتاعة انتهاء الشيوعية تحققت .. هى فى الشيوعية النهارده !! انشقت الأرض وابتلعتها مش كده ولا إيه .. أنا كنت دائماً أعمل على أن أبعد الشيوعية عن جهاز الإذاعة والتلفزيون اللهم إلا إذا كانوا لا يثبتوا هذه المبادئ فى الإذاعة والتلفزيون .. ولذلك كان مثلاً يهاجموا النواحي الدينية .. فرحت عامل إذاعة القرآن الكريم .. أول إذاعة للقرآن الكريم فى البلاد العربية بل فى العالم .. وكان لها صدق جيد جداً فى الرأى العام .. من هنا أقول كان لابد إن أنا ابتعد ولا أسير فى هذا الاتجاه وكان الله معى فى هذا ووفقنى كل التوفيق .. وأنا ابتعدت من ٦٦ .. حتى ٧١ » .

* إذن ابتعدت مش أبعدت ؟

* « لأ .. أنا ابتعدت لإن حصل تغيير فى الوزارة .. وزارة ٦٦ .. جابوا وزير رئيساً .. الرئيس عبد الناصر رحمه الله جاب وزير من الوزارة وعمله رئيس وزارة .. وأنا كنت نائب رئيس وزارة وكلنا مجموعة من نواب رئيس الوزارة فلجنا سبنا مراكزنا .. لكن عيننى أنا فى الاتحاد الاشتراكى .. الوحيد اللى عيننى فى الاتحاد الاشتراكى من الجميع .. لإنه كان علاقته بى طيبة وفاهم الاتجاه بتاعى فى هذا الموضوع .. إلا أن الاتحاد الاشتراكى كان مليان عناصر من العناصر إياها دى الشيوعية .. وبعدين كانوا بيتكلموا بأسلوب غريب لا أنت فاهمه ولا الرأى العام فاهمه .. لدرجة حصلت نكت كثيرة على الاتحاد الاشتراكى .. واحد فلاح جاي من البلد فجابهو فسحوه فى مصر وودوه المتحف وودوه الهرم والبرج وشاف القرص اللى بيلف ورجع بيقلوا له يا عم فلان أنت شفت مصر .. قال لهم آه .. طيب شفت إيه .. قال لهم كذا والهرم وكذا وكذا .. قال لهم بس شفت حاجة أنا مش فاهمها خالص .. قالوا له زى إيه .. قال لهم زى الاتحاد الاشتراكى ده !! .. يعنى كان الاتجاه لا يتلائم معى » .

* ويعلق أمين شاكرا قائلا : « وطبعاً عملوا عليه الدائرة وقعدوا .. طبعاً سامى شرف .. وعبد الناصر لا يسمع إلا ما يريدون أن يسمع .. ولا يرى إلا ما يريدون أن يرى .. رغم إنه

كان قبل كده مصدر سعادته الكبرى إنه يختلط بالناس وإنه يشوفهم ويقابلهم .. دول عزله عن الناس تماما » .

• **أسأل د . حاتم : الاتجاه ده .. إيه اللي كان خلاه يتوغل وينتشر ؟**

« شوف .. هي فيه ظروف سياسية كانت بتجبر السياسة على هذا الموضوع .. جاء خروشوف هنا في مصر طبعاً وطلع جميع الشيوعيين من السجون في ذلك الوقت .. وطبعاً كنا بنأخذ سلاح من الاتحاد السوفيتي .. والاتحاد السوفيتي كان بيعمل كل جهده إن هو سلاحه يبقى قوى .. الخ .. فطبيعة الأمور لا يمكن كنت أقدر أمشي مع هذا الاتجاه .. يعني طبيعة نفسى ما نتفكش مع هذا لكن كانت النتيجة إن فيه الاتجاه السياسى اللي موجود .. عاوز يستثمر العلاقة دى لكن أنا كإعلام ما أقدرش أدخل في الإعلام بتاعى هؤلاء الشيوعيين .. ولو إنى أعرفهم كأفراد كويسين .. فيه عدد منهم كويس جداً وبيتكلموا كويس .. لكن فيه بعضهم لا يتفق ولا أسمع له بصفتي المسئول عن الإعلام أن ينشر الشيوعية وإلا كانت اتخربت البلد في ذلك الوقت » .

• **أسأل مصطفى كامل مراد : هل غابت الديمقراطية في عهد الرئيس عبد الناصر ؟**

« هو فيه ديمقراطية مع ثورة ؟! مش ممكن لا تبقى ثورة .. تبقى أوضاع سياسية مستقرة .. لكن الثورة هي انتفاضة وانتفاضة على الأوضاع الموجودة .. سواء كانت سياسية أو اجتماعية .. وبالتالي بنحتاج إلى نظام مطلق حتى يمكن أن نحقق أهدافها » .

• **ويضيف مصطفى كامل مراد :** « وبدأت تصدر قرارات حراسات .. يمكن بدون علم عبد الناصر .. وفي بعض الأوقات كان فيه قرارات من اللي هو أخذها لم تكن تنفذ » .

• **بسبب مين يافندم بصراحة ؟**

« بسبب نظام الحزب الواحد .. يعني سيطرة قائد أو زعيم على الحكم .. وبالتالي ده يعطى انعزال عن الشعب .. ويعطى فرصة للمجموعة اللي حواليه .. أن تسيطر عليه وتعطيه ما تريد من المعلومات فقط » .

• **مين المجموعة دى يافندم ؟**

« ماهى المجموعة دى اللي اشتبكت مع السادات سنة ٧١ .. هي مجموعة على صبرى وسامى شرف والفريق فوزى وكل المجموعة دى .. وضياء الدين داود وشعراوى جمعة .. وكل هؤلاء .. وكانت المجموعة اليسارية » .

• **ويقول محسن عبد الخالق :** « الحكم الديكتاتورى عبارة عن ديكتاتور واقف في مستنقع .. ده في العلوم السياسية واقف في مستنقع ملئ بالمداينة والمراوغة والسلبية والنفاق .. وكل شئء سيئ .. وكل مرض سياسى موجود .. ده من ناحية .. الناحية الثانية جمال عبد الناصر كان ممكن يحكم لو لم نجد هؤلاء .. يعنى أحاط به ناس كثيرون .. خصوصاً في الإعلام » .

* بينما يقول سامى شرف : « كان جمال عبد الناصر يبطالب جميع المؤسسات التي تعمل معه بالمعارضة الصريحة .. وكانت له عبارة يقول عاوز واحد يحط رقبته قصاى وعاوز اللي يقول لأ .. ولكنه أرجع تانى وأقول لك نحن فى العالم الثالث .. صدقا ، ظلما ، كذبا ، توها .. إن ده يرضى عبد الناصر .. وكل الصفات دى حطها على بعضها ودى مش غلطته .. هى دى غلطة الطرف الآخر المتعامل معه .. إنما هو من جواه وبصرحة وفى الغالب كان يريد لأ » .

* هل عشنا الحكم الشمولى فى عهد الرئيس الراحل عبد الناصر ؟

* « ماذا تعنى كلمة شمولى ؟ » .

* الحكم الديكتاتورى ؟

* « عمال أتكلم بقالى سننين لما نشفت ريقى .. وتقول لى ديكتاتورى .. أنت نشفت ريقى عمال أقول لك وترجع تقول لى ديكتاتورى تانى .. والله أنا بقدر الإمكان بأحكى لك بما يرضى الله ويرضى ضميرى .. أحكامى على ما عشته وعلى ما شفته .. وعلى ما سمعته .. لكن حافول لك فى آخر الآخر أنا منحاى .. أنا منحاى لجمال عبد الناصر .. منحاى لنظام ثورة ٢٣ يوليو .. منحاى لمصر .. منحاى للوحدة العربية » .

* بس حضرتك لم ترد على السؤال .. هل كان الرئيس فيه الطابع الديكتاتورى ؟

* « يعنى إيه ديكتاتورى ؟ كل اللى قلته لك ده كان إنساناً يزعل ويفرح .. ويبيكى ويضحك .. يثيب ويعاقب .. الديكتاتور ما « بيعتقش » .. عمال على بطل زى المنشار .. ذبح حتى بيذبح .. زى مش عارف إيه الحيوان ييموت أولاده خوفا عليهم .. ذبح مين يعنى ؟ أو تدكتر دكترة على مين ولا على إيه ؟ » .

* أنا أقصد نظام الحكم فى مصر فى هذا الوقت ؟

* « هو فيه شرعية ثورية .. الثورة مرت بمرحلتين .. المرحلة الأولى من سنة ٥٢ إلى ٥٦ شرعية ثورية .. وبعد كده شرعية دستورية فيه مؤسسات موجودة والنظام الديكتاتورى بيلغى كل المؤسسات .. ولا يتعامل مع المؤسسات .. جمال عبد الناصر عمره ما تعامل مع الأشياء متجاوزا المؤسسات .. نرجع إلى محاضر اللجنة التحضيرية للاتحاد الاشتراكى العربى سنة ٦٢ .. قمة الديمقراطية فى المناقشات .. وشارك فيها الله يرحمه خالد محمد خالد .. ويمكن قصة الحوار اللي دار بين خالد محمد خالد والرئيس حول الديمقراطية تغينى عن إن أنا أجابوك على سؤالك .. الحوار اللي دار بين الدكتور حسنين كامل بهاء الدين وكان أيامها أمين منظمة الشباب بالاتحاد الاشتراكى .. وما بين بعض أساتذة الجامعة .. قمة الحوار الديمقراطى وقمة الصبر » .

- وأسأل د . هدى عبد الناصر : ماذا تقولين تحت عنوان « عبد الناصر والحكم الفردى » ؟
- « كان الرئيس ضد الحكم الفردى وكان يدعو لأى منصب بالانتخاب .. وكانت الدولة دولة مؤسسات .. كون إنها كانت ذات أداء مش بالدرجة المطلوبة هذا شيء .. لكن وجودها فى حد ذاته ووجود قاعدة انتخابية شيء آخر .. وكلمة الحكم الفردى ليس له مكان هنا إطلاقاً .. ثم ماذا عن التأييد الشعبى سنة ١٩٦٧ .. لم تحدث هزيمة رئيس وحدث له ما حدث وطالب الشعب بعودته فى مصر والبلاد العربية » .
- ليس فى وقفة الشعب عند الهزيمة أى تعارض مع سياسة الحكم الفردى ؟
- « وقفة الشعب فى لحظتها كانت معه لأنه لو كان حكمه فردياً كان سيكون على غير رغبة الشعب » .
- إذن ترفضين من يقول على والدك إنه كان دكتاتوراً ؟
- « أرفض ذلك لكن من يعتقد هذا هو حر .. كل ينظر من وجهة نظره وتقييمه الشخصى » .
- ولكن ما هو دفاعك عنه ؟
- « أى نظام حاكم يفرض قرارات سياسية سيضر البعض من قطاع المجتمع .. ويجب أن ينحاز إليه فى قراراته قطاع آخر .. ليس فى عهد والدى فقط ولكن فى جميع العهود والأنظمة .. قرارات الخصخصة وبيع شركات القطاع العام بأقل من قيمتها .. لمصلحة من إذن بيعت .. أى قرار سياسى يجب أن يكون هناك سؤال لمن هذا القرار .. ولا يمكن أن يكون فى مصلحة جميع قطاعات الشعب .. نظام والدى من البداية كان واضحاً أنه ينحاز للشعب وينحاز للفقراء » .
- بينما يقول نجيب محفوظ : « الإنسان لم يصب من يوم ما تولدت الثورة الفرنسية والشعوب عرفت حقوقها قد من الشمولية .. مافيش مصيبة تصيب شعب زى الحكم المطلق والنظام الشمولى » .
- وهل أصبنا من هذا الجانب ؟
- « أصابتنا كل المصائب اللتى عانيناها من ٥ بونيه والفساد والتسيب والخسارة الاقتصادية .. البلاء الشديد الذى نعانى من جراء هذا الحكم » .
- ويقول يحيى الرفاعى : « أصبح يطلق على الأوامر اسم قرار جمهورى وبعضها قرار بقانون أو قانون .. المسألة متروكة بيد الحاكم مش بيد القاضى .. هذا السيل العارم من القرارات ترتب عليه تهيمش دور القضاء إلى حد الاعتداء على بعض رجال القضاء .. مثل الاعتقال بدون التزام بنصوص الدستور والقانون .. حراسات فرضت وتوسع فى الاعتقالات الادارية .. كل ده كان بيستفز عند كل قاضى الشعور بالظلم عند كل مواطن .. القضاء جزء من كل يشعر بما يشعر

به الشعب المصرى ... إن صلح الشعب المصرى يصلح هذا القضاء .. وإذا أصيب الشعب المصرى بأى كارثة تصيب القضاء أيضاً .. للأسف كان فيه إيجابيات فى هذه المرحلة .. لكن السلبيات أكثر .. مثل القضاء على الحريات .. واستئثار السلطة التنفيذية بالسلطة التشريعية تحت مظلة حكم فردى وحكم شمولى .. والشعب لا يحكم نفسه بنفسه .. يضع القانون الحاكم الفردى .. حرية الاجتماع معدومة .. وحرية الرأى غير موجودة .. والغلبة أصبحت لكتبة التقارير السرية » .

• وأسأل محسن عبد الخالق : كيف تحول عبد الناصر إلى ديكتاتور فى رأيك ؟

• « مجلس الثورة كان مع الديكتاتورية .. ومن خرج من مجلس الثورة أصبح ديموقراطياً .. وهو استطاع أن ينخلص من الوطنيين وأتى بجملة فرسان السلطة وهؤلاء كان لهم مصلحة » .

• ويقول طارق البشرى : « كان القرار الجمهورى هو أداة التعيين فى كل الوظائف الكبيرة .. رؤساء الهيئات والمؤسسات والشركات وكذلك الأعضاء .. وكلاء الوزراء والمديرون ومن يمثليهم فى القطاع العام .. وكان رئيس الجمهورية هو من يضع للاتحاد نظامه وقانونه ويرسم له تشكيلاته .. وقد ظلت مصر منذ سنة ١٩٥٨ تحكم بدساتير مؤقتة .. تصدر بقرارات من رئيس الجمهورية .. وتعديل بقرارات منه .. بحسبان إنه هو نفسه مستفتى عليه من الشعب وحائز على ما يشبه الإجماع » .

• وهكذا انفرد عبد الناصر ورجاله بالسلطة ...

النكسة

- النكسة التى حدثت يوم ٥ يونيو سنة ١٩٦٧ هى محصلة لأوضاع خاطئة فى الجيش المصرى .. ونتيجة لاستغلاله بالسياسة وإنشغاله بالحكم .. والاختصاصات المدنية الغريبة التى أسندت إليه .. النقل العام .. الثروة السمكية .. الجمارك .. وحتى الحراسات .
- ويقول جمال حماد : « مبدأ اشتغال الجيش بالسياسة مبدأ مرفوض .. وكان الجيش مشغولاً أيضاً باختصاصات مدنية غريبة متعددة منها مثلاً النقل العام والجمارك وغيرها » .
- وكان جزء كبير من الجيش مشغولاً بحرب اليمن ...
- ويقول نجيب محفوظ : « ٥ يونيو كانت خبطة شديدة جداً .. الحقيقة يعنى مهما صورتها لك مش على أساس الهزيمة .. أى جيش يصح أن ينتصر .. ويصح ينهزم .. وكل بلد لها انتصاراتها ولها هزائمها .. إنما إحنا كنا وصلنا إلى درجة تهاى لنا إننا دولة عظمى .. وحتى حرب اليمن خلتنى مش خايف إن إحنا نضعف أمام إسرائيل .. قلت اللى بيعت حملة زى دى .. وأماننا العدو الأول .. ده لازم عنده جيش لايقاوم .. مش واخد بالك .. يعنى اتخذت منها دليل للاطمئنان مش للخوف .. لأنه مش معقول أبعث جيش فى اليمن .. يضعفنى أمام عدوى الأساسى .. لما حصلت الهزيمة كانت الحقيقة ممكن تسميها دوخة .. مش قادرين نفهم أولها من آخرها وإنت عارف إنها دوخة لإن حتى الآن الناس داخلة فيها » .
- ويقول صلاح الدسوقي : « القوة الضاربة للجيش المصرى كانت فى اليمن .. وباقى الجيش اللى هو مش مدرب كان موجوداً .. أى واحد يعرف إن فتح جبهتين فى وقت واحد .. كان حاجة خطيرة جداً وكانت النتيجة الهزيمة .. ولا أعتبرها هزيمة عسكرية بقدر مامى هزيمة سياسية » .
- بينما أسأل عبد المجيد فريد : كان جزء كبير من الجيش موجوداً فى اليمن ؟
- « لأ ماكنش جزءاً كبيراً إنما كان فيه عدد ٣ لواءات أظن موجودة فى اليمن كان طبعاً يبقى

وجودهم هنا أفضل من أجل المعركة .. بس لا أعتقد إن وجودهم كان سيؤثر كثيرا على المعركة لإنها معركة طيران » .

• وأسأل شمس بدران : هل الجيش المصرى كان مستعداً فى هذا الوقت لهذه الحرب ؟

• « آه كان مستعداً ... مش معنى وجود فرقة فى اليمن .. إن الجيش كان مش مستعد » .

• وكان الجيش يعانى من ضعف فى التدريب وعدم استكمال المنشآت لقلة الميزانية .. وبقاء قياداته لمدد طويلة فى مناصبهم .. بصرف النظر عن كفاءتهم ..

• وأسأل سامى شرف : هل كان الرئيس عبد الناصر على علم بحالة الجيش قبل هزيمتنا فى ٦٧ ؟

• « معرفة حقيقية زى معرفته باللى بيدور فى البلد .. لأ » .

• ليه .. اشمعنى العسكرية ؟

• « المؤسسات العسكرية وصلت إلى نوع من أنواع الدولة داخل الدولة .. ده موضوع كبير قوى ومش حيتجاوب فى دقيقة أو دقيقتين لأنه إذا تجاوب إجابة سريعة حتكون إجابة مخلة .. وقد تؤول وقد تُفسر .. لكن أقدر أقول لك إن ما حدث بعد ٥ يونيو ٦٧ وتولى الرئيس جمال عبدالناصر المسؤولية كقائد أعلى ورئيس جمهورية .. باننت نتيجته .. أنا أسف مش بجابوب .. لأ أنا بأجابوب بالطريقة التى تؤدى لتفادى الاختصار فى الإجابة » .

• ويقول د . مراد غالب : « طبعاً كانت القوات المسلحة جزءاً كبيراً منها فى اليمن .. عدد كبير من الاحتياطى جنباه .. وجايين بالجلاليب وخلافه .. يعنى ماكناش فى أحسن أوضاعنا العسكرية بدون شك » .

• ويقول الفريق سعد الشاذلى : « النكسة بتاعة سنة ٦٧ .. الحقيقة كنا نستحقها لأن طبعاً ماكانش يجوز إن إحنا ندخل الحرب بهذا الشكل .. وهذه الهرجلة .. وهذه التعبئة المموجة .. إزراى إحنا ننتصر .. عساكر يأتوا إلينا فى سيناء لابسين جلابيب علشان يدخلوا الحرب .. دون أى تدريب ودون أى تجهيز » .

• ويقول شمس بدران : « كان فيه ٦ أو ٧ فرق وفرقة مدرعة .. مش معنى وجود فرقة فى اليمن إن ده حيعجز الجيش المصرى عن إنه يدخل حرباً مع إسرائيل .. الجيش المصرى فى هذا الوقت كان متوقفاً على الجيش الإسرائيلى .. بنقول الجيش بالتعبير الدارج على القوات المسلحة ماعدا الطيران .. الطيران الإسرائيلى قائم على أساس طائرة هجومية دفاعية .. طيارة يتمشى مسافات طويلة فيها صواريخ فى نفس الوقت لو تعرضت لها طائرات مقاتلة تقدر تدافع عن نفسها .. إحنا الطيران بتاعنا كان عبارة عن طائرات ميغ .. طائرات ماهيانش هجومية وطائرات مش مقاتلة يعنى دفاعية .. مخصصة أصلاً لحماية المطارات .. وكان عندنا قاذفات قتال لكن قاذفات القنابل ماتقدرش تدافع عن نفسها .. وكان عندنا طائرات سوخوى .. طيارة

قاذفة مقاتلة بس كان مداها صغيراً وحمولتها صغيرة بالنسبة إلى طائرات إسرائيل .. وإسرائيل كان عندها ٥٠ طائرة ميراج وصلتها حديثاً من فرنسا .

• وأسأل عبد المجيد فريد : هل الصراع على السلطة بين الرئيس والمشير كان السبب في هزيمتنا في ٦٧ ؟

• السبب في الهزيمة عدم الاستعداد العسكري لمواجهة هذا القدر من العمليات .

• ويقول د . الدكتورى : « الأسلوب الذى كان يدار به الجيش لم يكن أسلوباً يواكب العصر .. التسليح الحديث بالنسبة إلى التطور العلمى .. والاتحاد السوفيتى لم يكن صديقاً فى التسليح .. وكان إمداده لنا بالسلاح يغلب عليه الطابع التجارى .. ولم يكن هناك اتفاقاً للسلاح أو الذخيرة .. فالسوفيت لم ينزعجوا لهزيمة ٦٧ بل استثمروها .. وزادت من شدة قبضتهم على الأمور فى مصر » .

• ويقول الفريق أول عبدالمحسن مرتجى : « القوات المسلحة بتاعتنا .. بتعتمد على الاحتياط علشان تقف أمام إسرائيل .. هذا الاحتياط عمره ما استدعى .. إن حالة القوات كانت فى الحضيض والدفاعات بتاعتنا فى سيناء ماكانتش مستكلمة .. الخمس بس مستكمل لأن فكرة الحرب ماكانتش موجودة فى دماغ أحد ولا فى أذهان الرئيس .. لما تحصل حرب .. مش مفروض القادة دول يستدعوا وتقول لهم والله منتظرين يحصل حرب أو حنصعد عمليات علشان تحصل حرب أو حاجة زى كده .. لم يستدعى المجلس الأعلى للقوات المسلحة .. ولم يأخذ رأى أى أحد فى القوات المسلحة .. الرأى الوحيد اللي أخذه مرة لما هيئة قوات العمليات طلبت بعث قوات إلى شرم الشيخ خوفاً من إن اليهود يسبقونا وينزلوا شرم الشيخ .. المشير الله يرحمه بقى جمعنا .. وتعالوا ندرس هذا الموقف نبعت أو مانبعتش .. فكان فى دراستنا لهذا الموقف طلعتنا بقرار إن إحنا مانبعتش .. ليه .. لانه لو بعطنا معناها حرب .. وإحنا غير مستعدين للحرب .. يعنى واضحة .. يعنى القائد العسكرى عليه أن يبين وجهة نظره .. ومين اللي يتخذ القرار ده .. القرار سياسى .. فأنا دخلت الحرب بقرار سياسى .. مش بناء على قرار عسكرى .. القرار العسكرى ده متخطط و .. و .. الخ . لكن السياسة هى اللي بتدى أوامر علشان أنفذها .. أنا القائد العسكرى .. رئيس البلد ورئيس الجمهورية يعرف كل الحاجات دى عن القوات المسلحة .. ويعرف إن القائد بتاعه مش على كفاءة .. وهو قالها فى كتاب The Game Of Nations اللي هو « لعبة الأمم » مع كوبلاند .. قال له أنا عارف إنه قائد القوات اللي موجود عندنا متخلفاً بالنسبة للحروب الحديثة .. طيب وبعدين قال له إن الجيش مايقدرش يقف أمام إسرائيل .. الجيش بتاعنا اللي هو منهمك فى اليمين .. ومش عارف يصد شوية عصابات .. حبيجى يحارب إسرائيل إزاي .. إذن كل المعلومات دى موجودة عنده .. إزاي هو يتخذ الاجراءات اللي تخلى الحرب لايد أن تقع .. وكانت قوات الاحتياط غلبانة لدرجة إن بعضهم كان بالجلابيب أو بعضهم باللبس الملكى .. تقول لهم حنوصل اللبس العسكرى ببعدين .. وبعضهم وأنا بأمر مش لاقين فأسا أو جاروفاً يحفروا به .. حتى أنا بأقول لعبد الحكيم عامر ..

يعنى هو جاء وزار الجبهة يوم الهجوم .. كنت أنا طبعاً اللي معه .. يقول لى خلى بالك ده حيحصل حرب .. قلت له إنت سيدتك عاوزنى أحارب بالقش ده ؟ .. مين يحارب بالقش ده ؟ .. مين يقبل إنه يدخل فى عمليات بالاحتياط غير المسلح ؟ .. قال معلش المهم تفهم الناس كلها إننا حنحارب علشان الناس كلها تستعد .. زادت فكرة الحرب .. كانت فى دماغهم مافيش فكرة حرب .. جننا من اليمين تعبانين ده علاوة على الحالة الاقتصادية : مافيش بترول ومافيش بنزين وماتقدش نعمل لكم مناورات .. حتى لدرجة لما يقال لهم ياجماعة ده إحنا حنحارب إسرائيل .. رد محمد فوزى وقال لما نحارب إسرائيل يجيلك الفرج .. الكلام ده كان فى مارس ٦٧ هـ .

• وبالتالى فلدينا مسئوليتان : أولاً دفع مصر إلى الحرب .. ثانياً هزيمة مصر فى الحرب .. ولنبدأ هذه القصة المؤسسة من البداية ...

• يقول أمين شاكى : « قرار إرسال الجيش المصرى إلى سيناء سنة ٦٧ هـ ده قرار الاتحاد السوفيتى وأنا قلت لعبد الناصر ده .. دلوقتى الحلف الأطلنطى نقل من باريس إلى بروكسل حيث كنت أنا سفيراً .. وطلب منى أن أتابع أعمال حلف الأطلنطى .. وكان الحلف يعتبر الشمال الإفريقى والشرق الأوسط من أهم المناطق خارج أوروبا .. وكان بيدرس هذه البلاد من جميع النواحي ومن ضمنها الجيش .. فكان مقدار كفاءة الجيش المصرى بـ ٣٤٪ فقط وكفاءة الجيش الاسرائيلى بـ ٦٦٪ » .

• هل كان الرئيس عبد الناصر يعلم ذلك ؟

• « أنا قلت له بالضبط كده .. هو ماقدش يعمل حاجة .. لأنه ماكانش عنده فى هذه الأيام حق اتخاذ أى قرار على عكس ما يريده الاتحاد السوفيتى .. قلت له إن ٥٥٪ من القوة الضاربة بتاعتنا موجودة فى اليمن ونحن لسنا فى موقف يسمح لنا أن نسحب من هذه القوة عسكري واحد .. لأن فيصل كان حاطط الجيش بتاعه على الحدود الشمالية لليمن .. فإذا سحبنا إحنا قواتنا يدخل هو .. فقلت له ده إحنا جيشنا بحاله اللي كفاءته ٣٤٪ ماقدش يحارب إسرائيل .. فحنحارب إسرائيل بنصف الجيش .. قلت له تأكد أن كل عسكري حيروح سيناء مش حيرجع .. وكل دبابة حتروح سيناء حتنكسر .. قال لى أنا بأتكلم مع عبد الحكيم وهو يقول إنهم جاهزين وعلى أتم الاستعداد أن يلقنوا إسرائيل درساً .. قلت له هذا الكلام فارغ .. وعبد الحكيم يقول لك كده لأنه كل اللي بيهمة التهاردة هى الفلوس اللي بيأخذها وطريقة المعيشة اللا أخلاقية اللي هو عايشها والنفوذ اللي هو بيتمتع به .. ده اللي بيهمة .. فأنت قلت له ابعت قوات إلى سيناء .. فقال لك حاضر باريس .. هذا اللي حصل » .

• ويقول مصطفى كامل مراد : « ٦٧ فى الواقع كانت هزيمة أو كما سميت نكسة ماكانش حد يتوقعها أبداً من المسئول عنها » .

- من المسئول عنها ؟
- « المسئول عنها طبعاً قيادة الجيش وعبد الحكيم عامر باعتباره كان قائد عام القوات المسلحة .. ولا نقدر أن نُخلى مسئولية عبد الناصر منها برضه .. يعنى القيادة السياسية والعسكرية مسئولة عن هذه الهزيمة أو النكسة » .
- وأسأل توفيق عبده إسماعيل : قال البعض إن الصراع على السلطة بين الرئيس عبد الناصر والمشير عامر هو السبب فى هزيمتنا فى ٦٧ ؟
- « ماأقدرش أخذ هذه الجملة أقول إنها صحيحة ١٠٠٪ إنما أقول إنها صحيحة ٥٠٪ .. الصراع على السلطة بين رجال جمال عبد الناصر ورجال عبد الحكيم .. مش بين الاثنين » .
- ويقول محسن عبد الخالق : « عبد الناصر أخطر .. كنت أيامها فى لندن مبعداً واستدعانى السفير الأردنى .. قال لى استدعنى الخارجية البريطانية اليوم - وكان يوم ٢٦ مايو - لتبلغنى إن الحرب ستقوم يوم ٥ يونيو فنرجو أن تبلغ الملك حسين علشان يبلغ جمال عبد الناصر .. ولما استدعانى قال لى أرجوك إبعث لجمال عبد الناصر بطريقتك تقول له كده .. لانى خائف إن الملك حسين مايلغش عبد الناصر .. فقلت له ماطلبتش الخارجية البريطانية ليه تبلغ ؟ طبعاً مش حبا فينا .. قال سألت هذا السؤال قالوا إنكم حتقولوا إن الغرب هو المسئول .. وإحنا لنا مصالح ويادوب إحنا صلحنا الأوضاع .. فنرجو إن إحنا مانخلص المنطقة تعود إلى حالة الغليان والصراع .. وأبلغت ذلك لعبد الناصر .. بعثت له .. وعبد الناصر هو القائد الأعلى للقوات المسلحة وقرار الحرب والسلم لا للوزير الحربى ولا لقائد الجيش .. دائماً .. لرئيس الجمهورية » .
- وهو مش مفروض إن القائد العام يقول للقائد الأعلى إن الجيش غير مستعد ؟
- « إحنا بنتكلم فى ظل نظام شمولى وله عيون داخل الجيش .. وشمس بدران بتاعه .. جمال عبد الناصر المسئول الأول » .
- وأسأل الفريق أول عبد المحسن مرتجى : من المسئول فى النهاية المشير أم عبد الناصر عن النكسة ؟
- « صاحب القرارات السياسية .. رئيس الجمهورية » .
- أحمد أبو نار قال لى حضرتك وضعت الخطة مع الرئيس والمشير وأتور القاضى ؟
- « لأ ماكنتش أعرف حاجة عن الخطة .. أنا عرفت الخطة بعدين .. بدأت أقرأ فى الخطة .. ومع ذلك الخطة دى كان فيها قصور .. لأنه فيه حثت أنا مررت فيها فى الفترة بتاعة الاستعداد للحرب .. دى كانت بتعتبر مواقع مائعة .. كانت أرض زى ملعب كورة .. الخطة كان فيها قصور كل ده ليه .. لإن الحرب كانت غير متوقعة فى ذلك الوقت » .

- لماذا قبلت إنك تبقى قائداً للجبهة ؟
- « أنا حأقول لك .. القائد أو الضابط ده رجل منفذ مايقدرش فى وقت الشدة أبدا يستقيل .. لما نفهم من المشير إنه حييجى قبل العمليات بـ ٤٨ ساعة وحيكون موجود معك وحيجيبك الـ Staff اللي نافص .. وحيجيبك المواصلات الناقصة والحاجات دى كلها وحذير المعركة .. يبقى ليه لآ ؟! » .
- وأسأل المشير الجمسى : هل الصراع على السلطة بين الرئيس عبد الناصر والمشير عامر كان وراء هذه الهزيمة ؟
- « أنا باقول إن ثقة الرئيس جمال عبد الناصر فى المشير عبد الحكيم عامر دى سبب من أسباب الهزيمة .. لأنه لما جاء فى مايو وسأله وقال له أنا حأقل مضيق تيران هل القوات المسلحة جاهزة يا عبد الحكيم .. قال له « برقبتي ياريس » .. والكلام ده لايقال من قائد عام للقوات المسلحة إطلاقاً .. ولو لم يكن جمال عبد الناصر يثق فية ثقة مطلقة ما كان » .
- وأسأل الفريق أول مرتجى : هل المشير فعلاً قال للرئيس « برقبتي ياريس » ؟
- « بيقال إنه قال كده .. حتى لو قال معناها حاجات لرفع المعنوية .. رقبتي يعنى أنا خلاص مسئول عن كل حاجة .. طيب إنت ياريس عارف إن قوائك بالشكل ده .. والمشير بالشكل ده .. إزاي يعنى تقبل قوله « برقبتي ياريس » .. إزاي تحارب وهو يعنى القائد لما أقوله كده يزج بالبلد فى حرب » .
- وأسأل شمس بدران : هل المشير قال « برقبتي ياريس » ؟
- « لا أعتقد لإن ده مش كلام المشير .. مش أسلوبه يعنى فى الكلام .. وهو ماقالش كده » .
- ويضيف مرتجى : « قرار الحرب مين اللى بيأخذه .. الرجل السياسى .. مش الرجل العسكرى ولا الرجل الاقتصادى .. هو اللى يتخذ قرار الحرب .. ويعدين إنت بتدخلنى حرباً وعارف حالة قوائنا إيه .. صفوة القوات بتاعتنا موجودة فى اليمن » .
- كنت بتقول الرئيس عبد الناصر هو المسئول الأول ؟
- « المسئول الأول .. هم بيقولوا خيانة ومش خيانة .. وأنا بأعتبر إنك إنت بتدخل البلد فى حرب وهى مش مستعدة لها .. دى مش خيانة ؟! تدخل بلد فى حرب وأنت تعلم مثلاً إن زى ما قال إن القيادة العسكرية غير كفوة .. وأنا كنت قائد القوات والمشير عامر ده كان متخلفاً عن أى قائد عصرى كذا سنة ورا .. وتسيبه .. ويعدين لما بأقول لعبد الناصر إنت حتى لم تجمع المجلس الأعلى للقوات المسلحة علشان تسأله ندخل الحرب ولا ما ندخلش .. تأخذ رأينا يعنى ما هو ده مش رأى إلزامى لك .. قال لى أنا كان بينى وبين عبد الحكيم عامر حساسية .. هل مصر نقاد بهذا المنظر ؟ » .

- ويقول د . محمد الدكروري : « النكسة أنا عبرت عنها وقتها قلت إنها لم تكن نكسة عسكرية .. وإنما كانت نكسة وطنية ومصيرية وكان لابد أن يظهر في الجيش المصري مؤشرات .. فجاءت النكسة العسكرية لأسباب كثيرة كتب عنها كثيرا .. أولا إن الرئيس جمال عبد الناصر كان يترك أمور الجيش لعبد الحكيم عامر .. والمشير عامر كان تارك الجيش في يد شمس بدران » .
- وأسأل الفريق مذكور أبو العز : القيادة العسكرية كان مسئوليتها إيه إلى جانب القيادة السياسية ؟

• « الرئيس عبد الناصر للأسف الشديد ديكتاتور .. وليس بعد رأيه أى رأى ثانى .. صحيح هو كان فيه علاقة قوية بينه وبين المشير عبد الحكيم عامر .. إنما مش ممكن المشير عامر يقدر يعمل حاجة من غير ما عبد الناصر يقول » .

- بس قيل إنه قال له إحنا جاهزين ومستعدين ؟

• « قد يكون هذا تم .. أنا معرفش تأكيداً .. إنما فى نظرى إن المسئولية الكبيرة تقع على جمال عبد الناصر .. ولا أخلى كمان مسئولية المشير عامر من العملية لإننى كوني قائد عام للقوات المسلحة برضه دى مسئولية سياسية ومسئولية حربية .. فهو لازم يعرف يقدر .. هل ممكن إنى أعطى قرار حرب من غير ما أعمل مثلاً تقديراً للموقف يعنى مثلاً أشوف الحالة الداخلية شكلها إيه .. أشوف الاقتصاد بتاعى شكله إيه .. أشوف الحالة التموينية شكلها إيه .. الروح المعنوية للشعب شكلها إيه .. نمرة واحد .. أبص للحاجات الخارجية والدول العربية علاقتى بها إيه .. أشوف أمريكا موقفها شكله إيه .. أشوف روسيا موقفها شكله إيه .. أشوف الدول الللى فى مدار هذه البلاد الكبيرة شكلها إيه .. لازم أدرس كل هذه الحاجات من الأول علشان أشوف الوقت مناسباً ولا مش مناسب .. جيشى كله موجود هنا ولا نصفه فى اليمن .. ويعدين كمان أنا لما آجى أحط تقديراً للموقف يجب أن أحدد العوامل الرئيسية التى تؤثر فعلاً على تقدير الموقف .. ماجيش لعامل مهم أتجاهله وأعطى لعامل مالوش أهمية الأهمية الكبرى وأعطى عليه قرارى .. زى اللى حصل عندنا » .

- وأسأل د . عزيز صدقى : هل كان الاستعداد لحرب ٦٧ غير كاف .. وهل كانت الثقة قد اهتزت بين الشعب والحكومة ؟

• « نعم .. بدليل النتيجة .. أقول لك حاجة .. مش أنا وزير الصناعة فى ٦٧ طلب ماحدث جاء طلب منى أن أعمل إعداداً استراتيجياً .. أنا مش عاوز أخش فى هذا .. لكن الرئيس جمال عبد الناصر قال أنا مسئول .. إنما المسئولية الحقيقية فى قيادة القوات المسلحة فى ذلك الوقت .. أنا قلت إحنا نعد العدة علشان لو حصل حصار الجبهة الداخلية بتكمل .. لكن للأسف القوات المسلحة دخلت المعركة وظهرها غير محمى .. ووفائع كثيرة كانت موجودة تزكد هذا .. فطبعاً إنت لك حق إن هذا الاستعداد لم يكن موجوداً وبالتالي كانت الثقة بين الناس والدولة فى ذلك الوقت مفقودة » .

• وأسأل أمين هويدى : بصراحة شديدة جدا هل المخابرات العامة المصرية تتحمل جزءاً من المسؤولية ؟

• « إنت بتقلب علىَ المواجه يا أخ طارق .. موضوع النكسة ده موضوع يسبب للإنسان ألماً شديداً لإنها هزيمة بكل معنى الكلمة .. وأنا لا أتكلم عن نفسى .. أنا رجل كنت فى تلك الفترة وزير دولة لشئون مجلس الوزراء .. لذلك حينما أتحدث عن الموضوع .. أتحدث عنه بمنتهى الموضوعية .. بعض الناس بتختلف .. هل الهزيمة سياسية ؟ هل الهزيمة عسكرية ؟ اللي أنا أحب أقوله شئنا أم لم نشأ .. عبد الناصر نفسه اعترف بأنه مسئول عن هذه الأوضاع .. وهذا حق .. لكنه لا يمس جوهر ولا جذور الموضوع لأن النكسة كانت ساحقة لدرجة ما أقدرش أقول إنه تم فيها قتال بالمعنى المفهوم .. المسئولون عن هذه مسئولية مباشرة هم القادة العسكريون .. دون استثناء .. لإننا - وأنا وضحت الكلام ده فى كتابى الأخير اللي هو « الفرص الضائعة » وكتابى « أضواء على نكسة ٦٧ وحرب الاستنزاف » - دخلنا سيناء فى ٦٧ دون خطة ولم يحدث هناك قتال على الإطلاق لأن الجيش قادته لم يهتموا بمثل هذه الأمور .. وحاولوا بعد ذلك إغراق الأسباب الحقيقية فى أسباب سياسية .. ولكنى مازلت أعتقد إن كنا نريد تسمية الأمور بأسمائها .. أن القادة العسكريين مسئولين كلهم عن هذه النكسة .. ولذلك أنا اهتمت جدا بهذا الموضوع .. عن العلاقة بين القيادة السياسية والقيادة العسكرية .. لإنه وزير الحربية المعروف رجل سياسى وهو يمثل القيادة السياسية على قمة المؤسسة العسكرية .. وده له معنى كبير أن القيادة العسكرية تعمل من باطن القيادة السياسية وتأتمر بأوامرها وتنفذها ولا تخرج عنها .. وأنا فى تقديرى إن العلاقة بين القيادة السياسية والقيادة العسكرية المختلة قبل النكسة كانت سبباً كبيراً جدا فى إننا لم نقف تماما على حال القوات المسلحة الحقيقية » .

• ويقول د . مراد غالب : « عايز أقول حاجة يمكن حساسة شوية .. الحقيقة كان فى المرحلة دى بالذات .. كان فيه انقسام كبير فى السلطة فى مصر .. وكانت فيه مواجهة وصراع بين مؤسسة الرئاسة .. ومؤسسة القوات المسلحة » .

• الرئيس والمشير عامر يعنى ؟

• « آه .. يمكن تبسيطاً أقول الرئيس والمشير لأن المشير كان بيحب جمال ومخلصاً له .. لكن اللي حوالياه فى القوات المسلحة كانت حاسة إنها السلطة الحقيقية » .

• وأسأل عبد المجيد فريد : هل كانت رئاسة الجمهورية بتدى الرئيس انطباعاً إن عندنا ما يدمر إسرائيل ويمحوها من على الخريطة .. الخ ؟

• « الرئاسة مالهش علاقة .. هى القيادة العسكرية .. قالت فى أكثر من اجتماع إن إحنا قادرين على أن ندخل معركة مع إسرائيل .. مانرميهاش البحر ولا حاجة مافيش حد قال هذا الكلام .. إنا لمواجه الجيش الإسرائيلى فى المعركة .. وإحنا حنكون منتصرين وحنقدر نطردهم من الحدود إلى طريق بئر سبع غزة » .

• ويقول محسن عبد الخالق : في ٦٧ من الذي أعلن الحرب .. هل إسرائيل .. زى أحد الكتاب ما قال الغليان والفران .. أنا الذي أعلنت الحرب .. وأنا قلت لجمال عبد الناصر في أبريل في ٦٧ وأنا في مصر .. إنت بتعمل إيه ؟ ده فيه كتاب طالع من المعهد الاستراتيجي في بريطانيا "The Conflict & Middle East" يقول إن الخطوة التالية لإسرائيل هو تعريب القضية الفلسطينية بمعنى احتلال أراضي عربية .. فتتجه الدول العربية لتحرير أرضها وتترك القضية .. وهذا ما حدث إلى جانب أن القوة العسكرية لم تكن متكافئة .. إحنا كنا أضعف بكثير وجانب كبير من الجيش موجود في اليمن .. واتصلت واجتمعت مع أنتوني هنري كان جاء إلى مصر وزار عبد الناصر وأنا في لندن وقال لى : وأنا نازل وجدت الطيران المصري في مطار ألماتة بيلمع في الشمس .. باقول للرئيس يا ريس ده أى طائرة ممكن تضربها قال له يا أنتوني "The war is over" (الحرب انتهت) .. وده قبل الحرب ما تقوم .. فإذن جئنا إلى عصر المغامرات !! » .

• ويقول د . نور الدين طراف : هو عبد الناصر .. الهزيمة في ٦٧ تحمل مسئوليتها .. برغم من إنه غير مسئول في نظري .. وقال إحنا لازم نبندى نكافح من جديد .

• ويقول الفريق سعد الشاذلى : « إذا كان هناك فائدة وحيدة من نسخة ٦٧ .. فهي أننا تعلمنا منها دروسا إزاي نعمل تعبئة .. إزاي نعمل علشان نتلافى هذه الأخطاء » .

• بس كلفتنا ؟ غالى ؟

• كلفتنا غالى طبعاً .. فهي كانت خطأ .. أخطاء سياسية .. ويعدين فيه ناس في القيادة السياسية تلوم القيادة العسكرية .. والقيادة العسكرية تلوم القيادة السياسية .. والحقيقة أن الاثنين كانوا على خطأ وأخطأوا في الحسابات بتاعتهم » .

• وأسأل جمال عامر : أصابع الاتهام وجهت للمشير عبد الحكيم عامر ورجاله .. فما هو دفاعك ؟

• « أنا أقول إن كل واحد يتحمل جزءاً من المسؤولية .. ده اللي أنا أقوله .. مش علشان أنا ابنه . لكن الواقع بيقول إن كل واحد يتحمل مسؤوليته .. أنا شايف إن المسؤولية كلها اترمت على عبد الحكيم عامر » .

• وأسأل برلنتى عبد الحميد : بصراحة شديدة جدا .. هل والده عمرو عبد الحكيم عامر .. ترى أن المشير مسئول عن نسخة ٦٧ مسئولية أولى ؟

• « مش معقول .. مايفش غير عبد الحكيم عامر في البلد .. مش دى بلد .. ولا هى عزبة .. ماكانش قائد عام ده كان نائب أول .. والجيش معروف فيه إن الأوامر بتبقى من فوق .. وكان فيه قائد أعلى للقوات المسلحة ورئيس الدولة .. وكان فيه حكومة .. كان فيه حاجات كثيرة قوى .. يبقى مسئول إزاي يعنى .. دى حاجة .. الحاجة الثانية أن المشير في الوقت ده بالذات ماكانش ببجارب وماكانش في الأرض وماكانش في المعركة .. ده كان متشغلاً فوق في

طائرة .. والى موجودين فى الأرض كان الرئيس عبد الناصر ومحمد فوزى اللى كان رئيس الأركان » .

- وأسأل حسين الشافعى : من المسئول الأول فى تقديرك عن هزيمتنا فى ٦٧ ؟
- « المسئول الأول عن هذه الهزيمة هو الصراع على السلطة بين عبد الحكيم عامر وعبد الناصر » .
- ويقول أحمد كامل : « هزيمة ٦٧ كانت خطأ كبيراً جداً من القيادتين السياسية والعسكرية » .
- أيهما أكثر .. مسئولية المشير عامر ولا الرئيس عبد الناصر ؟
- « عسكرياً المشير عامر .. لأنه واجب أى قائد .. الحفاظ على قواته وحمايتها .. والرئيس عبد الناصر .. لأنه وثق أكثر من اللازم فى القيادات العسكرية » .
- هل كان هناك صراع على السلطة بينهما ؟
- « كان فيه من سنة ٦٢ » .
- وأسأل عبد المحسن أبو النور : من المسئول عن نكسة ٦٧ ؟

• « المسئولية الكبرى فى نكسة ٦٧ ليست فى الاستعداد للحرب أو فى تقرير إننا نحارب .. هم طبعاً الاستعمار وإسرائيل حاولوا إنهم يدخلونا الحرب بكل الطرق .. وفى رأى قدروا يضحكوا على الاتحاد السوفيتى بأنهم يقولوا له إن كان فيه اتجاه عندنا فى القيادة العسكرية إننا نقوم بالهجوم أولاً على إسرائيل .. فطلبوا بسرعة .. وجاء سفير الاتحاد السوفيتى وصحى عبد الناصر الساعة ٣ صباحاً وقال له إن الأمريكان بيرجوا إنكم ماتقوموش بالهجوم لأنهم قاهمين إنكم حتقوموا بكره بضرب إسرائيل وإنهم هم حيمينعوا إسرائيل من أى عمل .. ففعلاً خلوا الاتحاد السوفيتى تأكد من إن الأمريكان صادقين وحاول أن يجعلنا نصدق هذا الكلام .. ولكن عبد الناصر كان حذراً .. أعطى إخطاراً فى ٢ يونيو للقوات لما كان مجتمعاً مع الطيران بأنه فى الغالب يمكن أكثر من ٩٩٪ إسرائيل حتهاجم فى ظرف يومين أو ثلاثة .. ولا بد إنكم تكونوا جاهزين على هذا الأساس .. واللى أنا شفته ولمسته إنه لم يؤخذ هذا الكلام على محمل الجد .. ولم يصل هذا التحذير إلى الوحدات بالكامل .. ولذلك حصلت كثير من الأخطاء التى أدت لحدوث هذه النكسة » .

- ويقول حلمى سلام : « الرئيس عبد الناصر كان مطمئناً لقوة الجيش قبل الحرب .. وذلك من خلال عبد الحكيم عامر .. الذى لم يكن على مستوى المسئولية فقد توقفت معلوماته العسكرية عند رتبة الصاغ » .
- وأسأل كمال الدين حسين : كتبت للرئيس عبد الناصر تكلمه عن النكسة فماذا قلت له ؟
- « طبعاً أنا ماليش دعوة باللى حصل فى الحرب .. وأنا وبغدادى وحسن إبراهيم وغيرنا

وزكريا .. طبعاً قلبنا على بلدنا .. رحنا حاورنا القوات فى القيادة فى أثناء الحرب .. وأنا كان رأيي إنه لو حصل حرب سوف نأخذ علفة ما أخذنا مثلها .. علشان أنا كنت على علم بحالة الجيش المصرى وخصوصاً كمان أن جزءاً كبيراً منه بيحارب فى اليمن .. وكنت عارف رأى جمال عبد الناصر فى الجيش وقتئذ من قبل أن أستقيل .. لم أكن متصوراً إنه يحصل حرب .. علشان كده بعث له .. كان حضر رئيس وزراء العراق يزورنى وهو كان صديق جمال عبدالناصر وصديق لى قال لى إنت الظاهر زعلان .. كل الإخوان بعثوا إليه بخصوص الحرب وإنت لم تهتم .. قلت له علشان أنا مش مصدق أدخل حرب .. ومع ذلك أنا سوف أرسل له جواباً وخلصته إن أنا مستعد أن أكون جندي من جنود مصر فى الجيش المصرى .. وأنا عارف لو أخذ قراراً بالحرب إحنا سوف نروح فى داهية .. مع ذلك أنا مستعد .. وبعدين كتبنا مذكرة إحنا الثلاثة وبنقول له إحنا مستعدين نخدم فى أى حة فى ميدان القتال حتى ننتهى .. ثم نمشى .. بعث لنا وقعدنا معه ثلث ساعة وتكلم عن شمس بدران وإن الروس سوف يساعدوا إذا حصل حرب وسوف يبقوا معنا .. قعدنا كل العملية ثلث ساعة نأخذ وندى فى هذا الموضوع يمكن أنا كان دمي ثقيلاً شويه .. كنت مكشراً يعنى مش مبتسماً .. اللى عمله فى عبد الناصر كان كثير قبل كده .. جاء قبل أن نمشى قلت لحسن إبراهيم : يا حسن قول له لماذا لم يرد على الجواب .. فقال له .. ومع ذلك تجاهله ولم يرد عليه .. وتكلم فى موضوع ثانى » .

● وفى نوفمبر سنة ١٩٦٦ هاجمت حركة فتح الفلسطينية إسرائيل .. فردت إسرائيل بضرب الأردن .. واتهم وصفى التل مصر بعدم تحمل نصيبها فى مواجهة إسرائيل ..

● ويقول سعيد كمال رئيس اتحاد الطلبة الفلسطينيين السابق : « ما وقع فى ٦٧ هو فى الحقيقة مخطط كبير .. طبعاً كان فيه انقسام فى العالم العربى .. فيه تناقضات فى العالم العربى .. على مستوى القوى السياسية والشعبية .. ولو إنه انعقد مؤتمر المتقنين العرب بيوم واحد قبل ٦٧ فى الجزائر .. دعا له الرئيس بومدين .. اتحد جميع المتقنين العرب بكل مشاعرهم السياسية بعد هذه التجارب المضنية ووقع عدوان ٦٧ .. وما آلت إليه الأوضاع .. هو فى الحقيقة ده اللى عشته فى هذه المرحلة .. إنما لو نتكلم بالتفصيل .. أقول إحنا غلطنا وأخطأنا سياسياً عندما طالب عبد الناصر بالتقسيم كبدائية للمصالحة » .

● وفى أبريل سنة ١٩٦٧ فى أثناء الاشتباكات الجوية السورية الإسرائيلية .. حطقت الطائرات الإسرائيلية فى أجواء دمشق وسقطت الطائرات السورية .. وانضمت سوريا مع الأردن فى الهجوم على مصر ..

● وأصبح عبد الناصر فى مأزق وضعه فيه السوريون والأردنيون .. وانساق إلى الحرب .. بعد استغزاز إسرائيل وأمريكا ..

● ويقول جمال حماد : « أمريكا هى التى أطلقت على عبد الناصر اسم « الديك الرومى » ! »

● ويقول الفريق أول عبد المحسن مرتجى : « وكانت الدعاية العربية ضد جمال عبد الناصر قوية جداً .. بحيث كانت بتأرق ليلنا .. وإن إحنا مش قادرين نمنع الملاحة فى خليج العقبة ..

فين الكلام اللى اتقال إن إحنا أكبر دولة .. وإحنا أعظم دولة عسكرية .. فدى كانت عاملة فى ذهن عبد الناصر .. وملخبطاه خالص .. علشان كده خلانا نمر على الوحدات والقادة نجمعهم ونقول لهم : يا جماعة شرم الشيخ مش مهمة فى الوقت الحاضر .. لأن إسرائيل بتستخدمها فعلاً .. ما تهمناش .. لكن هم عاوزينا إن إحنا ندخل الحرب وإحنا غير مستعدين لها .. ولكن إحنا مش حندخل .. إحنا حندخل فى الوقت والمكان المناسب لها » .

• وأسأل الفريق المذكور أبو العز : هل إحنا اللى أعلننا الحرب أم العكس ؟

• « هم طبعاً دفعوا القيادة السياسية .. هم يعلموا إن من صفاتها التهور واتخاذ القرارات الغير مسئولة .. عارفين ودارسين .. درسوا كل حاجة .. فمن ناحية فيه إثارة من ناحية أمريكا .. وفيه إثارة من ناحية إسرائيل نفسها .. أذكر إن كان فيه تصريح لأشكول على سوريا .. فقد يتكلم إنما هل هو عمل حاجة .. لأ .. إنما هو عارف القيادة السياسية بتاعتنا متهورة ويندى قرارات غير مسئولة .. فحطوه فى مصيدة .. وشدوه سنة ٦٧ لنقف ما بين الاثنين بالضبط زى البندقية وكسارة البندق .. فكانت النتيجة إن إحنا لازم ندخل الحرب .. كان لازم نعرف إن أمريكا تحكون فى جانب إسرائيل بشكل صريح .. ما إحنا كمان كنا نقول والقيادة السياسية تقول إن أمريكا هي إسرائيل .. وإسرائيل هي أمريكا .. إذا كانت إسرائيل لوحدها مفردة ما فيش خوف منها .. أما إذا كانت أمريكا معاها وبهذه القوة وبهذه الصراحة يبقى كان لابد إن إحنا نخط هذا فى الاعتبار من الأول .. وما نجيش بقى كمان نصعد المواقف .. وبعدين نعمل تجاوزات فى الحديث .. « والله اللى زعل يشرب من البحر الأبيض .. وإذا ما عجبجوش البحر الأبيض .. يشرب من البحر الأحمر » .. فرد عليه جونسون وقال له « ده أنا حاشربك من مجارى القاهرة » .. فمن الذى شرب من مجارى القاهرة ؟ عبد الناصر لم يشرب من مجارى القاهرة .. إنما اللى شرب من مجارى القاهرة هو الشعب المصرى » .

• ويقول محسن عبد الخالق : « آدى شخصية عبد الناصر .. البطل القومي .. وكان كل الناس بعد ٥٦ مستعدة تنتخب عبد الناصر رئيساً وترفعه .. ومصر حققت كل آمالها .. دخل بعدها إلى عصر المغامرات .. الوحدة مع سوريا .. الانفصال عن سوريا .. اليمن وغير اليمن .. إسرائيل و ٦٧ .. وبعدين أندعش إن بعض الكتاب يقول لك إن العالم العربى فرض علينا ذلك .. هو أنا ما عنديش رأى .. إيه يعنى العالم العربى فرض علينا .. يعنى إيه مش فاهم ؟ أنا رجل لى فكرى ورأبى ولا يفرض على أحد .. يستفيد من الظروف اللى أنا أخلقها .. لكن لا يفرض ظروفنا معينة » .

• ويقول عبدالمجيد فريد : « الحرب حددها عبد الناصر ٥ يونيو فى جلسات جماهيرية وجلسات سياسية .. قال أنا أتوقع بناء على المعلومات اللى عندى .. وكان فيه معلومات مخابرات عامة كثيرة .. معلومات جيدة .. لكن اليهود اصطادوا عبد الناصر .. واصطادوا مصر .. لأنهم عاوزين يخلصوا من هذا النظام .. فعملية المرور فى مضيق خليج العقبة أخذت من أجل أن تبدأ عملية الحرب .. وعارفين الصدى اللى حيحصل وموقفه مع البلاد العربية مش حيقدر يرجع فى كلامه » .

- * وأسأل أحمد طعيمة : هل استغفر الرئيس عبد الناصر قبل الحرب ؟
- * « ده ١٠٠٪ .. وده من ضمن المخطط .. وطبعاً كان بيوزع علينا فى هذه الفترة قبل ٦٧ كل ملخصات أو موجزات إذاعات السعودية والأردن على وجه التحديد .. الاثنان دول كانوا بيبتهما عبد الناصر اتهامات بالغة الشدة .. بأنه رجل دجال وأنه لا يصدق الأمة العربية .. وهو بيتكلم عن تحرير فلسطين وهو محتّمى بالبوليس الدولى وقوات الطوارئ فى سيناء .. وهو بيقول إنه حيحرر فلسطين ومباهه الاقليمية فيها السفن الإسرائيلية .. فأولى بك وقبل ما تتكلم عن تحرير فلسطين وتقول إنك المدافع عن فلسطين .. حرر سيناء من البوليس الدولى وحرر المياه الإقليمية من السفن الإسرائيلية .. والدافع العاجل اللى حصل .. وهو الحشود اللى قيل إنها إسرائيلية ضد سوريا .. برضه استغلوا فيها نقطة ضعف عبد الناصر .. إن انفصال سوريا أدمى قلبه وكان يتمنى أن تعود سوريا إلى وحدتها مع مصر .. فطبعاً اندفع فى الحاجتين .. إنه يطلب انسحاب البوليس الدولى ويقلل من شرم الشيخ .. واستغفر لمدة طويلة .. ودى طبعاً من ضمن الدراسة اللى معموله لحرب ٦٧ .. يعنى مش حاجة جت ارتجال .. لأ .. دى كانت مؤامرة » .
- * ويقول عباس رضوان : « كان فى يوم من الأيام بيتكلموا عن إن هو محمى بالبوليس الدولى الموجود فى سيناء .. وبيجمع على إيه .. الجزيرة العربية دى برضه أثرت عليه فى القرار الذى اتخذه .. بصرف البوليس الدولى اللى كان فى سيناء .. علشان لا يكون فيه حجة للعرب إنهم يقولوا أنت محمى بالبوليس الدولى الموجود فى سيناء فى ذلك الوقت » .
- * وأسأل شمس بدران : ماذا تقول لنا وقد مر أكثر من ربع قرن على نكسة ٦٧ ؟
- * « هو فيه عدة عوامل اجتمعت وأدت إلى معركة ٦٧ اللى أدت إلى الهزيمة .. العوامل دى كان من ضمنها ومن أهمها إن أمريكا كانت عازمة توقف نفوذ عبد الناصر .. أو بمعنى آخر تخلص منه .. فى نفس الوقت إسرائيل كانت بتجهز نفسها لمعركة مع مصر .. علشان تخلص على قوة مصر العسكرية .. وبالتالي تنتهى المشكلة الإسرائيلية بأن يحصل صلح مع مصر أكبر دولة .. وبالتالي بقية الدول العربية .. فهذان العاملان اجتمعا » .
- * ويقول عبد الهادى البكار : « سنة ٦٧ تورطت مصر بالحرب .. مش برجاء من سوريا .. بتقرير روسى .. لازم تعرف إن كل هذه الدول العظمى .. لإننا نحن أعوان مستهلكين بدهم أن نظل ضعافاً .. عاوزين يرهقوك .. يرهقوك علشان دائماً يسيطروا عليك » .
- وأغلق عبد الناصر خليج العقبة ومضائق تيران .. واجتمع وزراء المالية العرب وقدموا مساهماتهم للقائد العام للقيادة العربية الموحدة الفريق على على عامر ...
- وبدأ الشعور العام فى مصر كلها .. نتيجة للشحن الإعلامى الذى انطلق من صوت العرب .. بأنه قد آن الأوان لتأديب إسرائيل وضربها ...
- * وأسأل د . الجوهري : قلت « لم يستمع الرئيس عبد الناصر إلى رأى القادة العسكريين واستمع إلى رأى صحفى » .. من هو ؟

- « أيوه .. هو هيكل ! » .
- **ويقول أمين هويدى :** « قيل فى حرب ٦٧ موضوع اليمن .. وقيل أسباب أخرى .. الكلام ده لو أن القتال قد تم .. لم يتم أى قتال .. لكن كل هذا الكلام له ردوده .. له أبحاثه .. إن كنا نريد أن نتعلم من الأخطاء .. صدقنى يا أخ طارق لو إن القيادة العسكرية اعترضت وقالت إنها غير مستعدة لكانت الأمور تطورت تطوراً آخر .. لكن الكل قال آه إنا مستعدين .. والتصوريات موجودة فى الصحف .. إنا نمتلك أقوى قوة جوية فى المنطقة .. إنا كبيت وكيت .. وصدقوا هذا الكلام » .
- **ويقول أحمد سعيد :** « فى هذا اليوم كنا بنحاول أن نعبر عن الأمل الذى نحاول أن يبقى » .
- **ويقول د . تحسين بشير :** « الحقيقة لم يكن فى ٦٧ شىء كويس .. لا القرار السياسى صح .. ولا القرار الشعبى صح .. ولا قرار الصفوة اللى حول عبد الناصر صح .. ولا الإعلام المصرى صح » .
- **وأسأل شمس بدران :** هل كان الإعلام بيدنا الإحساس والانتطباع والثقة فى (إن جيشنا يحكس الدنيا ؟
- « آه .. ما إنا قلنا فعلا إن الجيش بتاعنا أقوى من جيش إسرائيل .. معنى الإعلام لم يكن مخطنا » .
- **وكان لهذا الشحن الإعلامى أثره الواضح فى البلاد العربية .. فى الجزائر وليبيا والسعودية وغيرها ..**
- **وأسأل د . حاتم :** فى ٦٧ يافندم إيه رأيك فى إعلامنا ؟
- **« الإعلام بتاع ٦٧ حمل الحقيقة المسئولية .. مش خطؤه لإن الخطأ كان موجوداً من ناحية القيادة نفسها .. الإعلام هو مرآة للسياسة ولكنه لا يصنع السياسة .. فكان الجيش المصرى فى ذلك الوقت بيروح سيناء ويقول أنا حأحارب .. هو اللى عاوز يحارب بيقول أنا حأحارب .. مش معقول .. ويقول مثلاً فى ذلك الوقت حترمى إسرائيل فى البحر .. طب يا سيدى ما ترحمها الأول وبعدين نقول أنا رميتها إلى آخر الكلام اللى كنا بنسمعه .. وكله كلام شعارات يعنى لا معنى له .. ولذلك لما حدثت الربة الكبيرة فى القيادة العسكرية فى ذلك الوقت .. أولادنا اللى فى الإذاعة والتليفزيون بقوا يأخذوا القيادة فى هذا الموضوع وهم ليسوا على علم تام بما يحدث .. وإنا عاوزين يرفعوا الروح المعنوية .. لكن للأسف الشديد كانت المبالغات شديدة .. وكانت النكسة .. إنا بنقول عليها نكسة لكن هى هزيمة بمعناها الصحيح » .**
- **ويقول محمد فائق :** « أنا مسكت الإعلام قبل ٦٧ وشهدت النكسة .. وده كان عملاً خطيراً جداً مايفش شك .. وكانت أزمة إعلامية خطيرة لأن الإعلام زى ما أنت عارف لايخلق صورة .. وإنما يعكس صورة .. وبالتالي الصورة اللى عكسها الإعلام قبل الحرب جاءت صدمة » .

• ووردت معلومات يوم ١٣ مايو سنة ١٩٦٧ من الاتحاد السوفيتي بأن إسرائيل حشدت قواتها أمام الجبهة السورية ..

• وأكد هذه المعلومات رئيس مجلس الأمة أنور السادات الذي كان يزور موسكو في أوائل يونية ..

• وأسأل عبد المحسن مرتجى : روسيا كانت واقفة معنا .. ولا على الحياذ ؟

• « روسيا ماكانتش معنا أبداً .. روسيا كانت متصورة إن الهجوم حقيقي على سوريا .. سوريا كانت البنت البكر في ذلك الوقت .. وكانوا ماشيين مع الروس .. وإحنا كنا شوية منكمشين عنهم .. ماكانوش عاوزين إن يحصل أى حاجة ضد سوريا فهم اللي بدأوا حكاية الحشود ومش الحشود علشان إحنا كقوات مصرية نحشد قوات .. يبقى اليهود في ذلك الوقت يفكروا أكثر من مرة قبل ما يدخلوا على سوريا .. وفي رأى الجماعة الروس إنه حتى لو حصلت حرب حتبقي حرب محدودة .. وفي هذه الحرب هم بقى يدخلوا المحافل الدولية يظهرها كأصدقاء العرب وإلى آخره وبذلك يكسبوا هم الناحية السياسية » .

• وأسأل د . مراد غالب : هل كانت روسيا أمينة في تعاملها مع مصر سنة ٦٧ ؟

• « أنت يمكن لمست قضية من أخطر القضايا .. و ٦٧ يمكن طلع عليها كتب كثيرة جداً .. لا أدعى إن أنا أعرف كل حاجة عن ٦٧ .. أولاً لأن فيه حاجات كانت بتحصل هنا في مصر .. لكن الحقيقة يمكن قبل كده بشوية كانت سوريا مهددة .. لما جاء النظام اللي كان فيه نور الدين الأتاسي وكان رئيس الجمهورية وكان يوسف زعين رئيس الوزراء وكان صلاح شديد هو سكرتير عام الحزب .. وكانوا بيعتبروا إن هذا النظام أكثر يسارية من النظام اللي قبله .. وإنه المهم حماية هذا النظام فكانوا يدفعوا ناحية توثيق العلاقات بين مصر وبين سوريا .. فده حتى في نظرهم بيعمل توازن وفي نفس الوقت بيحمي النظام .. وأنا عاوز أقول الآتي .. أنت طبعاً على طول تفكر في مسألة الحشود دي .. هل صحيح كان فيه حشود على سوريا ولا ماكانتش فيه .. وإيه قصتها .. ناس بنقول لأ ماكانتش فيه .. الفريق فوزى راح سوريا ورجع وقال مافيش حشود .. الله إيه الحكاية هل فيه ولا مافيش .. عاوز أقول لك حاجة .. يمكن برضه ماقلتاهش قبل كده .. المارشال جريتشكو وزير الدفاع السوفيتي .. قال لي : نحن نستعجب الكلام ده جنبته منين إن مافيش حشود .. لأ ده فيه حشود .. نحن نعم عدد الألوية .. أسماء قادة الألوية .. وعاوز أقول لك على حاجة أكثر من كده نحن نعرف أسماء قادة الكتائب .. فكأ عندهم معلومات كبيرة عن الحشود .. رأيي الشخصي إن هذه المعلومات سريت لهم عن عم ويتفاصيل لا تقبل المناقشة .. لدرجة إن السفير الروسي في إسرائيل .. رفض إنه يروح يشوف إذا كان فيه حشود ولا لأ .. لإتهم كانوا واقفين إلى درجة كبيرة جداً إن هناك حشود .. وعاوز أقول حاجة مهمة جداً .. لما بلغونا بإن فيه حشود هم بلغوا القيادة وبلغوني .. وكانت فيه حفلة استقبال للرئيس أنور السادات لما كان رئيس مجلس الشعب .. وكان الكلام ده حوالي قبل ٥ يونيه بأيام .. فأنا كتبت وقلت للرئيس أنور السادات : بكرة أنت مسافر فتبلغ الأخبار دي للرئيس

عبد الناصر .. فقال لي : لأه موضوع لازم تبليغه فى الحال .. الحقيقة أنا كتيبه وكتبت فى الآخر خالص وقد « نرون إبلاغ مجلس الأمن وإحاطته علماً بهذه الحشود » .. لأن برضه كنت خائفاً من تصعيد العملية .. فبدأت العملية بأن إحنا كمان حشدنا القوات المسلحة بتاعتنا وطلبنا إبعاد قوات الطوارئ الدولية عن الحدود بيننا وبين إسرائيل .. وكان رالف بانس الأمين العام المساعد للأمم المتحدة .. قال لا إذا كنتم عاوزين تبعدوا قوات الطوارئ فتبعوها عن جميع الأماكن .. ومنها مضيق تيران .. وهنا بقت القضية تتعقد أكثر .. لأن إحنا كنا بنقول بنفوت إسرائيل وسفن إسرائيل من المضيق .. لأن فيه قوات الأمم المتحدة فدلوقت أنت حجتك إيه .. فإذن أنت لازم تقفل مضيق تيران .. وهنا بدأت العملية تتأزم بشكل كبير .

• ويقول شمس بدران : « وتهايت الظروف أن جاء لنا معلومات من الروس على إن فيه تجمعات إسرائيلية كبيرة بتتحرك علشان خاطر تهاجم سوريا .. وفى نفس الوقت السوريون راح لهم نفس المعلومات دى » .

• المعلومات دى راحت لهم من مين ؟

• « المعلومات جت لنا من الروس .. كان أنور السادات بيزور روسيا وبلغوها للسادات .. وجت للسوريين برضه عن طريق الروس .. فالمعلومات كانت من مصدر واحد .. بأن إسرائيل بتعمل تحركات عسكرية كبيرة بتتحرك علشان تهاجم الجبهة السورية .. وبعدين فى حقيقة الأمر بعد كده .. ظهر إن التحركات دى كانت تحركات عادية بخصوص الاحتفال بيوم إنشاء إسرائيل .. العيد الـ ٢٥ لإنشاء إسرائيل .. وكانت القوات دى رايحة علشان تطلع الاستعراض بتاع العيد الـ ٢٥ لإنشاء إسرائيل » .

• ماكانتش إذن حشوداً حربية للمعارك ؟

• « آه .. بس تبليغ الروس كان على إن دى حشود » .

• ويقول جمال عبد الحكيم عامر : « ٦٧ موضوع كبير جداً .. تدخلت فيها أطراف كثيرة من خارج مصر ومن داخل مصر .. على ما أذكر قرار الحرب نفسه ليس من مصر أساساً لأن جاءت أنباء أن هناك حشود على سوريا .. فى ذلك الوقت سافر الفريق فوزى وزار الخطوط .. ووجدوا إنه لا توجد حشود .. وبلغوا هذا الكلام .. والروس تمسكوا بكلامهم إن فيه حشود » .

• وأسأل شمس بدران : الفريق فوزى عاد من سوريا ولم يجد حشوداً .. بصفتك كنت وزير الحربية أيامها .. لازم عارف ؟

• « آه .. لم يجد حشوداً .. السوريون قالوا له مافيش حشود .. استكشفتنا واستطلعنا ومافيش حشود ! » .

• وكان وزير الحربية شمس بدران قد عاد من روسيا لتوه وأبلغ رسالة هامة ..

• ويقول مرتجى : « لما راح شمس بدران روسيا .. الكلام اللي قيل له هو فهمه غلط .. هو

فهم إنهم حيساعدونا .. هي كل اللي هناك بلاش تكونوا أنتم السابقين في الدخول للحرب ..
خلوهم هم اللي يعتدوا الأول .. هو مافهمش كده .. هو فهم غلط لأن يمكن ده فتحى عبد العزيز
هو أيامها كان موجوداً ملحق عندنا .. كان لواء .. كان حاضراً هذا الحديث .. بيقول هو فهم
الحديث غلط إن الروس فيما معناه بيقولوا هدوا اللعب » .

• **يقول د . مراد غالب :** « وجاء شمس بدران .. كان وزير الحربية وقابلنا كوسيجين ..
كوسيجين اتكلم في منتهى العقل .. وقال الآتى وحأقوله بالنص : طبعاً الموقف والحشود
الإسرائيلية قدامكم والحشود المصرية وخلافه .. ده وضع في منتهى الخطورة .. وأنه لا يوجد
جيوش بهذا الحجم وهذا الشكل في أى مكان .. ده سيؤدى قطعاً إلى عمليات عسكرية ومعارك
ضخمة جداً .. ثم إن قفل خليج العقبة ده العالم كله لن يرضى به .. ولكن لقد أخرجتم القوات
الدولية وبان قدام العالم لأن إسرائيل صرحت إنها لا تريد العدوان على سوريا .. فده مكسب
كبير لكم أيضاً .. إنتم طلبتم إخراج قوات الطوارئ الدولية .. وعلى هذا الأساس فإنتم لغيتم
آخر آثار عدوان سنة ٥٦ .. وعلى هذا الأساس عليكم أن تثبتوا هذه النجاحات .. وكيف ذلك ..
بأنكم ترجعوا وتخففوا حدة الطوارئ وحدة الموقف والحشود .. بحيث إنكم لا تعطوا الفرصة
إلى اشتباكات .. لأنكم حققتم مكاسب كبيرة .. وعليكم أن تخافوا على هذه المكاسب » .

• **بينما يقول عبد اللطيف بغدادى :** « كان شمس بدران راح زيارة لروسيا ورجع بيقول إن
روسيا عاوزانا نقل .. وإن اليهود مش حياربوا قبل ست سبع شهور .. فكان يوم ٢٩ مايو
قبل ٥ يونية .. الذى حصل فيه الحرب بقى » .

• **وأسأل شمس بدران :** في مايو ٦٧ سافرت إلى موسكو .. وقيل ما قيل عن هذه الزيارة ..
فماذا تقول أنت ؟

• « أنا سافرت لموسكو .. يعنى ما سافرتش باختياري .. العملية إذا كنت عاوز تقرأها في
المذكرات اللي أنا كتبتها حتلاقى إن إحنا سحبنا القوات الدولية من شرم الشيخ بدون موافقة
لا هيئة الأمم المتحدة ولا حاجة .. وكان فيه تردد إن القوات تنسحب .. قائد القوات اللي كان
متردداً .. لكن انسحبت القوات من شرم الشيخ .. وبعد ما انسحبت أصبح من واجبنا إن إحنا
نوقف الملاحه في شرم الشيخ .. ما نخليش مراكب إسرائيل تعدى .. لأن بقينا إحنا المسؤولين
عن خليج شرم الشيخ » .

• **وسأفرت بعد كده ؟**

• « ماهو عبد الناصر في اجتماع في مجلس القيادة العامة .. بعد ما شاف الموقف والكلام ده
كله .. قال لى .. أنا عاوزك تسافر بكره روسيا .. قلت له خير .. قال لى يعنى علشان يبقى
فيه مظهر إن فيه تعاون بيننا .. وتروح تقابل وزير الدفاع هناك وتبان في الصور وفي
الجرائد .. فيبان إن فيه ما بيننا وبين الروس تعاون .. يعنى زيارة دعائية أكثر منها لأى
هدف .. فقلت له طيب .. فالمشير انتهر الفرصة وقال إن إحنا لينا طلبات تسليح هناك .. مادام

حتمسافر خد الطلبات دى معاك لأن الروس مآخزينها .. فانتشك وفد عسكرى وجاء معانا وكيل وزارة الخارجية أحمد حسن الفقى .. وسافرنا على موسكو .. قابلى فى المطار طيعا المارشال جريتشكو اللى هو وزير الحربية الروسى .. فأنا علشان أذى الزيارة المظهر اللى عبد الناصر كان عاوزه .. قلت له أنا جاي أقابل رئيس الوزراء .. أنا عندى مهمة بأن أقابل رئيس الوزراء ..

* اللى هو كان كوسيجين ؟

* « آه .. فقال لى ده أنا عامل لك حفلة فى نادى الضباط .. قلت له طيب مانروح الغداء بس أنا جاي أساساً أقابل رئيس الوزراء .. فقال لى طيب ندبر المقابلة بكره .. ورحنا نادى الضباط علشان نتغدى .. ابتدا كل واحد يقول كلمة .. وحسيت بجو توتر .. وحسيت إنه فيه حالة خوف من إن الموقف يتصاعد .. وكانت واضحة جداً فى القادة الروس .. اللى كل واحد فيهم قال كلمة ... وبعدين اللى شعل الموضوع أكثر بقى إن أحمد حسن الفقى قام وقال كلمة .. قال : « أنا لى ابن وأنا أرحب جداً إن ابنى يروح يموت فى حرب ضد الأمريكان » .. دى بقى شعلت الدنيا .. فبعد ما خلصوا كلام كلهم .. أنا فمت وقلت الموقف مش بالصورة دى .. الموقف مافيش فيه تصعيد ولا حاجة .. وإحنا صحیح قفلنا الخليج .. بس حنسمح للمراكب الإسرائيلية تفوت فى الخليج .. لو هى فى حماية مراكب أمريكية أو إنجليزية .. وإحنا ما بنصعدش الموقف ومش حيتصعد أكثر من كده .. كان أول إحساس أنا حسيت من الروس .. من القادة العسكريين دول .. إنهم مش عاوزين يصعدوا الموقف وخائفين من أن الموقف يتصعد ويحصل مواجهة مع أمريكا .. بعد كده لما رحلت قابلت كوسيجين اللى هو رئيس الوزراء .. برضه أحس بالارتياح الكبير قوى لما قلت له .. وسألنى إنتم حطيتوا ألغاماً فى الخليج .. ألغام يعنى معناها حيتقل إلى الأبد .. قلت له لأ إحنا ماحطيناش ألغاماً .. إحنا حطين مدفعية سواحل .. ومدفعية السواحل ممكن ما تضرش على المركب أو ممكن تنسحب وينتهى الموقف .. فنصح بعدم تصعيد الموقف وقال إحنا إديناكم السلاح .. وإديناكم المعلومات .. ومش عاوزين نصعد .. قلت له المعلومات بتاعتكم دى هى اللى خيلتنا نتحرك وهى اللى خلقت الموقف ده » .

* وما نقلتش بقى رسالة من الروس للرئيس عبد الناصر حصل عليها قولان ؟

* « لأ .. مافيش رسالة معينة .. فيه محضر جلسة رئيس الوزراء كوسيجين » .

* طيب عملت إيه لما التقيت بالرئيس ؟

* « وأنا راجع ورايح بقى أركب الطائرة ومسافر .. أخذنى جريتشكو على جنب وقال لى لما أحسن إنهم كان باين إنهم خائفين من الموقف .. وإحنا حسينا كده .. إنتم ما تخافوش من أى حاجة .. إحنا لو الأمريكان تدخلوا .. والأسطول بتاع الأمريكان دلوقتى فى البحر الأبيض وإحنا أسطولنا معاهم .. تكاد مراكبنا وإحنا نلمسهم بأيدينا وكانوا نزلوا هم وحدات « ترويس » فى كريت .. وسحبوها تانى علشان إحنا تدخلنا .. فأنا بأقول لك الكلام ده علشان خاطر تشدوا حيلكم ..

ماتخافوش لو أمريكا دخلت المعركة أو تدخلت إحنا حنحميكم .. ابعثوا لنا حنجيلكم لغاية عندكم .. لو أمريكا دخلت المعركة .. فلما رجعت أبلغت الرسالة دى لعبد الناصر .

• بحرفيتها ؟

• بحرفيتها طبعاً الرسالة موجودة ومكتوبة .. قال لى اكتبها .. كتبها وموجودة فى الرئاسة وفى وزارة الخارجية وموجودة فى كل حنة .. هو بقى بعد النكسة ما حصلت .. عبد الناصر أولها .. وجاب هيكل وقال له ده شمس بدران مافهمش الرسالة ورجع قال إن الروس خيشوا معانا فى أى حرب تحصل .. وده اللى خلاه يمشى فى هذا الطريق .. وقال إنه أخذ إشارة منى إن الروس مستعدين يخشوا معانا فى أى مغامرة نقوم بها .

• وهذا لم يحدث ؟

• طبعاً لأ .. الله .. ما هى الرسالة موجودة ومحفوظة فى رئاسة الجمهورية وفى وزارة الخارجية .. نص الرسالة موجود .. وموجود فى الكتاب اللى طلعه هيكل تحب أقرأه لك .

• ويضيف شمس بدران : « ما هو الكتاب ده بعد ما مات عبد الناصر .. الوصايا .. بعد الحرب على طول .. كتب طبعاً نقلاً عن عبد الناصر إن شمس بدران راح فهم الرسالة غلط وبناء عليها عبد الناصر عمل كل الإجراءات . »

• يعنى أنت المسئول ؟

• أنا بقى اللى فهمت غلط لأنى مسطول !! وعبد الناصر أخذ كل الإجراءات دى كلها لأنى قلت له رسالة .. ما هى الرسالة محفوظة آهى .. وفى الوثائق بتاعة هيكل ظهرت صورة الرسالة .. إذا دخلت أمريكا الحرب فإننا سوف ندخلها بجانبكم .. وأمريكا ما دخلتش الحرب طبعاً .. بس هى اللى حاربت هى اللى عملت كل حاجة .

• كنت بتكلمه من غير مترجم ولا إيه ؟

• لأ لأ كان فيه مترجم .. حأتكلم روسى إزاي يعنى !؟ .

• لأ نتكلم إنجليزى معه ؟

• لأ هو ما بيتكلمش إنجليزى .. فيه مترجم طبعاً .

• وكنت حاسس إنهم مش عاوزين يتورطوا فى حاجة ؟

• مش عاوزين يخشوا فى مواجهة مع أمريكا .. كان باين إنهم مش عاوزين يصعدوا الموقف .. قال عبد الناصر إننى أبلغته إن الروس حيساعدونا .. وأقنع هيكل بالكلام ده .. قال خطبة بعد كدة وقال شمس بدران راح روسيا ورجع بأخبار كويسة .. وإن الروس معانا وكلام بالشكل ده .. ما أنت تشوف فى كلام هيكل لما جاب نص الرسالة .. غير ما قال فى الأول قبل كده ..

أنا جيت هيكل بعد كده وقلت له علشان هو قال نقلاً عن عبد الناصر إن أنا فهمت غلط وقلت إن الروس معنا في أى موقف ... واليهود لو عملوا حاجة فالروس حيقوا معنا بالكامل .. وبعد كده بقى لما جابوا المراجع وكتبوا وجاب نص الرسالة المكتوبة .. وضح الحقيقة .. وظهر إننى كنت أميناً في نقل الرسالة حرفياً » .

• وجبت هيكل فين أنا ما فهمتش ؟

• « في بيت المشير بعد الحرب .. لأن عبد الناصر فهمه قصة ثانية .. قال له شمس بدران فهم الموضوع غلط وجاء هنا لخبط .. فهيكل نشر الكلام ده .. وبعدين .. صححه بعدها » .

• « ويعلق شمس بدران فيقول : « أمريكا أخذت موقفاً مع الدول الغربية إنها ماتديناش تسهيلات إقتصادية .. كنا نجيب مستلزمات الإنتاج من الغرب .. فالبנק الدولي وأوروبا الغربية كلها منعوا منح مصر تسهيلات إقتصادية .. فأصبحت مصر على شفا الإفلاس فعلاً .. لأن مش قادرين نجيب مستلزمات إنتاج للمصانع بتاعتنا .. ده حصل قبل عملية الحرب على طول .. فيمكن الحرب هي كانت مخرج من الأزمة الاقتصادية الرهيبة اللي كانت حتحصل لمصر .. الحرب يمكن كانت مخرجاً منها .. لأن الروس بعد كده ابتدوا بيعتوا تموين وابتدوا بيعتوا الحاجات دي كلها » .

• « ومن المسئول الأول عن نكسة ٦٧ .. الرئيس ولا المشير .. ونسبة كام إلى كام في تقديرك ؟

• « هما الاثنان مسئولان ومسئولية متضامنة » .

• « وشمس بدران ؟

• « أنا ماكانش لى مسئولية عسكرية .. أنا مسئوليتي كوزير حربية كانت مسئولية ميزانية .. والميزانية أنا حاولت أعمل فيها دشم الطيارات » .

• « وتم سحب قوات الطوارئ الدولية من شرم الشيخ ومن الحدود المصرية الإسرائيلية ...

• « وتقول جيهان السادات : « الرئيس عبد الناصر لما تكلم وقفل المضايق طبعاً كانت واضحة لكل إنسان له صلة بالسياسة أو على علم بالأوضاع إنه سوف تقوم حرب .. حتى لما كنت أتناقش مع أنور السادات كان يقول لى « لو الحرب قامت سوف يأخذوا (اليهود) درس عمرهم » .

• « ويقول سامى شرف : « كانت جميع اجتماعات الرئيس تسجل فيما عدا لقاء واحد .. طلبه الرئيس .. أعتقد هو كان عاوز القادة اللي عارفين أن فيه تسجيلات يخيلهم يتكلموا على راحتهم .. ففي جلسة ١٥ مايو سنة ٦٧ ما اتسجلش اللقاء ده اللي تقرر فيه قفل خليج العقبة .. دي الجلسة الوحيدة التي لم تسجل .. باقي الجلسات كلها مسجلة .. مجلس الوزراء مسجل .. اللجنة التنفيذية العليا مسجلة .. كل الجلسات .. جمال عبد الناصر لم يتعامل مع الأحداث

متجاوزاً المؤسسات .. حتى فى أخطر الأحداث كان بيتشاور .. يعنى فى غلق خليج العقبة كان مشتركاً معنا اللجنة التنفيذية العليا للاتحاد الاشتراكى - ١٥ عضو .

• وكلهم وافقوا ؟

• كلهم وافقوا .

• باستثناء أفن ...؟

• المهندس صدقى سليمان - الله يرحمه - قال نتريث .. لكنه وافق من حيث المبدأ .

• ويقول تحسين بشير : « الشخص الوحيد الذى أكن له احترام رغم إننى لا أعرفه هو الرجل الذى اشتغل فى بناء المد العالى وكان رئيس وزراء الإقليم المصرى المهندس صدقى سليمان » .

• ويقول الفريق أول مرتجى : « لأن إسرائيل قالت فى بيانات كثيرة وتصريحات كثيرة كذا حاجة لو حصلت يبقى إحنا حنقوم باللى بيسموه الهجوم المضاد .. يعنى إحنا (اليهود) ما حاربناش يعنى مش إحنا إنتم السبب أنتم عملتم حاجة اضطررنا نرد عليها .. لو حشدتم قوات كثيرة حناربكم .. ولو قفلتم الملاحة فى خليج العقبة وما نوصلش إيالات يبقى حناربكم .. لو الفدائيين نشطوا أكثر من اللازم يبقى حناربكم .. لو جاءت قوات أجنبية غير القوات التى فى البلاد التى حوالينا يبقى إحنا مضطرين ناربكم .. عملنا كل الحاجات دى .. إذن عبد الناصر كان عارف إن الذى هو بيعمله حيوصله للحرب » .

• ويقول الفريق مذكور أبو العز : « إنما طبعاً إحنا لا أخذنا إجراءات شديدة مثلاً زى .. بعننا طائرة للجنرال « ريكى » الذى هو كان قائد البوليس الدولى .. وقال له أنت تنسحب لأن إحنا حنضرب .. وبعدين كمان قفلوا العقبة .. وبعدين حشدنا قواتنا كلها بالطريقة العشوائية التى تمت » .

• ويقول عبد اللطيف بغدادى : « علاقنى بعبد الناصر كانت مقطوعة من ٦٤ لغاية ٦٧ .. فى فترة ما قبل الحرب اعتبرنا دى برضه بلادنا .. ولأزم يبقى لنا دور .. فبعننا له مذكرة حذرناه من الحل باللجوء لمعركة .. وما ندخلش إلا إذا اعتدوا على سوريا .. وبعدين هو قفل شرم الشيخ .. ومنع مرور السفن .. اعتبرنا إن الحرب قائمة فإسرائيل حقتال فى سبيل حياتها .. كثيران لها .. فبعننا له مذكرة ثانية .. بنقول فيها إن الحرب واقعة لا محالة وإحنا لنا خبراتنا كمواطنين يهمننا إنه يبقى لنا دور .. وحددنا لنا دورنا .. من هنا قمتنا واتكلمنا وناقشنا .. إنما هو كان تقدير الموقف خطأ » .

• ويقول د . مراد غالب : « طبعاً ده أول يوم كان فيه هذا الكلام .. أنا بعثت رسالة فى يومها بخط إيلى .. مع الله يرحمه حمدى عاشور .. ووصل للرئيس فى نفس اليوم .. لكن شوف النية كانت مبيتة لضرب مصر .. وحأقول لك ليه .. ببساطة شديدة لأن أمريكا والرئيس الأمريكى شخصياً جونسون دخل هذه المعركة بشخصه .. « كاموفلاج » يعنى عملية تمويه

استراتيجية لصالح إسرائيل وضرب مصر إزاي .. لما قال لجمال عبد الناصر إحنا عاوزين نخفف حدة التوتر .. أنا حابعت لك هيوبرت همفرى نائب رئيس الجمهورية والسيد زكريا محيى الدين كان المفروض يروح أمريكا علشان يقابل جونسون .. وأعطى انطباعاً إن المعركة والموقف فى سبيله إلى الحل .. حاقول لك على حاجة تدهش لها .. كل اللى حول عبد الناصر قالوا له خلاص المشكلة فى طريقها إنها تتحل .. وجمال هو الوحيد اللى قال أنا ابتديت أخاف بجد .. فالترتيب بناع ٦٧ الاتفاق مع أمريكا .. السفينة ليبرتى اللى ضربوها الإسرائيليون وقصص كثيرة .. لكن كل دى علامات عجيبة ويجب أن نعترف إن الحملة الإسرائيلية وهجوم الإسرائيليين ٦٧ كان مثلاً من أمثلة العمل العسكرى الهائل .. لم يتركوا ثغرة إلا وحسبوا » .

• وأبلغ عبد الناصر أن الهجوم على مصر وشيك .. وبدأت عمليات تشويش السفينة ليبرتى على اتصالاتنا اللاسلكية ..

• ويقول د . عبد العظيم رمضان : « أصدقاء عبد الناصر ومنهم تيتو وهوشى منه .. أبلغوه بموعد هجوم إسرائيل فى يونيو ٦٧ » .

• ويقول الفريق أول محمد فوزى : « حرب ٦٧ معركة مدبرة من قبل إسرائيل .. تهدف بمساعدة الولايات المتحدة الأمريكية لكى تقضى على النظام فى مصر .. وكلمة « تدبير » أعنيها بحق .. إذ إنها بقيت عشر سنوات تدبر وتسعى وتنظم لهذه المعركة .. بعد العدوان الثلاثى مباشرة سنة ٥٧ .. ركزت القوات المسلحة الإسرائيلية على عملية ضرب مصر بهدف الإطاحة بالنظام وموقف التنمية للشعب المصرى .. المعركة لم تأخذ وقتاً طويلاً إذ إنها جاءت مفاجأة .. الضربة الجوية التى تمت .. الضربة الجوية خطط لها منذ عشر سنوات وتم تدريب الطيارين الإسرائيليين على الطيران المنخفض .. الأمر الذى لم يكن مألوفاً فى ذلك الوقت .. يعنى إيه الطيران الواطى ؟ يعنى الطيار يطير على ٣٠ متر فوق سطح الماء .. هذا الارتفاع لا يخلية يدرك قيمته ولا معناه لأن لو بص لفوق يجد السماء .. لو بص لأسفل يجد البحر والانتان لون واحد .. يعنى المسألة قاصرة على العدادات .. مثل هذا الطيران لمسافات طويلة يجيب أخطاء من ناحية الاتجاه .. علشان يوزنوا هذا الخطأ ويمنعوه خطأ مساعد .. مركب مساعدة اسمها « ليبرتى » فى الوسط ما بين تل أبيب وبورسعيد .. المركب دى كانت مركب تجسس وظيفتها إنها تنظم اتجاهات أفواج الطائرات المقبلة من اتجاه تل أبيب إلى بورسعيد .. يقدر يخاطبه فى الوسط ويقول له أنت منحرف يمين أو شمال .. ولذلك هى مساعدة لهم فى ضبط الاتجاه بالضبط » .

• وأسأل سعد الشاذلى : عاوز أعرف موقف الروس فى فترة ٦٧ ؟

• « موقف الروس فى فترة ٦٧ أنا لست مؤهلاً لأن أتكلم عنه الكثير .. صحيح أنا كنت ضابطاً برتبة لواء إنما القوات التى أودها (مجموعة الشاذلى) كان عددها حوالى ١٥٠٠ واحد .. يعنى من ضمن الـ ٨٥ ألف الموجودة فى سيناء .. فعلاقتنا بالروس فى ذلك الوقت لا أقدر أحكم عليها » .

• **ويقول مرتضى :** « لما كنا في « أبو صوير » وكان حصل اجتماع مع بتوع الطيران .. بتوع الطيران كانوا عاوزين انهم بيتدوا بالهجوم الأول .. بعد الحديث وبعد الاجتماع وبعد المجادلة .. عبد الناصر وقف وقال « مش حيحصل حاجة » .. بس هذا الشريط أول ما الحرب انتهت .. وأول ما مسكوا عبد الحكيم عامر .. وأول ما ابتدا بتوع الطيران يقولوا طيب ما فيه شريط .. راح بعث سامى شرف وراحوا جابوا الشريط » .

• **ده اللي هو مين ياقتند ؟**

• « ده عبد الناصر .. وقال له ده لو هذا الشريط سُمع نروح في داهية .. ده تسأل عليه مثلاً إسماعيل لبيب لأن هو اللي كان ماسك المخابرات بتاعة الطيران » .

• **ويقول شمس بدران :** « بعد ما خلصت الخطبة وخرجنا .. عبد الحكيم عامر أحس بالهجوم ده .. أخذ بعضه ورجع قال لهم ماتخافوش يا أولاد .. إحنا حناحارب .. وركبنا ومشين .. وإحنا في العربية بقى أنا بأقول له يا عبد الحكيم الكلمة اللي قالها الرئيس كلمة سيئة جداً وماكانش يجب أن تقال في مؤتمر زى ده .. دى خلت الناس تشعر بضيق .. دى كلمة غير موفقة وهبطت الروح المعنوية في القوات الجوية كلها .. مش بس في القاعدة .. وبعدين روحنا البيت .. أول ما روحت البيت لقيته بيطلبنى .. عبد الحكيم عامر .. وقال لى إنت عارف الكلام اللي إنت قلته لى في العربية ده لسه الرئيس طالبنى وقال لى إن هيكال كان معاه وقال له .. نفس الكلام ده .. فكلمه دلوقت علشان هو عاوز يسمع منك الكلمتين دول .. فكلمته قال لى إيه الانطباع اللي أنت أخذته .. قلت له إن مافيش حرب والناس روحها المعنوية هبطت .. فقال لى ده اللي قاله لى هيكال بالضبط .. بعد كده اللي حصل بقى اللي عرفناه بعدين .. إن عبد الناصر طلب سامى شرف وقال له التسجيل بتاع خطبة القاعدة الجوية فيه كام تسجيل ليها من الجهات اللي كانت موجودة وتسجل الخطبة .. فقال له الإذاعة والشئون المعنوية بتاعة القوات المسلحة (أربع جهات) .. فقال له ابعت هات الشرائط من الأربع جهات دول واعدمهم .. فسامى شرف بعث جاب الشرائط .. بيقول بقى لواحد صاحبه وهو فى السجن .. أنا لما بعث جبت الأربع شرائط أعدمت ٣ وخليت واحد .. قال له ليه بقى خليت واحد .. قال له علشان أمسكه عليه .. لو حصل أى حاجة أبقي ماسك عليه الشريط ده » .

• **وأسأل سامى شرف سكرتير الرئيس للمعلومات :** يقال إنه كان فيه تسجيل لقاء في قاعدة أبو صوير الجوية حصل فيه نقاش بين الطيارين وبين الرئيس .. وبعدين الشريط اختفى .. إيه مدى صحة هذا ؟

• « يعنى مافيش حاجة تهمنى أو تخصنى أنا شخصياً .. لأن أنا مش حأخسر حاجة أو حأسنفيد حاجة .. حأسنفيد إيه .. كل الأشرطة والتسجيلات اللي تمت للرئيس عبد الناصر وكل المؤسسات المصرية اللي اجتمع بها موجودة فى أرشيف سكرتارية الرئيس للمعلومات فى منشية البكرى » .

- قيل إن هذا التسجيل بالذات الرئيس طلب إنه يتشال ؟
- « محصلتشن معايا أنا .. أنا شخصياً ما أخذتشن الأمر ده .. مين اللي قال الكلام ده ؟! » .
- أحد القادة العسكريين ؟
- « يعرف منين .. ما هو أنا أقدر أقولك أنا إمبراح كنت قاعد مع الرئيس حسنى مبارك .. أقدر أقولها لك دلوقت ولا حد شافنا ولا أى حاجة .. مين القائد أو المسئول اللي قال الكلام ده ؟ أى واحد فينا يستطيع إنه يدعى إنه سمع أو قال .. لكن المهم الكلام مايطلعش على عواهنه .. فيه النهارده بعض الإخوة الزملاء السياسيين عاملين يكتبوا فى الجرائد أنا بيعت لجمال عبد الناصر جواب .. طلب مابعتشن .. دلوقتى وأنا قاعد أكتب جواب وأفول بعته لأنور السادات ولا بعته لحسنى مبارك .. أنا دلوقتى وأنا قاعد معاك ممكن ولا مش ممكن .. لكن الشئ المعتمد الرسمى هو الموجود فى أرشيف الدولة » .
- وأسأل شمس بدران : معنى كلامك إن المشير كان عاوز يحارب والرئيس ماكانش عاوز يحارب ؟
- « آه العملية ابتدت بإن إحنا حركنا القوات علشان نحارب ونخش » .
- طيب كيف نحارب وإحنا مش مستعدين بالطيران وبالدشم .. الخ ؟
- « مش مستعدين بالطيران إيه .. ما هو الطيران بتاعنا موجود وفيه عنده خطة لضرب الطيران الإسرائيلى .. زى ما هم خططوا بالضبط » .
- وفى اجتماع الرئيس مع القادة طلب منه الفريق أول صدقى محمود التصريح للقوات الجوية المصرية بأن تقوم هى نفسها بالضربة الأولى .. لكن عبد الناصر قبل فكرة تلقى الضربة الأولى من إسرائيل ..
- ويقول شمس بدران : « كان فى مؤتمر القيادة .. عبد الناصر قال خلاص إحنا الموقف السياسى دلوقت يستدعى الاستعداد وعدم المبادأة .. وقال للمجتمعين إن إحنا حتلقى الضربة الأولى .. فصدقى قام نط من الترابيزة وقال له : ماأقدرش ياسيادة الرئيس "I'll be crippled" قالها له بالإنجليزى .. قال له الضربة الأولى دى حتعجزنا .. فقال له طيب .. يعنى تحب تتضرب من أمريكا ؟! إذا إحنا عملنا الضربة الأولى .. أمريكا هى اللي حتضربنا .. تحب تحارب أمريكا .. ولا تحارب إسرائيل .. فقال له طيب خلاص يا سيادة الرئيس .. قال له حتخسر قد إيه لو إضربتم الضربة الأولى ؟ .. قال له أخسر ٢٠٪ على الأقل » .
- ويقول الفريق أول عبد المحسن مرتجى : « الرئيس عبد الناصر قال إننا مش حتضرب الضربة الأولى .. فصدقى محمود قال ياريس لو ماضربناش الضربة الأولى نحنسر خسائر كبيرة جداً .. وموقفنا حيقى شكل تانى .. قال : « ده قرار سياسى وأنا مش عاوز أحارب

الأمريكان » .. وأوقف الطيران .. إنت متوقع إيه لما يبدأ اليهود يقوموا بضربتهم وطيراننا كله مرمى على الأرض .. وماحصلش إن درجة الاستعداد ارتفعت فى القوات المسلحة فى ذلك اليوم .. وبعدين هو قال فى يوم ٥ يحصل هجوم .. للأسف الشديد إن ماطلعش من القيادة ما يقال لنا يا قوات استعدوا وارفعوا درجات الاستعداد .. ماحصلش حاجة زى كده ، .

• **ويقول الفريق المذكور أبو العز :** « حكاية الضربة الجوية الأولى هي خطة عسكرية معروفة من زمان .. يعنى فى دراسة كليات الحرب الجوية أول درس كنا بنأخذه فى الضربة الجوية الأولى .. يعنى معروفة مش غايبة عننا .. لايد إنك علشان تمنع هذه الضربة هي لايد لها مقومات كثيرة لازم يتعمل حسابها وإحنا أخذنا الضربة الأولى » .

• **ويضيف المذكور أبو العز :** « وبعدين هو كمان عبد الناصر غلط غلطة كبيرة جداً وهو إنه أعطى المبادرة للعدو .. قال أنا مش حاضرب الضربة الجوية الأولى .. ونحن لانحتمل الضربة الجوية الأولى .. أولاً الطائرات على الأرض مرصوفة زى البط .. طيب حنودى الطائرات فين .. نخبها تحت شجر المطار فى الصحراء .. حتوديه فين ؟ حتحتها فين ؟ ما هو لازم انتشار .. وبعدين ما فيش دفاع جوى .. دفاع جوى هزيل .. ما فيش دفاع جوى خالص .. ولا الحاجات دى كلها مش معروفة .. ما هي معروفة » .

• **ويقول أحمد أبو نار :** « فى الحقيقة كان فيه حوار أنا حضرته مش كعضو معاهم .. لكن كضابط اتصال .. كان فيه رأى إن المشير طلب إن إحنا نقوم بالهجوم الأول مبدئياً .. ولكن الرئيس جمال عبد الناصر لم يوافق على إننا نبدأ بالخطوة الأولى .. على اعتبار إن ده حيوقنا فى مشاكل مع أمريكا .. ويفضل إن إحنا نأخذ الضربة الأولى .. وبعدين نرد .. فكان الاجتماع ده على مستوى كبير .. فسأل الفريق طيار قائد القوات الجوية الفريق صدقى محمود .. قال له إيه رأيك يا صدقى .. ده الرئيس .. مش أحسن إن إحنا نأخذ الضربة ؟ .. قال والله يا فندم إحنا لو أخذنا الضربة الأولى تبقى ضربة « كريلينج » .. فقال له لا لأ أعتمد كده .. وغضب عبد الناصر ومشى .. تانى يوم لقيت المشير بيكلمه ويقول له أنت غضبان وماتعشش فى القيادة .. تعالى علشان إحنا قررنا نأخذ الضربة الأولى » .

• **بينما يقول عبد المجيد فريد :** « صدقى محمود قال الضربة الأولى حتبقى صعبة علينا قوى .. بس ما إدأش تصور إنه يحصل تدمير كامل للقوات الجوية وإلا كان عبد الناصر مادخلش معركة » .

• **وكان قد عيّن الفريق صلاح محسن قائداً للجيش .. إلى جانب الفريق عبد المحسن مرتجى قائد الجبهة .. وكان الفريق أول محمد فوزى هو رئيس أركان حرب القوات المسلحة ..**

• **وأسأل الفريق أول عبد المحسن مرتجى :** حضرتك كنت قائد الجبهة فى ٦٧ فمن كان يدير العمليات فى الجبهة ؟

• **« قائد الجيش اللي هو الفريق صلاح محسن .. أنا ما أدركش العمليات خالص » .**

- تعليماتك للمنطقة العسكرية الشرقية كانت إيه ؟
- « لا تعليمات » .
- يعنى إيه .. ما أعطتش تعليمات ولا مآكناش فيه تعليمات ؟
- « هو أنا لم أشترك فى وضع الخطة .. مآكناش لى دور فى وضع الخطة إطلاقاً .. الللى هى خطة الدفاع دى .. ولم أشترك فى تمزيق الخطة فهى مزقت فى أثناء حشد القوات .. وأنا كل المهمة بتاعتنى إن أنا أتواجد فى مركز القيادة الللى هى الجبهة .. وأنا مآكناش معايا المواصلات الكافية الللى تخلينى أتصل بالقوات كلها .. مآكناش معايا الفريق الكافى علشان أقدر أدير بمركز القيادة الحاجات دى كلها .. كان المفروض حتجيلى مع عبد الحكيم عامر بالفريق والأركان حرب كلهم .. بالمواصلات كلها قبل العمليات بـ ٤٨ ساعة .. ومآكناش فيه فكرة إن حيحصل عمليات قبل ٤٨ ساعة .. وفى هذه الحالة كان المفروض عبد الحكيم عامر يدير المعركة عن طريق صلاح محسن الللى هو قائد الجيش بوجودى أنا معاه بمركز القيادة .. نقدر نقول مركز قيادة متقدم .. بتاع عبد الحكيم طبعاً .. عبد الحكيم ماجاش .. اليوم الللى كان جأى فيه حصل الهجوم الللى هو يوم ٥ والمهمة بتاعتنى كانت إيه .. إن أنا طول ما عبد الحكيم عامر ماهواش موجود أنا بأدى المشورة ولما أشوف حاجة بأبلغ مصر .. مش بأبلغ قائد الجيش ببلغ مصر والأوامر تصدر عن طريق مصر إلى قائد الجيش .. يبقى أنا المهمة بتاعتنى هنا هو حلقة وصل أو استشارة لا غير .. إلى أن يأتى عبد الحكيم عامر ويتخذ القيادة من مركز القيادة المتقدم » .
- منصب قائد الجبهة يافندم مش كان مبنياً على أساس إن حضرتك كنت قائد القوات البرية ؟
- « أنا كنت فى ذلك الوقت قائد اليمن .. قائد القوات البرية .. مش مفروض أبدأ إنه يتخذ قيادة ميدانية .. هو ممكن يتخذ قيادة ميدانية لمسرح ثانوى إنما هم رأوا إن أنا أتواجد إلى أن ييجى عبد الحكيم عامر .. كلمة قيادة الجبهة دى كلمة خاطئة .. هو ده المفروض مركز القيادة المتقدم بتاع عبد الحكيم عامر .. إنما هم حطوا كلمة الجبهة دى على أساس نبقى منظرنا زى منظر الجيوش الكبيرة » .
- عملية الحشود دى كانت مش مسئوليتك يافندم ؟
- « لا إطلاقاً .. أنا لم أتدخل فى حاجة أبداً .. إطلاقاً » .
- ودور الفريق فوزى فى هذا الوقت ؟
- « دور الفريق فوزى هو رئيس أركان حرب القوات المسلحة فى ذلك الوقت .. هو الللى بيلخص كل التعليمات .. والعمليات .. ويعرضها على عبد الحكيم عامر الللى هو القائد العام .. يعنى هو أساس عمله العمليات الحربية علشان كده معاه أجهزة هيئة العمليات والأجهزة دى كلها علشان هو وهم بيتخذوا القرارات .. أو على الأقل بيوضعوا عبد الحكيم عامر فى الصورة بالنسبة للموقف العام .. سواء موقف الجانب الآخر أو موقف القوات بتاعتنا » .

• **ومدى مسؤوليته ؟**

• « محمد فوزى أنا بأعتبره المسئول رقم واحد عن الحرب .. ويليهِ قائد الجيش » .

• **ويقول أمين هويدى :** « فوزى رجل عسكري قديم وصل إلى أعلى الرتب فى القوات المسلحة .. وكما قلت هو أمضى أغلب تاريخه فى الكلية الحربية ثم تولى رئاسة الأركان وكان رئيساً لأركان القوات المسلحة وكان وقتاً خطيراً جداً وقت النكسة » .

• **إذن هو أحد المسئولين ؟**

• « طبعاً .. وأنا قلت قبل كده .. أنا شاهد وقلت إن كل القادة العسكريين مسئولين عن نكسة ٦٧ .. طبعاً الفريق فوزى كان رئيس الأركان .. ده وجه .. المخابرات العامة فى تلك الأيام .. وهى جهات لم تخدم تماماً الغرض الذى كانت تقوم من أجله .. ولذلك المعلومات عن عدوان ٦٧ لم تكن على المستوى اللائق .. بس عاوز أقول حاجة .. حتى لو إديت معلومات فى ظل القيادة العسكرية التى كانت قائمة مش حتعمل حاجة .. لو إديت القيادة العسكرية الللى كانت قائمة أضعاف القوات الللى كانت موجودة ماكانتش حتعمل .. كان مصيرها حيكون نفس هذا المصير .. لأن الهزيمة لم تكن أبداً نقص معلومات ولم تكن نقص قوات .. كانت عدم كفاءة قيادة وعدم تفرغ القيادات لتدريب قواتها » .

• **ويضيف الفريق أول مرتجى :** « محمد فوزى عمره ما تولى قيادة ميدانية .. ولم يكن يفهم فى إدارة المعركة ولا فى إدارة الحرب ولا الفن العسكري .. إنما أنا بأعتبر إن هو ضمن الناس الللى يسألوا عن الذى حصل فى الحرب » .

• **وفى يوم ٥ يونيه سافر المشير عامر جواً لزيارة الجبهة .. وفى نفس هذا التوقيت بدأت المعركة ..**

• **ويقول أحمد أبو نار :** « تطورت الأحداث وفوجئت بالمشير قال لى أنا رايح مطار « بير تماده » فصبقت المشير بيوم ومعاي فريق الحراسة والشئون الإدارية ورحنا المطار .. إديت تمام هناك للفريق عبد المحسن مرتجى وكان مفروض المشير حيوصل بالطيارة فى مطار « بير تماده » .. يوم ٥ يونيه فوجئنا بطائرات إسرائيلية ضربت مطار « بير تماده » فرقنا على الأرض وكان بجوارى الفريق عبد المحسن مرتجى .. وبعد ماقلت لى إسرائيل بدأت الحرب ودمرت طيارانا فى مواقعها .. كان فيه كذا طيارة ميج وطائرات هليكوبتر .. وبدأت المعركة فعلاً فأمرنى الفريق عبد المحسن مرتجى أن أرجع تانى بناء على تعليمات المشير وأروح مبنى القيادة هناك » .

• **وأسأل برلنتى عبد الحميد : إيه الللى طلعه الطيارة ؟**

• « طلع الطيارة بأوامر من عبد الناصر .. قال له روح هدىء الناس الللى واقفين هناك ومستنيين الضربة .. ولفانين .. الجيش قلقان .. وقاعدنين هناك على الحدود ومستنيين الضربة .. والحرب كانت مفاجأة .. فقال له روح يا حكيم .. كان مسميه حكيم .. روح يا حكيم هديهم

شوية .. فإنن لا يمكن كان عبد الحكيم عامر عارف أن فيه حرب فى الوقت ده .. يعنى اللي يقول إنه كان فيه حرب وإنه متوقعاً حرب .. لا يمكن .. طيب حبيعتة إزاي جمال عبد الناصر إذا كان فيه حرب .. وعبد الحكيم حيأمن على نفسه إزاي إنه يطلع فى طائرة فى يوم فيه حرب .. ده كلام عجيب جداً .

• **ويقول الفريق أول محمد فوزى :** « العملية دى تمت صباح يوم ٥ يونيه فى الوقت اللي كان فيه المشير عبد الحكيم عامر قائم بطائرته ومعه نخبة من القادة إلى سيناء .. لتنظيم عملية أوضاع الطيران وأوضاع القوات المسلحة هناك .. اختار هذا التوقيت للأسف الشديد بعد أن أخذ إنذاراً من الرئيس عبد الناصر بأن هذا التوقيت هو المحتمل إتمام الضربة الجوية فيه .. وبرغم ذلك هو لم يدرك هذا الإنذار الإدراك الكافى .. ولم يعطى هذا الإنذار أو يوزعه على القوات المسلحة المصرية فى ذلك الوقت .. ومن هنا جاءت المفاجأة .. الأمر المحزن أكثر أن هناك أوامر إذا كانت طائرة المشير أو طائرة أحد من الكبار طائرة فى الجو المحورى الذى تطير فيه هذه الطائرة يبطل استخدام النيران ضد أى طائرة فى الجو .. طبعاً للأمان .. فالليس جاء هنا إن سوء الحظ تجد هنا إن الضربة جاءت فى هذا التوقيت بالذات .. المشير بالطائرة فى الجو .. المدفعية المضادة للطائرات والصواريخ اللي هى مفروض إنها تقاوم هذه الضربة عندها أوامر بالسكون .. ولو إن هذا الأمر أنا شخصياً معترض على إتعامه لأن الأوامر المستدعية لرجال الدفاع الجوى .. إذا اعتدى عليك فعليك أن تصد العدوان بصرف النظر عن أى حاجة ثانية .. الكلمة دى لم تطبق .. يعنى معناها تأثير المشير عبد الحكيم عامر وسلطته ونفوذه كانت أقوى من الأوامر المستدعية اللي موجودة عند كل الجنود . »

• **وأسأل شمس بدران :** كنت مع المشير عامر فى الطائرة يوم ٥ يونيه لما أمرتم المدافع بأنها ماتطلقش صواريخها حفاظاً على روحه والآخرين اللي كانوا معكم ؟

• « مش مضبوطة .. لا تأثير لها فى الموضوع .. أنا ماأقدرش أقول التفاصيل دلوقت .. لكن دى واقعة بالتأكيد ليس لها تأثير .. إنت عاوز تقول إن ده اللي خلى الطيران الاسرائيلى ييجى يضرب الطائرات .. لأ .. لأ .. مالهش تأثير خالص .. معقولة طيارات اليهود تيجى وتبتدى تضرب وحيفضلوا سايبنتها تضربهم علشان قالوا لهم ده المشير جاى !؟ . »

• **وأسأل حسين الشافعى :** كنت أحد الشهود على حرب ٦٧ من الطائرة .. ويمكن واحد من اثنين أو ثلاثة كانوا مع المشير عامر يومها .. ما تعليقك وقد مضت سنوات على نكسة ٦٧ ؟

• « أنا فى مذكراتى بأقول « سأقص عليكم قصة شاهد أراد الله له أن يكون شاهداً واختار له موقعاً متميزاً ليرصد منه الأحداث التى لم يرها أحد .. » وقلت بالنسبة لحرب ٦٧ فى سنة ٧٢ فى جامعة أسبوط إن حرب ٦٧ كانت خيانة وكانت مؤامرة انفتحت فيها الأطراف واستدرج فيها من استدرج .. وجاز الأمر على السذج لكى يعيش النكسة .. وطبعاً لا أقول هذا الكلام إلا مما شهدته فى مطار فايد . »

• ويقول أحمد حمروش إن حسن إبراهيم علق قائلاً : « إهمال آه .. خيانة لأ » .

• هاجمت إسرائيل سماء مصر بطائرات قديمة (الميستير) .. وطائرات حديثة (الميراج) .. وما بين الساعة الثامنة والحادية عشرة والنصف من صباح هذا اليوم المشنوم .. يوم الإثنين .. دمرت موجات الغارات قواتنا الجوية .. وأعلننا أننا أسقطنا ١٤٢ طائرة على جبهاتنا بينما الواقع كان أقل من هذا بكثير جداً ...

• ويقول المهندس جمال أنور السادات : « أنكر جيداً سنة ٦٧ .. يوم ٥ يونيه .. دى حاجة أنكرها زى ما تكون إمبراح .. والذى كان موجوداً فى البيت الصبح وأنا دخلت حجرته وقعدت جنبه على السرير .. وبعدين التليفون رن .. بيتكلم فى التليفون .. فأنا عرفت إنه بيكلم عبد الناصر .. بيقول له معقولة طيب خليه يأخذوا العلكة بقى » .

• وتقول هدى عبد الناصر : « يوم ٥ يونيو كنت متزوجة وكنت فى بيتى بعيدة عن منشية البكرى .. وكنا قلقانين » .

• سمعتى مثلنا الأخبار والبيانات العسكرية التى كانت تعلن انتصارنا أم كنت تعرفين الحقيقة ؟

• « لأ لم أكن أعرف الحقيقة .. وكان الجو العام كله قلق وترقب » .

• وهل كنت تنتظرين الحرب أم كانت مفاجأة ؟

• « بعد إعلان حكومة الائتلاف القومى فى إسرائيل قال والذى إن الضرب سيكون يوم ٥ يونيو » .

• وتقول جيهان السادات : « حتى أنا كنت فاكدة أولادى كانوا فى مدرسة « بورسعيد » .. وكنا ساكنين فى الهرم ساعتها .. أول ما سمعت الضرب كان هو لسه فى السرير .. وكان الصبح وبيقرا الجرنال .. أنا رحمت وقلت إيه اللى بيحصل .. قال لى سوف يأخذوا الدرس .. على إسرائيل .. إنها سوف تأخذ درساً .. أنا لمبت بسرعة ورحمت أجيب أولادى من المدرسة علشان مش عارفة إيه اللى يجيرى وهم أطفال صغيرين .. وكانت السكة زحمة بدرجة وأنا كنت سابقة ولم أستنى السواق .. وجريت ورحمت المدرسة فعلاً وأخذت أولادى وكان فيه الكثير من أولياء الأمور بيأخذوا أولادهم لأن كان فيه صوت انفجارات » .

• ويقول عبد اللطيف بغدادى : « يوم ٥ يونيه سمعت الضرب .. اتصلت بكمال حسين جالى هنا وقعدنا .. زى ما حاربناهم حاربونا .. وإحنا مواطنين وملناش دعوة بجمال عبد الناصر .. الموضوع موضوع عبد الحكيم دلوقتى .. فكمال قال لى إحنا بعتنا له .. إن إحنا أى واجب تختاروه لنا .. ماحدث سأل فىن كرامتنا .. قلت له إنسى كرامتنا فى سبيل بلادنا .. حتى اتصلنا بعبد الحكيم من هنا .. قلت له إن كمال عندى ويهمنا نكون جنبكم .. وكان مركزه القيادة اللى جنبنا دى فى مدينة نصر .. قال تشرفونا .. رحنا له .. وأنا كنت متتبعاً الإذاعات .. إسرائيل .. ولندن » .

- ويقول عبد المجيد فريد : « المعركة كانت معركة جوية وهدفها تدمير كافة الطائرات الموجودة لدى الجمهورية العربية المتحدة في عدد من الساعات .. وبعد كده ابتدأت المعارك تنزل مستواها بدون طيارات والسماء مكشوفة .. هل يعني وجود اللواتين اللي كانا في اليمن لو تواجدا في سيناء كان حيوثر على ضرب الطيارات .. لن يؤثر » .
- ويقول كمال الدين حسين : « ده كان كذباً مكشوفاً .. يعني ٦٧ كانت مصيبة كبرى .. أما في ٥٦ فالجيش كيانه على بعضه فضل سليم .. سلاح الطيران اتكسر .. لكن الطيارين سُلّام .. وقدرنا نكمل الجيش بعد كده » .
- وأسأل محمد فائق : هل كان الإعلام موجهاً بعلم حضرتك ولا كان فيه توجيه ما ضروري والباقي كان وليد اللحظة ؟
- « أنا أؤمن جداً أن التوجيه زيادة عن اللزوم ينهى الإبداع .. وهذا كان بيهمنا جداً .. كان فيه عمالة وقتها .. كان صلاح زكى .. سعد لبيب .. جلال معوض .. طاهر أبو زيد .. فاروق .. المهم كانت شخصيات مهمة جداً وقادرة وفاهمة كويس قوى .. وبالتالي كان بيطلق لها حريات كبيرة جداً .. وأحمد سعيد كان من الشخصيات المتميزة جداً وكان في صوت العرب » .
- وأسأل د . عبد القادر حاتم : أحمد سعيد معذور ولا مشارك في المسؤولية .. ولا إيه رأيك ؟
- « الحقيقة أحمد سعيد رجل وطنى وأدى دوراً من أحسن الأدوار » .
- والبيانات التي أُذيعت ؟
- « ماذا فعل إذا لم تكن هناك قيادة عسكرية تدليك معلومات وأرادوا هم يحسنوا الصورة .. فطلعت غلط .. حتى أنا كلمتهم في نفس اليوم .. وكنت أنا بره ماكتنش أنا المسئول عن الإعلام في ذلك الوقت .. قلت لهم إيه الكلام ده .. وقعدوا ٧٥ طيارة و ٨٠ طيارة والكلام ده .. قالوا ماحدش بيدينا معلومات .. وأصبحت العملية كل واحد بيجتهد في اتجاه معين .. فالحقيقة لا ذنب لهم وأنا أبرئهم من كل رأى أو اتهام » .
- وأسأل أحمد سعيد : نقدر نقول إنك كنت تنفذ حرفياً تعليمات القيادة .. أو نقدر نقول « عبد المأمور » ؟
- « لأ .. أنا لو عبد المأمور .. في هذه الحالة حتبقى تلاقى نفسك بتنفذ أحياناً بغاء .. لأنك حتلتزم .. لكن لما تكون الرؤية عندك واضحة والقيادة نفسها مديالك حرية الحركة في حدود الخط العريض .. فيقدر تتحرك بدلالة » .
- وأسأل الفريق أول مرتجى : البيانات العسكرية غير الحقيقية كانت بناءً على تقاريركم ؟
- « لأ [إطلاقاً] .. أنا كنت موجوداً في مركز القيادة المتقدم أو الجبهة .. ولا أعلم إيه اللي بيحصل من دعايات ومن إشاعات » .

- حضرتك ماكنتش بتسمع راديو ؟
- « أنا ماكنتش » فاضى .. أنا كنت عمال أمر علشان أشوف شكل القوات الموجودة هناك إيه .. طول الوقت .. وحتى لو سمعت .. ماهو أنا مش أنا اللي بأخرج أو بطلع الحاجات دى » .
- ويقول عبد اللطيف بغدادى : « كانت مصر بتقول وقعنا كذا طائرة .. فتبين لى إننا خسرنا أغلب طائراتنا » .
- وأسأل الفريق أول مرتجى : إذن من كان المسئول عن إصدار البيانات العسكرية ؟
- « القيادة العامة طبعاً .. القيادة العامة فى مصر هى بتقولك وقعنا كذا طائرة .. لكن الطائرة بعد ما تخلص البنزين بتاعها بترمى المستودع بتاعها عملوها دى طائرة وقعت .. وآثارها مستودع بنزين أو خزان بنزين » .
- مين فى القيادة يافندم ؟
- « ما أعرفش الحاجات دى كلها بتبقى تابعة للعمليات لأن العمليات هى اللي بتصدر التعليمات اللي بتصدر فى الصحف » .
- ومين اللي كان مسئولاً عنها يا فندم ؟
- « كان الفريق أنور القاضى » .
- ويقول شمس بدران : « لأ .. الإعلام اللي حصل أثناء الحرب كان فيه مبالغات كثيرة وتوجيه من جهات أخرى .. مالناش دعوة إحنا بها » .
- ويقول عبد اللطيف بغدادى : « جاءت الساعة ١٢ فرحنا لعبد الناصر وورّانا الصور قوالتنا فين ومتمركزة فين .. قعدنا معاه للساعة ٣ .. قلنا له طيب هم دلوقتى طياراتهم بتضرب طياراتنا على الأرض .. وفى ٥٦ حصلت نفس العملية اتكررت تانى الأخطاء دى .. وفى ٥٦ الى كان قائد الطيران برضه سنة ٦٧ .. كان لازم تمشى القيادات اللي فشلوا فى ٥٦ كان لازم تمشى .. عبد الحكيم عامر كان تمسك بهم وقال لو هم أخطأوا يبقى أنا أخطأت .. وهم لو يمشوا يعنى أنا أمشى » .
- وأسأل محمد أحمد : الراديو والإذاعات والصحف كانت بتقول الواقع ؟
- « لأ .. لأن كان فيه ناس من الإعلام تقول هذا الكلام .. وده مش صحيح إطلاقاً » .
- وأسأل أحمد سعيد : هل لما اكتشفت الحقيقة تراجعت فى تصريحاتك وحاولت أن توضح للناس الحقيقة .. وتعتذر .. ولا اضطررت اضطراباً أنك تكمل ؟
- « أولاً مايفش حاجة اسمها نعتذر وحاجة إننى أضطر .. أنا رجل فى موقع .. شأنى شأن أى جندى فى الموقع حتى لو كتيبته كلها بتنسحب .. وقائده ماقالوش اتسحب .. هو لا يجب إنه

ينسحب واخذ بالك .. لو قائده قال له حافظ على الموقع ده .. فلازم يحافظ على الموقع ده .. المسألة مش مسألة مزاجية .. بحيث أننى أزعل أقوم أقول أو أخذ خط .. غير الهيكل العام .. ثم أنا لا أعلم ماذا يحدث فى الجبهة .. ما هو جازير العدو بياناته اللي كذب وبياناتنا اللي صح .. ده إحنا قاعدين داخل استوديوهات داخل غرفة مغلقة .. حنعرف مين .. كل علاقتى بالقيادة هو تليفون .. بيان رقم كذا .. ذيعوا .. بيان رقم كذا .. إنت مهمتك إيه فى هذا الامتحان طبعاً بتتصل بالقيادة وتتصل أيضاً بجهاز التوجيه السياسى بتاعك اللي هو الرئاسة .. الارتباك كان من البشاعة بحيث إنك تبص تلاقى نفسك وحدك .. فيبقى أمامك إيه .. فيه معارك شغالة .. جيشك وقيادة جيشك اللي ببيلغك لم يقل لك إننا سلمنا .. لم يقل لك إننا أوقفنا القتال .. حتى وأنت بتضرب .. القتال يستمر » .

• حتى المعلومات دى لم تكن بتوصلك ؟

• « لا .. فوضع طبيعى أنى أحافظ على شىء معين .. وهو أن المقاومة والقتال يستمر إلى أن تستبين الحقيقة .. على حوالى الساعة ١١ بالليل نجحنا فى أن نعمل اتصالاً بسيادة الرئيس .. فأخضرت من قبل سامى شرف .. وهو سكرتير المعلومات .. بأن المقاومة مستمرة وإحنا لم نطلب إيقاف إطلاق النار .. كان بدأت إشاعات فى العالم بتيجى على « التيكروز » وتيجى فى الاستماع .. ثانى يوم الاتحاد السوفيتى عرض إيقاف النار .. إحنا رفضنا .. إذن معنى هذا جيشك بيقاوم .. إذن أنت مستمر .. وخاصة إنه طلب منا دعوة الأردن وسوريا إلى دخول المعركة .. ماكانوش دخلوا لسه .. كنا إحنا لسه اللي بنحارب العدوان الإسرائيلى .. بعد هذا .. فى هذه الليلة بالذات اللي هى ليلة الثلاثاء بقى .. فوجئنا إن فيه نوع من أنواع التعمية .. بدأت على الأخبار بتاعة إسرائيل نفسها .. يعنى إسرائيل نفسها بدأت بياناتها الحربية ببيان فيها نوع من أنواع الغموض بعد ما كان ضاربين لفوق قوى .. فهذا أعطانا وإحنا داخل غرفتنا المغلقة واستوديوهاتنا المغلقة .. نوع من أنواع الاطمئنان .. خاصة إن قيادتنا السياسية رفضت وقف إطلاق النار .. قرار كان حيطلع من مجلس الأمن وكان بشروط جيدة .. ثانى يوم أبلغنا من قبل القيادة إننا نفتح جرة أكثر لسوريا والأردن .. إذن الخط أيضاً كان تصعيدياً .. رغم الآلام اللي جوانا من البيانات المعادية » .

• **ويقول شمس بدران :** « الفريق صدقى محمود حاول يأخذ اعتماداً لإقامة دشم .. طبعاً علشان نتلافى ضربها على الأرض ثانى .. الدولة ماكانش فيها فلوس أو ماكانش أحدأ مهمتاً بهذا .. فما أخذش الاعتماد .. كان بيطلب الاعتماد ده كل سنة .. ده على حسب كلامه ماكانش بياخذ اعتماد لدشم الطيارات .. أنا لو فى مكانه ومسئول عن القوات الجوية لازم أعمل دشماً للطائرات .. وماحدث ببينى فلوس للدشم أقول لهم سلام عليكم فوراً .. آه أستقيل .. هو ما استقالش فيه خطأ منه .. لأن هو كان لازم يستقيل علشان خاطر يجبر الحكومة على إنها تبدله اعتماداً للدشم أو تدى اللي بعده اعتماداً لدشم الطائرات .. ماإدولوش اعتماداً .. لغاية سنة ٦٧ .. لما اتعينت وزيراً للحربية سنة ٦٦ بعد اعتماد الميزانية .. أصبح أهم اختصاص لى الشؤون المالية .. ميزانية القوات المسلحة .. أى وزير فى الدولة مسئول عن الميزانية بتاعة

الوزارة .. فده اختصاص جديد بالنسبة لى .. ماكانش عندى قبل كده .. فاتعملت ميزانية للقوات المسلحة فى مارس .. بتتعمل دائماً فى مارس وبتتصدق فى أبريل .. وراح رئيس أركان القوات المسلحة اللى هو الفريق محمد فوزى بيلف على قادة القوات المسلحة .. بيروح القوات الجوية يقعد معاها يومين ثلاثة يشوف الميزانية بتاعتها .. ويعدين يروح القوات البحرية يقعد معاها يشوف الميزانية بتاعتها .. ويروح القوات البرية يشوف الميزانية .. وهكذا .. بيشف مطالبهم إيه لأن فى هذا العام كانت ميزانية القوات المسلحة وميزانية الدولة عموماً متوقفة على الرقم بتاع السنة اللى قبلها .. يعنى إحنا كان مخصصاً لنا فى الميزانية كذا مليون فى السنة اللى قبلها سنة ٦٦ .. سنة ٦٧ أخذنا نفس المبلغ رغم إن إحنا عندنا إنشاءات جديدة تتطلب إن المبلغ يكون أكبر .. فنتيجة كده جينا لبند الإنشاءات الجديدة اللى هو البند الرابع فى الميزانية .. وشطبناه لأن مالوش فلوس » .

• مين اللى شطبه يافندم ؟

• « فوزى .. محمد فوزى اللى هو رئيس أركان حرب اللى هو بينسق الميزانية ويقول إيه اللى يتعمل وإيه اللى ما يتعملش .. وعلى قد الفلوس الموجودة .. وأنا بأخيل إن جايز اليهود يكون وصلهم إن لأول مرة الميزانية يتحط فيها فلوس علشان إنشاء دشمة للطائرات .. فجعلوا بالعملية دى قبل ما الدشم تتعمل » .

• وأسأل الفريق مدكور أبو العز : السؤال اللى يفرض نفسه .. هل أخذنا درساً من سنة ٥٦ حتى لا يتكرر ؟

• « للأسف لأ .. الطائفة إذا تركت فى العراء وعلى الأرض لاتساوى شيئاً .. إنما إذا طارت بقت سلاحاً رهيباً .. فيجب أن أحميها .. أحميها ببناء دشمة وعدد من المطارات كبير .. بحيث يصعب على العدو إنه يضربها كلها مرة واحدة .. ممكن قوى مطار بينضرب وممكن قوى المطار الثانى يدافع أو يروح يضرب فى إسرائيل .. وقتت الاعتمادات المالية ضد القوات الجوية بطريقة غير مسئولة .. يعنى ناس مسئولين ماكانوش بيقدروا أبداً وما يعرفوش قيمة القوات الجوية .. لكن للأسف الشديد ماأخذناش الدرس .. وأنا لى تجربة كبيرة جداً مع القيادة العامة للقوات المسلحة فى نظر الميزانيات وأصريرت على إن لازم (.. الكلام ده قبل ٦٧ كان سنة ٦٢ أو ٦٣ المرة الأولى) .. أنا كنت أول واحد يناقش هذه العملية مع القوات المسلحة .. ولكن للأسف الشديد ماكانوش يعطوا أهمية كبيرة للطيران .. فالطيران بمجرد أن هو ينضرب وهو على الأرض .. تبقى الحرب انتهت على طول » .

• وأسأل الفريق أول عبد المحسن مرتجى : والطيران الذى دُمر بعد ساعات قليلة .. من المسئول عن ذلك ؟

• « أنا بأعتبر إن الرئيس عبد الناصر مسئول مسئولية كبيرة جداً .. مسئول فى هذا الموضوع تماماً ليه .. أولاً إحنا ماكانش عندنا فى هذا الوقت مطارات كفاية .. إحنا اتعلمنا فى روسيا

إن بين المطار والمطار ٢٥ ك .. إحنا عندنا ٤ مطارات .. اثنين فى سيناء وواحد فى الأقصر وواحد فى قلب القاهرة .. كلها مطارات لا تكفى الطائرات اللى عندنا .. وما فيش ملاجئء عشان الطائرات تدخل فيها .. وما فيش دفاع جوى كويس .. الرادارات اللى كانت تكتشف الطائرات كانت أى طائرة تنزل عن ٥٠٠ متر ماتقدرش تكشفها .. إسرائيل كانت بتعرف كل نقط الضعف اللى عندنا .. لذلك هم لما جم تحت ٥٠٠ متر وعارفين فين المطارات بتاعتنا وتديروا إزاي يهاجمونا ويضربونا .. ده علاوة على إن إسرائيل عملت مفاجأة لنا .. وهم قدروا يطوروا الطائرة بحيث عملوا مستودع بترول فى الأجنحة وأصبحت تصل لجميع المطارات الموجودة فى الجمهورية العربية بالبنزين اللى فيها .. علاوة على ده .. عملوا قنبلة العمر بحيث أن أجهزة الإصلاح الموجودة ماكانتش تقدر تصلح الممرات المضروبة بالسرعة المطلوبة .. إذن إحنا من ناحية الطيران كنا أضعف وناحية الدفاع الجوى فى حالة ضعيفة .. وكان فيه طيار عراقى خائن أخذ الطائرة الميج ٢١ ونزل عندهم هناك .. إذن كانوا عارفين كل خصائص ونقط ضعف ونقط القوة فى الطائرة الميج .. إذن هم عارفين يعنى كل حاجة عن الطيران » .

• حضرتك إذن بتعالى الفريق صدقى محمود من المسئولية ؟

• « أنا باعنى صدقى محمود من المسئولية من وجهة نظرى آه .. لأنه ماكانش يقدر يعمل أكثر من كده مع الظروف اللى كانت موجودة فى ذلك الوقت .. الرئيس قال ماليش دعوة شوقوا إنتم اصعلوا اللى إنتم تعملوه .. طيب حنعمل إيه .. إنما الجماعة الروس جبوا إنهم بيبنوا إن الطيران بتاعهم كويس عملوا الفيركة بتاعة صدقى محمود .. واتحاكم صدقى محمود » .

• **ويقول الفريق أول محمد فوزى :** « على الساعة ١٢ الظهر كانت القوات الجوية المصرية خاسرة ٨٠ ٪ من قواتها .. الأمر الذى جعل المشير عبد الحكيم عامر يهتز ويعتقد إن القوة الضاربة اللى كانت فى يده راحت » .

• **ويقول أحمد سعيد :** « إلى أن كانت الساعة ١٢ إلا خمسة .. عندما أيقنا أن جميع البيانات الحربية التى تعطى لنا من القيادة العسكرية .. مخالفة تماما لما يحدث فى ميدان المعركة » .

• **وتقول جيهات السادات :** « والله من الحاجات اللى الواحد لا ينساها حقيقى .. رجع أنور السادات الحزن اللى باين على وشه .. حزن مصحوب بذل تقدر تقول يعنى بالأصح .. لأننا انهزمنا من أول لحظة .. لأن هو لما راح مجلس قيادة الثورة عرف طبعاً إن إحنا انهزمنا .. أنا كان معيار راديو صغير وضعاه فى جيبي كده .. كنت برضه بأشتغل فى المستشفيات مع الجرحى .. كان أيامها أحمد سعيد بتاع صوت العرب بيقول « ولقد ضربنا مش عارف كام طائرة إسرائيلية ونزلنا كام طائرة » .. وكان حماسه شديداً .. وأنا عارفة الحقيقة ومش قادرة أفتح فمى .. كنت ممزقة ما بين ما أسمع .. إزاي ده .. وبين اللى حاصل فعلاً اللى قاله بعد كده » .

• **ويقول الفريق أول عبد المحسن مرتجى :** « لآكان المفروض أولاً إحنا كان عندنا خطة بايطة لا مؤاخذة .. يعنى الخطة الدفاعية غير سليمة .. بسبب تدخل رئيس الجمهورية فى بعض

الحتت .. وبسبب تدخل عبد المنعم رياض .. إنه هو تصور إن اليهود ممكن ييجوا من بعض الوديان الجنوبية .. ويلفوا حول قواتنا .. وده اللي خلى عبد الحكيم عامر يغير في الحطة .. اتغيرت خالص الحطة .. بقينا عاملين زى خيال المانة بالضبط .. مافيش تدريب على واجب العمليات .. ومناطق في الجنوب كنا بنبتع لها المياه بالطيران .

● وبعد أن دمر الإسرائيليون سلاح الطيران المصري .. وطلبت الأردن وقف إطلاق النار اضطر عبد الناصر إلى وقف إطلاق النار

* ويقول سيد مرعى : « تحولت الشوارع التي كانت تفيض بالأمس حماساً وهتافاً .. إلى شوارع أشبه بالمقابر .. تزدحم بعلامات الاستفهام التي لا تجد أحداً يشفى غليل الناس ويعتيم بلجاباتها » .

● وتقرر الانسحاب ... وكان هذا القرار مسئولية القيادتين السياسية والعسكرية ..

* وأسأل محمد أحمد : الرئيس عبد الناصر في ٦٧ .. هل اشتد المرض عليه ؟

* « هو خلاه نعى الهم أكثر .. الله يرحمه وإحنا نازلين رايحين القيادة .. كنا بايتين في المكتب .. واتصل الفريق صادق وطلب منى أن أبلغه .. قلت له لأ قول له أنت لأحسن تكون المعلومات مش واثق منها .. قولها له أنت بلسانك .. لما عرف .. ليس ونزل على طول قال إحنا خسرنا الحرب .. أول يوم الساعة ٨,٣٠ صباحاً وإحنا نازلين جرى .. قال إحنا خسرنا الحرب .. خدعوني » .

* ويقول محمود فهم : « طبعاً كان متأثراً جداً .. لكن ماكانش باين عليه حاجة .. ماكانش يعطينى الفرصة أتكلم معاه في وقتها » .

* وأسأل شمس يدران : قرار الانسحاب اللي صدر .. كان صدر من المشير ولا من الرئيس عبد الناصر ؟

* « بعد ما حصل الهجوم على العريش وحصلت معركة مدرعات بعد كده .. عبد الحكيم طلب عبد الناصر في التليفون وأنا كنت موجوداً .. وكان موجوداً أغلب أعضاء مجلس الثورة .. وقادة الجيش ورئيس الأركان كان موجوداً .. وحتى على عامر كان موجوداً اللي هو كان رئيس القيادة المشتركة أو القيادة الموحدة .. وقال له تشوف إيه .. قال له ننسحب طبعاً .. وأنت يا محمد فوزي رأيك إيه قال الانسحاب .. بغدادى رأيك إيه .. سأل الناس اللي موجودة كلها .. فقال لعبد الناصر كلهم بيقولوا الانسحاب .. قال له "O.K" قال له ننسحب .. بعد ما انتهى الموقف ده حصل موقف ثانى .. وعبد الحكيم عامر طالب عبد الناصر .. ده كان لوحده أنا وهو يس في الأوضة .. وبصيت لقيت عبد الحكيم عامر نازل عياط .. وبيقول له حاجيب لك ولادى كلهم يا جمال .. أول مرة يقول له يا جمال .. من غير ما يقوله باريس .. أجيب لك كل ولادى » .

• وبعد ما خلاص كلامه قال له إيه ؟

• قال لى عبد الناصر .. طول المكاملة عمال يعيط ويقول له حاجيب لك ولادى .. وقام بذل مايعمل الانسحاب على مراحل .. غير العملية وقال لهم ارجعوا فوراً .. مافيش لا مراحل ولا غيره .. كله بييجى .. فيقت العملية مش انسحاب .. جرى .. إلى الورا !! .

• بينما يقول الفريق أول محمد فوزى : « هذا القرار خاطيء لعامر .. دون استشارة أحد يأمر بانسحاب القوات البرية من سيناء فى ليلة واحدة وبأسلحتهم الخفيفة .. تاركين الأسلحة الثقيلة فى سيناء .. وهذا التقرير بهذا الشكل .. تنفيذه من الناحية العملية مستحيل .. إن قوات عددها ضخمة بهذا الشكل تعبر ٣ مضائق فى سيناء هى حاجز ما بين وادى النيل وسيناء فى ٢٤ ساعة .. الأمر الذى أحدث خسائر فى القوات البرية ليس من العدو .. وإنما من الضغط الموجود .. ده كان كل واحد عاوز يخترق الـ ٣ أبواب من الخط الاستراتيجى بتاع المنطقة الجبلية اللى موجود شرق سيناء .. شرق قناة السويس .. المضائق .. كانت مستحيلة تنفيذها عملياً والدليل على ذلك إن الجنود اللى راحوا شهداء من فعل العدو .. فى منطقة رفح بصفة خاصة .. أعدادها ضعيفة .. بالنسبة للخسائر التى حصلت من اختراق الحجم الكبير من القوات البرية الـ ٣ منافذ اللى قلت لك عليهم .. المضائق .. إذن النهاية بتاعة هذا الموضوع إن المعركة اقتصر (١) على القوات الجوية فقط .. (٢) المعركة لم يتم فيها مواجهة مباشرة بين الجندي المصرى والإسرائيلى وعلى ذلك كانت العملية قاصرة على هذا الشكل اللى أنا بأحكى لك عليه .. الخسارة السريعة التى تمت للجانب المصرى جعلت الناس والقوات المسلحة نفسها لا تصنق .. خسارة جوية .. وقرار خاطيء » .

• ويضيف الفريق أول فوزى : « هى عملية كبيرة لكن فيها دروس كثيرة .. وأنا كنت الوحيد الموجود فى القيادة العامة للقوات المسلحة » .

• بس حضرتك كنت رئيس أركان حرب أيام المشير وأيام النكسة كذلك ؟

• « آه .. هى لها ظروفها .. فأننا توليت القيادة من الرئيس جمال عبد الناصر .. والمشير لم يكن مستريحاً .. وكان فاهم أننى جاى علشان أقاومه .. ومن الناحية الإدارية .. كان فيه واحد تانى .. السيد على صبرى .. مع منظمة الشباب .. فى حالة إن لو فى القوات المسلحة أو المشير يعمل شيئاً .. يبقى فى البلد جهات أخرى مضادة .. فأننا كنت أحدهم .. وكانوا متخوفين » .

• وأسأل عبد المحسن أبو النور : هل زى ما قالوا إنه كان فيه صراع على السلطة أدى إلى ذلك ؟

• « لا أعتقد إن أى صراع على السلطة يصل مهما كان .. إلى حد الخيانة » .

• بتسميها خيانة ؟

• « مش عاوزة شك .. ماوصلش إلى حد الخيانة إنه يصدر أوامر بحيث إن القوات تخسر هذه

الخصائر فى سبيل إنه ينتقم من العنصر اللى عاوز ينتقم منه .. أعتقد إن هذا مش بيحصل أبداً ..
هو سوء تقدير » .

• وأسأل برلنتى عبد الحميد : مين اللى أعطى أمر الانسحاب ؟

• « أمر الانسحاب معروف إنه جمال عبد الناصر .. ده حتى خرج من الاجتماع الرئيس جمال عبد الناصر وكان موجودا أيامها فى القيادة .. ولما شاف الحرب تقريباً خلصت بعدما خلص الطيران .. فقال لهم أنا حاستريح فى حجرة جنبكم .. ودى بيحكىها لى مرتجى .. فقال أنا حاستريح ودخل له زكريا وخرج زكريا .. بيقول الرئيس خلاص أمر بالانسحاب .. وأخذ كل القوات .. أنا مش عارفة يعنى دى حاجات معروفة والقواد كانوا موجودين .. والناس موجودين .. وينتقل عكس الحقيقة ليه .. أنا مش عارفة » .

• بينما يقول عبد المجيد فريد : « عبد الناصر قعد مع القيادات العسكرية قال لهم اشرحوا لى إزاي لما تتحركوا من قواعدكم غرب القناة لغاية الحدود المصرية .. العريش رأس النقب تروحوها فى ٣ أسابيع من قبل ١٥ مايو لغاية ٤ يونيه .. إزاي تقدرنا وماكانش فيه طيران فوقكم .. إزاي تتصوروا إن يطلع أمر انسحاب كافة القوات الموجودة فى سيناء بالليل تتسحب غرب القناة .. الصبح فى ١٢ ساعة .. الأمر غلط والأمر العسكرى غلط .. عبد الناصر ماكانش يعرف هذا الموضوع » .

• وأسأل الفريق أول مرتجى : الانسحاب هل أبلغت به ؟

• « إطلاقاً .. وأنا كل اللى أعلمه أنى بعد ما اتصلت بعبد الحكيم عامر تليفونياً وقلت له إن الموقف ماهوش خطر بالطريقة اللى الناس متصورها .. مازال عندنا قوات .. ماحصلش عليها هجوم .. وأنا اللى أنا بأقترحه إن إحنا بننقل النطاق الأولانى ده ونروح نمسك به المضائق .. قلت له المضائق أهم حته ونركز فيها .. وهنا حنقدر نحارب لغاية آخر رجل وآخر طلقة .. حتى قلناها له بالانجليزى .. قال لى نفذ .. إذن كل العملية أنا اتحركات .. قلت له أنا حننقل من مركز القيادة إلى مركز قيادة حددته له علشان أنا بانضرب بالطائرات .. وأنا فعلاً كنت بانضرب بالطائرات .. وفى الوقت نفسه هذا المركز الجديد حبيقى مركز متوسط بالنسبة للقوات .. أنا قلت الكلام ده لصالح محسن هو قائد الجيش .. لأن أنا ماليش السلطة إن أنا أقول لهم ارجعوا .. أنا كل كلامى عن طريق قائد الجيش .. فتصورت إن العملية دى كلها عملية تنفيذ للاقتراح اللى أنا أقترحه » .

• اللى هو الذهاب إلى المضائق ؟

• « الارتكاز فى المضائق .. الدفاع عن المضائق لآخر رجل وآخر طلقة .. أنا كان معايا المشير أحمد إسماعيل وكمان الجسمى .. والاثنتان ما شاء الله كل واحد منهم بقى مشيراً » .

• حضرتك لما بتقول لى فى الأول .. إن قواتنا كانت قشاً .. وبعدين بتقول نذهب إلى المضائق ونحافظ عليها .. إزاي بهذه القوات القش ؟

• « لأن أنا بقصد هنا بالقش إن دول ما تعلومش ما يقدروش يحاربوا حرباً خفيفة متحركة .. يعنى إنما لو أقول له أقعد هنا ودافع عن المنطقة دى حيقعدوا وحيدافعوا » .

• ويعدين ؟

• « إحنا قاعدين بصيت لقيت قائد البوليس الحربى .. سعد زغلول عبد الكريم .. دخل على فى المركز الجديد ده .. قال لى يا فندم أنت بتعمل إيه ؟ قلت له بنحارب يا ابنى أنت مش عارف إن إحنا بنحارب « بأتريق طبعاً » .. قال لى ده كل القوات انسحبت للغرب .. وأنت القيادة الوحيدة اللى موجودة .. وممكن قوى اليهود يمسكوك ويأسروك » .

• وعملت إيه ساعتها ؟

• « قلت له مش ممكن يستحيل .. قال لى إذا ما كنتش مصدقنى سيادتاك .. تيجى معايا ومحمد فوزى موجود فى السويس .. بيدى تعليمات جديدة بتوزيع القوات .. بعد إيه .. بعد الانسحاب .. وأخذت أحمد إسماعيل وقلت للجمسى تستنى فى مجلس القيادة .. ما هو أنا إيه « متوغوش » .. وطبعاً عملنا ميعاد لتوليفة اللاسلكى بينى وبينه .. ورحت فعلاً للسويس لأن كنا قريبين طبعاً من السويس .. ولقيت فعلاً محمد فوزى يقول لى خلاص يا سيدى صدرت تعليمات بإيقاف إطلاق النيران » .

• وبعد إعلان الحقيقة المؤلمة على الشعب الذى خُذع .. أصيب بصدمة بالغة بسبب هزيمتنا فى ٦ ساعات ..

• ويقول د . عبد العظيم رمضان : « قال محمود الجبار الذى كان قريباً من عبد الناصر ومقرباً معه .. وأعتبره مصدراً من المصادر المؤكدة .. إن عبد الناصر كان مبتسماً بعد الهزيمة .. وأنا فسرت أنه ينسجم مع فجعية الهزيمة .. لأن الجيش لم يكن له أى سيطرة عليه .. » .

• ويقول د . مصطفى محمود : « اختار عبد الناصر المبدأ الخطأ .. اختار المبدأ الاشتراكي وكانت النتيجة انهيار اقتصادى كامل .. قفلت بمشهد ختامى درامى وهزيمة ساحقة .. ومع ذلك استمر الخطأ والتستر عليه » .

• وقرر الرجulan .. عبد الناصر وعامر .. التخلّى عن موقعهما .. بعد شعورهما بالمسئولية والعار ..

• وتقول هدى عبد الناصر : « لم نقرب من والدى يوم التحدى .. واحترمنا رأيه ولم نتدخل » .

• واتفق عبد الناصر مع عامر على ترشيح وزير الحربية شمس پدران لرئاسة الجمهورية خلفاً له .. لكن عبد الناصر أعلن أنه رشح زكريا محبى الدين ..

• وقال أحمد حمروش إن زكريا محبى الدين قال لجمال عبد الناصر : « أنت من حقك أن تتنحى .. ولكن ليس من حقك أن تعين رئيساً للجمهورية بدلاً عنك .. وأنا لن أقبل هذا التعيين » .

- وأسأل سعيد حليم : لما تنحى الرئيس عبد الناصر بعد ٦٧ رشح السيد زكريا محبى الدين وقال « أخى وزميلي وصديقى زكريا » هو الذى يتولى بعدى .. تفكرت فيه ؟
- « كان التغيير هذا اقترحه جمال عبد الناصر .. ورفض زكريا محبى الدين هذا الموضوع .. وبالتالي جمال عبد الناصر استمر بناء على طلب الجماهير » .
- « هل لو كان زكريا وافق كان ممكن يحدث تغيير ؟
- « يعنى هل كان يمكن إن الواحد يتصور إن السيد أنور السادات يصبح رئيسا .. ماكانش يتصور كل ده .. حاجات ما أقدرش أقول فيها حاجة » .
- ويقول د . يونان لبيب رزق : « كان زكريا قرباناً على مذبح ٦٧ » .
- وأسأل عبد اللطيف بغدادى : هل كان متفقاً مع عبد الحكيم أنهما يستقيلان معاً ؟
- « كانا اتفقا على إنهما يجيبوا شمس بدران رئيس جمهورية .. فأننا سألت عبد الناصر فيه .. إيه الذى خلاك تفكر فى شمس بدران .. لا خبرة ولا شخصية ولا يصلح إطلاقاً لهذه العملية غير إنه كان الرجل بتاع عبد الحكيم وبتاعك .. قال ما هو كنا فى وقت مضطرب وأزمة حادة .. فاللى خطر على ذهننا شمس بدران .. ورجعت فكرت تانى قلت زكريا .. واحد منّا وله خبرته وعلاقته بالأمريكان كويسة .. كان يقدر يعمل حاجة .. قلت له لأنك أنت فى خطابك ماقلتش شمس بدران .. قلت زكريا محبى الدين .. فعبد الحكيم كان بيستمع للتليفزيون ضرب الترابيزة الى أمامه برجله .. قال لى عرفت منين .. من المجموعة بتاعته الى كانت قاعدة معه .. قلت له قام علشان يروح الإذاعة .. علشان يلقى بياناً هو الآخر .. فقال لى حصل .. وجمال عبد الناصر أعلن اسم زكريا .. راح زكريا فوجيء .. راح جرى عليه بعد الخطاب .. قال له أنت لا تملك أنك تصدر هذا القرار .. واتهى له إنه توريطه له .. جاية بعد هزيمة ولخبطة .. ورفض زكريا .. وبعدين زكريا عمل بياناً .. قال فيه اللى يستمر فى القيادة جمال عبد الناصر » .
- وليه زكريا محبى الدين بيرفض تماماً الكلام ولا يدلى بأى حديث ؟
- « أخذ نفسه القاعدة دى .. أو المبدأ ده .. من البداية » .
- هل لإخفاء أشياء مايحبش أنه يقول عليها ولا إيه ؟
- « زكريا حريص إن ماحدش يسأله .. وهو على حق .. وأنا كنت عاوز أعمل كده زيه .. بس إنت بقى إلحاحك .. علشان كده تجاوبت معاك .. رغم تمنى كذا مرة » .
- ويقول عبد المجيد فريد : « هو الذى كان رشحه كان زكريا محبى الدين .. أنا سمعت هذه القصة منه .. وبعدما رجعت تانى .. أول واحد عربى جاء فى الاجتماعات العربية الرئيس بومدين .. اجتمع معه فى المكتب وكنت موجوداً .. بومدين قال له إيه الحكاية .. احكى لنا إيه اللى حصل .. قال له حصل كذا وكذا فى الجيش .. وجاء عند حنة زكريا محبى الدين وقال ..

وأنا فكرت فى مين فاخترت زكريا .. لأن زكريا الأمريكان جيعتبروه وجهاً جديداً واتجاهاً جديداً
يقفوا معه مايقفوش الوقفة التى كانت معى .. والاتحاد السوفيتى حيحاول إنه يرضيه علشان
يبقى متعاوناً معهم .. استمراراً لخطتنا .. بالإضافة إلى أننى بأشوف زكريا كرجل دولة فى
إدارة قضايا الدولة .. أنا شايف زكريا أكثر الموجودين فى إدارة الدولة .. عبد الحكيم عامر
كان مرشحاً شمس بدران .. دى الحقيقة .. أما بالنسبة لعبد الناصر ماغيرش » .

• وهل المشير كان رايح الإذاعة يلقي بياناً مقابل بيان الرئيس ؟

• « لا أظن .. لا أعرف هذه القصة .. بس أعرف المشير .. ورجاله كانوا تعبانين جداً ..
ماكانوش يتصوروا هذا البيان .. لأن معناه سقوط دولة الجيش والمؤسسة العسكرية » .

• وأسأل برلنتى عبد الحميد : هل اتفق الرئيس عبد الناصر والمشير عبد الحكيم عامر على
من يخلفهما ؟

• « طبعاً هما متفقين يوم ٨ بعد قرار مجلس الأمن .. اتقابل جمال عبد الناصر وعبد الحكيم عامر
وشمس بدران وقعدوا واتفقوا إنهم لازم يستقيلوا .. ولأزم يجيبوا وجهاً جديداً ينفع يتعامل مع
الغرب .. وحتى رشح زكريا وحاجات زى كده .. فعلى طول الناس دى راحت على زكريا ..
علشان تضربه بالطوب .. علشان مايرضاش » .

• ويقول جمال عامر : « لما جاء قرار التنحي واتفق والدى مع الرئيس عبد الناصر على
التنحي .. هما الاثنان مع بعض .. فوجيء والدى فى ذلك الوقت .. إن الرئيس جمال
عبد الناصر أعلن القرار لوحده .. ولم يذكر اسم والدى .. كانت النتيجة إنه ثار وكلم الرئيس
عبد الناصر وقال له أنا حاروح أتكلم فى الإذاعة عن استقالتي .. وبناء عليه .. راحت نازلة
بعدها بس كانت متأخرة .. نتيجة لهذا .. الناس حسنت إن الرجل ده فضل متكالب على مركزه ..
وإن هو اللي قاعد وإنه سبب هذه المشكلة .. فكان فيه نوع من الإثارة ضده » .

• وأسأل مصطفى أمين : رأى حضرتك فى تنحي الرئيس عبد الناصر سنة ٦٧ ؟

• « هو كان واثقاً إن البلد ستقف معه وتعيده للحكم » .

• ويقول عبد المجيد فريد : « التنحي أنا لمسته كأمين عام رئاسة الجمهورية .. فى إنه طلب
منى السكرتير الخاص للرئيس إعداد قصر القبة وهو من أحد مسؤولياته لأن الرئيس جاي بعد
الظهر الساعة ٦ علشان يقول بياناً هاماً يوم ٩ يونية .. فانتظرت فى القصر لغاية ما جاء
الرئيس .. وجاء عادى جداً .. وشه عجز كذا سنة .. ولوحده .. وطلع فى الصالون .. المكتب
جامز .. قلت له يعنى سيادتك المشكلة اللي أنت فيها ياما واجهت مشاكل زى كده .. وإن شاء
الله حتقدر تواجه هذه المشاكل والقضايا وتعيد الثقة والبناء .. كلام يقال فى هذه الظروف ..
مارنش على .. كأنه مش موجود معايا .. دخل المكتب وابتدا يقرأ البيان .. بيان التنحي » .

• وأسأل د . ثروت عكاشة : تنحي الرئيس عبد الناصر واختار زكريا محبى الدين .. وعقدتم

اجتماعاً فى منزل الرئيس عبد الناصر .. وبرناسك .. لتطلبوا منه إنه يراجع نفسه
ويتراجع .. فالنتيجة كانت إيه ؟

• « أنا بالصدفة كنت أقدم الوزراء الموجودين فى تلك اللحظة .. واستشرت زملائى لكى تعقد
جلسة ننظر فيها الموقف عقب التنحى .. إلى أن جاء الأخ محمود يونس وتولى رئاسة الجلسة
ثم جاء رئيس الوزراء بعد ذلك .. وانتقلنا إلى مجلس الوزراء فى مصر الجديدة .. والفكرة
التي كانت تدور بأذهاننا إن مجلس الوزراء لا ينبغي أن يتدخل فى موضوع التنحى أو عدمه ..
فذلك أمر متروك للشعب أو لمجلس الأمة .. غير أن الأوامر صدرت وتذاك بعزم الخوض
فى هذا الموضوع » .

• **ويقول أحمد أبو ناز :** « عاصرت هذه الأحداث والمشير كان غضباناً لأنه كان ثائراً وقال إحنا
اتفقنا إن إحنا نتنحى ونسيب البلد للناس اللي يديروا هذه البلد .. ولكنه خلى بى .. ورجع
تاني بترتيب من سامى شرف .. وأمر محمود طنطاوى وقال له روح بلغ استقالتى ونيعها فى
الإذاعة .. أنا غير موافق .. فراح محمود طنطاوى وأذاع استقالة المشير » .

• **وأسأل الفريق أول عبد المحسن كامل مرتجى :** تذكر إيه عن موضوع تنحى رئيس
الجمهورية ؟

• « أنا سمعت .. ما أقرش أقرر بالضبط .. اتفق الرئيس عبد الناصر مع المشير عبد الحكيم
عامر إنهم الاثنين يتحيان .. ده عبد الحكيم عامر هو اللي قال لى هذا الكلام .. وبعد كده طلب
عبد الحكيم عامر أن يلقي بيانا زيه .. فبعد الناصر هو اللي ألقى البيان ماخلاش عبد الحكيم
عامر يلقي البيان .. يعنى فى وجهة نظرى العملية كانت مفبركة ويعنى فيه شيء من الدعاية
أكثر من اللازم .. يعنى الناس تقوم وتهتف لعبد الناصر تانى .. دى كلها قطعاً فيه يد كانت
بتحركها .. لأن عبد الناصر قال لى .. هل فيه دولة فى الدنيا بيحصل فيها ما حصل والنظام
بيستمر زى ما هو بعد ٦٧ .. وأنا قابلقه بعد ٦٧ قلت له بقى إن كان اتفق مع عبد الحكيم عامر
لما قعدوا واتكلموا إن شمس بدران يبقى رئيس الجمهورية .. قال له يا عبد الحكيم ماتجيش
سيرة .. ده كان بالليل شمس بدران .. وبعدين أنا بأنقك كلام عبد الناصر .. قاله لى ..
أنا رحنت مكتبى تعباً جداً .. أخذت نوماً ونمت .. صحيت الصبح استغربت إزاي أخلى واحد
زى شمس بدران يبقى هو رئيس الجمهورية .. ابتدا يقول فيه حاجات .. يعنى ماهياش
كرويسة .. فلفى هذا الموضوع من فكره .. وقال لى إن عبد الحكيم عامر كان فى ذلك الوقت
أخطر شمس بدران .. ويقول إن شمس نام الليلة وهو يحلم برئاسة الجمهورية » .

• **ويتذكر شمس بدران الذى كان مرشحاً لرئاسة الجمهورية هذه الواقعة فيقول :** « كان فعلاً
حيثنحى .. وكان فى الوقت ده حيسلم البلد للى يقدر يمسكها من القوات المسلحة .. مين حيسك
البلد .. اللى مسيطر على القوات المسلحة .. مين مسيطر على القوات المسلحة .. أنا .. بعد
عبد الحكيم عامر وهو لما يمشوا .. أنا اللى حابقى مسيطر على البلد .. هو كان يجينى جداً ..
وقال علوز دماً جديداً .. مايمشيش الكلام ده مع زكريا طبعاً .. فالغدادي قفشه فى هذه

الحكاية .. ولما يحصل للتحتى تقوم مظاهرات شعبية ويرجع تانى .. فقال لى عموماً إحنا غيرنا الموقف دلوقتى لذكربا .. وهو بقى ماقاليش زكريا علشان خاطر الأمريكان .. لكن هو قال زكريا لما غير رأيه .. وقرر إنه يرجع تانى !! « .

• بتقول فى مذكراتك التى لم يقرأها الناس بعد إنه كان فيه قراران للتحتى ؟

• « آه .. كان فيه قرارين للتحتى » .

• أولاً كان فيه اتفاق بين الرئيس والمشير على التحتى معاً ؟

• « آه .. هو أنا أحاول لك بالضبط .. المعركة لما حصلت .. عبد الناصر ما إشتراكش فيها كان مبتعداً خالص .. بس هو اشتراك قبل ماتحصل .. يعنى قال لنا حركوا القوات .. قالها لعبد الحكيم عامر .. أنا مش مسئوليتى أنا .. مش موضوعى أنا .. قال لعبد الحكيم عامر يحرك القوات إلى المنطقة الشرقية .. وبعد ما انتهت المعركة .. ولما انسحبت القوات .. عبد الحكيم عامر كان عنده نية الانتحار .. بيعت للبيت بتاعه جاب شنطة .. وأنا أعرف هذا لأنى دخلت عليه كذا مرة فبقى يخفى الشنطة .. وأنا عارف إن فيها حاجة .. فكلمت أقرب واحد له أخوه حسن عامر .. طلبته لقيته فى العراق .. فقلت أطلب الرئيس .. قلت له ييجى .. قال أنا آجى أعمل إيه .. إنتم اللي ماسكين العملية كلها .. أنا ماليش دعوة أنا مالى .. قلت له بصراحة أنا حاسس إن عبد الحكيم عاوز يترك ويرتاح .. وعاوزك تجيب علشان تلحقه .. قال بس أنا آجى وأريحه خالص .. وحامسك أنا القيادة وكل حاجة .. لأن هو أعصابه فلتت » .

• ده كان إمتى يافندم ؟

• « كان قبل يوم التحتى بيوم » .

• يعنى يوم ٨ ؟

• « آه .. وأصبح عبد الناصر فى دماغه إن عبد الحكيم عامر كان حينئذ .. يعنى معناه إنه سلم أموره خلاص .. فجاء القيادة .. كان فيه مجموعة من أعضاء مجلس قيادة الثورة ورئيس الوزراء صدقى سليمان ومجموعة من الناس .. جاب عشاء .. وخلصوا العشاء .. وبعدين الناس كلها مشيت .. دخل هو وعبد الحكيم فى أوضة لوحدهما .. انتقل عليهما الباب وانكلما شوية .. وخرج روح » .

• وكان مبتسما كما ذكرت فى مذكراتك ؟

• « الرئيس كان مبتسماً وكان مستريح البال جداً .. لما عرف إن عبد الحكيم عامر عاوز ينتحر .. زى ماتقول اتخلص من ثقل كبير قوى كان عليه .. ده اللي حسيته .. كان جاي بروح معنوية عالية جداً .. بينكت وبهز كأن مافيش حاجة حصلت .. ده الرئيس جمال عبد الناصر .. والثانى عبد الحكيم عامر كان فى حالة هدوء غير طبيعية يعنى هدوء واحد سلم أمره الله .. ومش حقيقى موجوداً بكره الصبح .. حقيقى فى علم الغيب .. بعد ما خرج ناصر .. قال لى

المشير دلوقتى إحنا اتفقنا على إن إحنا الاثنين نتتحى .. والبيان حيطلع بكره .. وعبد الناصر اقترح إنك أنت تبقى رئيس جمهورية » .

• إنت شمس بدران ؟

• « آه .. وأنا بأقول لك إن عبد الناصر اقترح مش أنا .. ما معناه إن هو مآكناش موافق على الاقتراح .. وإن عبد الناصر اقترح هذا الاقتراح .. وإن عبد الحكيم مآكناش موافق عليه .. بس مآقاليش إن أنا مآكناش موافق .. لإنه يعنى حبقى فيها سخافة .. قلت له لأ أنا كمان مش موافق على الموضوع ده .. فقال لى اتفاهم معه .. أنا ماليش دعوة بالموضوع .. هو اللى رشحك مش أنا .. ثانى يوم طلبته أنا فى التليفون علشان ييجى .. قال لى أنا أجى أريحه .. قلت له لا تريحه ولا حاجة .. هو نفسه حيسترج .. هو نفسه حيمشى إذا ما انتحش .. هو نفسه خلاص انتهى .. حيسب السلطة والقيادة وأنا كمان ماشى معاه .. قال لى لأ .. ده أنا عاوزك جداً يا أستاذ .. قلت له عاوزنى فى إيه .. اتكلم بقى الكلام اللى أنا قلته مع عبد الحكيم عامر وقال لى عرفت أنا كنت بأقول لك أنا كنت عاوزك ليه .. وقلت له أنا مش موافق على هذا الموضوع .. فقال لى أنا غيرت رأيى ثانى وثقت إن زكريا محبى الدين .. الكلام ده ثانى يوم الظهر .. زكريا محبى الدين يبقى رئيس جمهورية .. لأن بصراحة يا شمس الأمريكان عاوزين راسى .. وأنا حأنيهم راسى .. وأجيب زكريا الرجل بتاعهم .. يقوم بقدر بتفاهم معاهم ويخلص مصر من المشكلة اللى هى فيها .. أنا الحقيقة بكيت .. يعنى برضه .. واحد بيضحى بنفسه فى سبيل بلده .. لكن الحقيقة مآكناش كده .. اللى ظهر بعدين إن هو غير رأيى من شمس بدران إلى زكريا .. لأنه قرر العودة .. لو كان أعلن إن شمس بدران حقيقى رئيس الجمهورية .. كان حيزعل منه كل الناس الكبار .. اللى هم أكبر منى بـ ١٠ - ١٥ سنة .. حيزعل زكريا محبى الدين .. وحيزعل أنور السادات .. وحيزعل على صبرى .. وحيزعل حيزعل زكريا يقول شمس بدران لإنه حيزعل كل الناس دى .. اللى حيرجعوا يشتغلوا معاه .. إنما إذا كان عاوز يتتحى ومايرجش .. وفى تصميمه إنه مايرجش .. حيقول شمس بدران ييجى محلى ومايهموش الباقي دول .. لكن هو كان يفكر فيها تفكيراً جاداً من الأول .. إن هو يتتحى نهائياً ومايرجش خالص .. وعلشان كده دار فى خلدّه إنه يعين شمس .. لما رجع غير رأيّه إنه يرجع ثانى .. غير من شمس بدران لزكريا محبى الدين .. علشان مايزعلش الناس اللى حيرجع لهم ثانى » .

• طيب إيه اللى خلاه يغير رأيّه فى تصورك ؟

• « آه .. ده سؤال عويس جداً .. ده حيؤدى إلى الكلام عن موضوع ثانى .. لما بعنا جيبنا السفير الروسى قبل البيان ما يطلع بساعات .. يعنى الساعة ٥ .. البيان اتأذع افنكر الساعة ٧ .. السفير الروسى كنا مدينه عربيه بوليس حربى .. علشان يقدر يتحرك فى القاهرة بدون عوائق .. فجاء السفير الروسى وعبد الحكيم عامر قال له أنا خلاص .. أنا حأتتحى وحأسيب القيادة .. فقال

له طيب .. وما اهتمش يعنى .. فقال له مش أنا بس عبد الناصر كمان .. قال له إيه .. جمال عبد الناصر .. وأخذ بعضه وطار رجع السفارة علشان يعمل اتصالات بموسكو .. وبعد ما وصل السفارة .. مايفش بخمس دقائق كلمنى فى التليفون وقال لى أنا عاوز ميعاد من جمال عبد الناصر .. عبد الحكيم عامر قال له ده جمال عبد الناصر كمان حيتنحى وحيذيع البيان الساعة ٧ .. بعد ساعتين يعنى .. علشان كده نط .. وقال لى أنا عاوز أقابل جمال عبد الناصر فوراً دلوقتى .. فوراً أرجوك تخليه يوقف إذاعة البيان لغاية أنا ما أقابله .. يعنى معناها إن دى ماتقولش تنحى .. واستنى فى مكانك بلاش تنتحى .. فقلت له أنا حابغ الرسالة .. فكلمت عبد الناصر قال لى لأ أنا مش حاوقف البيان .. بس خليه ييجى دلوقتى .. فكلمت السفير .. راح قابل جمال عبد الناصر قبل إذاعة البيان على طول .. قال له إيه طبعاً ماحدثش كان قاعداً معهم علشان أقول لك قال له إيه .. لكن بالاستنتاج كده .. لما السفير يقول خليه يوقف البيان ومايقولهموش .. معناها إن الروس بيقولوا له ماتخليهموش ينتحى .. فهو ماسمعش كلامهم .. وقال لأ حيتنحى .. معناها إيه .. إنه حيتنحى وناوى يرجع تانى .. فهو مااهتمش بطلب الروس إنه ماينتخاش لإنه حيرج تانى .. والقيادة الروسية عاوزاه يستنى فى منصبه ماينتخاش .. لأنهم مش فاهمين إن التحدى حيقى فيه عودة .. هم فاهمين التحدى يعنى تنحى .. وقالوا خليك فى محلك لأن المسؤولية الأساسية فى العملية دى مسئولية عسكرية .. وعبد الحكيم عامر حيمشى وأنت ممكن تحاكمه بعد كده .. يعنى خلى المسؤولية كلها مسئولية عسكرية .. وإنت خليك فى موقعك وحذيك الدعم اللى إنت عاوزه .. الطيارات اللى كنا بنطليها منهم وكانوا بيقولوا مانفندرش نجيبها .. لأن الموقف بيتصاعد .. بعثوها تانى يوم .. وجاءت طيارات الميج مفكوكة فى طائرات توبلوف كبيرة كل طائرة بتشيل ٢ ميج .. جناحتهم مفكوكة بيجوا فى ٥ دقائق يركبوها .. وبعثوا له لواء مدرعات و ٧٠ دبابة » .

• وعملنا بها حاجة ؟

• « أخذنا الحرس الجمهورى .. والخبراء الروس قاعدين يعدوا الدبابات .. فبين الـ ٧٠ دبابة مش لافينهم .. راحوا فين .. ماحدث يحرف .. لأنهم راحوا للحرس الجمهورى » .

• ليه ؟

• « الله .. لحماية عبد الناصر .. ما دبابات الحرس الجمهورى اللى كانت فى الحرب اتكسرت .. أهم حاجة الدبابات اللى تيجى .. تروح الحرس الجمهورى » .

• طيب خطبة التحدى حصل فيها تغيير أو تعديل ؟

• « هو بيان الرئيس للتحدى اتشال منه اسم شمس بدران واتحط اسم زكريا .. لما اتحط اسم زكريا ماتشالاش الحواشى اللى مع شمس بدران .. » وإن القيادة الجديدة حتبقى شباب .. الخ » .. الكلام ده كله مايمشيش على زكريا .. زكريا مش شباب .. هو شال الاسم بس .. وهيك نسى يشيل الحواشى اللى حول اسم شمس !! » .

* ويقول عبد اللطيف بغدادى : « قال لى عبد الناصر .. محمد أحمد لو تلاحظ وأنا بألقى خطاب التنحى بتاعى .. قدم لى ورقة .. والكاميرا راحت من على لحظة .. ورقة بتقول عبد الحكيم متجه إلى الإذاعة لإلقاء بيان .. فأنا عملته كده .. امنعوه فمنعوه .. هنا ابتدا الخلاف بين الاثنين » .

* وأسأل شمس بدران : كان فيه ورقة اتقدمت للرئيس زى ما حضرتك قلت لى .. ساعة ما كان بيلقى الخطبة ؟

* « آه هو عبد الحكيم عامر رجع لعب فى عيه الفأر .. لما لقاء غير من شمس بدران لذكريا .. هو ما قائلش حاجة أنا بأستنتج .. عبد الحكيم عامر قال بيجير ليه » .

* هو كان بيسمع البيان زيه زينا ؟

* « ما هو لسه البيان ما تذاعش بقى » .

* قبل إذاعته ؟

* « وهو فى العربية مروح بيته .. عبد الحكيم عامر حيسمع البيان فى البيت .. فلعب فى عيه الفأر .. إيه اللي خاله يغير من شمس بدران لذكريا .. لازم فيه حاجة .. يبقى لازم حيرجع تانى .. فراح متكلم فى التليفون عنده لاسلكى فى العربية .. كلم الرئاسة وعبد الناصر بيذيع البيان .. فقال لمحمد أحمد السكرتير هناك .. قال له دخل لعبد الناصر ورقة دلوقتى اكتب فيها شمس بدران بدل ذكريا .. فمحمد أحمد دخل الورقة فعلاً .. وطلعت فى التليفزيون .. وبص فيها وراح مطبقها تانى وكمل بيانه وماغيرش زى ما عبد الحكيم عامر قال له .. لأن كان فى دماغه خلاص إنه يمشى فى الخطة الجديدة اللي هى خطة العودة » .

* قلت لى الآن إنه قال إن المشير هو اللي اقترح اسم شمس بدران ؟

* « ما هو اتعرف بعد كده من صياغة البيان .. أفنكر بغدادى راح له إن البيان بيقول حنتركها للشباب والجيل الجديد .. ذكريا من الجيل القديم .. كان فيه حد تانى فى الأصل .. فقال له عبد الحكيم عامر كان اقترح شمس بدران وفرضه على .. ما هى دى بقى الميكافيلية .. هو ميكافيلى أكثر من ميكافيلى نفسه !! وقال للناس كلها وعمل مؤتمرات .. واجتماع للاتحاد الاشتراكى وخلافه .. قال فيها إن عبد الحكيم عامر هو اللي اقترح شمس بدران رئيس للجمهورية .. واللى أوحى له بالكلام ده الورقة اللي عبد الحكيم عامر دخلها له وهو بيقول الخطبة يعنى ماكانش بيكذب .. أو كان بيكذب ومابيكذبش » .

* وأسأل سامى شرف : هل فعلاً كان مكتوباً فى الخطبة إن الرئيس كان بيرشح الوزير السابق شمس بدران ثم غيرها إلى النائب ذكريا محيى الدين .. وهل دخلت فعلاً ورقة فى أثناء حديثه من المشير عامر ؟

* « ليلة التنحى كان الرئيس فى القيادة العامة ووصلوا فى مناقشاتهم إلى قرار بأن القيادة السياسية

والعسكرية مسئولتان .. وإن الحل هو التنحي .. وليأمر الشعب ما يأمره .. الرئيس وهو خارج
بص للمشير عبد الحكيم عامر وقال له إيه رأيك يا عبد الحكيم ؟ .. قال له شمس بدران ..
وشمس كان واقفاً .. الكلام ده كان الساعة ١١ أو ١٢ بالليل .. ورحنا البيت وهو فى ذهنه بيفكر
إيه اللى يحصل .. الترتيبات المستقبلية .. وصل إلى قرار وقناعة بالتنحي .. لما وصل بيته
بيقول لى .. أنت مش ساكن فى فيلا .. جهز لى أوضة .. الكلام ده بجد ومش بهزار ..
واسأل المدام آمى موجودة .. اسألها إنت .. جهزت أوضة ولا لأ .. كان يعنى مصرأ على
التنحي .. وفى حديث طويل عريض دار بينى وبينه حول التنحي وعدم التنحي وردود الفعل
اللى تحصل إيه .. والموضوع قصة طويلة عريضة .. ووصل الرئيس بعد كده الساعة ٢
صباحاً .. وكان هيكال موجوداً فى هذا الوقت .. إنه بيعلم التنحي وفكر فى الوجه المقبول ..
القوة التى تريد أن تنتزع جمال عبد الناصر من على هذه الأرض .. وشخص يكون وطنياً ..
ويكون مرتبطاً بنظام ثورة ٢٣ يوليو .. ومحافظاً على هذا النظام .. وجه مقبول على قدر
الإمكان .. زكريا محيى الدين رجل وطنى .. هو اللى عمل أمر العمليات بتاعة الثورة ..
وعندما اختلف زكريا مع جمال عبد الناصر طوال فترة الثورة .. عمره ما تأمر ولا انقلب
عليه .. بل لغاية النهارده هو لم ينطق .. وهو من أشرف الناس الذين عملوا إلى جوار
عبد الناصر .. فوق الاختيار على زكريا محيى الدين وانفق مع هيكال .. أعطى له نص
البيان .. وحصل نقاش .. أنا حضرت هذا النقاش .. إن الرئيس قال تتحمل المسؤولية .. هيكال
قال له جزء من المسؤولية .. لأن فيه مسئولية عسكرية .. قال له أنا رئيس الدولة وأنا القائد
الأعلى .. فأنا المسئول بأتمثل المسؤولية .. هيكال قال له نصيبى من المسؤولية .. فقال له لأ ..
بتحمل المسؤولية بالكامل .. الرئيس راح فيه ناس كثيرة بتخبرك كلام ومش عارفة اللى حصل
إيه .. يقول لك عمل الخطاب متسجل ومتذاع من البيت .. لأ خطاب الرئيس اتعمل واتحضر
واتعمل و .. و .. واتخط .. أتحمل المسؤولية كاملة .. وطلع الرئيس على القصر الجمهورى
بألفية وألقى خطاب التنحي منه .. وإحنا واقفين حول الرئيس .. تليفون ضرب رد عليه الأخ
محمد أحمد .. عبد الحكيم عامر بيقول له : قول للرئيس يبطل كلام إحنا ما اتفقناش على كده ..
ولازم يعلن تخيى أنا كمان معاه .. رئيس الدولة بيتنحي الموضوع غير وارد خلاص بقى ..
الرئيس ركن الورقة على جنب .. وبعدها حاول المشير عبد الحكيم عامر إنه يتصل بالأخ محمد
فائق .. كان وزير الإعلام .. وقال له أنا عاوز ألقى بياناً :

• وكانت ثقة الناس بعد الناصر وقدرته على التحدى بأقية .. وأصر الشعب على بقاء
عبد الناصر فى يومى ٩ و ١٠ يونيو ..

• وتقول برلنتى عبد الحميد : « المعروف قوى إنه كان بيدى أوامره .. ويقول لأفراد الاتحاد
الاشتراكى كلهم يفضلوا فى أماكنهم مايمشوش .. ولما تخلص خطبة الرئيس كله ينزل .. فكله
نزل .. وبعدين ماكانش فيه أنوبيسات فى الشوارع والناس فضلت واقفة فى الشوارع ..
ويقودهم ناس من الاتحاد الاشتراكى .. والصحفية زميلتى دى قالت إن ناس كثير قوى شافوا
إنه كانوا بيشيلوا يافطة عامر اللى كانوا متعودين عليها .. يافطة - ناصر - عامر .. وكانت

فيه يفظ جاهزة مكتوبة والبوية ناشفة وكل حاجة بتقول « ناصر ونرفض » .. يعنى حاجة كده كانت معمولة ومصنوعة بطريقة مكشوفة جداً .

• وأسأل أحمد طعيمة : هل حدث تجميع للحشود الشعبية يوم التتحي ؟

• « أنا بأعتقد إن كان فيه رد فعل شعبي خطير .. ورد الفعل ده مأكناش صنعياً .. فده جاء تلقائياً وطبيعياً .. ماحدش يقدر يقول إنه حركه .. أنا بأديك مثلاً .. زى نفترض واحد ضرير وفيه واحد ببصحه وهو معتمد اعتماداً كلياً وجزئياً عليه .. وثقته فيه تامة ١٠٠% .. وفي خلال سيره فى الطريق فوجيء الأعمى بإنه وقع فى بير .. لو تصور هو فى هذه اللحظة إن الرجل اللي كان ببصحه ومعتمد عليه قال له السلام عليك أنا ماشى وسايك بجرى له إيه ؟! » .

• بس هل كان الشعب ضريراً ؟

• « أنا بأدى مثلاً .. الشعب مش ضرير .. ولكن كان مسلماً القيادة تماماً لجمال عبد الناصر .. ويثق فيه ثقة عيame .. ويعدين الفترة اللي عاشها جمال عبد الناصر قبل مصيبة ٦٧ برهن فيها للشعب المصرى إنه زعيم وقائد .. ويقود معارك التحرير .. ده مش معارك التحرير لمصر معارك التحرير خارج مصر .. فكيف يمكن أن يتصوروا إن يتجى الهزيمة دى على يد عبد الناصر .. زى ما يكون بصوا لقوا أنفسهم فى بير .. البير ده عاوزين يطلعوا منه .. اللي نزلنا فيه هو اللي يطلعنا منه .. مش حد تانى » .

• ويقول عبد المجيد فريد : « أقول لك .. إحنا المكتب اللي قال فيه البيان ده كان الساعة ٦ .. ويعدين كان الرئيس لوحده وأنا كنت موجوداً والسكرتير الخاص كان موجوداً .. ويعدين نزلنا .. وركب العربية وراح البيت فى منشية البكرى .. بين آخر كلمة فى البيان وركوب العربية وطلوع فى الشارع من أمام قصر القبة ٥ أو ١٠ دقائق .. فى العشر دقائق دول الحنة بناعة من أول باب قصر القبة لغاية منشية البكرى .. الشارع كله .. العمارات اللي هناك عند مزلقان السكة الحديد وعند خط المترو .. والسيدات بملابهن العادية والأطفال والرجال .. الكبار والصغيرين .. ببصروا ياريس خليك معانا .. ياريس خليك معانا .. مين اللي نزل دول .. فين العصا السحرية اللي نزلتهم بعد ٧ دقائق من آخر كلمة له » .

• ويقول الفريق أول محمد فوزى : « يوم ١٠ يونية استجاب الرئيس لقرار الشعب بالعودة .. الناس اللي طعنوا فى هذه الحكاية وقعدوا يتكلموا يعنى دى فبركة .. وإن ده كلام مش مضبوط .. لكن هى حقيقة موجودة .. وأنا بأقول لك نتيجتها إيه .. لأول مرة فى تاريخ العسكرية المصرية يندمج الشعب مع القوات المسلحة تحت هدف واحد هو التحرير .. وبإرادة واحدة فأصبحت الـ ٣ عناصر الموجودة فى الدولة .. الشعب والقوات المسلحة والرئيس .. الـ ٣ يجمعهم هدف واحد وإرادة واحدة لأول مرة .. لم يحصل هذا الكلام ده سنة ٤٨ .. لم يحصل الكلام ده سنة ٥٦ .. ماحصلش الكلام ده إلا بعد سنة ٦٧ » .

• **ويقول أحمد سعيد :** « كانت مبايعة لقائد منكسر .. كأنها مبايعة لقائد منتصر .. والإعلام أساساً يجب أن يقوم على أساس محدد وواضح .. وهو إنه مرآة فعلية للجماهير .. المرآة الفعلية للجماهير دى عبارة عن إيه .. عبارة عن نوع من أنواع الانعكاس .. الذى حصل إن جيشنا انكسر .. وكانت النتيجة إن عملية اعلان الانكسار من الممكن أن تكون خطأ كبيراً جداً تجعل الجماهير تفقد سيطرتها على نفسها .. وتدفع إلى الطريق زى ما اندفعت فى يوم ٢٦ يناير ١٩٥٢ وحرقت القاهرة .. حرقت الفنادق .. وحرقت المؤسسات والمحلات العامة .. غاضبة طبعاً .. هى لا تقصد إنها تعتدى على أملاكها ولكن هى بتعتبر عن سخطها على النظام وعلى السلطة .. طب إنت إزاي تنقل الجماهير .. من جماهير رايحة تل أبيب أو داخلة تل أبيب .. إلى جماهير منكسرة وبهذه السرعة المذهلة فى خلال أيام قليلة .. تنهزم .. فوضع طبيعى إنك أنت لازم تفكر إيه الذى ممكن يخلى الجماهير تلتزم بنفسها وبحماتها وبمناشاتها ثم باستمرار المسيرة .. انهزمنا فى معركة .. ما إنجلترا انهزمت .. وأمريكا ما انهزمت فى فيتنام .. ياما شعوب بتنهزم وبتراجع تنتصر .. طب إيه الطريقة التى تعبر بها عن الانكسار الشنيع الذى حدث .. على رغم الإعلام هنا .. الشعب المصرى مهما قيل فيه إنه ابن نكتة .. إلا إنه بكاء .. كل ما يضحك يقول .. « اللهم اجعله خير » .. دى إحدى خصائصه الفعلية .. اللون الأسود الذى ليسوه الفلاحين واللى ليسوه بنات البلد سنين وسنين ده .. كان جزءاً من الخصائص ويعبر عن القتامة .. إذن علشان تعلن نبأ الانكسار ده يبقى الأسلم إنك تكيه .. إذن اعرض الهزيمة كواحد ميت إنما بقية الأسرة حتعيش .. الأب مات .. الابن موجود .. الأخ موجود .. مامتش الكل .. ودى حقيقة .. لأن دى مجرد هزيمة عسكرية .. يتحرق الجيش .. إنما مصر سليمة .. مصانعها سليمة .. شعبها سليم .. كباريها سليمة .. السد العالى سليم .. كلها سليمة .. مش زى ألمانيا لما اتدمرت وسلمت .. مش زى اليابان لما اتدمرت بالقنبلة الذرية .. إذن القضية قضية جزء قد هزم .. إنما الكل باقى .. إذن أنعى الجزء أنعيه .. أخليه نعياً .. خليه يلطموا .. خليه يعودوا إلى خصائصهم بقاعة الحزن .. ودى أنا بأعتبرها فى حياتى الإعلامية .. بأعتبرها نقدر نقول الذروة .. إن أنا قدرت أحافظ بالناس على البلد » .

• **ويقول د. ميلاد حنا :** « أنا فاكركنت فى منشية البكرى ساكن .. وشفيت الزحف بالليل .. شىء خرافى .. فالأنثى كيرلس حكى لى قال « هاتوا لى الزعبوت » .. يتلف بيها .. وأخذ وأخذ عصابته .. وجرى وراح خبط على الباب قالمه قولوا له كيرلس بره .. ودخل لعبد الناصر علشان يقوله ماتسبيناش .. يعنى هنا كان فيه حنة مشاعر إنسانية متدفقة .. مش رسمية ومش شكلية » .

• **ويقول مصطفى كامل مراد :** « المظاهرات لم تكن منظمة .. الحقيقة إننى شفت بنفسى .. كنت موجوداً فى مصر القديمة وقتها .. الناس تدفقت .. وطبعاً القيادات تدفقت أيضاً .. أنا لا أقدر أقول الاتحاد الاشتراكي الذى كان حزب الثورة كان ساكناً .. لكن الجماهير أيضاً طالبت بعودته » .

• وأسأل المشير محمد عبد الغنى الجمسى : عندما قرر عبد الناصر التحدى .. إيه كان رد فعل ذلك على الجيش ؟

• « فيه ناس .. جزء من القوات المسلحة قابله بضيق أو بزعل .. على أساس إنه تخنى عن الدولة فى هذا الوقت اللي إحنا مهزومين فيه .. وفيه جزء آخر كانت الحالة السيئة اللي كنا عليها فى القوات المسلحة بعد هزيمة يونية ٦٧ بمرارتها الأليمة .. فى الأسبوع الأول منها .. الناس كلها كانت مشغولة فى عملها العسكرى ولم تهتم بالموضوع ده .. يعنى جزء كده وجزء كده .. وما أقدرش أقول الراى العام بالكامل بالنسبة للقوات المسلحة .. النصف مليون .. كان مع هذا الراى أو مع هذا الراى .. لكن أنا عاصرت بعض الضباط وشفت بعض الضباط مستائين وزعلانين جداً إن هو تخنى .. وجزء آخر كان لا يبالي .. لأننا كنا فى محنة فى هذا الوقت أشد من المحنة دى » .

• وقامت المظاهرات فى كل أنحاء العالم العربى تؤيد مصر .. كرد فعل متحد للهزيمة من (إسرائيل) ..

• وكان لقرار العودة فرحة وسط الأحران .. ورحب مجلس الأمة برئاسة أنور السادات بهذه العودة ..

• ويقول كمال الدين حسين : « أنور السادات جاب مجلس الشعب علشان يبايعه علشان يتصرف زى ما هو عاوز .. يعنى توكيل .. وبعد كده أعطوه توكيلاً فعلاً يتصرف زى ما هو عاوز .. بعد الهزيمة » .

• ويقول د . يونان ليبيب رزق : « ظهر فى التلفزيون أحد أعضاء مجلس الأمة يرقص طرباً بعد عودة عبد الناصر .. وأساء ذلك إساءة بالغة إلى مصر .. وعرضت مجلة أمريكية صورتين .. واحدة لإسرائيلى بيكى على ضحاياهم القليلين .. والثانية يرقص فيها عضو المجلس المصرى .. وكتبت تحتها تعليقاً يقول « المنتصرون بيكون .. والمنهزمون يرقصون » » .

• وتسببت الحرب إلى جانب الهزيمة العسكرية والخسارة الكبيرة فى الأرواح والمال .. فى التأثير الخطير على الروح المعنوية للجنود وأفراد الشعب على حد سواء ..

• ويقول محمد أحمد : « وبعدين إحنا رايعين فى مجلس وزراء بعدها بيومين ثلاثة .. فيأقول له معلش كلها كام شهر كده .. قال لى : مش حافدر أحارب تانى .. مش قبل ٥ سنوات علشان أبنى الجيش .. لكن الهموم زادت عليه بطريقة لا يتخيلها العقل » .

• وأسأل سامى شرف : هل الرئيس طلب من الشعب فى خطاب وقال « كفاية نكت بقى » ؟

• « آه .. هى لها سبب .. مش كفاية نكت تكميما للأفواه .. ابتدت النكت تؤثر على معنويات القوات المسلحة .. يعنى وصلنا للمرحلة الأولى اللي هى نهاية يونيو ويوليو وبدأ العمل الجاد

فى إعادة تنظيم القوات المسلحة .. وإنّت بتعيد فى نفس الوقت الروح المعنوية .. بتقوى الروح المعنوية .. كان بيحصل رد فعل بالنسبة لبعض الجنود خصوصا قيل ماتخش العناصر المتعلمة .. يعنى قبل تجنيد خريجي الجامعة والعناصر المتعلمة كان العسكرية البسيط العادى بيتأثر بيرجع إلى بلده وأول مايشخ قريبه عمه أو خاله أو أخوه بيتريقوا عليه بالتكت .. العملية انتشرت طبعاً فى قياس الرأى العام .. وكان عندنا نظام كويس جدا لقياس الرأى العام .. علمى مش بتاع البطاطا هو اللى بيكتب التقارير ولا المكوجى ولا البواب .. لأ ده نظام علمى .. ولسه لغاية النهارده موجود فى مصلحة الاستعلامات .. يعنى حطينا الأساس بتاعه فى مصلحة الاستعلامات بالدرجة الأولى .. أما تقارير الأجهزة الأخرى فكانت ثانوية .. بالنسبة لقياس الرأى العام .. لأن أغلبها مكتبية .. وابتدت الروح المعنوية للقوات المسلحة تتأثر بشكل سلبى .. انتقال له ياريس دى مشكلة .. فكان حلها فى التنظيم السياسى .. يا إخوانا القصة كذا وكذا وحكى لهم بعض التكت اللتى تقال بما يمس الروح المعنوية .. ويمس المواطن المقاتل المصرى .. وإحنا عاوزين لأن هو لم يهزم .. وهو ببسعى لأن يأخذ ثأره .. إحنا برضه كمصريين عندنا حكاية الثأر مش حنتنصل منها .. موجودة على جميع المستويات .. وبالتالي اتفق الكل على هذا الموضوع .. وهبط بعدها فى قياس الرأى العام .. و CURVE (منحني) الرسم البيانى بتاع الشائعات انخفض إلى مستوى متدنئى .

• وأسأل الفريق أول مرتجى : ماذا سيكتب التاريخ العسكرى عنه ؟

• « حيقولوا على مسك قيادة الجبهة .. وهو رجل انظم فى هذه العملية زى ما قال عبد الناصر .. أنا ظلمته ظلم الحسن والحسين .. أنا لم أدر معركة .. لم أخطط لمعركة .. وأنت قبل كده سألتنى وقلت لى إنت مسئول .. آه مسئول زى ما كل واحد مسئول .. مجلس الوزراء مسئول .. مجلس الشعب مسئول .. زى وسائل الإعلام ماهى مسئولة .. زى الشعب ماهو مسئول .. وعبد الناصر نفسه بيقول لى فيه فى الدنيا شعب يحصل له محاصل ويستنى النظام زى ماهو . »

• ويضيف مرتجى : « أنا عاوز أقول إن حرب ٦٧ دى علاوة على أن القيادة السياسية وضعت أساساً .. إنها تصعد عمليات القيام بالحرب .. علاوة على كده .. القيادة السياسية تدخلت فى الخطة نفسها .. وطالبت إن إحنا نبعت قوات لرفع .. ونفس القوات ما كانت مستعدة إطلاقاً ومافيش أى نوع من الدراسة .. وهذه الفرقة بالكامل راحت هناك .. وهذه الفرقة ماعملتش أى حاجة غير إنها رجعت قبل ما تبدأ فى حفر خنادقها .. هنا خطأ التدخل السياسى فى الخطة العسكرية اللى كانت موجودة من الأصل . »

• والمسئول هو الرئيس عبد الناصر ولا المشير عبد الحكيم عامر ؟

• « المسئول هنا النظام الشمولى اللى كان موجوداً .. يبقى عبد الناصر .. كان بيقول .. وعبد الحكيم مايقولش لأ .. والمفروض إن عبد الحكيم يعترض على هذا كرجل عسكرى ..

إنما الناحية السياسية هي التي كانت مسيطرة على دماغهم وتفكيرهم .. لأن الرئيس بيقول خلاص .. كل الناس بتنفذ .. لكن الناحية الحربية مش طالبة ده .. مش عاوزة هذا الشكل .

* **ويقول نجيب محفوظ :** « دى هزيمة الحقيقة فضلنا نوضيها لروحنا .. يعنى اللي كان باين لنا من الداخلى .. لسياستنا وأسلوبنا وإدارتنا ولكل شىء .. ولأخلاقنا ولكل حاجة .. أضعنا أنفسنا .. وانتشر الفساد .. ونفس الجيش حصل فيه عبث كثير .. والسياسة أفسدت زيادة .. وحملة اليمن .. يعنى عملنا فى روحنا حاجات .. توضح أحسن توضيحاً لهزيمة محترمة » .

* **هل الديمقراطية هي السبب ؟**

* « اختفاء الديمقراطية سبب جميع الكوارث زى ما شرحت لك .. لأن الديمقراطية أقل ما فيها إلغاء الرقابة والصوت الحر .. يعنى الناس اللي فى المعتقلات كانوا حيقدوا فى البرلمان يتكلموا .. حملة زى حملة اليمن كانت ستناقش .. نروح ونبتع سلاحاً ولا نذهب .. نخليها للمتوعين .. هل يمكن نبتع جيشاً وقدامنا إسرائيل .. كلام كده .. علشان ننتهى للرأى الصحيح .. كل شىء كده .. الديمقراطية ميزتها .. حتى لما تغط بتصلح نفسها » .

* **وأسأل أحمد حمروش :** هل كانت نكسة ٦٧ نكسة كبيرة لمصر ونكسة أكبر لعبد الناصر ؟

* « مافيش شك إن جمال عبد الناصر كان أحد الأسباب الرئيسية لحدوث الهزيمة والعنوان نفسه .. وهو اعترف بكده .. مأكناش بيحاول يخفى الحقيقة لأنه كان مسئولاً مسئولية كاملة عن كل ما حدث .. ولا شك إن الهزيمة فى ٦٧ كانت مفاجأة له .. ومفاجأة للشعب المصرى .. لأنه كان يعيش حلم الثورة .. يعيش حلم الأمل فى أن يحقق أشياء كثيرة .. فدى كانت صدمة كبيرة .. وتصور إن من ٦٧ للنهارده نحن نعيش هذه المرحلة .. لكى نزيل آثار العدوان التى لم نزل بعد » .

* **ويقول عباس رضوان :** « لأ أنا بأعتبر إن قصة ٦٧ دى مرسومة .. مرسومة على مستوى أعلى من مصر .. لإنهاء موقف مصر البارز فى المنطقة العربية وفى العالم الثالث .. هو مانقدرش نقول أو نفصل بين عبد الحكيم عامر وعبد الناصر .. لإن الاثنان عسكريان قبل كل اعتبار .. يعنى عبد الناصر عسكري وعسكري كفاء جداً .. وعبد الحكيم كفاء جداً وعسكري ومعه مساعدين ورؤساء هيئات ممتازين جداً .. إنما يمكن من ناحية تقديرى أنا .. إن المعركة السياسية هي التى وصلت الموقف إلى هذا .. إذن عبد الناصر .. على أى الأوضاع القرار كان قرار عبد الناصر .. يعنى قرار غلق الخليج وقرار الضربة الأولى .. جمال عبد الناصر اتصل بى يوم ٢٨ وقال لى شفت صدقي .. قلت له خير .. قال لى : بأقول تحتمل إيه من الضربة الأولى قال لى ٨٠٪ .. وعينيه ماأعرفش احمرت وبتاع .. قلت له رجل صادق يعنى هو بيقول لسيداتك الصدق .. ما هو يمكن والله نحتملها .. إنما هم فعلاً بقى لهم كام سنة عاوزين يعملوا دشم تحت الأرض .. ما أتبحثش لهم .. هو ده كلامه صح .. إنه لا يحتمل الضربة الأولى .. ويمكن دى أساس الهزيمة .. الضربة الأولى الاسرائيلية التى خلصت على قواتنا الجوية وهى على الأرض » .

- وأسأل مصطفى أمين : نكسة ٦٧ ؟
- « أكبر كارثة في تاريخ مصر » .
- من الذى تسبب فيها فى رأيك ؟
- « حكم الفرد » .
- ويقول أحمد أبو الفتح : « لا أستطيع أن أتصور إن عبد الناصر زج بمصر نتيجة رغبته فى تدمير شعبية عبد الحكيم عامر .. ولا أستطيع أن أتصور إنه وقع فى خديعة الروس .. أعتقد إن عبد الناصر بعد انفصال سوريا وأحوال حرب اليمن أراد أن يقوم بمظاهرة يغطى بها القشل والأحوال .. وينعش بها زعامته التى كانت قد انهارت إلى أضعف مستوى .. ولم يكن أمامه إلا أن تتجه مظهرته صوب تهديد إسرائيل » .
- وأسأل محمد أحمد : هل عرفت أن الرئيس عبد الناصر آسف أو حس إنه أخطأ فى موقف ما ؟
- « هى مافيش إلا بتاعة ٦٧ .. واللى هو قال من أول يوم إحنا خسرنا الحرب .. وخدعوني فعلاً .. بالمعلومات اللى جابوها السفراء الأجانب .. أو خدعوه فى الجيش لما مر عليهم .. والله أعلم » .
- وأسأل عبد الحميد البكوش : يوم • يونية أين كنت ؟
- « فى ٥ يونية ٦٧ كنت وزيرا للعدل فى الحكومة الليبية .. وكانت الحكومة مجتمعة فى ذلك الوقت فى مدينة البيضاء بالجبل الأخضر .. وأبلغنا من قبل المؤسسات المعنية بوقوع كارثة • يونية .. وكنا نواصل الاستماع فى أجهزة الإعلام المصرية وراڊيو صوت العرب بالذات .. وكنت شخصياً أنزعج من المبالغة فى الحديث عن الانتصارات وإسقاط الطائرات .. فقد كانت المبالغة تبدو إنها تخفى وراءها حقيقة مختلفة .. بعد بضعة أيام تبينت الهزيمة .. وكانت مرارتها شديدة علينا .. أنا شخصياً لم أكن أرى فيها فقط هزيمة عسكرية بل هزيمة للنفس العربية والنظم العربية والعلاقات العربية وحتى الثقافة العربية .. لقد ظلت الأمة العربية سنوات طويلة تستعد لمثل هذه الحرب .. ثم تفاجأ بأنها تخوضها من فراغ وتنتهى بها إلى فراغ .. كانت حقاً هزيمة محزنة ووقع أثرها على كل مواطن ليبنى فى ذلك الوقت .. ولعل الكثيرون مازالوا يعانون منها » .
- والعقيد معمر القذافى كيف كان وقعها عليه ؟
- « العقيد القذافى سنة ٦٧ كان لا يزال ملازماً ثانياً فى الجيش .. ولم يكن ينتبه أحد إلى وقع الهزيمة عليه ولا يعلم أحد كيف تحملها فى ذلك الوقت .. ولكنه بعد أن وصل إلى السلطة .. كان يشكر دائماً إنها هزيمة دفعته إلى القيام بالانقلاب ثأراً للهزيمة » .

- وأسأل المشير الجمسى : هل تعتقد إن ما حدث كان مسئولية شخص بعينه ؟
- « الحقيقة .. اللي حدث فى هزيمة ٦٧ .. وأنا لا أسميها نكسة إطلاقاً ولكنها هى هزيمة مريرة .. والهزيمة سياسية وعسكرية فى وقت واحد .. والحقيقة إحنا ارتكبنا أخطاء سياسية وعسكرية فى هذه الحرب ترتب عليها الهزيمة » .
- ويقول محسن عبد الخالق : « هزيمة ٦٧ مسئوليتها أولاً وأخيراً على جمال عبد الناصر .. ما حدث فى ٦٧ نحن نعيش آثاره حتى الآن .. والعالم العربى يعانى من ٦٧ .. أنا شفتها على التلفزيون حاجة تؤذى .. أنا قعدت فى البيت لا أستطيع الخروج للشارع لمدة شهر .. أنا كنت فى لندن مغترباً » .
- وأسأل محمد فائق : لو تكلمنا بصراحة عن النكسة .. من المسئول الأول عنها ؟
- « والله النكسة الحقيقة .. الأول الهزيمة العسكرية لا يمكن أن تعكس موازين القوة الحقيقية فى ذلك الوقت .. ولكن كان فيه خلا كبيراً فى القيادة .. لكن فى النهاية الهزيمة بطبيعة الحال هى مسئولية النظام ككل .. وده اللى خلى عبد الناصر بعد الهزيمة .. يستقيل ويحتمل هذه المسئولية بكل شجاعة أمام كل الجماهير » .
- وأسأل أحمد الخواجة : من السبب فى هزيمة ٦٧ فى رأى نقيب المحامين ؟
- « النظام السبب فى هزيمة ٦٧ .. غيبة الديمقراطية .. لأن أنت علشان تحرر أرضك مش محتاج تفويض .. يعنى أنت وأنت تحكم ولدك أرض محتلة أنت مفوض تفويضاً طبيعياً بحكم منصبك فى أن تحرر أرضك المحتلة .. إنما أن تدخل حرب .. ده لا يجوز أن حاكم يستأثر به بعيداً عن الناس .. ولا أن يصدر فيه قراراً .. ولذلك حتى فى الدول الديمقراطية المتقدمة لما تيجى الدولة تعلن الحرب بتستأذن البرلمان فى إعلان الحرب .. بتعرض على البرلمان أن تدخل حرب .. غيبة الديمقراطية هى السبب .. واللى ترتب على غيبة الديمقراطية إننا نتخط فى مكان صعب .. يعنى أذكر إن جاء فى يناير سنة ٦٧ الأخ فؤاد نصار كان سكرتير الحزب الشيوعى الأردنى .. وكان فى ألمانيا وطلب يقابل الرئيس عبد الناصر .. قال للرئيس عبد الناصر فيه ظواهر غريبة فى إسرائيل فيها هجرة فيها بطالة لأول مرة .. ومعنى ذلك إن إسرائيل تأخذ شكل الدولة .. وإن إسرائيل مش ممكن تسكت على الكلام ده وإن الوسيلة الوحيدة أمامها لتحقيق أهدافها هو أن تحارب .. الرئيس عبد الناصر قال له مش حأخض حرب ضد إسرائيل دلوقتى .. هو قال يومها إنه صلاح الدين حاصر الصليبيين وما حاربش الصليبيين .. إحنا نأخذ إزاي الأمور كده .. والأمور تداعت إلى حد قفل خليج العقبة فى مجتمع دولة عبد الناصر .. والله أعلم » .
- ويقول خالد محبى الدين : « ٦٧ ده فى نظرنا هو الشرخ الكبير فى ثورة يوليو .. لإنه طبعاً هذه الحرب إحنا بنعانى من آثارها حتى اليوم .. مع كل النوايا الطيبة فى الرغبة فى الدفاع عن سوريا ومساعدة الشعب الفلسطينى إنما التخطيط لم يؤدى إلى النتائج بتاعتها .. جاءت

النتيجة هزيمة الجيش المصري واحتلال سيناء .. وللخروج من أزمتها مصر بتدفع الثمن إلى الآن .. فما إدوش القيادة لتدريب الجيش وجعله جيشاً عسكرياً منظماً لتحقيق الفكرة الكبيرة .. وكانوا يستخدموا الجيش كوسيلة للضغط .. فى الحياة السياسية » .

• ويقول سعد عبد النور : « الهزيمة لم تكن بسبب الجيش إنما بسبب سوء السياسة وسوء تنظيم القائمين على هذا الجيش » .

• وأسأل محمد مأمون الهضيبي : ما رأى الإخوان فى نكسة ٦٧ ؟

• « طبعاً .. هذه مش نكسة .. دى مصيبة كبرى .. نحن لغاية النهارده ما وصلناش لـ ٥ يونية ٦٧ .. كان حافظ الأسد معه الجولان وعاوز ما هو أكثر .. إحنا يا مصريين كان معانا لغاية قطاع غزة ورفع هناك وعاوزين ما هو أكثر .. إحنا النهارده كل اللى بنحاوله الضفة الغربية اللى كانت جزءاً من الأردن .. فالنهارده الضفة الغربية فى .. قطاع غزة فى .. الجولان فى .. النهارده حتى الآن بنحاول إننا نصل إلى شىء معين كنا عليه قبل فجر ٥ يونية .. فهذه واقعة تاريخية طبعاً .. وهذه نكبة سياسية واقتصادية وفكرية إلى الآن ولم تعوضها حرب » . ٧٣ .

• وأسأل د . هدى عبد الناصر : هل تغير الرئيس بعد الهزيمة ؟

• « لاشك أنه تأثر نفسياً جداً » .

• وهل أثرت عليه النكسة صحياً ؟

• « صحياً لم تؤثر .. لكن والذى من يوم ١١ يونيو وضع كل طاقة الغضب والتأثر فى إعداد الدولة للمعركة وجهها لإعادة البناء بنفس الإصرار والعزيمة ويمكن أشد » .

• هل كان الرئيس حزينا بسبب الهزيمة أم لأنه مسئول عنها ؟

• « كان يعتبر نفسه مسئولاً .. ولا تنسى عدد شهداءنا .. ومصر كلها ضحت فى هذه الحرب » .

• وأسأل سامى شرف : هل تغير الرئيس عبد الناصر بعد حرب ٦٧ ؟

• « كانت الحرب صدمة كبيرة له .. وهو فى مجلس الوزراء وأنا كنت وزيراً أيامها قال لى أنا عاوز كل واحد فيكم يقول بصراحة الوضع إيه وحفندر نعمل إيه .. هو أحس بقى إنه كان مخنوقاً وإن الأوامر اللى إياها لعبد الحكيم عامر لإرسال الجيش مش أوامره .. فحب يعرف إيه اللى حصل فى البلد .. القيسونى اتكلم .. ونزيه ضيف .. و .. و .. إلى آخره .. وجاء الدور على .. فأنا اتكلمت إنما كنت جاداً شوية .. فزل منى قال لى الكلام ده كان مفروض تقوله لى فى البيت .. قلت له دلوقتى مافيش حاجة اسمها بيت ولا غيط .. البلد دى بلدنا كلنا .. وزى ما إحنا وزراء ونعلم الكثير .. رجل الشارع لازم يعلم إيه السبب اللى خلى سيادتك تعطى أوامر بتحريك الجيش إلى سيناء .. هو واقع الأمر أحس إنه غلط واضطر إنه راح الاذاعة والتلفزيون

واعترف إنه أخطأ .. وأحب إنه يلقى المسؤولية كاملة عليه .. إحنا مارضيناش .. وقلنا له تفضل .. على ما نلاقى بنى آدم يلم الشعب كله حواليه .. العملية دى حتأخذ وقت طويل .. وإحنا الوقت مش فى مصلحتنا » .

* **ويقول د . مصطفى خليل :** « من طرد قوات الطوارئ وإغلاق خليج العقبة إلى قيام حرب ٦٧ .. وما نتج عنه قيام حرب ٦٧ من احتلال إسرائيل لسيناء والضفة والجولان .. وغير تماماً القضية الفلسطينية أو غير النزاع العربى الإسرائيلى .. لأن النزاع الذى كان يقوم قبل ذلك هو .. سيناء كانت فى حوزتى .. والجولان مع سوريا .. والضفة الغربية كانت محتلة ولكن تقريباً مع الأردن .. فيه العلاقات بينها وبين الأردن .. لما حصل احتلال الضفة واحتلال سيناء والجولان .. تطور النزاع إلى أننى بأطلب إرجاع الوضع إلى ما هو عليه قبل ٦٧ .. دى مش القضية الفلسطينية الأساسية .. دى القضية التى نتجت عن هزيمة ٦٧ .. وده اللى أحب أن أوضحه أمام الرأى العام » .

* **ويقول أحمد حمروش :** « من بين ٣٤٠ طائرة مصرية صالحة للعمل دمرت على الأرض ٣٠٠ طائرة .. ولم تقتصر الخسارة على الطائرات وحدها ولكنها لحقت بالطيارين أيضاً » .

* **وأسأل مرتجى : خسائرنا من الحرب كانت إيه ؟**

* « أولاً ماحدث عارفيها .. وفيه كثير جداً هربوا من غير ما أحد يعرف إن كان دول ماتوا ولا ما ماتوش .. فيعنى ما أقدرش أقرر .. لكن إحنا خسائرنا فى المعدات أكثر بكثير جداً من خسائرنا فى الأفراد .. لأن طيعا القوات وهى بتمر فى الممرات كان اليهود بيضربوا أول عربية وأول دبابة والباقين كلهم يبقفوا وراءها .. وإحنا عندنا لما نوقف العربية الأولى مش نستمر محافظين على الفواصل لأ نروح كاسرين عليها .. فأصبح طابور جميل تنزل الطائرة تقرب منه زى ما هى عاوزه .. ومافيش طيران خالص .. علشان كده .. إحنا خسرنا معدات أكثر كثير من الأفراد » .

* **حضرته كقائد جبهة ألم تبلى بالخسائر أو ما علمتش العدد إيه فيما بعد ؟**

* « فيما بعد إيه .. مافيش فيما بعد » .

* **فقدنا نسبة قد إيه من قواتنا ؟**

* « شوف إحنا كان عندنا حوالى ١٣٥ ألف .. اللى كانوا فى الجبهة حوالى ٨٥ ألف .. منهم كانوا احتياطى .. فالخسائر من ٢٠٪ إلى ٣٠٪ .. الناس اتفرقتش يعنى فى العراء .. كل واحد يمشى على مزاجه .. يعنى قدروا يتفادوا بعض الخسائر » .

* **سجلات وتسجيلات حرب ٦٧ أين هى الآن ؟**

* « المفروض فيه إدارة مسئولة عن الحاجات دى .. ومسئولة عن أعداد الموتى .. والحاجات دى كلها كان مفروضاً يبقى فيه تنسيق .. لكن دى كلها راحت » .

- **بفعل فاعل ؟**
- « بفعل فاعل أو تغطية موقف مشين للجماعة الزعماء .. كانوا يحبوا إنهم يعرفوا .. ٥ الحاجات دى نقدر نقول كان لها دور فى الموضوع » .
- **تقصد مين الزعماء يافتدم ؟**
- « المسئولين عن الحرب .. ومين المسئول عن الحرب .. رئيس الجمهورية » .
- **وأسأل سعد الشاذلى : ضحايا هذه الحرب نتكلم عنها .. يعنى أولا التعبئة كانت كام جندى**
- « حسب ما أتذكر وحسب ما كتبه الفريق محمد فوزى فى الكتاب بتاعه لأن هو فى هذا الود كان رئيس أركان حرب القوات المسلحة .. طبعا أقدر منى أن يعرف هذه الحقائق .. حسد ما أعلن وحسب ما قرأته إن القوات كانت فى هذا الوقت تقدر بحوالى ٦٠٠ ألف » .
- **فلتتنا منها كام .. بمعنى عدد الشهداء وعدد الجرحى .. والمعدات ؟**
- « لما أقول ٦٠٠ ألف يعنى القوات المسلحة ككل من ٥٠٠ إلى ٦٠٠ ألف .. ولكن اللي دخلو سيناء وقتها كانوا حوالى ٨٥ ألف أو قريب من هذا العدد .. خسرنا منهم حوالى ١٣ أو ٢ ألف قتيل وجوارهم حوالى ٣٠ إلى ٤٠ ألف جريح .. يعنى نسبة كبيرة جداً .. والأخطر من هذا أن حسب ما جاء فى كتاب الفريق فوزى أننا خسرنا ٨٥٪ من المعدات العسكرية .. وهذا كانت كارثة كبيرة بالإضافة إلى ١٠٠٪ من القوات الجوية .. الطيران بتاعنا كله دمر .. فكانت نكسة وهزيمة بكل ما فى الكلمة من معنى » .
- **ويقول أحمد أبو الفتح :** « أقدم عبد الناصر على « تهويشته » التى انتهت بحرب ٥ يونية سنة ١٩٦٧ .. وهذه الحرب الملعونة ضاع فيها قطاع غزة العربى وال الضفة الغربية والقدس الشرقية .. وتدنست أعز الأماكن المقدسة بأحذية الإسرائيليين الذين يدخلون المسجد الأقصى ثانى قبلة المسلمين بأحذيتهم كما يندسبون كنيسة القيامة باحتلال بيت لحم » .
- **وأسأل د . هدى عبد الناصر :** « قال البعض إنه كان يقصد « تهويشة » وليس الحرب ؟
- « لقد كان ذلك عدواناً من جانب إسرائيل » .
- **وغلق المضايق وخليج العقبة وإبعاد البوليس الدولى ؟**
- « كان هذا حق مصر واستردته .. ولم تكن مصر معتدية » .
- **يقول أحمد حمروش :** « رغم قسوة الهزيمة .. لم يسقط النظام ولم تكتب الكلمة الأخيرة فى ثورة يوليو » .
- **وأطلقنا كلمة « النكسة » على هزيمتنا الكبيرة فى ١٩٦٧ ...**
- **ويقول عبد المجيد فريد :** « جاءت النكسة .. والنكسة كانت شديدة » .

- ويقول د . عبد العظيم رمضان : « كانت النكسة فى ٦٧ هى هزيمة نظام .. لا هزيمة جيش .. لم يكن لها مبرر على الإطلاق .. ونكسة ٦٧ مازالت آثارها حتى هذه اللحظة .. وكانت بداية التقهقر والانحسار .. وكانت الهزيمة شرخاً فى الجدار سمح برؤية كل الذى كان خفياً وراءه » .
- ويقول محسن محمد : « أطلقنا اسم النكسة على الهزيمة .. بل ضحكنا على أنفسنا وقتلنا إنها هزيمة فى معركة وليست هزيمة فى حرب » .
- ويقول أحمد أبو الفتوح : « تألمت غايبة الألم وحزنت غايبة الحزن لهزيمتنا المؤسفة والمخجلة التى نشرت عنها الصحف فى الخارج الكثير .. وكان ابنى هو الذى أبلغنى بأن الحرب انتهت لصالح إسرائيل بعد بدايتها بساعات » .
- وكانت النكسة جرحاً خطيراً فى نفوس جميع المصريين .. وشرخاً عميقاً فى جدار ثورة يوليو .. وفى نفس عبد الناصر شخصياً ..



المشير والمصير

- كانت النكسة عبارة عن شرخ عميق فى جدار ثورة يوليو .. وبقعة سوداء فى صفحات تاريخنا المعاصر ..
- وكشفت النكسة ما وراءها من فساد ومخالفات وإهمال وتسبب .. علاوة على صراع على السلطة بين الرئيس عبد الناصر والمشير عامر .. وهو ما لم يكن معروفاً على الملأ ..
- * ويقول جمال حماد : « كان الناس يظنون أن عبد الناصر والمشير كالتوءم على وئام تام .. وبدأ الشعب المصرى يرى أشياء جديدة لم يكن يعرفها .. وعبد الناصر نفسه بدأ يتكلم عن مراكز القوى فى أثناء صراعه مع المشير عامر » .
- * وأسأل الفريق أول عبد المحسن مرتجى : هل المشير خان الرئيس بشكل أو بآخر فى الأواخر ؟
- * « أنا ما أعرفش لكن هو زى ما بأقولك إن هو كان بيقول أنا أخويا عبد الناصر .. أنا سمعتها دى منه » .
- * وهل الرئيس خان بشكل أو بآخر المشير ؟
- * « أعتقد آه » .
- * وأسأل مصطفى أمين : المشير عامر ؟
- * « كان يحب جمال عبد الناصر جداً .. وكان جمال عبد الناصر يبجبه جداً .. ولكن أخطاءهما أنهما كمنوا الصحافة فلم يعرفوا الأخطاء التى وقعت .. ولو كانت الصحافة حرة فى ذلك الوقت .. لعرفت الأخطاء التى وقعت فيها ولما حدثت الكارثة » .
- * وأسأل جمال عامر : فيه اتهامات وأقاويل كثيرة بتتقال عن المشير .. من ضمنها ما يمس شخصه ومن ضمنها ما يمس كرجل عسكرى .. تدافع عنه وتقول إيه بصفته ابنه الأكبر ؟

• الهزيمة لها أسباب كثيرة .. إحنا لم تكن مستعدين للحرب خالص .. كان الجيش فى اليمن .. فرار غلق خليج العقبة كان القرار الذى أشعل نار الحرب وكانت الحرب محتمة .. والباقي معروف .. قبل الحرب بسنتين الميزانية اتخفضت فى القوات المسلحة لظروف البلد .. لم يكن هناك استعداد للحرب إطلاقاً .. واليهود فرضوا توقيتهم علينا .. وطبعاً دى كانت مؤامرة .. اليهود كانوا بيسعدوا لهذه الحرب من فترة وعارفين كل حاجة عننا .. ويمكن لو كنا قدرنا وعملنا الضربة الوقائية كانت قللت .. مش ضرورى كنا تكسب .. لكن كانت قللت الخسائر لحد كبير .. وده كان رأى المشير .. إن هو بوجه ضربة .. ولا أحد يذكر هذا الكلام .. بنتكلم فى حاجات ثانية ليس لها علاقة بالموضوع ونسيب الموضوع الأساسى .. النهارده فيه لجنة للتاريخ .. فين هى .. مش فاهم اتعملت اللجنة وتشكلت .. وسوف تأخذ اتجاهها إيه الله أعلم .. لكن على الأقل أحسن من اللى بيتكتب فى الجرائد ده .

• وأسأل لطفى واكد : ما حدث بينهما حضرتك تفسره بايه ؟

• من مشاهداتى إن كل ما بتزايد الديكتاتور .. والديكتاتورية مش ديكتاتور واحد .. لا كل واحد عامل ديكتاتور فى مجاله .. كل ما يحدث فقدان للتوازن .. ومن هنا يصبح لاشيء منطقي .. إنما هو بلا شك تمسك عبد الحكيم عامر بالسلطة .. واعتقاد جمال عبد الناصر إن تمسكه بسلطة القوات المسلحة فيه ضرر كبير عليها .. نتج عن هذا بدايات الخلاف .. كان ممكن الخلاف ده يكون بين صديقين .. ويبقى له حدوده .. إنما عندهما يكون بين ندين ما بيبقاوش حدود .

• وأسأل عبد الرحمن البيضاني : قلت فيما قلت .. « سيطر شمس بدران على السلطة باسم المشير ثم استولى على المشير وأصبح صاحب القرار فكانت الكارثة » .. تعليقك إيه على هذا ؟

• « لازلتم مقتنعاً بوجهة النظر هذه .. إن إحنا كنا نتعامل مع الرئيس عبد الناصر مباشرة .. ونفاجأ بأن القرارات أو الاتفاقات التى نصل إليها مع عبد الناصر لا تأخذ طريقها فى كثير من الأحيان إلى التنفيذ .. فعلمنا أن المشير عامر كان بيتدخل فيها .. ولإن كان المفروض مثلاً إن الرئيس السادات سيكون أول سفير لمصر فى اليمن .. يعنى من ضمن تخطيط الثورة بالاتفاق مع الرئيس عبد الناصر .. إن السادات حيترك رئاسة مجلة الأمة ويكون أول سفير لمصر فى اليمن للتفاهم الذى كان بيننا قبل هذا بسنوات .. وفوجئنا بأن المشير عامر وصل ونحى السادات على أن يكون له كلمة نافذة بين الثوار اليمنيين .. رغم إن هو الذى احتضن الثورة فى البداية قبل أن تقوم .. وهو الذى قمنا أصلاً للرئيس عبد الناصر .. وهو الذى دافع عن موضوع قيام الثورة .. الخ .. وعلمنا فيما بعد إن المشير عامر كانت إرادته مرهونة بقرار شمس بدران » .

• ويقول صلاح الدسوقي : « أنا كنت فى فنلندا .. وأنا بعث خطاباً لجمال عبد الناصر .. ونشره الأستاذ جلال الحماصسى أكثر من مرة .. أظن نُشر فى عموده « دخان فى الهواء » .. وأنا قلت الحقيقة إن الانحرافات داخل الجيش بقيادة عبد الحكيم عامر أدت لتدهور الجيش المصرى ..

وقلت إن الجيش المصرى فى ٦٧ حُرم من القوة الضاربة لأى جيش من جيوش العالم .

• وأدت الهزيمة إلى تخليص عبد الناصر من هيمنة قادة الجيش .. لأنه لم يستطع ذلك قبل النكسة ...

• ويقول أحمد حمروش : « لقد هزت الاستقالة جمال عبد الناصر .. فلم يكن يتوقع من عبد الحكيم عامر هذا التصرف » .

• ويقول جمال حماد : « انسحب عامر إلى مرسى مطروح وأرسل ضباط القوات المسلحة برقيات احتجاج للرئيس وخشى عبد الناصر انقلاباً من الجيش .. وبذلك تكون المحاولة قد باءت بالفشل » .

• وعاد المشير عامر أقوى مما كان فى سنة ٦٢ .. ولم يكن هذا هو الخلاف الأول ...

• ويقول د . عبد العظيم رمضان : « فقد حدث ما حدث بين الرجلين سنة ١٩٥٦ .. وبعد الانفصال .. ثم كانت الفترة من سنة ١٩٦٢ إلى سنة ١٩٦٧ التى قال عبد الناصر إنه يجهل كل شيء عما يدور داخل الجيش خلالها » .

• ويقول جمال عامر : « أنا أتصور إن أول صدام كان سنة ٦٢ لما اتعمل مجلس الرئاسة .. وكانوا مصريين إن هم يحدوا من اختصاصاته وفى الترفيات وكذا وكذا .. وهو أسد ده نوع من تحجيم دوره فرفض هذا وقدم استقالة مسببة فى ٦٢ .. لكن طبعاً الرئيس عبد الناصر قابله ونقاها على الموضوع ده .. لكن أنا أعتقد إن دى عملت حاجة بينهما زى شرح .. بس جاءت ٦٧ وأعتقد إنها كانت كارثة بجميع المقاييس وكان لازم يحصل فيها حاجة .. لإن دى كارثة حلت بالبلد ويمكن كان تعصف بأى مخلوق .. لم يكن متصوراً إن هما يبقا مع بعض أو يحكما تانى مع بعض .. ولازم يبقى فيه كبش فداء فى الآخر .. يعنى الناس بتسأل من المسئول عن هذه الهزيمة فكان لازم يبقى فيه كبش فداء .. وكان هو عبد الحكيم عامر » .

• ويقول محمد أحمد : « عبد الناصر لما كان عمل مجلس رئاسة بعد الانفصال .. علشان عبد الحكيم عامر يترك الجيش .. والثانى غضب وراح مرسى مطروح .. ابتدئت المشاكل .. وهو كان حريصاً على عدم حصول أى انقسامات أو مشاكل فى الجيش بالذات » .

• ويقول أحمد طعيمة : « قال لى الرئيس أنا يا أحمد يا طعيمة جت فترة أصبحت معزولاً والمشير والقوات المسلحة يعنى تقريباً عزلونى .. ما بقتش مستطيع أعمل حاجة .. وهذا الكلام ما كنتش مستطيع أنى أقوله لك لأن ده أنا رئيس جمهورية .. فده ما كانش فى صالح البلد .. هذا ردى لك » .

• ويقول عبد المجيد فريد : « ما بعد النكسة كان فيه جلسة مهمة للجنة التنفيذية العليا للاتحاد الاشتراكى .. كانت يوم ٤ يوليو .. فقال نصاً والنص موجود .. « أنا منذ خلاى مع المشير لم أعد على علم بما يحدث فى الجيش منذ عام ١٩٦٢ .. ولحسابية عبد الحكيم عامر كنت مش

عاوز أشعره إن إحنا من وراه بنلم معلومات وبالتالي فقدت الاتصال والمعلومات الدقيقة عما يحدث في الجيش منذ عام ١٩٦٢ .. طبعاً ده مش صحيح .. في كتاب لى بأقول إن الحنة دى مش صح .. لأن كان ممكن عبد الناصر وكان في ذلك الوقت زعيماً وكان له « كاريزما » ولو حط هذه المشكلة أمام الناس .. الناس كانت حتبقي معه .. بس هو خاف إن الجيش ينزل بالدبابات والعربات وأسلحة ويحصل دم » .

* **ويقول توفيق عبده إسماعيل :** « عاشوا مع بعض وكانوا على علاقة وثيقة .. كان ببجيب عربية من برة لازم يبقوا « اثنين » .. لما ببسافر في أى مكان كان لازم هو يكون موجوداً .. يعنى العلاقات كانت أقوى بينهما هما الاثنين .. إنما مش الجهازين .. وكان ده مسمى جمال وده مسمى عبد الحكيم » .

● **كان عامر يعمل ضابطاً بالسودان عام ١٩٤١ وحصل على ترقية استثنائية لشجاعته وكفاءته في حرب فلسطين .. ولكن البعض قال إن ترقيته فجأة من صاغ إلى لواء أمر غير مستساغ ..**

* **ويقول د. ثروت عكاشة :** « كان المشير عبد الحكيم عامر إنساناً نبيلاً رقيق المشاعر .. لا تنتقصه الشجاعة .. له جولات بطولية في معركة « بيت سانيم » في فلسطين عام ٤٨ .. نال عنها التقدير والترقية » .

* **ويقول توفيق عبده إسماعيل :** « هو كان عنده مشكلة .. كان عاطفياً جداً .. العاطفة دى بتبقى كويسة في حاجات ووحشة في حاجات .. له دور رئيسي في معركة مشهورة قادها في رفح ورفح استثنائياً فيها .. هو كان شخصية عسكرية متميزة ومتربى عسكرياً كويس وخريج كلية أركان حرب ووطنى » .

* **ويقول الفريق أول مرتجى :** « المشير كان رجلاً شهماً إنما ملاكانش عنده خبرة عسكرية .. لإنه من صاغ رائد إلى لواء قمشير .. طبعاً ملاكانش عنده .. وملاكانش هو ببحاول كمان في إنه يكتسب خبرة عسكرية » .

* **يمكن كان معتمداً عليكم ؟**

* « ما هو برضه كقائد المفروض إنك تبغى أكثر خبرة منى .. وأنا كنت أعمل مناورات كثيرة ملاكانش ببجضرها » .

* **ويقول المشير محمد عبد الغنى الجمسى :** « كان من ضمن الأخطاء التي ارتكبتها الثورة واركتبها الرئيس عبد الناصر من وجهة نظرى إنه عين الرائد عبد الحكيم عامر قائداً عاماً للقوات المسلحة .. وده كان لتأمين الثورة .. ولكن عبد الحكيم عامر كرائد ورتبته بسيطة كان ضابطاً ناجحاً في سلاح المشاة في ذلك الوقت .. لما يترقى مباشرة إلى القائد العام للقوات المسلحة طغرة كبيرة لرتبة كبيرة ما أخذش الخبرة الطويلة التي فيها .. وظهرت عدم خبرته في حرب ١٩٥٦ وكانت واضحة جداً في حرب ٦٧ .. أنا أذكر لشخص عبد الحكيم عامر كفاءته كرائد في هذا

الوقت .. إنما كونه يتولى القيادة العامة للقوات المسلحة كان سابقاً لأوانه جداً جداً .. فإذا كان هناك خطأ من وجهة نظري فهو خطأ الرئيس عبد الناصر .

• وأسأل أحمد أبو نار : ماذا تقول عن المشير عامر بعد مرور هذه السنوات .. وقد كنت قريباً منه ؟

• « كل إنسان له عيوب وله مميزات .. ولا كامل إلا الله وحده .. ولكنى بقربي من المشير أجده شخص يتمثل بالرجولة وصعدي حقاً وتاريخه حافل وأترقى استثنائى فى حرب ٤٨ فى فلسطين وكان أركان حرب برغم رتبته الصغيرة » .

• وعامر من عائلة صعيدية من بلدة أسطال .. صادق عبد الناصر من أيام الكلية الحربية .. رغم الاختلاف الطبقي بينهما .. وهو من أقارب حيدر باشا ..

• ويقول جمال الليثى : « عبد الحكيم عامر كان ابن بلد وجدع .. وبلدياتى » .

• وأسأل برلنتى عبد الحميد : لو قلنا مين هو المشير فى بضعة كلمات تقولى إيه ؟

• « ده سؤال صعب قوى .. هو رجل صعيدى مصرى .. طيب القلب جداً .. مؤمن جداً .. ويكره الإلحاد والملحدون ويمكن دى من الأسباب اللي أدت لمصرعه .. معنى ممكن أقول فى جملة واحدة كده إن المشير عبد الحكيم عامر إنسان مصرى طيب جداً وأصيل » .

• ويضيف أحمد أبو نار : « كان ضد الملك فاروق وقريباً لقائد الجيش حيدر باشا .. وهو من أسس قيام الثورة .. وكان عبد الناصر يثق فيه ثقة لا حدود لها .. لدرجة إن أخوه متزوج ابنة المشير .. ورجل على خلق ورجل ذو شهامة كبيرة جداً » .

• ويقول عباس رضوان : « أنا يمكن أحب أوضح هنا هو إن علاقتى بالاثنتين عبد الناصر وعبد الحكيم عامر كانت متوازية » .

• وما كانش فيها تعارض ؟

• « ما كانش فيها تعارض وكانت العلاقة على نفس المستوى .. بدليل إن يمكن من ٥٤ إلى ٦٧ ما فيش خلاف حصل بينهما .. ما كانوش الاثنى كل منهم ببلجأوا لى علشان أوصل رأييه وأهدى الآخر .. وده استمر يمكن إلى ٦٧ .. وعبد الحكيم عامر كضابط .. أولاً ضابط كان كفه جداً .. حارب زى ما قلت لك وأخذ ترقية استثنائية » .

• وقريب حيدر باشا ؟

• « وكان هو المقرب من السرايا فى الوقت ده .. ولا أى حاجة حصلت معاه .. يمكن الحاجة اللي يختلف أو يرتفع بها عن الآخرين جميعاً هو وفازة لصديقه » .

• عبد الناصر ؟

• « أى صديق .. أنا بأعتبر وفاءه لجمال عبد الناصر يفوق وفاء أى أخ شقيق لأخيه .. بدليل إننا

فى يوم من الأيام كنا فى الإسماعيلية فى حفلة أو مؤتمر شعبى والنور انقطع .. كان دقائق.. كان يحولوا على مولد كهربائى .. فى الثلاث دقائق دول أو الأربعة .. وعاد الضوء كان عبد الحكيم عامر واقف أمام جمال عبد الناصر اللي قاعد على الكرسي .. يعنى عبد الناصر قاعد كده .. وعبد الحكيم عامر واقف أمامه وظهره للجمهور .. يعنى أى طلبة كان هو اللي حياخذها .. حرسه ما حدش منهم اتحرك لدرجة إن فيه بعض من الإخوة الوزراء فى هذا الوقت يمكن عينيها دمتت .. ده مثل ما حدش شافه .

• **ويضيف مرتجى :** « أنا أفكر إنى حضرتها فى الإسماعيلية .. كانا بيلقيا بياناً والناس كانت مجتمعة كلها ويعدين النور انطفأ عدة ثوانى .. أول ما ولع النور طبعاً لقينا عبد الحكيم عامر واقف أمام عبد الناصر يحميه .. عبد الحكيم عامر ده ظل عبد الناصر .

• **ويقول عبد المجيد فريد :** « هو علاقته مع المشير عامر علاقة خاصة وتحتاج إلى دراسة .. لأنه هو الوحيد اللي كان تتميز علاقته بحاجة خاصة .. وقال لى مرة الرئيس فى جلسة من الجلسات : « إحنا أصلاً صعايدة سوا .. وطلعنا ضباط سوا .. وأخذنا شقة مع بعض فى القاهرة .. وهو اللي علمنى السجائر .. ورحنا سوا مع بعض متقباد فى وجه قبلى .. وعبد الحكيم أنا الوحيد اللي أدخل بيته وأدخل لأسرته حتى لو ماكش موجود .. والعكس عندى بييجى ويدخل عندى وعند أسرته دون إذن .. الوحيد .. فكانت علاقته مع عبد الحكيم علاقة خاصة جداً » .

• **وأسأل محمد أحمد :** أصدقاء الرئيس الراحل جمال عبد الناصر يا ترى مين ؟

• **« الحقيقة اللي هم كانوا زملاءه كان أقرب صديق له المرحوم عبد الحكيم عامر » .**

• **وأسأل لطفى واكد :** أقرب أعضاء مجلس قيادة الثورة إلى قلب الرئيس عبد الناصر كان مين ؟

• **« عبد الحكيم عامر طبعاً » .**

• **وأسأل الفريق أول مرتجى :** هل كانا صديقين حميمين أيام الكلية وأيام الشباب ؟

• **« كانا صديقين حميمين جداً .. وكان عبد الحكيم عامر ببصرف عليه كمان » .**

• **« حضرتك كنت زميلاً للمشير ولرئيس أيام الكلية .. وبتقول لى ببصرف عليه .. إزاي ؟**

• **« جمال عبد الناصر ما هو كان فقيراً .. لكن المشير كان من المنيا من عائلة كبيرة وكان مبسوط مادياً وببصرف على جمال عبد الناصر .. فى المأكول والمليس .. إلخ .. قبل زواجه » .**

• **بينما يقول أمين شاكر :** « الاثنان تعارفا فى مكتبة الكلية الحربية وأصبحا أصدقاء . وعبد الحكيم عامر ماكانش زى ما أنت متصور ثرياً وكذا .. بل بالعكس كان عايش عيشة ضنك فى شارع غرب القشلاق فى العباسية .. وعبد الناصر كان عايش عيشة أحسن منه لأن زوجا

عبد الناصر كانت ثرية غنية .. هي من أسرة إيرانية لكن نشأت بينهما هذه العلاقة ونمت هذه العلاقة وتطورت » .

• وأسأل شمس بدران : هل فعلاً كما قيل المشير كان يبصر على عبد الناصر .. أيام ما كانا لسه ضباطا صغيرين أو أيام الكلية ؟

• « لا .. مش بهذا المعنى .. عبد الناصر كانت حالته كويسة .. عنده عربية .. وحالته مش بطانة يعنى » .

• وأسأل برلنتى عبد الحميد : أقرب أصدقاء المشير لنفسه كان مين من مجلس قيادة الثورة والضباط ؟

• « للأسف .. جمال عبد الناصر » .

• ليه ؟

• « عبد الحكيم كان فى الحقيقة بيعتز بهم كلهم .. لإنه زى ما قلت كان حتى لو حصل خلاف فى الفكر أو فى رأى لكن الاحترام كان متواجدا بين أعضاء مجلس قيادة الثورة .. لإنهم عارفين إنهم قاموا وعملوا عملاً قيماً وكان فيه فدائية ووطنية .. فالاحترام دائما يبقى فى الخلفية لما يتعاملوا مع بعض .. ممكن يختلفوا .. ممكن يزعلوا .. ممكن كل حاجة لكن كان فيه احترام متبادل بينه وبين معظم أعضاء مجلس قيادة الثورة » .

• وفيمن أصيب بخيبة أمل ؟

• « فى عبد الناصر .. هو اتفاجىء به .. ماكانش متخيلاً إنه ممكن يعمل معاه كده خالص .. لكن السياسة مافيهاش مستحيل .. مافيهاش الصبح والغلط .. السياسة هى مصالح .. وعلى الآخرين إذا دخلوا فى السياسة أن يتحملوا نتائجها » .

• أنجب المشير من زوجته الأولى نجبية وصلاح وقبله جمال تيمناً بعبد الناصر .. ثم أنجب عمرو من زوجته الثانية الفنانة برلنتى عبد الحميد ..

• وأسأل جمال عامر : ماذا تقول لنا عن المشير عامر كإنسان وكأب ؟

• « هو كان أباً عظيماً طبعاً وببهم بأولاده .. ورجلاً .. وكان عنده مشاعر .. وأعتقد إنه إنسان ممكن تسأل الناس عنه .. لو حبيت تنزل ويبقى فيه حرية فى الكلام أسأل أى أحد ويقول لك المشير عمل كذا وأنا بأحبه .. يعنى ستلاقى حاجات كثيرة وقصص إنسانية لا حصر لها .. الواحد ببشر فيها كل يوم بدون مبالغة والواحد سعيد جداً .. لأن إحنا ماشيين بحسه الحقيقة .. أنا بأفخر إننى ابنه لأن مجرد بس مابيجى نكر اسمه تلاقى الناس فعلاً عن حب عاوزة تساعدا .. وأعتقد أن مافيش سبب للمجاملة حالياً » .

- كان الرئيس عبد الناصر والمشير عامر صديقين حميمين لدرجة أن المشير عامر سمى ابنه جمال اللي هو أنت والرئيس عبد الناصر سمى ابنه عبد الحكيم ؟
- « بداية أنا سميت جمال قبل الثورة ودي تحسب للمشير .. لأن هم كانوا شخصين عاديين جداً .. وتقريباً مقيمين مع بعض وفيه علاقة طبعاً جامدة جداً » .
- وأسأل شمس بدران : وعلاقته بفنانة ثانية ؟
- « قالوا إن هو اتعرف بوردة .. ما أعرفش وردة الجزائرية دي خالص .. دي إشاعة من وردة » .
- وأسأل مرتجى : هل كان على علاقة بالفنانة وردة ؟
- « أنا فى الحقيقة ماكنتش أعرف .. اللي قال لى هذا برضه الرئيس جمال عبد الناصر لما رحلت قابله بعد ٦٧ .. هو اللي قال لى موضوع علاقته بوردة .. إن حسنين هيك هو اللي قال له .. وأنا زعقت له » .
- وأسأل عباس رضوان : من ضمن اللي قالوه ارتباطه بأهل الفن .. ورجاله أيضا ارتبطوا بالفنانات ؟
- « يعنى يمكن بحكم سلوكياتى أنا أقول ماكنش له ارتباط علمته .. ووجدت فيه هو شخصياً التصرف الرجولى .. وارتباطه الأخير لما خُلف من السيدة برلنتى عبد الحميد » .
- ويقول أحمد حمروش : « الغريب أن المشير تزوج من برلنتى عبد الحميد .. وعلى شفيق تزوج من مها صبرى .. وعبد المنعم أبو زيد من سهير فخرى .. وهن جميعاً من الفنانات .. يبدو أنهم يحبون الفنانات » .
- وأسأل سامى شرف : اطلقت الشائعات على عدد كبير من القادة وبالذات فى علاقاتهم بالفنانات .. إيه الحكاية ؟
- « أسأل من يطلق هذه الشائعات » .
- يعنى قالوا المشير والفنانة وردة .. هل ده صحيح ؟
- « لم يصل لعلى هذا » .
- قالوا المرحوم على شفيق والفنانة مها صبرى ؟
- « لأ دي زوجته » .
- والمشير عبد الحكيم عامر وبرلنتى عبد الحميد ؟
- « زوجته ومخلقة منه » .

- * وبعدين قالوا سامى شرف وإحدى الفنانات ؟
- * « كريمة بتاعة المعادى .. آه .. اثبت !! »
- * أثبت إزاي ؟
- * « مش إنتم اللي بتقولوا !؟ »
- * « لأ مش إحنا اللي بنقول .. ده هم اللي قالوا وحبينا نستفسر ؟
- * « هذا الموضوع حاول الكثير إن هم ينكشوا فيه .. فبنقول موتوا بغيظكم .. ما لقوش فى الورد عيب قالوا يا أحمر الخدين .. سامى شرف نقى ونظيف واللى ماسك حاجة يجيبها فى وشه .. »
- * « هل زى ما قلت فى كتابك .. زوجة النائب حسين الشافعى هى اللي كانت وراء نشر إشاعة « كريمة » ؟
- * « هى إحدى العناصر اللي كانت وراء نشر هذه الإشاعة . .
- * « حضرتك تشرحها لى ؟
- * « فى يوم من الأيام لقيت الرئيس ضرب لى تليفون اللي ببنى وبينه .. ويقول لى اعتقل ماجدة .. قلت له ماجدة فى موسكو .. أنا أول شىء خطر فى ذهني ماجدة الصباحي .. وماغدة الصباحي كانت فى مهرجان موسكو بتاع السينما .. فقال لى لأ ماجدة الشافعى .. قلت له ليه ؟ قال لى دى قاعدة جوه مع تحية وبتقول لها إن سامى شرف مرافق « كريمة » ومش عارف إيه .. فالناس اللي بتتسلى عليك وهم أقرب الناس لنا وهم يعلموا الحقيقة إن أنت لا بتاع كده ولا كده .. وإن بتحارب الحاجات دى .. لأن إحنا فيه حاجة مقتلهاش فى الحديث كله .. عبد الناصر كان لا يفصل بين التصرف الشخصى والتصرف العام للرجل العام .. كان بيعتبر الاثنين شىء واحد ودى قيمة والحمد لله .. علشان كده إحنا ماشيين النهارده ننكلم ولا نخشى إلا الله ولا نملك شيئا .. الحمد لله وأنت تعلم أنا أملك إيه وما أملكش إيه . .
- * طيب ما وضحتش لى ماجدة مين ؟
- * « حرم الأستاذ حسين الشافعى » .
- * « وأسأل أمين شاعر : شعراوى جمعة كان على علاقة بإحدى فنانات الكوميديا ؟
- * « أعتقد هذا .. أعتقد إنه كان على علاقة بها . .
- * « عُرف المشير بتعدد الاهتمامات والهوايات .. بعضها حقائق مؤكدة .. وبعضها تضاربت فيها الأقوال ..
- * « وأسأل فتحة الله رفعت : هل كانت له هوايات خاصة ؟
- * « أنا أسمع زى ما أنت بتسمع . .

- لكنك لم تحضرها ؟
- « لأ لم أحضرها » .
- « وأسأل عباس رضوان : تردد على السنة الكثيرين .. وأنا واثق رغم حرص حضرتك كشرط لمقابلتنا ألا نتحدث فى أى علاقة شخصية بأى أحد .. لكن ممكن إظهاراً للحق أسألك هل كان للمشير هوايات أخذت عليه وأثرت على كونه القائد العام للقوات المسلحة ؟
- « للأسف إن عبد الحكيم عامر بحكم وضعه بالنسبة للثورة وبالنسبة إن هو الرجل الثانى كان طول المدة معرضاً للتشهير من بعض الأجهزة .. وهذه الأجهزة كاذبة .. لم أجد فيه أى عملية انحراف .. يعنى عملية ما أعرّض يذخن ولا كلام زى كده .. كل هذا ثبت لى إنه كذب .. ومجرد تشهير .. وكان فيه يجوز من بعض زملائه أو غيرهم من يستكثر عليه أن يكون الرجل الثانى فى الثورة » .
- « وأسأل شمس بدران عن هوايات المشير الخاصة .. أو مزاجه الخاص ؟
- « يعنى إيه مزاجه الخاص .. زى ما بتسمع إنه كان « بيحشش » ؟
- « أيوه ..
- « عمره ما شاف شكل الحشيش .. هو شكله يعنى فى الكلام يمكن الناس تفتكره زى « المساطيل » شوية .. لكن هو مش كده .. عمره ما شاف الحشيش ولا يعرف شكل الحشيش » .
- « فعلاً ؟
- « خالص ولا شافه .. ولا شافه .. ده مؤكد » .
- « أمال الإشاعات ؟
- « ولا كان غاوى يشرب خمرة .. يعنى يشربها فى المناسبات لما يجبر عليها » .
- « أمال الشائعة اللى طلعت عليه مين اللى طلعتها ؟
- « الإشاعة يمكن كان فيه حواليه بعض الناس .. كانوا معروفاً عنهم إنهم حشاشين » .
- « وأسأل جمال عامر : كان بيدخن كثيراً ؟
- « آه كان بيدخن كثيراً » .
- « وأسأل الفريق أول مرتجى : هل كان المشير له هواية خاصة ؟
- « لأ ما أعرّض كان بيشرّب سجاير .. آه .. كان بيشرّب قهوة .. آه .. لكن حاجات خلاف كده أنا ما أقدرش أقر حاجة زى كده » .

• بينما يقول محمود فهميم : « الحقيقة اعفني من السؤال .. هو كان معاً في الكلية الحربية وكان معاً في فريق الملائكة بتاعى الله يرحمه .. وكان له شلة ربما كانوا متهورين شوية معاه » ..

• قيل إن المرحوم على شفيق هو اللي كان له هذه الهوايات مش المشير .. إيه الحقيقة ؟
• « الحقيقة الاثنين » .

• ويقول عبد المنعم أمين : « كل ما قيل عنه .. والتشنيعات اللي قُلت عنه .. طلعت من مخبرات رئاسة الجمهورية » ..

• ممن بالتحديد ؟

• « أنت عارف عندنا في مصر لما يكون الرئيس عاوز حاجة في أى جهاز .. تبص تلاقى كلهم بيشتغلوا له » .

• وأسأل جمال عامر : هل كان له هوايات خاصة ؟

• « والله لم يكن عنده الوقت لأى هواية .. بس أحياناً يلعب شطرنج .. تنس .. ده إذا توفر بعض الوقت لمجرد إن هو يعمل أى نوع من أنواع الحركة » .

• وأصبح عامر الرجل الثانى فى الدولة بعد ناصر .. وتصاهر الرجلان ..

• ويقول عبد المنعم أمين : « نبيه جداً .. ويغضب سريعاً .. لكنه نظيف » .

• ويقول شمس بدران : « علشان نبقى صادقين مع أنفسنا وفيه عدالة فى الكلام .. إن عبد الحكيم عامر هو اللي أنشأ القوات المسلحة الحديثة .. قبل عبد الحكيم عامر وقبل الثورة ما تقوم أيام الملك كان فيه جيش .. كنا بنسميه جيش المحمل .. إيه جيش المحمل ده ؟ كان كل هدف الجيش إن هو يعمل الاستعراض السنوى بتاع المحمل .. ماكانش فيه جيش .. كان فيه جيش « شمال .. يمين » .. طوابير تتطلع شمال يمين .. أدى الجيش » .

• أمال الجيش اللي دخل حرب فلسطين كان إيه ؟

• « ما هو كان كده » .

• والجيش اللي إنتم كنتم فيه ؟

• « آه .. كان بالشكل ده .. فيه مدرعات وفيه قوات جوية .. وفيه كل حاجة .. بس ماكانش جيشاً منطوراً بالمعنى الصحيح .. إنما أقدر أقول إن عبد الحكيم عامر هو اللي طور الجيش وهو اللي خلق القوات المسلحة الحديثة » .

• ويقول أمين شاكى : « وبعدين أسوأ ما ترتب على هذه العلاقة إن عبد الناصر اختار عبد الحكيم عامر قائداً عاماً للجيش .. دى كانت أكبر نكسة أصابت هذا البلد .. إن كان عبد الناصر معين

عامر الرجل الثاني .. أصل مين اللي عمل الثورة ؟ الجيش .. مين اللي مسك الجيش ؟
عبد الحكيم عامر .. القوة في يد مين ؟ القوات المسلحة .. هو اللي بيتحكم في كل شيء ..
ولا يجزئ أى أحد إنه يتعرض لها .. كان مين حيتعرض لها ؟ الباقيين كانوا أفراداً .. كان
كمال الدين حسين حياخذ المدرسين ويروح يتعرض للقوات المسلحة ! .. ولا صلاح سالم حياخذ
الإعلاميين ويروح يتعرض للقوات المسلحة ! .. لأ القوة الأساسية للثورة كانت القوات المسلحة
ودي ماسكها عبد الحكيم عامر .

* ويقول خالد محيي الدين : « عبد الحكيم كلنا نعرف عنه إخلاصه ونكائه ودهاءه في أن
واحد » .

* وأسأل جمال السادات : علاقة الرئيس السادات بالمشير عامر ؟

* « كانت جيدة جداً .. كانوا أصدقاء جداً .. وكان يبجى ويتعشى عندنا ونشوفه باستمرار .. وكان
دائماً المشير يجيب لنا « لبنان تشكلتس » » .

* ويقول أحمد سعيد : « الله يرحمه كان عمدة .. عمدة صعيدى لكفر كبير .. وأى عمدة في الدنيا
بيعتمد على مشايخ غفر .. قد يكون أكثرهم غير سوى » .

* ويقول د . مراد غالب : « أنت في الحقيقة تلمس نقطة حساسة جداً في نفسى .. وأنا ماكنتش
أحب أنكلم عليها لأن المشير رجل كان إنساناً جداً ومليان مشاعر .. إنسان بمعنى الكلمة .. كان
بينصر الرجالة بتويعه .. يعنى كان رجلاً صعيدياً .. والرجالة بتويعه مستعد إن هو يموت نفسه
علشانهم مش بس يساعدهم .. وبالتالي .. شخصية من الصعب إنك تحطها فين .. كنت بأعتبره
صديقاً ويمكن دى كانت شوية متناقضة مع علاقتى بالرئيس جمال عبد الناصر » .

* المهم كان وجود المشير عامر نفسه خطراً ، إذ أنه يستطيع إثارة الجيش حيث إن الجيش
كله متعلق به ..

* وأسأل د . حسن رجب : المشير عبد الحكيم عامر ؟

* « كان رجلاً طلياً جداً .. إنما بكل أسف كان بيعتمد أكثر من اللازم على المساعدين بتويعه ..
وماكانوش كلهم على المستوى الكويس من ناحية .. مثلاً معرفش الأخلاق .. الدقة في العمل
أو أى شيء من هذا القبيل » .

* ويقول أحمد حمروش : « كان عامر « الطفل العذال » حسب تعبير عبد الناصر لحسن
إبراهيم .. قد أصبحت له أنياب وأظافر .. ولم يعد عبد الحكيم القديم » .

* ويقول توفيق عيده [إسماعيل] : « كان فيه مجموعة من أصحاب المصالح من الضباط .. مش
عاوزين يتعدوا زى هريدى وهو كان مديهم مناصباً كبيرة في الجيش وخارج الجيش .. شمس
بدران طبعاً كان معاهم وكانوا بيبحثوا عن دور له علشان يبقوا هم معاه .. الاثنين مع بعض ..
وأنا أتيت لى في فترة الستينات .. أنا طبعاً سبت الجيش ٥٤ .. بدأت العلاقات الاجتماعية تنمو

مع الرئيس عبد الناصر أو مع المشير عبد الحكيم عامر أو مع زكريا محيي الدين وغيره ..
بقينا نلتقي في مناسبات يمكن أقول لك كان الكثير من الأجوبة لهما وهما عن بعد .. ما يعرفوش
ده قال إيه .. يفكرؤا بطريقة واحدة .. ولا يمكن أن يكون لأى منهما تفكير غير الثاني .. إنما
المجموعات اللى حوالىهم اللى كانت مستفيدة من عاطفة عبد الحكيم عامر .. كانت مجموعات
لها سيطرة وأساعت له وأساعت للعلاقة اللى بينهما إساءة بالغة » .

• **وأسأل شمس بدران : كان الضباط مدللين من المشير عامر .. هل ده صحيح ؟**

• « آه » .

• **يعنى كان بيدلهم ؟**

• « يعنى إيه مدلهم .. بيشوف شئونهم .. واحد مريض له حاجة ما تتعالجش إلا بره .. بيعتته
بره .. واحد أمه عيانة حتى ومالهش علاج بيعتتها بره .. خدمات إنسانية » .

• **ويقول جمال حماد : « المشير رجل صعيدى شهم وأى ضابط يلحأ له يلبي طلبه فوراً ومن
هنا اكتسب حبهم » .**

• **ويقول د . محمود جامع : « شمس بدران أيام عبد الحكيم عامر كان خلف مكتبه خزانة كبيرة ..
يوزع منها على المحتاحين من الضباط .. أى ضابط بيدخل له ويكون محتاجاً يعطيه .. وكانت
المسائل سائبة » .**

• **وأسأل شمس بدران : مكتب المشير كان فيه استغلال للنفوذ .. هل ده صحيح ؟**

• « أنهى مكتب بقى .. ما هو كان فيه عدة مكاتب .. كان فيه مكتب عسكري نحت اللى هو كان
حافظ إسماعيل واخذ مسئوليته .. وبعدين كان فيه مكتب شئون عامة اللى أنا كنت واخذ
مسئولته .. وبعدين كان فيه الحرس بتاعه والسكرتارية بتاعته » .

• **طيب مين فيهم ؟**

• « هم دول الحرس والسكرتارية هم اللى تبحروا فى عمليات كده .. يحيوا بضائع وما يدفعوش
جمرك .. ويتاجروا فى حاجات وكلام من ده .. تجارة .. وبعدين اتعمكوا كلهم واتحاكوا ..
راحوا السحن » .

• **ويقول مرتجى : « بعد ٦٢ عبد الناصر كان بيقول لى كان بينى وبين القوات المسلحة حساسية
بسبب المشير عامر » .**

• **ويقول محمود فهم : « الرئيس كان يحب المشير .. والمشير كان يحب الرئيس جداً .. لدرجة
ومما مختلفين مع بعض والرئيس محدد إقامة المشير .. كنت أطلع فوق وأجده بيكلم المشير ..
كل الناس مش عارفة إيه اللى بينهما .. مش قادر يسبب المشير أبداً .. ولا المشير قادر يسببه ..
فقلت له يافندم سوف أروح أدلك المشير فقال لى طيب استنى وطلبه .. وقال لى روح بكره**

.. ذلك .. رحلت له وجدت بالداخل عنده ترسانة من الضباط وسلاح إيه .. دخلت عليهم » .

• دخلت إزاي ؟

• « ومعى شنطة قلت لهم قولوا للمشير إني حضرت .. بصوا لى باستغراب .. منهم عباس نصار وجلال هريدى .. وقالوا لى هات الشنطة .. وقالوا للمشير .. فقال دخلوه .. عملت للمشير تدليك وكل حاجة وطلعت وهم برضه يعنى مستغربين .. فرجعت للرئيس جمال أول ما شافنى فضل يضحك .. قلت له فيه حاجة يافندم .. قال لى يا فهمم الحفيقة إنت عملت دربكة جامدة .. قلت إزاي يافندم ده المشير اتبسط .. قال المشير اتبسط لكن الحاشية اللي بره افتكروك جاي تعمل حاجة .. وكان فيه ضباط من الموجودين مع المشير بتروح الرئيس .. فقالوا للرئيس عن كل حاجة .. بس ما قدروش يعملوا حاجة للمشير » .

• بعد الرجوع فى التتقى .. غضب عامر بعد أن عاد ناصر للسلطة وحده .. واستقر رأى على منع عامر من التورط فى أكثر مما تورط فيه .. وأعلن ناصر تحديد إقامة عامر فى بيته .. وانهار عامر ..

• ويقول أنيس منصور : « كان الخلاف قائماً بينهما .. وهما أصحاب .. لكن عبد الناصر أقوى .. شخصياً أقوى .. وأكثر تماسكاً .. ومتفرد ومنضبط كقائد وكسياسى .. عبد الحكيم .. زجل فرفشة « وهليلهى » ومش منضبط ومعتمد على محبة بعض الضباط وصداقته القديمة لعبد الناصر » .

• وأسأل عباس رضوان : إيه اللى خلى عبد الناصر فى رأيك يرجع فى كلامه وما ينتحاش .. فى حين إن المشير ابتعد وظل مبتعداً ؟

• « دى فيها الاحتمالان .. بس برضه كده كان فيه محاولات أن يستمر من عبد الناصر .. أن يستمر مع تقليص سلطاته على قدر الإمكان » .

• لاحظت فى مكتب عباس رضوان ملفاً مكتوب عليه « محاولة انقلاب عسكرى بقيادة المشير المرحوم عبد الحكيم عامر » .

• « اعتبروا إن اتصالات عبد الحكيم عامر بالضباط عموماً دى تمهيداً .. اللى هم زى ما بأقول لك طبقة الانتهازيين .. وجاء وقت كان فيه فكرة أن لا يبقى أحداً من ثوار يوليو .. لما تعين محمد فوزى كلمنى يومها ناصر وقال لى إن عبد الحكيم عامر حيروح المنيا وعاوزك تخليه يستنى .. قلت له سوف أحاول .. رحلت له يومها كان ماشى على المنيا .. وقال لى لا معلش يا عباس .. ورحلت معاه لحد يمكن البدرشين ورجعت هنا ببيان هو كان عنده ٣ أو ٤ ضباط دى مش مشكلة .. وبعدين هو مش ساذج علشان مش جيعرف إنه متراقب فى ظرف زى ده .. طبعاً متراقب .. إنما يعنى اللى كان أحرص واحد على مصلحة البلد وعلى مصلحة جمال عبد الناصر فى نفس الوقت .. هو عبد الحكيم عامر مافيش شك » .

• **ويقول د . عبد العظيم رمضان :** « كان لابد من التخلص من المشير عامر ولكن ليس عن طريق المحاكمة .. لأنه كان يهدد النظام .. ولو حوكم تكون سابقة خطيرة .. ومن الممكن أن يكشف كل الأسرار » .

• **ويقول الفريق أول محمد فوزي :** « يوم ٢٥ أغسطس سنة ٦٧ أراد الرئيس عبد الناصر أن ينهى هذا الإشكال مع المشير عبد الحكيم عامر .. شبت مناقشة لغرض ما على الهزيمة في ٦٧ .. المشير لم يقبل هذا الوضع وخرج دون أن يصل إلى نتيجة ما معه .. المشير بدأ يعمل حركات غير شرعية ودعا بعض الضباط إليه كانوا ١١ واحداً في البندوم بتاع بيته .. في ذلك الوقت الناس دول كان صدر الأمر بطلوهم على المعاش .. وجاب سريتين من الشرطة العسكرية مسلحتين في بيته بالإضافة إلى الـ ١١ ضابطاً .. الوضع لم يكن سليماً من ناحية الشكل .. ضباط كبار كانوا مسؤولين ووجدوا في بيت المشير ومعاهم أسلحة ومعاهم سريتين من الجنود .. بالإضافة إلى ذلك المشير جاب ٣٠٠ واحد من بلده .. بقي الوضع شاذاً من الناحية الشرعية .. بدأت حركات داخلية يعملها بأن يتصل بالقوات المسلحة ويشير إلى عمل شيء مضاد للشرعية الموجودة في البلد أو يطبع استقالته مرة أخرى وينشرها على أعضاء مجلس الأمة .. الأمر ده يبقى اسمه عمليات مضادة وضد الشرعية الموجودة في البلد .. الرئيس عبد الناصر قرر إزالة هذا الوضع بأن يمنع هذا العمل .. وكلفني بتطهير المنزل » .

• **ويقول شمس بدران :** « المشير لما راح قابل عبد الناصر قبل ما يسافر عبد الناصر للسودان كان كل اللي في ذهن عبد الناصر أنه يحدد إقامته بس علشان يتقى شره .. واللى في بيت المشير اتمسكوا وراحوا وأبتدا يحقق معهم .. واحد منهم أخذه التطوع بقى وقال على المؤامرة كلها .. اللي هو جلال هريدي (١) » .

• **تطوعاً ولا قهراً ؟**

• « لا هو كان فيه قهر طبعاً .. لكن الباقي ما اتكلموش .. هو اللي اتكلم علشان خاطر يتهرب ويأخذ عفواً وأخذ وعداً بالعفو فعلاً .. طبعاً ما اتعافاش عنه .. أخذ مؤبداً زى أى واحد تانى .. كان أخذ وعداً علشان يتكلم .. فاتكلم قال فيه كذا كذا .. لما اتعرف الكلام ده ونُقل لعبد الناصر شالوا عبد الحكيم عامر من تحديد الإقامة في بيته إلى بيت تانى في الهرم وبقي معتقلاً .. وعلشان كده انتحر .. أو زى مايقولوا انتحروه .. كان معروفاً أنه معاه سم وحاول ينتحر قبل كده في بيت عبد الناصر فماسبهوش هناك .. لو كان اتفتش كانوا لقوا السم .. غالباً سابوه علشان ينتحر .. يعنى انتحروه » .

• **وأسأل الفريق أول مرتجى :** قلت لى إنك اعتقلت ٣ أيام لكنك لم ينيك « من الحب جانباً » وطلعت بدون محاكمة .. ليه يا فندم ؟

• « لأن أولاً هم كانوا متصورين إن أنا دخلت مع المشير العملية اللي بيقولوا عليها دى .. وبعدين (١) بذلت قصارى جهدى لمحاولة التسجيل مع السيد جلال هريدي .. فاعتذر وأصر على عدم الحديث .

اتصح إن أنا ماليش دخل فى هذه العملية إطلاقاً .. وفى الوقت نفسه لما رحلت قابلت عبد الناصر فبأقول له أنت إزاي تخزننى .. قال لى يابنى أصل أنا حقول لك العمليات دى كلها توريطه .. قلت له يعنى قعدنا مع بعض سنتين فى كلية الأركان وإنت عارف أخلاقى وأنا رأبى أن الرجل العسكرى لا يخون .. لإنه أقسم أنه يبقى مع النظام بتاع البلد ما هو مش ممكن ينقلب على نظام البلد .. فقال لى « أنا تصورت إنت لك دور وثبتت إن أنت مالكش دخل فى هذه العملية » .

• ويقول أمين هويدى : « بعد ما حدثت النكسة .. وأحب أقول هذا للتاريخ .. أنا كنت قاعداً فى مكتب سامى شرف ودخل علينا اثنين ضباط من الفرسان .. عماد ثابت وأحمد سيد أحمد نصر ضباط من أحسن ضباط القوات المسلحة .. وكانوا جايين يقولوا إن تحت أيديهم حوالى مائة دبابة يمكننا أن نستخدمها فى الدفاع عن الضفة الغربية للقناة .. فالأخ سامى انبسط جدا وقام بأسهم على هذا ومشوا .. بعدين يقول لى إنت مالك .. قلت له سامى ده إحنا كان عندنا أفين دبابة راحوا فىن الـ « ٢٠٠٠ » دبابة إحنا جايين نتكلم على مائة دبابة .. يا سامى كل شىء لازم يتغير .. وكانت هذه الفاتحة لبدء وضع الترتيبات لإزاحة عبد الحكيم عامر .. ليه إزاحة عامر ؟ لإن ماكش يقبل إنه يترك منصبه وأصبح خارج السلطة الشرعية للبلد وكان المفروض كلنا إحنا لهذه العملية .. شعراوى وسامى وأنا .. كنت وقتها وزير حرية ، سامى سكرتير الرئيس للمعلومات ، شعراوى وزير الداخلية .. وسمينا الاسم الكودى لهذه العملية « جونسون » .. وكانت الخطة إن إحنا - وهذا الكلام كاتبه فى كتابى مع عبد الناصر وفى كتاب « الفرص الضائعة » ، ولكل اللى كانوا أحياء - المفروض الأول نعترض المشير فى طريق صلاح سالم وهو راجع من إحدى سهراته وما كنش بيكون « فائق » قوى .. وضعت الخطة على هذا الأساس وبلغنا بها الرئيس وافق عليها واللى كان على علم بهذا الموضوع أيضا زكريا محيى الدين .. لكن بعد تقديرنا للموقف مرة أخرى .. وشعراوى كان ضد هذه العملية .. على أساس أنها تحتاج بالقطع احتكاكا واضحا لإن يصح أولا أن يكون المشير فائق ، وثانياً تكون الحراسة قوية .. وعملية فى شارع صلاح سالم حتىبقى مش تمام .. ففكرنا بخطة أخرى ودى عملناها فى نادى الشمس حول حمام السباحة .. الخطة دى كانت تقتضى أن يجى عبد الحكيم فى بيت الرئيس بأى دعوة ونمسهك هناك ثم نمسك بيت الجيزة .. ليه بيت الجيزة ؟ المشير أخطأ من ضمن أخطائه العديدة إنه جاب ناس يحرسوه من الغنيا وقعدوا معاه فى البيت وأصبحت نقطة مقاومة داخل البلد لا سلطة على هذا الوضع .. وأخذ الأخطر من كده يقابل الضباط فى القوات المسلحة والناس بتوعه ينشطوا يقابلوه فى حتت كثيرة .. فقلنا نستدعى عبد الحكيم فى منزل الرئيس ونمسهك هناك ثم نفشى بيت الجيزة .. الرئيس قاضل له ٥ أيام ويسافر مؤتمر الخرطوم وقلنا لازم نُصفى العملية قبل مؤتمر الخرطوم .. فقرر أن المشير ييجى فى بيت الرئيس يوم ٢٥ ويُمسك .. والرئيس وافق على هذا الكلام على أساس لما يجى نستدعيه يكون النواب موجودين .. تحدد إقامته بعد ما يكون البيت نُظف من الناس الموجودين فيه .. يومها يوم ٢٥ اجتمعت أنا وسامى وشعراوى فى مكتب سامى علشان نكون قريبين من الرئيس .. استدعيت الفريق فوزى فالرجل جاء مباشرة علما بأن كان درجة حرارته مرتفعة .. وجاء معه قائد الشرطة العسكرية سعد

عبد الكريم ومحمد صادق مدير المخابرات الحربية .. وأعطى محمد فوزى تمام وأخذ القوات وطلع على بيت الجيزة لتصفيته .. شوية وجاءت عربة المشير ونزل الرئيس قابله وانقبض على الضابط اللي معاه طنطاوى ، وهو من خيرة ضباط الجيش ولن ولم يحد أبداً عن مبادئه شعرة واحدة طول ما هو موجود مع المشير .. ما أعرفش هو فين دلوقتى إحنا نتكلم للتاريخ .. زكريا محيى الدين وأنور السادات وحسين الشافعى كانوا فى حجرة الصالون .. وأنا سبت شعراوى وسامى بره وحطيت عربيتى الخاصة قصاد الباب علشان نأخذ بها المشير بعد ما نمسكه .. وأنا كنت قاعداً بره فى الأنتريه والنواب كانوا قاعدين وعبد الحكيم كان فى شبه محاكمة .. لكن الرجل لم يتخاذل ولم يضعف أبداً بل كان متماسكاً ومتمسكاً بمركزه متمسكاً كاملاً .. قام الرئيس كذا مرة يتصل بعباس رضوان فى بيت الجيزة بتاع المشير عبد الحكيم لأن كان فيه اتصال على أساس عباس يقنع الناس اللي موجودة هناك ما فيش داعى للصدام .. فوزى جاء لكم .. والرئيس فى الدور فوقانى .. أنا دخلت جوه فوجدت عبد الحكيم عامر قال ما تجبى نتمشى بره فى الجنينة .. وطلعتنا نتمشى وأقول لك أنا الوحيد الحى الذى عاش هذا المنظر .. وبدأ ينتهد فقلت له سيادة المشير إيه اللي بتعمله ده إحنا رايعين فين عاجبك الموقف ده كله ؟ قال اسكت يا أمين أنت ما تعرفش حاجة .. قلت له تصلح الموقف وتنتهوا مع بعض .. البلد غرقت .. رجع قعدنا قال عاوز أروح التواليت .. بعد ما طلع من التواليت .. وفيه ناس موجودة من الباوران والضباط وإحنا موجودين كلنا .. مسك كاس فيها ماء راماها وقال لى يا هويدى اطلع بلّغ الرئيس بتاعك إن عبد الحكيم انتحر .. أنا اتخضيت جدا بصراحة وكان الرئيس يتندر على هذا الوضع .. وطلعت جرى على السلم قصاد حجرات النوم .. فيه زى بسطة معمولة من الخشب كده .. لقيت الرئيس واقف لابس قميص وينطلون .. فيه إيه قلت له عبد الحكيم انتحر .. قال لى لا يمكن كان حقه ينتحر يوم ما ودانا فى داهية فى سيناء .. اللي ما انتحش يوم سيناء مش حينتحر النهارده !! لكن لعب فى عبه الفأر .. نزلت لقيت الأولاد والضباط الموجودين استدعوا الدكتور الصاوى .. وأخذوا يدوه حقن ويعالجوه .. كانت الساعة ٥ صباحاً تقريباً .. جاء شاب : فين الوزير هويدى .. اتفضل يا فندم التليفون عاوزك .. فرحت لقيت محمد فوزى على التليفون قال تمام يا فندم تمت تصفية بيت الجيزة واعتقلنا كل الناس الموجودين وجارى تحميل الذخائر والقنابل والأسلحة فى اللوارى .. بلغنا الرئيس بهذا الكلام .. وطلع عبد الحكيم ومعاه أنور السادات وحسين الشافعى أو زكريا وحسين الشافعى .. لا أنكر بالضبط .. فى عربة خلاف عربيتى .. وكانت آخر مرة أشوفه والعربية طالعة من باب بيت الرئيس .. المشير فى الوسط يمينه أحد النواب وشماله أحد النواب .. وقعد فى بيته .. إلى أن تم الانتحار فى المرة الأخرى فى بيت المريوطية .

• **ويقول مرتضى :** « أنا ما رحتش البيت بتاعه وقت ما قبضوا عليه .. أنا كنت قبلها بيوم عنده وبأقول له يعنى الوحدة لازم تستمر الوحدة لازم ترجع تانى وترجعوا إنتم الاثنين مع بعض زى ما كنتم .. البلد فى احتياج لكم .. إلى آخره .. فهو قال لى أنا بكرة رايح له وإن شاء الله الأمور كلها تتحل .. تانى يوم لما راح هناك حصل « ظيطة » .. حصل هناك عند عبد الناصر

كان موجودا السادات وغيره ومش عارف حصل زى عملية انتحارية زى ما بيقولوا هم .. أنا ما أعرفش » .

* وأسأل شمس بدران : قرأت فى مذكراتك المكتوبة والتي لم تنشر بعد هذه الجملة « عبد الناصر استخدم هيكل كمخلب قط .. فماذا تعنى بذلك ؟

* « اعتقاله بقى أنا ما حضرتوش .. ماكنتش موجوداً ساعة الاعتقال .. هو راح هو وعبد الناصر بعث له كان حيسافر الخرطوم ومش عاوز يسافر ويسيب عبد الحكيم عامر .. أمامه واحدة من اثنين : يا يأخذه معا ودى مش ممكن لأن هو خلاص خرج من السلطة .. يا يحدد إقامته مش يعتقله .. يحدد إقامته يعنى يضمن إنه ما يقدرش يعمل حاجة أثناء غياب عبد الناصر .. بس المشير كان عاوز يعمل انقلاباً ضد الرئيس عبد الناصر .. آه فهو لما بعث له .. كان هيكل واسطة فى السكة ما بين عبد الناصر وعبد الحكيم .. يعنى يأخذ كلام عبد الحكيم عامر ويروح يبلغه لعبد الناصر .. وكان هو وسيلة الاتصال .. طبعاً كان فيه اتصال مباشر ما بين جمال عبد الناصر وما بين عبد الحكيم عامر .. بس كان هو السكة علشان الكلام اللي ما يقدرش يقوله عبد الحكيم عامر .. يقوله هيكل لما يروح لعبد الناصر .. وعبد الناصر انتهاز فرصة إن هيكل فيه قبول من عبد الحكيم عامر على إنه يعنى وسيلة اتصال أو واسطة بينه وبين عبد الناصر .. فخلّى هيكل يتقع عبد الحكيم عامر إنه يروح بيت عبد الناصر ويتعشى فى ليلة معينة هناك ويتكلموا فى الموضوعات دى .. ومش هيكل بس هو اللي أوحى بذلك كمان الجيار .. محمود الجيار .. كان برضه بين الاثنين .. صديق للأثنين .. والاثنين بيحبوا محمود الجيار .. فخلّى برضه الجيار يتقع عبد الحكيم عامر إنه يروح يتعشى .. يعنى ناصر استخدم هيكل كمخلب قط .. فلما عملوا الميعاد بتاعه ده علشان عبد الحكيم عامر يروح المعتقل .. وعلشان يزيل أى شك من عبد الناصر .. خلى هيكل هو اللي يجيب عبد الحكيم عامر .. والله أعلم .. وخلّى الجيار يكلمه .. فراح عبد الحكيم عامر فى الفخ المنصوب ليه .. فبعد الحكيم عامر ما أخش خوانة وراح .. فيه ولد فى البيت بقى من ضباط الصاعقة اللي كانوا قاعدين قال له يا فندم ما تروحش ده حيعتلك .. قال له بلاش كلام فارغ .. يا فندم ما تروحش أرجوك ده حيعتلك .. قال له بلاش كلام فارغ » .

* وبعدين ؟

* « الكلام اللي عرفته بقى بعدين إن أول ما راح كان واخد معاها طبنجة طبعاً .. قبل ما يخش وقفه وفتشوه فطلموا الطبنجة .. لأن عبد الناصر طبعاً عارف إنه حبيتى معاها طبنجة وجايز يخش يعمل أى حاجة .. وأخذوا منه الطبنجة ودخل وبعدين القصة معروفة بقى » .

* وأسأل الفريق أول مرتجى : هل الأستاذ هيكل كان همزة الوصل بين المشير والرئيس ؟

* « ما أعرفش » .

* وأسأل برلنتى : فى الوقت ده المشير عمل إيه ؟

* « في الوقت ده المشير أصلاً ما كنش عاوز يرجع الشغل .. وقدم استقالته وسافر على طول على الصعيد .. على أساس إنه مش عايز يشتغل .. وعبد الناصر بعث له كثيراً جداً .. بعث له صلاح نصر وبعث له عباس رضوان وبعث له هيكل وبعث له عصام خليل .. وكان بيطلبه يومياً ويقول له « أنا وحيد ما تسيينيش فيه مشاكل ولازم تنقف جنبى .. والعملية مش عملية كرسى إحنا شركاء فى القرارات ومتعودين إننا نشترك مع بعض فى المشاكل » .. يحاول أنه يجره إلى مصر بشتى الطرق .. رفض رفضاً قاطعاً كل المحاولات دى .. وعرض عليه إنه يكون نائب أول رئيس جمهورية بكل الميزات اللي فى السلطة دى والشهرة دى .. رفض كل ده لأنه إنسان قرر فعلاً إنه يعتزل السياسة .. وفعلاً اختار بيت خاله وجاب مراته وقعدهما فيه وجاب أولاده ودور لى أنا على بيت أقعد فيه .. واحد استقر ذهنه تماماً على إنه جيعيش بعيداً عن السياسة كائى مواطن عادى .. خلاص انتهينا .. فى الآخر بعث له هيكل بحاجة ما يقدرش المشير يقول فيها حاجة .. قال له تعالى وأنا كل الضباط اللي قبضت عليهم حاطلهم واللى فى المعاشات حارجهم وأحل لك جميع مشاكل الضباط اللي مضايكك .. وعاوز أحزاب حنفاك فيها .. إزاي نبعد يا حكيم .. وكانت دى عملية استدراج خطيرة جداً أدت لقتله » .

* « ويقول جمال عامر : « والدى قعد فى البيت وقدم استقالته .. وحصلت الاعتقالات لجميع الضباط اللي كانوا بيشتغلوا معاه .. وفيه ناس هربت زى شمس بدران وجلال هريدى وناس ضباط كثيرة لا حصر لها أتوا إلى البيت طبعاً .. يروحوا فين وهو لم يقدر التخلي عنهم فقعدها معاه فى البيت .. وتكلم مع الرئيس ليه الاعتقالات دى .. ووعدته إنه يحل هذا الموضوع .. ونتيجة إنه لم يحصل حل للناس دى أقامت معاه فى البيت وهو كان بيساعدهم حقيقة .. طبعاً ما يقدرش يروحوا بيوتهم ومطلوب القبض عليهم .. وكان يحاول تهديتهم وهم تاترين جداً ضد الرئيس عبد الناصر .. وعاوزين يعملوا أى حاجة ضده .. أنا سمعته أكثر من مرة كان بينهى هذا الكلام ويرفض حتى يسمعه .. وماكانش فى دماغه إنه يعمل انقلاباً أو غيره » .

* « وأسأل شمس بدران : هل كنت فى بيت المشير ؟

* « أنا كنت فى الاسكندرية » .

* « إذن ما ألقوش القبض عليك ؟

* « لأ كنت رجعت .. رجعت لبيت المشير » .

* « ودخل بقى الفريق فوزى وقبض عليكم ؟

* « آه » .

* « ويقول الفريق أول محمد فوزى : « المنزل كان فيه وقتها زوجته وأولاده .. وهو كان مدعوأ إلى الرئيس عبد الناصر ويعمل مناقشة حضرها السيد أنور السادات وزكريا محيى الدين وحسين الشافعى فى بيته فى منشية البكرى .. اللي هى لم تنتهى لشيء .. بس على الفجر انتهى اللقاء

فى المنزل .. وأنا بالنسبة للبيت فى الجيزة خلصت مهمتى من ناحية تطهير العسكريين الموجودين فيه » .

• قالوا الرئيس عبد الناصر كان طلب زيارة المشير عامر له على أساس إن البيت ببقى سهل اقتحامه ؟

• « آه دعاه .. طبعاً واضحة المسألة فى أن العمليتين تما فى وقت واحد .. وعلى بال ما انتهى اللقاء فى المنزل كنت أنا خلصت التطهير دون إطلاق طلقة رصاص واحدة .. بل بالعكس من ناحية البيت نفسه بعض العساكر فى المطوح أطلقوا النيران .. أنا لم أرد عليهم .. وانتهى الوضع بحجز المشير فى منزله وسط عائلته بس بحراسة مش من عنده .. وكل الحراسات الللى كانت معاه كلها تم تطهيرها .. بهذا الوضع انتهى التدخل الغير شرعى الللى فى البلد فى ذلك الوقت .. جاءت بعد كده إنه لم يقبل هذا الوضع وبدأ يتحرك من ناحية الاتصال بجماهير كثيرة وبأعضاء مجلس الشعب .. الأمر الللى خلى هناك خطوة تقدمية أخرى تأتى من ناحية عزله فى مكان آخر .. أخذت هذه الخطوة وأخذته من البيت .. وكان معى المرحوم عبد المنعم رياض » .

• هل وجدت منه مقاومة ؟

• « لأ إحنا كنا عسكريين منضبطين .. وفيه قائد شرعى موجود بيأمر بشى إحنا بتننفعه .. وطلبت منه هذا الطلب استجاب وكان فى حالة نفسية سيئة .. وكان يلطف العملية بشى من المهدئات فى نظره .. وهى طلعت أفيون .. وبعدين ابنته وإحنا فى قلب البيت قالت بابا أخذ سم .. أنا قُلت هذه الكلمة وبدلاً من أخذه إلى البيت الذى سوف أضعه فيه أخذته إلى المستشفى فى المعادى .. وفى المستشفى اتخذت إجراءات طبية كثيرة الغرض منها الإطمئنان عليه .. غسيل بطن .. رفض يغسل المعدة .. أخذ مقيء .. والمقيء نزل شوية حاجات .. أخذنا تحليلاً وطلع إنه أفيون .. والأفيون مؤثر على الأكونوتين الذى أخذه فى البيت لدرجة الللى بها مش مأثر عليه .. ولكن هى كانت محاولة .. فيما بعد طلع لاصقه فى جسمه » .

• وأسأل شمس بدران : هل كان فيه محاولة قلب نظام حكم من المشير ؟

• « كان فيه محاولة بس بعد زمن طويل يعنى .. فى الأول كان عبد الحكيم عامر عاوز يقتحى ويس ما يعودش للحياة السياسية .. وبعدين لما أفتعوه الناس الللى موجودين فى البيت والناس الللى حواليه إنه لازم يرجع علشان خاطر ببقى فيه حياة نيابية سليمة .. وهو اقتنع بالفكرة دى إنه يعود تانى للسلطة ، ويعمل حياة نيابية وإن ببقى فيه برلمان ويبقى فيه إضراب ويبقى فيه تعدد أحزاب وتبقى حياة نيابية سليمة .. وعلى هذا الأساس قرر إن هو يرجع القيادة الشرفية ، ومن هناك يعلن عودته للسلطة وبيعث قوة تحاصر منزل عبد الناصر إذا ماكانش خيارج للتفاهم يخرجه بالعافية » .

• طبيب عمل الانقلاب ده إزاي ؟

• التفكير الللى فى دماغه .. وبعدين الكلام ده ما اتعرفش وكان هو الحاجة الأساسية عنده إنه

يعمل هذا .. ينفذ هذا الكلام أثناء وجود عبد الناصر في القاهرة مش وهو في السودان في مؤتمر الخرطوم .. يعني كان فيه ناس منهم يقولوا له ما تستنى لما يروح السودان تقوم تبقى البلد فاضية .. قال لأ لازم تتعمل وهو موجود هنا .. فلما عبد الناصر بقى طلبه في البيت .. عبد الناصر كمان مش عاوز يسافر الخرطوم ويسيه هنا .. فلما طلبه في البيت واعتقله أو حدد إقامته ماكنش فيه أى تفكير أو أى أخبار بأن المشير يفكر في أى حاجة .. لكن واحد من الضباط اللي اتمسكوا واللى هو جلال هريدى .. اعترف بقى بالموضوع ده .. فى التحقيق .. فلما اعترف بأن كان فيه انقلاب ومحاولة للاستيلاء على السلطة فراحوا واخدين عبد الحكيم عامر من بيته .. هو كان متحدد إقامته فى بيته .. أخذوه فى معتقل .. مما دعا إن هو ينتحر ، .

• **ويقول جمال عامر :** هو راح البلد في الصعيد بعداً عن أى تأويلات حتى يهدأ الوضع شوية .. واتنين الفريق محمد فوزى قائدأ عاماً وبرضه مشبوا في موضوع الاعتقالات بصورة أكبر وطلعوا الناس على المعاش .. طبعاً الناس كلها ضباط ممتازة .. منها أسماء كبيرة وناس رجعت الخدمة بعد كده وحاربت في ٧٣ .. طبعاً لم يقدر يقعد إلى ما لا نهاية هناك .. وأفكر الرئيس كلمه هناك ورجع وحصل مقابلة بينهما .. وكان الرئيس عبد الناصر بأى إلينا في البيت في وجود الناس اللي قالوا بيعملوا مؤامرة أو غيره .. جاء مرتين في تواجدهم .. ولوحده .. ولو كانوا يريدون عمل أى حاجة من دى ما كان أى حاجة تحصل .. ولو هو بس عمل بإيده كده .. كان الناس تنف .. لكن طبعاً لم يكن موجود هذا الكلام خالص لأن كان فيه ثقة كبيرة .. هو اتعرض عليه نائب رئيس جمهورية ورفض لأن هو أساساً خلاص حس إنه لا يقدر أن يخدم البلد بعد اللي حصل .. بس اللي حصل إن الرئيس عبد الناصر كان مسافراً إلى الخرطوم في مؤتمر قمة .. كان واضحاً إن الوضع لازم يحل بصورة أو بأخرى .. تواجد عبد الحكيم عامر بالناس دى في البيت في وسط القاهرة يشكل خطورة كبيرة .. في الجيزة .. وفيه ناس حول الرئيس عبد الناصر لهم مصلحة وفرصة عمرهم تحققت أخيراً .. إن فيه شرح موجود بينهما والنهارده الفرصة مهيأة إن هم يخلصوا من عامر علشان هم يبقوا في الصورة .. وده اللي حصا بعد كده .

• **زى مين ؟**

• **زى سامى شرف والفريق فوزى ..** وكلهم في صلات قرابة .. فيه حاجات الناس لم تعرفها .. هم اجتمعوا على عبد الحكيم عامر في الحنة دى لأن كل مرة كانوا يفضلوا إن هم يخلصوا منه .. ودى كانت فرصتهم .. وبعد ذلك تلقى والدى دعوة من عبد الناصر إنه يذهب إليه في البيت على العشاء .. طبعاً اللي حصل إن كل الناس اعترضت وقالوا له لا تذهب .

• **وإنتم أهل البيت .. ماذا فعلتم ؟**

• **إحنا لم يأخذ رأينا في حاجة زى كده .. هم إخوانه رفضوا أن يذهب .. وحذره شمس بدران وصلاح نصر إن يمكن يُعتقل .. لكن هو رفض .. وأصر وراح معاه السائق وفرد واحد .. أول ما دخل البيت اعتقل السائق والضابط اللي معاه .. ودخل وقعد .. كان زكريا محبى الدين**

وأثور السادات وحسين الشافعي على ما أنكر .. وبدأ الموضوع إن وجوده في البيت خطر ولازم تحدد إقامته .. حضر الجلسة دى الرئيس ولم يكن موجوداً بصفة مستمرة .. وأتخيل إن هو كان يتجنب المواجهة معاه .. وفجئىء إن تم القبض عليه .. وراح على البيت » .

• عرفتكم الحكاية دى متى وإزاي ؟

• « عرفنا فى وقتها بلغنا من أطراف كثيرة .. إحنا برضه كنا بنقدر نعرف زى ما هم بيعرفوا كل حاجة فى وقتها » .

• وانقطعت الصلة بينه وبينكم ؟

• « الليلة دى انقطعت .. هم ماجموا البيت وهو مش موجود .. قالوا إننا قبضنا على المشير .. وبعدين خوفاً على الناس اللى فى البيت تقرر إن كل القوة الموجودة تسلم » .

• كان فيه تبادل لإطلاق النار ؟

• « لا لم يحصل أى حاجة .. الناس تصرفت بإدراك ومافيش داعى لأى حاجة تحصل خصوصاً إن المشير مش موجود معاهم .. علشان الزوجة والأولاد » .

• ثم ماذا حدث فى الهرم ؟

• « هم بعد ما قبضوا على الناس اللى فى البيت .. راحوا أحضروه فى البيت عندنا وحطوا قوة من عندهم لتحديد إقامته وفضل معانا وكان كويس جداً » .

• ويقول عباس رضوان : « واعتقل المشير عبد الحكيم فى منزله .. ورحلت زرته بناء على طلب الرئيس عبد الناصر وكان الحصار اللى كان على المنزل كما قوات الهجوم على إيلات » .

• وأسأل محمد أحمد : عبد الناصر والمشير عامر فى آخر أيامهم .. تقول إيه ؟

• « عبد الناصر كان منضبطاً وكان فى أغسطس ٦٧ وجمع مجلس الثورة علشان يقولوا لعبد الحكيم عامر على أخطائه ويحددوا إقامته تمهيداً لمحاكمته .. وبعدين هو دخل قال أنا أخذت حباية إيه .. وكاد يحدد إقامته لولا دخل الدكتور وأعطاه حقن ضد السموم ماكانش عاوز يأخذها .. مسك نزاره بالقوة .. وبعدين زكريا محبى الدين قال حأخذه يروح بيته مش حيخرج وخلاص .. ولحد ما نشوف .. واتعملت عليه حراسة لحد ما جم الضباط اللى قعدوا عنده .. ثم سلسلة ما حصل من المشاكل .. وحبوا يطلعوا الضباط ما طلعوش لحد ما سحبوا الحراسة .. وبعدين جابوا حرس من الصعيد .. إنما كان فى قرارة نفسه متألماً طبعاً إن صديقه اللى أقرب واحد وإليه خاب أمه فيه .. دى المشكلة بتاعته » .

• ويقول جمال عامر : « فوجئنا فى يوم صباحاً وجدت عربيات مدرعة وقوة كبيرة واقفة على شارع النيل وعربية إسعاف لفنت نظرى وطلعت قلت له .. بعد شوية وجدت الفريق عبد المنعم رياض حضر ومعه ٢ ضباط وجلسوا معاه فى الصالون .. وجدت ضباط كثيرة بالسلاح .. طبعاً

أحس إنه فيه غدر .. كان فى ساعتها على طول تكالبوا عليه ومسكوه .. وراحوا نازلين على العربية .. وكان معاهم عربية إسعاف .. فى البيت حاولوا يركبوه العربية ما أمكنش .. بكل القوة دى .. فجابوا عربية ملاكى مرسيدس وركب ومعاه فوزى والفريق عبد المنعم رياض .. ففهمنا إنه راح مستشفى المعادى .. ودخل المستشفى .. هم حسب روايتهم بعد كده إن هو أخذ سماً وهو قاعد معاهم .. مع العلم إن الرجل كان قاعداً ما يعرّش إن هم جابيين وإحنا كنا معاه ولم يتحرك من مكانه .. إمتى ده تم ماحش يعرف .. طيب إنتم بتجييوا عربية الإسعاف وعارفين إنه حياخذ سماً مقدماً إزاي .. هو طبعاً راح المستشفى .. إحنا عرفنا من الفريق مرتجى اللي هو كان أخوه مدير المستشفى فى ذلك الوقت .. حكى لنا إن هو حضر وكانوا مصرين إن يعملوا له غسيل معدة .. جاء مرتجى وقال له علشان خاطرى .. فسمع كلامه .. ووضع صباعه فى بفه ورجع .. وعلى روايته فضل يضحك معهم .. وكان طبيعياً جداً والنبيض بتاعه كويس .. وحالته الصحية كويسة .. طلب من الفريق فوزى إن يسيبه الليلة فى المستشفى .. يعنى مجرد إن هم يتابعوه .. فرفض طبعاً .. لأن الفريق فوزى عنده عداة مستحكم ضد عبد الحكيم عامر .. رجل حقود ولذلك هو اختير لهذه العملية .

* **ويقول الفريق أول مرتجى :** « لما راحوا مستشفى المعادى فى ذلك الوقت .. كان مدير المستشفى أخويا .. وعملوا له غسيل معدة وحاجات زى كده .. فطلب منه إن المشير يقعد تحت الملاحظة الطبية ٢٤ ساعة .. محمد فوزى رفض وقال لا لا .. التعليمات عندها إن إحنا نأخذه واللى يحصل يحصل .. وأخذه وراحوا على الفيلا اللي هو انتحر فيها . »

* **ويضيف جمال عامر :** « تانى يوم الصبح جاء لنا واحد ضابط وقال لنا المشير طالب حاجات .. عاوز الكتب وشنطة الأدوية .. لأن كان فيه أدوية لازم يأخذها كل يوم بانتظام .. المس بتاع الأسنان .. وطلب طلبات محددة أكيد هو اللي طلبها فبعثناها .. بس تانى يوم بلغونا إن المشير انتحر .. بس طبعاً المشير كان فى مسئوليتهم بالكامل .. والحراسة بتاعتهم بالكامل كانت من رئاسة الجمهورية . »

* **مش كان فيه الدكتور الصاوى حبيب أظن لحظة من اللحظات برضه بيقولوا ساعد على إنقاذ حياة المشير ؟**

* **« ده جاء فى الآخر .. وأنا أثق فيه من فين ؟ هم كلهم محل شك .. طيب ماهم لما كانوا عاوزين يحققوا معاه .. ما كان موجوداً فى البيت .. إيه السبب فى النقلة دى ؟ ليست لسبب قطعاً غير كده .. الناس اللي كانت موجودة أنا بأشكك فيها بالكامل ؟ » .**

* **وتحددت إقامته فى فيلا فى المروطية أو المنصورية ؟**

* **« هم أخذه على المنصورية .. راح المستشفى أولاً من البيت .. وبعدين على المنصورية . »**

● **وهكذا كانت نهاية المشير .. بدون أى محاكمة رسمية ..**

* **وأسأل شمس بدران : هل انتحر المشير عامر ؟**

« أنا ما شفتوش طبعاً إذا كان انتحر ولا ما انتحرش إنما الدلائل كلها بتقول أنه مش انتحر زى ما بيقلوا .. كانوا بالتعبير الدارج فى مصر « انتحروه » .. انتحروه بمعنى إنه دعى للانتحار زى ما هتار بعت السم لروميل وقال له انتحر .. فبعت له السم وروميل انتحر بدل ما يدخلوه محاكمة عسكرية .. دى نفس الحكاية بس عبد الناصر ما بعتلوش السم لإنه كان عارف بالفعل إن معاه السم .. ده الفرق بينهما » .

« ويقول د . عبد العظيم رمضان : « كتبت وقلت « إعدام عبد الحكيم عامر » وذلك حتى لا أنفى صفة القتل .. وثبتت أنه لا يمكن أن يكون مات منتحراً » .

« ومن كان « عشاوى » فى رأيك ؟

« ممكن المخابرات .. ما هى بتجيب ناس .. وتحضرهم من الخارج قهراً .. ولا يمكن لإنسان أن يسيطر على جهاز المخابرات .. مش بس فى مصر .. فى أى دولة حتى الولايات المتحدة .. الله أعلم كان مع المثير ممرض من حرس عبد الناصر .. ممكن يكون كده » .

« وأسأل مرتجى : هل تعتقد إن المشير انتحر ؟

« لأ .. أنا أعتقد إن هم انتحروه .. لأن برضه كلام إن هو حاطط البتاع على بطنه ويأخذ جزء ويسيب جزءاً .. طيب سابع الجزء الثانى ليه ؟! » .

« مين بالتحديد اللى أصعب الاتهام توجه إليه فى حادث مقتل المشير ؟

« هو بيقال إنه عبد المنعم رياض الله يرحمه ومحمد فوزى » .

« ولو واحد منهم .. تختار مين ؟

« هو شوف عبد المنعم رياض أكثر جرأة من محمد فوزى .. محمد فوزى مش جرىء .. فاحتمال كبير يبقى عبد المنعم رياض .. والله أعلم » .

« ومحمد فوزى ؟

« محمد فوزى مش جرىء .. يعنى هما الاثنين دول .. واحد منهم .. بينفخوا الكلام اللى قاله عبد الناصر » .

« وأسأل توفيق عبده إسماعيل : المشير عامر .. قلت لى إنه قال فى يوم من الأيام حانتحدر .. لو ماسمعتوش كلامى أو ما هدأتوش .. وطلع المسدس .. هل ممكن يكون هو اللى انتحر فى ٦٧ كما نشر .. ولا كما يقول البعض « انتحروه » ؟

« أعتقد إنه انتحر وأنا قابله قبل انتحاره بـ ١٥ أيام بالصدفة .. إنما العاطفة لما بتزيد شوية ما يبقاش فيه التأثير الكبير أو التأثير السليم .. فهو كان عاطفياً وأنا لا أستبعد إن العاطفة دى هى اللى أدت إلى الانتحار » .

• وأسأل كمال الدين حسين : من ضمن الحاجات التي قُلَّتْها « موت المشير عامر لغز كبير » .. وإن « زبانية عبد الناصر قتلوا عبد الحكيم » ؟

• « أنا أعتقد .. والله أعلم - بدرجة أكثر من ٩٠٪ إنه هو قُتل .. إن هو وضع له السم في الجوفة .. لا أعرف التحقيقات التي اتعملت .. أى أحد يقول لك التحقيقات بتتعمل نتائج تحقيقات وكلام من ده .. لكن هو يعنى كان يومها بالذات كان طالب حاجات من بيته .. وكتب حاجات طالبيها .. إزاي طالب حاجات من البيت .. طبيب إنتم أخذتوه المستشفى العسكرى وبعدين عملتوا له غسيل معدة .. وبقي فى عيادتكم .. وحصل استعجال فطيع للجهاز الطبى فى المستشفى وإنه لازم يأخذه دلوقت .. قالوا لازم يظل ٢٤ ساعة تحت الملاحظة رفضوا رفضاً باتاً .. وأخذوه وضعوه فى حنة غرب القاهرة فى الجيزة .. وبعدين قالوا إنه انتحر .. يعنى كلام ليس يدخل عقل .. أنا أعتقد فيه ناس من الجهاز الطبى وناس كبار جداً قالوا إنهم وضعوا له السم فى الجوفة .. وقالوا لى اسم الرجل بس أنا مافيش داعى أذكر سيرة الناس حالياً » .

• بينما يقول عبد اللطيف بغدادى : « فراحوا بعد كده بأخذوه من بيته فوزى وعبد المنعم رياض .. علشان يودوه المريوطية .. فهر عصلج .. وبعدين برضه حط حاجة فى بقه .. وأخذوه على مستشفى المعادى .. فوزى مش حطه فى قسم الضباط .. حطه فى قسم العساكر حسب ما فهمت أنا من وكيل النيابة الذى حقق فى قضية عبد الحكيم وانتحاره فى المريوطية .. اسمه الكردي .. وحصل التحقيق .. فوزى قال للعساكر اللي موجودين ادخلوا جروه .. لإنه كان يكره عبد الحكيم .. فبعد المنعم رياض قال له ما يصحش .. دخل له عبد المنعم رياض واتفاهم معاه .. قال له إحنا جايين ننفذ الأوامر فقام معاهم .. أولاده كانوا منفعلين وممراته منفعلة .. فوزى قال للدكاترة : خلال ساعة واحدة اخلصوا من العملية دى .. المفروض يعملوا له غسيل معدة ويقلعوه ملط وكشفوا عليه يكون مخبى حاجة .. فماعمش دى .. أخذوه على البيت اللى فى المريوطية .. فى المريوطية بقى .. حسب ما فهمت من وكيل النيابة فى التحقيق إنه حاطط فى الحنة دى .. سيانيد البوتاسيوم .. سم فى شريط لاصق وعلامته واضحة .. فى عصير جوفة .. فأنا سألت يمكن يكون أحد حط له فى عصير الجوفة .. مش هو .. لأن اللى سمعته إن الواحد لما يحب ينتحر ينام فى سريره وينتحر وهو نائم .. لكن ده راح الحمام ووقع فى الحمام .. ده تفكيرى .. وأكد لى الكردي وكيل النيابة إن التحقيق لم يتدخل أحد خالص فيه .. لا نائب عام ولا جمال عبد الناصر ولا أحد .. التحقيق مضبوط تمام .. ويؤكد إنه انتحار » .

• ويقول الفريق أول محمد فوزى : « ولما راح البيت هددنى بالليل بعد فنجان قهوة شربته معاه وعبد المنعم رياض .. ووصل للرئيس جمال عبد الناصر الرسالة الآتية : « إنت مسئول عن الوضع اللى أنا فيه .. وأنا مش عاوز أتقبله أكثر من ٢٤ ساعة .. لازم تخلصنى من هذا الوضع .. وإلا إنت مسئول عن اللى يحصل .. إيه اللى يحصل نيتى الانتحار » .

• قالها كده صراحة ؟

• « لا لا .. إنما بأقولها للأحداث اللى حصلت بعد كده .. بالليل قائد الحرس الجمهورى لم يكن

مطمئناً على الحراسة فى قلب البيت .. يعنى اتفتت أنا وهو ندور على حقة أخرى .. رحنا المعادى تانى يوم رحنا ندور على المكان المضبوط .. جاء تليفون لاسلكى فى البيت وقالوا المشير انتحر .. رحنا رجعنا على البيت لأقينا أخوه الكبير اللى كان موجود .. كان مفتش تعليم فى غزة فى ذلك الوقت » .

• والكلام ده كان فين ؟

• « فى بيت المنصورية .. اللى هو حددت فيه إقامته .. الكلام ده كان يوم ١٣/٩/١٩٦٧ .. رحنا وجدنا أخوه وجدنا السيد أنور السادات موجودين يعنى سبقونا .. وكان وصل الطبيب الشرعى وكشف عليه .. قلعه هدموه واكتشف وجود ٥ حبايات ريتالين .. زى علب الأسبرين مستخبة فيه .. والسانسة منتوشة وعليها علامات حمراء .. هى دى اللى أخذها وراح فى الحمام .. ويادوك من الحمام للسريز لم تأخذ نصف ثانية .. وجاء الطبيب وكشف عليه وعمل إجراءات طبية .. ولم يلحقه .. توفى .. وانتهى الإشكال بانتحار المشير .. وكلمة الانتحار دى اللى تمت وحصل فيها إجراءات .. يعنى متماثلة فى جهتين مختلفتين .. الطبيب الشرعى بأجهزته .. والرئيس عبد الناصر أمر جهة أخرى - كانت جامعة القاهرة - تعمل نفس الإجراء .. الإجراء الطبى .. التحقيق فى وفاة المشير تم فى جهتين منفصلتين .. طلع التحقيق ونشر الوثائق فيه اللى فنية وفى الآخر خالص حفظت القضية .. إذ أن المشير عبد الحكيم عامر انتحر أمام عائلته وبإرادته .. وبذلك تُحفظ القضية إدارياً » .

• هو كان أمام عائلته يافتدم ولا كان .. ؟

• « أخذ المسألة الأولى اللى قبضنا عليه أخذها .. وإينته قالت كده .. يعنى هى كانت حباية داخل الأفين » .

• وأسأل د . شريف محمد عبد الفتاح : اختاروك ليه إنت بالذات .. للكشف على المشير ومعالجته ؟

• « هو .. ما اختاروش إنى أكشف عليه أو أعالجه .. هو اللى حصل إننى كنت فى ذلك الوقت بأشنتغل فى مستشفى القوات المسلحة اللى فى المعادى .. وما أعرفش مين اتصل بمدير المستشفى فى ذلك الوقت وكان ده المغرب تقريبا .. قبل المغرب بحاجة بسيطة .. وقال إحنا عاوزين دكتور باطنى كويس يطلع دلوقتى حالاً يشوف المشير عبد الحكيم .. فى مكان حنقول لكم عليه .. وجاء أحد علشان يورينا الطريق وده كان طلع فى فيلا قرب ترعة المنصورية .. فيلا حولها حديقة كبيرة وهى تقريبا من دور واحد .. لما وصلت هناك .. لقيت زى صف .. زى الناس اللى تستقبل العزاء .. ومن ضمنهم الطبيب اللى كان يشوفه فى ذلك الوقت واتذكر اسمه الدكتور إبراهيم بطاطا .. وساعة ما نزلت شاور لى إشارة معناها إن كل شىء انتهى .. فقلت له إيه اللى حصل ؟ فحكى لى حكاية هى دى اللى ماريجتشيش قوى .. بيقول لى .. إن هو كان بيتقايأ اليومين اللى فاتوا .. وأنا كنت بأديله عصير جوافة .. أنا فاكر الحكاية دى كويس

قوى .. لأنه لما قيل عن حاجات أخذها بعد كده أنا متذكر عصير الجوافة ده ممكن يغطي طعم أى حاجة ورائحة أى حاجة .. فهذه اتسجلت فى دماغى ساعتها .. قلت له اشمعى عصير جوافة ؟ وبعدين أخذنى لاحظت كده .. بيقول لى إن هو إنقاي ووقع أمام الحمام .. فلفيت الحنة نظيفة قوى .. فدى فى الحقيقة لفنت نظرى قوى مرة ثانية .

* هى كانت لسه الواقعة حادثة ؟

* « يا دويك قبل ما أوصل على حد قوله .. وبعدين دخلت جوه .. برضه أول ما لفت نظرى إن الحجره مرتبة قوى .. لما واحد يكون بنوى الانتحار بيبقى عادة عنده حالة اكتئاب ويأس شديد .. ودى حاجة طبية مفهومة ومن الحاجات التى جعلتنى حاسس بشيء من الغرابية .. وبعدين لفتته .. رحمه الله .. فى السرير .. لابس بيجامة مكوية .. السرير مشدود .. زى ما بيسموها كان زمان « شدة الكلية الحربية » .. مشدود على الآخر والزوايا مضبوطة .. وأنا كان عندى خير قبلها وإنه غالباً ما يكون توفى .. فكان كل همى ساعتها إني يا دويك أشوف النبيض وأسمع القلب بالسماعة وأتأكد من الوفاة .. من عدمها .. لأنه إذا كان توفى فعلاً فأصبح مالبش شغل .. فهذه كانت الحاجات التى لفنت نظرى فى ذلك الوقت .. لكن ما كانش فيه أى شيء يدل على عنف أو يدل على أى شيء آخر مثل ما قالت بعض الناس .. وكان قالوا بعدين إنه كان فيه جزء حساس من جسمه .. أنا ما أقدرش أقول حاجة فى دى لأنى ماحاولتش لأن كل اللى كنت بحاول أعمله إننى أتأكد .. هل توفى إلى رحمة الله ولا لا .

* مين اللى كان موجوداً فى هذه الفترة يا دكتور ؟

* « كان الدكتور اللى اسمعه إبراهيم بطاطا .. وبعض الناس أنا ما أعرفهمش .. وحرس وما إلى ذلك .

* وكنت لابس « ميرى » ؟

* « لأ .. أنا كنت لابس بنطلون أبيض وقميص أبيض اللى كنت موجوداً بها فى المستشفى .. لأنه كان على عجل وكان معايا سواق وكان معايا تمرجى .. وبعد شوية جاء الفريق فوزى .. قال لى إيه فيه إيه .. قلت له توفى إلى رحمة الله .. قال لى اكتب تقريراً مادام أنا وصلت .. قلت مادام أنا ماكنتش بأعالج سيادة المشير رحمه الله .. يبقى أنا ما أقدرش أكتب تقريراً .. والتقرير يكتبه الطبيب الشرعى بعدين .. بعدما بصيت لفتت العربية بتاعتى اخنفت والسواق اخنفتى والتمرجى اخنفتى .. وكل ما أتحرك ناس بالسلاح كده والأسلحة بنتجه نحوى .. وكان منظر غريباً جداً .. وبعدين كان لى معرفة خاصة باللواء الليثى ناصف الله رحمه .. كان قائد الحرس الجمهورى فى ذلك الوقت .. ولو تتذكر حضرتك كانت القوة الوحيدة السليمة فى البلد .. فأنا استنتجت بعد ذلك إن هو كان السند الحقيقى للنظام فى ذلك الوقت .. فأنا كنت بأعالجه فى بعض الدلال عليه .. فقلت له هم مقعدنى ليه ؟ قال لى أنا مش عارف .. وأخذنى وقال تعالى تشوف الفريق فوزى .. فمشيت معاه وفى حماه فكنت فى حماية كويسة .. يعنى

وصلنا للفريق فوزى وأنا فاكرك الحكاية دى .. فكان قاعد ماسك تليفونات .. إيدنى ٣٧ .. ويتكلم كلاماً مبهماً .. إيدنى ٣٨ .. إيدنى ٣٥ .. أرقام كده غريبة .. الظاهر إنها تليفونات كردية .. ويعطى تامات ويعمل حاجات بالشكل ده اللي إحنا نعرفها فى الجيش .. ويعدين اللواء الليثى ناصف قال له الدكتور كان نوباتجى أمراض باطنة وعنده حالات كثير فى المستشفى وكل الناس عارفة إنه هو هنا .. هو كان لبقاً جداً رحمه الله .. قال له عاوز يعنى يمشى .. قمت قلت له أنا المفروض إنى أرجع إلى مرضاى .. قام قال له .. برضه ما كلمنيش مباشرة كده .. قول له أنا خالطه يمشى بس ما يفتحش بقة .. فأنا رديت بنفس الطريقة .. قول لسيادة الفريق أنا مش حافط بقى ولا حاجة .. فيعدين اللواء الليثى ناصف أخذنى ومشينا مع الفريق فوزى .. وقال اللواء سعد زغول عبد الكريم اللي هو كان قائد الشرطة العسكرية .. جيب عربية الدكتور افرج عنها وعن السواق وعن التمرجى .. فالظاهر إنهم كانوا مسكوم .. ما أنا برضه جالى التمرجى والسواق ما يفتحوش « بقمهم » هم كمان .. ورجعنا إلى المستشفى .. وبعد كده عرفت إنه فيه أطباء تانيين وصلوا بعدى .. واحتجزوهم للصباح هناك .

• هل كان فيه تهديد أو وعيد آخر قبل ما تغادر منزل المشير ؟

• « لا ماكانش فيه تهديد أو وعيد .. لكن هو كل الحكاية إنه « ما نفتحش فمك » .. ففعلاً رحلت المستشفى وكنت عامل حسابى لأنى كنت شايف يعنى .. ببسألونى هناك زملائى وجلسوا يتريقوا على وقالوا « ذبحوا لك الأرنب » .. وأنا لما حضرت التحقيق اللي عمله بعد كده سيادة النائب العام ووزير العدل .. مش فاكرك مين فيهم وقتها خرج بيقول لى أنا الشهادة بتاعتك مش فاهمها .. قلت لأننى بأقول ما شاهدته .. أما رأيي الخاص فده ليس للإذاعة .. ده رأيي الخاص .. حاولت بعد كده كثيراً إنى أعرف إيه اللي حصل بالضبط فعرفت بعد كده إن المشير رحمه الله .. جاء مرتين المستشفى وإنه كان واخد حاجة زى مخدرة .. أو قد يكون حاجة سمية لا أتذكر .. أفكرت اللي أنا متأكد منه إنه كان فيه حاجة مخدرة .. وعملوا له غسيل معدة ونصحه فى ذلك الوقت الأطباء اللي كانوا هناك وأنا ماكنتش نوباتجى فى اليوم السابق .. إنهم يخلوه قاعد فى المستشفى وكانوا معاه على ما سمعت فى ذلك الوقت .. الفريق فوزى واللواء عبد المنعم رياض الله يرحمه .. وإن هما كانا الحراسة بتاعته .. وحتى كان تعليق الزملاء إن عبد المنعم رياض الله يرحمه كان بيعامله معاملة كريمة جداً .. والفريق فوزى كان شديداً معاه شوية زيادة .. والمشير عبد الحكيم عامر كان محبوباً لدى الضباط والعساكر جداً فى ذلك الوقت .. فكانوا مستنكرين المعاملة الجافة من الفريق فوزى .. هذا كان « سمع » أنا لم أشاهده .. ولذلك لما كان يطلبنى النائب العام والسيد وزير العدل فى ذلك الوقت .. كنت بأقول لهم أنا ماليش دعوة إلا باللى شاهدته .. فأنا أسأل على اللي شاهدته وليس عن رأيي أو ما سمعت .. وهو ده اللي حصل .. وفى يوم من الأيام بعدين قوى بعدها بعشر سنين ولا حاجة أو أكثر .. كنت رابع مع أحد الزملاء إلى المنصورة نمتحن الطلبة هناك .. كنت بأمتحن خارجى .. الطبيب ده بالصدفة كان الطبيب الخاص بنتاج الفريق فوزى فى ذلك الوقت .. اللي هو وقت المشير .. فحكى لى قصة غريبة جداً إنه أحد الأشخاص هو يعلمه تماماً وحلف إن هو له دخل فى وفاة المشير .. وإنه يعلم جميع

التفاصيل .. الشخص ده هو الدكتور إبراهيم بطاطا .. فأنا فى تقديرى إنه جايز يكون استنتاج إن الدكتور إبراهيم بطاطا هو اللى يكون موجوداً .. لكن هو كان بيحلف بأغلظ الأيمان إن السر عند الدكتور إبراهيم بطاطا (٢) » .

• وأسأل عباس رضوان : هل انتحز ؟

• « لا أقدر أحكم فى هذا يا طارق .. لأن الموضوع حساس جداً .. يعنى هو طبعاً فيه كلام كثير .. وكان فيه قضية مرفوعة من إخوانه .. وإنما ما أقدرش أحكم .. إنما اللى أقدر أقوله إن عبد الحكيم عامر كان شجاعاً جداً ويحافظ على كرامته جداً .. يعنى موضوع انتحاره الله أعلم » .

• وأسأل برلنتى عبد الحميد : قتل أم انتحز بصرحة ؟

• « حينئذ ليه ؟؟ عبد الحكيم عامر رجل متدين جداً .. وأول كتاب قرأه هو القرآن الكريم .. مع سيدنا الشيخ إمام .. متربى تربية دينية وفى بيئة دينية .. وعارف اللى بينتحر بيموت كافر .. وبعدين ينتحر ليه وهو حواليه أصحابه .. والرئيس بيتحايل عليه يرجع السلطة .. وحواليه مراته وعياله .. وحواليه زملاؤه .. وأبتدا فعلاً يأخذ قرارات تؤكد إنه عاوز يعيش .. وبعدين هل من المنطق إنه ينتحر بعد أربعة شهور طيب ما كان ينتحر يوم ٦ ولا ٧ ولا ٨ .. يعنى أدى واحد بالقلم على وشه دلوقتى .. يقول لى « آى » بعد أربعة شهور مش منطق .. وبعدين الدليل القوى اللى لا يقبل مناقشة واللى بعده ما حدش يتناقش ولا يسأل هذا السؤال ولا يقول قتل أو انتحز .. هو تقرير الطبيب الشرعى .. دكتور مختص فى معهد البحوث هو اللى كتب تقريراً بناء على طلب المحامى العام فى ذلك الوقت .. أعتمد اللى هو المحمدى الخولى .. يعنى الدولة طلبت إنها تحقق فى مقتل المشير أو انتحاره .. والتقرير وصل فى النهاية إلى إنه المشير قتل عمداً مع سبق الإصرار والترصد .. العلم هى اللى بيتكلم دلوقتى » .

• وأسأل د . على محمد دياب : قدم لنا نفسك ؟

• « أستاذ تحليل السموم والمخدرات ورئيس معهد السموم والمخدرات بالمركز القومى للبحوث » .

• عندما قمت بالتحقيق وكتابة هذه التقارير كنت أيامها مدرساً ؟

• « كان ذلك بعد انتهاء رسالة الدكتوراه ونشر أبحاثى المتعلقة بهذا .. وأنا تخصص سموم ومخدرات » .

• وإيه اللى حصل فى الواقعة والتقرير ؟

• « واقعة استدعائى ولا التقرير نفسه ؟ »

(٢) للعلم .. طلبت الدكتور إبراهيم بطاطا (قبل وفاته) وحاولت إقناعه بالتحدث .. فرفض واعتذر بإصرار .

• هم استدعوك أعتقد علشان تكتب تقريراً عن وفاة المشير عامر ؟

• « الحقيقة لما استدعاني المستشار محمدى الخولى وبعد مناقشة كبيرة معايها .. سلمني كل الأوراق ونتائج التحليل والأقوال وملابسات القضية وكلفني بكتابة تقرير بالنتيجة .. فالحقيقة كتبه وسلمته له .. وصلت فيه إلى أن الوفاة دى مرتبة ومدبرة وهى فى الحقيقة قتل واضح » .

• إزاي ؟

• « هم بيقولوا وجدوا شريط أفراس متفضية ومتعبية فيها بودرة الأكونوتين .. الفجوة لا نقل عن ٥٠ ملجرام إحنا نعرف إن الجرعة القاتلة لا تزيد عن ٢ ملجرام .. فمش معقول ومش منطقي إن يكون الشخص اللي عاوز ينتحر ده فتح وأخذ ملء الفجوة كلها واستعمل الـ ٥٠ ملجرام .. الكمية اللي تكفى لقتل من ٢٥ - ٥٠ بنى آدم بالغ فى دقائق .. لإن بالتجارب اللي عملناها لما تأخذ محلولاً مخففاً من الأكونوتين ده بنسبة واحد فى الألف يعنى ٤٠/١ .. بمجرد ما تتحط نقطة من هذا المحلول على اللسان تحس برعشة وتتميل وشد فى عضلات الفكين وارتجافات شديدة تمتد لعضلات الذراعين .. ولا يقوى الشخص اللي واخد هذا السم بعدها أن يمسك بشيء أو يقبض بأيده على شيء أو يفكر فى أى حاجة .. ناهيك عن أن هو يخش دورة المياه ويعيد لصق الشريط مرة أخرى ويطلب معجون حلاقة ويغسل أسنانه .. فكان غير منطقي وغير معقول .. ولو كانت هذه الكمية نفسها استعملت كان من السهل جداً أن نجد لها آثاراً فى العينات اللي حلت .. وكان ممكن نلقى آثاراً على الأظافر والأصابع .. وده لم يحدث .. ولم يلحظه أحد » .

• وهل وضع السم فى عصير الجوافة ؟

• « كانت مرتبة القضية نفسها .. تجد إنها مرتبة ترتيباً مفهوماً ودقيقاً .. شغل مخبرات .. العصور اتحط بكمية محسوبة ثم اتحط الأكونوتين فى العصير بكمية محسوبة .. بحيث يؤدى العمل أو الفعل بتاعه فى ظرف ٣٠ دقيقة .. وبعد الفترة دى ينتهى كل شيء .. وبعدها اختفى أى أثر لعبة العصير والكوب اللي كان فيه العصير » .

• المشير كان عايش لحد الساعة السادسة ؟

• « فى صحة جيدة تماماً .. من واقع الكشف المتعددة من أكثر من شخص .. التنفس طبيعى والنبض طبيعى والحالة مطمئنة للساعة السادسة .. وقالوا إنه دخل دورة المياه وطلع لقوه » نايم .. بعد ٣٠ دقيقة تقريباً حدثت الوفاة .. فى هذه الفترة وقيل ذهابه لدورة المياه كان اتحطت الكمية المحسوبة فى كوب العصير » .

• هل الفريق فوزى والفريق الليثى ناصف .. وآخرون كانوا موجودين ؟

• « فى الأوراق اللي قرأتها مكتوب بوضوح إن الفريق فوزى الساعة ٦ تماماً .. ساعة ما كُشف على المشير وقالوا إن صحته جيدة والتنفس طبيعى .. اتصل بمدير مستشفى القوات المسلحة

بالمعادى .. قالوا لهم ابعثوا لنا طبيب فوراً لأن حالة المشير سيئة على خلاف ما كان مقيداً بنتيجة الكشف » .

وليه التقرير لم ير النور أو ما عرفناهوش غير من خلال كتاب السيدة برلنتى عبد الحميد ؟

« هو المحامى العام لما أخذ التقرير .. ويعد يومين قابلته .. وكان مقتنعاً تماماً بالنتيجة اللى وصلت إليها .. وفى ظرف اليومين دول كان صدر قرار بعد ما أعلن عن نتيجة التقرير .. من غير ذكر أسماء .. نُقل أو رقى لمحكمة النقض .. وجاء محام غيره .. ومن ساعتها والتقرير اختفى فى دواليب المحكمة .. هو كان مرتباً إنه يكون قتل ومرتباً له الوقت بالضبط .. إى فى الساعة السادسة لما تم الكشف على المشير وقيل إنه فى حالة وتنفس طبيعى والقلب سليم .. فى هذه الساعة بالضبط كان الفريق فوزى بيتصل بمدير مستشفى القوات المسلحة بالمعادى ويقول له ابعث لى عربية حالاً بطبيب علشان المشير حالته متدهورة .. قبل أن يرى أحد علامات التدهور أو الانهيار .. فكان مرتباً على ما أعتقد إن فى الساعة دى بالضبط يتحط حاجة أو يتعمل حاجة » .

تسمح تقرأ لنا ما كتب من نتائج هذا التقرير دلوقتى ؟

« هى النتيجة .. بعد المقدمات العلمية ومناقشة نتائج التحاليل قلت فيها .. « مما سبق لا يستطيع الباحث المنصف المدقق إلا أن يقرر أن وفاة المشير لم تكن انتحاراً وإنما كانت قتلاً بإعطائه سم « الأكونوتين » بطريقة أو بأخرى بعد الساعة السادسة مساء يوم ١٤/٩/١٩٦٧ . وإننى أقرر مطمئناً أن هذه الوفاة جنائية مكتملة الشروط الجنائية من التعمد إلى سبق الإصرار والترصد .. ودى نتيجة علمية لا يستطيع أى باحث أو عالم أو رجل قانون أو قضاء أن يشكك فيها .. ولو كانوا قدروا يشككوا كانوا شككوا !! » .

• وتقول هدى عبد الناصر : « عرفنا خبر وفاة المشير وكانت طبعاً مفاجأة شديدة .. كنا فى الإسكندرية .. ولا يمكن أن أنسى علاقتنا بالمشير والصدقة » .

• والمصاهرة ؟

• « أبوه عمى حسين متزوج ابنته » .

• وهل قمت بواجب العزاء ؟

• « لم يكن الموقف يسمح بالعزاء .. وكان هناك نوع من التباعد » .

• هل كان الرئيس حزيناً لوفاة المشير ؟

• « حزن عليه جداً .. والظروف كلها كانت مؤلمة » .

• ومات المشير ودفن معه سر وفاته .. الذى اختلفت الآراء حوله ..

• **ويقول جمال عامر :** « قالوا اذهبوا بالجثة على البلد .. سافرنا وجدنا مظاهرة عسكرية ولازم الدفن حالاً ومش عارف إيه .. والعساكر وافقة ومحوّطة البلد .. اللي تم جنازة غريبة المنظر لا تليق بأى إنسان .. كان منظرًا مؤسفًا وتمت الجنازة بهذا الوضع .. وإحنا رفضنا نقعد فى البلد .. كانوا عاوزين نقعد هناك .. ورجعنا على مصر .. ولم نعمل عزاء .. »

• **ولم تقبلوا العزاء فى المشير ؟**

• « طبعاً الرجل قُتل .. لا يمكن يكون انتحاراً .. أولاً هو رجل مؤمن يعنى لم يكن رجلاً كافراً علشان ينتحر .. ويعين عنده من الشجاعة إنه يواجه الموقف ١٠٠٪ .. هو أبدى استعداد للمحاكمة ويأخذ مسؤوليته بالكامل والكلام ده انكتب وهو قاله .. لكن اللي أنا سمعته إنهم كانوا عاوزين يتجنبوا الوضع ده بأى حال .. لا عاوزين أحد يسمعه ولا يتكلم .. يعنى أفضل شيء إنهم يموتوه .. لم يكن هناك شيء يبدل عن هذا الموقف .. طبعاً اختلفت الروايات زى ما بأقول .. وقالوا أخذ سم فى البيت علشان لما يأتى ينتحر تانى يبقى فيه سابقة .. وزى ما قلت لك إحنا كنا قاعدين معاه مافيش أى مجال إن هو يأخذ حاجة لأنه لم يكن مستعد لهذا الكلام .. دى ناحية .. الناحية الثانية ماكانش حينتحر أندأ وهو كان مستعد إنه يأخذ مسؤوليته بالكامل وهو عمره ما كان يهرب من المسؤولية .. »

• **وأسأل د . الدكتورى : جنازة المشير عامر ماذا تقول لنا عنها ؟**

• « المشير عامر للتاريخ كان شخصية لا تتكرر .. فالاتحاد السوفيتى كان غير سعيد لوجوده ضمن ثنائية الحكم فى مصر .. المشير عامر كان رجلاً عطّاء كريماً وابن بلد .. وكان لا يرد أحداً خاصة من رجال القوات المسلحة وبالذات أبناء المنيا .. فلما توفي والده المرحوم على عامر قام قطار خاص من القاهرة يحمل المعزين من المنيا إلى القاهرة .. وامتدت الجنازة وكان فيها الرئيس عبد الناصر من المفبرة وحتى القرى على امتداد ٦ كيلو متر .. وكنت أول المعزين بعد وفاة عامر ولم أجد سوى ٦ أشخاص من ضمن المعزين !! وهذا يعكس الحالة التي كان عليها الناس .. »

• **ويقول د . ثروت عكاشة :** « لقد ظلم عبد الحكيم عامر مرتين .. ظلمه عبد الناصر صديقه .. عندما أسند إليه العديد من المناصب المختلفة الأنواع والمتشعبة .. حتى أصبح بمنأى عن الاطلاع بالمهام الجسام المنوطة به على رأس القوات المسلحة .. وظلم عبد الحكيم عامر نفسه أيضاً عندما أحاط نفسه بأعوان وقادة على غير المستوى المطلوب .. »

• **ويقول عبد المجيد فريد :** « أنا اتصلت بعدها بيوم أو يومين بالرئيس بعد ما انحدر عبد الحكيم .. فلغيت حزيناً جداً فى غرفة المكتب .. فقلت سيادة الرئيس بنسمع إنك لا تأكل .. وإن الملفات موجودة على المكتب كما هى .. فقال لى « أصل ما تعرفش قد إيه كانت علاقتى مع عبد الحكيم عامر .. أنا لما بأفتح الملف بأشوف صورة عبد الحكيم أمامى بأقله .. لما بأقعد على الأكل بأشوف صورة عبد الحكيم فى الطبق .. أرمى الشوكة والسكينة ولا أكل .. » فىلى

هذا القدر تصور تأثر عاطفياً .. يسبب له حاجات لا يقلل إنه يسببها مع أحد تانى .. يعفو له عن حاجات لا يعفوها عن أحد آخر .

* وأسأل سامى شرف : الفنانة برلنتى عبد الحميد كانت يتشكو من أنه حصل عليها ضغوط ورقابة بعد وفاة المشير ؟

* « لأ محصلش .. الفنانة برلنتى عبد الحميد شاركت مع أختها الأنسة زهرة .. أو السيدة زهرة ما أعرفش .. وراحوا فى دكرنس فى محافظة الدقهلية .. طبعوا الاستقالة اللي كان عبد الحكيم عامر قدمها آخر ٦٢ وكان بيطالب فيها بالديموقراطية .. فهم طبعوا هذه الاستقالة وابتدوا يوزعوها على نطاق واسع .. دى قضية توزيع منشورات .. اتقبض عليها وعملت برلنتى عبد الحميد معاملة جيدة جداً فى جهاز المخابرات .. إلا إنها طلبت تقابل الرئيس جمال عبد الناصر .. فلما بلغنى حلمى السعيد .. كان حلمى السعيد هو أيامها المشرف على المخابرات وكان متولياً التحقيق فى قضايا انحراف المخابرات .. فحلمى السعيد كلمنى وقال لى دى برلنتى عبد الحميد عاوزة تقابل الرئيس عبد الناصر .. فقال لى روح لها شوفها عاوزة إيه ؟ فرحت قابلتها وكان ليلتها أو ثاني يوم عبد الحكيم عامر انتحر .. الكلام جاب بعضه .. قلت لها عبد الحكيم انتحر فقالت ده أنا مراته .. فخرجت قلت للرئيس برلنتى عبد الحميد بتقول إنها مرات المشير عبد الحكيم عامر .. قال افرج عنها حالا .. دى مرات عبد الحكيم عامر . »

* وأسأل برلنتى عبد الحميد : هل الرئيس كان يعرف بعلاقتك وزواجك ؟

* « أنا مش متخيلة إن أحد يتصور إن اثنين أصدقاء وشركاء فى دولة .. وشركاء فى السياسة والقرارات .. وفيه العلاقة القوية جداً دى .. واحد فيهما يتجوز والثاني ما يعرفش .. إزاي تجي إزاي ؟ مش معقولة .. الحاجة الثانية لدواعي الأمن دائما المتعارف عليه .. هو إنه جمال عبد الناصر لما يكون فى أى مكان .. النائب بتاعه بالذات عبد الحكيم عامر لازم يبقى عارف نمرته وهو فين .. والعكس برضه بيحصل .. ولو عبد الحكيم عامر فى مكان معين إن شاء الله بيزور ناس أو مسافر البلد أو بيمشى فى الشوارع لازم يكون جمال عبد الناصر عارف عبد الحكيم فين .. وفى نمرة كام وكل حاجة .. وهو كان بيتصل بنا فى البيت .. دى دولة .. بالنسبة للمشاكل العائلية الزوجة بتحب تعرف جوزها فين والأولاد يعرفوا أبهم فين .. فما بالك مشاكل دولة .. فدى كانت حاجة معروفة بين الاثنين .. وكان بيتصل وأنا كنت أحياناً بأرد على الرئيس وكان يقول لى .. إدينى عبد الحكيم .. وبعدين زارنى أكثر من مرة فى الإسكندرية فى البيت بتاعنا .. والحاجات دى كلها أنا ذكرها بالتفاصيل فى الكتاب بتاعى .. فطبعاً اللي يقول إن عبد الناصر ما كانش يعرف إن عبد الحكيم متجوز ده كلام ساذج .. لأنه حتى على مستوى الأجهزة جوا يشهروا بعبد الحكيم وعارفين إنى أنا كنت متجوزاه .. وحطوا منشورات تحت الأبواب فى وسط البلد .. التنظيمات كانت عاوزة تشهر بعبد الحكيم .. إن عبد الحكيم متجوز وإن مراته حامل وإنها برلنتى عبد الحميد .. ووصلت للرئيس وجاب شعراوى جمعة .. والحكاية

معروفة سنة ٦٦ .. إزاي ما يعرفش بقى إنه متجوز .. يعنى حاجات غريبة جداً مش فاهمة هو الجواز عيب ؟ هو حرام ؟ هو ما فيش حد فى مصر متجوز اثنين » .

* وأسأل الفريق أول مرتجى : هل كان الرئيس على اتصال بالمشير وزوجته الفنانة برلنتى عبد الحميد ؟

* « دى برلنتى اللى بتقول كده .. عبد الناصر بينكر هذا .. هو جاء بيقول لى لازم كل واحد يكون عنده حاجة فى « الباك دوور » .. حتى قلت له الباك دوور دى تطلع إيه .. قال لى يعنى يبقى فيه اتصالات وحاجات كده منها الخفية علشان قال إيه الرجل الزعيم أو السياسى يبقى منتعشاً » وفريش » .

* ويقول شمس بدران : « المشير حاول يخرج من الحكم أكثر من مرة .. ولمجرد الصلات العاطفية بينه وبين عبد الناصر ماقدرش يخرج .. فلما أصر على البقاء بهذا الوضع .. فقد الاهتمام وانصرف إلى مواضيع أخرى ... اللى هى قصة حب واتجوز اسمها إيه دى ؟ »

* الفنانة برلنتى عبد الحميد ؟

* « الفنانة برلنتى عبد الحميد .. القصة الوحيدة بتاعته فى حياته .. هى برلنتى عبد الحميد » .

* هل الرئيس عبد الناصر كان بيشجعه على علاقته بالفنانة برلنتى وزواجه منها ؟

* « آه طبعاً .. لكن زواجه لأ .. إنما كان بيشجعه على علاقته بالفنانة برلنتى .. عبد الناصر كان بيشجعه فعلاً .. بصراحة بقى كان علشان يصرفه عن الجيش » .

* طيب إزاي كان عاوزه يبقى .. وإزاي عاوز يصرفه ؟

* « ما هو عاوز بقى يطلعه بالتدريج .. يطلع فى الوقت اللى يناسبه هو .. اللى يناسب عبد الناصر مش اللى يناسب عبد الحكيم » .

* وأسأل محمود فهم : الرئيس بكى يوم وفاة المشير ؟

* « الرئيس بكى .. ولم يبكى إلا يوم وفاة المشير .. كان يومها بأدلكه .. طلعت له بعد يوم من وفاة المشير فوق وجدت عينيه زى الدم من البكاء .. أكبر واحد زعل على المشير الرئيس جمال عبد الناصر الله يرحمه » .

* وأسأل جمال عامر : موقف الرئيس عبد الناصر من موت المشير .. هل طلبكم .. عزاكم .. قال لكم حاجة ؟

* « الحق يعنى طبعاً .. كنا محملين الرئيس عبد الناصر المسؤولية بالكامل .. ولذلك إحنا كنا رافضين أى علاقة أو أى طلب .. بس كان خالد عبد الناصر طلب عن طريق ناس أن يأتى ليعزى .. فلما طلب قلت له اتفضل .. وجاء إلى البيت ولم يكن فيه أى حاجة تانى .. وحصل لنا نوع من الحصار من جميع النواحي .. اللى بيحى البيت يتراقب .. مش عارف الناس بدأت

تخاف .. وإحنا قلنا لهم ما فيش داعى تيجوا علشان لا نسب لأحد مشكلة هو فى غنى عنها .. طبعاً إحنا أصبحنا بالنسبة للدولة شيئاً لا يمكن لمسه .. مافيش أى واحد فى الدولة يقدر إننا ننكلم معاه فى أى شىء .. طيب إحنا نعيش إزاي ومافيش معاش .. والدى ليس مليونيراً .. هو رجل كان عنده بعض أملاك عن أبوه باع جزءاً منها خلال حكمه ودى طبعاً لا أعتقد إن أحدأ عملها .. لإن طبعاً كان عنده التزامات معينة وتصرف فى حاجته .. باع كثيراً من حاجاته ليواجه طلبات المعيشة وكده ليس معنا أى مصدر دخل تانى .. حصل إن حسين عبد الناصر جوز أختى قال لى يا جمال مافيش حد يحل هذا الموضوع إلا الرئيس .. أنت لازم تقابله لإن لا أحد بييجى ناحية هذا الموضوع وإنتم حستتمروا إزاي كده .. صرفتوا كل اللى معاكم ومافيش حاجة .. وضرب لى مثلاً كان واحد من الضباط حصل له نفس المشكلة وراحوا قابلوه واتحلت .. نهايته طلبت ميعاد ورحت قابله فهو قابلى على الفور الحقيقة .. سألنى عن أحوالى كويسين مش عارف إيه .. بدأت أحكى له اللى حصل ووجدت إن هو مستغرب جداً من الموضوع وكان هو متأثراً جداً وحسيت بكاد يكون .. يعنى متأثر بدرجة كبيرة .. لكن لما عرفت إن هو مش عارف ده كله .. استغربت لإن هو بيعرف كل حاجة المفروض .. مافيش حاجة بتغيب عنه فقلت له يا فندم إحنا .. قال طلباتكم إيه ؟ قلت له إحنا ليس لنا طلبات إحنا عاوزين المعاش اللى بتقرره الدولة لأى واحد .. الرجل ده خدم فى القوات المسلحة وغيره زى أى ضابط المفروض أن يكون له معاش .. قال لأ إزاي وفعلأ وقتها عملوا مش عارف ١٥٠ جنيه .

• كنت تقول له يا فندم ولا يا عمى ؟

• « لا كنت بأقول له يا فندم .. ماتقدرش تقول يعنى للرئيس عبد الناصر غير كده .. كان له حضور وهو جامد ما تقدرش تكلمه كده » .

• والمشير كان يقول له إيه ؟

• « كان يقول له يا جمال .. يعنى فيما بينهما .. لكن عادة « يا ريس » .. هو كان يقدره جداً الحقيقة .. وبعدين هو عبد الحكيم عامر كان يقدر الناس كلها مش جمال عبد الناصر بس .. كانت حاجات صغيرة بتحصل وتصرفات منى فكان ينبهنى دائماً إن لازم الواحد يعامل الناس كويس ويحترمها ودى حاجة كان ينفرد بها فى الحقيقة » .

• وأسأل برلنتى عبد الحميد : ماذا ترك لك المشير عبد الحكيم عامر بعد رحيله ؟

• « ترك لى الاعتقال .. ترك لى التعذيب .. لكن علشانهم يهون كل شىء .. ترك لى أجمع ذكريات ممكن تقولها امرأة عن زوجها .. ترك لى .. معاشاً ٢١ جنيه نعيش به أنا وابنى .. ومنعت من العمل ومن السفر .. إنما مالهوش ذنب فى كل ده .. وأنا بأعتقد إنى زوجة محظوظة جداً .. فقدت ترك لى أحلى حاجة ممكن يسببها أب .. وهو عمرو اللى بقى دكتور عمرو عبد الحكيم عامر » .

• هذا وكان التخلص من سيطرة الجيش يقتضى شيئين :

□ أولاً : التخلص من مجموعة عبد الحكيم عامر ...

• ويقول د . عبد العظيم رمضان : « قام جمال عبد الناصر بفصل كل دفعة شمس بدران وزير الحرية واعتقاله .. لأن كان لابد من تصفية هؤلاء .. وعبد الناصر لم يسترد حريته بالنسبة للجيش إلا بعد الهزيمة والمحاکمات » .

• ويقول اللواء أ . ح . حسنى نبيه الدسوقي : « أحمد إسماعيل أبلغنا أن الفريق فوزى يدعو دفعة شمس بدران لحضور مؤتمر بالكلية الحرية .. وعندما وصلنا إلى هناك اعتقلنا جميعاً .. وهكذا كل دفعة شمس بدران فُبض عليها .. فى عملية تشبه قصة القبض على المماليك فى القلعة » .

□ ثانياً : إجراء محاكمة للقادة العسكريين باعتبارهم المسؤولين عن الهزيمة ...

• وأسأل حسين الشافعى : ماذا لمست فى أثناء المحاکمات اللى حصلت فى محكمة الثورة وقد كنت رئيس هذه المحكمة ؟

• « والله أنا بأعتبر إن ٦٧ دى معنى كانت العملية الجراحية اللى قضت على الازدواجية والصراع على السلطة » .

• وفعلأ .. حوكم قادة الجيش وعلى رأسهم قائد الطيران صدقى محمود ...

• وأسأل مرتجى : الفريق صدقى محمود تجده مظلوماً ولا مسئولاً ؟

• « لا أنا أعتقد إنه مظلوم ١٠٠٪ .. ليه ؟ لأن - بس أنا ما حضرتش الحقيقة .. الواقعة دى قالوا لى عليها - لما قال الفريق صدقى اللى كان عاوزنا نضرب الضربة الأولى .. وفى الخطة اللى ماضى عليها عبد الناصر وكاتب نُظر إن إحنا نضرب الضربة الأولى .. وفعلأ كان فيه تعليمات بضرب الضربة الأولى ويعدين أوقوها .. لما تدخل الجماعة الأمريكان والجماعة الروس .. وقالوا يعنى ما فيش داعى إن إحنا نكون البادئين .. فهو عبد الناصر اعتقد إن إحنا كسبنا المعركة الأولى والمعركة الثانية تبقى المفاوضات والنواحي السياسية .. فصدقى محمود قال له يا أفندم لو هم ضربوا الضربة الأولى خسائرنا حقيقى كبيرة جداً فى الطائرات .. فقال له إنت عاوزنى أعادى أمريكا .. ده قرار سياسى عليك إنك تتخذ الإجراءات المناسبة علشان تقلل من الخسائر بتاعتك .. إحنا فى ذلك الوقت لا فيه دشمل للطائرات ولا فيه دفاع جوى للطائرات ولا فيه رادارات كويسة .. كلها قديمة » .

• وأسأل شمس بدران : هل كان المشير يحب الفريق صدقى محمود حباً أعمى ؟

• « آه .. وحُكم عليه بالإعدام .. هى دى حاجة تحصل فى أى بلد فى العالم !! » .

• ويقول مذكور أبو العز : « لما حصلت الهزيمة .. أحبوا إنهم يوجدوا كبش فداء لها .. فكان

الطيران للأسف الشديد .. ويعدين أنا واجب على أن أنكر بأن القوات الجوية فى هذا برينة ..
برينة .. برينة .. من كله .. بالعكس كان مجنياً عليها لأن طلباتها بالنسبة للنشم وطلباتها بالنسبة
لزيادة المطارات رفضت » .

• **ويقول أحمد أبو نار :** « حوكت وصدر حكم على بالأشغال الشاقة ١٠ سنوات ولقيت ما لقيت
فى السجن .. هذه الفترة كانت فترة قاسية جداً .. المحاكمة قبل ما تبقى محاكمة .. غُبننا فى
السجن الحربى علشان يأخذوا منا اعترافات بلن إحنا ناس متآمرين » .

• **هل هذه من آثار التعذيب (مشيراً إلى يده) ؟**

• **هذه من الآثار .. وفيه آثار ثانية والطب الشرعى أثبتنا وأخذت عليها تعريضاً عشرة آلاف
جنيه .. وقال لك ليس الغرض الإثراء وثبت هذا من شهادة الشهود بوقائع التعذيب .. هم
عاوزين نقول أى كلام ونقول إن هناك مؤامرة .. علماً بأن الضباط دول كانوا أحسن ضباط
فى الجيش .. وعلى كفاءة عالية ومجموعات صاعقة من أحسن الضباط .. وطيارين من أحسن
الطيارين .. وعلى سبيل المثال تحسين زكى .. الله يرحمه .. الفريق طيار أحمد نصر اللى
هو قائد القوات الجوية حالياً (وقت الحوار) أخذ سنة معانا .. ولكننا مظلومين » .**

• **وكان الاتهام إيه ؟**

• **« الاشتراك فى قلب نظام الحكم والتآمر » .**

• **ويقول عبد المجيد فريد :** « من خلال التحقيقات اللى حدثت بعد النكسة .. تحقيقات المخابرات
اللى قام بها الأستاذ أمين هويدى الذى كان مدير المخابرات العامة فى ذلك الوقت .. تبين إن
الرئيس مكاينش يعرف التفاصيل التى تحدثت فى المخابرات من انحرافات ومن معاملات غير
عادية ومن استخدام النساء وبعض الأحداث التى كانت لا تجوز فى ذلك الوقت .. لكن مثلاً
إنه يعرف إن فيه اعتقالات تمت فى أحداث القضية الفلانية .. حصل » .

• **والتعذيب ؟**

• **« ما أقدرش أجاب عن دى .. ما أعرفش لأنى ما حضرتش .. مكاينش مسئولاً فى المخابرات
أو أستطيع أن ألم بهذا الموضوع » .**

• **كما حوكم عباس رضوان ...**

• **وأسأل سعيد حليم : عباس رضوان ؟**

• **« عباس رضوان .. الناس يعلمون عنه إنه الرجولة والشهامة .. وأيضاً ضابط أركان حرب
وضابط حر » .**

• **وأسأل عبد المحسن أبو النور :** هل كان فيه فلوس بتستخى بسبب تأمين الثورة ؟

• **« إطلاقاً .. اللى حصل سنة ٦٧ .. بعد ٦٧ ظهر الكلام ده فى محاكمة صلاح نصر رئيس**

المخابرات .. وجدوا مبلغ ١٤ ألف جنيهه عند عباس رضوان دفنهم فى غيط بتاع واحد قريه
اللى بلغ عنهم .. هذا المبلغ مافيش غيره .. ماحصلش غيره إطلاقاً .. وهذا المبلغ كان موجوداً
لتعزيز العمل المضاد اللى كانوا بيتحركوا به ضد جمال عبد الناصر .

• **ويقول د . عبد العظيم رمضان :** « موضوع الزلغ عند عباس رضوان حقيقى .. وقد ذكرت
ذلك فى كتابى « تحطيم الآلهة » .. وكان ما حدث فى ٦٧ هو صراع عباس رضوان
وعبد الحكيم عامر مع عبد الناصر . »

• **ويقول أحمد حمروش :** « كتب موسى صبرى فى التعليق على محاكمة عباس رضوان وقال :
إن حقيقة النقود الضائعة تظهر » إن ما خفى كان أعظم » .. وبعدها نُقل من جريدة الأخبار إلى
جريدة الجمهورية كاتباً بعد أن كان رئيساً للتحريير . »

• **ويقول عباس رضوان :** « أنا يوم ٢٥ رحت بيت المشير فى الصباح وجدت تحديد إقامة يعنى
مافيش دخول .. فكل اللى حصل إنى أحضرت ضابط الشرطة العسكرية وقلت له راعى
البيت .. يوم ٧ سبتيمبر قاعد أنا فى البيت وأنا كنت متوقعاً والشنطة جاهزة يعنى كان وضعاً
طبيعياً .. فوجئت بضابط عزيز على اسمه حسن طلعت .. كان ماسك مباحث أمن الدولة
والمباحث العامة .. وجاء وسلم وشرب قهوة .. وقلت له إنت جاي فى موضوع أنا عارفه ما فيش
أى إحراج ولا حاجة .. دقيقة واحدة .. وأحضرت الشنطة وطلعت معاه فى عربة مدنى على
القلعة .. وقعدنا فى القلعة شوية .. ثم السجن الحربى . »

• **كان فيه سوء المعاملة فى السجن ؟**

• **« بالنسبة لى لأ » ..**

• **طيب دخلت السجن ليه ؟**

• **« والله اللى كان فاضل إحنا .. المتبقى عبارة عن عباس رضوان .. صلاح نصر .. شمس
بدران .. وعبد الحكيم عامر كضباط ثورة .. والضباط الصغيرين عادييين .. هم تخيلوا إن دول
ممكن يعملوا حاجة .. وأنا لآخر يوم كان مافيش أحد ما بيلجأ ليش من الاثنين .. عبد الحكيم
عامر أو عبد الناصر .. الرئيس كلمنى : إيه يا عباس ده إخوات عبد الحكيم ما أعرفش بيبوز عوا
كتاب استقالة .. قلت له لا سوف أنبه عليهم .. بعدها برضه أروح له المنيا يقول خليه ييجى ..
لكن هو عبد الحكيم عامر بمعرفتهم ببعض فهم إن هو مالوش فى الاستمرارية . »**

• **وحوكم أيضاً صلاح نصر رئيس المخابرات ...**

• **وأسأل حافظ إسماعيل : ماذا تقول لنا عن صلاح نصر ؟**

• **« كان يريد أن تبقى كل السلطات فى يده . »**

- وأسأل سعيد حليم : صلاح نصر ماذا تقول عنه ؟
- « صلاح نصر أولاً صديق عمرى .. وعندما تخرجت احتضننى .. و هو إنسان شريف وعلى مقدرة ثقافية عالية لأنه بيؤلف كتباً وأنا أعتر به شخصياً .. وهو الذى ضمنى للضباط الأحرار .. كون بقى فى حكم ما يساء دى موجودة كثيراً .. شوف النهارده كلينتون عمالين يطلعوا له مش عارف إيه .. ده موضوع سياسة وأنا ما اشتغلتش فى السياسة » .
- ويقول شمس بدران : « صلاح نصر تباهى بأنه يحكم عبد الناصر .. يجعله ينام ويستيقظ بأمره .. ثم يتصل بالمشير عامر ويحكى له ذلك على سبيل التلمية » .
- ويقول أحمد كامل : « فيه شوية حاجات حصلت خاصة بعد ٦٧ وثار كلام كثير جداً .. وقيل ما قيل فى المخابرات العامة .. وأنا بأرجع هذا إلى حاجتين أساسيتين : الحاجة الأولى إننا كشعب نجهل كثيراً جداً عمل المخابرات ولا نعلم عنها شيئاً بحكم عيب آخر موجود فينا إن كل شىء « سرى للغاية » .. وقد لا يكون له أهمية فى أن يكون سرّاً .. النقطة الثانية إنه من عيوبنا برضه إن إحنا نعمم .. فرد يخطئ فى المخابرات العامة نقول المخابرات العامة كلها سيئة .. هذا خطأ كبير جداً وشائع على كل المستويات » .
- جهاز المخابرات العامة فى عهد صلاح نصر .. وفى عهد أحمد كامل .. إيه الفرق بينهما ؟
- « الفرق بينهما حاجة بسيطة جداً .. إن أنا سميت إلى تحديد واجب كل إنسان بيعمل فى جهاز المخابرات .. ثم تحديد واجب جهاز المخابرات نفسه .. بعدم التضارب مع الأجهزة الأخرى .. وحتى فى هذا الشأن عقدت بروتوكولات للعمل بالنسبة للجميع .. آخر حاجة إن جهاز المخابرات يعمل استراتيجياً ولا يمس أى فرد مصرى .. يمكن قبل كده كان يمس بعض الناس » .
- بعيدا عن التعميم .. قالوا ما قاله مالك فى الخمر بالنسبة للمخابرات العامة .. فهل ينطبق ذلك على وقت صلاح نصر ؟
- « لا » .
- وأسأل أحمد سعيد : صلاح نصر ؟
- « لا صلاح نصر ده شغلانة لوحده .. ده مدفع سريع الطلقات لما ينفعل .. فى نفس الوقت عبد من العبيد بتوع الرومان لما يحس إنه غلط معاك يجيلك يتوسل إليك .. وبعدين نهره متدفق .. كوزير أنا تعاملت معاه كوزير .. نهر متدفق من العطاء .. والإمكانات » .
- ويقول شمس بدران : « رجل كفاء جداً .. أنشأ جهاز جديد فى الدولة الللى هو جهاز المخابرات .. وأنشأ بكفاءة تامة وكان رجلاً نزيهاً جداً .. نزاهة كاملة .. إنما إتحط عليه العيب كله بعد ما إحنا مشينا .. الفساد الللى فى الدولة كله إتحط على صلاح نصر .. والهزيمة العسكرية اتحطت على عبد الحكيم عامر .. وخرج عبد الناصر بريئاً من الموضوع كله ..

مالوش هو دعوة بحاجة .. الهزيمة العسكرية بقت عبد الحكيم عامر وفساد الدولة كله وقواته ..
و .. يبقى صلاح نصر » .

• **ويقول الفريق أول مرتجى :** « صلاح نصر كان شغله مع جمال عبد الناصر .. وفي الوقت نفسه كان هو ذو ولاء كبير لعبد الحكيم عامر .. صلاح نصر كان أول من عمل مخابرات بالمنظر اللي هي فيه » .

• **مش زكريا محيي الدين ؟**

• **« زكريا هو اللي بدأ .. لكن صلاح نصر هو اللي توسع فيها بالطريقة اللي وصلت إلى ما وصلت إليه .. كان كل شغله مع جمال عبد الناصر أساساً .. الواحد لما سمع عنه كلاماً كثيراً والله أعلم .. يقول لك الرجل يُعْتَقَل ويقول لك الرجل ده كذا .. كل دى تأشيريات بدون إمضاء .. أنا كنت أحب صلاح نصر .. بس أنا ما كنتش أعرف أبداً الخفايا اللي بتحصل .. أنا كنت في زيارة بيني وبينه .. صلاح نصر كان عمه عبد الله نصر .. وكان أول واحد حضرته في الكتيبة وأنا ملازم ثاني صغير .. وكنت معجباً به جداً .. حتى لما كنت بأزوره في البيت لما تعب .. وصلاح اتجوز مرات عمه لما مات » .**

• **وحوكم كذلك شمس بدران ..**

• **ويقول سعيد حليم :** « الحقيقة هو صديق شخصي لى .. وأعتز بصداقته .. وكنت بأشغل سكرتيراً لزكريا محيي الدين .. وهو كان بيشتغل للمرحوم عبد الحكيم عامر .. وكنت لا أعرفه قبل الثورة .. وتوطدت الصداقة بيني وبينه .. واستمرت هذه الصداقة .. وأنا على اتصال به دلوقتى » .

• **وأسأل شمس بدران :** كان رئيس المحكمة السيد حسين الشافعى .. وكنت متهماً بالتآمر وقلت فيما قلت .. « إن الدم حبيبي للركب » ؟

• **« الدم للركب ده تعبير عبد الناصر .. أنا كنت بأقابل عبد الناصر في الوقت ده .. وبعدين كان فيه عندي واحد شغال في البيت في الشقة اللي أنا ساكن فيها .. مرة قال لى إنه مشى في الشارع فناس كانت بتمشى وراه .. فأنا الحقيقة اتضايقت .. ما كانتش فيه حاجة تستدعى إن أنا أتراقب .. فطلبت عبد الناصر في البيت قلت له يعنى يصح بعد مدة السنين دى كلها إنك تراقبنى .. قال لى والله أنا ما راقبتك ولا أعرف .. قلت له آمال إيه يعنى المجندين اللي ماشيين ورا الشغال .. دول جايين منين يعنى نازلين من السماء .. قال لى أنا والله ما قلت حاجة ومش أنا .. فأنا كنت بأتكلم معه بعنف الحقيقة .. هو قلب القضية دى كلها للمتصلين به .. على صبرى وخلافه .. علشان هم يعرفوا العلاقة اللي بينه وبينى .. هو بيؤلف بقى .. لازم بيرر لهم أى تصرف جيمعهم معاً وقال إن أنا قلت له « أخلى الدم للركب » .. يبقى ده مبرر لإنه يعتقلنى بعد كده .. طبعاً ده ماحصلش .. وده مش تعبيرى .. ما بأفولش أنا التعبيرات دى » .**

• وأسأل مرتجى : إيه رأيك فى شمس بدران ؟

« شمس بدران كان يتميز بالانتماء لعبد الحكيم عامر فى الآخر .. فى الأول كان الرجل بتاع عبد الناصر .. لما وجد إن عبد الحكيم عامر أسهل مطية فابتدا يخرج من نطاق عبد الناصر وينضم إلى عبد الحكيم .. إنما لما تشوف عبد الناصر .. لما أنا رحت له بعد ٦٧ .. وهو بيتكلم عن شمس بدران .. بيتكلم كلاماً سيئاً جداً ووقحاً .. شمس بدران لبسوه عباية أكبر من حقيقته » .

• ويقول أحمد أبو نار : « شمس بدران شخصية ممتازة وعلى خلق وقائد ولا يعيبه إلا تحقيقاته مع الإخوان المسلمين حيث إنه المسئول عن التعذيب .. وده كان بأوامر .. فيما عدا ذلك هو شخص يعرف ربنا كويس .. وكل اللي عمله مكلف به بتعليمات من فوق » .

• من فوق .. يعنى المشير عامر ولا الرئيس عبد الناصر ؟

• فى الحقيقة علاقة شمس بدران بالرئيس جمال عبد الناصر هى الأساسية .. ويعدين لما شمس عاشر المشير أحب المشير .. لأنه عاش معاه فترة الحرب .. فالرئيس عبد الناصر اعتبر إن الرجل بتاعه خرج من إيده وراح للمشير لدرجة إنه كان معين شمس بدران رئيس جمهورية لمدة يوم حسب الاتفاق مع المشير .. ثم حصل إنهم عينوا زكريا محيى الدين » .

• وأسأل سامى شرف : كان الرئيس عبد الناصر معيناً شمس بدران ليكون عينه على المشير عبد الحكيم عامر .. الكلام ده صح ولا غلط ؟

• « شمس بدران بحكم إنه كان أحد الضباط الأحرار الذين تحركوا ليلة ٢٣ يوليو .. وكان له دور فعال ما ننكرولوش حقه .. وماننكرولوش دوره ولا وضعه .. كان فى خلية الضباط الأحرار اللي كان بيرأسها الرئيس عبد الناصر .. فكان فيه صلة قوية بين الاثنين .. لكن كل الأمور وتداعيات العمل وصلت سنة ٦٧ إن شمس كان مشاركاً فى المؤامرة بتاعة المشير عبد الحكيم .. وبدليل إن هو كان ماسك السلاح يعنى كان فيه دليل مادى .. فيه آخرين لم يرد ذكرهم وما حش يعرفهم وعاشين لغاية النهارده .. كانوا داخلين فى هذه المؤامرة بس ربنا أمر بالستر .. الرئيس عبد الناصر ما كانش يحب يوسع الأذية .. لو كان غاوى أذية كان أذى ناساً كثيرة جداً .. ومش دى بالذات .. فيه حاجات أخرى كثيرة .. أسلوب عبد الناصر فى التعامل فى الإضرار وفى التعامل مع التآمر كان بتبدأ اثنين باثنين يقول أربعة .. المتتالية التآمرية ده فى علم المخابرات ٢ بيقوا ٤ .. و ٤ بيقوا ٨ .. الخ .. يعنى إيه ؟ أصل البنى آدم ده مش لوحده .. ده معاه أمه وأبوه وأخته وأخوه وابن عمه .. تصور إزنت حناذى ٨ عائلات .. فيقول لك اجهض وأعمل المسألة وما تأنيش ناس كثير .. هو ده أسلوب عبد الناصر فى التعامل مع الأشياء .. وحتى فى التعامل مع الخارج » .

• وأسأل حافظ إسماعيل : شمس بدران ؟

• « أنا كنت سفيراً لا أعلم !! »

• **ويقول أحمد سعيد :** « لأ .. شمس بدران ده صديق .. وبعدين شاء قدره رغم صداقته لنا .. إنه يكون أحد المشايخ بتوع كفر المشير » .

• **ويقول د. الدكتورى :** « الوزير السابق شمس بدران كان أكبر ما يؤله هو حب المشير عبد الحكيم عامر له .. وكان المشير عامر لما يبص لشمس بدران كنت تحس كما لو كان عاشقاً له .. فكان مطلوب الإرادة أمامه .. وكان له مطلق التصرف فى كل ما هو من اختصاص المشير » .

• **ويقول أمين هويدى :** « شمس بدران كان تولى وزارة الحربية بمعلومات شخص لم يتجاوز الضابط الصغير .. لم يدرك خطورة المنصب اللى هو فيه .. ولكن أعطيه بعض العذر .. لأن تدهش يا أخ طارق لحاجة حصلت مع شمس بدران وهو وزير حربية .. أى إنه ممثل القيادة السياسية وعلى قمة المؤسسة العسكرية .. تعرف مين اللى حدد اختصاصاته .. القائد العام للقوات المسلحة المشير عبد الحكيم عامر .. فيه قرار موجود .. وأنا كنت فى هذا الموضوع .. والدولة سكنت على هذا .. كان شمس هو وزير حربية يعمل من باطن القائد العام .. هذا أول خطأ .. الرجل كان يقوم ببعض الأعمال المحدودة فى القوات المسلحة .. ولكن أنا زى ما قلت لك القادة الكبار كلهم كانوا مسئولين عن التجاوزات التى حدثت يوم ٥ يونيو ١٩٦٧ .. المهم شمس بدران زى ما قلت لك كان وزيراً للحربية فى ظروف سياسية اقتضت وجوده .. وبالقطع لم يكن هو الشخص المناسب فى المكان المناسب » .

• **ويقول الفريق سعد الشاذلى :** « شمس بدران تولى منصب وزير حربية مع أن خبرته لا تزيد عن خبرة ملازم أول أو نقيب .. يعنى لا أقدر أن أقول إن هو كان يعنى لديه المؤهلات التى تؤهله كوزير الحربية .. حتى وهو وزير حربية كان يكاد يكون يعمل مدير مكتب عبد الحكيم عامر » .

• **ويقول المشير عبد الغنى الجمسى :** « كان من غير المناسب إطلاقاً إنه يتولى مسئولية وزير الدفاع فى الوقت الذى اتعين فيه .. لإنه حديث جداً .. وكان مدير مكتب المشير عبد الحكيم عامر فى ذلك الوقت .. وأعتقد إنه لم يقم بأى عمل عسكري فى حرب يونيو ٦٧ .. رغم إنه كان وزير الحربية فى هزيمة ٦٧ .. وكان من السابق لأوانه أن يتولى هذا المنصب » .

• **ويقول الفريق أول محمد فوزى :** « شمس بدران كان عبد الناصر يعتبره ابنه .. وأنا حضرت مرات كثيرة .. فلوس شمس بدران تخلص مثلاً .. يقوم بروح للرئيس عبد الناصر يقول له أنا عاوز ٣٠٠ جنيه لأن مصروفى خلس .. يعطى له .. فضل فاهم إن ده بتاعه لغاية السنة الأخيرة اللى هى بعد الهزيمة .. قعدوا فى الجنية سوا قال له أنا عاوز أعرف التنظيم بتاعك يا شمس .. رد عليه وقال له القوات المسلحة كلها التنظيم بتاعى .. كان فى ذلك الوقت شمس بدران وزيراً للحربية .. لكن مفهومه إن هو الكل فى الكل .. فراح عبد الناصر وقف وزعل .. ومن ذلك فقط عبد الناصر عرف إن شمس بدران مش بتاعه .. ومش ابنه ولكن ابن المشير عامر » .

• كان فى سنة كام ؟

• « الكلام ده فى أغسطس ٦٧ .. قبل ما يسافر الخرطوم .. وقبل الحكاية ما نتم .. واللقاء الذى أقول لك عليه كان فى ٢٤ أغسطس سنة ٦٧ .. وكنت أنا موجوداً فى القيادة واقف على رجلي حصل تهديدات لى وقاومتها بأسلوبى . »

• مين اللى هددك ؟

• « جاء لى حوالى ٢١ ضابطاً كبيراً .. قالوا لى كلهم إنت قاعد على الكرسي بتاعك ليه ؟ .. ما فيش قائد إلا المشير .. طيب إنتم عاوزين إيه .. قالوا تمشى .. أمشى إزاي أنا هنا موجود بأمر السلطة الشرعية بتاعة البلد .. إنتم اللى طلعتم على المعاش .. إنتم تتفضلوا بره .. وطردتهم .. سمعت عند الرئيس بعدها بساعتين .. جاء نقيب اسمه « أبو نار » ومعه ١٢ عربية مصفحة بتوع السريتين اللى كانوا موجودين فى بيت الحلمية مع المشير .. المشير نقل من الحلمية راح الجيزة .. دول أخذوا أمراً علشان يأتوا للجيزة .. فى طريقهم إلى الجيزة حوّنوا علّى .. دخل النقيب ده ومعه ١٢ عربية مصفحة مبنى القيادة .. أخذت خبراً .. وأنا موجود فوق .. نزلت له على الشرفة بتاعة المبنى وهو مدور العربيات .. والعساكر الموجودين عمالين يهتفوا للمشير .. مبنى القيادة بعد بيت الرئيس عبد الناصر .. اللى فى الشارع سمعوه فى منشية البكرى .. وقلت لهم الوضع اللى إنتم فيه غير قانونى .. وإحنا موجودين فى الميدان وقت حرب .. اللى منكم سينتظر دقيقتين فأكثر سوف أشكل له مجلساً عسكرياً ميدانياً وأحاكمه .. وبعدها انصرفوا وراحوا على الجيزة وتمركزوا هناك . »

• وأسأل أحمد أبو نار : هل كان فيه شيء ما بين الوزير شمس والغريق فوزى ؟

• « الغريق فوزى مع احترامى له كفائد كان قريباً لسامى شرف .. وكان يعلم كل شيء عن طريق سامى .. وكان فيه حاجات شخصية بينه وبين شمس بدران .. لأن كان شمس بدران مدير مكتب المشير وعقيد .. وهو كان رئيس هيئة أركان حرب أيام ما كان المشير قائد الجيش .. وكان يخشى شمس بدران .. فلذلك لما حصلت النكسة أحب يننقم من كل ما هو محيط بالمشير عامر . »

• وصدرت أحكام عسكرية اعتبرها الشعب المصرى أحكاماً هزيلة .. وثار ثورة عارمة ..

• ويقول د . عبد العظيم رمضان : « فى أثناء المحاكمات اتفتحت صور كان من الصعب أن تظهر أمام الشعب .. لأنها كانت تمس هيبة النظام أكثر مما هزته الهزيمة . »

• وكانت مظاهرات سنة ١٩٦٨ أول مظاهرات بعد مظاهرات سنة ١٩٥٤ تقوم فى مصر ضد رئيس الدولة .. وتزعم طلبة الهندسة بجامعة القاهرة مظاهرات الطلبة احتجاجاً على الأوضاع .

• وأسأل د . حلمى مراد : كان فيه هتافات موجهة ضد النظام ومظاهرات : حضرتك تقول عنها إيه ؟

• والله .. سألتنى الرئيس عبد الناصر نفس السؤال ده .. لأنه فى وقتها لما حصلت هذه المظاهرات .. الرئيس عبد الناصر دعا رؤساء الجامعات .. إلى اجتماع فى قصر القبة .. وأنا كنت من بينهم .. كمدير جامعة عين شمس .. وكنت أنا أحدثهم فى التعيين كرئيس جامعة .. وبدأ يعطى الكلمة للأقدم فالأحدث .. وإخواننا رؤساء الجامعات الأقدم تحدثوا .. فوجدتهم كلهم بيتحدثوا عن كيف قامت المظاهرات وكيف تم فضها .. والهتافات التى كانت تنتقل .. الخ .. ولما جاء الدور على قلت له : والله أنا بأعتقد إن سيادتك لم تدعونا علشان نقول لك كيف قامت المظاهرات وكيف تم فضها .. وإيه الهتافات التى كانت تنتقل .. لأن موجود من الأجهزة الأمنية والرقابية ومختلف المعنيين الللى يكتبوا تقاريراً أدق منا فى هذه النقطة .. لإنهم موجودين فى وسط الناس ونظرتهم أعمق .. إنما أفكر سيادتك دعينا علشان نقول لك لماذا قامت هذه المظاهرات .. وكيف نتفادى حدوثها مرة أخرى .. قال لى : بالضبط .. أهو ده الللى أنا عاوزه .

• ويقول د . ميلاد حنا : « لما جاءت هزيمة ٦٧ .. أنا عاصرت بنفسى الحركة الطلابية فى كلية الهندسة جامعة عين شمس .. وأنا أستاذ نزلت للمدرجات وخلعت روبب الأستازية وقلت لهم أنا طالب زيبى زيكم .. ومن ٦٨ لحد النهارده مامدنتش . »

• وأسأل إبراهيم مكادى رئيس اتحاد الطلبة بهندسة القاهرة : قعتم بمظاهرات واعتصام فى فترة ما بعد ٦٧ ؟

• « تفاصيل الواقعة .. هو إنه يوم ٢١ فبراير ٦٨ وكان بالصدفة يوم الطالب العالمى الذى تحتفل به الأمم المتحدة الللى هو كان سنة ٣٤ أيام كوبرى عباس ما افتتح على الطلبة المصريين .. فإحنا كنا موزيين احتفال بكده يومها بس برضه تشاء الصدفة إنه يومها كان صدور أحكام الطيران .. وبعدين زميلة لنا فى قسم العمارة كانت جاية الكلية بالتاكسى .. قالوا لها حصل مظاهرات فى حلوان .. وضربوا العمال بالرصاص .. ومات منهم أربعة .. ابتدئت المناقشات فى ساحة الكلية ولازم نعمل حاجة .. أذكر كان فيه واحد زميل من كلية التجارة .. د . أحمد شرف جاء .. اتفقنا فيما بيننا إن إحنا فى الاحتفال بعد ما نخلص الكلام المعتاد الللى بيتقال فى هذه الاحتفالات .. نتكلم .. وكان كثير من الزملاء كان فيه إبراهيم محمد فريد ومحمد منيب وممدوح بدر الدين .. أخذوا الكلمة .. وأثاروا موضوع ما حدث فى حلوان .. وتحول المدرج إلى هتاف بأنه لابد من عمل شىء وهو كان شىئا غريباً علينا .. فطلعنا فى مسيرة إلى الحرم الجامعى .. كنا حوالى ٢٢ طالب ودخلنا الحرم الجامعى ولقينا على الكليات كلها وابتدت الهتافات وانتهت إلى مدرج كلية الآداب .. امتلأ على الآخر .. وكان كل واحد يقول الللى هو عاوزه وأساس الهتافات كان .. الحرية .. الحرية .. »

• **وكنتم بتقولوا هتأففات أخرى أظن بعضها عن المحاكمات ؟**

• « هو بالتحديد الهتاف كان يقول « لا صدقى ولا الغول .. جمال هو المسئول .. كانت بمنتهى الأمانة يعنى اللي حوّر هذا الكلام بعد كده تماماً .. أساساً مش هي محاكمات الطيران اللي كانت تفرق معنا .. هو طبعاً كان من ضغط ٦٧ .. كشباب فى هذا السن حسينا إنه غدر بنا من الجميع وعلى رأس القائمة طبعاً الرئيس .. وفى الاجتماع فى كلية الآداب انتبهنا إلى أن لابد من تنظيم الأمور .. لمينا ٢ من كل كلية .. كان فيه ١٢ واحد على أساس إن دول يروحوا يقابلوا الرئيس ويرجعوا نعمل اجتماعاً يوم السبت .. وانفضت الناس على كده .. المهم وكيل الكلية طلب مقابلة الناس بعد الاجتماع ده .. ثانى يوم .. يوم الخميس برضه .. كانوا بيتكلموا الكلام ده كله وكانوا مستنيين عربيات تيجي من الرياسة .. بدل ما تيجي العربيات .. قالوا لأ وزير التعليم العالي د . لبيب شقير جاي .. فوصل د . لبيب وللأسف ماكانش سياسيا خالص .. لأن طبعاً ما اتعودش على موضوع زى كده .. وكانت مفاجأة للجميع .. مافيش مظاهرة حصلت فى تاريخ الثورة .. فاتكلم بعنف جداً ومافيش اجتماع وإنتم مين .. ولا تمثلوا أحداً ورفض رفضاً باتاً موضوع الاجتماع يوم السبت .. حاولنا حتى ننصح الجميع ما هو خلاص يوم السبت الطلبة جاية ولابد يحصل الاجتماع ده مافيش فائدة .. المهم قعدنا برضه يوم الجمعة وداومنا الاتصالات .. يوم الجمعة بالليل الدكتور أسامة الخولى طلبني أنا وفريد رحنا له البيت .. وكان وكيل الكلية - كان المعيد أيامها مسافر - د. العريان .. ونصحنا برضه إن بلاش حكاية مظاهرات يوم السبت أو أى شىء لأن حُضْرِبْ بيد من حديد على هذا الموضوع وإن « الدولة لن تسمح » .. وبدأوا الكلام بصورة رسمية .. رحت برضه أنا وزميل آخر هو محمود كمال إلى د . فؤاد محيى الدين .. كان خاله .. وبرضه كان نفس الراى » .

• **ويقول أحمد حمروش :** « تم اعتقال بعض الطلبة عقب مقابلة ساخنة مع الدكتور لبيب شقير وزير التعليم العالي .. وكان شعراوى جمعة يؤكد إنه لم يصدر أمراً بإطلاق الرصاص .. وكان على صبرى هانداً صامتاً لا أعرف ما يدور فى صدره .. بينما كان سامى شرف صاخباً يوزع الاتهامات (كالعادة) على الإخوان المسلمين والشيوخيين » .

• **ويقول مكادى :** « أنا أنكر كلمة أبويا لما خرجنا مرة من الاعتصام ورحت البيت قال لى « براقو .. علمتكم اللي أباهاتكم ماعرفوش يعملوه » .. فيعنى يكفيننا هذا .. هي ظروف البلد كانت غريبة أيامها .. المهم رحنا يوم السبت مافيش اجتماع وقلنا للناس خلاص د . لبيب شقير منع الاجتماع .. ماكانش فيه أى نية بأمانة مش رايعين مبينين إن إحنا نعمل مظاهرة .. إنما حدثت .. وخرجت الناس إلى الشوارع .. والكل تجمع فى كلية الهندسة .. ونزلنا إلى شار القصر العينى إلى مجلس الأمة وقتها .. طبعاً لا تتخيل إحساس الناس .. الناس كانوا بير، ورد على المظاهرة من البلكنات .. وبيهتفوا معاه .. إحساس عارم من الشعب كله .. الهتة هي هي « عاش تضال الطلبة والعمال » .. « البلد دى بلدنا واللى مانا هُم إخواننا » .. وصلنا إلى مجلس الأمة كان أنور السادات هو اللي كان موجوداً هناك وكان رئيس مه

الامة .. فخرج الأول فريق حاول يهدى الناس أو شرح الى إحنا بنعمله أو ماذا حدث .. طبعاً دى كانت حاجة جديدة بالنسبة لنا .. وبرضه مهما كان إحنا بنعتبر دى بلدنا .. فأنور السادات خرج وحاول يتكلم .. بس لا مجال .. فطلب يخش مندوبين ويتكلم معاهم فى هدوء .. فى الأول حتى كان فيه رفض تام لأ ما فيش ثقة وتخاف عليهم .. وكل الكلام يحصل قصاد الجميع .. فحتى كان هناك كلمة شهيرة له كان بيقولها « بشر فى ما يحصل لهم أى حاجة » .. دخلوا وحصل الاجتماع وحصل الكلام .. المهم بالليل قبض على الناس دى كلها .. اللى هم كانوا دخلوا .. فذه الى خلانا روحنا يوم الأحد الكلية .. وجاء خبر إنه انتقبض على زملائنا .. وجاء يومها المحافظ » .

• واعتديتم عليه ؟

• « لأ مكانش اعتداء .. هو للأسف .. هو غلط برضه .. الجرائد طلعت قالت إن بعض الكليات وبعض الجامعات وبعض الطلبة عملوا مظاهرة .. الجرائد كلها كانت فى الشارع فهو راح واقف .. فيبقولوا له أنت ما قرأتش الكلام اللى موجود فى الجرائد .. قال لهم أنا ما قرأتش الجرائد .. اترمى عليه بيچى ٣٠٠ جرنال .. بس طلعناه .. ده برضه والد مهما كان » .

• **ويضيف مكادى :** « الدكتور عبد الحميد حسن جاء دوره بعد كده .. بعد الاعتصام .. اعتصمنا ساعتها قعدنا كذا يوم وكان فيه مقابلات واجتماعات طول الوقت .. علشان أولاً الإفراج عن إخواننا اللى كانوا محبوسين فى القلعة دول .. انتهت بإن إحنا خرجنا إلى مجلس الشعب واجتمعنا بالرئيس أنور السادات .. وأيامها كلمته الشهيرة « إنتم مزعبرين كده ليه ؟ » وهو كان كلامه كويس قوى يومها .. إنه هو واعى لكل شىء واعترف بكل شىء .. وقال فعلاً أنا عارف وكل المؤسسات تعبانة ومش مضبوطة وإنه بيسعى إنه يجد حلاً للأمور .. وبعد كده رجعنا وفضينا الاعتصام وابتدت بقى .. الحركة دى طبعاً قلبت كيان الدولة كلها .. وابتدينا دخلنا فى بيان ٣٠ مارس وابتدا الرئيس طلع وقالها .. قال أنا مسئول وأنا مع الشعب والشعب عاوز التغيير وأنا معاه .. انتخابات من القاعدة إلى القمة .. ابتدا بقى برنامج إنه يلف يخطب مع قوى تحالف الشعب العاملة أيام الشعارات الاشتراكية والوحدة .. فعملوا البرنامج بحيث إنه يروح الأول للعمال والفلاحين والجنود وفى الآخر بيچى للمثقفين .. وضمووا الطلبة إلى المثقفين .. على اعتبار إن إحنا المثقفين .. رفضنا الموضوع ده رفضاً باتاً .. قلنا إحنا أبناء كل قوى تحالف الشعب مش أبناء جبهة واحدة .. علشان كده قالوا ما فيش طالب يتكلم .. خلّوا مدير الجامعة يتكلم .. بس طبعاً تحركنا جامد أيامها ولازم طالب مننا يتكلم .. وقلنا الطالب اللى بيمثلنا رئيس اتحاد الجامعة الدكتور عبد الحميد يتكلم .. كان فيه رفض تام لهذا الموضوع » .

• ليه ؟

• « يعنى هو إحنا تخيلنا إن هم عاوزين يحطونا فى كورنر .. ويقولوا ده إنتم أولاد المثقفين وخلاص .. إنتم مثقفين .. وكان فيه جبهة أو جهاز أيامها بي فكر إن ممكن يضرب الطلبة بالعمال .. ويضرب الطلبة بالفلاحين .. قلنا لأ إحنا أولاد الجميع .. ورحنا للأستاذ محمد حسين

هيكل .. وشعراوى جمعة وعبد المجيد فريد .. وحتى هيكل أيامها قال الأمور لما بتترتب للرئيس بتبقى صعبة .. فعلى العموم كحل وسط اكتبوا اللي إنتم عاوزينه .. ويوم الخطاب الصباح كان عبد الناصر رايح الجامعة .. ينزله فى جريدة الأهرام » .

• وقد كان ؟

• « لأ .. دى كان لها قصة ظريفة .. النائب بتاعى منير .. وإحنا خارجين على الباب قال للأستاذ هيكل طيب ولو الخطاب ما نزلش فى الأهرام ؟ رد عليه قال له « عيب عليك يا أخى » !! المهم كتبنا الخطاب وإديناه له فقال إيه لغة الميكانيكية دى .. لأ دى لغة ريكة ما تنفعش .. وقعدت أنا وفريد يومها لحد بالليل مع إحسان بكر .. هو يكتب الكلام وإحنا نوافق عليه لغاية ما خلص وسبناه .. جينا بالليل بقى .. كلمته قال أصل ما الحقتش المطبعة .. المهم تانى يوم برضه ما نزلش .. بس تانى يوم كان الأستاذ هيكل طليبنى فى البيت وقال لى الرئيس وافق أن طالب يتكلم فثوفوا عاوزين مين .. فجينا عبد الحميد عندنا فى البيت .. وقعدنا كلنا كتبنا الخطاب سوا .. وهو ده اللي حدث .. بس هى كانت كل خطرة فيها معركة لأنها شىء جديد على الدولة .. ده اللي اكتشفناه بعد كده .. إن كل الأجهزة كانت أيامها مرعوبة .. إن شىء جديد بالنسبة لهم .. متصورين إن كل شىء عندنا متسيطر عليه وكل شىء Under Control » .

• وهل تشعر الآن إنكم حققتم شيئا من هذا الذى فعلتوه ؟

• « هو بالتأكيد طبعاً تحقق الكثير .. إحنا على مستوى الكلية طبعاً أخذنا حاجات كتير .. كان فيه مرحلة من الحرية .. يعنى كانت مجلات الحائط لازم الحرس الجامعى يعضى عليها .. بعد كده اتشال الموضوع ده .. كان رئيس الاتحاد بس هو اللي يعضى عليها .. والحرس بعد كده بطل يخش .. مع إنه حرس الجامعة دول كانوا إخواننا برضه .. يعنى من الحاجات اللي كانت أيام الاعتصام .. ما هو كان حرس الجامعة بيهرب لنا الأكل برضه .. البوليس قاعد يحرسنا إنما كان فيه أكل بيجى لنا من البيت .. ما هو العسكرى ده مين ؟! » .

• ويقول د . عبد العظيم رمضان : « إنما كانت أهم ما أسفرت عنه مظاهرات فبراير سنة ٦٨ .. إن عبد الناصر أحس أن الجبهة الداخلية طالما إنها استطاعت القيام بمظاهرات ضده .. لو استمر الوضع على ذلك .. سيؤدى إلى سقوط نظامه » .

• ومرت الأيام واختل كل رجال عامر كما اختل هو نفسه .. وهكذا كانت نهاية مصير المشير ..

• وأسأل جمال السادات : هل وفاة المشير عامر كان لها صدى فى نفس والدك ؟

• « أيوه تأثر جداً وحزن جداً » .

• وأسأل الفريق أول محمد فوزى : وماذا سيكتب التاريخ عن المشير عبد الحكيم عامر ؟

• « هذا الإنسان .. مقاتل .. محبوب .. ولكنه غير مناسب لقيادته للقوات المسلحة » .

* ويقول لطفى واكد : « الله يرحمه .. هو صديق ولا أريد أن أقول عنه ما يسمى له في قبره » .

* ويقول د . ثروت عكاشة : « الظروف خانت المشير في بعض ما كان يجريه كما تورط في أخطاء ما كان أحراره أن يقع فيها .. لقد زاملت عبد الحكيم عامر في الكلية الحربية ونحن أبناء دفعة واحدة كما زاملته في الدراسة بكلية أركان الحرب .. وكان موقعه منى موقع الإجلال والمحبة .. فقد كان إنساناً نبيلاً كما ذكرت .. حتى إنى لم أكن أناديه باسمه .. بل كنت أناديه « جان جاك » .. أقصد جان جاك روسو .. لبراءته وصراحته ونقاته .. لقد اختار عبد الحكيم عامر الموت بوصفه الطريق المفضى إلى الشرف .. الذى يقيه من عار الهزيمة .. وكأنه قد عوض بميته الأبطال ما كان ينبغى له من حياة » .

* ويقول شمس بدران : « كان رجلاً كفواً في عمله .. ويعبدن اضطرب بسبب عمله .. ويتجه لحاجات ثانية .. لأنه قعد غصب عنه في هذا العمل » .

* ويقول الفريق سعد الدين الشاذلى : « كان بيدير القوات المسلحة بأسلوب العمد » .

* ويقول رشاد مهنا : « لا أعرف عنه شيء لأنه كان ورائنا ولا أعرف عنه حاجة » .

* ويقول الفريق أول مرتضى : « المشير عامر كان رجلاً فيه جميع الصفات القيادية اللى ممكن تكون موجودة .. إلا .. حاجة واحدة إنه كان بعيد خالص عن الجو العسكرى والعلم العسكرى .. وإنه كُلف بحاجات أكثر من اللازم .. مسؤوليات مدنية .. كلها علشان كمان يبعد بالكامل عن الناحية العسكرية » .

* ويقول محسن عبد الخالق : « رجل طبيب .. فى ظل أى نظام سياسى .. لو عبد الحكيم عامر فى ظل نظام ديموقراطى كان يبقى رجلاً كويس .. لكن كان فى ظل نظام ديكتاتورى .. لكن هو كشخص كان شخص خيراً » .

* ألم يكن السبب الأول والأخير فى هزيمة ٦٧ كما يقول البعض ؟

* « هزيمة ٦٧ مسئوليتها أولاً وأخيراً جمال عبد الناصر » .

* ويقول خالد محبى الدين : « رجل وطنى وضابط كويس .. لكن إنه يقود القوات المسلحة فى هذه الظروف .. لإنها كانت عازرة قيادة عسكرية وتدريب وتنظيم وعمل .. وعبد الحكيم عامر كان ضابطاً سياسياً .. ولأنه كان ضابطاً سياسياً كان غالب عليه هذا الطبع » .

* ويقول حسين الشافعى : « أقول إنه إنسان كريم ويمكن إنه يراهن برصيده كله تحسباً لضربة حظ .. إما يكسب بها كل حاجة .. إما يخسر بها كل حاجة » .

● وبدأت مصر مرحلة جديدة ...



سنوات الاستنزاف

- وغد مؤتمر القمة العربي بالخرطوم فى سبتمبر ١٩٦٧ ...
- وتقول هدى عبد الناصر : « بعد أن عاد والدى من مؤتمر الخرطوم ونجح المؤتمر .. وكان استقبال السودان قد ترك أثراً كبيراً فى نفسه .. وأنا أرى أن السودان كان سنداً لمصر وأمنى زيارته .. وكان والدى بعد الهزيمة شايلى حمل ثقيل وتعهد بإعادة البناء ولم تعرف الانسامة طريق شفتيه إلا بعد أن عاد من الخرطوم وكانت أول مرة أشوفه والابتسامة على وجهه » .
- ويقول أحمد أبو الفتح : « وتجلت الشهامة العربية إذ أنبرى الملك فيصل يقول : إننا لا نستطيع أن نأكل فى السعودية بينما يجوع المصريون .. واقترح أن تقوم المملكة السعودية وليبيا والكويت بتقديم المساعدات المالية سنوياً لمصر » .
- وكان الرئيس عبد الناصر بعد أن تخلص من مراكز القوى فى الجيش ومن عامر .. قد جمع بين رئاسة الجمهورية ورئاسة الوزراء ...
- وعين أمين هويدى وزيراً للحربية خلفاً لشمس بدران ... كما تولى المخابرات خلفاً لصلاح نصر ...
- ويقول أمين هويدى : « عقب النكسة أنا توليت وزارة الحربية والمخابرات العامة مع بعض .. ودى أول مرة فى تاريخ الثورة أو حتى الآن إن واحد يجمع بين المخابرات العامة ووزارة الحربية .. وكلفت بتشكيل وزارة وسافرت موسكو فى نوفمبر ٦٧ وأنا رئيس وزراء مصر !! » .
- وعين عبد الناصر .. محمد فوزى قائداً عاماً للقوات المسلحة خلفاً لعبد الحكيم عامر ...
- وأسأل الفريق أول محمد فوزى : توليت الجيش بعد المشير .. كيف كانت الظروف حينئذ ؟
- « يوم ١١ الصبح اتصل بى الرئيس عبد الناصر وقال لى : تتحمل مسئولية القيادة العامة فى الظروف اللي إحنا فيها دى .. قلت له : نعم .. قال : طيب أنا سوف أعينك قائداً عاماً .. وأعلن

فى الرادىو تعيننى قائداً عاماً الساعة ٢،٣٠ الظهر فى ذلك الوقت .. وكان فى اللقاء الأول وقال لى تحضر لى الساعة ٧ م ومعاك كشف الجيش ونقعد قعدة .. وفعلأ تم فيها التوجيه السياسى والعسكرى للمرحلة القادمة .. فيها ظهرت نيته وتصميمه الذى أذيع بعد ذلك فى مؤتمر الخرطوم أيام ٢٥ ، ٢٦ ، ٢٧ » .

• **ويضيف الفريق أول محمد فوزى :** « وفعلأ كلمة الاستسلام دى كانت منطقية موجودة بعد هزيمة ٦٧ .. قعد ديان فى تل أبيب يستنى مكاملة من عبد الناصر إنه يستسلم .. ديان قعد ٣ سنوات وشهرين يستنى هذه المكاملة ولم تحصل .. والرد بتاعه إن لأول مرة يتضح الهدف الجديد للقوات المسلحة ويظهر فيها إرادة القتال للشعب وللقوات المسلحة .. وأعطانى التوجيه السياسى اللى علينا كلنا نحرر الأرض وأن تعد القوات المسلحة إعداداً جديداً على أسس علمية فى ظرف ٣ سنوات ونصف أو ٤ سنوات بالكثير .. إذن هو حدد الهدف .. وحدد الزمن .. وقال لى من ناحية السلاح إنه سوف يتولى التفاوض مع الاتحاد السوفيتى .. ولا تفكر إن العدو سوف يسيك .. لأ .. سوف يتدخل فى عملك .. وفعلأ حصل إن الجنود الإسرائيليين حضروا إلى الشاطئ الشرقى واعتقدوا إن القتال هو الحد الفاصل .. وابتدا هذا الوضع الجديد اللى أنا بدأت فيه من يوم ٦٧/١١ » .

• **وأسأل د . الجوهري :** الفريق فوزى ؟

• **أنا ما حضرتوش علشان أحكم عليه .. ما أقدرش أعرف .. يعنى ما عنديش فكرة ليه الرئيس كان أمامه كذا واحد يختارهم .. عنده عبد المنعم رياض عظيم جداً .. ناس كثير جداً كويسين .. اختياره له أنا ما أعرفش ليه رغم صلتى الوثيقة بالرئيس عبد الناصر ما أعرفش هو إزاي وقع اختياره عليه » .**

• **وأسأل الفريق أول مرتجى :** ماذا تقول لنا عن الفريق محمد فوزى ؟

• **« محمد فوزى عمره ما تولى قيادة ميدانية .. ما كانش على دراية إزاي يدير مركز قيادة .. يعنى حسب معلوماتى لما جاء عبد المنعم رياض يقول له « لو جم اليهود ولقوا حول القوات المسلحة ووقفوها كلها » .. المفروض إنه يقول الكلام ده لرئيس الأركان .. ورئيس الأركان يبطل كل هذا الكلام ويبلغه للمشير .. إنما يقول له روح للمشير صاحبك .. من هذه الناحية كان رجلاً إدارياً .. إنما لا يفهم فى الناحية العسكرية ولا كيف يدير القيادة اللى معه .. ولا إزاي يدير فى هيئة العمليات المهندسين والمدفعية إلى آخره » .**

• **إذن إزاي الفريق فوزى هو اللى بعد كده أصبح القائد العام ؟**

• **« الانتماء والقربة اللى بينه وبين سامى شرف .. وإنهم يتقوا فيه فى مثل هذه الظروف أكثر من أى واحد تانى .. لإنه حيتمشى مع رغباتهم » .**

• **وأسأل المشير الجسمى :** الفريق محمد فوزى ؟

• « الفريق محمد فوزى كان أنسب قائد يعين يوم ١١ يونيو ٦٧ .. عندما عينه الرئيس عبد الناصر فى هذا المنصب .. أنسب واحد إنه يتولى مسئولية القيادة العامة للقوات المسلحة هو ومع الفريق عبد المنعم رياض .. وكانت خطوة موفقة من الرئيس عبد الناصر أن يعين الاثنين .. لأن الفريق أول محمد فوزى يتسم بالانضباط العسكرى الشديد إلى حد القسوة .. وهذا كنا نطلبه فى هذا الوقت وكانت القوات المسلحة تحتاجه فى هذا الوقت وقام بدور رئيسى خلال ٣ سنوات تولى فيها منصب القيادة العامة للقوات المسلحة ويكتب له » .

• وأسأل الفريق سعد الشاذلى عن الفريق محمد فوزى ؟

• « ضابط منضبط وشديد الضبط والربط .. وبذل مجهوداً كبيراً جداً فى إعادة تنظيم وتدريب القوات المسلحة فى الفترة ما بين ٦٧ إلى ٧٠ » .

• وأسأل أمين هويدى : الفريق محمد فوزى ؟

• « كان قائد كلية حربية متميزاً جداً جداً .. وحضر نكسة ٦٧ إذ كان رئيس أركان حرب القوات المسلحة .. ثم قاد حرب الاستنزاف التى انتهت بقبولنا إيقاف إطلاق النار » ..

• « ويضيف الفريق سعد الشاذلى : » نتكلم عن مرحلة الاستعداد .. وأحب أن أشيد بفضل من سبقونى فى الاستعداد قبل أن أصل لهذا المنصب .. مافيش شك إن الفريق محمد فوزى .. ومساعدوه الذين كانوا فى السلطة فى سنة ٦٧ لغاية ٧١ .. بذلوا مجهوداً كبيراً فى إعادة بناء القوات المسلحة وإعادة تدريب القوات المسلحة .. ومنذ اليوم الأول بعد الهزيمة كان هناك استعداد لضرورة الجولة الثانية مع إسرائيل .. فكان بعد تدريب كل سنة سمية مشروع التدريب الاستراتيجى .. وهنا يشترك فيه القادة وتوضع فيه خطط الحرب القادمة .. أنا شاركت فى هذا كقائد للقوات الخاصة سنة ٦٨ و ٦٩ وشاركت فيها كقائد منطقة البحر الأحمر سنة ٧٠ و سنة ٧١ .. توليت قيادة رئيس الأركان .. مما لا شك فيه أن الاستعداد لحرب أكتوبر بدأ بعد النكسة مباشرة فى ٦٧ » .

• « ويقول خالد محبى الدين : » ولذلك أول ما انتهى دور المشير سنة ٦٧ وجاء الفريق محمد فوزى وتولى إعادة بناء القوات المسلحة .. الجيش كان حاجة ثانية .. والفريق فوزى عنده دور ولازم تقدره فى إعادة بناء القوات المسلحة .. وإنه صحيح هو غادر سنة ٧١ لكن البذرة التى وضعها للذين جاءوا بعده .. مكنت مصر أن تحارب حرب ٧٣ فالفرق فوزى شخصية هامة » .

• « ويقول د . عبد العظيم رمضان : » فوزى بنى وبينه مشاكل لا حصر لها .. وهو لم يكن قائداً عسكرياً يستطيع أن يقود معركة مثل معركة أكتوبر .. لكن كان فوزى له ميزة وهو أنه رجل ضبط وربط .. لكن ليس له مؤهلات عسكرية تمكنه من القيام بحرب كبيرة » .

• « وعين عبد المنعم رياض رئيساً للأركان فعاد من عمان لتسلم موقعه الجديد .. كما عين الفريق مذكور أبو العز قائداً للقوات الجوية ...

• وأسأل الفريق أول عبد المحسن مرتجى : ماذا تقول فى جملة واحدة عن عبد المنعم رياض الله يرحمه ؟

• « عبد المنعم لم يمسك أى قيادة ميدانية فى حياته .. ما إحنا دائماً بنقول إيه إن الرجل التخصصى أو اللى هو ده إحنا اتعلمناه فى روسيا إن بتاع المدفعية المضادة للطائرات .. ده تخصص ما يمكش قيادة .. اللى يمكش قيادة هم بتوع المشاه والمدركات .. لإن الوحدات التشكيلية اللى هم بيمسكوها مكونة من جميع الأسلحة .. لإن إيه وحدات مشتركة أسلحة حديثة .. فقائد المشاه لو مسك لواء مشاه أو قائد المدرعات لو مسك لواء مدرع حبيد فيه مشاه ومدركات ومدفعية و .. و . إلى آخره .. علشان كده يبقى فاهم فى القيادة .. عبد المنعم رياض عمره ما مسك قيادة » .

• وأسأل الفريق مذکور أبو العز : هل التفتيت بالقيادة السياسية بعد الهزيمة .. بعد النكسة ؟

• « بعد الهزيمة رحل أسوان .. وبعد أسوان استدعيت يوم ١١ يونيو » .

• كنت ذكرت إن فيه اجتماع ضم عدداً كبيراً من المسؤولين مع الرئيس الراحل عبد الناصر وتكلم فيه عما حدث فى ٦٧ ؟

• « هذا يذكرنى بواقعة .. أنا أأسف لها أشد الأسف .. إن هو كان فى حالة ندم .. كنت أنا موجوداً وكان قائد القوات المسلحة موجوداً وصالح نصر كان موجوداً والفريق عبد المنعم رياض كان موجوداً .. وقال لى لقد أمنت الدولة طلباتك كلها .. فالحقيقة قال هذا الكلام .. إنما بعد ساعة لما رحل أقابل القائد العام لقيت إن مافيش فى إيدى حاجة » .

• وهل القائد العام كان الفريق فوزى ؟

• « آه .. كان الفريق فوزى .. وكان الرئيس فى حالة ندم بيقول إن تهويشته المرة دى ما نفعتش .. فطبعاً لما أسمع هذه الكلمة طبعاً أنا فكرى لازم يكون متجه نحو مبدأ معين لازم أسير عليه .. يعنى إيه تهويشتى المرة دى ما نفعتش .. يعنى عملية قرارات كبيرة ضخمة زى كده تقوم نقول ده تهويشة .. طيب وتبقى يعنى السياسة مبنية على التهويش .. طيب وتبقى دى السياسة دى .. تبقى قيادة إيه هذه القيادة .. فانا من هذا الرأى حطيت فى مخى حاجة ثانية إن أنا لن أنفذ أى أمر إلا إذا كان هذا المخ يقول إن هذا الأمر فى صالح بلدى مهما تكن النتائج .. قلنا صريحة للرئيس عبد الناصر فى إحدى الجلسات .. حتى لدرجة إنه قال لى ليه قلت ما عنديش استعداد أحضر نكسة ثالثة .. هو طبعاً القيادات متعودة إنها تتجاوز مع الناس .. فقلت له إذا كانت العملية فيها شئق يا ريس يبقى أنا لن أنفذ أى أمر إلا إذا كان فكرى يقول إن هذا فى صالح بلدى وأنا أتحمل هذه المسؤولية » .

• وتولى سعد الشاذلى قوات المظلات والصاعقة ...

• ويقول الفريق سعد الشاذلى : « أنا لم أستلم قيادة المظلات والصاعقة إلا بعد الحرب .. بعد

حرب ٦٧ .. ولكن في خلال الحرب سنة ٦٧ عندما اندلعت الحرب أنا لم أكن أخدم في تشكيل ميداني .. كنت في هيئة التدريب .. انتدبت لقيادة مجموعة خاصة شكلت من المظلات والصاعقة .. وحيث إن هذه القوة المشكلة من المظلات والصاعقة والمشاة والبابات قوة مشتركة ليست ضمن تنظيم الجيش .. كل تشكيل في جيش له رقم يقول مثلاً الفرقة ٢١ مدرعة .. الفرقة ٤ مدرعة .. الفرقة مشاة وهكذا .. إنما لأن هذه القوات منتقاة من وحدات أخرى لم تأخذ رقم فسميت مجموعة الشاذلي في وقت الحرب .. فأخذت اسمي وإنها مجموعة الشاذلي .. ولكن يبدو أن هذا أوحى إلى القيادة العامة للقوات المسلحة بعد الحرب باني أمسك قوات المظلات والصاعقة .. فبعد انتهاء الحرب توليت قيادة المظلات والصاعقة كقائد كل قوات المظلات وكل قوات الصاعقة تحت قيادتي .. ولعلني كنت الأول والأخير لأنه بعد سنة ونصف من هذه القيادة نقلت إلى قيادة منطقة البحر الأحمر .. في أوائل سنة ١٩٧٠ .. خلت القيادة وعادت المظلات والصاعقة مستقلين كما كانوا قبل ذلك .

• **وتضافرت الجهود والإمكانات العربية للمجهود الحربي .. وإعادة تكوين الجيش ...**

• **ويقول عبد المجيد فريد :** « وأذكر لما جاء رئيس الأركان السوفيتي بعد ١٤ يوم من المعركة .. جاء وفد سوفيتي وهم قرروا إعادة التسليح .. وإعادة بناء القوات المسلحة . »

• **ويقول عبد المحسن أبو النور :** « تأخذ بالعقل الجيش سنة ٦٧ .. كان انتهى .. السلاح راح .. العسكر راحت وابتدا إنشاء الجيش تقريباً من الصفر .. طيب مين اللي أنشأ الجيش من الصفر .. عبد الناصر أولاً قعد وهمه الأساسي بناء الجيش لسرعة التخلص من عار الهزيمة سنة ٦٧ .. واستعادة الأرض المسلوبة . »

• **وإزداد نفوذ رجال الرئيس .. إلى جانب علي صبري وسامي شرف ومحمد فائق .. مثل شعراوي جمعة وعبد المحسن أبو النور .. وإزداد الحصار حول الرئيس ...**

• **ويقول أحمد طعيمة :** « أنا حأقول لك حاجة علشان تعرف كيف عزل عبد الناصر .. الرئيس ما بيتعزلش دفعة واحدة .. ده بيتعزل تدريجي وهو ما ببيقاش حاسس إنه بيتعزل .. في أول الثورة لما كنا نروح زيارات للأقاليم وهذا مثال عجيب حأقول لك عليه .. كنا نركب القطار فنقعد كلنا في صالون واحد .. عبد الناصر وكلنا كل ضباط الثورة .. وبعد فترة نيجي نأكل وجبة الطعام نروح مع بعض عربية الأكل .. فوجئت بالتطور اللي حدث بعد كده عبد الناصر ومجلس قيادة الثورة في عربية وإحنا في عربية صالون تاني .. وبعدين ساعة الفطار أو الغداء نجتمع في مائدة واحدة .. ثم تطورت الأمور .. هم في صالون وإحنا في صالون .. هم في عربية طعام وإحنا في عربية طعام .. سافرت سفير في الأرجنتين ورجعت وكان فيه الملك محمد الخامس وفي زيارة إلى المنصورة فوجئت بحاجة بقى غير اللي أنا كنت عايشها قبل كده .. بعد التطور ده .. فوجئت إننا نستقل قطار قبل الرئيس ونذهب إلى مكان الاحتفال قبل الرئيس بنصف ساعة .. وبعدين ييجي قطار الرئيس يصل إلى المنصورة وييجي على المنصة فيبقى إحنا قاعدين ووزراؤه ولا كلم أحد منا ولا سمع لحد منا .. يدخل على المنصة .. خلص

الاجتماع يطلع من المنصة يأخذ القطار هو الأول .. وبعدين إحنا نطلع فى القطار اللي بعده .. فكان حتى الوزير أو الوزراء فرصة إنهم يكونوا فى القطار قاعدين مع بعض يتكلموا مع الرئيس .. مافيش فرصة إن أحد يكلمه .. بقى يطلع بقطار لوحده ويرجع بقطار لوحده ولا يلتقى بأحد .. مرة بتتكلم معاه قال لى : « يا أخى أنا فيه وزراء بيخشوا الوزارة وبيخرجوا ما أكونش قعدت معاهم قعدة خاصة » .. ده طبعاً لأن كان لهم مصلحة فى إنه لا يصل للرئيس عبد الناصر إلا مايريدون .. وكان عندهم تكتيك معين : أنا عاوز أقول إن طارق رجل مش كويس فيدخل على صبرى بقصة على طارق وبعدين يدخل سامى شرف بقصة أخرى على طارق .. كل واحد يدخل بقصة على طارق مش هى لكن كلها تنتهى إلى ضياع طارق .. عاوزين يرفعوا أحد نفس الطريقة .. فطبعاً أنا بأعتبر جمال عبد الناصر تعرض إن قراراته إن كان صدر هناك قرار خاطئ .. بسبب ما يعرض عليه .. إنما نواباه .. مش ممكن نوابا وطنية أكثر من نوابك يا عبد الناصر .. ولا إخلاص لهذا الشعب قدك يا عبد الناصر » .

• تقول إن مجموعة على صبرى عملت حاجزاً على الرئيس عبد الناصر ؟

• « ما هو على صبرى أنا بأعتبره أحد المسؤولين عن ضياع ثورة ٢٣ يوليو وانصرافها عن أهدافها .. كفاية إنه كان بيكتب مقالاً فى الجمهورية كل أسبوع .. حياهم محلات الحلاقة والصالونات والبقالة .. ما خلاش حاجة إلا حيخضعها .. والمكوجية وكله !! وكان له بطاقة طبعاً وأعران ودول أنا بأعتبرهم أكبر شر حاق بعبد الناصر .. بطاقة السوء .. وكمان سامى شرف .. كل دول كانوا بيحاولوا يعزلوه » .

وأسأل أمين شاكر : كلمنا عن الحصار الذى فرض على الرئيس من مجموعة العاملين معه ؟

• « عبد الناصر فرض عليه حصار وكان حصاراً شديداً جداً .. ومن الغريب إن عبد الناصر برغم ذكائه وفطنته .. عارف هل هو قبل هذا الحصار لأنه ما يقدرش يقاومه .. ولا إنه ما أحسش به لإن الجماعة اللي عملوا هذا الحصار عملوه بمنتهى الذكاء .. أنا فى رأى إن الحل الثانى هو الأقرب إلى الصواب .. الجماعة دول الـ KJB (المخابرات السوفيتية) جندهم مقابل مرتبات » .

• جند مين ؟

• « على صبرى وسامى شرف وشعراوى جمعة وأمين هويدى وصلاح نصر .. لكن مراكزهم كانت أقل من مستوى الناس دول » .

• وحضرتك بتلقى هذا الاتهام جزافاً ؟

• « ليس لى مصلحة فى أن ألقى هذا الاتهام لأنى كنت فى هذا الوقت سفيراً فى الخارج » .

• وكيف وصلت إليك هذه المعلومة ؟

• « من السفير السوفيتي نفسه » .

• وكان اسمه إيه ؟

• « ديمتروف .. هو اللي قال لي هذه المعلومة .. كان سفير موسكو لدى السوق الأوروبية المشتركة .. ولدى حكومة بروكسل في نفس الوقت .. زى حالاتي .. أنا بعدها بحوالي ٣ أيام جئت القاهرة ورحت لعبد الناصر في البيت وقلت له هل أنت مرتاح لوضعك أنت في الداخل .. قال لي أه .. قلت له هل أنت تظن إنك على علم بما يحدث في البلد الآن .. قال لي أيوه .. قلت له أسمح لي أقول لك إن هذه الإجابة مبالغ فيها لأن فيه حاجات بتحصل وسيادتك لا تعلم عنها أى شيء .. لأن أنت لا ترى الآن إلا بعيون موسكو ولا تسمع إلا بصوت موسكو .. هي اللي بتعطى لك التعليمات وهذه التعليمات بتروح أساساً لعلى صبرى أو لشعراوى .. وبعدين هم عملوا نظام محكم شوية كأنه فيه أكثر من جهة للمعلومات .. أولاً كان التنظيم اللي عملوه .. سامى شرف .. التنظيم الطليعى .. ده كان الأعضاء اللي فيه أغلبيهم بيتجسوسوا على زملائهم .. (٢) المباحث العامة .. (٣) المخابرات .. ولما حببوا يخلوا عبد الناصر يعتقد إن فيه حاجة معينة ورأى معين تلاقى الثلاثة جهات بعنوا تقريراً كل واحدة من جهة إنما بنفس المعنى .. فبعد الناصر لما يرى إن المخابرات قالت كذا والتنظيم الطليعى قال كذا .. لما يقولوا نفس الكلام يبقى الكلام ده صحيحاً .. فيتخذ قرار دون أن يستدعى الشخص أو الجماعة اللي مكتوب ضدها التقارير ويناقشها فيما كُتب ضدها ويسمع منها وجهة نظرها .. لم يكن أحد يقدر أن يمنع عبد الناصر من الاتصال بالناس .. أه طبعاً .. أحدهم يجيى يقف عند الباب يقوم عبد الناصر يحوشه .. لا .. لكن عبد الناصر كان متصوراً إن كل ما يحدث في البلد كان بييجي له .. عنده أكثر من جهة بتعطى له المعلومات ولكنه لا يعلم إن هذه المعلومات يتم التنسيق بينها .. بحيث تبدو كأنها مستقلة الواحدة عن الأخرى .. لكن ده كان غير صحيح .. وترتبط على هذا إن عبد الناصر أبعد عن الشعب » .

• ويقول المستشار يحيى الرفاعى : « الرئيس عبد الناصر نفسه كان يشكو من القرارات والقوانين وكثرتها .. فكانت تصدر بأعداد كبيرة .. وصرح أنه يكاد لا يعلم عنها شيئاً » .

• وأسأل إبراهيم بغدادى : قيل إن هذه المجموعة كانت تحاصر الرئيس وتبعده ؟

• « ماحدث يقدر يبعد عبد الناصر عن الاتصال بالآخرين .. هو الرئيس جمال بعد ٦٨ كان كل تركيزه فى إعادة بناء الجيش .. وكانت صحته بدأت تتأثر نتيجة مرض السكر والأزمة القلبية التى مر بها .. فشكل لجنة من الناس اللي يثق فيهم واللى إيديهم فى العمل اليومى .. من سامى شرف وشعراوى وجمعة وأحياناً على صبرى أو أمين هويدى ومحمد فائق معاهم .. وأحياناً كان بيحضر معاهم الأستاذ هيكل .. وكان أنور السادات مسؤولاً عن المتابعة .. هذه اللجنة كانت تعرض على الرئيس عبد الناصر كل ما تصل إليه وهو يتخذ القرار النهائى .. لكن حكاية إنهم يحاصروه ويمنعوا الناس من الاتصال به .. جمال عبد الناصر لا يستطيع أحد أن يمنعه من الاتصال » .

• **ويقول أحمد طعيمة :** « يوم وفاة عبد الناصر كان مين من الثورة موجوداً ؟ حتلاقى مافيش أصابع يد واحدة .. وكلهم تخلص منهم واحداً وراء الآخر .. وطبعاً زكريا محيي الدين زى بغدادى .. وفضلوا ناس لا لهم علاقة .. يعنى الله يرحمه شعراوى جمعة مثلاً لا ضباط أحرار ولا حاجة ولا له علاقة .. سامى شرف لا من الضباط الأحرار ولا حاجة .. إنما دخلوا وتسلقوا .. جميع الأصليين من ثورة ٢٣ يوليو بعنوا .. هى دى الحقيقة » .

• **ويقول أنيس منصور :** « بطانة عبد الناصر حكمت مصر بعد ٦٧ .. وكان فى حالة غياب تام .. فلم يكن أحد معه فى ٦٧ غير بطانته .. السادات ده لا وجود له .. عبد الناصر كان له أصدقاء .. لأن عبد الناصر مش متأمر ده رجل عسكرى وقوى .. وعيوبه قليلة .. بينما كل اللى حوله كان لهم عيوب .. ويقال إنه كان يبشع كل اللى حوله على أن تكون لهم عيوب .. وكل واحد يبديله الحبل الذى يشنق به نفسه » .

• **ويقول د. مراد غالب :** « شوف على صبرى رجل له مبدأ .. كان رجلاً مفكراً ومتقفاً وصلباً .. لما اتسجن هو ومحمد فائق رفضا إنيهما يكتبيا أى التماس للعفو .. لا نقدر أن نقول عليه إنه يتأرجح لأ .. كان مخلصاً لجمال عبد الناصر بدون شك .. لكن كانت العدالة الاجتماعية بتلعب فى ذهنه دوراً مهماً جداً .. اوعى تصدق إنه كان شيوخياً ولا أحد يصدق إنه كان شيوخياً » .

• **ويقول أمين شاكر :** « أنا ما أحبش أطعن فى أحد .. لكن كان معروف علاقتى بالناس دول .. أنا كنت لا أطيّهم ولا يطيقونى وهم الذين دفعوا عبد الناصر يرسلنى إلى فنزويلا .. فى أمريكا الجنوبية .. أغبياء فعلاً .. أدعياء نكاه .. على صبرى كان فى تصوورى إنسان غبى لا شك فى هذا .. وهو رجل من النوع الذى يأكل على كل مائدة .. خاله على الشمسى .. الدكتوراه اللى أخذها من سويسرا .. لماذا يحب أن يبقى الإنجليز فى مصر ؟ .. دى الدكتوراه بتاعته .. وهو ابتدا يتقرب مِننا باتصاله ومعرفته بالملحق البحرى فى السفارة الأمريكية .. وإن عن طريق هذا الموظف حييىب لنا سلاح .. وأنت تعلم ما أعقب هذا من سفره هو وعبد المنعم أمين وكيف أهينوا هناك وطردوا » .

• **وأسأل سامى شرف :** هل كنت تخفى أشياء عن الرئيس عبد الناصر ؟

• « لا يستطيع سامى شرف بتكوينه الشخصى اللى رباه له أبوه وأمه .. ولا بتكوينى العلمى اللى أنا اتعلمته .. ولا بأخلاى الشخصية إن أنا أسمح لنفسى إن أنا أرتكب خطأ .. وجل من لا يخطئ .. الإنسان خطأ .. ربنا يفتينا شر الغرور .. لكن سامى شرف بدأ مع جمال عبد الناصر وهو شاب بافع سنة ٥٢ كان عمرى ٢٣ سنة وضابطاً جديداً بأبنى مستقبلى .. فإذا أخذنا الموضوع فى الإجابة على سؤال حضرتك من زاوية شخصية أنانية .. أنا عاوز أبني نفسى ماذا سيكون موقفى إذا اكتشف عبد الناصر إن أنا ضلته أو أخفيت عنه معلومة ؟ أبسط شىء مع السلامة دى نمرة واحد .. نمرة ٢ لم يكن عبد الناصر أحادى المصدر .. كان له مصادر عديدة كثيرة جداً .. فإذا أخفى سامى شرف قصة أو موضوع أو قضية معينة عن جمال

عبد الناصر فيستطيع بالـ SYSTEM بتاع جمال عبد الناصر وتكوينه وأسلوبه في العمل إنه يعرف من أى مصدر آخر .. طيب سيكون موقفى إيه ؟ ما كنتش حافقد !! كنت أروح !! .

* أثرت موضوعين أود مناقشة كل موضوع منهما على حدة .. أولاً قلت تعدد مصادر المعلومات عند الرئيس .. ألا يعنى ذلك إنه كان فيه رقابة على الرقابة من الرقابة ؟

* « لا لا .. أنتم بتحملوا الأمور .. إخواننا الصحفيين يفسرون الموضوع أكثر مما يحتمل .. تعدد المصادر معناه إن هناك أجهزة تعمل فى الدولة مش بالمعنى السائد فى المشرق العربى أى التجسس والرقابة .. أنا بأقول الأجهزة الللى هى المؤسسات .. زى التنظيم السياسى للوزارات ثم مجلس الوزراء كجهاز كمؤسسة .. ثم مجلس الأمة أيامنا ودلوقتى مجلس الشعب ثم اللجنة المركزية للجنة التنفيذية العليا .. تم أهم من هذا وذلك وأعنى بها عن أيامنا التلفزيون ما كانت له انتشر .. النهارده التلفزيون بيعيش العالم فى قرية صغيرة أو بؤرة .. بزر بتعرف إيه الللى فى هونج كونج .. وبزر تانى تعرف إيه الللى فى لوس أنجلوس .. لكن على أيامنا ما كانت كده .. كان علشان تعرف إيه الللى بيحصل فى لوس أنجلوس تأخذ ٢٢ ساعة أو ٨ ساعة .. كان حجم وكم الصحافة اللتى يقرأها عبد الناصر مهول .. وبعض الصحف بالخبرة المتراكمة والممارسة الرئاسية إنها تبرز لجمال عبد الناصر أو تضع تحت أنظاره أهم الصحف المؤثرة فى العالم .. يعنى فى أمريكا معروف واشنطن بوست .. نيويورك تايمز .. والوول ستريت .. تلك تمثل القوة فى أمريكا .. فى لندن التايم وجرائد المعارضة الأخرى مثل الديلى ميرور والديلى ميل .. تم فى باريس لوموند .. الخ .. فى لبنان كان كل جرائد لبنان يقرأها لماذا ؟ .. لبنان كانت تمثل نافذة من العالم الخارجى على العالم العربى وبالذات مصر .. وفى نفس الوقت تمثل نافذة من العالم العربى إلى العالم الخارجى .. هذا عن الصحافة .. الإذاعة .. الـ "BBC" و الـ "VOICE OF AMERICA" ودى كانت مصدراً هاماً جداً للمعلومات بالنسبة لجمال عبد الناصر وأنا بتكلم عن المصادر العلنية .. رسائل المواطنين .. إحنا كان بيصلنا فى اليوم الواحد فى المتوسط ٣٠٠٠ رسالة فى اليوم تقريباً .. فى بعض الأحيان كانت بتوصل إلى ١٠٠٠٠ رسالة فى اليوم من جميع أنحاء العالم ومن داخل مصر .. المواطن الللى بيعت رسالة لجمال عبد الناصر سواء باسم أو بدون اسم .. فيه ناس ما كانتش بتكتب أساميتها .. وفيه ناس كانوا يكتبوها أسماءهم اعتقاداً إن جمال عبد الناصر مش حيطوله لوجوده فى الأرجنتين ولا فى البرازيل أو فى أستراليا أو هنا فى مصر وينقد ويعطى رأى ويقول معلومة كل دى حصيله معلومات .. كل ده بيشكل قاعدة معلومات عريضة جداً .

* وتقول هدى عبد الناصر : « تعدد المصادر كفيل بوصول الأخبار الحقيقية .. حتى ولو متأخرة .. وأى رئيس معرض لنفس الشئ وأنا أرى أن ما يقال هذا غير منطقي . »

* ويقول اللواء طه زكى : « كنا خاضعين فى هذا الوقت لإدارة المباحث العامة الللى كان بيرأسها اللواء حسن طلعت . الله يرحمه . وطبعاً رئيس حسن طلعت كان شعراوى جمعة .. إنما سامى

شرف كان عامل له مكتب خاص .. وأحمد كامل فى جهاز المخابرات العامة كان عامل له مكتب تانى .. والثلاثة مكاتب يشتغلوا ويمكن يكونوا على بعضهم كمان .

• وأسأل سامى شرف : قيل إنه كان فيه نوع من أنواع الحصار حول الرئيس من حضرك ومن بعض زملائك .. هل الكلام ده صحيح ؟

• « ماذا يعنى حصار أولاً .. مثل ما يقول البعض بأننى مسكت عبد الناصر فى ٥٤ وكنته » .

• أنا أقصد بهذا أعضاء مجلس قيادة الثورة عبد اللطيف بغدادى وحسين الشافعى وكمال الدين حسين .. يدون ألقاب طبعاً .. لما كانوا بيتقربوا من الرئيس ده كان شىء ما ببسعدكوش .. وكان العكس ويتحاولوا تبعدهم ؟

• « ليه بالعكس النهارده لما أنت تحس إن القادة بتوعك متكاتفين .. مثلاً حسين ده قوة لنا إحنا .. يعنى لا يسعد أى أحد فىنا وبعدين ما حدش حياخذ أكثر من نصيبه .. وبعدين اللي يعرف جمال عبد الناصر ما كانش يقول الكلمة دى .. جمال عبد الناصر كان له طريقة فى اختيار الناس وفى تجنب الناس .. عمرها ما كانت قائمة على .. يحب ويكره ليس لها مقاييس ولا معايير .. وعندما كان بيختلف كان ببواجه .. وجميع حضرات القادة وأسائنتنا اللي تفضلت وذكرت أسمائهم دلوقت هم طبعاً لهم احترامهم ودورهم التاريخى والوطنى الذى لا ينكر ولا يستطيع أحد إنه ينكره .. لكن مش معنى هذا إنه يستطيع إنه يملأ رأى أو يفرض رأى يكون مخالف للسياسة العامة المتفق عليها .. فيما بين هؤلاء الأعضاء برضه .. يعنى فيه بعض الأسماء اللي حضرتك تفضلت وذكرتهم .. وتوقع على قرارات معينة » .

• زى إيه ؟

• « كده حخش فى التفاصيل ! » .

• لأ دى بس ؟

• « بعض القوانين الاشتراكية .. الإصلاح الزراعى الثانى .. ثم يأتى بعضهم أو أحدهم يقول لك أنا مش موافق على كده .. ما إنتم قاعدين والجلسة مسجلة وصوتك موجود .. أنت وافقت ليه ؟ .. مش معنى هذا النهارده سواء أيام ما كنت أشارك أو أعمل مع الرئيس عبد الناصر أقول إن كلام عبد الناصر هو كان الصواب .. بالعكس عبد الناصر فى كثير من الأحيان كان يخضع لرأى الأغلبية .. بدأ من أول أيام الثورة جمال عبد الناصر لما حصل خلاف ٥٤ وقرر كل أعضاء مجلس قيادة الثورة فرض الديكتاتورية العسكرية .. والوحيد جمال عبد الناصر الذى قرر الديمقراطية وقال أنا قاعد فى بيتنا لما نبقوا تنتفخوا على قرار ابقوا تعالوا قولوا لى .. وخرجوا اجتمعوا تانى وقرروا إن هم يلغوا هذا القرار الذى اتخذه .. وقيس على هذا الكثير .. وكثير من الأحيان وفى كثير من المواقف كان جمال عبد الناصر يسعى إلى إحداث التوازن ودى لها مزاياها ولها عيوبها فى المجتمع من أجل إن إحنا نبقى واقفين على أرض صلبة ونستطيع أن ننتقل إلى الأمام ونحدث التغيير المطلوب » .

• **ويقول عبد اللطيف بغدادى :** « سنة ٦٤ استقلت .. رأيت جمال عبد الناصر مرة فى وفاة والده لما رحلت الجنازة .. وسنة ٦٧ فى الحرب قابلته مرتين فى القيادة .. أيضاً المقابلة والحديث بتاعى فى المخابرات .. وبعدين حصل قطيعة أخرى استمرت فترة .. لغاية ٧٠ .. ثم اقترينا بشدة .. وبعدين عزمته على فرح ابنتى فى أبريل .. والمجموعة كلها والوزراء .. ولكن مجموعة مراكز القوى لم يحضروا .. وحضر هو وكان لابس النظارة .. وسألنى إنت ما عزمتش سامى وفوزى وشعراوى ؟ .. قلت له لأ عزمتهم ماجوش .. فالأولاد كانوا ضد هذا التقارب » .

• **إظهاراً للاعتراض ماجوش ولا إيه ؟**

• **« ما جوش .. بالضبط كده » .**

• **وأسأل توفيق عبده إسماعيل : ماذا تقول لنا عن المرحوم شعراوى جمعة ؟**

• **« المرحوم شعراوى جمعة كان التحق بالمخابرات العامة فى فترة من الفترات فى أوائل الستينات وبعدين راح محافظ ثم جاء فى التنظيم .. كان محافظ السويس .. كان له دور محورى فى تربية كوادى حزبية فى السويس لما عين محافظاً للسويس فأثبت إنه رجل منظم .. وجاء وزير داخلية بعد ٦٧ عين وزير داخلية وأمين تنظيم فى الاتحاد الاشتراكي » .**

• **ويقول أمين هويدى :** « شعراوى جمعة صديق عزيز عرفته وهو ضابط صغير وعرفنا بعض عائلتي وسرنا سوياً فى درب طويل .. نختلف أحياناً ونتنفق أحياناً أخرى .. حتى عملنا سوياً فى أمن البلد .. هو وزير داخلية وأنا كرئيس للمخابرات العامة .. شعراوى رحمه الله مات بعد مرض عضال والحمد لله إنه لم يمكث معه طويلاً » .

• **ويقول سعيد حلیم :** « أعرف إن المرحوم شعراوى جمعة كان مدرساً على فى الكلية الحربية .. كان ضابط أركان حرب .. لكن لا أعتقد إنه كان ضابط حر .. كان ضابطاً كويس وتولى هو وزارة الداخلية على ما أعتقد فيما بعد » .

• **ويقول إبراهيم بغدادى :** « هو من الدفعة السابقة لى .. خدمنا مع بعض كملازمين فى الكتبية الأولى مشاه .. ثم اشتغلنا مع بعضنا فى المخابرات .. وشعراوى كان رجل طيب وعلاقته مع الناس كلها طيبة .. ورجل يعتمد عليه .. وكان من القمم الأساسية فى التنظيم السياسى اللى كان معمول فى مصر وكان محل ثقة عبد الناصر .. وأعتقد إن الناس حتى اللى أضربوا فى زمن شعراوى وزير الداخلية لغاية النهارده بيشكروا فيه وفى أخلاقه وحسن معاملته لهم .. كان رجل فاضل » .

• **أشيع عنه إنه كان على علاقة بإحدى فئات الكوميديا ؟**

• **الإشاعات لا تنتهى فى بلدنا أو فى أى بلد فى العالم .. ولا أستطيع أن أكذب أو أن أؤكد هذا الخير .. لكن عندما أشاهد حجم العمل اللى كان بيشتغله أقول ده حتى ما يقدرش يتفرج على التلفزيون !!» .**

* وأسأل أمين هويدي : ماذا نقول لنا عن سامى شرف ؟

* « سامى شرف رجل قام بخدمة الرئيس عبد الناصر ما وسعه ذلك من جهد .. هذا معروف .. رجل له علاقاته مع بعض الناس جيدة جدا .. وشأنه شأن الآخرين علاقته مع بعض الناس الآخرين مش طيبة .. وأنا كده وأنت كده وكلنا بهذا الشكل » .

* ويقول سعيد حلیم : « سامى شرف إنسان مرتب حقيقة .. وعنده مقدرة على العمل ساعات طويلة وكان الرئيس عبد الناصر فى حاجة لأى شخص يرتب مكتبه كرئيس دولة .. وفعلاً سامى شرف نجح فى هذا .. الأخ سامى كان انضم إلى مجموعة تحريات المباحث العامة .. اشتغلت معه ورشح للرئيس عبد الناصر وأخذه سكرتيراً للمعلومات » .

* ويقول د. الدكتوروى : « إذا أردت أن أصنع نموذجاً أو تمثالاً أو أعطى مثلاً لإنكار الذات فكان هو سامى شرف والرئيس جمال عبد الناصر .. ما أعطاه سامى شرف من جهد وصحة وإخلاص لعبد الناصر لم يعطيه أحد آخر .. كان أميناً فى نقل كل شىء لعبد الناصر .. وموصل جيد .. ولكن أعتقد إنه نسب إليه أكثر مما هو حيث كان موصل جيد للرئيس عبد الناصر وموصل جيد للجهات المختلفة ولم يكن صانع قرار فى مرحلة عمله مع عبد الناصر .. وهو رجل لا يؤخذ عليه أى شىء ويشهد له نزاهته وشفرة وإخلاصه » .

* وأسأل كمال الدين حسين : سيادة النائب من ضمن اللي حضرتك قلته إن الرئيس عبد الناصر قال لك « سامى شرف يستطيع حكم مصر » .. فى أى المناسبات قال الرئيس عبد الناصر هذا الكلام ؟

* « طبعاً كلمة « سامى شرف قادر على حكم مصر » .. دى إهانة للشعب ومهانة لكل واحد .. انتقلت كان فيه منافسة قبل مؤتمر قوى الشعب الوطنية كنا نتناقش إيه اللي يحصل وإيه اللي نعمله .. كان كل واحد يعمل مشروع الدستور .. وبعدين طرأت فكرة أن نعمل مجلس ثورة من جديد .. ده فى ظروف يمكن لمجلس الثورة أن ينشأ ولكن بالتعيين لا بالانتخاب .. كان رأى جمال عبد الناصر إنه يتم بالتعيين ويقول أأست أنا الذى يعين الوزراء .. هؤلاء وزراء .. لكن هذا مجلس ثورة .. كان رأى بغدادى بالانتخابات .. الظاهر إن جمال عبد الناصر قال كلمة شديدة لبغدادى .. بغدادى زعل وكتب استقالته .. المهم إنه بعد هذا الاجتماع .. حاولنا نروح القناطر ونعمل اجتماع لتسوية الأمور .. أنا قلت يا جمال راضى لبغدادى لأنه زعل من الكلام الذى قلته .. وأنا كنت أود التوفيق بين الناس وأحاول أن تكون كل المجموعة متفاهمة مع بعضها .. راح قال إنتم فاهمين إيه .. إنتم فاهمين المركب سوف تغرق لو كل واحد يسيبها ويمشى المركب لن تغرق .. هذه البلد يمشيها سامى شرف .. يمسكها سامى شرف .. لما تبقى المركب بتغرق ويسيبها ويمشى .. إحنا رجالة وطول عمرنا رجالة وبنقاتل .. وفى أحلك الظروف بنقاتل ونصمد وكل حاجة .. فسكت » .

* وأسأل أمين هويدي : هل كان سامى شرف الأمر النهائى فى آخر أيام عبد الناصر ؟

* « لا لا .. عبد الناصر لم يحكم أحد بجواره .. عبد الناصر ظل يحكم حتى الساعة الخامسة بعد ظهر يوم ٢٨ سبتمبر ١٩٧٠ » .

* **ويقول أمين شاكرا :** « سامى شرف كان بنى آدم ما أقدرش أقول كان بينه وبين الأخلاق مسافة كبيرة جداً .. كان كل اللى بيعمله إنه يطعن على الناس وأنا أقول إن طارق ده رجل طيب وكذا وكذا .. هذا ليس خبراً .. لكن لما أقول إن طارق به كذا وكذا .. ده خبر .. هل الناس حتتحرى هل أنت فعلاً رجل سييء وتريد أن تضر فلاناً وفلاناً أم لأ ؟ ده الخبر .. سامى شرف من هذا النوع ما يوصلش أبداً حاجة طيبة لعبد الناصر أو يتكلم كلمة طيبة عن أى أحد .. كان يهتم جداً بالأخبار السيئة يوصلها لعبد الناصر وبصورة مثيرة » .

● **وزاد الاعتماد على الاتحاد السوفيتى فى إعادة بناء الجيش .. فى وقت قطعنا فيه علاقتنا بأمريكا المساندة لإسرائيل ...**

● **وكان عبد الناصر على استعداد كامل بعد النكسة لإعطاء تسهيلات للسوفيت ...**

* **ويقول شمس پدران :** « عبد الناصر قال بصريح العبارة لعباس رضوان قبل الاجتماع ببودجورنى قال أنا سأدخل كتلة الدول الاشتراكية .. حبيبقى شيوعى يعنى .. ومصر نخش الكتلة .. وعندما جاء بودجورنى عرض عليه الاقتراح ده .. طبعاً إحنا ما كناش قاعدين فى الاجتماع .. بس الروس قالوا له لأ طبعاً مش عاوزين .. حتخش كتلة الدول الشيوعية حبيقوا مسئولين عن الدفاع عن مصر .. مش عاوزين هم يتورطوا فى العملية دى .. فما وافقوش عليها .. فما دخلتش .. والدلائل عليها بقى اللى حصلت إن ابتدا فوزى .. أخذ توجيه من عبد الناصر .. ابتدا يمهّد للقوات المسلحة الكلام ده .. إن إحنا الحياذ الدولى ما عملناش حاجة .. ولازم نخش ونبقى فى كتلة الدول الاشتراكية نخش الكتلة الشيوعية .. لإن الحياذ الإيجابى ما جابش نتيجة .. ابتدا يمهّد .. فلما جاء بودجورنى ما رضيش .. قال له لأ » .

* **بينما يقول د . عبد العظيم رمضان :** « لا أعتقد أن هذا الكلام صحيح » .

* **ويقول سعد الشاذلى :** « إنما أنا أحكم على علاقتنا بالروس فى الفترة اللى أنا توليت فيها رئاسة الأركان .. ما فيش شك إنهم كانوا جادين فى المساعدة وطبعاً أنا أستطيع أن أحكم على الفترة من سنة ٧١ لغاية ٧٣ بالتفصيل .. وأقدر أحكم على الفترة من ٦٧ لغاية ٧١ لإني كنت قائدًا للقوات الخاصة وكنت قائدًا لمنطقة البحر الأحمر .. أقدر أقول إن الروس كانوا جادين فى إنهم يعيدوا تنظيم القوات المسلحة ويمدها بالأسلحة الحديثة التى لم تكن ميسرة لبعض دول حلف وارسو » .

● **الأسلحة الهجومية ؟**

* « قبل أن تفكر فى الهجوم لابد أن تفكر فى الدفاع .. هذا أولاً .. الأمر الثانى توجد أسلحة هجومية ودفاعية فى نفس الوقت .. الدبابة تنفع فى الهجوم وتنفع فى الدفاع .. الطائرة .. فيه طائرات عملها الدفاع فقط » .

• واستمرت صداقة مصر مع روسيا ..

* **ويقول توفيق عبده إسماعيل :** « عبد الناصر بعد يونيو ٦٧ لا شك إنه فقد الكثير من قدراته وأصبح تركيزه الأساسي والرئيسي كيف يثار .. وكان باستمرار شغله الشاغل .. بعض الأمور بعد ٦٧ كانت خارج حدوده كان دائماً مركزاً على الجيش وعلى إعداد الجيش وعلى إعداد الطيارين على وجه التحديد .. وعلى التسليح مع روسيا .. ولذلك سلم للروس الكثير في هذه الفترة » .

* **ويقول عبد المجيد فريد :** « كانت التحديات التي واجهت عبد الناصر بعد ٦٧ في اعتقادي ٤ تحديات .. أولاً : تحدى داخلي .. ثانياً : تحدى عربي .. إنه كان زعيم وقيادة عربية بغض النظر النظام الغربي معه أم لا إنما الناس كانوا معه .. بغض النظر النظام كان معه أم لا .. وكان ليس هناك تصور إنه يهزم أو إن إسرائيل تعمل التي عملته .. وكان التحدي الثالث : الاتحاد السوفيتي .. لأنه أدى أسلحة وأجهزة ومعدات وبعدين اتسابت في سبائك فأخذتها الـ C.I.A. عن طريق إسرائيل .. فإزاي أعيد تاني الثقة لدى الاتحاد السوفيتي علشان يديني تاني أسلحة ومعدات لكي أعيد بناء الجيش .. علشان أرجع ثاني آخذ الأرض المحتلة فكانت مشكلة الاتحاد السوفيتي .. والتحدى الرابع : أمريكا .. دولة عظمى أولاً مع إسرائيل وثانياً في داخل الأمم المتحدة » .

• وأصدرت الأمم المتحدة في ٢٣ نوفمبر سنة ١٩٦٧ القرار رقم ٢٤٢ الذي اختلفت الآراء في تفسير بعض عباراته .. وعادت إسرائيل في تنفيذه ...

* **ويقول حافظ إسماعيل :** « ٢٤٢ فيه شيء من الغموض .. كل واحد يفسره كما يراه » .

* **ويقول خالد محيي الدين :** « رحت لعبد الناصر قلت له إنت قبلت ٢٤٢ ؟ قال آه .. أصل أنا عاوز أعيد بناء القوات المسلحة .. وعاوز الاتحاد السوفيتي يساعدني .. فعاوز أقتع الاتحاد السوفيتي إن أنا مش جاري قوى وراء الحرب بسرعة لأنه خايف إن الحرب تقوم فتحصل حرب عالمية ويخش .. فأنا بدى أطمئنه وعاوز أبني القوات المسلحة علشان يبقى الجيش قوياً والشعب راضياً وإنه بقدر يسترد أرضه .. وعاوز أيضاً أوضب اقتصادي .. فقلت في القرار ٢٤٢ وسيلة .. والقرار عبارة عن إيه » إسرائيل تنسحب .. وأدى تعهداً بإنهاء حالة الحرب » .. فإذن جمال عبد الناصر نضج قوى زى ما قلت في ٢٤٢ » .

* **ويقول محمد فوزي :** « أنا مؤمن أصلاً بالجندى أكثر من إيماني بالضابط الصغير لأن إذا لم يوجد الجنود لا أخذ الراتب بتاعى ولا أكون قائداً .. نمت هذه الناحية ونجحت في ذلك لدرجة تمكني أن أقول لك إن الجندى البسيط الصغير ده هو اللي بدأ حرب الاستنزاف .. إزاي ؟ الجندى البسيط الصغير واقف في الشاطئ شاف جندياً إسرائيلياً على بعد ١٨٠ متر وهو عرض قناة السويس .. وربنا أعطاه من القوة بالدرجة التي بها وضع مشط البندقية وضرب ضربتين فقتل الجندى الإسرائيلي والبننت اللي وياه .. البنات الموجودين داخل القوات المسلحة

الإسرائيلية .. كنت أنا بعد ما خرجت من عند الرئيس الساعة ٧ كتبت منشوراً وزعته على القوات بالتليفون وقلت إحنا فى موقف لا يسمح لنا بالعدوان .. بضرب إطلاق النار .. الجندى الذى يطلق نار على العدو يحاكم محاكمة عسكرية وهذا الكلام كان الساعة ٩ .. الساعة ١١ بالليل بيكلمنى قائده .. قلت له يا سيادة اللواء رقى العسكرى ده وحط على ذراعه شريطين .. قال سيادتكم ماضى المنشور ويتقول كذا وكذا .. قلت له معلش نفذ الأمر الأخير .. القرار الأول طلع من عقلى ومعناه ضبط النفس مش عاوزين لغاية ما نستعد .. القرار الثانى تابع من قلبى .. من هنا جاءت النخوة فى أن الجندى ده ثانى يوم الصباح ضرب ٣ وفعلاً أنا ذهبت للجندى ووضعت له نيشان على صدره .. فى إن هو أجاد إجابة كبيرة وقلت إنه ينزل أجازة .. علشان أمه تقول له إيه يقول لها ده نيشان لأنى « قتلت إسرائيلى » .. « راحت مزغرته » .. هذا ما أريده من أسوان لإسكندرية .. وبدأت حرب الاستنزاف .. التهادرة بندقية .. بكرة رشاش .. بعده هارون .. بعده مدفعية ثقيلة .. وبدأت حرب الاستنزاف بالطريقة دى .. تسألنى طلعت توجيهات لهذا .. أقول لك لأ .. نظمت العملية بعد كده أه » ..

• **ويقول أمين شاكر :** « إحنا بعد هزيمة ٦٧ جبننا سلاحاً من روسيا .. وجبننا مدفعية طويلة المدى .. وبنينا المنصات فى منطقة قناة السويس .. وبدأنا حرب الاستنزاف دى علشان نخلى الجيش يحس إنه لا زال بحارب .. ده فى عهد الرئيس عبد الناصر .. بس كانت مكلفة جداً العملية دى بالنسبة لنا .. ولكن نجحت بدرجة كبيرة .. وأنا فى تصورى إنها كانت مقدمة لحرب ٧٣ .. لما جاء عبد الناصر وأنا أعتقد دى من النصائح القليلة اللى سمعها منى .. واستخدم عسكرى مثقف .. لإن الحرب اللى فى هذا الوقت كانت أصبحت حرب معدات .. فأخذنا من طلبة الجامعات ومن الشباب المثقف والموظف .. فمستوى الجيش ارتفع جداً بالعسكرى .. أنا حاربت فى ٤٨ إحنا طلع عينيها من العسكرى المصرى .. كان مستواه سيئاً جداً .. كان لا يقرأ ولا يكتب .. ولا يعرف يلبس الشراب ولا الجزمة .. ده متعب قوى .. ما تعرفش تقود عساكر بهذا الشكل .. لكن لو كان العسكرى مثقفاً ومتعلماً تقدر قوى تشغله » .

• **وظهر شعار « يد تبنى ويد تحمل السلاح » .. وبدأ عبد الناصر ينفذ خطة حرب الاستنزاف ...**

• **ويقول جمال حماد :** « وتحول الشعار من الصمود إلى الردع .. رأى البعض أنها محاولة لتهنئة الجبهة الداخلية .. وفسرها البعض الآخر بأنها كانت ضرورية للإبقاء على روح المقاومة فى الجيش والشعب » .

• **وصدر بيان ٣٠ مارس سنة ١٩٦٨ بعد المظاهرات الطلابية ...**

• **ويقول د. عبد العظيم رمضان :** « بدأ عبد الناصر ينفذ خطة حرب الاستنزاف التى فسرها البعض بأن الغرض منها الداخلى وليس الخارج على ما يبدو فى الظاهر .. لكى تكون عين الشعب مشغولة على الحدود لا على ما بداخل الحدود .. فالجبهة الداخلية كانت تمر بقلقل » .

• **ووعده الرئيس عبد الناصر فى بيان ٣٠ مارس بإصلاحات دستورية وديموقراطية ...**

* **ويقول سيد مرعى :** « بدأ عبد الناصر يتجه إلى إعادة تشكيل الحكومة التي كان يرأسها حتى ذلك الوقت المهندس محمد صدقي سليمان .. وفي اجتماع مجلس الوزراء شرح الأسباب الرئيسية لتلك النكسة .. وقال جمال عبد الناصر إنه كان من تلك الأسباب صدور قرارات اعتقال وإبعاد ومصادرة حملت الظلم لكثير من المواطنين الأبرياء .. وأن الوقت قد حان لتصحيح هذا كله .. ولتكن نقطة البدء في ذلك هي رفع الحراسة عن الأشخاص الذين صادرت لجان تصفية الإقطاع أملاكهم .. ولكن كان هناك أقلية من الوزراء .. خصوصاً السيدان سامى شرف وشعراوي جمعة بدأوا يحذرون الرئيس من خطورة رفع الحراسات .. وأن هذا الاتجاه يحتاج إلى التمهّل حماية للنظام السياسى نفسه » .

* **بينما يقول سامى شرف :** « لو كنا نريد فرض الحراسة على الناس ونستمر فيها .. إذن لماذا تشكلت لجنة في حياة جمال عبد الناصر لإنهاء قضية الحراسات .. وكانت مشكّلة مني وشعراوي جمعة وسيد مرعى وأمين هويدى باعتباره وزير الدولة لمجلس الوزراء المسئول عن الحراسات » .

* **وتقول هدى عبد الناصر :** « كان والدى يريد في اللجنة المركزية العليا للاتحاد الاشتراكى التوسع أكثر وإيجاد قوى قومية أخرى تعبر عن نفسها .. لكن ظروف الحرب لم تسمح .. وبيان ٣٠ مارس لم ينفذ بالكامل » .

* **هل الظروف أو المحيطون بالرئيس هم الذين لم يسمحوا بالتغيير وكان الرئيس يريد ؟**
* « الوقت لم يسمح كان صعباً أن يحدث أثناء فترة الحرب أى تغيير .. وعلى العموم أنا لا أعرف بعد كل هذه السنوات إذا كانت الديموقراطية قد تحققت أم لا ؟ »

* **قيل إن الرئيس قد أسف على قرارات تنظيم الصحافة .. ومذبحة القضاء ؟**

* « تقصد تطهير القضاء !! هذان الملفان يجب أن يفتحاً لنعرف تفاصيلهما .. والتاريخ سيحكم .. لكن والدى لم يفتح هذين الموضوعين معي » .

* « من كان ينتقد الرئيس أو يناقشه يذهب وراء الشمس » .. هل توافقين على هذا القول ؟

* « لا أعتقد أن أحد الموجددين راح وراء الشمس !! »

* **ويقول أحمد كامل :** « عبد الناصر كان يفكر في إنشاء حزب .. وكان لا مانع لديه أن يكون هناك حزب معارض .. لكن بعض الناس تقول لك إحنا حنئشوى حزباً علشان يحاسب عبد الناصر .. وكانوا في التنظيم الطليعى يختاروا الناس للمباهاة بالأعداد الموحدة ليس بالكيف إنما بالكم » .

* **مين من المحيطين بالرئيس عبد الناصر أساءوا إليه وإلى الثورة ؟**

* « اعفينى من هذا السؤال .. لأنى لا أريد أن أجرح أحداً » .

- **فيه منهم عدد كبير ولا قلة قليلة .. بصراحة ؟**
- « أنا حاضرب لك مثلاً يوضح رأيي في الحجة دى .. أنا لما أكون وزيراً مديراً أى حاجة .. وفيه واحد ينقل لى الأخبار .. لو نقلت الأخبار دى غير واضحة بتؤدى إلى أضرار .. لو نقلت بصدق وأمانة ما بيحصل ضرر .. فهى العملية كلها عملية هل الإنسان ينظر إلى ذاته أم ينظر إلى الخارج ؟ النظرة هنا مختلفة تماماً .. لو أنا بأحافظ على الكرسي اللي أنا قاعد عليه .. مش عاوز أسببه ممكن أوترك وممكن أحطك فى موقف ما يناقش ظريف .. إنما الصدق والأمانة حتى لو اقتضى الأمر إنك تسبب المكان اللي إنت فيه .. دول قليلين جداً اللي يحافظوا عليه » .
- **ويقول سيد مرعى :** « قال لى عبد الناصر لقد أخطأنا فى أشياء كثيرة وكانت لجنة تصفية الإقطاع واحدة منها » .
- **ويقول كمال الدين حسين :** « أنا ضميرى أبى على أن أقعد ساكتاً .. قال لى عبد الناصر مرة إنتم قاعدين ساكتين ليه ؟ قلت له مش بنسكت .. ويمكن زملائي نصحونى إني لا أذهب لأن ما فيش فائدة من الكلام .. قلت لهم لو فى واحد فى المليون أمل .. علشان دى مصر وبلدنا وأنا لا يمكن أن يكون فى قلبى حاجة نفسى أقولها ولا أقولهاش .. والحقيقة طلبت مقابلته وهو على طول قابلى .. وتكلمت عن الجبهة الداخلية وإن الناس لازم تشعر إن كيانها رجع تانى وتتخلص من أجهزة المخابرات الأربعة الموجودة فى البلد .. وإن كرامتهم رجعت تانى .. وأن يبقى لهم أمل فى المستقبل وتدعم الجبهة الوطنية بأن تعطى أمل فى الحرية .. قال نعمل انتخابات دلوقتى .. قلت أنا لا أحدث عن الانتخابات .. لكن أعطيتهم أمل إن يبقى فيه حرية .. وكرامتهم ترجع لهم تانى .. ومع الجبهة العربية اعمل صلحاً مع كل العرب وتعاون معاهم .. وبعدين نتفق مع الشرق .. وحتى الغرب ندرس إمكانية الاتفاق معهم .. وقف وقال لى إنه عاوزنى أمسك المقاومة الشعبية .. المقاومة الشعبية كنت رايحها من نفسى .. وبأجمع مين اللي عاوز يدخل المعركة أو عاوز يستجمع قوته ولازم يعمل تعبئة عامة بجميع إمكانياته داخلية وخارجية .. ودى كانت النظرية اللي بنى عليها الكلام بتاعه .. وفى المناقشة بأقول له ما فيش ولا عسكرى ولا مدفع من هنا للسويس ونرجع جيشنا اللي فى اليمن علشان حنحتاج الدبابات .. قال والملك البدر يرجع ؟ أنا حقيقة صعقت .. جاءتنى صدمة كبيرة .. إحنا بننكلم عن الدفاع عن مصر إحنا مش لاقين أى حاجة علشان ندافع بها عن مصر .. يقول الملك البدر يرجع ولا يتنيل على عينه .. وبعدين طلبت المقاومة الشعبية وبعدين أصريت على إنه لازم الكلام اللي قلته يبقى له صدق .. قال لى جمال إنت زهقتنى .. قول لى أنت قابل تعمل مقاومة شعبية ولا لا ؟ قلت له لازم يبقى فيه شعب .. الشعب يشعر بكيانه الأول .. أقول للناس إيه علشان يعملوا مقاومة شعبية .. قلت له : ربنا يسامحك أنت وأنا اللي بننكلم وربنا اللي هو شافيت أنا بأكلمك علشان خاطر مصر تتصرف زى ما أنت عاوز .. الكلام ده كان فى يونيو ١٩ ، ٢١ فى مقابلتين » .
- **ويقول عبد المجيد فريد :** « بعد ٦٨ جاء برنامج ٣٠ مارس .. ومن ضمن برنامج ٣٠ مارس

كما تذكر الانتخاب من القاعدة إلى القمة بما في ذلك أمين القاهرة .. ويتدرج من القاعدة من الوحدات للقسم للأقسام للمحافظة لغاية القاهرة .. وكانت وإحنا داخلين على ٦٥ و ٦٦ و ٦٧ كانت بعد الانفصال حصل مشكلة في مصر فكان العمل الجماهيري مطلوب بشكل شديد .. وكنا جداد على العمل الجماهيري .. فكان شعله بياخذ الصباح والليل كعاصمة وكانت ٢١ قسماً في ذلك الوقت .. أظن دلوقتي ٢٢ - ٢٣ وعدد الشياخات في القاهرة أكثر من ١٠٠ .. فكان المطلوب أن نواجه مع الناس باستمرار وكنت أنا بالذات أعرف جيداً شياخات القاهرة واحدة واحدة .

- * وأسأل عبد المحسن أبو النور : ماذا كان دور أمين عام الاتحاد الاشتراكي ؟
- * « أمين عام الاتحاد الاشتراكي شغلته إنه يجمع كل آراء الاتحاد الاشتراكي ويعرضها على اللجان التنفيذية المختلفة .. الاتحاد الاشتراكي كَوْن بعد نكسة ٦٧ بالانتخاب الحر المباشر .. والتي كَوْنه سواء من القرية إلى المدينة إلى المركز إلى المحافظة إلى مستوى اللجنة المركزية ثم اللجنة التنفيذية العليا - التي هي أكبر سلطة سياسية كانت في هذا البلد - كله تم بالانتخاب » .
- * هل اقتبس هذا النظام من الاتحاد السوفيتي ؟
- * « الاتحاد السوفيتي ليس لديه انتخاب » .
- * ويقول د . حلمي مراد : « قال لي الرئيس .. اضرب لي مثلاً على بعض الناس من حولي منحرفين وأنا أتغاضى عنهم .. قلت له على مثلين » .
- * وإيه المثلين ؟
- * « مافيش داعي » .
- * لأ أرجوك ؟
- * « أحدهما كان قائد البوليس الحربي » .
- * من يا فندم ؟
- * « أنا مش فاكرا اسمه .. هو بعد كده انتقل للملك الدبلوماسي .. ولما أبعد إلى ألبانيا حيث ارتكب برضه أخطاء .. سحبوه من هناك .. وقال له عبد الناصر مش كفاية إن فلان الفلاني بيتهمني باني أنا بأعطي عليك .. لأنه كان في الحقيقة بيعذب الناس وبيعتدى عليهم وبيخرج عن القواعد بما يتناقى مع حقوق الإنسان .. ما قدرش يعاتبني في حياة الرئيس عبد الناصر .. وبعد ما توفي جاء زارني في البيت .. وقال لي إن الرئيس عبد الناصر أخبره بشكواي » .
- * والثاني ؟
- * « الثاني برضه الله يرحمه توفي أخيراً .. اللواء جمال نظيم .. فقلت له برضه عن وقائع كان بيعملها لإن له اتصال بشباب الجامعة .. وكان بيشراف على التدريبات العسكرية في الجامعة ..

فقال لى لأ أنا مانماش له موقف يوم الثورة بعد ما فقدنا الأمل إنه يبجي بالكتيبة بتاعته .. إنه ظهر وبقي واقف على الدبابة .. هذه الصورة لا أنساها طول حياتي .. المهم أنا كلمت الرئيس بصراحة جداً .. لدرجة طبعاً ما فكرتش أبداً إنه حيدعوني للوزارة .. وخرجنا من عنده .. كل رؤساء الجامعات وكان موجوداً الله يرحمه الدكتور لبيب شقير وزير التعليم العالي وقتئذ قال لى إيه اللي إنت قلتة ده كله .. الرئيس حبيقى مستاء منك .. قلت له والله أنا بأقول اللي يرضى ضميرى .. يعنى مش حاجى أنكلف أو أتصنع .. المهم بعدها بكام يوم عمل تغييراً وزارياً ولقيت السيد سامى شرف بيطلبنى فى التليفون وقال لى الرئيس عاوزك تيجى له الساعة ٨ مساء اليوم .. لم يأتى فى ذهنى رغم إنه كان نشر فى الجرائد إن فيه ترشحات للوزارة وإن الرئيس كان بيقابل بعض المرشحين .. ماجاش فى بالى أبداً إنه حيقل لى أدخل الوزارة .. فرحت فى الميعاد لقيته يقول لى أنا سعدت بالكلام اللي إنت قلتة يوم اجتماع رؤساء الجامعات وعرفت إنك إنت عندك أفق سياسى .. فلجنا عاوزين نستفيد من وجودك .. ولذلك أنا بأعرض عليك تيجى وزيراً للتربية والتعليم .. فأننا أسأت الحقيقة قوى .. يعنى اتضايقت .. قلت له ده شرف كبير .. إن سيادتك راضى عن الاستعانة بى إنما اسمح لى سيادتك أعترز .. قال أمال بس تقعدوا تنتقدوا وتشنعوا .. ولما نيجى نقول لكم تعالوا اشتركوا فى إصلاح الأوضاع .. تتهربوا .. قلت له : أنا لا أتهرب ما أنا رئيس جامعة بدرجة وزير .. بل أنا رئيس وزارة .. لأن عندى مستشفيات آدى وزير صحة .. ومدينة جامعية آدى وزير إسكان .. وأنا عندى كليات أنا وزير تعليم .. وعندى رياضة أنا وزير شباب ورياضة .. أنا أكثر من وزير .. أنا رئيس حكومة وعندى استقلالى .. ومرتبى أنا بدرجة وزير ؟؟ فتسمح لى سيادتك أنا بأخدم الدولة وبأربى جيلاً ناشئاً .. ومتأخذنيش أنا ماليش علاقة بوزارة التربية والتعليم .. قال لى يعنى عاوز تيجى وزير تعليم عالى .. ما انت شهدت للبيب شقير قلت عليه إنه قائم بعمله كويس .. قلت له وأنا مش عاوز آخذ حاجة من أحد .. قلت له أنا متأسف أنا ما طلبتش كده .. قال لى أمال عاوز تيجى وزير شباب ده مش قدرك .. إنت لما تيجى وزير تربية وتعليم يبقى عندك كل مدارس التعليم .. وكل المدرسين من أسوان إلى الإسكندرية .. المهم .. غير الموضوع وقعد يتكلم فى المسائل العامة إلى حد ما يعطينى فرصة .. رجع تانى للموضوع .. فقال لى إحنا مش اتقابلنا مرة زمان .. وبعدين ده تجنيد وتكليف ولا فكاك منه ولا هروب .. تصور أى واحد يطلع مبسوط أو يروح على بيتهم .. أنا قلت لسانك سيارتى أن يجول بنا فى أنحاء مصر الجديدة حتى أفيق .. وقد كان ..

- **ويضيف د . حلمى مراد :** « فى الواقع إخواننا المعنيين أو المحيطين بالرئيس عبد الناصر .. ما كانوا يحبوننى لأبى ما جئت عن طريقهم .. أنا كنت بأسمى طريقهم ده « مكتب التخديم » .. يعنى ما جئت عن طريق مكتب التخديم .. أنا اللي اختارنى الرئيس عبد الناصر شخصياً .. إنما هم اللي اختاروا الباقيين .. حتى اللي دخلوا من أساتذة الجامعة فى هذه الوزارة .. و قصد الرئيس عبد الناصر يبقى عدد كبير من أساتذة الجامعة إرضاء لطلبة الجامعة وإشعار بالطمأنينة .. كان كل من اختير من الجامعة .. اللي اختارهم السيد على صبرى بمعاونة الدكتور لبيب شقير وزير التعليم العالى . »

• زى مين يا فندم ؟

• « زى الله يرحمه محمد حافظ غانم .. وزى الدكتور عبد العزيز حجازى .. يعنى كل اللى كانوا أساتذة جامعة فى ذلك الوقت كانوا من اختيار السيد على صبرى .. بمعاونة الدكتور لبيب شقير .. فأنا ماكانوش بيرتاحوا لى .. خصوصاً إنهم كانوا بيشتعروا إن الرئيس عبد الناصر بيدبلى من التقدير أو الإمكانيات ما لا يعطيه لغيرى » .

• وماذا حدث إذن ؟

• « أولاً أنا وقت ما عرض علىّ إنى أدخل الوزارة فأنا بأقول له أنا وزارة التعليم العالى .. التربية والتعليم أنا ماليش علاقة بها .. قام قال لى مين قال إنك جاي علشان وزارة معينة .. وبناء عليه كنت بأنكلم فى مجلس الوزراء فى كل شىء .. وكان يسمح لى بذلك .. بقية إخواننا .. بعضهم كان بيأخذها من قصيره ولا يتحدث إلا فى شئون وزارته أو لا يتحدث إطلاقاً .. وفيه بعض من إخواننا الوزراء .. أنا قعدت فى الوزارة ١٦ شهراً .. لولا إنى أعرفهم شخصياً وأعرف نبرات أصواتهم .. كنت لا أعرف صوته شكله إيه !! أما أنا كنت بأنكلم .. وتلك كانت من العناصر اللى بتضايقهم أيضاً » .

• حضرتك اشتركت فى كتابة بيان ٣٠ مارس ؟

• « ضايقهم إن جاء الرئيس عبد الناصر فى الجلسة التالية .. واختارنى .. متابعاً لتنفيذ بيان ٣٠ مارس على مستوى الوزارات جميعاً .. وطبعاً دى ثقة وتكريم » .

• وما هو سبب الخلاف الذى أدى إلى استقالتك ؟

• « كنت لا أذهب إلى المطار لاستقبال الضيوف .. وقال لهم د. حلمى جاء لى البيت .. أنا كنت بأقسّم كلامى .. أنا ما كنتش بأنكلم عمال على بطل .. يعنى فيه أمور أفتحتها فى الجلسة العامة لمجلس الوزراء .. وفيه أمور حساسة أكلمه فيها فى ميعاد خاص فى البيت .. فهو كان متضايقاً من عدم مرواحى المطار .. فلما رحلت له البيت قلت له وقتى محدود وعندى مشاغل كثيرة .. فيكفى إنه يروح مع سيادتك من يكون لهم علاقة بالضيف اللى جاي .. أنا إن جاء مع الضيف وزير التعليم أو هناك مسائل سوف تناقش ثقافية تعليمية أنا مستعد للحضور .. وزوار مصر كثيرين جداً ويترددوا كل يوم .. والمسافة للمطار وانتظار الإجراءات حيصيص الوقت .. فأرجو من سيادتك تعفينى .. فضحك وقال لى وهو كذلك .. أريد القول إنهم كانوا يبدسون وكان الدس يصل لى .. فبعد هذا حصل إنى ذهبت لدول الخليج .. دعيت إلى يوبيل التعليم فى البحرين .. ورحلت أيضاً الكويت .. الخ .. فالهمهم أهديت هدايا هناك وجبتها معايا .. فلما جيت .. جيت إلى مكتب الأستاذ سامى شرف .. وقدمت تقريراً برحلتى وما حصل فيها .. والهدايا التى أهديتها وقلت أنا تنازلت عنها للدولة .. لأنه لم تهدي لى بصفتى الشخصية .. ولكن بصفتى وزيراً فى الدولة وتركتها على المكتب فقال لى لازم نعرض الأمر على الرئيس وهو اللى يقول نعمل إيه .. وضرب الجرس استدعى فراش المكتب وقال له حظها فى عريبة سيادة الوزير ..

وقضت معاً وما حش راضى بأخذها .. لغاية ما جيت رايح اجتماع مجلس الوزراء .. فقابلت الله يرحمه الأستاذ صلاح الشاهد .. كان كبير الأمناء .. فقلت له حصل كذا وما حش راضى يستلمها .. قال لى يا سيدى الكل بياخذ هدايا .. قلت له خدنى على قد على .. أنا مش عاوزها .. فقال لى طيب ابعتها لى بكرة .. فبعثها له فى جواب وماضى عليه وأخذها .. هم عندما جاء اجتماع اللجنة المركزية للاتحاد الاشتراكى .. فتحوا الموضوع .. فواحد قال لى كان عضواً فى اللجنة المركزية .. قال لى إيه اللى إنت عملته ده .. يقولوا إنك أنت بتشنع على الرئيس وعلى أعضاء اللجنة المركزية وإننا بتقبل هدايا .. وإنك إنت بتضع قوانين جديدة فى البلد وإنك عاوز تعمل دعاية لنفسك .. وإنك كذا وكذا .. فقلت له يا أخى إنتم بتتبرعوا من مرتباتكم مثلاً للمجهود الحربى أنا مرتبى ما عنديش غيره مش بأتبرع به .. فانا بأتبرع بالهدايا دى .. وفى هذا فليتنافس المتنافسون .. ببزعلوا ليه ؟ .. فمن وقتها بقيت شايف إنه بقت الأمور تتغير .. لحد ما أخذوا منى حديث لمجلة روز اليوسف .. ده بقى اللى فجر الموضوعات .. الحديث ده كان فيه مقدمة عملها الصحفى .. وفيه أسئلة من وضعه .. زى ما قلت له للرئيس فى جلسة مجلس الوزراء اللى أثار فيها الموضوع .. قلت له أنا مسئول عن إجاباتي أما الأسئلة وأما المقدمة فانا مش مسئول عنها ... لأنه بدأ كلامه بيقول .. وهذا الحديث اللى أصدر قراراً بمنعه .. إنه وأنا بعت له جواب ردأ على المنع قلت له مافيش وزير يقبل إنه يعطى حديثاً وأحد يمنعه .. لأنه يجب أن يكون غير مرضياً عنه ولازم يستقيل .. فقرأ الجواب وقال لهم ده بيقول فى المقدمة « يجلس اليوم على الكرسي الذى جلس عليه سعد زغول وعلى الشمسى وطه حسين .. والخ كل وزراء التعليم » .. الوزير فلان واللى حول الوزارة من بركة ماء راکدة إلى خلية ثورية .. وإنه بيسألوه عن تنفيذ بيان ٣٠ مارس .. فقال إن بيان ٣٠ مارس لم ينفذ لأن الوزراء مشغولين بأعمال الوزارة .. وإن القيادة السياسية مشغولة بالمعركة مع إسرائيل .. يعنى أنا مش نافع .. وإنتم مشغولين عن تنفيذ بيان ٣٠ مارس .. وأيضاً إدى برضه حديثاً آخر .. قال فيه برضه كلام يعتبر نقداً لعمل الحكومة .. وجاء جواب أيضاً كان وقتها حدث اللى ترتب عليه منبحة القضاء .. إنه جواب ضد وزير العدل .. إن هو أثار القضية وحصل منبحة لرجال القضاء .. فبعد ما خلص .. رفعت إيدى وقلت له تسمح لى أرد .. قال لى انتفضل .. فقلت أولاً فيما يختص بالجواب الأول سيادتك اللى معيننى متابعاً لتنفيذ بيان ٣٠ مارس .. وعلى هذا الأساس لو قلت انتفذ بالكامل أبقي أنا كذاب .. ما حش يصدقنى .. إذا قلت مش حارد يعنى ممتنع عن الرد يبقى أنا برضه ما ريحتش الناس .. فانا بأقول إن فيه جزء نفذ والذى لم ينفذ هذه السنة سينفذ السنة القادمة .. إذن هذه أحسن إجابة ممكنة .. كون إنهم اتكلموا عن سعد زغول وعلى الشمسى .. هذه لم أكتبها ولمست مسئولاً عنها .. وفيما يختص بالقضاء .. قلت له ده أنا استأذنت سيادتك فى بداية عهد الوزارة .. أنا اشتغلت فى النيابة وأنا أستاذ فى الحقوق ودرست لهم .. أتوسط لحل المشكلة مع القضاء وسيادتك أننت وأنا اتكلمت معاهم .. قال لى ونجحت .. قلت لأ ما نجحتش لإنى كل ما أهنيهم وزير العدل الأستاذ أبو نصير يؤجل المسائل لخلافات شخصية بينه وبينهم .. فانا بعثت لسيادتك جواباً .. بأقول لك إن الثورة من محاسنها إنها لم تصطدم بالقضاء .. فانا برضه بأطلب منك إنك لاتستمع لى

هؤلاء الذين يحاولون الإيقاع بين نظام الحكم وبين رجال القضاء .. قال يعنى أنت سيادتك طلبت إنك يوم تقابلنى وأنا رفضت إنك تقابلنى .. أو أنت هنا فى مجلس الوزراء يوم ما طلبت تقول كلمة وأنا امتنعت إنى أعطيها لك .. قلت له لأ .. إنما فيه حاجات مستعجلة ما تنتظرش اجتماع مجلس الوزراء .. وفيه حاجات ما أفدرش أقولها هنا .. فأنا بأكتبها لسيادتك فى جواب بخط يدى .. لم يكتب على آلة كاتبة .. ويرسل مغلفاً لسيادتك تقرأه .. حببت سيادتك تفتح الموضوع فى مجلس الوزراء تفتحه .. حببت تستدعيني وتناقشني فيه ممكن .. حببت نقطعه ونحطه فى سلة المهملات ممكن .. يبقى دى أحسن وسيلة لمخاطبة رئيس الدولة .. فقال لى ده أنت أصبح التعاون معاك غير ممكن وراح قام مرة واحدة .. وبدأ يقرع جرس موجود على المنضدة .. علشان يستعدوا بره لفتح الباب ويجيبوا سيارته عند السلم .. فخرج مندفعاً وهو معدى بجانبى قال لى « أنا عندى جوابك القديم الخاص باجتماع اللجنة المركزية للاتحاد الاشتراكى الذى قدمت فيها استقالة » .. بعد ما كان قال لى المرة الماضية لن نقبلها .. المرة دى بيقول لى أنا عندى جوابك وانصرف !؟ .. وخرجت من القاعة وما حدش من المادة الوزراء قُرب منى .. وخرجت خلافاً للإشاعات وجدت سيارتى (لم أخذ سيارتى دى إشاعة) .. ورحت منزلى وصرفت المائق قلت له ما تجيش لحد ما أطلبك .. وقعدت فى البيت ما قدمتش استقالة .. لأنى لو استقلت مرة ثانية حيقولوا كل ساعة بيستقيل حنمسكه بالقوة .. ومن ناحية ثانية حببت إن هو اللى يقبلنى لإنه يبقى مطالب ببيان لماذا أقالنى .. فيقينا كده من يوم الأحد لغاية الخميس .. يوم الخميس كنت بره البيت وراجع لغيت بعض الجرائد بتقول « إقالة وزير التعليم يا جدد » .. فى الشوارع .. اشتريت الجرائد وقرأت الكلام ده وأنا راجع البيت .. وبعدين لما رجعت قالوا لى إن السيد سامى شرف اتصل بك .. قلت لهم الصبح بقى .. الصبح طلبته قال لى السيد الرئيس طلب إنى اتصل بك قبل ما تقرأ الجرائد ويبلغك بالقرار ويشكرك على الخدمات اللى أدتها للبلاد فى مدة توليك الوزارة » .

* وأسأل سامى شرف : هل قام أحد بتقديم استقالته للرئيس عبد الناصر ؟

* « فيه آه » .

* زى مين ؟

* « الدكتور عبد الوهاب شكرى - الله يرحمه - كان وزيراً للصحة .. لكن سُحبت !! »

* ويقول أحمد حمروش : « بدأ عام دراسى جديد ومشاعر الطلبة لم تهدأ تماماً .. رغم بيان ٣٠ مارس .. وتفجر الموقف فى المنصورة .. وقامت المظاهرات ثم تصدى لها رجال الشرطة وأطلقوا الرصاص فقتل البعض .. وخرجت مظاهرات جامعة القاهرة وهندسة الإسكندرية » .

* ويقول أحمد أبو الفتح : « إننا نجنى اليوم ثمار ما زرعته ديكتاتورية عبد الناصر .. وأخطر هذه الثمار هو قتل الروح الوطنية .. وانتماء المصريين خصوصاً الشباب لمصر .. ويا ويل دولة يموت فيها انتماء أهلها للوطن » .

- **وحاول ناصر إصلاح المسار السياسي الداخلي .. واعترض بعض أعضاء اللجنة التنفيذية العليا على أساس عدم المساس بالنظام الحالي حتى إزالة آثار العدوان ..**
- **ويقول أحمد حمروش :** « طفا الخلاف بين الاتحاد الاشتراكي ومسئوله القوى » على صبرى .. وبين محمد حسنين هيكل إلى السطح » .
- **ويقول جمال حماد :** « فى صباح الأحد ٢١ سبتمبر ١٩٦٩ صدرت الأهرام فى صفحتها الأولى تتحدث عن رحلة على صبرى إلى موسكو ومحاولة تهريب .. تم التحقيق فيها مع بعض السكرتارية التى صاحبته .. وجمد نشاطه فى الاتحاد الاشتراكي حتى ينتهى التحقيق .. واستقر رأى على أن يترك على صبرى أمانة لجنة التنظيم فى الاتحاد الاشتراكي .. وتم انتداب شعراوى جمعة مكانه » .
- **ويقول عبد المجيد فريد :** « ثالث سنة بعد النكسة حضرت جميع اللقاءات مع عبد الناصر فى إطار عملى كأمين عام لرئاسة الجمهورية .. ولو إن الاجتماعات مسجلة بس التسجيل يتلف .. فكان عندي دائماً اختزال كامل لهذه الاجتماعات .. فعن طريق أوراقى التى فيها هذا الاختزال عملتها إلى أوراق كاملة .. فبقيت أحط فى الكتاب كل اللقاءات التى تمت بين الرئيس والرؤساء والوفود الخارجية .. أو بين الرئيس واللجنة العليا للاتحاد الاشتراكي داخلياً فى الأحداث من ٦٧ - ٧٠ .. وأحكى الظروف التى جاءت قبل اللقاء والنتائج التى جاءت بعد اللقاء .. دوناً أقول إن أنا عملت كذا وإن الظروف كذا .. وأترك للقارئ والباحث إن من خلال إطلاعه يصل إلى نتائج هذا اللقاء .. التحذيرات التى واجهت عبد الناصر بعد ٦٧ داخلياً وعربياً مع الاتحاد السوفيتى ومع الولايات المتحدة الأمريكية .. ويقدر الإمكان جبت اللقاءات التى تبين إزاي قدر أن يواجه وكانت قاسية جداً لاسيما فى الأيام الأولى » .
- **ويقول د . عبد العظيم رمضان :** « بسبب صراعات مراكز القوى .. اتهموه بأنه يدخل سجاجيد .. وكانت نكتة فى تقديرى .. فالضابط الواقف أمام مكتب عبد الناصر كان يستطيع أن يدخل بلداً كاملة .. فما بالك بعلى صبرى نائب رئيس الجمهورية .. ولكننى أود أن أقول إن عبد الناصر كما قال لى إبراهيم الطحاوى يحب إن يكون على من حوله « إن » .. يعنى فيهم عيب .. وهذا أسلوب يتبعه كل الطغاة .. لما تكون نظيفاً ستعبه » .
- **وأسأل سامى شرف :** هل كان فعلاً الرئيس يريد أن يتراجع عن قرار تأميم الصحافة ؟
- **« ما أفندش أقول تأميم الصحافة .. هى الغرض منها إعادة »** لأ .. ما كلش حيرج فيها .. الغرض منها إن فى المجتمعات المفتوحة أو الرأسمالية بمعنى أصح .. الصحافة يسيطر عليها فرد .. وعندك الأمثلة كثيرة « ماردوخ » وغيره وآخرين كثيرين » .
- **ويقول محمد فائق :** « كان بعد ٦٧ يفكر جدياً فى فكرة الأحزاب والتعدد .. فهو لم يكن ديكتاتوراً بأى حال من الأحوال فى رأى .. كان النظام إلى حد كبير .. نظام الحزب الواحد أو نظام التنظيم الواحد .. ده صحيح .. ولكنه كان يفكر فى التعددية » .

• وأسأل د. حسن عباس زكى : بداية التحول إلى الاشتراكية ؟

• « آه طبعاً .. بداية تعديل الاشتراكية ما هو السادات كان معاناً فيها .. وكلهم موافقين عليها .. فى أواخر ٦٩ - ٧٠ .. وأنا أذكر إن نفس الرئيس عبد الناصر طلبنى وقال لى كل الناس بتشتكى دلو قى من القطاع العام .. والدريكة اللى عملناها دى .. وجمع مجلس الوزراء وقال لهم الشعب ببشتكى وخصوصاً بعد ٦٧ إحنا لازم ندرس إيه الأسباب اللى خلت الشعب يشتكى وإيه العوامل اللى تخلىنا نقدر نرد عليه .. فى ذلك الوقت هو نادى على وقال لى إن تيتو بيقول له إن كل الناس بتشكوا ويتسخط على يوغوسلافيا .. لإن إحنا أخذنا عنها نظام بيقولوا السبب هم .. فتيتو بيقول لى أنا ما قلتش كده .. ده النظام اللى إنتم عملتوه ده ليس المنفذ عندى .. فقال لى روح يا أخى شوف إيه الحكاية إحنا عاملين إيه ومش عاملين إيه .. رحنا فعلاً .. اللى حصل إن إحنا أخذنا منه النظام اللى عمله أول ما عمله وهو اتغير .. وإحنا ما اتغيرناش .. فكان القطاع العام عبثاً ثقيل .. لكن كان ضرورة .. ومازلت أقول إن لابد أن يكون له ضرورة مؤقتة مش كقطاع عام بنك بنكين شركة شركتين زى ما بنشوف كده .. تطلع مشكلة احتكار يبقى لازم فيه شركة تمسده .. لكن ما يقاش له عموميات .. فعلاً رحنا وجبت وعملت له أسلوباً لكن للأسف ربنا ما أعطالوش العمر بقى .. أما هو فكان بدأ فعلاً بغير ويبدل .. ما فيش شك فى ٧٠ و ٧١ » .

• ويقول د. عبد العزيز حجازى : « أنا أعتقد إنه فى مناقشاتى فى بعض الأحيان مع الرئيس عبد الناصر عندما سأل إيه القطاع العام لا يحقق مكاسب ؟ ليه أسعار السلع مرتفعة فى القطاع العام عن مثيلاتها فى الخارج ؟ وكان ناقشنا معه موضوع تأمين بعض المحلات الاستهلاكية أو المطابع وغيره من القطاعات .. وهو كان فى الآخر بدأ يقتنع بأن التجربة لابد أن تعدل .. وأنا سمعت من الملك فيصل الله يرحمه ومن الرئيس السادات الله يرحمه بعد وفاة عبد الناصر .. إنه لو عاش عبد الناصر كان سوف يسير فى طريق الانفتاح » .

• وأسأل نجيب محفوظ : هل الديمقراطية تتعارض مع الحكم العسكرى ؟

• « الحكم العسكرى ده حكم فيه أوامر وعساكر ولا يعرف الديمقراطية » .

• أقصد حكم العسكريين للدولة ؟

• « طيب ما حكم العسكريين للدولة يأتى بناء على إيه ؟ مش على قاعدة عسكرية يبقى اختفت الديمقراطية .. إنما العسكريين إن كانوا زى سوار الذهب فى السودان .. يضربوا القوة العاقبة للتقدم ويتركوا الناس تشتغل بقوا اسمهم مع الشعب .. مش حكام الشعب » .

• ويقول كمال الدين حسين : « بعد كده فى أغسطس كان يتناقش فى اللجنة التنفيذية بالاتحاد الاشتراكى وقال لازم نغير بتاعنا .. ولازم نعمل انفتاحاً سياسياً .. وأنا بأفترح أن نعمل حزب ثانى ونعطى له إمكانيات ونعمل جرنال .. ويبقى يتنافس مع الاتحاد الاشتراكى والللى يدخل الانتخابات ويكسب يبقى فى الحكم والثانى يعارضه .. لما أقول لكم زكريا يعمل حزب وأنور

السادات يعمل حزب تانى .. الناس حتضحك علينا .. ونقول دى تمثيلية الأحزاب .. لكن هو حزب معارض فعلاً موجود ومن رجال أثبتوا طول عمرهم إنهم رجال .. بغدادي وكمال الدين حسين ممكن يكونوا حزباً ويقولوا هذه العملية .. وأنا متأكد إن هم يتصرفوا كرجال .. فطلعوا كلهم بلا استثناء يعارضوا فى هذا الموضوع واللى يقول ده يقعدوا يهيشوا فى الماضى .. وقال لهم ما هم مشتركين معانا فى الماضى .. لكن يقعدوا يعملوا ما أعرفش إيه ؟ يقول لهم آه ما هو أى واحد مننا يعمل حاجة غلط .. أنور السادات يعمل حاجة غلط .. كمال الدين حسين يعارضه ويقول له ده غلط .. ويصحح .. وهكذا .. رفضوا .. المهم بعد كده ينسأل مجموعة منهم لماذا رفضتم هذا الاقتراح .. قالوا إنهم كانوا متأكدين من عدم التنفيذ .. بس عبد المجيد فريد كاتب ويقول : أنا أشهد إن عبد الناصر خلّص نعمته من ربنا وإن المسئولية تقع على بقية الناس الللى كانوا موجودين فى الاجتماع .. بعد كده هو اتكلم عن الجبهة الداخلية وبعدين عمل بيان ٣٠ مارس سنة ٦٨ .. بيان ٣٠ مارس كان هو أثر العملية دى .

• **ويقول جمال حماد :** « أصبح سامى شرف أقوى شخصية فى مصر بعد الرئيس الراحل عبد الناصر ... تبين من تحقیقات المدعى العام الاشتراكى فى قضية مايو ٧١ قيام سامى شرف بشراء مشترياته الخاصة من المصروفات السرية .. ولم يستطع سامى التدليل على صحة حصوله على إذن عبد الناصر لإتفاق هذه المبالغ من المصروفات السرية فى مشترياته الخاصة » .

• وقعت مذبة القضاء ...

• **وأسأل المستشار ممدوح عثمان نجيب :** كنت رئيساً لمحكمة الاستئناف وعاصرت المرحلة اللى سميت مذبة القضاء ، ودى كانت بعد بيان ٣٠ مارس وبعد مظاهرات الطلبة ، فحدث ما حدث وبدون تعليق منى أرجو أن أسمع تعليقك وذكرياتك عن هذه المرحلة ؟

• « هى مرحلة قديمة ونكرى قاسية على نفسى .. وليس على رجال القضاء فقط بل على الجميع .. القضاء المصرى قضاء راسخ متين يتحدث عن عظمته ليس فى مصر وحدها بل فى كافة البلاد العربية وغيرها فى بلاد العالم كله .. أراد الحاكم فى هذا الوقت أن يقضى على هذا الصرح المتين الشامخ فأطاح برجاله وكانوا ١٥١ بالتحديد من خيرة رجال القضاء .. ابتداء من رئيس محكمة النقض كان شيخ القضاء ورئيس المحكمة العليا إلى معاون النيابة وهو ابن أحد السياسيين القدامى .. وكان معاوناً للنيابة .. يعنى فى أول سلم الوظيفة القضائية .. فده من ضمن من أطيح به بلا ذنب أو جريمة .. الحدث للأسف سمي فى هذا الوقت إنه إصلاح للقضاء .. إصلاح للقضاء مع إنه ذبح للقضاء .. ذبح لإن القضاء يتميز باستقلاله وحيثته دون تدخل من السلطة .. كما نص الدستور .. ثم يأتى الحاكم فى هذا الوقت وبجرة قلم ليطيح بـ ١٥١ من خيرة رجال القضاء يمكن نقول لى إنت ما طلعتش ؟ لأ ما طلعتش .. والله كانت الظروف ساعدتنى فى أن لم أفصل كما فصل الزملاء الللى كانوا يجدوا مجرد جواب بإنك أحيلت إلى المعاش .. كلنا ننتظر هذا الجواب .. وأنا كنت فى لقاء مع الصديق الوزير فى وقت المذبة

أو قبل صدورها على طول وهو الدكتور حلمي مراد .. كنت أودى واجب عزاء .. قال إنتم هايجين وعاملين إيه ؟ ما إنتوش عارفين حيحصل لكم إيه ؟ فقلت له حيحصل إيه ؟ كان ذلك فى المنيرة أمام شارع القصر العيني - كان وكيلاً للنيابة وكان زميلاً لى وأنا على صلة به - والحاكم بقى عاوز يعدد محكمة الثورة أو محكمة الدجوى فى هذا الوقت فى دار القضاء العالى لمحكمة المتهمين فى قضية « كمشيش » .. قضية جنائية عادية .. أظن إحنا القضاء العالى من السهل عليه جداً أن يحكم فى دعوة الجناية وجاى فى معقل دار القضاء العالى .. إيه ده هل هذا مقبول .. هل يقبل رجال القضاء هذا ؟ فهذا الحديث نقل بحذافيره لوزير العدل فى هذا الوقت .. تانى يوم الدنيا انقلبت .. والحاكم سمع كثيراً عن انتقادنا لبعض أوضاع .. وكان حكماً شمولياً ومش عاوز أبداً انتقاد .. إذا انتقدناه فى الحرب أو الخسائر أو الهزيمة .. لإنه كنا بنصور الهزيمة على إنها نصر .. فكنا فى نادى القضاة .. وأنا انتخبت منذ كنت وكيلاً للنيابة واستمرت عضويتي إلى أن راسته وأنا فى المعاش بعد الدكتور عبد الحافظ هريدى .. وقبل مقبل شاكر .. ووجدى عبد الصمد .. إلخ .. فبعدما كنت نائب رئيس النادى أحيل عبد الحافظ هريدى إلى التقاعد فتوليت هذه الرئاسة » .

• هل كانت إجراءات الرئيس عبد الناصر لتأمين الثورة ولا لمصلحة مصر ؟

• « لم يكن هذا لمصلحة مصر .. نبدأ من الآخر .. إن مصلحة مصر لا يمكن أن تكون هدم القضاء .. ده شمشون اللى بيهد المعبد على من فيه .. إنما هل لمصلحة مصر أن نقضى على رجال القضاء بجرة قلم لـ ١٥٠ واحد ويسلسل فيها ابتداءً من شيخ القضاة .. اللى أنا عاوز أقوله إنه لم يكن هذا لمصلحة مصر .. هو ولا تأمين نفسه حياًمن نفسه فى إيه إحنا ناس طبعاً مسالمين .. حيامن نفسه من إيه .. هو ده كان لفرض سلطانه حتى لا يكون هناك أمامه صوت معارض » .

• وأسأل أحمد الخواجة : لو تكلمنا عما أطلقوا عليه « مذبة القضاء » ماذا يقول لنا نقيب المحامين ؟

• « ده نتيجة اشتغال بعض القضاة بالسياسة .. وأنا لى رأى إن لا يجوز للقاضى ولا رجل الجيش يشتغل بالسياسة .. أن تشتغل بالسياسة معناها إنك تتحزب .. القاضى يعد رجلاً وكيلاً للمجتمع فى الفصل بين الناس .. بكل أسف الناس اشتغلت بالسياسة .. فى المكتب ده بعض الذين ادعوا البطولات .. كانوا يأتون ليكونوا معتلين للقضاء فى الاتحاد الاشتراكي .. إنما كانت النتيجة إنهم استباحوا دم بعضهم البعض .. وأنت النتيجة بأسوأ شيء يمكن أن نتعرض له .. مذبة القضاء كانت شيئاً قاسياً » .

• هل الرئيس عبد الناصر كان وراء المذبة ولا هناك من كانوا وراءها ؟

• « أنا عاوز أقول لك شيئاً باختصار .. رحم الله من مات وغفر لمن عاش .. يعنى أولاً كان فيه قضاة استباحوا دم آخرين .. إنما اللى أشرف على القصة دى كلها وكان حتى بيناقشها من ٣٠ أغسطس سنة ٦٩ الرئيس السادات ! »

* **ويقول المستشار يحيى الرفاعي :** « الاتحاد الاشتراكي قام على أشلاء المرحلة السابقة التي كانت تمثل الأحزاب السياسية المختلفة .. ومن تكويناته شيء اسمه التنظيم السري الطليعي .. كان تنظيماً غير معلن والمنضمين إليه أفهموا أنهم سيحكمون البلد في يوم من الأيام .. وكان دورهم الأساسي كتابة تقارير والقيام بدور غريب جداً .. محمد أبو نصير قام بعمل ما أسماه اتحاد القانونيين واتصل بالمرحوم رئيس نادي القضاة وآخرين .. في وقت كان قد ظهرت في الصحف عدة مقالات تهاجم رجال القضاة وتمس كرامتهم .. على صبري مثلاً كتب مجموعة منها في جريدة الجمهورية .. يستنكر في بعضها أحكام القضاة بالبراءة لعدم كفاية الأدلة أو بطلان الإجراءات القانونية .. ضارباً عرض الحائط بالمبادئ الأساسية للقوانين العالمية .. وبيدين الإسلام الذي أمر بمبدأ لا تأخذوا بالشبهات .. حتى هذا أنكره وهاجموه .. وكانت قضايا كمشيش قد نظرت في هذا الوقت .. التي تبين أن جميعها ملفقة .. أنا شخصياً حضرت في محكمة من محاكم الثورة في ذلك الوقت .. شهد فيها أحد أعمدة النظام وهو شمس بدران بأنها قضية ملفقة فحكم فيها بالبراءة ومع ذلك أثارت استنكار القائمين في الحكم وقتها .. وهناك قضية انهم فيها شخص يدعى محمد أمين دسوقي بالجاسوسية وتسريب خطاب كان منشوراً في العالم كله .. قضى ببراءته ولكنه استمر محبوساً عدة سنوات بعد حكم البراءة .. وقضية ثالثة قدم فيها رجل للمحاكمة .. أعقد أنه كان مثل ولي أمر عبد الناصر في مراحل نشأته الأولى وعلى علاقة شخصية به .. وشهد الشاهد الرئيسي في القضية بأنه حمل بنفسه ماكينة طبع المنشورات .. فلما طلبت منه هيئة المحكمة حمل الماكينة بيديه لم يستطع لثقل وزنها .. ففضى فيها ببراءة المتهم ولكن الحكم لم ينفذ .. وزاد التهجم على القضاة .. وكان التنظيم السري الطليعي يؤدي دوراً كبيراً في الإقناع بين القضاة والنظام لأنه كان يرى اقتحام القضاة وتجنيده رجاله بالانخراط في عضويته .. مثلما كانت هناك محاولة لانتخاط القضاة في الاتحاد الاشتراكي .. ونجحوا في تجنيده البعض .. وأطيح بوزير العدل كما أطيح بالدكتور السنهوري من قبل بدميسة .. وقالوا إنه يدبر ثورة ويسعى لعمل اجتماع في نادي القضاة .. وكان كل هذا غير صحيح .. وحيى بمحمد أبو نصير وزيراً للعدل .. ومحمد أبو نصير للأسف بدأ يقرب من هم مشكوك في نزاهتهم وكفاءتهم ومن هم مرشحين للفصل من القضاة ويضمهم لتشجيع القضاة للدخول في الاتحاد الاشتراكي .. وهي قلة منحرفة محدودة .. كانت تنادي بالتعاون مع الحكومة وتنادي بفصل النيابة العامة عن القضاة .. وصدر القرار بفصل مجموعة من رجال القضاة ظلماً وعدواناً بدون وجه حق وبدون تحقيق .. وبدون الرجوع حتى إلى حصانتهم وقدسية رسالتهم » .

* **وأسأل المستشار مقبل شاكر :** ماذا تقول لنا عما أطلق عليه « مذبة القضاء » لإحالة عدد كبير من رجال القضاء إلى المعاش ؟

* « الحقيقة إنا لا بد أن نرجع وراثوية قبل هذه الأحداث إذا أردنا أن نعرف أصل المسائل .. طبعاً معروف في هذه الأونة كان نظام الحكم شمولي .. ليس هناك إلا تنظيم سياسي واحد لا أكثر ولا أقل هو المسيطر على كل الأمور .. كان يحكمه فكر معين وهو فكر ينتمي إلى

اليسار .. كان فكراً مهجوراً .. قائماً على سيطرة الحزب والتنظيم السياسى على كل السلطات بمقولة إن مردود ذلك للشعب .. وطبعاً يعنى مع تطورات الأحداث أصبح هذا الفكر منتهياً فى العالم .. رغم أن دستور الدولة ينص على أن هناك سلطات ثلاثة وأن هناك استقلال لكل سلطة عن الأخرى .. والدستور شكله ديموقراطى إلا إن القائمين على الأمر فى التنظيم لم يكن هذا هو منهجهم .. ولم تكن هذه هى قناعتهم .. حاولوا فى منتصف الستينات أن يطووا القضاء المستقل فى مصر - والحمد لله طول عمره - بمقولة دخول القضاء فى التنظيم السياسى .. أو إيجاد شعبة خاصة بالقضاء فى التنظيم السياسى .. كانت وجهة نظر القضاء إنه يضع تحت نظر ولى الأمر الرأى الصحيح .. ومن هنا وكانت جمعيتهم العمومية منعقدة بطبيعتها فى ٢٨ مارس .. أدلوا برأيهم فيما سمي ببيان القضاء يوم ٢٨ مارس سنة ٦٨ .. مسجلين حرصهم على استقلال القضاء .. وعلى أن القضاء سلطة .. وعلى أن القضاء ينبغى أن يستمر بحيدة ويتجرد وبقاء وأن النيابة العامة تظل شعبة أصيلة من شعب السلطة القضائية .. طبعاً الكلام ده لم يلقى القبول عند المخططين لكل ما كان يجرى على الساحة من منتصف الستينات .. واللى كادوا أن ينجحوا فى سنة ٦٨ .. طبعاً بدأت الأمور تهدأ وبدأ مجلس إدارة نادى القضاء يوضح المسائل .. ويبعد ما ينبغى أن يكون عليه الأمر .. ابتدأوا يحسوا إن المتصدى لما يفعلون هو مجلس إدارة نادى القضاء المعقل الشرعى للقضاء .. ومن هنا بدأوا يخططون لقلب هذا المجلس المنتخب من خلال الانتخابات القادمة والترتيب لها .. وفعلأ كان فيه انتخابات ٦٩ .. كانت الانتخابات يوم ٢١ مارس ١٩٦٩ وكانت انتخابات شاملة .. وجهزوا قائمة بالكامل .. لماء مقاعد مجلس الإدارة .. وطبعاً كان فى المقابل فيه قائمة مجلس إدارة نادى القضاء .. اللى كانت برئاسة المغفور له المستشار ممتاز نصار .. وطبعاً قال القضاء يومها كلمته فى ٢١ مارس .. وكانت كلمته واضحة وصريحة ومدوية .. وانتخب قائمة المستشار ممتاز نصار بالكامل .. ولعل هذه أحد المرات القليلة فيما أنكر فى تاريخ مصر إن قائمة بالكامل تنجح .. وفيها ١٥ كرسى .. طبعاً هذا ورتبوا لمذبحة القضاء التى حدثت فى الأول من سبتمبر سنة ٦٩ من خلال إجراءات سميت بإنها إعادة تشكيل السلطة القضائية .. وإعادة التشكيل تضمنت استبعاد ١٣٧ من خيرة رجال القضاء آنذاك .. يتقدمهم أعضاء مجلس إدارة نادى القضاء فى مصر .. وأيضاً أعضاء مجلس إدارة نادى قضاة الإسكندرية » .

• المجلس اللى حضرتك بترأسه النهارده ؟

• « أيوه .. مجلس إدارة نادى قضاة مصر الأم كلها من أسوان للإسكندرية .. يشرفنى أن أكون رئيسه اليوم » .

• ولماذا فعل الحاكم ذلك ، وما الحجة التى كانت وراءه ؟

• « هو الكلام اللى استغل واللى وصل إلى ولى الأمر أو الحاكم .. إن هؤلاء ضد النظام وضد .. وضد .. طبعاً افعلوا أشياء وصوروا أشياء .. وهم قريبين من الحاكم .. فاستطاعوا أن يبرزوا أشياء كلها لا أساس لها من الصحة .. وكلها مكنوية .. والموقف كله أن القضاء كان يريد أن

يحتفظ باستقلاله وحيدته .. وألا يعمل بالسياسة وهذه المسألة نحن حريصون عليها أمس واليوم وغداً إن شاء الله » .

• ألم يكتشف الرئيس عبد الناصر بعد ذلك أن الموضوع لم يكن كذلك ؟

• « تأذن لي .. ولعلني سأجيب عليه لأول مرة .. قبل وفاته مباشرة وتحديداً يوم الخميس السابق على وفاته .. أعقد إنه توفي يوم الإثنين ٢٨ سبتمبر سنة ١٩٧٠ .. أرسل رسولاً إلى المغفور له المستشار ممتاز نصار وكان يعمل بمكتبه بالمحكمة .. يبلغه أن الرئيس يريد أن يصلح الموقف .. وإنه عرف أن هذا غلط وأن هذا أكبر غلط وقع فيه النظام .. ولعل دى برضه المسألة انتقلت في إحدى المقالات .. وأنا أذكر أن المغفور له المستشار ممتاز نصار استدعاني في مكتبه وطلب مني حصر الأسماء وأن أحضر مشروع قانون بنص واحد بعودة الذين أحيوا للمعاش .. وكان ده طبعاً ما جرى كان قراراً معدوماً كما قالت محكمة النقض بعد ذلك .. معناه إنه لا سند لولى الأمر أن يعمل هذا طبقاً للدستور وطبقاً لقانون السلطة القضائية وكل القوانين المعمول بها في مصر .. وأنا الحقيقة أنا أعديت للوالد الأستاذ ممتاز نصار رحمه الله ما طلب مني .. وإن كنت يعني ما أقرتوش إنه يوافق على العودة .. لإني أنا قلت اللي فعل مثل هذا مش هو اللي يصلحه .. كمسألة متعلقة بمبدأ قيمة .. وطبعاً القضية مش قضية أفراد وإنما قضاء بلد هو صمام الأمن فيه .. وما فيش أحد منا أضرير .. هو عزل لا يملكه ولي الأمر وإنما كان بالقوة .. محدش أضرير وفي نفس الوقت كان لابد أن يحدث ثمة تغيير في البلد ككل .. حتى يمكن للقاضي المستقل الحريص على العدل وعلى الحيدة والتجرد أن يعود .. فيؤدى عمله وهو الأمر الذي كان بعد هذا » .

• وأسأل مدوح نجيب : كما يقولون في عمل رجال القانون والقضاء .. هل لديك أقوال أخرى بالنسبة لمذبحة القضاء ؟

• « بالنسبة لمذبحة القضاء أنا لي قول أخير .. وهو إن السادات عندما تولى .. أعاد القضاة .. وأنا كنت في هذا الوقت أشتغل مدير التفتيش القضائي بوزارة العدل .. فكنت بأعيد القدامى كلهم .. فالبعض رفض والبعض عمل بالمحكمة لأنها أكسب .. والبعض قبل .. جاءوا وسكناهم في أماكنهم .. السادات أعاد للقضاء حقه .. حقه اللي هو اغتصب اغتصاباً .. لأن القضاء قيمة في استقلاله .. وليس لدى أقوال أخرى » .

• وبدأت حرب الاستنزاف .. وبدأت بقذف ويضرب المدافع يومياً على الجبهة ...

• ويقول عبد المجيد فريد : « كانت سماء القاهرة مفتوحة .. الجيش الإسرائيلي يقدر يعدى في ذلك الوقت .. يقدر يعبر قناة السويس .. يصل إلى السويس .. يصل إلى القاهرة لولا الموقف الدولي .. وكان صوته واطي زى ما قال أول ما بدأ حرب الاستنزاف ٦٨ .. قال « دلوقتى بدأ صوتي يعلو من وقت فوزي ما على صوته إنما قبل كده ما كنتش قادر على قول كلمة » . لأن الهزيمة مرة والهزيمة صعبة .. هو كان حاسس بالهزيمة شديدة جداً عليه .. وأزما، والمشاكل القلبية جاءت من الهزيمة من نكسة ٦٧ » .

• **ويقول الفريق سعد الشاذلى :** « حرب الاستنزاف إحناً بنشغل بالمدفعية والدوريات .. وهم يشتغلون بالطيران .. فدمروا الدفاع الجوى لمصر تدميراً كاملاً فى نهاية ٦٩ .. يعنى كان سماء مصر مفتوحة .. تستطيع الطائرات الإسرائيلية أن تلعب فيها كيفما تشاء .. فى هذا الوقت جمال عبد الناصر سافر إلى الاتحاد السوفيتى وقال لهم الموقف .. وأذكر هو قبل ما يسافر عمل اجتماع للقادة وحضرت أنا هذا الاجتماع كقائد للقوات الخاصة .. وسافر وعرض عليهم الموقف .. فى خلال شهرين يعنى فى حوالى فبراير ومارس ٧٠ بدأت الأسلحة تصل من الاتحاد السوفيتى بكميات كبيرة جداً » .

• **ويقول أمين شاكر :** « لما ابتدئت عملية حرب الاستنزاف أخذنا أسلحة من الاتحاد السوفيتى اللى كان « منشف ريفنا » .. كل حاجة نطلبها يقول لك حاضر وبس .. وإحنأ كنا عاوزين الحاجات دى تانى يوم .. الاتحاد السوفيتى أنا قابلت السفير السوفيتى ونزىه ضيف قابله والقيسونى قابله .. لمنا عليهم لوماً شديداً وقلنا له بصراحة إن إحنأ نعتبر إنهم مسئولين عن اللى حصل فى ٦٧ .. وعن قرار عبد الناصر فى ٦٧ .. هو بلغ هذا الكلام هناك فابتدوا يصلحوا ويسرعوا شوية فى إمدادنا بالأسلحة والذخائر .. وعملنا المنصات فى منطقة القتال وبدأنا حرب الاستنزاف .. وأنا أعتمد أن حرب الاستنزاف كانت مقدمة لحرب أكتوبر ٧٣ » .

• **بينما يقول د . عبد العظيم رمضان :** « وهكذا كانت المدافع تضرب على خط بارليف وكانت نتيجتها غالباً عملية إزعاج لإسرائيل .. وأحياناً استفزازها .. لكنها أديرت بعقلية قديمة كما قال أمين هويدى » .

• **وأسأل الفريق سعد الشاذلى :** هل كان الرئيس عبد الناصر يفكر جدياً فى الحرب فى ذلك الوقت ، وكان يصدر قرار الحرب ثم يلغيه كما أشيع ؟

• « لا .. لا .. ما أقدرش أقول كده .. منذ اليوم الأول للنكسة كان هناك استعداد للحرب القادمة .. متى ؟ لا نعرف .. إلى أن تصل قواتنا إلى الحد الذى تستطيع به أن تقوم فيه بعملية هجومية .. حرب الاستنزاف بدأناها سنة ٦٨ .. يعنى بعد مرور ما يقرب من سنة من النكسة .. ابتدئت حرب الاستنزاف وكانت زى ما بأقول لك على شكل مدفعية ودوريات .. ولكن لم يكن هناك فى هذا الوقت أى تفكير لعملية هجومية .. كان كل خوفنا أن يقوم الإسرائيليين بالهجوم علينا .. إنما تفكير بأن القوات المسلحة تهاجم إسرائيل فى هذا الوقت أبداً .. فيه وثائق تقول كده لغاية سنة ٧١ لم يكن فيه أى خطة .. والخطة الهجومية وضعت فى أغسطس أو تمت فى أغسطس سنة ١٩٧١ » .

• **ويقول المشير الجمسى :** « وعلشان المناقشة التى تدور أو تكتب حول هذا الموضوع .. أقول بكل أمانة إن الرئيس عبد الناصر وعهده له فضل فى إعادة بناء القوات المسلحة بعد حرب يونيو ٦٧ .. وما تم فى هذه الفترة التى انتهت بحرب الاستنزاف والتطعيم للمعركة .. فأصبحت القوات المسلحة جديدة بكل المعايير وتمت على درجة عالية من الكفاءة .. وهذا يكتب للرئيس عبد الناصر وعهده » .

- **ويقول د. أشرف غريال :** « كان لابد من اتخاذ الموقف اللى إحنا اتخذناه .. وحرب الاستنزاف كانت ضرورية لأن كان من المهم زى ما كان السادات يقول .. مصر ماهياش جئة هامة » .
- **وأسأل الفريق أول مرتجى :** كيف أدار إذن حرب الاستنزاف ؟
- « أنا ما حضرتش حرب الاستنزاف .. دى حرب ثانية أى واحد يقدر يديرها .. إمنى القائد من دول بتبان قدراته العسكرية .. عندما تشتبك القوات ويكون العدو قدامك .. إيه يعنى الشطارة وإيه القدرة اللى بها ما عملتش حاجة أنت قاعد فى التكييف والمدفعية عمالة تضرب » .
- **ألم يكن عبد الناصر صاحب الفضل فى إعادة بناء الجيش ؟**
- « هو أى واحد كان يقدر يعيد بناء الجيش .. قد تكون له يد .. بس متبها لى إن عبد الناصر كان له يدأ أكبر باستخدام الروس » .
- **وأسأل الفريق سعد الشاذلى :** سنوات الاستنزاف يا فندم .. إيه تعليق حضرتك عليها باختصار ؟
- « سنوات الاستنزاف كانت تجربة علشان تحيى الروح المعنوية فى القوات المسلحة لأن الهزيمة تضعف الروح المعنوية .. فالقوات المسلحة كانت بعد ٦٧ الروح المعنوية سيئة جداً وكان لازم نقوم ببعض الأعمال .. ما فيش شك إن إحنا خسرنا فى حرب الاستنزاف خسرنا كثيراً برضه .. لأن إحنا كنا من وجهة النظر المصرية عندنا أسلوبين : أسلوب ضرب المدفعية أى نضرب الأهداف الإسرائيلية اللى فى الشرق بالمدفعية .. والأسلوب الثانى إن إحنا نطلع دوريات تعمل كمان على الطرق داخل سيناء .. والقوات اللى كانت تعبّر هذه الكمان أو الجزء الأكبر منها كانوا من القوات الخاصة تحت قيادتى .. من قوات المظلات والصاعقة كلها .. إنما الجزء الأكبر من العمليات الفدائية فى الشرق كان يقوم بها رجال الصاعقة .. العدو كان يبرد علينا بحاجة ثانية .. يرد علينا بالطيران .. فالطيران كان يهاجمنا ويضرب ويحدث فينا خسائر .. والخسائر اللى بتحدث فينا كبيرة ما فيش شك .. ولكن إحنا كمان بنحدث فيه خسائر فى الأفراد .. ومشكلة إسرائيل إن هى عندها خسارة الأفراد مهمة جداً .. لأن عددهم قليل .. ما عندهوش مانع يخسر ١٠ دبابات ولا يموت له عسكرى واحد .. إنما العسكرى يوجعه أكثر .. إحنا كنا بنتعبه فى حكاية الخسائر دى .. إنما فى نفس الوقت تعلمنا دروس كثيرة .. لأن إحنا علاوة على رفع الروح المعنوية .. التقاؤنا بالعدو .. شغنا إن العسكرى مش هو العسكرى الذى كان لا يهزم ولا يقهر وكذا وكذا .. وبيجرى ويبسيب السلاح بتاعه ويهرب .. ويبسيب الدبابة بتاعته وناخذ منهم أسرى ونرجع بيهم .. دى كان لها فوائد ما فيش شك » .
- **ويقول الفريق مذكور أبو العز :** « أنا لما جيت طبعاً عرفت إن لابد أن نحمى الطائرة وهى على الأرض أولاً .. فقلت لازم أصعل دشم .. لازم أزود المطارات .. وفى فترة الأربع شهور ونصف ما بم عمله .. وطبعاً بهذه المناسبة أذكر الفضل للأخ الكبير سليمان متولى .. لإتبه وقتها كان مسئولاً عن شركات الرصف .. وقام بمجهود كبير وضخم جداً .. وبهتية لى لا أحد يقدر يقدره إلا أنا والناس القريبين منى » .

* هل وجدت في خلال فترة توليك قيادة القوات الجوية أن القيادة العامة أو القيادة السياسية بتلبي طلباتكم ؟

* « طبعاً أبدأ .. لأن أنا طبعاً لما قلت للرئيس عبد الناصر قلت له أنا أريد ١٦ مليون جنيه بالتحديد علشان أبني دشماً ومطارات .. فقال للقائد العام أنا طبعاً لن أنكر اسمه .. قال له بكرة لازم تروح له شوف سيادتك أنا لن أسمح لنفسى ببقائى فى موقعى دقيقة واحدة .. وأنا جاي الحقيقة من أسوان علشان أشتغل وعلشان أعمل حاجة .. فإذا كنا ما أخذناش الدروس من سنة ٥٦ و سنة ٦٧ .. وبعدين نتجى تقول لى أجل العملية .. فأننا لا يمكن أبدأ ما لم ييجى لى النهارده دلوقتى حالاً هذا المبلغ أنا مش حاقعد .. هذا هو الأسلوب الذى يجب أن يتعامل به الإنسان .. أبدأ .. إنما لابد أن يكون هناك قيادة واعية تقدر العملية . »

* هل بعدت أم ابتعدت ؟

* « أنا بصراحة قدمت ٣ استقالات .. ولكن كان جمال عبد الناصر الله يرحمه كان دائماً يقول لى معلش .. وفعلاً كان يحاول .. وأصلاً كان الرئيس عبد الناصر بعد الهزيمة شخصيته كانت تعبانة جداً .. وكان مش هو الشخص الذى الواحد يعرفه .. فكان شخصية منهارة جداً .. وكان شخصية ضعيفة جداً .. فسببت القوات المسلحة بالضبط كده بعد أربع شهور ونصف .. لأن مش أنا الذى سيادتك بتسأل السؤال وتقول لى أنت طلعت ولا ؟ أنا فى الواقع أنا ما كانش ممكن للرئيس إن هو يطلعنى .. هو عاوزنى .. ماكانش ممكن .. إنما الروس طلبوا هذا .. قالوا لن نلبي أى طلبات من طبابتك ما لم منكور أبو العز وكذلك الجهاز بتاعه يخرج .. الكلام فى نهاية أكتوبر ١٩٦٧ .. فليفنا بإننا لازم نمشى أنا و ٢١ لواء معى .. الذى هم القيادة كلها الذى كانت موجودة معى .. وجابوا طبعاً قيادات من بعد كده ومسكت القوات الجوية بعد كده .. وهو حاول يرجعنى محافظاً .. فقلت له : يا ريس أرجع أقول للناس إيه .. أقول إن أنا فشلت وأكذب أو أقول الحقيقة ؟ والحقيقة مش مطلوب أن تذاع .. فأننا طبعاً كفاية الذى حصل وأرجوك أنا مش عاوز أشتغل لا محافظ .. وعرض علىّ مستشار .. قلت له : إيه يا ريس هو أنت عاوز استشارة .. طب المستشارين ما هم عندك كثير .. المستشار يعمل إيه والبركة فيك .. أنت مش عاوز استشارة .. وبعدين لا قبلت لا ده ولا ده .. فشاف إن أنا « معصلج » .. قال لى : اسمع لما أقول لك ده أمر والأمر ده حتنقه أنا قلت ما فيش إلا مستشار رئيس الجمهورية .. قلت له : يا ريس أنت لا تحب إن أحد يستقيل فأننا من النهارده أنا أقدم استقالتى وفى الوقت الذى أنت تشوفه مناسباً .. أنا تحت أمرك .. طبعاً كانت معاملة رغم هذا كله ورغم الكلام الذى الواحد بيقوله على .. الرئيس عبد الناصر فى الحقيقة كان مقدراً العمل الذى أنا عملته .. بس أنا كمان إنسان لا يمكن إنك تدبنى مسئولية .. يعنى المسئولية التى أخذتها فى إيدى .. وقلت له : أمانة الدولة فين يا ريس وأنا فى إيدى حاجة ؟! »

• وردت إسرائيل علينا ببناء خط بارليف الحصين على شط القناة ...

- وأسأل الفريق أول محمد فوزي : حرب الاستنزاف ردت عليها إسرائيل بخط بارليف .. هل هذا صحيح ؟
- « خط بارليف عبارة عن ٣٧ نقطة .. سميت ارتجالاً بخط بارليف .. وهى محاولة لتخنية الجندي الإسرائيلي تحت مواد صلبة حتى لا يكون عرضة لنيران المدفعية المصرية أو النيران المصرية من الجانب الغربى » .
- وبدأت تستخدم صواريخ سكاي هوك وتعاقبت على طائرات فانثوم كمدفعية طائرة تضرب بها كافة أنحاء مصر .. فتطول بها الصعيد ونجع حمادى والبحر الأحمر والزعفرانة ...
- ويقول الفريق الشاذلى : « الكلام ده سنة ٦٩ .. فيه واحد ضابط اقترح إن الطيران الإسرائيلي عندما يأتى لم يكن يضرب الموقع الهيكلى ويضرب الموقع الأصلي .. قال له إبن نحن نبذل .. واقتراح إننا نأخذ جهاز رادار حى ونضعه فى الهيكلى .. ولا نرسل كل هذا .. أى الدفاع الجوى والدفاع الأرضى والكلام ده علشان يخدع طيران العدو .. الطيران الإسرائيلي لم يبلغ الطعم وبلاستطلاع الالكترونى عرف إن ده الجهاز الهيكلى .. وإن ده مش الأصلي .. وكل ده فى ٧ أو ٨ عساكر .. فجاء بالليل بعملية بطائرتين هليوكوبتر فيهم ٤٠ عسكرى ونزلوا بعيد عن الرادار .. ونزلوا طبعاً لما نقول جهاز الرادار ٨ أفراد اللي يكون صاحى بالليل مثلاً فى حدود ٢ أو ٣ عساكر .. فدخلوا عليهم قتلهم ونبحوا الثانيين وقعدوا وقكوا الرادار وسافروا .. كل ده .. كانت عملية فظيعة .. بعدها جمال عبد الناصر أمر بعزل أحمد إسماعيل من قيادة الأركان يعنى .. فأنا رحلت على أثر ذلك .. وكلفت بأن أقود منطقة البحر الأحمر » .
- ويقول د . عبد العظيم رمضان : « وهكذا تحولت حرب الاستنزاف لإسرائيل إلى استنزاف مصر أيضاً .. وكانت خسائرننا كبيرة فى الأفراد والمعدات » .
- ويقول د . مصطفى خليل : « حرب الاستنزاف كانت بتستهلك الدخل القومى لمصر خلال هذه الفترة » .
- ويقول صلاح الدسوقي : « كمال رفعت ده كان صديق العمر .. فى آخر الأيام بعد ما خرجت أنا على المعاش لإننى كنت مختلفاً مع التوجه نحو الاتجاه الشيوعى وخرجت .. وأنا أصغر واحد فى الحكومة على المعاش .. رحت بيت الإسكندرية وكان « جارى » .. شوقته بعد هزيمة ٦٧ فى فنلندا .. قلت له ما كنتش أتصور إن أنا وأنت وكانت علاقتنا مع عزيز المصرى علاقة وطنية صرفة .. وكنا نقول إحنا وطنيين لحماية مصر مش لحماية نظام معين .. وكنا دائماً نقول إن أى نظام فى الدنيا له بداية وله نهاية .. كيف وصل النفوذ السوفيتى فى مصر إلى هذا الحد ؟ فكان رده إنه لولا وجود ١٠٠ طيار سوفيتى بيجمى سماء مصر .. لم يكن فيه نظام اسمه نظام عبد الناصر .. قلت له أنت تحولت إلى المحافظة على النظام مش المحافظة على مصر .. قال أعتبرها زى ما أنت عاوز .. كان ده آخر لقاء بعد كده رحت الأمم المتحدة بعد وفاة جمال عبد الناصر » .

• ويقول د. محمد الذكورى : « فى سنة ٦٩ رأس الرئيس السادات الوفد المفاوض للاتحاد السوفيتى .. وكان معنا السيد محمود رياض والفريق محمد فوزى وأنا كنت فى الوفد المصرى .. وقتنا لهم نريد المزيد من السلاح .. والرد الغريب الذى سمعته من قيادات الاتحاد السوفيتى ما تستعجلوش على السلاح .. وقتنا طيب كيف نستعيد أرضنا .. قالوا بالنضال السياسى السلمى المرير .. وكان واضح جداً إنهم كانوا عاوزينا نستمر على هذا الوضع حتى يضعوا قبضتهم على مصر لتحويلها إلى دولة شيوعية » .

• وبلغ الأمر ذروته فى ضرب مصنع « أبو زعبل » و « مدرسة بحر البقر » .. واستعمال قنابل النابالم الحارقة المحرمة دولياً ..

• وجدير بالذكر أيضاً أنه حدثت بطولات كبيرة فى تلك المرحلة .. كما حدثت قبلها .. ففى أكتوبر سنة ١٩٦٧ تم إغراق المدمرة إيلات .. ووقعت معركة « رأس العش » فى نفس العام ...

• ويقول أمين هويدى : « يكفى كان عبد الناصر يقول إن جهازى يجول ويصول داخل إسرائيل من ناحية مقاومة الغير فى محاولاتهم للحصول على معلومات .. من ناحية الأعمال الإيجابية يعنى ما زال ينشر فى الصحف ما يقال من ضرب « الحفار » فى غرب إفريقيا .. إحنا اللي قننا به .. وكان فيه محاولتين محاولة فاشلة فى داكار .. وتكررت المحاولة فى أبيدجان وضربناه وتمرناه حتى لا يتجه جنوباً ليندس مياها فى البحر الأحمر » .

• ويقول أحمد كامل : « جهاز المخابرات جهاز وطنى من الدرجة الأولى .. وقام بأعمال مبهرة على الرغم من حداثة إنشائه .. وأفنكر شوية الحاجات التى أعلن عنها أخيراً ظهرت كتمثيلات أو كحلقات تليفزيونية عن أعمال المخابرات .. زى « الهجان » و « زى » الثعلب .. » دموع فى عيون وقحة .. كل هذه الحوادث كانت حقيقية قامت بها أجهزة المخابرات .. فلا يصح إطلاقاً بأننا نقول المخابرات كلها سيئة .. بينما فيه أعمال عظيمة جداً عُمِلت ولا يمكن أن نقول إن المخابرات بخطأ فرد أو فردين أو ثلاثة من مئات الأفراد الذين يعملون .. أن نشوه عمل الآخرين الذين عملوا بجد لصالح الوطن وقدراته .. ده الموقف بالنسبة للمخابرات بالنسبة لجمال عبد الناصر .. وقيل كلام كثير جداً وإحنا من أحسن ناس الذين نُعبّر أى كلام .. سقطت دولة المخابرات .. كأن المخابرات كانت دولة داخل الدولة .. وهذا غير حقيقى بالمره .. إنما فيه أخطاء .. أيوه فيه أخطاء حدثت من بعض أفراد أساءوا إلى الجهاز .. وأسأوا إلى العمل » .

• ويقول الفريق أول محمد فوزى : « العدو يوم ٥ يونيو أخذ الأرض ودمر السلاح ونسى يعمل حاجة تالئة هى مقومة من مقومات الحرب وهى إرادة المقاتل .. بدليل إن المعركة خلصت يوم ١٩٦٧/٦/١٨ يوم ٧/١ أى بعد ٢٢ يوم حصلت معركة صغيرة اسمها « رأس العش » .. نفس الجندى .. نفس السلاح .. نفس الظروف ما فيش حاجة متغيرة .. لأ إن القائد اتغير .. مش بس قائد القوات المسلحة .. والجو بقى فيه هدف آخر اللي هو إزالة آثار العدوان .. وفى هذه المعركة باننت أصالة الجندى .. أنا أنكرك بكلمة قلناها قبل كده فى أن معركة ٦٧ تمت

دون مواجهة بين الجندى المصرى والإسرائيلى .. يعنى الجنود المصريين انسحبوا من سيناء بالجملة دون أن يقابلوا العدو الإسرائيلى .. هذه المعركة أظهرت صلاحية الجندى الحقيقية .. لا تدريب ولا عمل .. هو بعد ٢٢ يوم ومش معقول حاجة تحصل .. نفس الجندى قابل العدو وكانت الظروف تغير القائد .. فى نفس الوقت اللى كان فيه ديان مستنى جمال عبد الناصر أن يستسلم .. كان جمال عبد الناصر وأخذ القرار اللى جاء بعد كده من الأمة العربية : إزالة آثار العدوان .. يعنى تحرير الأرض » .

• وأسأل المشير عبد الفتى الجمسى : بعد حرب ٦٧ حضرتك كنت رئيس جهاز الاستطلاع فى المخابرات الحربية .. فمأذا تذكر عن هذه الفترة ؟

• « كان من ضمن أسباب هزيمة حرب يونيو ٦٧ إنه ما كانش عندنا معلومات عن العدو .. المعلومات الكافية التى تؤهلنا أن ندخل فى صراع عسكري وياه .. فى الوقت اللى كانت إسرائيل تتمتع فيه بجميع المزايا التى حققت لها المعلومات الكافية .. وما كانش عندنا جهاز استطلاع .. لأنه كان الاعتماد فقط على إدارة المخابرات الحربية .. اتخذ القرار بإنشاء جهاز للاستطلاع كجزء من إدارة المخابرات الحربية .. يتولى الحصول على المعلومات عن العدو بالقوة العسكرية وليس بالوسائل المتخفية .. بمعنى أصبح أساليب المخابرات الحربية تسير فى مجالها وإحنا كقوات مسلحة عملنا هذه الوحدات التى أنجزت مهامها بكفاءة فى حرب الاستنزاف وبعد حرب الاستنزاف حتى حرب أكتوبر ٧٣ » .

• ويقول عبد المحسن أبو النور : « غالبية وقت عبد الناصر خصصها للقوات المسلحة .. واصطدم كثيراً مع الاتحاد السوفيتى علشان يجيبوا له أحدث الأسلحة .. وبعدين التدريب .. وبعدين تشكيل الجيش ثانى من عناصر متعلمة حتى يحسن تدريبها وأسرع وقت مستطاع .. ولم يسكت على هذا الأساس .. ما قالش إحنا لسه نجهز الجيش .. من أول شهر حصلت فيه النكسة بدأ الصراع بيننا وبين إسرائيل .. لم يتوقف .. بدأ فى معركة البحرية .. بدأ فى معركة رأس العش .. ابتدا بعد كل هذا كل يوم يتسع وكان الهدف من هذا .. أولاً الحفاظ على الروح المعنوية للبلد وإننا لم نصبح جثة هامدة .. ثانياً منع إسرائيل من إنها تركز أقدامها » .

• وأسأل محمد نسيم : البطولات التى وقعت فى فترة حرب الاستنزاف شاركت فيها .. تقدر تحكى لنا عن هذه الفترة ؟

• « يعنى دائماً هى كانت الحرب سجلاً لعمل المخابرات بالنسبة للدول العربية وإسرائيل ومصر على القمة .. طبعاً هذا الموضوع وزى ما يقولوا الجماعة المحترفين فى مجموعة العمل السرية .. يعنى هى حرب دهاء ما بين القوتين .. مصر وإسرائيل .. بالنسبة لعمليات التجسس .. وكانوا بيعملوا حساب للمخابرات المصرية .. لأن الجهاز له تاريخه وله كيانه .. « رأفت الهجان » طبعاً ده ظهر خلاص .. لكن الأول خالص أنا وصالح مرسى عملنا قصة « الحفار » .. يعنى الجهاز وافق على إخراجها وإنها تصور للرأى العام العربى والمصرى .. فأرادوا أن يردوا وبدأوا يعملون عن طريق أحد الصحفيين عندهم فى أحد الصحف

الإسرائيلية .. يقول لك إن هذا كان عميلاً مزدوجاً .. وطبعاً لكي يشككوا في العملية .. فكلمني الأخ عادل حمودة وصالح مرسى قالوا لي هل نرد ؟ فكان رد الأخ عادل حمودة وصالح مرسى ثم أنا شخصياً رديت عليهم قلت لهم .. مثل هذه العمليات ضخمة يعني عملية مثل « رأفت الهجان » لما تيجي تقول لي ده عمل مزدوج .. أتحداكم أن تظهروا صورته أو اعترافاته وخلافه وإنه كان يعمل معاكم .. ده مرة واحد .. مرة ٢ إنتم سنة ٦٧ وصلتم للقناة وكان الوضع في مصر في حالة يرثى لها .. طيب لو في ذلك الوقت حاجة زى كده كنتم أعلنتموها وأظن كنتم بقى ممكن تجيئون الأرض .. مرة ٣ إنتم انضربتم ضربة تمام في ٧٣ .. إذن .. إنتم كده لا ده اتعمل ولاده اتعمل !! »

● **ومرت شهور الصمود على جنودنا ببطء وهم في خنادقهم .. وبدأت شهور الردع .. ونجح عبد الناصر في أن يبني نظاماً دفاعياً قوياً هو حائط الصواريخ سام ٣ الذى اكتمل فى أوائل سنة ٧٠ ..**

• **ويقول د . عبد العظيم رمضان :** « هو الذى بُنى فى أسوأ الظروف تحت قُصف الطائرات والمدافع الإسرائيلية ويتضحيات مصرية كبيرة .. وكان الغرض الأول منه إيقاف هجمات الطيران الإسرائيلي » .

• **ويقول كمال الدين حسين :** « عبد الناصر صمم أن يبني حائط صواريخ بكل التضحيات .. وفعل فيه ناس عسكريين ومدنيين كثير ضحوا بأنفسهم علشان الصواريخ دى .. بس دى كانت الملاذ الأخير علشان نقدر نحمل بلدنا من الطيران الإسرائيلي ونحمي جيشنا من الطيران الإسرائيلي .. إذا كان فيه عمليات هجوم تحصل بعد كده زى ما كان جمال عبد الناصر ما كان بيهيى .. كان لازم الصواريخ علشان تمهد للعمليات وتحمل الضرب وقواتنا .. فكان أى هجوم مرتبطاً بالصواريخ اللي سوف تحميه وتحمل البلد كلها » .

• **ويقول سعد الشاذلى :** « نقدر نقول إن بناء قواعد الدفاع الجوى استكملت فى حوالى يونيو ٧٠ .. استكملت بالقدر الذى يستطيع أن يتحدى إسرائيل .. إنما عمر الدفاع ما ينتهى .. باستمرار لما بيكون عندك بتزيد .. إنما وصل إلى مرحلة الشباب ومرحلة القدرة على التصدى لطيران العدو سنة ٧٠ .. وفى يونيو ٧٠ استطاع الدفاع الجوى أن يوقع ١٢ طائرة .. فهو النهارده العيد القومى للدفاع الجوى .. أسبوع تصافى الطائرات .. كل ده يؤكد إن الروس ساعدونا مساعدة جادة فى خلال الفترة من ٦٧ لغاية ٧٣ » .

• **وأسأل الفريق أول محمد فوزى :** هل الاتحاد السوفيتى كان يقدم لمصر أسلحة دفاعية وليست هجومية ؟

• « هذا خطأ .. لم يحدث هذا .. كان الكلام ده قبل ٦٧ .. بعد ٦٧ الاتحاد السوفيتى انفتح فتحة لم تكن ننصورها .. كان يخبىء علينا الحاجة .. ما بقاش يخبىء فى الآخر .. سنة ٧٠ إن إحنا بقينا أحسن من أى دولة أخرى فى حلف وارسو .. وأنا أخرجت فى يوم من الأيام جاء وزير الخارجية ووزير التجارة التشيكى يزورنا .. فقال أحب أشوف المعامل اللي عندكم .. لأن إحنا

كنا طالبين ورشة كبيرة علشان نصمم موتورات الطائرات ونصمم أشياء فى الصاروخ .. عدلناه هنا فى مصر بدلاً من إرساله إلى روسيا .. التشيك كانوا جيعملوا المصنع .. رحنا إلى حلوان وقال ماذا يعمل هذا ؟ ووجدنا خبير روسى طالع على السلم ليركب موتور طائرة جديد رقم ٥١١ محل الموتور القديم .. ظهر إن التشيك لم يأخذوا هذا الموتور .. الرجل سافر هناك وعمل أزمة دبلوماسية .. أنا اللي وقعت فيها إني أنا وديت الرجل وفرجته على كل هذا .. إحنا وصلنا فى الآخر إلى إن إحنا أخذنا الإلكترونيات وأخذنا الأسلحة الحديثة ببلاش تقريباً .. وأنا قلت لك كلمة بلاش دى هى ترجمة للحالة المالية التى كانت موجودة بين مصر وبين الاتحاد السوفيتى .. كنا نأخذها بثلاث ثمنها اللي بيكتب على الورقة نأخذها سياسياً ولا نأخذها تجارياً .. يعنى أنا قارنت ما بين « الإيف ١٦ » والميج ٢١ .. الناحية المالية تندم لو تعرف إن الربع مليون اللي كنا ندفعه فى الميج ٢١ نط وبقي ٢٤ مليون دولار .. هذا الموقف يستحق الإشادة أو التدوين .. كلمة الحروب المكلفة وكلمة الاتحاد السوفيتى كان علينا دون نتيجة التسليم .. الكلام ده كله خطأ .. كنا نأخذ الفلوس ونعمل تعاقدات ونعمل أقساط .. والفائدة لا تزيد عن ٢% .. وكل الكلام الرسمى يتخط على الورق .. لكن الحقيقة لأ .. الحقيقة كنا بنحط على النوتة .. حتى النوتة دى اصطلاح أنا عملته زى ما كنت بأجيب لأمى حلوة طحينية بـ ٣ أبيض زمان ..

• بس كنت حضرتك لازم تسدها فى الآخر ؟

• « طيب إحنا الوقت لغاية عبد الناصر لم ندفع ولا مليماً .. إيه رأيك حاجة ثانية .. بريجنيف جاء سنة ٦٤ علشان يأخذ ود الثورة المصرية وود عبد الناصر وراح ماسك القلم الأحمر وراح شاطب على ٥٠% من الديون العسكرية الموجودة على مصر من سنة ٥٥ .. حافظ إسماعيل جاب أول دفعة سنة ٥٥ من التشيك هى روسية ٥٠% وبعدين أسلحة ٥٦ جاءت مجاناً .. خسرتها .. أسلحة ٦٧ اللي خسرتها جاءت لنا مجاناً .. لم توضع على « اللسة » .. دى كانت دفاعية .. لكن بعد ٦٧ كل الأسلحة جاءت لنا .. كلمة دفاعية وهجومية موضوع لبس عند أى رجل مدنى .. الدبابة نقول عليها هجومية ولا دفاعية .. تنفع هنا وتنفع هنا .. وهى الدفاع أو الهجوم » .

• وعلى الصعيد العربى ثالث دول الخليج استقلالها تبعاً .. وكانت إنجلترا قد انسحبت سنة ١٩٦٨ من اليمن الجنوبي بعد تدعيم مصر له .. كما قامت الثورة فى كل من الصومال والسودان .. وكان صدام حسين نائباً لرئيس حزب البعث العراقى أيامها .. وفى هذه الفترة رحبت مصر بثورة الفاتح من سبتمبر فى ليبيا بقيادة الملازم أول معمر القذافى سنة ١٩٦٩ ...

• ويقول أمين شاکر : « فى ليبيا .. الملك السنوسى كان رجلاً طيباً .. لكن البطانة اللي حول كانت بطانة سيئة جداً واستغلالية .. وكانوا مسيطرين على تجارة البلد سيطرة تامة .. وأنا قايلاً مرتين وكلمته إنه يختار من الشباب الجديد أو اللي اتعلم بره .. بعض العناصر مع الناس »

يعملوا نوع من التوازن .. هو ما كانش عنده مانع .. لكن ما قدرش .. لذلك الثورة اللي قام بها العقيد القذافي دى مش ثورة .. ده رجل طلع ضرب طلقتين زى فرح العمدة وقع النظام والجماعة اللي حول الملك السنوسى .. كانوا « طفحانين » فلوس حيقعدوا يعملوا إيه تانى .. حطوا رجلهم فى الطائرة وراحوا مشيو .. ولما جاء هنا الحقيقة إن عبد الناصر أكرم ضيافته جداً وأعطينا له قصرأ فى الإسكندرية وسكن فيه » .

• **ويقول الفريق سعد الشاذلى :** « الدول الخليجية كلها أخذت استقلالها تباعأ فى خلال السنتين التى تبعت هذه الحرب » .

• **ويقول محمد فائق :** « بعد ٦٧ لما قامت الثورة فى السودان ثم فى ليبيا وكذلك الصومال .. وكانت كل مرة هذه الثورات تعلن فى أول بيان إنها امتدادأ لثورة يوليو ومصر مهزومة بهذا الشكل وفيها النكسة أو الهزيمة العسكرية الخطيرة فى ٦٧ .. لاشك هذا يرفع المعنويات وكان له تأثير كبير فى معنوياتنا عموماً » .

• **ويقول البكوش :** « بعد قيام الثورة طبعأ ليبيا كانت لتوها قد استقلت .. وكانت حاجتها أشد إلى المعونات .. وقدمت ثورة ٥٢ لليبيا مساعدات مادية ومساعدات بشرية لدرجة إننى أستطيع القول بأن كل الذين كانوا يدرسون فى ليبيا ويتولون الوظائف عقب الاستقلال فى سنة ٥٢ كانوا إما ليبين تعلموا فى مصر .. وإما مصريين .. وزاد عدد البعثات الليبية إلى الجامعة المصرية وتواصلت الصلات ونشطت .. بالنسبة للتأثير الإعلامى طبعأ لم يكن لمصر قبل سنة ٥٢ نشاط إعلامى ملحوظ خارج مصر ولكن من خصال ثورة ٥٢ إنها وسعت من نشاطها الإعلامى فكان لهذا تأثيره الكبير فى ليبيا وفى تكوين الرأى العام فيها سواء حسبنا هذا لها أو عليها » .

• **قيل إن الرئيس عبد الناصر قال للعقيد معمر القذافي إنه يرى فيه شبابه .. ما مدي صحة هذا القول ؟**

• « نعم سمعت من عدة مصادر أن الرئيس عبد الناصر قال هذا الكلام للعقيد القذافي .. بل أضيف إلى ذلك أن الرئيس عبد الناصر فى زيارته لليبيا وفى خطاب معن قال للعقيد القذافي أنت أمين القومية العربية .. ولعل هذه المقولة أو تلك هى التى جعلت الأخ العقيد يعوم فى بحار من الطموحات غير الواقعية .. ودفعت به إلى اتخاذ سياسات خاطئة وضارة ضد مصر وضد بلاد عربية كثيرة .. فهى التى ألهمته أن أمامه فرصة لحكم المنطقة العربية كلها .. وطبعأ هذه طموحات غير واقعية بالنسبة لليبيا وإمكاناتها .. وغير واقعية أكثر بالنسبة لمؤهلات الأخ العقيد » .

• **وأسأل د . عبد العزيز حجازى :** بعد نكسة ٦٧ حضرتك توليت وزارة المالية .. فماذا وجدت وماذا فعلت ؟

• « أول حاجة الجيش والخسائر التى حدثت من خلال معركة ٦٧ كانت عاززة تجديد كلها .. يعنى عملية دعم للمعركة .. وبالتالي كان ده رقم واحد .. المعركة والأمن القومى نمرة واحد ..

نمرة ٢ الخطط .. التنمية كانت بحاجة من ٦٠ إلى ٦٥ وهى من أكبر الخطط التى نفذت وجاءت بنتائج إيجابية كبيرة .. إنما بعد التكلفة بدأت أرقام الاستثمار تقل .. كان علينا واجب واحد أن نحافظ على المستوى المعقول .. لأن الأولوية للمعركة .. إذن الموازنة تخدم المعركة ولا تخدم التنمية بالقدر الذى كان متوقع أن يحدث » .

• **ويقول مصطفى كامل مراد :** « النظام جاء بعد ٦٧ أصابه نوع من الارتباك .. عبد الناصر كان يعانى من الهزيمة وكانت حالته الصحية مش تمام .. وكان يحاول إن هو يجمع قواته وإمكانياته علشان عملية الهجوم المضاد بتاع اليهود وبما سمي بحرب الاستنزاف .. فكانت الأوضاع متدهورة من الناحية السياسية ومن الناحية العسكرية أيضا ولذلك كان فيه ارتباك وبدأوا يتطرفوا ناحية الاشتراكية أكثر » .

• **ورغم حرج الأوضاع الاقتصادية الداخلية .. فقد تضافرت كل الجهود لإزالة آثار العدوان وأصبح « لا صوت يعلو على صوت المعركة » ...**

• **ويقول أحمد حمروش :** « قد انخفض الاستثمار عام ١٩٦٨ بمعدل ٥٠٪ عن مستواه سنة ١٩٦٧ .. واستمر الانخفاض بعد ذلك كنتيجة للآزمات الشديدة فى النقد الأجنبى منذ عام ١٩٦٣ » .

• **وركز صوت الفن على دعم المجهود الحربى الذى بلغ مليارات الدولارات ...**

• **ويقول جمال حماد :** « قامت كوكب الشرق أم كلثوم برحلاتها لهذا الغرض إلى دول كثيرة لجمع التبرعات » .

• **ويقول سامى شرف :** « اهتمامه بالمسرح والمسرح الناقد مش المسرح المؤيد .. ما المؤيد أنت تقدر تجيب مليون واحد يؤيدك بالترغيب أو بالترهيب .. لكن تجيب مسرحاً ناقداً مش سهل .. « سكة السلامة » وأعمالاً لألفريد فرج و « شىء من الخوف » وعطريس وفؤادة .. ومن أول ما سمع عليها الرئيس وشاف ثروت عكاشة وقال له عطريس ده يعنى جمال عبد الناصر وفؤادة دى مصر .. عمل لجنة من عبد القادر حاتم وأمين هويدى وسامى شرف وشعراوى جمعة وثروت عكاشة .. ورحنا شغفناها فى عرض خاص .. ثروت عكاشة كان متبنياً رأى المنع هو والمشير عبد الحكيم عامر .. ومعانا على نور الدين التائب العام فى ذلك الوقت .. مش عارف جاء معنا ليه .. شغفناها يومها .. واحد بيقتد المجتمع .. طيب ما هو لازم يفتد المجتمع .. قلنا للرئيس .. وجدنا الرئيس شافها فى عرض خاص وقال .. ده يمشى يا ثروت ما يتقاش مغفلًا .. اهتمام بالسينما .. بفيلم « بورسعيد » وفيلم « ميرامار » .. أفلام كثيرة .. كل ده كان فى الستينات .. وكان الرئيس يهتم بها ويطلب إنه أكبر عدد ممكن من أعضاء الاتحاد الاشتراكي إنهم يروحوا كسبايين كتوجيه حزبى .. إن أكبر عدد يروح ليه .. علشان يتعلم .. أنت لما كل واحد يقولك براقو أنت ماشى صح كله تمام يا ريس ما دى بتضيق .. إنما لما بأنافطه وبأعارضك والمعارضة مش للمعارضة .. ما هو فيه معارضة بناءة مبنية على مفاهيم معينة » .

• **ويقول أحمد المصرى :** « اسمح لى أقول لك حاجة غريبة جداً .. فى ظل ٦٧ كنت تولد

هينة المسرح فى ظل هذه الفترة .. وفى ظل عبد الناصر المجروح فى ٦٧ قدمت أكثر من عشرة مسرحيات كلها تناقش الوضع » .

• **ويقول محمد فائق :** « بعد الحرب بدأنا نفوق .. الحقيقة فيه تغيير شامل فى خطة الإعلام بالكامل ناحية الحقيقة والأخبار التى تقال .. لدرجة إن حتى إحنا طبعاً وزارة الإعلام .. لا تملك إنها تغير البيانات العسكرية .. أعطيك بيانات عسكرية تنيعها لا تغير فيها .. ولكن كان فيه اهتمام بالتدقيق فى الأخبار بشكل كبير جداً .. قابلتنا مشكلة النغمة الصحيحة .. طيب إحنا عارفين بعد حرب ٦٧ مش حانقدر نحارب .. قبل سنتين أو ثلاثة على الأقل .. والبني آدم لا يتحمل إنك تفضل تشحن فيه لغاية ما تحارب لأنه عارف حيسنتى سنيناً .. مستحيل .. الناس بتطالب بالنغمة الصحيحة فكانت أزمة أو مشكلة كبيرة جداً .. وبالمناسبة وسط الهيصه دى عملنا محطة الموسيقى والبرنامج الثانى .. وعشان أخرج من هذا المأزق بأقول طيب يتعمل برنامج اسمه « ما يطلبه المقاتلون » .. ونزل الميكروفون للخنادق وبقينا نسأل العساكر » .

• **ومصير أحمد سعيد ؟**

• **« بعد ٦٧ هو جاء لى .. كان متعباً جداً .. قال خلاص .. وأنا لا أطلب من واحد يمस्क الميكروفون ويقول كلمة لا يؤمن بها .. اللى مش مؤمن بهذه الكلمة بدون مساس بأى شيء .. لكن الحقيقة هو ما قدرش يتحمل بعد ٦٧ .. فى الإعلام ما كانش فيه الضغط على الناس .. كانت دعوة أكثر منها موظفين يقولوا وينفذوا سياسة معينة .. فكان فيه تعليمات طبعاً فى السياسة .. لكن كان ببني بعد كده متروكاً للشخص التعليقات فى مساحة كبيرة من الحرية » .**

• **وحدثت محاولة للتخفيف من حدة الصراع العربى الإسرائيلى ...**

• **ويقول محسن محمد :** « قال خالد محبى الدين وهو فى باريس إنه سمع عن اتصالات بين عبد الناصر وإسرائيل .. ولا أستبعد أن يكون أحمد حمروش قد ذهب والتقى بجولد مان بناء على رغبة عبد الناصر .. وأنا رأى الشخصى أن عبد الناصر كان لا يمانع فى التصالح مع إسرائيل ولكن .. كانت تنقصه الشجاعة » .

• **وأسأل أحمد حمروش :** هل كنت تجرى اتصالات بجولد مان رئيس المجلس اليهودى الأعلى من أجل السلام .. وكانت هذه الاتصالات سرية بناء على تعليمات الرئيس عبد الناصر ؟

• **« كنت فى زيارة لفرنسا وحاولوا أن يفسروا الوضع فى إسرائيل بأنه ليس كله أسوداً .. وليس موحداً .. وأن هناك فرصة داخل المجتمع الإسرائيلى من أجل السلام .. وأبلغت الرئيس عبد الناصر الذى وافق للهدف التالى : تشتت حرب الاستنزاف كل يوم ضغطاً على إسرائيل وتسبب لها ضحايا تؤرقها .. والفرصة سانحة لإظهار أن نية مصر هى السلام .. وقابلت جولد مان عن طريق صديق مصرى الأصل صحفى بجريدة « لوموند » بعد أن وصلته دعوة من خلال الرئيس اليوغوسلافى تيتو لتسهيل زيارته لمصر .. وأشر الرئيس عبد الناصر « اعتقد صداقة معه » .. وصرح جولد مان عن رغبته فى السلام .. بينما ثارت جولدا مائير بسبب هذا**

التصريح .. وهبت عاصفة من المظاهرات فى إسرائيل تهتف « إلى المطبخ يا جولدا .. إلى القاهرة يا جولدا مان » .. وكان الرئيس قد أعلن ذلك للمؤتمر القومى للاتحاد الاشتراكى » .

• ولم يعد مع عبد الناصر أحد من زملائه القدامى غير السادات والشافعى ..

• ويقول إسماعيل فريد : « انتهى حكم عبد الناصر .. وليس معه ضابط من الضباط الأحرار فى الحكم من وزراء وخلافه .. كل اللى إنت شفتهم دول من خارج الضباط الأحرار .. عبد المحسن أبو النور كان انفصل عننا هو وحماة محسن .. ولما تيجى تلاقى على صبرى .. كل دول لم يكونوا أحراراً .. وانتهى حكم عبد الناصر وهو الضابط الحر الوحيد .. حتى أنور السادات نائب رئيس الجمهورية وحسين الشافعى .. دول انضموا للثورة .. لم يكونوا فى تنظيمات الأحرار .. بخلاف ما ذكر أنور السادات فى كتاب « البحث عن الذات » .. ولا حسين الشافعى .. هو رجل عظيم ودخل فى الثورة وهو اللى خرج بسلاح السوارى وسلاح الدبابات » .

• ويقول أحمد أبو الفتح : « غضب عبد الناصر من السادات .. وابتعد السادات ومكث فى قريته .. ثم أراد أن يصلح بينه وبين الرئيس فأرسل إليه من يخبره أنه مريض فى فراش الموت ويتمنى أن يرى عبد الناصر .. فذهب عبد الناصر ليلقى عليه النظرة الأخيرة .. فاستقبله السادات بالجلباب على باب البيت .. فقال له عبد الناصر : الله ما إنت فى كامل صحتك أهو .. أمال إيه الحكاية ؟ فقال له السادات لما شفتك ردت فى الروح .. هو اللى يشوفك يمرض يا ريس !! » .

• ويقول د . محمود جامع : « كان عبد الناصر يمر بوعكة صحية .. وكان السادات من أكثر الناس حرصاً على زيارته باستمرار .. ويجلس معه ويسامره ويرفقه عنه » .

• وتقول د . هدى عبد الناصر : « الرئيس السادات ما كانش بيبجى لنا كثيراً .. وكان قرب لوالدى فى الفترة الأخيرة ولم نشعر بابتعاد السيد حسين الشافعى عن والدى » .

• ويقول د . محمود جامع : « ليس صحيحاً على الإطلاق ما قاله سامى شرف فى كتابه أن الرئيس عبد الناصر قد أعاد السادات نائباً له من أجل منحه معاش كبير » .

• وأسأل سامى شرف : من كانوا نواب الرئيس عبد الناصر فى أواخر شهور فى حياته ؟
• « أنور السادات » .

• وحسين الشافعى ؟

• « لأ حسين الشافعى لم يكن نائباً .. حسين الشافعى مع احترامى وتقديرى العظيم له يقولون إنه لم يصدر قراراً بتعيينه .. لكن الذى كان نائباً لرئيس الجمهورية الذى صدر قرار بتعيينه نائباً لرئيس الجمهورية فى ديسمبر سنة ١٩٦٩ كان أنور السادات .. وفى إعادة التنظيم نشر تعيين أنور السادات .. لا على صبرى ولا حسين الشافعى أعيد تعيينهما » .

- متى كان هذا ؟
- « فى ديسمبر سنة ١٩٦٩ » .
- بينما يقول حسين الشافعى : « استمرت العلاقة مع عبد الناصر على ما يرام .. لإنى عمري ما أخذت أى موضوع كعملية شخصية .. لإنى رجل لى دورى فى الثورة ومؤسس .. ومش معقول إن أى حاجة يراها القائد أنا أخذها بصفة شخصية .. بأعتبر إن دورى فى هذا الموضوع انتهى لحد هنا وخلص .. إنما أن أخذها شخصية وأستقيل هى دى الحقيقة اللى خسرت الثورة .. طاقات كبيرة جداً كان من الممكن أن لا نخسرها .. طبعاً فى الجانب الآخر كان فيه ناس ببحرخوا بيتمنوا إن أى واحد من هذه المجموعة يطلع .. كما أقول هناك من صنعوا الثورة .. من صنعوا الثورة فهم حريصون عليها .. أما من صنعتهم الثورة فهم حريصون على أنفسهم » .
- وأسأل سامى شرف : طيب حسين الشافعى لماذا ترك يا فندم ؟
- « ساب يعنى إيه ؟ »
- ما بقاش نائب ؟
- « لا أعرف .. افرض النهارده أنا بأشتغل عندك فى الشركة بتاعتك وأنت حبيت ورحت عامل إعادة تنظيم الشركة وما حطنتيش فيها » .
- خلافك مع الرئيس أنور السادات عندما كان نائباً فى أثناء سفر الرئيس عبد الناصر .. ماذا تقول عنه ؟
- « مش خناقة .. هو تصرف خاطيء ما تعودتش عليه .. ومش أنا بس وكان بيشاركنى فى هذا الأخ أمين هويدى والأخ شعراوى جمعة الله يرحمه .. فيه تصرف خطأ إحنا لا اتعودنا عليه ولا نقبله .. وقلنا له ما يصحش .. قلما رجع الرئيس بلغناه واتلغى القرار » .
- ويقول خالد محبى الدين : « أنور السادات الوحيد اللى فضل نائب رئيس جمهورية مع الرئيس عبد الناصر » .
- وأسأل سامى شرف : الرئيس فى سنوات عمره الأخيرة لم يبق معه إلا قلة قليلة .. وتخلى هو عن زملائه ؟
- « أنا الشخص الوحيد .. وآسف على كلمة أنا للمرة الثانية .. أنا الشخص الوحيد وحط تحت كلمة الوحيد مائة خط الذى عمل مع جمال عبد الناصر من يوم ٢٣ يوليو لغاية ٢٨ سبتمبر .. لغاية لحظة وفاته .. لغاية ما توفى .. ولم أغادر مكانى .. الآخرين .. أمسك من أول النواب لأصغر الناس فيه اللى قعد فى بيته .. وفيه اللى ترك الوزارة .. وفيه اللى انتقل له فى الظل شوية .. الخ .. أنا الوحيد اللى فضل معاه .. أنا لست مثل « شمشورش » (سلطان الجان) على جمال عبد الناصر .. لأ جمال عبد الناصر أخذننى بذراعى ويعملنى ويجهدنى مش بالواسطة

ولا بالمحسوبية ولا بقرابة ولا بمعرفة سابقة .. إلا التدريس درس لى وكان أستاذى .. وبقيت معه على هذا الأساس .

• أفهم من كده أنك كنت الشخص الوحيد المصيب فى كل المجموعة التى عملت مع الرئيس ؟
• والله اللى ماسك لى ذلة يقولها لى .

• أنا قصدى « كل من عمل مع الرئيس » لم يكمل معه مثلك ؟

• كل من حول عبد الناصر إذا كان شخص أبعد أو وُضع فى الظل فترة أو استريح شوية أو ما كملش .. فيبكون هناك أسباب .. الأسباب هى العمل مش أسباب يسموها شخصية .. يعنى جمال عبد الناصر ما كانش يجيى للأستاذ طارق حبيب ويقول له كرافتك مش عجبانى ويقول له أقعد فى بيتكم .. لأ ما يبقاش جمال عبد الناصر .. إنما النهارده حضرتك بتشتغل مع جمال عبد الناصر واركتبت خطأ .. يقولك ١ .. المرة الثانية يقولك ٢ .. المرة الثالثة يقولك ما أفدرش أتعاون معاك .

• حتى ولو كان خطأ بهدف وطنى أو منطقى أو غير مقصود ؟

• الأخطاء بتختلف .. فيه أخطاء مقصودة .. وفيه أخطاء غير مقصودة .

• واختلاف وجهة النظر ؟

• عمره ما كان اختلاف وجهة النظر سبباً فى تنحية أحد .. عمرها ما حصلت .

• وسافر ناصر إلى موسكو للعلاج وعاد فأعاد علاقته ببغدادى .. بعد أن أبعد الشافعى ...

• ويقول كمال الدين حسين : « أنا عارف قبل ما يموت مباشرة كان علاقته كويسة مع البغدادى .. وكان قال له وأنا واثق من هذا الكلام .. إننا سوف نجتمع بعد مؤتمر العرب اللى حصل فى القاهرة .. وكان سوف يعينه نائباً لرئيس الجمهورية ورئيساً للوزراء .. وكان قطعاً سوف يحصل تغيير فى مصر .. لكن القدر لم يمهل أن يعمل هذه العملية » .

• ويقول عبد اللطيف بغدادى : « كان أبنى طارق فى الجامعة الأمريكية .. وبعدين ببدرس كمبيوتر .. زى ما نقول حسب اللائحة بتاعتهم ممكن ينسحب من « الكورس » بتاعه ويروح يدرس ويرجع تانى يعيد قيد نفسه .. عمل كده .. وأخذ « كورس » فى الكمبيوتر وكان عاوز يشتغل فى الكمبيوتر بعد الظهور وجيب لنفسه دخلاً .. لما راح يعيد قيد نفسه تانى قالوا آسفين فيه أوامر بعدم إعادة قيدك .. كان حكى لى فأنا لم أصدق .. قلت له مين اللى قال لك ده .. قال لى دكتور مسئول عن شؤون الكلية كان بيشتغل معايا زمان .. فطلبته قلت له صحيح .. قال لى آه .. دى أوامر جاءت لنا .. قلت له يعنى عاوزين ترموا أبنى فى الشارع .. لأن البديل بعد ٣ سنين فى الجامعة الأمريكية أسفره بره .. ما دام إنتم قافلين الباب عليه .. أنا إمكانياتى لا تسمح لى إنى أسفره بره .. قال لى على العموم ما أفدرش أعمل حاجة الدكتور نزيه ضيف مسافر بره أمريكا وزمانه جاى .. حبيجى بعد يومين .. نزيه ضيف كان الحارس على الجامعة

الأمريكية .. وكان يشتغل معاً في التخطيط أيام ما كنت وزيراً .. فقلت طب ما هو يقول
دى تعليمات برضه .. فقلت كاتب جواب لعبد الناصر .. ثم طلبنى فى التليفون بعد ثلاثة أربع
ساعة قال أنا كنت مسافراً .. وأنا قلت لسامى شرف وأمين هويدى وشعراوى يشوفوا العملية
دى وحأعطى التعليمات .. على العموم هو قبل كده .. محمد نصير زوج ابنتى جاء من شغله
من لندن .. فحجزه وما رجعت تانى » .

* وكان إيه المقصود بالحاجات دى ؟

* « بضايقتى .. وإنى اتصل به وأذل نفسى وأكلمه وأرجوه .. وفى حديثنا جاب سيرة محمد
نصير .. كان هيكل ظليه يشتغل معاه ويمسك الكمبيوتر فى الأهرام .. وجاء قال لى أشتغل
قلت له اشتغل .. المهم قال لى عبد الناصر نصير بيأخذ خمسة آلاف جنيه فى السنة .. وكان
ده أقصى مرتب .. وقال لى أهو يشتغل دلوقتى وبيأخذ مرتب كويس وقال لى مر على ..
رحت له البيت ومشينا فى الجنينة وأول كلمة قالها لى أنت كنت على حق بالنسبة لعبد الحكيم ..
وقلت له يستحسن تبقى أنت تكلمنى أنا قاضى .. ابتدئنا نلتقى يومياً .. الكلام ده فى يناير ..
وبعدين رحنا إلى الإسكندرية فيقينا نلتقى يومياً » .

* « ويضيف عبد اللطيف بغدادى : « عبد الناصر كان عاوز يطلب منى أن نتعاون .. ومش
عاوزنى أرفض .. عاوزنى أخدھا بالهداوة شوية شوية .. ومن هنا بدأ الحوار .. وبعد عزومة
ابنتى صملت لهم عشاء هنا .. بقينا نتناقش .. لقيت المعلومات اللى عندى أكثر من إخوانا اللى
بيشتغلوا معاه .. جينا بعد كده .. فى الإسكندرية قال أنا عاوز أريح شوية وعاوز أنفرغ للجيش
والاستعداد للمعركة وعاوز أحد يشيل عنى العبء الداخلى » .

* « ويقول رشاد مهنا : « هات واحد بقى مع جمال عبد الناصر إذا كنت تعرف .. أنور السادات
بقى مع جمال عبد الناصر .. يعنى أدركها » .

* تفكر ليه ؟

* « لأن أنور السادات له عمق فى التفكير وله هدف فى حياته يصل إليه بأى وسيلة أى كانت » .

* « ويقول محمد أحمد : « يعنى لما كنا فى روسيا فى رحلة العلاج .. وكان معانا أطباء
مصريين .. وجميع الأطباء اللى هناك قالوا له أولاً لا تشتغل أكثر من ٤ ساعات فى اليوم ..
تأخذ يومين فى الأسبوع راحة لا تشتغل بعد الظهر خالص .. تأخذ شهرين فى السنة راحة ..
قال لهم الله إنن أصبحت أنا لا أصالح .. أنا مستعد أنزل على طول والبلد يستلمها أحد تانى ..
ويكون يصلح .. قالوا له لأ لو مشيت على الكلام ده تصلح .. اللى حصل بعد ما رجعنا بدل
ما كان بيشتغل ١٤ ساعة فى اليوم بقى يشتغل ٤٠ ساعة فى اليوم .. يعنى إن خلص الاجتماع
مثلاً الساعة ١,٣٠ - ٢ تلاقيه بيص للفريق فوزى ويقول له يا سيادة الفريق أرجو لا تنسى تمام
٥,٣٠ على ما نروح تبقى الساعة ٣ لأن فيه دورية طالعة فى عمليات الاستنزاف فعاوز أطمئن
الدورية دى طلعت ولا لأ .. مش جاى لى نوم .. دول رجعوا ولا ما رجعوش حصل إيه عملوا

إيه .. فكان شغله زاد مش قل .. ويعدين فى ليبيا حصل إيه .. بعث جاب القذافى وأعوانه وإداهم اللي فيه التصيب .. وقال لهم روحوا .. وقال لى مش عاوز تكلمنى .. ولا تلفون » .

• **ويقول تحسين بشير :** « الرئيس السادات .. وهو نائب رئيس كان شخصاً غير مهم فى الدولة .. يعنى أمور الحكم لم تكن فى يده رغم إن عبد الناصر اختاره فى مجلس الثورة بسبب إنه أيده طول عمره تأييداً كاملاً .. لإن السادات كل بطل يشتغل فى السياسة .. وهو نائب رئيس جاء رئيس تحرير النيوزويك للشئون الخارجية وكان رجلاً كبيراً ورحنا قابلناه فى بيته فى الهرم .. وكان لا يقول شيئاً كان كلامه فيه عموميات مملة إلى درجة إننى ابتديت أنام لإن الدنيا حر .. وبتاع النيوزويك معاه المصور .. وكل شوية يصورنى علشان يصحبنى .. لإنه كان كلاماً لا يعنى شيئاً .. إلا إنه ما أن تولى الحكم - وتولية الحكم لم يكن سهلاً - انقلب تماماً » .

• **ويقول أحمد حمروش :** « عاد على صبرى للظهور من جديد .. لإن وجوده مهم فى نجاح لعبة التوازن التى يلعبها جمال عبد الناصر .. ويوم ٢٦ أبريل ١٩٧٠ حدث تغييراً وزارياً .. عين فيه كل من حسن التهامى وسعد زايد وسامى شرف ووزراء دولة .. كما عين محمد حسنين هيكل وزيراً للإعلام .. وعين أيضاً حافظ إسماعيل رئيساً لهيئة المخابرات العامة » .

• **وأسأل د . محمد الدكرورى :** كنت مدير مكتب الرئيس السادات قبل ما يبنى رئيس .. وكنت أمين المنيا .. ما الذى تذكره عن هذه الفترة ؟

• « أنا كنت أميناً للمنيا .. ولم تكن بينى وبين الرئيس السادات علاقة سابقة .. وبعد النكسة بدأ الرئيس جمال عبد الناصر بعيد تنظيم الاتحاد الاشتراكى والتقى بأمناء المحافظات وناقشهم عن أسباب النكسة .. ولما أعاد تنظيم الاتحاد الاشتراكى كان الرئيس السادات فى هذه المرحلة أقرب واحد له وقتها .. كنت أعمل مع الرئيس عبد الناصر فى سكرتارية المعلومات .. وطلبنى السادات لمقابلته .. فذهبت إلى بيته فى الهرم وقال لى يا محمد إنى كلفت بلجنة سياسية مكلفة بمقابلة الدكتور الأتاسى رئيس سوريا .. يعنى أنا لطبيعى كصعيدى استجبت وذهبنا فعلاً إلى سوريا .. وكنا أربعة : السادات وأنا والمرحوم محمد عبد السلام والدكتور محمود جامع .. والتقينا بالرئيس الأتاسى رئيس سوريا .. وهذه الرحلة نجحت فى إذابة الثلوج .. فى هذه الفترة كان الرئيس جمال عبد الناصر قد اشتد عليه المرض .. وكان يسير دفة الأمور مجموعة على رأسها السيد على صبرى تضم السيد سامى شرف والسيد أمين هويدى والسيد شعراوى جمعة .. كان الرئيس عبد الناصر لابد أن يختار شخص يخفف عنه .. وكان وقتها اختار السادات نائباً لرئيس الجمهورية .. وأعتقد إنه قد أوصى لعبد الناصر ألا يعطى للرئيس السادات حجم أكبر من اللازم .. وقتها مرض السادات ولزم الفراش فى ميت أبو الكوم » .

• **وفى أغسطس عام ١٩٧٠** ظهرت مبادرة روجرز بعدما طلب عبد الناصر من نيكسون حل الصراع العربى الإسرائيلى فى خطاب أول مايو .. وكانت المبادرة تحمل تحولاً محتملاً فى السياسة الأمريكية بالنسبة لقضية الشرق الأوسط ...

• **ويقول خالد محبى الدين :** « أخذ عبد الناصر وقته علشان بينى قواته المسلحة وقيل مشروع

روجرز علشان يظهر حسن نواياه للأمريكان ويكسب وقتاً .. فى الوقت اللي كان فيه الطيران الإسرائيلى يضرب مواقع الصواريخ التى تبني فوجدها فرصة إنه يعمل بهدوء حتى يبني قواعد الصواريخ .. كان الدفاع الجوى يعتبره قصيته الرئيسية .. ما كانش عاوز يخش الحرب وينضرب له قناطر أو سد .. لإنه عارف أهمية ده لمصر .. فكان عاوز ما يخش المعركة إلا وجميع سدود مصر والسد العالى محمى بشبكة صواريخ لا يمكن اختراقها .. هو من هنا اتعلم وأخذ خبرة وبدأ يمارس الفن السياسى .. ولو كان عاش كان عمل حاجات كثيرة » .

• **وبيضيف حمروش :** « انعكاس قبول المبادرة من وجهة النظر العربية كان سلبياً .. وانجرف البعض إلى رفضها .. وأعلنت ذلك كل من سوريا والعراق .. وإذاعة « صوت فلسطين » اتهمت الذين قبلوا المبادرة بالخيانة » .

• **وأسأل د . أشرف غربال :** مشروع روجرز وقبول الرئيس عبد الناصر له ؟

• **كتابة التاريخ من الناس الللى شاركت فى وضع التاريخ مهمة لمعرفة الحقائق بتفاصيلها ..** كشفت الكتب إن كيسنجر كان ضد الخط الللى ماشى فيه روجرز .. وبالتالي كان فيه سياستين خارجيتين من واشنطن فى ذلك الوقت : سياسة خارجة من الخارجية الأمريكية تعكس آراء وليم روجرز .. ومن ضمنها مشروع روجرز المشهور وده فى كثير من نواحيه كان يعمل إلى إعطاء العرب حقهم .. ومشروع كيسنجر الللى بيقول للإسرائيليين ولا يهتمكم من كل كلام روجرز .. السياسة بتوضع فى البيت الأبيض .. وبالتالي خلوا روجرز يقول ما يقوله ده لاستهلاك العرب .. أما إحنا ماشيين على سياسة تأييد إسرائيل ١٠٠% .. أعتمد أن هذه الصورة لم تكن غالبة عن عبد الناصر .. إنما بجانب هذه الصورة مشروع روجرز كان يحتوى على نقاط لا شك إنها فى صالح الموقف والحق العربى .. إنما بالكامل لأ .. ولهذا كنا حريصين على قبوله .. إنما فى نفس الوقت على المطالبة باستكمالها فيما يتعلق بالحق الفلسطينى .. فيما يتعلق بالانسحاب من بقية الأراضي العربية » .

• **كما صدر قرار وقف إطلاق النار يوم ٨ أغسطس سنة ١٩٧٠ .. وانتهت حرب الاستنزاف وتكاثفها الإجمالية حوالى ٨ مليارات جنيه كما قال الأستاذ هيكل وزير الإعلام فى ذلك الوقت ...**

• **وعلت نبرة هجوم على مصر من بعض القيادات العربية ...**

• **وأصدر عبد الناصر قراراً بوقف إذاعة صوت فلسطين من القاهرة بعد هجوم الفلسطينيين عليه ...**

• **وأسأل سامى شرف :** أمر الرئيس عبد الناصر ب« صوت فلسطين » .. لماذا ؟

• **« كان فيه اتفاق بين الرئيس عبد الناصر والفلسطينيين من أول الثورة .. كان عاوز كل يوم طلقة تنضرب .. ابتدا فى أيلول الأسود .. يعنى فى بداية سبتمبر ٤ - ٥ سبتمبر .. عمليات**

مرافقة سياسية تضرب القضية العامة .. عملية خطف الطائرات وتدميرها بدون اتفاق مسبق ولا تنسيق .. الغرض منه إحراج القيادة المصرية بعد مؤتمر الخرطوم .. وللأسف الشديد اللى قام بهذه العملية مجموعة تشكل جبهة من بعض العناصر من الإخوة الفلسطينيين .. سواء كانوا الحزبيين أو من تنظيمات أخرى .. دلوقتي أنت النهارده تتيح لهؤلاء الناس صوت نافذة على العالم .. من هذه النافذة تضربت أو من وراء هذه النافذة بيضريك .. مش بيضريك أنت كشخص .. بيضرب القضية .. أبسط إجراء أنت بتتخذ هو إغلاق هذه النافذة .. ولو كان بصفة مؤقتة .. وده كان الراى يعنى بصفة مؤقتة لغاية الأمور ما تتعدل .

• ويقول سعيد كمال : « عاتب الرئيس عبد الناصر عرفات .. مش هو شخصياً .. إنما الموقف الفلسطيني عموماً » .

• وإذاعة فلسطين أغلقت فى هذا الوقت ؟

• « أغلقت لإنها تحدثت فى اتجاه معادى إلى حد ما .. أو نقول مخالف .. واستجابت لنقد الشارع الخاطئ .. وأن كلام عبد الناصر كلام خطأ .. يعنى اللى يقولوا إن عبد الناصر كان ضد السلام مختلين .. واتضح فيما بعد إن قبول روجرز كان موضوعاً تكتيكياً لا أكثر ولا أقل .. ومع ذلك قامت مظاهرات فى عمان وفى الأرض المحتلة .. مما أدى إلى إغلاق إذاعة فلسطين » .

• ويضيف محمد فائق : « الحقيقة الفترة دى كانت فترة دقيقة .. وكانت مليانة بمشاكل كثيرة جداً » .

• واجتمع الرئيس عبد الناصر بالرؤساء والملوك العرب فى القاهرة بسبب الخلاف الأردنى الفلسطينى وأحداث « أيلول الأسود » ...

• وأسأل عبد المجيد فريد : نتحدث عن الساعات الأخيرة فى حياة الرئيس عبد الناصر وأنت حضرتها .. تفكر هذه الفترة .. هذه الساعات ؟

• « فاكّر مؤتمر أيلول الأسود اللى هو الخمسة أيام الأخيرة من عمر عبد الناصر لما حصلت مشاكل لمنظمة التحرير الفلسطينية مع الملك حسين .. وحصل ضرب وقتل ودم .. وبعدين عبد الناصر طلب فى اتصالات تليفونية من بعض الملوك والرؤساء إن ما يحلش المشكلة العربية إلا بأيدى عربية .. إلا إنه استدعاهم فجّمْ وأخذنا الهيلتون كرناسة لتكون مقر إقامة واجتماعات .. فبعد ما حصل اجتماع اليوم الأول أو الثانى قال الملك فيصل .. الله يرحمه كان شخص محترم جداً .. وكانوا اصطلحوا وكل منهم يتق فى الآخر ويحترمه احتراماً كبيراً جداً .. الملك فيصل قال نخليها الملوك والرؤساء التسعة بس .. فاللى أذكّره جيداً كله طلع : أنور السادات .. نواب الرئيس .. الأمراء الللى كانوا مع فيصل .. رؤساء الوزراء .. وبقي فقط ٩ ملوك ورؤساء .. والملك حسين وباسر عرفات .. بعدين الملك فيصل قال نخلّى عبد المجيد لإنه جيقابل الصحفيين مش إحنا .. أو يطلع بيان رسمى أو متحدث رسمى ضرورى يبقى فيه أحد .. وبقيت فى المكان مع الـ ٩ ملوك والرؤساء .. هو كان بييجى له الام شديدة فى ذلك الوقت

من السكر في أعصاب رجله .. كان طلب منهم إن كل ساعة ونصف أو ساعتين يمشى ..
يعنى ما نفتحش الباب لإن الصحفيين بره والصحفيين الأجانب .. وكانت الدنيا والموقف السياسى
ساخن .. الأسطول السادس عاوز يتدخل .. وسوريا عاوزة تنزل دبابات ضد الأردن .. والعملية
كانت ساخنة جداً .. والرئيس القذافى مسلح .. وياسر عرفات قال على الملك حسين ..
نصاب .. قال له إنا كنا نصابين .. وإذا كان فيه دكثرة الدكثرة بتكشف علينا كنا .. معمر
القذافى والرئيس عبد الناصر قال له كده .. فكل ساعتين كان يمشى .. فكنت أنا المصرى
الوحيد الموجود .. كنا فى قاعة ألف ليلة وليلة الـ ٩ ملوك ورؤساء .. فكان يمشى لمدة ١٠
دقائق تقريباً وكنت أمشى جانبه .. بس لقيت وجهه وكأنه بيومت فى ذلك الوقت .. أنا فى رأى
إن بدأت الوفاة قبلها بيومين أو ثلاثة .. من الموقف .. لأن كنت بأعطي له برقيات يشوفها بقاعة
الموقف فى عمان ما بين قتلى واعتداءات على أطفال .. واعتداءات على نساء .. جرحى ..
فهو ماشى كان يقول لى لولا هزيمة ٦٧ ماكانش حصل هذا الذبح وهذا القتل الللى حصل فى
عمان .. فبدأ يحمل نفسه .. وتحميل النفس صعب جداً .. محاسبة النفس من أفسى
المحاسبات .. فوجهه كان كله بيلعب عصبياً .. فتصورت إن الأحداث كانت أكبر من إن قلبه
يحملها .. وبدأت المشاكل قبل وفاته بيومين .. بـ ٤٨ ساعة » .

• **ويقول تحسين بشير :** « أضرب لك مثلاً .. ليلة ما مات كنا نائمين فى لوكانده هيلتون .. كان
ده مؤتمر القاهرة الللى عمله لإنقاذ الفلسطينيين من « أيلول الأسود » .. وكان هيكل وزيراً
للخارجية بالنيابة .. لأن محمود رياض كان مسافراً .. وجاء متأخراً .. الساعة ٣ صباحاً خلص
المؤتمر .. أعضاء مجلس الثورة لابسين البيجانات وقاعدين فى الصالون .. كان الرئيس يعمل
مؤتمراته فى الهيلتون علشان يطلع يشوف النيل .. علشان فى بيته ما يشوفش حاجة .. وأنا
قاعد مع محمد أحمد سكرتيره بأعد البرقيات الللى طالبيها الرئيس لكل رئيس عربى .. أخبط
على بابيه أخبط على هيكل .. أوديله مسودة البرقية يراجعها هيكل ولكن بعد كده يأخذها الرئيس
عبد الناصر ويراجعها كلمة كلمة .. كان ده شئ غريب جداً بالنسبة لى لإن البرقيات ليست
بهذه الأهمية ومع ذلك أنا كاتبها وهيكل يراجعها .. كان هو يراجع كلمة كلمة .. فعندنا كده لغاية
الساعة ٣ صباحاً .. وأعضاء مجلس الثورة قاعدين منتظرينه لما يخلص الشغل يقعد معاهم ..
فى الصباح نزلت معاه فى الأسانسير وكان بيضحك وينكت .. وكان حسن الخولى كان المندوب
الخاص الله يرحمه كان موجوداً .. كان بيدو إن قال حاجة مش دقيقة .. وكان عبد الناصر دقيقاً
جداً .. وكان فى الأسانسير فزغه بإيده .. كانت إيده طويلة قوى عبد الناصر .. وقال له
حتهرب منى فىن .. ما فيش .. فى الأسانسير .. وحسن صبرى يحاول يلاقى أعذاراً
وتبريراً .. إلى درجة .. عندما طلبونى العصر وقالوا لى أروح لمكتبى فى التلفزيون وأعد
قرآن لجميع المحطات الإذاعية والتلفزيون تصورت إن الذى مات كان حرم الرئيس مش
الرئيس .. فلم يكن هذا الرجل الللى كان كله حياة الساعة ١١ صباحاً .. لم أكن متصوراً إنه
حيومت فى تلك الساعة » .

• **وأسأل محمد أحمد :** كان إيه مرضه ؟

* « أول حاجة السكر .. وبعد كده جاءتة ذبحة صدرية » .

* تتذكر الساعات الأخيرة في حياة عبد الناصر ؟

* « طبعاً كان تعباًناً جداً ومرهق وكل حاجة .. وآخر يوم تصادف إنى كنت تعبان وحرارتي ٤٠ .. ويعدين هو وإحنا مروحين على البيت قال لى روح أنت بقي .. قلت له مش عارف مين حنوصله .. قال لى لأ .. كان إنسان جداً .. ويعدين روحنا أنا وأظن كان معاه فؤاد عبد الحى .. كان زميلنا .. ولأول مرة فى تاريخ حياته طلب العربية عند الطائرة .. عمرها ما تحصل أبداً .. كان يوصل المسئول لحد سلم الطائرة ويعدين يرجع يقف مع المودعين لحد الطائرة ما تتحرك .. ويعدين يركب عربيته .. أول مرة يركب العربية من عند الطائرة .. وفؤاد عبد الحى كلمنى قال لى عاوزين دكائرة .. كلمت دكتور منصور فايز كان بيشفوه وأظن على البدرى الله يرحمه .. ونزلت جرى على هناك لقيته مبتسم كده .. والدكائرة بيشفوه .. وروحه صعدت إلى خالقها .. وحاولوا بأجهزة مش عارف بتعمل إيه .. عملية تدليك القلب ما فيش فائدة .. كان جاء هيكل والسيد أنور السادات والسيد حسين الشافعى وسامى وشعراوى » .

* ويقول سعيد كمال : « الذى أذكره جيداً كنت فى بهو الهيتلون .. وكان الوفد سافر برئاسة حسين الشافعى على ما أعتقد ومجموعة من القادة العرب .. الشيخ سعد عبد الله .. سافروا إلى عمان لكى يأتوا بالرئيس ياسر عرفات رئيس منظمة التحرير إبان أحداث أيلول .. وقد نجحوا فى إحضاره واستقبلته فى فندق الهيتلون .. إذ كان الزعماء العرب متعفين بناء على دعوة الرئيس جمال عبد الناصر .. ولما سأل أبو عمار عن الرئيس قالوا هو الحقيقة نائم .. أنا الحقيقة وأنا موجود لقيت ابن عمه المدام عنده وهو دكتور من الأساتذة الجراحين .. فقلت له إيه الحكاية .. قال لى الرئيس تعبان شوية ونائم .. ماقالهش لى كده بوضوح .. قال تعبان .. على بال ما صحى الساعة ٧ مساء كان الرئيس أبو عمار ارتاح شوية أيضاً من الرحلة .. وكان معاه الشهيد على حسن سلامة .. ودخلنا إحنا الثلاثة على الرئيس عبد الناصر وكان يتقطع أنما مما وقع .. وقال لياسر عرفات : هذه الجماعة ربنا يسهل عليهم حلفاء جورج حبش اللى قادوك .. جورج حبش وجوانمه والبعثيين اللى قادوك إلى معركة مواجهة مع النظام الأردنى بالأخطاء القوية .. وأنا كنت بأنقطع وكان عندكم خلط فى مسألة قبولي لمبادرة روجرز وما وقع فى الأردن من تداعيات ضد مصر وضد العرب .. الكلام ده كان سنة ٧٠ يعنى .. المهم قال له : إيه رأيك أرجعها لك فى ظرف ٢٠ أسبوع .. دُهل ياسر عرفات .. وكانت كلمة المفاوضات عند المصريين من المحرمات .. قال له : لأ خليك فى مهمتك ولحقوق الشعب الفلسطينى المنصوص عليها فى الأمم المتحدة .. إنما إحنا مهمتنا إزالة آثار العدوان .. وكان فى ذهنه طبعاً ما وقع من حرب الاستنزاف وتقريباً الحلول السياسية التى تسترجع ذلك .. فأبو عمار قال للرئيس : ياريت إذا كنت أنا خارج اللعبة .. لعبة المفاوضات بين الضفة وغزة والكيان الفلسطينى على هذه الأجزاء من فلسطين .. يا حبذا طالما أنا لا أوقع صلحاً مع الإسرائيلىين فى المنطقة .. ثم تغيرت الظروف والأحداث تغيرت واستشهد الرئيس عبد الناصر .. وما بقى هذه قصة طويلة عريضة لن يتوقف عندها قطار الحرب والسلام » .

• وهنا وقعت المفاجأة .. مات الزعيم .. عن ٥٢ عاماً ...

• وأسأل هدى عبد الناصر : حدثيني عن ظروف وفاة الرئيس ؟

• « موضوع مؤلم رغم مرور ٢٧ سنة .. كنت قد غادرت منزله وذهبت لبيتى وبالتالى لم أكن موجودة لحظتها .. وكنت حامل فى ابنى .. وأختى كلمنى وقالت « بابا تعبان قوى » .. أتارى كان توفى .. ولما ذهبت وجدت الناس تنزل من غرفته خلاص .. وقالوا لازم بسرعة ننقله إلى القبة قبل إذاعة الخبر وبداية الزحام .. ومش ممكن أنسى وهم طالعين به على سلم قصر القبة حيث كنت قد اعتدت رؤيته .. لقد كان أمراً مؤلماً خصوصاً أنه رحل فجأة وكان عنده ٥٢ سنة » .

• وأسأل جمال السادات : يوم وفاة الرئيس عبد الناصر .. أين كان الرئيس السادات وماذا فعل ؟

• « كان موجوداً فى البيت .. هو كان من الصدمات الشديدة اللي إحنا شفناها أثرت عليه .. كان باين عليه من طريقة كلامه من ناحية .. ومظهره أمامنا كان متأثراً بوفاة الرئيس عبد الناصر » .

• ويقول شمس بدران : « أنا بعد ما خرجت من السجن على طول .. جاء لى د . رفاعى كامل اللي هو كان رئيس الخدمات الطبية .. ورفاعى كامل ده يخاف من خياله .. وكان صاحبي جداً .. بس لما دخلت وجاءت القضية هو ومراته انقطعوا خالص عننا .. بعد ما خرجت من السجن جاء لى د . رفاعى كامل .. فقلت دى حاجة غريبة جداً جاى علشان يقول لى الكلمتين دول .. قال لى عبد الناصر مات نتيجة إهمال أو تعمد .. أو .. وقال لى أنا ماضتش على شهادة الوفاة لإنها غلط .. اللي فيها غلط .. فقلت له إزاي .. قال لى جاله حالة .. أنا كاتب الكلام ده .. هو كان عنده السكر وعنده الضغط .. وعلاج دى بيتعارض مع علاج ده .. فالدكتور أعطى له الحاجة المضادة » .

• الدكتور مين ؟

• « دكتور الخدمات الطبية اللي كان معاه » .

• مش الدكتور رفاعى ؟

• « لأ مش رفاعى .. رفاعى جابوه علشان يمضى الشهادة مع اللي ماضيين » .

• هو كان فيه الدكتور الصاوى حبيب موجوداً أيامها .. وكان د . زكى الرملى .. وكان فيه الدكتور بطاطا ؟

• « واحد كان موجود معاه فى المطار .. هى حصلت له الأزمة فى المطار .. أزمة قلب أو أزمة سكر .. لو كان عنده حاجة مثلاً فى القلب .. إداله دواء السكر .. دواء السكر يتعارض مع دواء القلب » .

- * يعنى شخصه غلط وعالجه غلط ؟
- * « عالجه غلط .. موته » .
- * طبيب ما يمكن ده نتيجة لجهل ؟
- * « يا جهل يا تعمد .. ويمكن تبقى تعمد » .
- * تعمد لمصلحة مين ؟
- * « سامى شرف » .
- * وسامى شرف عاوز يبقى إيه .. يبقى رئيس جمهورية مثلاً ؟
- * « على صبرى .. وسامى شرف !! » .
- * وأسأل سامى شرف : يوم وفاة الرئيس عبد الناصر .. قيل إنهم غلطوا فى تشخيص وعكته أو مرضه فتسبب ذلك فى وفاته ؟
- * « والله أنا مش فنى علشان أرد على حصرتك الإجابة الدقيقة فى هذا الموضوع .. ولكن أقدر أحلل سياسياً إن الرئيس عبد الناصر مر بظروف صحية الرسم البياني بتاعها فى النازل من ٦٩ لغاية ٧٠ .. ده التحليل السياسى .. وبعدين الجهد الذى بذله فى مؤتمر القمة من ١٩ سبتمبر إلى ٢٨ سبتمبر ده جهد تنوء به الجبال .. هو كان المؤتمر قائم عليه .. هو تحمل كل الأعباء بتاعة هذا المؤتمر بشخصه بذاته .. وفاة الرئيس عبد الناصر كتب فيها تقرير رسمى أعده مجموعة من الأطباء المعالجين للرئيس جمال عبد الناصر واللى كانوا معه ساعة الوفاة .. كون أن يأتى دكتور لم يكن يعالج جمال عبد الناصر ... » .
- * بس د . رفاعى كامل كان طبيبه ؟
- * « لم يكن يعالج جمال عبد الناصر .. عمره ما عالج الرئيس .. ووقع على التقرير بذاته لإن إحنا كنا نزلنا الدكاترة .. بعد ما إحنا نزلنا من فوق من الدور الثانى لتحت .. الدكاترة فعدوا مع بعض يكتبوا تقريراً ولا أحد قدم له ورقة ولا أحد قال له إمضى ولا أحد قال له حاجة .. كان ليه مايمضيتى .. هو مش قاصر ومش صغير .. أنا النهارده لما أكون وزير الرئاسة وتيجى تجربنى على اتخاذ إجراء .. يا أستقيل يا إما أقولك مش موافق مش لاعب .. كده ولا إيه .. بعد كده كوني عاوز أعمل قصة الله أعلم بقى لحساب مين أو بغرض إيه .. ده موضوع آخر .. بعد وفاة الرئيس عبد الناصر كل اللى كانوا فوق كان حسين الشافعى .. على صبرى .. محمد فوزى .. شعراوى جمعه .. سامى شرف .. محمد حسنين هيكل .. بس أتور السادات جاء بعد ما إحنا نزلنا .. جاء متأخراً .. إحنا السنة اللى كنا فوق بس .. خرجنا من أوضة نوم الرئيس عبد الناصر .. الدكاترة كانوا قاعدين فى الأرضة الملحقة بأوضة نوم الرئيس .. وإحنا نازلين انتفضلوا اكتبوا التقرير بتاعكم .. والدكتور رفاعى كامل كان من ضمنهم » .

• وأسأل محمود فهميم : آخر يوم فى حياة الرئيس كنت معه ؟

• الرئيس عارف كانت والدتى بتحتضر فى مستشفى المعادى .. وكنت الوحيد الذى يزورها ولما رجعت كلمونى فى التليفون قالوا لى تعالى بسرعة .. قلت لازم فيه حادث أو حاجة مهمة جداً حصلت وشعرت إن الرئيس توفى .. رحنت علشان أدخل البيت ماعرفتش .. قعدت مدة طويلة حتى دخلت البيت .. كأن العالم كانوا مجتمعين فى البيت .. الناس زى النمل ..

• ويقول تحسين بشير : « الحدث الذى لا يمكن أن أنساه .. هو ليلة موت الرئيس عبد الناصر .. الرئيس مات وأنا كنت فى التليفزيون وحطينا القرآن فى جميع الخطوط .. حوالى الساعة ٧ جاء لنا الرئيس السادات وكان نائباً للرئيس فى ذلك الوقت .. ماکانش محبياً .. ماکانش هو الحاكم .. وطلع الدور التاسع كنا فى انتظاره ومعه ورقة قرأتها بسرعة .. حيعلن فيها للشعب وفاة الرئيس عبد الناصر .. وقرأ الورقة .. وشرب فنجان شاي صغير .. وعقبال ما نزل من الدور التاسع الى الدور الأرضى فى مبنى التليفزيون فى ماسبيرو .. كان الشعب بيتجمع حوالى ٣٠٠ فرد حول التليفزيون .. وابتدوا يبكوا ويندبوا على الرئيس عبد الناصر وزعيمنا .. بالليل الدنيا أظلمت .. كانوا طافيين الأنوار فى جريدة الأهرام .. كان الأستاذ هيكل بيكتب عزاءه وكنت قاعد مع الله يرحمه يوسف السباعى .. ولويس عوض كان قال إن شعبية عبد الناصر لم تكن شعبية بل كانت بين الطبقة الوسطى والمتعلمين .. وأنا بأقول لا .. دى شعبية لأنهم الطبقات المهورة والمستضعفين فى الأرض .. هو اتكلم باسمهم وفى رأى لم يتكلم بعد أسبوع أحداً بمن فيهم اللي استعمل اللفظ ده .. وقعدنا نتناقش فى الحكاية دى الساعة ٣ صباحاً .. نزلنا من « الأهرام » كانت الدنيا مظلمة .. فوجدت المنظر الآتى .. سيدة فقيرة لابسة أسود شايلة ولد هنا وثلاث أولاد هنا وماشية الساعة ٣ صباحاً تقول .. يا سبعى .. يا ضبعى .. على وفاة الرئيس عبد الناصر ..

• ويقول عبد المجيد فريد : « حضرت بعد الوفاة بعد نقل الجثمان من البيت إلى القبة .. بس وقتها كنت لسه بأخلص تقفيل المؤتمر ما حضرتش البيت » .

• وأسأل جيهان السادات : الرئيس السادات عرف إزاي بوفاة الرئيس عبد الناصر ؟

• « إحنا كنا موجودين فى البيت .. وكان فيه مؤتمر موجوداً فى فندق هيلتون بالضبط .. وهذا المؤتمر كان يخلص يومه .. وبعدين هو كلم أنور السادات وقال له أنا سوف أجي أتعضى عندك .. كان المفروض هو جاي البيت .. الساعة ٦ أو ٧ ضرب تليفون وسألوا عليه وقالوا عاوزينه فى بيت الرئيس جمال عبد الناصر .. على طول هو قال أكيد هو تعبنا وغير رايه ومش حييجي النهارده .. فانا سوف أروح له » .

• ويقول محمد أحمد : « هو كشخص ماکانش بهمه .. إنما هو كان دائم القول: اوعوا تكونوا

- فاكرين إنتم بتحرسونى الحارس ربنا .. ده أنا أما حاتيحي ساعتى حاتيحي مافيش أحد فيكم
حيقدر يمنعها إطلاقاً .. إنما كان انتماؤه العربى .. مات بهذا الانتماء فى نفسه وفى عرويته .
- **يقول أحمد حمروش :** « بكى رفاق عبد الناصر عليه .. فى نفس اليوم الذى بكى هو فيه منذ
تسع سنوات لفراق سوريا » .
- **واحتشدت جموع غفيرة ملأت القاهرة لتلقى نظرة أخيرة على الرئيس جمال عبد الناصر ...**

مات ناصر .. عاش السادات

- **تقرر دفن جثمان الرئيس عبد الناصر يوم ٣٠ سبتمبر سنة ١٩٧٠ .. بعد جنازة مهيبه ..**
- **ويقول جمال حماد :** « هدى عبد الناصر وشقيقها خالد أبديا رغبتهما للسادات في فتح الخزانة الخاصة بوالدهما .. وطلب السادات من هدى أن تجمع كل الأوراق الخاصة بالدولة وترسلها إليه » .
- **وتقول د . هدى عبد الناصر :** « طلبنا من الرئيس السادات أن نفتح الخزانة وأن يستلم ما يخص الدولة .. ووجدنا متعلقات خاصة بوالدى فقال لى راجعها وقد كان وأعدت ما يخص الدولة منها » .
- **قيل إن بدأ خفية قد لعبت بمحتوياتها ؟**
- **« الخزانة فتحت مرة بحضور الرئيس السادات .. وبعد ذلك مرة أخرى فتحناها فوجدنا كل حاجة ملخطة .. ووالدى كان منظماً جداً .. وعرفنا أن هناك من حاول أخذ بعض محتوياتها .. وأجرى الأستاذ على نور الدين تحقيقاً ولم تعرف الحقيقة .. وأنا لا أستطيع أن أحكم هل هذه اليد كانت مصرية أو تابعة لجهة أجنبية ولكن من المؤكد أنه أخذ منها ما أراد أن يأخذه » .**
- **ويقول سامى شرف :** « بعد الوفاة بأيام قال لى أنور السادات نريد جرد الخزانة .. وجاء أنور السادات .. وجاءت مدام تحية وجاءت هدى وخالد وحاتم صادق وأشرف مروان ومنى .. كل العائلة كانت موجودة ومحمد أحمد كان موجوداً أيضاً .. وفتح محمد أحمد الخزانة » .
- **ومن كان معه مفتاح الخزانة ؟**
- **« أنا لم أرى المفتاح قط .. والمرتين أو الثلاث التى كلفنى فيها الرئيس عبد الناصر بفتح الخزانة .. كانت مفتوحة .. المهم الكل كان موجوداً .. وعملت محضراً .. ولم أدخل منزل الرئيس منذ اللحظة التى تم فيها فتح الخزانة حتى الآن .. وقد أسفر التحقيق عن صدور قرار من النائب العام بحفظ القضية وإن الخزانة لم تفتح » .**

- وأسأل محمد أحمد : مين كان كاتم أسرارهِ الأول غيرك ؟
- « أنا لا أعرف .. إنما شخصياً أنا وهو الوحيدان بس اللي نعرف خزنته مافيش أحد تانى » .
- وأسأل عبد المجيد فريد : مفاتيح خزانة الرئيس مع من كانت فى لحظة الوفاة ؟
- ما أعرفش الحقيقة .. ما كنتش موجوداً فى البيت .. أتصور أنها كانت مع سامى شرف .. مجرد تصور ولكنى لا أعرف » .
- وأسأل عبد المحسن أبو النور : خزانة الرئيس عبد الناصر اختفت مفاتيحها بعد وفاته ؟
- « مفاتيحها لم تكن مع أحد من اللي اتمسكوا وراحوا السجن فيما بعد » .
- أنا بأتكلم عن يوم رحيل الرئيس ؟
- « كان أنور السادات وكان كل الناس اللي موجودة فى بيت عبد الناصر هناك » .
- وبضيف سامى شرف : « أنور السادات فى قضية مايو .. مالفاش حاجة خالص .. مش لاقى حاجة .. اخترع حكاية الخزنة .. خزنة إيه .. هى الخزنة كان فيها حاجة .. هل حأمد يدى لخزنة عبد الناصر .. وما عرفش يوصل لحاجة .. ده قعد يحاول معايا فى موضوع الخزنة دى فى قضية مايو يومين .. ٢٤ ساعة فى ٢٤ ساعة .. إنه يطلع بحاجة مافيش حاجة .. بأخذونى حرس يودونى ويجيبونى .. واحد منهم قال لى تصور يا أفندم إمبارح جابوا الست اللي اسمها كريمة بتاعة المعادى يحققوا معاها .. يقولوا لها علاقتك إيه بـ سامى شرف .. أقسمت لهم بيمين وعيطت إنها ما تعرفوش .. اثبتوا .. واثبت هذا الكلام » .
- وكان تولى السادات الحكم شيئاً طبيعياً على أساس أنه كان النائب الأول لرئيس الجمهورية ...
- ويقول عبد اللطيف بغدادى : « كان عبد الناصر اختار السادات نائباً له .. ودى برضه لها قصة .. عين أنور السادات نائب قبل ما تعود علاقتى به على طول .. قال لنا عبد الناصر إن حسين وأنور بيتخانقوا لما بيكون مسافر ويكون هما الاثنان فى حنة واحدة .. فجب يخلص من العملية دى .. فكان مسافراً رايح الرياض ولا ليبيا مش فاكتر .. فقام وهو طالع المطار الصبح .. راحوا له البيت علشان يطلعوا معاها .. فقال لأنور احلف اليمين .. كان متفق معاها على كده يظهر .. حلف اليمين وبقي هو النائب .. واستمرت العملية وبعدين توفى عبد الناصر وأنور نائب .. فبقى وفقاً للدستور .. النائب اللي يتولى » .
- وأسأل د . الدكتورى عن وجود صراع بين النائبين السادات والشافعى فيقول : « هو ما يعتبرش غيره أو تنافس .. ولكن إحساس بالأحقية .. وكان أوضح فى السيد حسين الشافعى .. وكان يتصور إنه أحق بأن يكون نائباً أول أو رئيس جمهورية .. فلما لم يحدث أحس بالإحباط الشديد الذى عبر عنه بأساليب كثيرة .. وبدأ يحاول الاتصال بالمحيطين بعبد الناصر حتى يأخذ وعداً منهم .. أما الرئيس السادات فلم يفعل شيئاً » .

• وأسأل جيهان السادات : لما تولى الرئيس السادات .. فى أول يوم هل كان خائفاً .. أم كان طبيعياً .. يعنى حضرتك تحكى لى إيه عن ذكريات هذه الأيام الأولى ؟

• « الأيام الأولى إحنا كنا عايشين فى قصر الطاهرة .. حاجة غريبة جداً .. أنا حياتى كلها الفرحه والحزن ملازمين بعض .. يعنى مثلاً فى ٦ أكتوبر تبص تلاقى أكبر فرحة لى وأكثر حزن لى .. مثلاً جيت ابنى جمال أكبر فرحة لى كام بأخلف ولد .. وهو طبعاً كان بالنسبة له ولد برضه فرحنا به قوى .. كان يومها حرب .. يعنى بقيت ممزقة ما بين حرب وما بين سعادة .. مش قادرة أفرح قوى والحزن موجود .. حياتنا كلها كده .. حتى لما تولى منصب رئيس جمهورية .. وده رد على سؤال حضرتك .. يعنى كبشر مش أقول لك لم أفرح .. أن أكون حرم رئيس جمهورية وزوجى بقى هو رئيس الجمهورية .. طبعاً فرحة كبيرة .. لكن مش قادرة أفرح لأننا كنا حزائى على الرئيس عبد الناصر لما مات .. ومات فجأةً وصغير ٥٢ سنة .. كنا كلنا تحت عبد الناصر وجبروته والهيئة بناعته .. فضلت أقول يا ربى يا ترى أنور حفيدك يسد هذا الفراغ ؟ فى نفسى من غير ما أقول له طبعاً .. وبلا شك هو نفسه كان أكيد برضه المشاعر تتمزق فيها ما بين حزن وما بين مسئولية .. ووضع جديد .. يعنى صحيح كان نائب رئيس جمهورية بس لم أكن متصورة إنه سوف يكون رئيس جمهورية .. لم تكن على البال خالص .. مشاعر غريبة » .

• ويقول جمال السادات : « هو كان مشغولاً جداً فى الوقت ده .. أقول لك البيت كله فيه قلق .. ووالدتى كانت قاعدة تقول له لأ بلاش .. إحنا مالنا ومال الكلام ده » .

• وأسأل سامى شرف : كنتك والرئيس السادات على وفاق وكنتك متعاوناً معه فى البداية ؟

• « مش مسألة تعاون أو عدم تعاون .. ليلة الرئيس جمال عبد الناصر لما توفى أنا قلت للرئيس أنور السادات أنا مش قاعد وسائدك تختار رجالك .. قال لى ما أقدرش أستغنى عنك .. وبعدين دخلت فى الموضوع مدام جيهان وجاءت زارت المدام هنا فى البيت .. وقالت لها ده سامى هو دماغ الدولة وهو مخ الدولة .. اقنعيه إن هو ما يعيش .. فأنا قلت للرئيس طيب أرجوك أنا حاقعد لغاية ما ننتخب رئيس جمهورية .. جينا فى التعديل الوزارى اللى هو بعد انتخاب رئيس الجمهورية فى نوفمبر سنة ٧٠ .. وإحنا بنعرض التشكيل الوزارى ما حطيتش اسمى .. قلت له يا فندم أنا اتفقت مع حضرتك .. حضرتك قلت لى إنك حتمينى .. أنا ما أقدرش أشتغل .. قلتها له طبعاً بطريقة ظريفة ومهذبة جداً .. وأنا رجل منضبط جداً .. يعنى مش زى ما يقولوا قليل الأدب وسافل وبجح ومجرم ومش عارف إيه .. لأ ده أنا بأضحك وأنتك وأهزر وبشوش .. وأحد التهم طلبت من النائب العام فى تحقيق قضية مايو قلت له شوف اسمع سيبك من الهجص اللى عمال تقوله .. ده أنا أتحداك .. التهمة اللى توجهها لى إنك تجيب مواطن من الـ ٤٠ مليون مصرى بوجه لى تهمة إن أنا كشرت فى وشه .. حأعتبرها تهمة .. قلت له ده أنا معروف بالإنسان الباسم » .

- * ما هو جايز تبتسم ولكن ... ؟
- * « أنا أعرف ربنا كويس قوى من وأنا قد كده .. مش من دلوقتى .. لأن إحنا ديننا مافيهوش واسطة .. منى له ومنه لى » .
- * « أسأل جمال السادات : هل كان دائماً والدك يبدافع عن الرئيس عبد الناصر ولا .. ؟
- * « كان يدافع عنه هنا جوه بيننا بعيداً عن الأضواء أو الإذاعة .. ومش عيب إنى أقولها جوز أختى محمود عثمان .. عنده أسباب شخصية إن النظام اللي قبل كده ما كانش مستريحاً له .. ما يقدرش يقول ده أمام والدى .. كان والدى يقول له ما تنقدش لأن الرجل ساب لى المسئولية واستأمنى على إنى أبقي النائب بقاعه وإنى أخذ المسئولية بعده فأنا متحمل كل شىء هو عمله » .
- * « أسأل السيدة جيهان السادات : هل كان عهد الرئيس السادات تكملة لمسيرة الرئيس الراحل جمال عبد الناصر ؟
- * « نعم كان تكملة .. ولكن كل رئيس وإنسان له الطريقة الخاصة به .. طبعاً أنور السادات كان يحب جمال عبد الناصر ويقدره تماماً .. لكن فيه بعض حاجات يختلف عنه فيها .. وده يعنى تقدر تقول تكملة من ناحية للثورة ثم من ناحية ثانية هو تكملة لجمال عبد الناصر لكن بأسلوب خاص » .
- * « ويقول الفريق أول محمد فوزى : « محمد أنور السادات اشترط أسلوب عبد الناصر وتوجهات عبد الناصر بالنسبة للمعركة وأعلن ذلك بصراحة فى قلب القوات المسلحة .. وفى قلب مجلس الأمة .. وتمادى فى الثقة وفى إيمانه بهذا العمل بأنه انحنى للتمثال النصفى الموضوع على منصة مجلس الأمة .. وهى عملية لا نقبلها نحن مسلمين علشان يفهم الجالسين إنه مؤمن مائة فى المائة بخطط عبد الناصر كلها وبالتوقيت » .
- * « ويقول عبد اللطيف بغدادى : « اشترك زكريا معنا لنعد بياناً لأنور السادات فنذكر فيه ما يجب عمله .. وبعدين رحلت له .. يوم الإثنين أو الثلاثاء مش فاكراً فى قصر العروبة .. قاعد وجنبه « النيوزويك » .. سألته إنت قرأت المذكرة .. قال آه قرأتها بس ده تغيير لنظام عبد الناصر .. فقلت له مرحلة جمال عبد الناصر انتهت .. إحنا من أخطائنا المرحلة السابقة .. نخط حل .. قال لا ما أقدرش .. قلت له أهم حاجة ثقة القاعدة الشعبية فى القيادة بتاعتها .. نمسك القيادة الموجودة .. ونشوف ثقة القاعدة الشعبية فى ؟ اللجنة التنفيذية مين وشخصياتهم شوية هياكل .. قلت له إزاي تقودنا القيادات دى .. لازم يحصل تغيير شامل .. قال ما أقدرش أنا كنت معاهم ليلة بليلة .. وقالوا لى فيه انقلاب حيحصل الضباط ابتدت تتحرك .. الثلاثة الكبار مجتمعين .. كلام من ده .. قلت له انقلاب إيه وبتاع إيه .. نفكر فى مصلحتنا فىن وهصلحنا بلادنا فىن .. وسبته وخرجت .. قلت لهم الحديث اللي حصل وكانوا متضايقين إنه ما رضىش يجتمع بهم » .
- * « وكانت مراكز القوى تعتقد أن بغدادى أو الشافعى أو غيرهما .. شوكة فى الحلق .. بينما السادات أفضل ...

• **ويقول عبد المحسن أبو النور :** « الصدمة التي أخذوها الناس نتيجة الوفاة المفاجئة لعبد الناصر ملهأش سابقة .. ما كانش عيآن بحيث إن الناس مستتية موته .. عملية بدون مقدمات .. وكان لابد إننا نحاول بسرعة إننا نتماسك ونجعل الحكم يسير في طريقه الدستوري الصحيح .. بأسرع وقت ممكن بحيث ما يحصلأش مشاكل .. وإحنا الجيش واقف أمام إسرائيل في الناحية الثانية .. وكان الجيش يستعد فعلاً لعملية عبور القناة .. فكان لابد إننا نحسم الموقف بأسرع وقت مستطاع .. حتى إننا لما جينا علشان نقول طيب عاوزين نجيب مين بدل جمال عبد الناصر .. ابندت بعض الناس ترشح أسماء مختلفة .. ولكننا صممنا على إننا نمشي مع الدستور والقانون .. فيه بعض الإخوان من أعضاء مجلس الثورة القدامى مع احترامى الشديد لهم وكفاءتهم الممتازة أرادوا إعادة فتح باب الثورة تانى وكلام من هذا القبيل .. أنا أحد الناس اللي رفضوا .. لإننا قلنا خلاص .. إحنا فتنا من هذا العهد .. وإننا أرسينا دستوراً وأرسينا قانوناً ولابد إننا نمشي على أساسه .. مانعش نرجع للقهقرة مرة ثانية .. ولذلك اضطررنا إننا نرشح أنور السادات .. لأنه هو كان نائب رئيس الجمهورية الوحيد .. والقانون ببقول بجل محل رئيس الجمهورية في حالة وفاته » .

• **ويقول تحسين بشير :** « اختاروه لأنه كان يمثل أضعف الشخصيات بالنسبة للمجموعة اللي كان في يدها قيادة الأمور .. للأسف كانوا عاوزين يستبعدوا زكريا محيى الدين .. ولدرجة أبل البغدادى .. وما أن تحول أنور السادات إلى كرسى الرئاسة طلع منه شخص جديد .. يستند إلى الشرعية الحاكمة فى مصر .. ويريد أن يفرض حكماً جديداً يحقق ما فشل فيه عبد الناصر .. وهو ضياع الأرض » .

• **ويقول أمين شاكر :** « والله السادات رجل ذكى .. هو كان صاحب عبد الناصر .. وكان يعلم إن عبد الناصر ما بيحبش المناقشة الطويلة .. فكان يطيعه فى كل حاجة تقريباً .. فلما جاء عبد الناصر صفى عدداً من أعضاء مجلس الثورة .. فضل السادات .. كأن هو أقدم من بقى .. إذ كان كمال حسين الرجل الطيب أبعد .. خالد محيى الدين أبعد .. مع إن خالد محيى الدين ده كان رجل ما أقدرش أقول سلبياً ولكن هادىء جدا ما يدفعكش إنك تعاديه »

• **بس خالد أبعد فى الأوائل ؟**

• **بعته سويسرا .. دى كانت عملية نفى وأبعد بعدين كان فى الآخر .. قبله كان طلع جمالاً سالم وصلاح سالم و .. و .. الخ .. زكريا محيى الدين كان موجود شكلاً .. بقى أخونا شيخ الإسلام ده وزير الأوقاف .. حسين الشافعى » .**

• **وأسأل د. الدكتورى : بعد وفاة الرئيس عبد الناصر إيه اللي حصل ؟**

• **بعد وفاة الرئيس جمال عبد الناصر كانت هناك القوى الغير منظورة التي كانت تحكم مصر سواء من داخلها أو التي كانت تمتد بخيوطها لخارج مصر .. فكان يجب أن يكون هناك صيغة جديدة فيما بعد عبد الناصر .. وكانت هناك ثلاث بدائل .. الأول أن يأتوا بالرئيس السادات ..**

وكان فى نظر من يدرس هذا الموضوع إن الرئيس السادات شخصية ليست سهلة .. والشخصية الثانية كال السيد حسين الشافعى .. والبديل الثالث هم من كانوا يديرون الحكم أثناء مرض عبد الناصر .. لكن وجد أن على صبرى لم يكن من السهل أن يقبله الشعب أو الدول العربية .. وأنا أعتقد إن التفكير اللى وصلوا إليه أن يأتوا بالرئيس السادات .. وإما أن يوجد وسيلة للتفاهم معهم وسياستهم تتحقق ويستمر على ذلك أو يعدوا أنفسهم لإعداد البديل وفى الوقت المناسب يتخلصوا منه » .

• وفى هذه الأثناء كان حافظ الأسد قد قاد انقلاباً فى نوفمبر سنة ١٩٧٠ وتولى الحكم فى سوريا ...

• وعين السادات الدكتور محمود فوزى رئيساً للوزراء .. وكلاً من حسين الشافعى وعلى صبرى نالبيين له ..

• ويقول سامى شرف : « فى التعديل الوزارى بتاع نوفمبر قال لى ما أقدرش وما أعرفش إيه إحنا داخلين على مرحلة الحرب .. كان لسه بيدغدغ هو فى الموضوع .. قلت له طيب سيادتك حدد لى يوماً .. قال لى شوف ١٥ يناير سنة ٧١ حنفتج السد العالى رسمياً .. تعمل لى قرارين .. القرار الأول بمنح صدقى سليمان أكبر نيشان فى مصر - وأيامها كان وشاح النيل - نكرمه به .. والقرار الجمهورى بتاعك عاوز سفير عاوز غير أى حاجة .. فى يوم ١٥ يناير قال لى مش حاسبيك حنقتد .. قلت له عاوز سيادتك أكتب استقالة .. يعنى بأقولها بطريقة مش عاوز أخرجك .. وإحنا نظامنا فى العالم الثالث ماحدث يقدم استقالة » .

• وأسأل أمين شاكر : ما الذى جعل الرئيس السادات يعين على صبرى والشافعى نالبيين له ؟

• « والله هو ما كانش عاوز فى أول تعيينه إنه يصطدم بأحد .. هو لا كان يقبل على صبرى ولا كان يقبل حسين الشافعى .. إنما كان عارف إن ده وده .. كان حسين الشافعى على علاقة بالإخوان المسلمين .. وعلى صبرى كان على علاقة بالشيعيين وله علاقة بالاتحاد السوفيتى .. فحب إنه يديهم مراكز اسمية .. لكن فى نيته إنه يقطع رقبتهما الاثنين » .

• وأثبت السادات أنه ليس ضعيفاً بالعكس فهو أقوى مما تصور الجميع .. وبدأ فى طرح مبادرات دبلوماسية دون استشارة القيادات السياسية الموجودة ...

• ويقول عبد المحسن أبو النور : « فيه ناس تقول لك ما إنتم غلطانين .. إنتم اللى جبتم أنور السادات وهو اللى عمل هذا الأساس .. كل ده علشان إنتم اللى جبتموه وإنتم اللى مسئولين عنه .. أنا الآن لو كنت تخطيت أنور السادات وكنا نجيب زكريا من بره .. طيب اشمعنى زكريا ؟ طيب ليه ماهواش بغدادى ؟ ولا هواش كمال الدين حسين ؟ .. وكل واحد له شعبيته .. حبتدى المنافسة والتنافس بيتدى .. طيب لما تيجى تقول لازم نأخذ من الموجودين حالياً اللى هم موجودين فى اللجنة التنفيذية العليا .. حنقول هو ولا حسين الشافعى ولا على صبرى .. نفس الكلام .. اشمعنى هو .. وهو ده حبيقى له ناس وده له ناس وححصل تفرقة فى هذا الموضوع

فقلنا الحل الوحيد لهذا الكلام .. إننا نضع ورقة ننفق عليها جميعاً إن الحكم يجب أن يكون جماعياً .. كل جهة لابد وأن تأخذ سلطاتها كاملة .. يعنى مجلس الوزراء أخذ سلطاته كاملة ويصدر قراراته بأغلبية الأصوات .. مجلس الشعب يأخذ سلطاته كاملة ويأخذ قراراته بأغلبية الأصوات .. ويعرض عليه كل شيء .. واللجنة التنفيذية العليا يعرض عليها كل شيء وتأخذ أصواتها برضه بالأغلبية .. وعلى هذا الأساس يبقى الحكم حكماً جماعياً ومافيش واحد ينفرد بالسلطة .. على هذا الأساس مانقدرش نقول إن أنور السادات ما بيعرفش يحكم أو بيعرف يحكم .. أو يمكن يمشى بطريق مخالف أو غير مخالف طالما إحنا مشينا بهذا الاتفاق .. واتفق على هذا الكلام .. وأنور السادات بعد انتخابه فى مجلس الأمة أعلن هذا فى اللجنة التنفيذية العليا وفى اللجنة المركزية وفى المؤتمر القومى العام .. وفى الجرائد .. وللأسف بعد شوية خالف هذا الكلام .. ده السبب الللى خلانا إننا نبتدى نعارضه .. لإننا عاوزين نقول الآتى .. إحنا مانقدرش نغلط مرة ثانية .. حصلت غلطة وقعنا نتيجةها سنة ٦٧ ولا يمكن أن تحمل البلد غلطة ثانية .. بأن ينفرد إنسان بالحكم وخصوصاً إذا كان هذا الإنسان ليس له التجربة التى كانت لجمال عبد الناصر مثلاً .. فإذن إحنا لابد إننا نصمم على أن جميع أجهزة الدولة التشريعية والتنفيذية تشارك فى الحكم حتى لا تحدث أخطاء نرجع نفع فيها مرة ثانية .. ولكن بعد فترة رجع أنور السادات يحاول أن يفرض آراءه بنفسه .. ولما وقفنا له .. ابتدا يقدم على إنه يتخلص من هذه المجموعة .

- وكان السادات قد شرع فى قيام وحدة مع كل من ليبيا وسوريا والسودان .. واعترض على صبرى ومعه بقية القيادة السياسية التى تركها عبد الناصر .. وكان الاتفاق من حيث المبدأ على الوحدة أيام ناصر حين كان يزور طرابلس للمرة الأولى والأخيرة ...
- ويقول مصطفى كامل مراد : « المسألة بدأت فى الاتحاد بين مصر وسوريا وليبيا .. إن مجموعة على صبرى وشعراوى وسامى شرف وعبد المحسن أبو النور كانوا يبعارضوا » .
- ويقول جمال حماد : « وكانت القضية الكبرى التى أثارَت الأزمة وفجرت الصراع هى قضية الاتحاد العربى الثلاثى بين مصر وسوريا وليبيا .. على أثر توقيع اتفاقية بنغازى » .
- ويضيف مصطفى كامل مراد : « السادات كان عاوز الوحدة لأنه كان يجهز لحرب أكتوبر » .
- وأسأل محمد فائق : بالنسبة للوحدة هل لك رأى وتعليق ؟

- « كان عبد الناصر فى أواخر أيامه وصل إلى قناعة إن فكرة الوحدة الدستورية السريعة ما كانت يفضلها .. بل بالعكس إنه يفضل إيجاد مصالح مشتركة أولاً .. وتلاحظ إن الوحدة الرباعية الللى اتعملت هى آخر حاجة عملها عبد الناصر كانت شبيهة بنموذج اتحاد شرق إفريقيا .. وهو اتحاد توحيد خدمات .. على أساس إن توحيد الخدمات توحيد المصالح .. بهذا الشكل ممكن إنه يوجد فيما بعد وحدة لأن الوحدة إذا تمت بشكل غير ناجح ممكن يكون مردودها سيء .. وده الللى خرج به عبد الناصر ... بدأت قصة الخلاف مع السادات داخل موضوع الوحدة مع ليبيا ..

وأهم أزمة قابلتنا قضية الوحدة مع ليبيا .. وإحنا لما مات الرئيس عبد الناصر كانت هناك ترتيبات معمولة علشان الحرب .. وكان المفروض إن الحرب كانت على وشك .. لولا السادات جاء وأخرها .. اللي حصل رحل عنا جمال عبد الناصر بعدها .. فكانت الحرب على وشك إنها تتحدد .. بل بالعكس كان ده الهدف .. الموضوع الأساسي اللي إحنا طبعاً بعد النكسة كان الواحد إحساسه وتمزقه شديداً جداً .. لأن إذا كان المواطن العادي يشعر بهذا التمزق وهذه المهانة اللي إحنا فيها فيما باللك بشخص مسئول .

• **ويقول البكوش :** « الواقع أن سلوك العقيد القذافي الوحشوى كما يسميه .. ليس سلوكاً غريباً .. فهو سلوك عربى اعتدناه أو اعتدنا صدوره من كثير من الحكام العرب .. فهم فى الواقع لا ينادون بالوحدة وإنما ينادون بالضم .. هى دعوة إلى توسيع رقعة سلطان حاكم عربى على حساب حاكم عربى آخر .. ولذلك لن نتحقق أى وحدة عربية .. وقشلت كل التجارب والمحاولات بين مصر وسوريا .. وبين مصر وليبيا وسوريا .. وبين مصر وليبيا والسودان .. كانت كلها دعوات فوقية ليست جادة على الإطلاق .. والذى يعرف خفايا السياسة العربية يعلم إنها دعوات مصطنعة لأغراض سياسية عابرة » .

• **ويقول د . عبد العظيم رمضان :** « اتهمت الفريق محمد فوزى بأنه يريد إدخال مصر فى كارثة جديدة أشنع من كارثة ٦٧ عندما أراد دخول الحرب .. وذكرت ذلك فى كتابى « تحطيم الآلهة » .

• **ويضيف محمد فائق :** « كنا شباب صغيرين .. فكان الواحد طبعاً أهم حاجة عنده إزاي نخلص من عملية الهزيمة العسكرية دى .. وكان الوضع جيداً .. ولكن أنور السادات كان لا يريد أن يحارب .. واتضح لنا إنه لا يريد أن يحارب وهذه كانت الأزمة الحقيقية .. فبدأ يخلق حاجات عطل بها الحرب .. زى مثلاً موضوع الوحدة .. كان مشاكلها إن السودان ما كانتش جاهزة لها .. ومعنى هذا إنه يمهد للوحدة الرباعية بين الدول .. لأن السودان كانت ظروفه لا تسمح له عمل وحدة بين سوريا وليبيا ومصر .. وما كانش أحد مستعد لها أبداً .. لكنها كانت عملية شكلية .. وكان المقصود بها كما كُتب فى المذكرات . وخاصة مذكرات الأستاذ هيكل . إنه كان واضح إنه يحاول أن يؤجل الحرب .. دى كانت أحد أهم مشاكل الأزمة اللي حصلت على الوحدة وترتب عليها خلاف فى رأى » .

• **وكان السادات فى جانب وهم فى جانب آخر ...**

• **يقول د . عبد العظيم رمضان :** « كان السادات عقلياً .. غير متعجل للسياسة التي يريد أن يحققها .. وهم مجموعة تريد الحكم الجماعى وتريد أن تثبت رسالة عبد الناصر وتحمل علمه .. ويريدون الحرب فى العام التالى لوفاة ناصر .. فوقف أمامهم السادات وقال « مصر غير مستعدة للحرب » .. وكان الناصريون يريدون تحرير الأرض فى وقت قمنا فيه بنقل الكلية الحربية المصرية إلى السودان والكلية البحرية إلى ليبيا .. وسماء مصر قبل حائط الصواريخ كانت مفتوحة تماماً .. فأدى كل هذا إلى خلاف كبير بينهم » .

• ويقول عبد المحسن أبو النور : « أنور السادات مثلاً لماذا كان يكره الاتحاد الاشتراكي .. ولماذا كان يعمل على حل الاتحاد الاشتراكي بعد ما جاء رئيس جمهورية .. الاتحاد الاشتراكي زى ما قلنا إنه قسم بالانتخاب للقاعدة والقمة .. فلما جاءت اللجنة المركزية وانتُخبت اللجنة المركزية .. فوضت عبد الناصر بإنه هو يشكل اللجنة التنفيذية العليا .. لأن اللجنة المركزية لسه كلها جديدة .. ومانقدرش تحكم على كل الناس مرة واحدة .. فبعد الناصر قعد مع أمناء الاتحاد الاشتراكي وبعض الناس الأساسيين فى الاتحاد الاشتراكي وأخذ رأيهم فى مين اللى ييجى فى اللجنة التنفيذية العليا .. الغالبية العظمى لم ترشح أنور السادات .. وعبد الناصر قال له - قال للسادات - هذا الكلام .. وتم الانتخاب وجاء هو مرة ٣ .. ولهذا أخذها فى نفسه .. من جهة الاتحاد الاشتراكي ومن جهة الناس الللى هم وقفوا ضده فى هذا الكلام .. وفى نفس الوقت هو لم يمارس أى عمل تنفيذى طول مدة الثورة » .

• ويقول محمد فوزى : « وأنا شرحت للسادات الخطة (جرانيت) التى تعنى .. الكلام ده خلاصوا الثلاث سنين ونصف وداخليين فى السنة الرابعة .. التى تعنى تحرير سيناء حتى حدود ٤ يونيو عام ١٩٦٧ .. وظل على هذا الشكل حتى شهر مايو عام ٧١ حيث انقلب رأساً على عقب بالنسبة لهذه الخطط وبالنسبة لهذه الملاحظات » .

• تفكر لماذا ؟

• « (١) حقده وكراهيته لجمال عبد الناصر .. (٢) إنه لا يتحمل الخسائر لو حصلت وكان متوقعاً إنه تحصل خسائر كثيرة .. قالها لى « عبد الناصر يستعملها لكن أنا لا أستعملها » .. (٣) اقتنع بأن الحل لو جاء على يد الأمريكان يكون أفضل وعمل اتصالاته الخفية والسرية أولاً » .

• إذن ما كنتش موافق على كلامه ؟

• « طبعاً .. وعرضت عليه أن يعطينى الضوء الأخضر بورقة اسمها درجة الاستعداد .. يقرر درجة الاستعداد فى موعد معين » .

• بينما يقول سعد الشاذلى : « أنا عُينت رئيس أركان حرب سنة ٧١ .. ولم تكن هناك أى خطة هجومية لتحرير سيناء أو تدمير خط بارليف » .

• ويضيف حافظ إسماعيل : « إحنا نعرف إن وقف إطلاق النار ما بيننا وبين إسرائيل كان فى أغسطس .. لغاية شهر نوفمبر .. ومن نوفمبر لشهر فبراير المدة هذه وقف إطلاق النار كان مطلوب وكان الآخرون رجال عبد الناصر يطلبون إلغاء وقف إطلاق النار » .

• وكان السادات فى أوائل سنة ١٩٧١ قد قرر تجديد مبادرة روجرز .. بينما رفض على صبرى وآخرون وقف إطلاق النار ...

• ويقول مراد غالب : « جاء مرة على صبرى كان بيرأس وفداً وكان كوسيجين هو اللى كان بيتفاوض معاهم حول مد وقف إطلاق النيران .. كوسيجين حاول بكافة الطرق إن هو يخليه

يقتنع بأنه لابد من مد وقف إطلاق النيران .. الكلام ده بالضبط فى أوائل ٧١ قبل مايو ٧١ .. وكنت عامل حفل استقبال فى بيتى كان فيها كوسيجين وعلى صبرى .. كوسيجين ابتدا يتنرفز من كتر ما على صبرى كان مُصرّ على رأيه .. فده مش واحد نقول عليه إنه كان مع الروس .. وإحنا دائماً الحقيقة نصنف الناس تصنيفات غريبة جداً » .

• ويقول حافظ إسماعيل : « الرئيس السادات قدم فى ٤ فبراير مبادرة مصرية حول التسوية السياسية مع إسرائيل » .

• يمكن استكمالاً لاتفاقية روجرز ؟

• « روجرز ما كانش قدم اتفاقية .. ليه .. لأن مصر اتهمت بإنها أدخلت صواريخ إلى منطقة قناة السويس .. وغيرت الأوضاع فى داخل المنطقة .. وعلى ذلك فشلت المبادرة لم تبدأ .. قانون السادات حب يستغل إلى أقصى درجة ممكنة إمكانية الحل السياسى » .

• ويضيف حافظ إسماعيل : « فى أوائل مايو استقبل وليام روجرز وزير خارجية أمريكا .. بعد أن أجرى مباحثات مع محمود رياض » .

• وأسأل سامى شرف : قيل إن هناك تسجيل حرصت على أن تحتفظ به وهو تسجيل على الرئيس أنور السادات فى أثناء مباحثات روجرز .. وإن كان فيه جهاز تسجيل فى غرفة نومه ؟

• « بيت أنور السادات ما كانش فيه تسجيل .. وأنا نادم على هذا والله النهارده .. أنا نادم عليه .. كنت عرضت اللقاء اللي تم بينه وبين كمال أدهم .. وما دار فيه .. لقاء أنور السادات مع كمال أدهم فى نوفمبر سنة ٧١ .. وهذا اللقاء حدد فيه أنور السادات لكمال أدهم ما سيجريه فى مايو .. لو كنت أعلم هذا كان لى تصرف آخر .. كنت تأمرت .. أنا لست متأمراً بطبيعة تكوينى .. ولكن إذا كان هناك تعامل مع أجنبى أنا أأمر لصالح بلدى .. لكن مش ضد بلدى .. فى تحقيق قضية .. النائب العام يقول لى باعتبارك أحد مراكز القوى .. قلت له إيه مراكز القوى يعنى ده أنا يشرفنى إنى أكون مركز قوى .. ده أنا يوم ما أبقي مركز ضعيف ما يصحش إنى أكون فى مركزى لازم انضرب بال .. ولا يصح إنى أبقي وزيراً لرئاسة الجمهورية .. لازم أكون قوى .. ده ربنا سبحانه وتعالى بيحب المؤمن القوى .. القوى بمعانى كثيرة .. قوة الأخلاق والقوة البدنية والقوة الفعلية .. وجميع أنواع القوة هى الإيمان » .

• وأسأل اللواء طه زكى : كان فيه تسجيلات للرئيس السادات شخصياً فى بيته ؟

• « كان معمولاً له فى بيته كله .. وانكشف يومها أو تانى يوم .. وجاءت الأجهزة المختصة اكتشفت إن هناك فى بيت الرئيس أنور السادات ويسجلوا عليه خطواته وكلامه وأحاديثه وكل شىء .. وده كان طبعاً أخط أنواع تباشر مع رئيس جمهورية » .

• ويقول سامى شرف : « كان التسجيل خاص بكبار المسؤولين أثناء العمل .. استحدثت شبكة

الاتصالات التليفونية .. وكان صلاح نصر أحضرهما .. هذه الشبكة قائمة على التسجيل التلقائي .. من أجل تأمين سرية الاتصالات بين كبار المسؤولين .. وكان المسئولون جميعاً يعلمون أن هذا النظام يسجل المكالمات .. شعراوى كان يعلم .. وعلى صبرى كان يعلم .. وهذا غير نظام المراقبة التليفونية » .

• **يقول د . الجوهري :** « كان هيكल بيكتب كتابات غريبة جداً .. ويقول إن إسرائيل قوة لا تقهر .. وإن السد الذى عملوه عاوز قنابل ذرية .. وعاوز وعاوز .. وكان فيه الجيش وضباط الجيش زعلانين من هذا الكلام .. لأن دى عملية بتدعو للانتهزامية .. طبعاً ده ما كانش مطلوباً .. أنا بأعتقد إنه لو كان سمع رأى العسكريين كان يمكن الموقف بقى أحسن ١٠٠ مرة من اللى كنا فيه فى هذا الوقت » .

• **ويقول د . عبد العظيم رمضان :** « كان لأمين هويدى وزير الحربية الذى عينه عبد الناصر بعد عامر نظرية تقول إن خط بارليف لم يظهر فجأة إنما نمت يوماً .. ووجدت لجان تقصى الحقائق أن الجنود من الفلاحين البسطاء لا يجيدون التهديد كما ذكر فى كتابه « الفرس الضائعة » . »

• **وفاض الكيل بالسادات بعد عيد العمال سنة ١٩٧١ وأعلن إقالة على صبرى .. ولقى الخبر صدى جيداً عند الجماهير ...**

• **ويقول د . يونان لببيب رزق :** « على صبرى لم يكن يحظى بشعبية .. كانت صورته العامة عند الناس أنه رجل متآمر أكثر منه رجل سياسى .. وهناك اليسار الوطنى واليسار العميل للاتحاد السوفيتى .. وأخشى أنه كان ينظر إليه من الجماهير بالصورة الثانية » .

• **ويقول الفريق أول محمد فوزى :** « فى الجيزة يوم ٩ / ٥ / ١٩٧١ .. يوم ما كان « سيسيكو » موجوداً فى القاهرة .. الصبح السادات عرض عليه الرد بتاع ديان .. وكنا جالسين فى منزله .. الدكتور فوزى ومحمود رياض وأنا وسيسيكو والرئيس السادات .. وكان أشرف غربال بيدون الحديث .. بيحجب ردود « ديان » على « أنور السادات » .. الردود على الأسئلة .. الأسئلة هذه لا يوجد أحد عارفها فى البلد .. تخص المشروع بتاع الرئيس السادات الخاص بفتح قناة السويس .. هو كان بيعتقد بأن فتح قناة السويس خدمة للعالم كله .. وإن ممكن تحرير سيناء يتم سلمياً .. هذه هى النقطة .. هل إسرائيل بعلاقتنا معاها الربع قرن ترضى تسبب شبراً بطريق سلمى من غير ما تأخذ حاجة ؟ هو كان مقتنعاً .. ما حدث من اللى كانوا موجودين واحتك بإسرائيل يرضى بهذا الكلام .. وبالذات قال اسمى .. وقال اسم محمود رياض .. فأنا عرفت بهذا وقدمت استقالة » .

• **وتأزم الموقف .. وازداد التوتر ...**

• **وأسأل كمال الدين حسين :** حضرتك قلت للرئيس السادات « احترس منهم إنهم مثا الدبابير » .. فماذا تذكر عن هذه الواقعة ؟

• « كان فيه ناس حكوا لى عن اللى حصل فى أول مايو فى حلوان .. التهييص على أنور السادات واللى حصل هناك .. وقالوا فيما قالوا .. كانوا صحفيين وكان فيه وزير موجود .. ما أعرفش كان دخل الوزارة أم لسه .. قالوا لى إن هو ناوى يشيل على صبرى .. قلت لهم هو لو يشيل على صبرى لوحده تبقى زى اللى نكش عش الدبابير هاجوا عليه الدبابير لغاية ما يموتوه .. إذا كان عاوز لازم يسحق عش الدبابير كله .. وفعلأ وصله هذا الكلام » .

• ويقول أمين شاكى : « لأن السادات ما كانش بيثق فى اللى حول عبد الناصر .. واللى حول عبد الناصر ما كانواش بيتقوا فى أنور السادات .. لكن كان لابد أن يتعايشوا .. فأنور السادات أصبح رئيس .. ودول تولوا مناصب الحكومة .. وما كانش السادات له أحد أبداً فى الحكومة .. كلهم من الناس اللى كانوا بيشتغلوا مع عبد الناصر .. والسادات كان يعلم تماماً الأخطاء اللى كانت موجودة أيام عبد الناصر وكان الشعب لا يرتاح إليها .. ولكن الظروف لم تمكنه فى البداية إنه يعمل تغيير .. فركز كل جهده فى عملية تحرير الأرض .. وقال لى أكثر من مرة مافيش حاجة تعمل فى هذا البلد إلا إذا خرج اليهود من سيناء .. طول ما هم محتلين أرضنا مش حانعمل حاجة » .

• كيف استطاع السادات أن يتغلب عليهم ؟

• « بغاوتهم .. ده زى ما تكون رايح تحارب تقوم ترمى سلاحك وتروح تحارب بإيدك فاضية .. دول كانوا يقدرنا يشيلوا السادات بسطر فى الجرنال .. إن رئيس الدولة أصيب بأزمة قلبية وتم اختيار مجلس رئاسى برئاسة على صبرى مثلاً .. وعضوية كذا وكذا .. والمجلس حيتولى الرئاسة إلى أن يعود » .

• ويقول جمال حماد : « كان السادات قد أيقظ اللواء أحمد إسماعيل من نومه قبل الواحدة صباحاً ليأمره بالتوجه إلى مبنى المخابرات العامة ليتولى رئاستها بدلاً من أحمد كامل » .

• وفى يوم ١٣ مايو حمل أشرف مروان مدير مكتب سامى شرف استقالات القادة .. فقبلها السادات وأعلنها فى الحال ...

• ويقول أمين شاكى : « السادات بعد ما نجح فى هذا وحصل على ثقة ومحبة الناس فكر فى الإصلاح الداخلى .. قال أنا أغير الطاقم الموجود تدريجياً .. وأبتدا بشعراوى جمعة والعملية عملت نوع من رد الفعل الحاد من الجانب الآخر .. واتصرفوا بغياوة وقدموا استقالاتهم .. فالناس كانت متبينة إنهم يستقيلوا .. راح ماسكهم وراح حاططهم فى السجن ويحكمهم والحكاية معروفة » .

• وأسأل محمد فوزى : كان فيه استقالة جماعية أعتقد فى ذلك الوقت ؟

• « أنا قبل كده كنت مقدم استقالة ما وصلتهوش .. ولكن الاستقالة الجماعية ما هى استقالة زى الفردية طيب وماله .. ده بعد كده أخذنا من بيوتنا .. أخذنى أنا من بيتى لابس البيجامة » .

• وحضرتك قريب السيد سامى شرف ؟

• « نعم مراته تبقى بنت خالتي » .

• وأسأل محمد فائق : حضرتك كنت مستقيلاً ولا كنت موجوداً يوم ١٥ مايو ؟

• « هو يوم ١٣ مايو .. ١٥ مايو ما كانش فيه حاجة .. ما أعرفش ليه سموه ١٥ مايو .. هو ١٣ مايو الحقيقة أنا استقلت .. ويومها على ما أنكر كان فيه وزير خارجية إيران .. فطلب منى السيد محمود رياض أن أظل فى الإسكندرية .. ففعدت .. بعد شوية لقيت إقالة شعراوى جمعة .. المهم تطورت الأمور بشكل سريع جداً والواحد شعر إن فيه حاجة .. الحقيقة كان الرئيس السادات بيفعل أشياء بطريقة تتم عن تغييرات جذرية تحدثت .. فكان فيه فكرة للاستقالة من قبلها .. فحصلت الاستقالة وخصوصاً بعد ما عرفنا إن الجيش مش حيحارب .. وكان الفريق فوزى اجتمع برجال الجيش وقال لهم رئيس الجمهورية مش عاوز يحارب لكن قادة الجيش قالوا إحنا مع الشرعية .. فبالتالى أصبح الموضوع محسوماً بهذا الكلام .. وانتهت .. واستقلنا » .

• وكانت الاستقالة عملية انفرادية كل واحد لوحده ؟

• « هو يمكن كل واحد بيستقيل لسبب مختلف .. لكن يمكن التوقيت كان واحداً » .

• وأسأل أحمد كامل : حضرتك فضلت رئيساً لجهاز المخابرات إلى متى ؟

• « والله هم ٦ أشهر .. بعد كده دخلت السجن » .

• ليه يا فندم ؟

• « لأن الرئيس السادات ما أعرفش ممكن ليه .. وحتى الآن لا أعرف سبب دخولى السجن .. لأن هو سألوه مرة فقال لهم أنا سجنتم أحمد كامل لأنه علم ولم يبلغ .. فكرة الرئيس عن رئيس مخابراته .. لما تبقى بهذه التفاهة يبقى حرام .. لأن أنا مش بأشتغل سكرتير .. أنا بأشتغل رئيس جهاز المخابرات .. وظيفتى إنى أحرض عن الرئيس الإشتغالات التى قد تشغله بلا مبرر وإلا ييجى هو يشتغل رئيس مخابرات .. فأنا كل المعلومات اللى تجيبى بأحفظها والخبر اللى يستاهل إنه يعرفه أبلغه له .. إنما الخبر اللى أنا أرى بإمكاناتى إنه لا يصح التبليغ عنه ما بأبلغهوش .. فهو لما ييجى يقول أنا سجنتم أحمد كامل علشان علم ولم يبلغ .. يبقى أنا مش فى وظيفة رئيس مخابرات » .

• وكيف كانت تصل التقارير إلى رئيس الجمهورية من رئيس المخابرات ؟

• « رئيس المخابرات المفروض إنه لا يتبع إلا رئيس الجمهورية .. وعلى ذلك كان يجب أن ترسل التقارير باسم رئيس الجمهورية رأساً .. علشان رئيس الجمهورية يطلع ويؤشر ثم يعيد هذا الكلام إلى المخابرات للتصرف بناء على تأشيرة الرئيس .. لأن جهاز المخابرات جهاز جمع معلومات

ويعطى للرئيس طرق الحل المفتوحة من وجهة نظره .. وللرئيس السلطة الأخيرة فى اختيار الحل الذى يراه مناسباً طبقاً للظروف السياسية والاقتصادية والأمنية وطبقاً لجميع الظروف الموجودة أمام الرئيس بكل وضوح .

- ويقول حافظ إسماعيل : « أحمد كامل كان صديقاً لسامى شرف » .
- وأسأل أمين هويدى : ما دور أحمد كامل الذى حل محلك فى المخابرات ؟
- « أسأله » .

• غير فى شيء ؟

• « ما أعرفش .. أنا كنت خارج المسرح وتركت هذا الكلام وكنت خارج السلطة .. أحمد كامل شهيد على كل إخوانه بموجب الشرائط التى كانوا ببسجلوها - هو الأمر المؤسف إن كان فيه شرائط مسجلة ضدهم كلهم .. ويسأل كل الذى انتقبض عليهم .. اسأل فيها أحمد كامل كان أحد الناس الذى ارتكز إلى هذه الشرائط علشان يقول الذى هو قاله وقتها .. على أى حال أحداث ١٥ مايو كان لابد أن تحدثت وحدثت وانفرد السادات بالسلطة لإن ما كانش ممكن ازدواج السلطة » .

• وأنت لم تعد للحكم ؟

• « إطلاقاً » .

• وأسأل د . عبد القادر حاتم : متى وكيف حضرتك رجعت إلى الأضواء وإلى السلطة ؟

• « أنا كنت بأشغل مستشاراً .. بعد ٦٧ و ٦٦ ما اشتغلتش .. فإذا بالرئيس السادات يدعونى .. ويقول لى تعالى امسك الإعلام ثانى .. وأنا الحقيقة قلت له سيادتك تعلم تماماً إن أنا لا أريد الناحية التنفيذية .. قال لى لأ .. أنا ما كنتش عارف بقى الخلفية التى بينه وبين الإخوان التى كانوا موجودين .. لإنى كنت بعيداً عن الحنة دى - كنت بأدرس وبشوف لوحاتى وكانت دى هواية جميلة مع القراءة - فقال لى لأ ده فيه عملية انقلاب .. قلت له إذا كان فيه انقلاب أنا لابد أن أكون موجوداً معك .. فقال لى تروح الليلة .. لإنه عين وزير ٢٤ ساعة فى ١٣ مايو » ٧١ .

• الذى هو مين ياقتنم ؟

• « كان اسمه الزيات .. مش محمد حسن .. الثانى قريبه الذى توفى .. بيدى له تعليمات وهو لا ينفذ .. فقال لى لو ما كنتش حأتروح حأبعت الياور بتاعى ومعا قوة تضربهم .. لإن هم عاوزين يقبضوا على وأنا داخل مبنى الإذاعة والتليفزيون .. قلت له طيب حأروح إذا كان كده .. وقلت له أنا سايب ولادى دول بقى لى ٤ سنين ونصف لكن فيه علاقة إنسانية بينى وبينهم .. وطالما إن أنت عيئتنى وأنا ظهرت فى التليفزيون مش حيحصل حاجة لإن هم

حيسموا الكلام وحيفهموا الوضع كويس لمصلحتهم ولمصلحة البلد .. قال لى لازم تروح .. فرحت فى ذلك الوقت مبنى التلفزيون بعربية أنا سايقها .. لقيت ٥ آلاف واحد على باب التلفزيون وشالونى .. وما لقيتش نفسى إلا فى الدور التاسع وعمالين يهتفوا .. وإذا بى هو بيتكلم فى التلفزيون ويقول لى الله ده الناس كلها بتهتف لك .. قلت له بحدين بقى يا سيادة الرئيس .. إحنا لسه فى أولها .. وخصوصاً الله يرحمه كان عنده روح الفكاهة فى عز الأزمات يقول لك حافهمهم .. قلت له سيانك بتقول حقنرم وفيه إشاعة بلن شعار الدولة حيبقى المغرمة .. وعلى العموم أدعوك إنك إنت تيجى وتشوف الإذاعة والتلفزيون .. لأن أنا قلت لهم هناك .. فيه حاجة اسمها وفاء وحاجة اسمها ولاء .. العلاقة اللى بينى وبينكم زى ما علمتكم .. ده نوع من الوفاء .. أما الولاء لمصر ولرئيس الدولة الشرعى .. دى كانت البداية .. لكن بعد كده كانت فيه خلافات بينه وبين الناس الللى كانت موجودة .. وسلم على واحد ويوسنى .. تلتى يوم ما ألقهوش .. ألقيه ممسوك .. مش عارف كان عمل إيه ؟

• وأسأل د. الدكتورى : كنت فىن فى أحداث مايو ٧١ ؟

• « فى ١٤ و ١٥ مايو وما بعدها .. أنا كنت فى قلب الاتحاد الاشتراكى .. أنا كنت أمين عام الاتحاد الاشتراكى فى الجمهورية .. وأنا الللى كان منوط بيّه مسئولية التوجيه الشعبى كله من الاتحاد الاشتراكى ومن بقايا التنظيم ومن كل الهيئات فى عملية اختيار الرئيس السادات .. وفى المرة الثانية فى تأييد عملية ١٥ مايو واستيعاده للشخصيات المستبعدة .. والجمهور عيز عن تأييده .. وكانت كل القوى المؤثرة فى مصر فى يده وكانت القاعدة قاعدة الجيش غير متاحة .. تنظيم الاتحاد الاشتراكى كان هش والداخلية اللتى كان مسيطراً عليها السيد شعراوى جمعة ولم تكن بالقدر المحسوب .. وبالتالي أول ما بدأت الفرص تلوح للناس انطلقت .. وكانت مئات الآلاف من الجماهير تأتى إلى الاتحاد الاشتراكى .

• هل حدث صراع بينك وبين سامى شرف كما ذكرت لى ؟

• « حصل بالرغم منّا .. الأستاذ سامى شرف تربطنى به علاقة أسرية وكنا معاً فى نخبة واحدة فى المدرسة وهو الذى أتى بى للعمل معه فى مكتب الرئيس للمعلومات .. ولكنى شعرت بعد استدعاء الرئيس إنه لم يكن مرتاحاً لهذا الوضع .. وعندما تحركت الأحداث أصبح هناك مجموعتين .. إحداهما من الصعيد والأخرى مجموعة سامى شرف .. وهو قد يكون فهم إنى بأعمل ضد سامى شرف لكن بالعكس أنا بأكن له كل مودة .. ولكنى لم أقف ضد سامى شرف .. ولكن وقتت مع مصر .

• وأسأل جمال السادات : مايو ٧١ إيه الللى تفكره منه ؟

• « افكر جيداً لما جاء العميد طه زكى .. ما كنتش أعرفه هو مين وشفته وهو داخل .. بس عرفت بعد كده إنه ده الضابط الللى قال عليه والدى .. فضلت أنا قاعد على السلم مهران للصبح

عشان خائف لا حد يجيى لما سمعت إن فيه ممكن ناس من الداخلية بيجوا .. وكنت صغيراً .. فضلت سهراناً قاعد للصبح .

• وأسأل المشير الجمسى : انطباعك كان إيه عن الجيش المصرى وقد كنت أحد قادته فى فترة ١٥ مايو ؟

• « فى ١٥ مايو ٧١ اللي هى ثورة التصحيح .. مرت على القوات المسلحة عادية جداً لم يحدث فيها شىء غير عادى .. والمشكلة كلها إن الفريق أول فوزى كان وزيراً للحربية وقائداً عاماً للقوات المسلحة .. وكان من المجموعة التى وقفت موقف ضد الرئيس السادات فى ذلك الوقت وده تاريخ معروف لكل الناس .. لم يحصل أى تصرف أساء للقوات المسلحة .. والقوات المسلحة لم تسمى إلى الموقف ده إطلاقاً .. خصوصاً إن الفريق أول محمد صادق كان رئيس أركان القوات المسلحة .. مالهوش دعوى بموضوع ثورة التصحيح وتولى القيادة .

• وأسأل أحمد سرحان : كنت مع الرئيس السادات فى سنة ٧١ ؟

• « أنكر إن السيد الرئيس كان رابط الجأش جداً .. وكان هادى جداً ومتزن جداً والأمور مشيت زى ما كلنا عارفين .. وأذكر إن هذا اليوم كُلفت أن أتوجه إلى مبنى السنترال فى رمسيس .. ورحت فعلاً إلى غرفة التسجيلات واستطعت مع زميل لى فى الحرس الجمهورى صلاح سليمان .. هو دلوقتى فى الحكم المحلى .. ومجموعة لا تتعدى الخمس أفراد إن إحنا نسيطر على مبنى السنترال بالكامل .. واستطعنا إن إحنا نتحفظ على الشروط .. وكان أيامها ممدوح سالم - رحمة الله عليه - فى نفس اليوم عين وزيراً للداخلية .. واتصلت به وانتقل إلى هذا المكان الأعضاء رؤساء النيابة .. وابتدت الأمور تأخذ الشكل القانونى .

• ويقول د . عزيز صدقى : « الشرعية بنقول .. فيه دستور مؤقت بيقول لما يموت رئيس الجمهورية يبقى نائب رئيس الجمهورية .. الدستور بيوجه لك إزاي الخطوات تمشى .. لو ما احترمتش هذا انتقحت السكة بقى فليتنافس المتنافسون .. هل المجموعة بتاعة على صبرى هى اللي تحكم ولا مجموعة مجلس الثورة ونخش بقى فى متاهات .. أنا كرجل وطنى قلت نعمل بالدستور ودى الشرعية .. ثم بعد كده اشتغلت مع أنور السادات .. ولعلمك فى ١٥ مايو أنا عرضت نفسى للمخاطرة .. البيان اللي أنا نزلته الساعة الواحدة والربع أنبغ من الإذاعة .. قلت فيه أعلنت الخيانة رأسها .. وقال لى الناس بعد كده إنت مجنون .. كان البوليس وباهم والجيش وباهم والاتحاد الاشتراكى وباهم .. ورايح أنا الساعة الواحدة .. ده أنا كنت فى بيت أنور السادات .. قلت له حنقك كده .. قال أعمل إيه .. كان هو وحسين الشافعى .. قلت له الوزراء استقالوا .. يعنى يقولوا إنك أنت خائن .. مش ترد عليهم .. نزلت البيان اللي أنبغ الساعة الواحدة والربع .. إذن أنا مش لإنه أنور السادات لإن دى مصر .. أدى علاقتى بأنور السادات من حيث هو ممثل مصر وأنا مواطن أحب مصر ولازم أف معاه .

• ويقول عبد اللطيف بغدادى : « واستمر أنور السادات بقى يحكم .. لما جاءت عملية مراكز القوى دى هنأناه وكان ده موقف تأييد له .

- وأسأل حافظ إسماعيل : ثورة التصحيح كنت موافقاً عليها ولا ضدها ؟
- « هي مش ثورة تصحيح .. هي صراع على السلطة .. بعد وفاة جمال عبد الناصر كان الرئيس السادات صاحب السلطة .. وكان هناك رجال جمال عبد الناصر بدون ذكر أسماء .. وكان الصراع ما بين هؤلاء ومن منهم يدير مصر » .
- وتغلب في النهاية الرئيس السادات وبعد كده استدعاك وانضمت إلى صفوف المجموعة الساداتية .. المجموعة الناصرية رُج بها في السجن .. كنت مؤيداً أم معارضاً هذا ؟
- « أؤيد الرئيس نعم .. لإنه اختيار شعب .. وإذا قال الشعب كلمته على هذا الأساس .. استفتاء .. السادات استفتي عليه .. وكسب الاستفتاء وأصبح رئيساً للدولة » .
- ويقول د . مصطفى خليل : « سيطرة النفوذ الشيوعي على مقدرات البلد كان يهدد النظام .. وهنا اجتمعت هذه المجموعة واتصلنا بالرئيس السادات وقتلنا له إحناء عاوزين نقف وراءك في هذا الصراع .. وكتبنا فعلاً الشيء اللي سماء بالعريضة .. وراح الرئيس السادات وانكلم عنها في مجلس الشعب بعد كده » .
- وأسأل سامي شرف : الدكتور حاتم أخذ ما يخصه من الخزينة ؟ ما صحة هذا الكلام الذي جاء على لسانك ؟
- « مش من الخزينة .. هو أخذ ما يخصه من سكرتارية رئيس المعلومات .. أنا كنت في السجن يُسأل هو أو أسأل اللي كانوا فيه » .
- وعرفت هذا الكلام منين ؟
- « لما خرجت من السجن سنة ٨١ فيه بعض الموظفين جاءوا لى هنا بيزوروني .. حمد الله على السلامة ومش عارف إيه والكلام جاب بعضه .. فلان جاء وفلان جاء وما أخنَش يعني هم ٣ اللي دخلوا المكتب بأوامر من السادات .. الدكتور عبد القادر حاتم ومحمد عبد السلام الزيات الله يرحمه ومحمد حسنين هيكل .. دول الموظفين قالوا لى .. عبد القادر حاتم أخذ ما يخصه .. إيه اللي يخصه ما أعرفش ؟ محمد عبد السلام الزيات بص في ملفه وقله تاني .. والأخ محمد حسنين هيكل صور المكتب كله ! »
- الملفات دي عن الأشخاص كانت علشان إيه ؟
- « افترض بقى الدكتور عبد القادر حاتم ده رجل كان وصل لدرجة نائب رئيس وزراء للثقافة والإعلام فيه اتفاقيات بيعملها .. فيه أحاديث صحفية بيعملها .. فيه ده نظام « سكاوتينج » إن كل واحد بيعمل شيء أو ينسب له شيء .. بيتخط في الـ FILE بتاعه .. وإن فلان كُلف بكذا وبكذا وإن فلان عمل كذا وإن فلان صرح بكذا وإن فلان سافر لكذا .. صدر قرار جمهوري بتعيينه .. إذا كان بعض الناس في ملفاتها شيء ضدهم كانت بتتخط في هذا الملف .. فيه ناس

كان فيه حاجات ضدها من تقرير أجهزة المباحث .. تقرير من الرقابة الإدارية .. من المخابرات .. يبتحط فى الملف بتاعه » .

- **وتقول هدى عبد الناصر :** « سمعنا أخبار الاعتقالات من الراديو » .
- **هى بدأت بتقديم الاستقالات .. من جميع رجال الرئيس عبد الناصر ؟**
- **« فعلاً .. ولم نعرف لماذا وقتها .. وأنا شخصياً كنت قد استقلت بعد وفاة والدى مباشرة » .**
- **وأسأل أنيس منصور :** وكيف انقصر السادات على مراكز القوى فى ٧١ ؟

• **« هو .. إحسان عبد القدوس له تعبير عن أنور السادات كان ببضايقه وأنا كنت بأنضايق من إحسان برضه .. إحسان أحد كبار المحللين السياسيين فى تاريخ مصر .. ولكنه بشر وفنان كان يقول لك إن أنور السادات ده رغم إنه بيحكم مصر لكن بيتصرف كأنه متآمر عليها .. تأمره أو إحساسه بالتآمر ده لم يفارقه أبداً .. يمكن حرمه من متعة .. وحكاية إنه كان بيتآمر على ناس ويتخلص منهم ده عز الطلب .. يعنى إدوا له فرصة فلمهم جميعاً فى سلة واحدة .. ويتصرف بمنتهى الهدوء يعنى هذه لعبته .. كيف يعملها أنا لا أعلم لكن طبعاً ده رجل محترف » .**

- **وأسأل نجيب محفوظ :** ماذا تقول عن ما سميت بثورة التصحيح ؟
- **« مش هى دى اللي السادات قبض على مراكز القوى ؟ »**
- **بالضبط ..**
- **« لا دى كانت نقل سلطة لسلطة .. يعنى كانت لحظة حاسمة .. إما جهاز عبد الناصر يستمر .. أو السادات يقلعه » .**

- **إيه رأيك فيها .. توافق عليها أو لك تحفظات ؟**
- **« هى كانت تمشى مع التطور خلاص » .**
- **ويقول مصطفى أمين :** « كان لابد منها .. لأن كان يجب أن تكون ثورة التصحيح دى بعد النكسة مباشرة .. إنما تأخرت عدة سنوات » .

• **ويقول مصطفى كامل مراد :** « كانت فترة عصبية جداً .. وأنا شاركت فيها من الناحية البرلمانية فى مجلس الشعب وأخذنا قراراً بإسقاط الرئيس والوكيلين و ١٣ عضواً .. المجموعة التى كانت منضمة إلى على صبرى .. طبعاً ده كان إجراء ثورى .. يمكن المرة الوحيدة فى تاريخ البرلمانات المصرية من سنة ١٨٦٦ حتى النهارده .. إنما هى كانت انتفاضة الغرض منها التحول من الأوضاع الاشتراكية إلى الأوضاع الليبرالية .. وكان لابد من إزاحة العناصر المعارضة .. فكان لابد أن يزيج هؤلاء الناس من طريقه .. وفعلاً تمكن .. الظروف مكنته

بطريق الحظ أكثر من أى شيء آخر .. إنما هى كانت حركة تصحيحية الغرض منها الخروج عن الخط الاشتراكي والاستعداد لحرب ٧٣ » .

* ويقول سامى شرف : « تركنا له الساحة بمحض اختيارنا لاختلافنا مع توجهاته ومع أسلوب العمل » .

* فى ١٥ مايو احتفل السادات بانتصاره على جميع أعدائه الذين أطلق عليهم اسم « مراكز القوى » .. ونجح فى أن يدخلهم السجن بعد اكتشافه عملية تسجيلاتهم .. وكان على رأس القائمة سامى شرف مدير مكتب عبد الناصر ، ولبيب شقير رئيس مجلس الشعب ، وشعراوى جمعة وزير الداخلية ، والفريق محمد فوزى قائد الجيش ، ووزير الإعلام محمد فائق ، وعبد المحسن أبو النور أمين عام الاتحاد الاشتراكي ...

* ويقول د . محمود جامع : « أثناء محاكمة سامى شرف .. فتح موضوع المصروفات السرية .. وكان سامى قد حصل على مبلغاً لما سئل عنه قال آه أخذته بأمر الرئيس عبد الناصر .. ونظر إلى منصة القضاة وقال : ما إنت يا حافظ يا بدوى أخذت أيضاً لبنائك .. أخذت ألف جنيهاً لكل بنت بمناسبة زواجها .. ثم نظر إلى شعراوى جمعة بجواره فى القفص وقال : ألم تأخذ أنت أيضاً ؟ كنت أصرف أموالاً كثيرة بأمر الرئيس .. وكانت هذه الأموال مصروفات سرية بدون مستندات » .

* وأسأل عبد المحسن أبو النور : هل كانت هناك شرائط وتسجيلات ؟

* « كل ده كلام لا يودى ولا يجيب .. كله خاطيء .. الشريط اللي اتكلموا على أساسه .. هو عبارة عن شريط بين شعراوى جمعة وفريد عبد الكريم .. بيتكلموا فيه على الوضع فى الاتحاد الاشتراكي .. وأنور السادات واللى بيعمله فى هذه الفترة .. وإنه لا يجب إننا نسكت على هذا الكلام .. حديث متبادل بين شعراوى جمعة وفريد عبد الكريم لا أكثر ولا أقل ... مافيهوش حاجة .. ممكن إنك أنت تلمس فيها أى شيء .. لكن أخذت وتعمل عليها هيصة فى الجرائد وإن فيه واحد جاء من وزارة الداخلية وقال الحقوا أنا جايب شريط إيه ومسجل عليه إيه ومؤامرة .. ولا فيه شيء من هذا القبيل .. كانوا أظهروه وهو موجود دلوقتى معروف .. مافيش حاجة من هذا القبيل إطلاقاً » .

* حضرتك بعدت بعدها ؟

* « أنا بعدها بعدت آه » .

* وأسأل طه زكى : لعلك الرجل الأول فى حادثة ١٥ مايو وقطعاً الذكريات كثيرة والكلام كثير .. فلنبداً حديثنا عنها ؟

* « سأكلمك إن شاء الله من الذاكرة اللى الأحداث دى محفورة فيها .. لأن باعتبارها تغيير مسار فى منطقة الشرق الأوسط بكاملها .. لأن زى الرئيس السادات ما قال - الله يرحمه - إن ١٥

مايو كانت بداية ٦ أكتوبر ولولا ١٥ مايو ما كان ٦ أكتوبر العظيم .. أنا كنت ضابطاً صغيراً فى مكتب من مكاتب إدارة المباحث العامة وقتها .. شغلنا مراقبة التليفونات سوء بأوامر قضائية أو بتكليف من النيابة العامة اللى بنعمل فيها ضابط من ٣ ضباط ولنا رئيس مكتب .. بعد وفاة الرئيس عبد الناصر - الله يرحمه - تولى الرئيس أنور السادات السلطة .. ويعنى كان فيه أقوال عديدة إن دى مرحلة انتقالية وإن فيه مراكز قوى فى الدولة وإن وإن .. فعلاً المكتب اللى كنا بنشتغل فيه ده كان ببسجل العديد من مراكز القوى أو بمعنى أصح هم كانوا بيراقبوا بعضهم فى مكاتيبهم وفى بيوتهم .. كل اللى كان يقدر يعمل حاجة فى الثانى كان بيعملها .. لإن مافيش أمان بينهم وبين بعض » .

* ومن كان المسئول أو الرقيب على ذلك ؟

* « والله إحنا كنا فى هذا الوقت خاضعين لإدارة المباحث العامة اللى كان بيرأسها اللواء حسن طلعت - الله يرحمه - وطبعاً رئيس حسن طلعت كان شعراوى جمعة .. إنما سامى شرف كان عامل له مكتب خاص .. وأحمد كامل فى جهاز المخابرات العامة كان عامل له مكتب ثانى فى جهاز المخابرات العامة .. وال ٣ مكاتب بيشتغلوا ممكن يكونوا على بعضهم كمان .. كنا مكلفين بمراقبة عدد من الشخصيات كان بيدور بينهم أحاديث .. باين منها قوى إن أنور السادات مش عاجبهم .. وإن طريقته مش عجباهم .. وإن قبوله لمبادرة روجرز اللى سبق جمال عبد الناصر قبلها برضه مش عجباهم .. وإن التيار اللى ماشى فيه مش مريح بالنسبة لهم .. والمجموعة دى كان بيرأسها على صبرى - الله يرحمه - ومجموعة مراكز القوى اللى وردت أسماؤها فى المحاكمات اللى جرت .. فأنا كضابط عادى حسيت إن الكلام اللى بيتكلموه بينهم وبين بعض إن السادات مش عاجبهم وسياسته مش عجباهم .. ويعنى بعض الألفاظ اللى لا تليق أن يقال على رئيس الجمهورية كانت بتتردد فى الأحاديث .. ففكرت إزاي الكلام ده ؟ مفروض إن إحنا بنعمل التسجيلات دى ويتفرغ على ورق وبيأخذها رئيس المكتب يودى الأصل لحسن طلعت مدير المباحث العامة .. وحسن طلعت يرفعه لشعراوى جمعة وزير الداخلية .. وصورة ثانية لسامى شرف مدير شؤون رئاسة الجمهورية .. والمفروض كلامهما بيعرض على رئيس الجمهورية إذا كانت الأمور تتعلق بأمن الدولة اللى بنتكلم فيها .. قطعاً لما حسيت كضابط أمن قديم إن الكلام ده كله نقد لرئيس الجمهورية وسياسته مش عجباهم .. بدأت أفكر طيب إزاي أوصل لرئيس الجمهورية علشان الكلام ده أكيد مش ببوصل له .. إحنا مش حاسين إن فيه إجراء بالعكس العملية بتزيد وبعضهم كان بيتكلم كلاماً لا يصح أن يقال على رئيس دولة .. رئيس الدولة رجل محترم وله شرعية دستورية لا يصح إن إحنا نجيب سيرته بأى كلام غلط .. أفكار عديدة انتابتنى فكان لى قريب فى القوات المسلحة عقيد اسمه محمد معوض كان ابن عمى .. فرحت له كنت أسمع منه إنه يعرف ضابطاً اسمه عفت السادات .. وعفت السادات شقيق الرئيس أنور السادات .. فقلت له ممكن يا محمد تجيب لى عفت .. قعد يسألنى ليه .. علشان إيه .. قلت له كفاية إنك توصلنى بعفت .. طيب ليه .. قلت له معلش ده موضوع ماحدش حيعرف عنه حاجة أبداً .. إلا لما أقابل الرئيس شخصياً .. فالهمهم اتصل يشوف عفت السادات ..

ما كانش حفظنا موفق فلقى ضابط تاني اسمه أحمد طه .. وده متزوج شقيقة الرئيس أنور السادات .. وجاء أحمد طه وقتل له أنا عاوز ميعاداً من الرئيس .. وراح جاب لى ميعاد .. حسب كلامه .. وإن كان طلع بعد كده مش مضبوط .. لإنه جاب لى ميعاد مع السيد فوزى عبد الحافظ .. ورحت ودخلت للسكرتارية الخاصة بعد ما ركنت سيارتى عند بقالة سعودى كنت شاكك إن أنا بأتراقب برضه .. لأن أنا فاهم إن كلنا بنراقب بعضنا .. واتمشيت ودخلت ببطاقة شخصية .. فيها وظيفتى إن أنا مهندس فى مصلحة التليفونات وباسم علاء الدين .. طلعت نكى .. ودخلت وطلعت عند السيد فوزى .. إيه وعاوز إيه .. قلت له أنا جاي للرئيس .. قال لى أنا السكرتير والرئيس نائم .. قلت له أنا جاي لأمر هام جداً .. وإذا قابلته فيه مصلحة للرئيس ولمصر ولك أنت ولليلد .. طبعاً أنا قلت له أنا بأشتغل إيه .. أنا داخل ببطاقة عمل شخصية مش مضبوطة يعنى مزورة .. والجهاز اللي بنعمل فيه هو اللي زورها علشان نستخدمها .. ودخلت بالبطاقة دى .. وبعدين قلت له على أى حال لما يصحى سيادة الرئيس اتصل بى أو اتصل بك وأجى أقابله .. فقال تتصل بى إزاي .. قلت له أنا اللي أتصل بك لإن تليفوناتك بتتراقب .. لما قلت له تليفوناتك بتتراقب بدأ ينتابه شيء من القلق .. قلت له أنا أخذ اسم ابنك حسام وحأكلمك على إن أنا ابنك حسام وابنك فى كلية العلوم .. عارف المعلومات دى من الشغل .. أقول لك يا بابا قابلنى عند الكلية أروح معاك وأجى أقابل الرئيس .. فرد أحمد طه اللي كان الوصلة فى الوسط .. قال لأ أنا أخذ تليفونات فوزى بك وهو يكلمنى وأنا أكلمك .. قلت له أنت مش دلوقتى طلعت كذاباً تبعد عن هذا الموضوع خالص مالكش دعوة بالعلية دى .. لإنك هممتنى إنك جايب ميعاد مع سيادة الرئيس وكلامك طلع مش مضبوط .. المهم حصل بنى وبينه شيء من الشد الخفيف .. قلت له يا أحمد كتر خيرك ولغاية كده كفاية .. ولعل نزلت وبعد كده كلمت السيد فوزى وقابلنى عند كلية العلوم .. فى الوقت ده ما كانش معابا شرائط نهائى .. كله فى الذاكرة وطلعنا قابلنا سيادة الرئيس .. وأذكر إنها كانت فى فراند فى البيت اللي على النيل الحالى ده .. وقعد الرئيس على كنبه وقعدت جنبه على كرسى والسيد فوزى كان واقف وأنا ما كنتش قلت لحد نهائى .. يعنى فوزى لم يعلم أنا جاي ليه .. إلا فى اللحظة دى لما بدأت أحكى للسادات .. فحكيت له المعلومات اللي عندى اللي هى مجمعة تقريباً عما يدور من مؤامرة ومن محاولة للتخلص من حكمه ومن النظام .. وبعدما خلصت قال لى الرئيس بالحرف يا ابنى - ولا أنسى هذا الحديث لأن أنا سجلته مع السيدة سامية صادق فى برنامج فتنان شاي .. ولازال مسجلاً وسيادة الرئيس السادات سمعه ومصر كلها سمعته .. فأنا لا أستطيع أن أغير كلمة واحدة منه - السادات قال لى : « بس يا ابنى بعد ما جمال مات شعراوى وسامى واقفين جنبى كويس جداً وبishtغلوا كويس .. وأنا لو أصدق كلام أى واحد يحكى لى زيك كده أحاط نصف البلد فى السجون .. معاك دليل » .. قلت له يا أفندم الدليل موجود .. بس ما أقدرش أحصل عليه لأن لما بأسجل الشريط بأكتب عليه حنة صغيرة « بين فلان وفلان » بين « السيد طارق حبيب وطه زكى » .. أياً كان .. بين « شعراوى جمعة وفلان » .. بين « على صبرى وفلان » وبياخذه رئيس المكتب يخفيه فى « شانون » كبير وهو الوحيد اللي بيعرف الـ Code Number السرى بتاع الأقفال .. يعنى أنا والضباط الاثنين اللي

معايها ما نعرفش عنه حاجة .. إحنا بنفرغ الشريط وبعد كده هو ببشيله فى الشانون ويقفل بالقلقل ويحفظ به نفسه .. فما أقدرش أجيبه .. وأنت سيادتك رئيس الجمهورية تقدر تجيب الغرفة باللى فيها .. فالحقيقة لما قال لى يا ابنى شعراوى وسامى واقفين جانبى كويس وببشغلوا كويس .. أنا الحقيقة بدأ بنتأبى شىء من الخوف .. فلما قال هذه الكلمة بدأت زى اللى بيصايب بحالة عمى جزئى لمدة ثوانى .. هو يبدو بما كان فيه من حس متقدم استشعر هذا .. بص لفوزى عبد الحافظ وقال له يا فوزى لو جاء طه فى أى وقت أو تكلم فى أى وقت يدخل لى حتى لو كنت نائماً .. بدأت أحس إن كلامى لقي عنده قبول وإلا ما كانش يقول كلمة زى دى أنا إيه يعنى ضابط صغير فى المباحث العامة يصحى رئيس جمهورية .. إلا إذا كان رئيس الجمهورية وجد فيه كلاماً صادقاً .. المهم نزلت وأنا فى حالة نفسية مش مستريحة .. إنما بدأت أفكر أجيب الشرائط دى إزاي .. وما أعرضش بقى فكره فيه إيه .. هو كان بعيد النظر وكان دائماً هادئ فى الترتيب .. يعنى يرتب بهدوء زى ما رتب لأكتوبر العظيم كده بهدوء .. فشاء ريك وأنا بأعتبره دائماً جنب مصر وكان جنب السادات .. فوجدت رئيس المكتب قال لى يا طه خالتي توفيت ومضطر أسافر وأخذت ثلاثة أيام أجازة .. أنا حادىلك الأرقام السرية بتاعة الشانون ولما أرجع أبقى غيرها بس ما تعرفهاش لأحد .. وسافر بلدهم وفتحت أنا الشانون بعد ما نزل وأخذت ثلاث شرائط كنت حافطها طبعاً .. فى شنطلى الجلد وخرجت إلى الشارع .. وكلمت فوزى عبد الحافظ على إنى حسام ابنه وجاءنى عند كلية العلوم ورحنا للرئيس .. والسيدة جيهان السادات أحضرت من بيت محمود أبو وافية زوج شقيقتها جهازاً يصلح لنوعية الشرائط دى .. وبدأ السادات يسمع يمكن من ٩ مساء حتى الفجر تقريباً .. وكانت هذه الشرائط بتحكى عن المؤامرة بالكامل بما فيها الألفاظ البذيئة اللى كانوا بيطلقوها .. كان بين شعراوى جمعة وواحد اسمه فريد عبد الكريم .. كان أمين التنظيم فى الجيزة .. وبين محمود السعدنى الصحفى وبعضهما .. وبين سامى شرف وبعضهما وعلى صبرى .. مجموعة من هذه المجموعات أغلبها أحاديث إنهم مش عاجبهم نظامه وإن الوحدة مع ليبيا مش عارف إيه ومبادرة روجرز دى تراجع .. وهم فى الواقع كان لهم اتجاه معين يسارى وكلنا يعلم هذا ما فيش كلام فكان مش عاجبهم طريق أنور السادات .. كان فيه تجاوزات عديدة فى الأحاديث ما يصحش أنكرها لإن عيب نذكر .. كلام لا يصح يقال من مسئول على رئيس دولة تتمثل فيه الشرعية الدستورية .. فالمهم السادات بعد ما خلس الاستماع .. ومنها مثلاً « لو فكر يروح الإذاعة على صبرى يقول لشعراوى - رد عليه وقال أعقله » .. كلام زى ده عيب حتى إننى أعيده .. إنما طلع منى عفواً .. لإنه لا يصح أن يقال على رئيس جمهورية من أعظم الرؤساء فى العالم .. وبعد ما خلصت قال لى يا ابنى كل ده عندك وجاى .. وقال لى إنت جاى ليه .. قلت إيمانى بك وبوطنيتك وبوطنيتى وببلدى وإيمانى بالله أكثر من الكل .. وأنت الرئيس الشرعى والشرعية الدستورية فى مصر فيك مش فى أحد تانى .. وجاى لك علشان تنفذ البلد فى الوقت المناسب والوقت اللى تراه .. قال لى طيب روح لشغلك وإذا جد جديد ابقى تعالى .. فعلاً بدأت أتردد على بيت السادات مرات عديدة لإن الحكاية ما كانتش ليلة .. الكلام ده كان فى أوائل مايو يمكن يوم ما أقال على صبرى من جميع المناصب اللى كان بيتولاها وطلعت فى الجرائد بعد الاحتفال

بعيد العمال في أول مايو .. زى الرئيس ما قال كانوا عاملين زى حكاية « سينما أونطة » يلعبوا برجليهم ويطلعوا له صور والكلام ده ما يصحش يعنى .. فبدأت أتردد إلى أن جاء يوم ١٣ مايو واستدعى السيد ممدوح سالم من الإسكندرية .. وجاء ممدوح سالم - رحمة الله عليه - وأعتبره أعظم من تولى السلطة في هذه البلاد نظافة وأمانة ونزاهة وعلماً .. تولى السلطة كوزير داخلية .. والسادات حدد إقامتهم جميعاً في بيوتهم .. وبدأت الأمور تأخذ مجراها .. وقتها أخذوني أنا وزملائي على إن إحنا بنسجل وما حدش عارف إن أنا عملت حاجة .. حتى السيد ممدوح سالم كان الرئيس قال له اللى جاء لى ضابط اسمه فلان .. فيقول لى أنا بأشكرك .. قلت له على إيه .. قال لى على اللى عملته .. قلت له أنا ما عملتش ولا أعرف حاجة .. قال لى لأ ده الرئيس قال لى .. كلمة معينة كان قالها لى فى الحديث قلت يبقى صحيح .. قال إنت على كل حال اللى عملته ده يرفع رأس الشرطة كلها .. ودى حاجة لبلدك كويسة .. قلت له ده يا أفندم إحساس ببنى مسلم فى بلد مسلم ورئيس شرعى ودستورى .. والناس دول كان اتجاهم نظام يسارى .. والناس اليساريين ما يعرفوش أصلاً إن فيه ربنا » .

• **ويقول أمين هويدى :** « فى ١٥ مايو أنا لم أكن فى الحكم .. أنا كنت رفضت أن أشارك فى الوزارة الثانية بتاعة الدكتور فوزى وبقي التعديل الوزارى مؤجلاً ٣ أيام لمحاولة إثنائى عن قرارى » .

• **مين اللى كان بيحاول يثنيك ؟**

• « من أول الرئيس السادات للسيد حسين الشافعى .. وكل الإخوة اللى كانوا موجودين .. أنا كنت بأعتقد إن الرئيس السادات له ظروفه أو طريقه وعلينا أن نخلى له الطريق .. لكى يكون حر التصرف فى هذا .. ولذلك فى نوفمبر ١٩٧٠ تركت الحكم .. وحينما قامت عمليات ١٥ مايو كنت خارج الحكم .. لكن الصراع بدأ وكان صراع سلطة بدأه الرئيس السادات باتخاذ قرارات منفردة عن الجماعة .. وأنا لم أكن من ضمنها .. لإني تركت كل شىء وتفرغت إلى التأليف والكتابة والزراعة .. عندى حنة أرض بقيت أزرع فيها وأكتب وطلعت أرامها « كيف يفكر زعماء الصهيونية » .. وانتهى هذا الموضوع إلى ما كان من المحتم أن ينتهى إليه بأن السادات انفرد بالسلطة .. و « قش » الناس كلها داخل السجن وحاكمهم فيما يسمى بقضية ١٥ مايو » .

• **وأسأل طه زكى : الرئيس السادات أحرقت الشرائط يوم ١٥ مايو .. هل كانت فعلاً هذه الشرائط هى الشرائط المسجلة ؟**

• « الشرائط المسجلة أخذتها النيابة العامة علشان تبأشر بحث القضية .. أغلب الشرائط دى كانت لأسر كريمة وستات محترمة وناس محترمة .. وكانوا بيطلبوها لأغراض شخصية .. الإنسان يعف عن أن يذكرها لإنها كانت بتمس أسر كريمة وأسرار شخصية .. لا يصح .. ربنا سبحانه وتعالى قال ﴿ ولا تجسسوا ولا يغتب بعضكم بعضاً .. أحبب أحدكم أن يأكل لحم أخيه ميتا فكرهتموه واتقوا الله إن الله تواب رحيم ﴾ .. كلام ربنا .. افترض إنى رجل أغلط فى حق نفسى .. انت مالك ما ربنا حياسبنى حتاسبنى إنت ليه .. وقامت ثورة ١٥ مايو والسادات

حدد إقامتهم وبعدين تولت النيابة العامة التحقيق .. وبعدين اتقدموا للمحاكمة وكل واحد أخذ جزاءه وبدأت البلد تأخذ مساراً جديداً .. والشعب كله طلع يبارك ما اتخذه أنور السادات من إجراءات .. السادات عرض على حقيقة وقتها مكافأة مالية .. الله أعلم بمقدارها .. إنما أعتقد كانت مكافأة كبيرة .. رفضتها مش عن غنى .. أنا رجل متوسط الحال والحمد لله .. لكنى اعتبرت العمل اللي أنا عملته لبلدى مش لحد تانى .. كان ثمنه حياتي لو كنت كشفت .

• **ويقول سامى شرف :** « عندما قدمت الاستقالة كنت أعرف إننى سأسجن » .

• **ويقول جمال حماد :** « كم كان القدر ساخراً حينما التقى أفراد هذه الجماعة التى أطاح بها السادات بأفراد جماعة المشير عامر الذين كانوا يمضون مدة العقوبة فى سجن « أبو زعبل » » .

• **ويقول حافظ إسماعيل :** « هو عندما استطاع اخماد التحرك الداخلى أعاد تنظيم سياسة الجمهورية واستدعائى .. كنت فى الخارج .. كنت أزور دول الشمال رسمياً لأنقل إليهم وجهات النظر » .

• **ومع صدور الدستور فى سنة ٧١ عاد اسم « مصر » فأصبحنا جمهورية مصر العربية .. وأصبح حافظ بدوى رئيساً لمجلس الشعب ..**

• **ويقول ثروت أباظة :** « منذ اليوم الأول الذى وضع فيه أنور السادات قدمه على بساط الحكم أصبح فيه روح مخففة .. فيه قدر من الحرية » .

• **وبدأ السادات يستخدم فى سنوات حكمه الأولى السياسة والدبلوماسية إلى جانب العسكرية .. وكان حريصاً على استقلال القرارات السياسية عن القرار العسكرى ..**

• **ويقول د . عبد العظيم رمضان :** « وكان هذا دليلاً على أن السادات رجل محتك وصاحب خبرة طويلة » .

• **وعين الفريق صادق رئيساً للمخابرات خلفاً لأحمد كامل .. كما عين الفريق سعد الدين الشاذلى رئيساً لأركان القوات المسلحة ..**

• **ويقول الفريق سعد الشاذلى :** « عندما توليت رئاسة الأركان فى مايو ٧١ .. كان تعداد القوات ما بين ٧٥٠ ألف - ٨٠٠ ألف .. عندما اندلعت حرب أكتوبر كنا وصلنا إلى مليون ٢٠٠ ألف .. إذن زدنا حوالى ٤٠٠ أو ٤٥٠ ألف .. ده مجهود كبير .. إنما لا يلغى المجهود الذى سبقه .. إنما كانت المشكلة الكبيرة اللي قابلتنا واللى لم يحلها الناس اللي قبلنا .. هى مشكلة الضابط والعسكرى .. إنت بتجيب العسكرى وفى خلال ٥ أو ٦ شهور تقدر تخليه جاهزاً للقتال .. وإنما الضابط إزاي .. الضابط بيدخل الكلية الحربية ويقعد مدة ومع كل الضغط يقعد سنة ونصف ويطلع .. وبصيت لقيت عندنا حوالى ٣٦ ألف ضابط ناقص .. والضابط الصغير ده هو قائد ومهندس .. لأن هو لما يكون سريعاً هو اللي بيعلم العساكر بتوعه .. طيب كنا سندخل الحرب إزاي » .

• وأعلن السادات أن عام ١٩٧١ هو « عام الحسم » .. ولم يتلق من الكرملين أى إجابة إيجابية وقامت عليه حرب نفسية شرسة .. وسافر إلى روسيا سراً فى فبراير سنة ١٩٧٢ لاستعجال الأسلحة وحثهم على مساعدتنا .. وهاجمه الطلبة كما هاجمه بعض الكتاب .. وعادت الشائعات وانتشرت النكات الساخرة بعد العام التالى « عام الضباب » ..

• ويقول تحسين بشير : « الرئيس السادات كان مقتنعاً إننا لازم نتصل بالعالم اتصالاً عضوياً .. فكان محتاجاً لأحد يكلم الناس بصراحة وطبعاً يبقى صوتاً واحداً .. الصوت اللى يتقال فى مصر هو اللى يتقال بره .. كان زمان المتحدثين يقولوا كلاماً وبعدين تمنعه الرقابة إنه يطلع فى الجرائد المصرية .. والللى يتقال فى الجرائد الأجنبية لا يقال فى الجرائد المصرية .. استمرينا نعمل لحرب ٧٣ .. وكانت الناس بتنكت عليه ويقولوا « سنة الضباب » .. وكانت عملية توفير الإمكانات لعملية عسكرية محدودة كانت صعبة جداً .. فى الوقت ده جاء لى صديق لى أستاذ فى جامعة « بيل » وقال لى إنتم قاعدین تعملوا حرب .. أملككم فى الحرب ضعيف جداً .. فقلت له لا إحننا لنا آمال فى الحرب .. ولكن يختلف عن الأمل بتاعكم » .

• ويقول د . عزيز صدقى : « النقطة الثانية يوم ما جئنا كان فيه اضطرابات فى الجامعة .. وأنا فى أول جلسة لمجلس الوزراء قلت لهم واضح إن فيه هناك فجوة من الثقة بين الشعب والحكومة .. مش حنقدر نشغل إلا إذا استعذنا الثقة .. ولذلك بدى أقول حاجة فى أول جلسة .. الوزير اللى حيدلى بتصریح ولا ينفذه أسف حاشيله .. فالتزمتنا جميعاً بهذا .. وأعتقد كتدعيم لموضوع الثقة كانت زيارتى للأقاليم .. وده تقليد أعتمد إنه كان جديداً .. إنت تستغرب إن مثلاً الرجل اللى عايش فى سوهاج ده ما شافش الحكومة .. والحكومة عنده العدة أو المحافظ .. لما تنتقل الحكومة كلها فى اجتماع شعبى وأى أحد يقف ويسأل سؤالا ورئيس الوزراء يرد عليه والثانى يرد عليه .. ودى هى الثقة فعلاً .. ما عندكش فكرة هذه الزيارات عملت إيه .. لأن الناس استجابت على طول .. والمهم إن القرار اللى أخذناه كنت بأرجع أعقد مجلس الوزراء وأخذ قراراً تنفيذياً .. كل ده كان مقصوداً به إيجاد الثقة بين الشعب والحكومة .. وأعتقد إن الاثنين دول .. تنفيذ خطة إعداد الدولة للحرب .. واسترجاع الثقة مع الشعب .. هما الحاجتان المهمتان اللى أمكننى أن أحققهما » .

• ويقول د . عبد القادر حاتم : « لما كان باستمرار يقولوا مظاهرات جامدة فى مصر وتنهف بسقوطنا كنت بأبقى فى منتهى السعادة .. الكتاب كتبوا وقالوا وهاجموا الحكومة .. كنت فى منتهى السعادة .. دى بتبين إننا بنتنجح وإننا لسنا جثة هامدة » .

• وأسأل جمال السادات : أعلن الرئيس السادات أننا حنحارب وبعدين تعدى السنة وما نحاربش .. ماذا كان رد فعله من ثورة الناس ؟

• « دى بعض الحاجات اللى كنا نشوقها فيه من الهدوء والاستحمال .. ما كانش حاجة بتبان عليه خالص .. وكان يأخذه فى نفسه ويهدوء جداً وما يفقدش أبداً الهدف بتاعه ولا السكة اللى هو عاوز يمشى فيها » .

• **ويقول سعد الشاذلي :** « هناك شواهد تدل على إنه لم يكن رغباً في الحرب سنة ٧١ وسنة ٧٢ .. وأذكر المؤتمر اللي اتعمل في القناطر الخيرية في يونيو سنة ٧٢ .. كان الغرض من هذا المؤتمر هو قراءة تقرير كتبه رئيس جهاز المخابرات العامة اللي هو كان أحمد إسماعيل في ذلك الوقت .. أحمد إسماعيل .. في يونيو ٧٢ كان قائد القوات المسلحة ووزير الحربية هو الفريق محمد صادق .. يبدو إن أحمد إسماعيل عرف بالخطة السرية اللي إحنا ما قلناش لأحد عليها .. الله أعلم عرف منين .. أنا النهارده بأشك في إن يمكن محمد صادق هو اللي قال له .. اللي هو كان وزير الحربية .. لأن التاريخ بتاع أحمد إسماعيل يقول جهاز المخابرات تبع رئيس الجمهورية .. فيعت لرئيس الجمهورية يقول له « نحذر من قيام القوات المسلحة بأى عملية هجومية .. لأن الفرص للقيام بهذه العملية الهجومية هو جر القوات المسلحة إلى معركة غير متكافئة يتم فيها تدمير القوات المسلحة » .. ودى كانت فكرة مين .. محمد صادق .. إذن وجود هذا التقرير من أحمد إسماعيل وتمشي مع فكر محمد صادق بوحى بأن محمد صادق احتمال أن يكون هو اللي قال لأحمد إسماعيل .. أنا لما سمعت هذا التقرير قلت له لا أستطيع أن أغامر لأن القوات الجوية الإسرائيلية قوية وإننا لا نفدر نقوم بعملية هجومية .. ولكن نحن نستطيع أن نقوم بعملية محدودة يكون الهدف منها العبور وتدمير خط بارليف واحتلال ١٠ أو ١٥ كيلو .. السادات لما سمع كلامى هذا وسمع التقرير بتاع أحمد إسماعيل ورأى محمد صادق المؤيد .. كان المفروض أن يتخذ قراره أنه مع الحرب أو ضدها .. لم يتخذ قراراً .. قد يتكلم كلاماً عاماً .. لا يفهم منه التأييد أو الاعتراض .. فعلاً إحنا يجب قبل أن نقوم بالحرب .. يجب أن نتأكد بأن لدينا القوات التى تستطيع أن تنفذ المهمة .. ولكن ما هو الحل إذا فرضت الحرب علينا .. وكلام إنشاء لا يؤيد وجهة نظر الشاذلي ولا يؤيد وجهة نظر محمد صادق وأحمد إسماعيل » .

• **وجاء بودجورنى لزيارة مصر ، وعقدنا معاهدة الصداقة والتحالف مع الاتحاد السوفيتى التى كان عبد الناصر متردداً فى توقيعها ..**

• **ويقول حافظ إسماعيل :** « السوفيت شعروا إن مصر بتعمل يميناً .. فجاء بودجورنى ومعاه مشروع اتفاقية كان عبد الناصر طلبها .. مشروع اتفاقية فوقها السادات .. مشروع اتفاقية تطالب الطرفين بالتشاور السياسى .. وتطالب الاتحاد السوفيتى أن يعطى الأسلحة اللازمة لإزالة آثار العدوان .. مش لاحتلال إسرائيل » .

• **ويقول د . مصطفى خليل :** « كان السادات شخصية عميقة .. وأنا بأعتقد إنه أخذ هذا الوضع بتوضيح للاتحاد السوفيتى لإنه بعد كده ألقى المعاهدة .. كما طلبنا في « الورقة » .. ويوم من الأيام يكشف النقاب عنها .. كانت موجبة إلى مساندته ولكن أمام الرأى العام هو بيثبتها على إن مجموعة من الناس جاية وعازمة تفرض وصايتها عليه .. وهذا غير حقيقى .. وبعد كده تكشفته له الحقيقة فقاربنا فيها لدرجة كبيرة » .

• **وإزاد ضيق الشعب المصرى من حالة اللاسلم واللاحرب .. واتسعت الفجوة بين مصر وروسيا ..**

• **ويقول د . يونان لبيب رزق :** « وفى ٦ يوليو أعلن السادات الاستغناء عن ١٥ ألف من الخبراء العسكريين السوفيت وطالبهم بالعودة إلى بلادهم خلال أسبوع » .

• **ويقول د . عبد العظيم رمضان :** « أدرك السادات أن الاتحاد السوفيتى مستريح لحالة اللاسلم واللاحرب .. وفى الوقت الذى يقرر فيه السادات أن يبدأ فيه الحرب مع وجود قوات سوفيتية فى مصر .. ولو حدث نصر لمصر سينسب إليهم .. وكان إخراج الخبراء السوفيت هو التمهيد الحقيقى للحرب » .

• **ويقول أمين شباكر :** « طرد الخبراء الروس كان موضوعاً منطقياً جداً .. لأن اتضح إنهم كانوا عاوزين إن إحنا نبقى فى هذا الوضع اللى كانت أمريكا عاوزانا نبقى فيه .. كانوا عاوزين البلاد العربية تبقى بلاد مهيشة الجناح وهم يقدروا يتغلغلوا فيها واحدة بعد الأخرى .. فوجودهم فى مصر كان حيسم لهم إنهم يدخلوا فى البلاد الأخرى .. وعملوا كده ودخلوا السودان ودخلوا العراق ودخلوا سوريا .. وكما تأكد لى بعد الفترة اللى هى سنة ٦١/٦٠ إن أى دولة كبيرة بتديك سلاح بتضع فى تفكيرها إنها تدخلك فى الاستراتيجية بتاعتها فى المنطقة بتاعتك وتشغلك لحسابها .. حتى ولو كان هذا على حساب مصلحتك .. بس هم بيقدّموا طلباتهم أو مقترحاتهم بصورة ما تخلّص تحس إنهم متجاهلين مصلحتك » .

• **ويقول فضيلة الشيخ محمد متولى الشعراوى :** « التاريخ الذى لا أنساء ولا أزال كلما أذكره أدعو لصاحب الفضل فيه هو إلغاء التواجد الروسى بدون آثار سيئة .. هذا موضوع هزنى ولا أنساء للمرحوم أنور السادات .. ويمكن هذا هو السبب فى أننى قبلت أن أشارك معه فى الوزارة » .

• **وأسأل سيد مرعى :** بعد طرد السوفيت أصبحت الأمين الأول للجنة المركزية .. فإيه دور حضرتك فى ذلك الوقت ؟

• « دى قصة غريبة قوى .. الرئيس السادات اختار سيد مرعى كأمين للاتحاد الاشتراكى .. فى هذا الوقت كانت اشتراكية وشيوعية .. يبقى طبعاً اختيار سيد مرعى فيها ده غريب شوية أو له Indication « مدلول » معين .. فى هذا المدلول أنكر إن سفير الاتحاد السوفيتى وقتها كان اسمه فلاديمير .. قيل ما أتولى كان قبل منى واحد .. لا داعى لذكر الأسماء .. ميلال شوية لناحية اليسار .. فالرجل فلاديمير أحب ينتخب وفداً يروح زيارة إلى الاتحاد السوفيتى فأخذهم كلهم شيوعيين .. فأول ما جاءنى فى أول زيارة ويكلمنى السفير السوفيتى طبعاً هو مش مستطغنى ولا مستلطف وجودى فى الاتحاد الاشتراكى .. فطلع ورقة وقال لى ده الكشف اللى حيسافر كوفد الاتحاد الاشتراكى .. قلت له ده أمر ولا إيه الحكاية .. قال مش أمر .. وكان متغافاً على كده مع السكرتير .. وقلت له إذا كان ده الكشف اللى حيسافر كده لا أقبله .. وفعلاً هو كان جايب من اليسار خالص وأنا الكشف اللى عملته يمين متطرف .. وحصل الصدام » .

• **وأسأل أمين شباكر :** هل عبد الناصر هو اللى أتاح للروس التغلغل فى إفريقيا وفى الشرق الأوسط فى نظرك ؟

• « مافيش شك علاقتهم بعبد الناصر ساعدتهم فى إنهم يتغلغلوا فى عدد كبير من الدول الإفريقية والدول العربية قبل الإفريقية » .

• **يقول د . مراد غالب :** « أنا حاقول لك بصراحة .. مافيش أحد يعرف هذا الكلام غير عدد بسيط جداً .. وحاقول لك ليه كنت ضده .. يمكن ما كانش لى فرصة إن أنا أوضح ده وما بأحيش أكتب مذكرات .. ما أحبت أكتب عن واحد صديق لى وقال لى وقتل له .. بأجد إن دى ماهياش مريحة بالنسبة لى .. الحقيقة كنا اتكلمنا مع الرئيس تيتو على أساس إلغاء الوجود العسكرى السوفيتى مقابل انسحاب إسرائيل من الأراضي المحتلة .. للأسف والنظام كان طبيعته كده على أى الحالات .. أنور السادات نفسه ما كانش عارف الحكاية دى .. فلما طرد الخبراء السوفيت قلت له يا ريس إزاي نعمل كده .. القصة كذا وكذا .. ده إحنا إيدنا لهم ذهباً ببلاش ويجب إن إحنا نشوف إيه اللى ممكن نأخذه قصاد إنهاء الوجود العسكرى السوفيتى » .

• **وأسأل حافظ إسماعيل :** طرد الخبراء السوفيت يؤيده أم تعارضه ؟

• « الخبراء السوفيت حضروا إلى مصر فى أوائل سنة ٧٠ بناء على طلب الرئيس عبد الناصر .. وطلبهم يدربوا أطقم مصرية تحل محلهم ويمشوا .. وبعدين طلب منهم تأجيل ترحيلهم ٦ شهور .. ودى كانت تتفق مع الـ ٦ أشهر اللى قال عليها .. طلب منهم تأجيل ترحيلهم .. إذن قرار استبعاد الخبراء السوفيت كان صحيحاً ولكنه نفذ بأسلوب كان من الممكن أن يكون أفضل .. فاتخاذ قرار طردهم كان لهذا الغرض .. ولو إن أشار الأمريكيون بواسطة كسينجر وأعطوا الانطباع إن وجود السوفيت فى مصر لا يشجع أمريكا أن تتقدم » .

• **ومما هو جدير بالذكر أنه بعد طرد الخبراء السوفيت .. لم تنقطع الصلة بين مصر والاتحاد السوفيتى بل توطدت .. فقد جاء لمصر سلاح أكثر ..**

• **ويقول الفريق سعد الشاذلى :** « مافيش أحد كان ضد الروس .. كلنا كنا مع الروس .. لإن هم الوحيدين اللى بيدونا السلاح .. ومن غيرهم ما كانش فيه حرب ٧٣ » .

• **ويقول د . مراد غالب :** « ابتدئنا نتصل مع الاتحاد السوفيتى ثانى .. وابتدا المشير أحمد إسماعيل راح برضه هناك .. وابتدت عملية إعادة العلاقات مرة ثانية .. وأخذنا منهم صفقة الأسلحة الكبرى اللى إحنا دخلنا بها حرب ١٩٧٣ » .

• **وكما عادى البعض السادات عداً أدى إلى ثورة مايو .. فقد اعترض البعض من الجيش وعلى رأسهم الفريق أول محمد أحمد صادق .. مما أثار الضباط فتخلص منه السادات ..**

• **ويقول مصطفى كامل مراد :** « الفريق صادق - الله يرحمه - ما كانش عاوز يحارب .. يقول إن الطيران الإسرائيلى يدمر ويكسر .. فاضطر السادات أن يبعده ويجيب المشير أحمد إسماعيل علشان يتولى قيادة القوات المسلحة ويقوم بحرب أكتوبر » .

• **ويقول سعد الشاذلى :** « لما جاء فى أكتوبر ٧٢ .. أى بعد حوالى ٤ أو ٥ شهور من هذا

المؤتمر وأقال محمد صادق من وزارة الحربية وجاب أحمد إسماعيل .. قال في البيان بتاعه إن هو أقال محمد صادق لإن محمد صادق مش عاوز يحارب .. طيب ما أنت جيت الرجل اللي بيقول نفس الكلام .. إذن القول شيء والفعل شيء آخر .. أنا بأعتقد إن السادات لم يكن راغباً في الحرب سنة ٧١ وسنة ٧٢ .

• **ويقول د . عبد العظيم رمضان :** « كان صادق مختلفاً مع الرئيس السادات في العبور وحرب التحرير .. وكان يرى أن نقوم بحرب موسعة غير محدودة .. وقام بمحاولة انقلاب ضد السادات .. فشلت .. وأنا دخلت مع صادق في حوار طويل وقلت له كيف ندخل حرباً ونحن لا نملك طيراناً يوصلنا إلى سيناء » .

• **واكتسب السادات شعبية بدأت تزيد تدريجياً على مر الأيام .. وبدأ يجرى بعض الإصلاحات والتعديلات في المسار الداخلي لمصر بعد مرور بعض الوقت على ولايته ..**

• **ويقول د . عبد العزيز حجازي :** « كان هناك مهمات واضحة .. المحافظة على المواطن المصري وبالأذات المتوسط علشان لا يقلق .. وبالتالي جنبنا نتيجة هذا في المعركة .. الله أكبر .. كله عنده حماس كبير جداً إنه يحقق الهدف .. وده اعتبره إنجازاً تاريخياً ضخماً جداً » .

• **ويضيف د . عبد العزيز حجازي :** « بعد كده يمكن من ٧٢ بدأنا نفكر في الاقتصاد .. لما أنا توليت نائب رئيس الوزراء .. ودرست العلاقات المصرية العربية .. والعربية المصرية .. المصرية الغربية والسوفيتية .. وأنا وجدت إنه لابد أن يحدث تغيير اللي هو تنوع مصادر السلاح وتنوع مصادر التعامل الاقتصادي .. وده أثار الاتحاد السوفيتي في ذلك الوقت » .

• **ويقول د . عزيز صدقي :** « أحكي لك قصة لطيفة جداً .. أنا كنت في الأقصر وأنا رئيس وزراء .. رحت أفتتح مصنع .. للأسف نزلت لقيت المحافظ جايب طلبية المدارس الصغيرين في الشوارع الموصلة للمصنع .. غيرى قد يسعد بهذا المنظر .. أنا أقسم لك إنى ساعة ما شفت المنظر طيب حناكلهم إزاي دول وحنبلسهم إزاي .. المسألة لما ترى هذه الظاهرة تترجمها إلى ما تعنيه هذه الزيادة اللي حصلت في السكان .. معناها إن إحنا لازم نووفر إمكانيات عمالة وسكن وغذاء وهكذا .. طيب حنجيبه إزاي .. كما ذكرت السد العالي كان لإحداث إصلاح مليون فدان بالإضافة إلى الأرض القائمة .. برغم التوسع ربنا لم يعطنا إمكانيات زراعية أكثر من هذا .. وبنعملها النهارده .. رغم هذه الجهود أصبحنا النهارده بنستورد ٧٠٪ من القمح الذي نأكله .. في يوم من الأيام كنا بنصدر قمح .. ده الطبيعي .. طيب حنجيب ده منين .. ليس أمامك إلا التوسع .. مش معنى ده إنك تعمل أى صناعة .. الصناعة اللي يمكنك أن تنافس فيها ويمكنك أن توفق فيها » .

• **وتفكك كل من منظمة الشباب .. والتنظيم الطليعي ..**

• **ويقول سيد مرعى :** « أول ما جئت الاتحاد الاشتراكي في أول خطاب لي في مؤتمر الاتحاد الاشتراكي ناديت أمام الرئيس السادات .. حتى الرئيس السادات كان ماشفش الخطاب » .

وفوجيء فيه إن أنا أشعر إن الارتباط ما بين الاتحاد الاشتراكي وأجهزة الاتصال بين القمة والقاعدة غير موجود .. وبالتالي يجب التغيير في الاتحاد الاشتراكي .. ضجة كبيرة خالص حصلت لإنهم باصين لى إن أنا يعنى وإن أنا مش شيوعى .. وتكونت اللجان الـ ٩ « اللى هى كانت ميلاد تكوين المنابر أولاً ثم الأحزاب ثانياً .. فكان الرئيس السادات على ما أتصور لما اختارنى فى الاتحاد الاشتراكي كان اختارنى بهدف تغيير سياسة الاتحاد الاشتراكي .. الأمر اللى تم فعلاً » .

* ويقول أمين شاكر : « كل فكر السادات وكل تصوره فى عملية إعادة الجيش وعمل حاجة تذكر له .. العسكرى المصرى قبل عهد السادات كان عسكرياً مجنداً وده كان نصيبه من التعليم أو الثقافة محدوداً جداً مش عاوز أقول إنه كان أمياً .. وكان معرفته بالأجهزة الميكانيكية والكهربائية والإلكترونية معرفة غير موجودة تقريباً .. فعلشان كده السادات جند طلبه الجامعات والمعنيين والمدرسين والطبقة المتعلمة .. وهذه الطبقة هى اللى أمكنها إنها تفهم الأجهزة والمعدات والأسلحة الحديثة .. وهى أسلحة معقدة وليست سهلة .. وأن تستخدمها وتستخلص منها أفضل النتائج .. ودول فعلاً هم اللى عبروا وهم اللى حققوا نصر ٧٣ » .

● وبدأ السادات يخطط جدياً لاسترداد الأرض التى ضاعت بسبب الهزيمة .. وعكف على استكمال بناء القوات المسلحة .. من أجل تحرير مصر .. ومسح عار الهزيمة .. واسترداد كرامة المصريين ورد اعتبارهم .

رقم الإيداع ١٩٩٧/١٤٣٥١
الترقيم الدولي I.S.B.N. 977-5514-746



على الرغم من أن ثورة يوليو ستكمل بعد بضع سنين ، العام الخمسين لقيامها ، فإن الكثير من خفاياها وأسرارها لم يكشف بعد، ولم تتضح كاملة صورة وقائعها وأحداثها المهمة التى امتدت على مدى فترة زمنية طويلة نسبيا وغيّرت وجه المنطقة العربية والعالم الثالث بل وأسهمت فى تحول الموازين العالمية.

ويتضمن هذا الكتاب شهادات سجلها المذيع التليفزيونى اللامع طارق حبيب على امتداد ٥ سنوات، مع ١٢٢ من صنّاع هذه الثورة ومن كانوا شهود عيان مباشرين على وقائعها، تعكس جوانب مختلفة للأحداث التى جرت. وتتفق هذه الإفادات فى بعض الأحيان، ولكنها فى أحيان أخرى تتضارب على نحو صارخ ومثير للدهشة. وهى فى كل الأحوال وبكل ما اتسمت به من توافق وتناقض وحدة وذاتية وموضوعية تساعد على استخلاص صورة أكثر اكتمالا عن حقيقة ما جرى.

وقد كتب مقدمة هذا الكتاب الدكتور يونان لبيب رزق أستاذ التاريخ الحديث والكاتب بالأهرام.

الناشر

مركز الأهرام للترجمة والنشر

التوزيع فى الداخل
الأهرام للتوزيع
ش
30.00
مطابع الأهرام التجارية - قليوب - مصر